

四庫全書存目叢書編纂委員會編

齊魯書社


四庫全書存目叢書

集部
第三九二冊



責任編輯：孫言誠 賀 偉

ISBN 7-5333-0615-5



EB35/11

四庫全書存目叢書·集部三九二

(大陸版·限中國大陸發行)

四庫全書存目叢書編纂委員會編

齊魯書社出版發行

(濟南經九路勝利大街)

廣東精裝印務有限公司印製

787×1092 毫米 16 開本 51.75 印張

1997 年 7 月第 1 版 1997 年 7 月第 1 次印刷

印數 1—100

ISBN 7-5333-0615-5

Z·60 集部定價：127800 圓

集部第三九二冊目次

集部・總集類

古文輯略不分卷(六)

〔清〕曹本榮編

江西省圖書館藏清鈔本

.....

古文輯略不分卷(六)

〔清〕曹本榮編

江西省圖書館藏清鈔本

附《四庫全書總目·古文輯略》
無卷數《提要》

墓誌銘四

明一

故江南等處行省都事追封丹陽縣男孫君墓

銘
明 宋 濂

君諱炎字伯融姓孫氏金陵句容人曾祖某祖文嗣父顯卿皆為儒母洪氏君身長六尺餘面黑如鐵一足偏跛於書少所不通喜雅辨累累数千言常窮一座人人莫不畏其口長於歌詩元正中天台丁君復同郡夏君煜皆詩名君遊此兩人間日夜相切劘益得旨趣下筆一掃百紙可立盡辭彩爛然驚動江東雅好飲酒常與夏君對飲賦詩各務出奇相勝每

得一雋語輒舉大呼譁聲撼四隣所與交皆當時豪傑間出遊四方君既以氣自負常輕視章句儒舉中常自許曰孫炎豈齷齪輩伍邪然卒無容之者竟困而歸歲之乙未今上皇帝渡江來金陵開江南等處行中書省聞君名召見與論君陳元運將終勸上延攬知能士以圖大業上甚悅辟為掾每問以事慷慨激烈所謀多合上心上愈嘉重以為可用戊戌征浙東以帶糧同知池州府事尋改池為華陽府即拜君為知府皆有聲明年十一月召為省都事會震州降

擇鎮安之者咸以震在山海間盜賊憑結非君莫可治上亦才君入省月餘遂命為處州總制踐殺兵馬之柄悉委之不取中報且以省符未署者付之聽其自辟任君從馬入處州時城外七里即賊營先首點重狼嗥虎踞不奉官府約束君至坐廳事驅城中民踞階下諭以元將亡及上起兵意謂民奉法則全否必為蠶粉語甚剴切民皆叩頭流血誓不敢二心退則轉告其鄉民以為孫使君仁且武不比舊官可玩狎君亦不撤屬備諭之孫是役兵來降者相繼于門數月皆化為良民君復擇其驍勇者練為兵時時練習之拔其服眾者為長有寇則率以禽寇事罷散歸為農有所警發馳一符立至軍門無敢或後姦吏巨族素驕橫者歛手吐舌畏之如神不敢出聲語雖在教百里外皆縮氣屏息如臨其家即民賴以安皆謂得孫使君治郡晚時上欲用人而秀民有才者見方戰爭勝負未分皆伏匿山谷中不肯出君患之鉤致一二人問有才者為誰今皆安在錄其姓名為書遣使者招之而劉君基章君益尤為處士所推劇君

最有名亦豪俠負氣與君類自以壯元壯為他人用
使者再往返不起以一寶劍奉君君作詩以為割當
獻之天子我人臣不敢私用封還之為書數千言開
陳大命以諭劉君無以答 則就見君置酒與飲論
古今成敗如傾河峽峽無礙滯劉君乃深歎服曰
某始自以為勝公觀公論議如此基何敢望君既以
口舌安反側郡工方征伐無一兵與壬寅二月苗將
頌甲李乙叛襲君而所練卒亦應之君無援被禽幽
室室中列卒環守脅君降君始之曰若生吾吾能成
若事賀孝知非其本心恐留自遣患遇夜以燭厲斗
酒饋君曰以此與公訣君拔佩刀割厲舉危酌酒仰
天歎曰嗟乎丈夫乃為鼠輩禽然我死義爾賊死內
是拘且不爾食卒恐持劍瞋目擬之君飲酒自如食
竟以其解衣君為曰此紫綺表乃上賜吾者賊勿解
吾當服以死引枕而卧賊俟其睡乃害之時某日也
年三十又幾事聞上嗟悼久之是年某月日以其
喪歸葬金陵南門外聚寶山之陽後二年贈徵事郎
戊申上即帝位念君死事之忠追封丹陽縣男仍命

有司復其家君先娶王女初國兵入金陵不屈死生
一子 誥平次君事親孝與人交緩急可仗有古烈
士風遭時遇變所為可稱道守死不二卒成美名可
謂俊傑雖位不大顯生不永年然忠義之士當與天
地長久不足為君憾也君所為若干卷門人蔣敬誦
次傳於世銘曰
元孝政亂盜若螽蟴牙相割河漢江淮中間飛一
龍誰其輔之惟群雅雅維時孫君起章遂齒牙差差萬劍
鋒陸前論事聲震繡帝一見之為動容俾知大府佐幕
中鋤姦剔蠹列罪功括蒼告降內猶紅詔君持節總
兵戎及馬三天駭一方徐行直入如涉空群前禁伏
偃且恭大開城門戒緩降口宣撤告後頑光敢有非
後屠其宗銷其鋒鐵耕以農生民有如魚脫量拔諸
水火哺食餐苗徭內餘據崇墉水其不備襲且攻君氣
吞賊兵力窮長城在陸制蟻螽仰天以日月為東義
不負國狗以躬遊魂上天化白虹下壓賊營賊眼朦
大軍回來若雷春拆骸解項殲賊死事上聞帝哀
侗贈官復尸頒爵封生氣煒然薄蒼穹生為偉人死

則忠臣卑奇書名譽豐晚令若艾登侯公死而無聞
鬼猶懷取彼棄此熟悲洪文臣悼行鎮幽宮名與天
地期無終

元隱君子東陽陳公先生鹿皮子墓誌銘

明 宋 濂

發之東陽有隱君子戴章陽巾裁鹿皮為衣種藥銀
谷澗中當春陽正殷號落紅於飛花亭上亭下有流
泉花飛墜泉中與其相迴旋良久而去君子樂之日
往觀弗厭既而入太霞洞著事其書縱橫辨博孟軻
氏而下皆未免於論議元統間濂嘗侯君子洞中君
子步履出連坐之海紅花宸戒侍史治酒漿蔬醢親
執竿獻酬歌古詞以為驪酒已君子慨然曰秦漢而
下說經而善者不傳傳者多不得其宗濂溯以來群
儒之說尤與珠泗伊洛不類余患屏去特註獨取遺
經猶思至四十春秋一旦神會心融灼見聖賢之大
旨譬猶明月之珠失之二千年以上自王公下至此隸
無不依俚日索之終不可致收豎乃獲於大澤之濱
豈可以人賤而并珠弗貴乎吾今持此以解六經決
然自謂當新來說於吾後云濂乃避席而問曰其意
云何君子曰吾以九疇為六府三事而圖書為易象
者不可誣以片言統萬論而天下古今無疑義以庸

言釋經子而野人君子無異辭謂神所知之謂智知
天下殊公之謂禮知公之宜之謂義知天地萬物一
體之謂仁禮後則和之謂樂謂天地萬物一體經子
之會要一視萬物則萬殊之公正家齊國治而天下
平矣濂未達請復問其詳君子曰國家天下一枳也
枳一而而殊十為枳有殊而一視之其於人則仁也
發而視之殊有十則等有十其於人則君臣父子長
幼之等夷利賞于尊之殊公所謂禮也視十為十者
禮之異視十為一者仁之同分愈異則志愈同禮愈
嚴則仁愈篤者先王之道也分愈異者志愈同故合
枳之殊反求其故地故舉而經次焉若差之黍秣則
人已無別犬牙錯而不齋飲之不合而一不可一見
禮愈嚴者仁愈篤故治國家天下者不以禮則異倫
敦禮樂廢而仁亡是故沐浴伊洛朝夕之所陳者天
下萬殊之分視聽言行之宜所操者禮之柄耳故學
聖人者必始於禮焉故一體萬殊者孔子之一貫於
沐浴伊洛之言無不統者也理一分殊之義廢則操
其枝葉而舍其本根沐浴伊洛之會要不可見章句

析而附會與遺經不可識矣濂受其說以歸間嘗質
之明經者或若曰近時學經者如三尺之童觀優於
臺下但聞臺上詒笑聲而弗獲見其形所以不知妍
姸唯人言是信君子之論偉矣或者曰伊洛之學大
明於淳熙未易遽取舍之也自時歛後為貪游仕奔
走於四方不及再候君子以畢其說聞君子益以斯
道為己任汲汲焉惟恐不傳靡盡靡在標觚著所見
於書書成即刻梓示人後貽書於濂曰子瀕死吾道
若無所授子聰明絕倫何不一來片言可蓋也憂患
相仍亦未及往而天下日趨於亂君子之室廬亦燬
於兵寓子婿王為家留六年之久遇微疾默坐於一
室不食飲者踰月縣令遣醫來視疾君子麾去曰吾
年八十又八其死宜矣何藥之為未幾憊然而逝實
至正己巳十月戊申也君子姓陳氏諱樵其字為君
來人因其衣鹿皮故又號為鹿皮子表隱趣也其先
居睦之富春宋之中葉來徙東陽太平里世為衣冠
巨族曾祖居仁祖嘉登仕即父取青國學進士從卿
先生石公一鰥與聞考亭之學有古節嘗抗章詆權

臣賈似道誦國及宋亡元丞相伯顏見其章欲用之
辭君子幼學於家庭繼受易書詩春秋大義於李公
直方其於天下之書無不讀讀無不解學成而隱遯
然不與世接唯寤寐群經思一洗支離穿鑿之陋形
於談辨見於文辭恒懇懇為人道之文辭於狀物寫
情尤精然亦自出機軸不蹈襲古今遺轍讀之者以
其新逸超麗喻為挺立孤松群葩俯仰下風而莫之
敢抗或就之學則斥曰後世之辭章乃士之脂澤時
之清玩耳舍六經弗講而事浮辭綺語何哉少作古
賦十餘篇傳至成均止徒競相騰焉謂絕似魏晉人
所撰君子則諱之不復肯為也君子足跡未嘗出里
門而名聞遠達朝著知名之士若虞文靖公集賢文
獻公潛貳陽文公元皆慕之以為不可及移書詔訪
如恐失之性後至孝父患風嵐君子扶之以行歲久
益勤後為風疾所侵氣弱不能吐君子截竹為簫時
吸而出之毋郭夫人歿君子不見見其遺衣輒奉之
嗚嗚而泣生平未嘗言利苟非其義千鈞萬鍾弗為
動家雖素饒於貧病德膏梁之習惡衣菲食以終其

身遇歲儉輒竭粟賑里閭自取來年以續其食嘗發
所藏錫為器工人持歸乃白金也悲焉之以告君
子君子一咲而已嗚呼君子已矣世豈復有斯人哉
君子所著書曰易象數新說曰洪範傳曰經解經曰
四書本旨曰孝經新說曰太極圖解曰通書解曰聖
賢大意曰性理大明曰答客問曰石室新語曰淳熙
糾繆曰鹿皮子曰飛花觀小葉合數百卷君子正配
朱氏先若干年卒生延年大年蒼年喬年昌年大年
至正庚寅中鄉闈乙榜第一署徽州路歙縣教諭側
室某氏生延年君子沒時諸子唯喬年在餘皆先卒女
三人其婚即王為次則俞某張紹先孫男九人某某
曾孫男五人某某喬年等洎王為以是年某月某日
奉柩葬於縣西南懷德鄉斗潭山之原縣長貳及學
士大夫門弟子咸會莫不洒泣奠後五年其高第弟
子楊君希乃為撰列行狀一通而喬年同王為持示
金華宋濂再拜請為銘嗚呼君子以超絕之資曠視
千古若一旦暮期以孔子為師而折衷群言之是非
不徇偏曲不尚詭隨又欲暢其已說而後已可謂特

立獨行而無畏懼者也非人豪其能之乎雖然淳熙
二三大儒其志將以明道也初亦何心於固必使君
子生於其時與之上下其論未必無起予之歎而君
子之衆說亦或藉其損益以就厥中則所造詣者愈
光輝混融而卓冠於後先矣天之生材相運而不相
值每如此意何如哉然君子措慮之深望道之切其
所傳者確然自成一家言殆無疑者世之人弗察伐
異黨同常指君子為過高是豈窺見其衝氣機者哉
源也不敏竊有慕洙泗伊洛之學有志弗強日就早
近不足以測君子所至之淺深而君子則欲進而教
之今因請銘故構著昔日問答之辭於其首後之傳
儒林者尚有所稽焉其稱為君子者君子蓋有德之
通稱尊之可謂至矣銘曰

洙泗傳聖體兮伊洛發遺精天人既混合兮陽陰悉
苞并無開不開闢兮金石奏和平自茲益演繹兮白
日中天行如彼藝黍稷兮蔣去莠與稂莠成白紫
兮詔使來者嘗有夫起東海兮吐言一如鑄曾以達
幽隱兮務使聲遠揚豈欲異塗轍兮理致無終窮著

書動盈車兮序言類括囊中有萬寶玉兮包絡無遺
亡解之溢衆目兮環異吁可驚似茲海外珍兮煥如
虹荀施琢刻工兮定可獻明廷下可奉公侯兮工可
奠方明胡為墮空山兮枯槁埋光晶鹿皮剪為裘兮
我冠賸重纓臨流既飛花兮心與烟霞冥清風與逸
氣兮橫絕宇宙中食道息自腴兮疇計祿位豐婆娑
太霞洞兮卒以工壽終斗潭向東流兮內有八尺壘
鬼神必呵護兮靈氣結華英永為文字祥兮于祀重
休聲

故詩人徐方舟墓誌銘 明 宋 濂

庶子之夏皇帝遣使者奉書幣起濂於金華山中時則有若青田劉君基麗水葉君琛龍泉章君溢同赴召遂出雙溪買舟沂桐江而西忽有美丈夫戴黃冠服白鹿皮裘腰綰青絲繩立於江濱揖劉君而笑且以語侵劉君並延入舟中葉章二君競來擁護各取官服服之竟欲載上黟川大夫覺之乃止濂疑之問於劉君曰此何人斯諸公乃愛之深邪劉君曰此陸之桐廬徐勉方舟也濂故聞方舟名亦起而鼓譟為

謹共酌酒而別聲迹不相聞者久矣自時厥後葉君出守南昌歿於王事後五年章君為御史中丞以卒又後十年劉君亦官至御史中丞受封伯爵授老於家復以一疾不起又五年濂乞骸骨還山白髮垂頰頽然成老翁矣今年冬來朝京師思方舟之子膺持中書舍人史靖可之狀來謁隨道之銘則知方舟之死歷一十三年矣嗟夫人生如寄石火電光真不堪把玩如此良可悲哉濂因語膺以舊事為之悽惻者久之乃序述其事曰方舟故督饒家自幼有俠氣

好馳馬試劍尤善蹴鞠之戲視拘拘法度士如無物稍長慘然悔曰此豈君子道哉即從師受章句為進士業標猷為文輒爛然成章已而又悔曰是如蠹書蟬出入故紙中何有終期哉人生貴適意盍習古歌詩以吟咏性廢幾遂遂其願耳先是睦多詩人唐有皇甫湜方於徐凝李頻施肩吾宋有高師魯滕元秀世號為睦州詩派方舟悉取而佩詠之鉢肝剗腎期超邁之乃已積之既久圓熟璀璨明珠走盤而玉色交映也方舟猶以為未足出游江漢淮浙間與名士

相摩切而詩道益昌江浙行省恭知政事蘇君天爵聞其賢力欲薦之方舟曰吾詩人爾其可縻以章綬邪竟避去蔡室江阜日苦吟於雲烟出沒間儼然若與世隔因自號曰滄江散人天大雪獨泛舟鉤江中終日戀戀若不忍舍去見者疑其非世間人元季吳孔亦籍開不出易為隱者服人莫知其蹤跡所在有瑞林滄江二集各若干卷唐詩通考若干卷藏于家云方舟平居喜怒不形於色無急步無疾呼聞測涯際性尚風義死陵羅氏率五百指來避兵方舟衣且

食之病者注藥死無所歸則擇地藏之久而弗懈事
平其巨舟載其還家至正丙午正月初九日方舟以
疾卒君子稽其自號題曰詩人滄江徐方舟墓表其
志也謙謂君子出處固立志之不同然亦有命焉當
劉君之出也衡方舟以隱自高數欲挽起之會有故
而止方舟獲終老於山林亦豈偶然之故哉余思方
舟其人而不可得俯念時昔盡然傷情乃歷序其故
而銘之曰

有才不施一發乎詩曰星月露草木走飛人事變遷

可愕可悲舉無遁情入我範圍嗾嗾所及皆成珠璣
一旦觀化魂無不之非湧醴泉定生靈芝昭德之符
千載弗虧

元封從仕郎鄭彥甫墓誌 明 宋濂

嗚呼大同之世人不獨親其親不獨子其子自大道
既隱情偽日滋此尼父所以有不及見之嘆雖然秉
彝天性亘萬古猶一日縱時有污隆而其道則未嘗
泯滅有若浦江鄭公非一家之三代乎其七葉之長
彥貞君非三代之英乎彥貞諱鉉彥貞字也其家自
宋南渡初即合食為義門迄今已歷十世宋元二朝
國史皆為立傳家教修明有遺範二卷俾奕世守之
彥貞嗣主其政益固嗣長謹正己以蒞物家人翕然

遵化一堂之上動逾千百指愛矜情一不分親疏視
其貨泉則錙銖皆聚于公察其事功則群趨而競赴
雖甚勞弗懈義淡仁孚和氣充牣四海之廣莫不聞
知道其門入其庭神暢心怡而鄙吝之萌銷沮無餘
退而有言食謂昔之義居如樊楊張李之流誠所不
及而蓋重彥貞君之善繼先志也彥貞君自幼沉毅
端慤屹然如成人雖朋舊不敢狎侮語一逆察輒白
眼望之聞人有輕己之言輒自責自厲惟恐如其料
及壯主貨財倡家意其易惑百端傾誘之每正色叱

之使去倡大說曰此鐵石心腸人也彥貞事父盡孝
父病在牀帶其妻卒不敢哭強顏乾爰以奉湯藥竟
不使之知後八日亦卒彥貞哀慟幾絕水漿不入口
者三日鬚髮為之盡白及至終喪外舅張必慶聞諸
甥哭哀無依力勸其更趣彥貞謝曰銘見後母肆虐
殘賊骨肉者多矣忍令吾兒陷之邪不聽彥貞年未
四十君子義之時天下承平衣冠萃於燕都翩然出
遊以充其見聞揭文安公侯斯在禁林黃文獻公潛
居成均二公以文辭鳴當世皆折行輩與彥貞交

論文談詩或至達日不休一時士大夫見彥貞方嚴
皆敬憚之或酣酒放歌聞聲即歛容正坐不敢吐氣
自時歐液彥貞仲子泳與從子深同講授脫脫太師
家彥貞為書數千言陳時政之弊令進於太師太師
多采而行之彥貞尚風義舊與泰政恩都魯沙游其
子為武義宰免官留武林貧不能自存彥貞延其家
十口來浦江給衣食三十餘年隣有瞽者跛者彥貞
養之終身每風興告饑者填門彥貞積餘飯親携單
分餉之至老不厭元季兵起州郡俱譁彥貞大將統

兵入境服義門名皆戒士卒無敢犯樞密判官阿魯
灰帥軍五萬一夕擊至奪民廬舍以居二十里之內
雖犬牛羊盡樂彥貞說之曰明公非太師之偏裨乎
太師位高却尚以無罪去國況明公之士卒忍行不
道乎脫有一人言於朝不識明公將何以處之阿魯
灰愕然曰業已如此為之奈何彥貞曰為明公計者
甚不難浙東據江阻海其民頗柔馴易制明公誠能
撫定而綏輯之俾他兵不敢東向執政柄者尚敢以
噍咳相驚乎行且錄明公之功矣阿魯灰不覺屈膝

曰非公不能聞此言命左右致東幣為謝明日下令
啟行一軍肅然曾未幾何國家大兵取婺州彥貞携
家避入諸暨流子里時李曹公文忠統兵來過嘆曰
此義門也今世罕見之躬為扁鵲而去事平遣帳前
先鋒率民兵二千護其家歸浦江人以為彥貞積善
之報云

高節先生墓誌銘

明 楊維禎

先生諱侶字君友姓嚴氏子陵三十五世孫也嚴本莊姓以漢明帝諱易之子陵以高名著史冊耕富春山釣桐水年八十終娶梅氏西京壽春尉福生茂茂生隆隆生卓由是而降踰唐歷宋衍為四家甲冑傳格為先生會王太父潤王太父自中考也俱不仕先生生而有奇氣讀書不為覓舉計從學卿先生漢炎貢公賈公得以復齋趙公趙公得於潛室陳公陳公親受於晦菴朱子此其淵源也貴官主釣臺必訪先生勸之仕則曰漢雲臺諸將仕非不赫赫今子姓無聞吾舅祖去之一千三百有餘年而高風遠韻與富山桐水相為峙流士奚足以仕而貴哉某不敏願為嚴陵賢子孫足矣居家教授生徒有裨糧自甌越來者宋相文山次客謝翱奇士也雪夜與之登西臺絕頂祭酒慟哭以鐵如意擊石復作楚客歌聲振林木人莫能測其意也暮年建沙社為會取悅而有信翱卒無子與社中友買地臺南築之築許翺亭憲使盧公攀高其義為之書嘗遊錢塘偕石塘胡公山村仇公

過孤山耐林處士岳郭王墓卒有勅於中告二人曰某常時如此親必不安亟歸及門適有終天之別捐踊氣絕者數四治喪祭一用朱子禮廬墓三年不殯衰不見賓客有白燕巢墳木事母益虔母卒哀毀成疾幾不起每至生旦服墨線哀慟踰他時所居室堂名以高遠取郡守王汝記釣臺書院語至順辛未冬十月晦疾革呼其子淵曰吾年已踰六十不稱天奉祖祠四十年後土田教養無忝吾死何怨乎疇西田吾已買諸官死又葬是遂逝越若干年為至正丁亥始克獎賡者故事有易名門人黃廷玉等私謚曰高節後詣于郡守祠于祖祠西小室娶黃氏宋椅眼進士黃蛻曾孫女子一淵也越十年丁酉予以建德理官過釣臺淵從予謁祖堂遂登雙臺訪子陵釣迹因酌高節君墓又訪臺南謝奇士塚予為奇士立阡表明年淵持廷玉所為狀來謁曰謝奇士表於吾子若有待先子之行應銘法其待如奇士幸吾子銘之遂銘曰於古風風乎胡可追千有百禩一畫厥岐不肯敗馳

瞠乎不知其後時我詔其人雖高有基雖高有基雖
遠有遺

故少師吏部尚書贈特進光祿大夫太師諡忠
定襄公墓誌銘

明 楊士奇

宣德十年正月十有五日少師吏部尚書襄公薨于
位先四日以疾聞上遣太監范宏以醫來視賜鈔萬
緡明日范太監以衆醫偕來又明日疾革范後來問
所欲言對曰陛下初嗣大寶義獨寡祐不能效分寸
裨益然區區犬馬之誠所望於聖明者惟敬守洪武
成憲始終不渝耳言已而絕訃聞上深悼歎屬時國
有大事悉停諸祀特賜鈔萬緡勅工部治喪葬贈公
特進光祿大夫太師諡忠定遣某官恭賜祭而官其
長子英英等奉襯歸窆有日永余為銘余與公同朝
三十有五年而事仁宗皇帝自登儲立大位始終皆
陪公公國家老成人所以攷益士奇蓋多不敢辭養
之世家重慶之巴縣宋以來多顯仕自公高曾而下
始隱居不出曾祖洎祖妣年及祖妣均壽妣雍氏考源
斌妣胡氏繼雍氏以公貴贈曾祖妣考皆榮祿大夫
少師吏部尚書曾祖妣妣皆夫人公諱義字宜
之字而岐嶷長端重不好弄而嗜學弗懈始從里社

師中書左丞殷哲時為郎守一見異之引克即學第
子員詰其師曰是兒將來遠到非吾所及當成就之
而公不煩程督日益有進洪武甲子中四川鄉試明
年中禮部會試廷試賜同進士出身擢中書舍人授
徵事郎見重大祖高皇帝每前奏事率稱旨而數見
獎賚初名瑤一日奏事畢問汝養叔之後乎觀灑宸
翰書義字賜之以易藎名時丁羅夫人憂賜道里費
且命馳驛歸盛時恩云版闕仍舊職滿三載吏部奏
當調時命終九載朝夕左右凡機密文字必以付公
而小心敬慎久而愈篤建文中陞吏部右侍郎授嘉
議大夫太宗文皇帝入正大統轉左侍郎數月陞吏
部尚書授資善大夫時政令制度有非洪武之舊者
詔悉援之公從容為上言損益貴適時宜聞舉其數
事陳說本末文皇帝以公忠實悉從其言小人有譖
公不忘建文者賴上聖明不聽有除授官不得苦地
訴公不公者上皆斥之永樂二年冊仁宗皇帝為皇
太子命公為詹事時師傳皆以勲臣兼之而輔導責
任文臣詹事蓋元僚也上欲有諭望太子率諭詹事

往導意公亦委曲周悉皇太子尤愛公所言靡不信
用滿三載陞資善大夫十年車駕巡狩北京命皇太
子監國中外庶務惟諸王及遠夷有奏請詣行在除
悉啟聞處分公熟於典故達於政體孜孜無倦不動
聲色而事類以濟賜誥以其官秩封贈三代滿九載
賜勅有秉心正直及淳良為實裨益國家之褒數奉
命兼禮部事雖職務填委靈之裕如十七年丁父喪
歸上及皇太子皆遣官賜祭皇太子贈賻尤厚有詔
起後公詣北京謝上慰勞再三賜鈔千緡遣中官護
送歸南京明年從皇太子朝北京遂命公巡撫直隸
應天等府州間安民休戚及文武吏之賢否而升黜
之公謂國家多事之際悉以法繩吏人將不勝特點
其太甚者數人除多寬假而兵民利弊當與革者具
奏行之仁宗皇帝初嗣位一切政議預者三四人而
公居首進少保兼吏部尚書二條俱支賜官服象笏
及玉帶二遂進少傅及進少師賜師傳之臣銀章各
一其文曰純愷糾繆公首被賜上諭之曰朕有過舉
卿即具疏用此封議進來蓋望公等匡直也純賜誥

授榮祿大夫贈三代及妻於公數人誥詞上時增曰
勿謂崇高而難入勿謂有所從違而或怠所以望公
等者慎切也又念公侍從監國舊勞時製忠貞印賜
之而賜勅有以善甥君苦心焦思二十餘年夷險一
節之懷時修太宗皇帝寶錄命公監脩宣宗皇帝嗣
位一切政議屬公數人如仁考之初建奉命監修仁
宗皇帝寶錄書成賜曰銀文綺鞍馬應從從人高
興還寵賚尤厚復從巡還以公年老不欲煩以
有司之務賜勅曰卿事祖宗積勩勤誠朕嗣統以來
尤資贊輔夙夜在念圖善始終茲以卿春秋高尚典
則司優老侍賢禮非攸當況師保之重寅亮為職不
煩庶政乃副倚毗可輟吏部之務朝夕在朕左右相
與討論至理共寧邦家其奇精神藏思慮益致嘉猷
用稱眷倚老成之意勉賜銀章一其文曰忠厚寬宏
蓋以褒德云賜新第於文明門內寵祿海加吏部言
公歷少師九載降勅褒諭仍賜宴禮却是歲生旦賜
鈔萬緡廐馬一匹今工嗣大位之日賜白金文綺是
夕齊宿於公得疾越五日竟不起享年七十有三公

為人沉深質實和厚簡靜內有孝友之行事君有誠
處人有量無所猜忌未嘗輕涉一語傷物至於議法
亦不苟為包含忌歸中正歷事五朝凡五十年所履
坦坦無一日顛覆之憂退朝之暇手不釋卷責而能
謙富而能約上前所言未嘗退以語人蓋天下有陰
被其利者矣士奇嘗劾論之魯簡肅之忠實不欺李
文正之不為傷人害物張忠定之不嗜玩好傅獻簡
之遇人以誠范忠文之不設城府公益兼有之矣元
配劉氏純張氏皆封夫人子男四長英次芳次苦次
荃皆尚寶司丞孫男四霖霖霖霖公墓在也縣某鄉
某原先塋之次銘曰
節乎蜀山浩乎蜀川孕精毓靈挺生偉人溫中穆外
履夷蹈素呈明麗天奮躍自下在帝左右秉恭與誠
掌帝之制播告四方進貳天官遂職家宰簡用俊良
佐興至理帝命洛陰俾輔聖儲陳厥謀謨聖罔弗喻
四紀在廷三葉升御肅肅師臣秉王之度一念惟仁
永天不渝寅畏小心保終猶初陰利逮人人則罔覺
惟帝昭明褒詔有教嗚呼忠定雖國老成曷不想遺

翼我聖明生榮死哀死且不朽昭德刊辭永告爾後

大學士文敏楊公墓誌銘 明 楊士奇

正統五年二月十八日少師工部尚書兼謹身殿大學士建安楊公奉勅歸展先墓既畢事卜日啟行病作衆曰曷俟少間公曰君命不敢稽也扶輦以行至臨安武林驛遂不起是年七月二十也守臣治棺歛既馳奏皇上嗟悼輟視朝一日贈時進光祿大夫左柱國太師賜諡文敏遣禮部尚書胡深齎祭遣中使護喪還葬其卿命有司治墳公先世見余諱其大父墓碑會大伯父遜大父達卿父伯成皆贈榮祿大夫

少傅工部尚書兼謹身殿大學士曾大母黃大母謝陸阮母劉皆贈夫人公初名子榮字勉仁自學諸生鄉試選第一會試第三廷對擢第二甲賜進士出身入翰林為編修太宗皇帝入正大統更其名榮初建內閣簡翰林之臣七人其中專典密務七人者解縉胡廣王淮胡儼金幼孜公及士奇也公燕最少最警敏一日晚上出右順門名內閣諸臣獨公一人在出江西三司奏章示之言吉安鄉民之肅聚者已悉獲業益朝廷初有聞卽遣行人許子謨齎勅撫諭子謨

行將一月又遣都督韓觀率兵繼之如撫諭不下即加兵及是奏皇上諭公曰觀不至不下其降勅褒觀公讀奏訖對曰計發奏之日觀尚在中道未足從從之日是歲上公時四方之事方殷七人者旦夕侍左右承顧問受旨退治職務且兼稽古纂述之事不虛寸晷上時步至閣下親閱其勞且視其所治或稱旨時公尤勤勵遂皆進官公進修撰數月復進侍講明年改元永樂秋公請告歸省又明年春七人皆賜二品金織衣且勞之曰天下事咸朕與若等同計非若六卿之分理也無幾簡翰林之臣十數人奏春坊官任輔導公爲右春坊諭德授奉訓大夫日公直進講經史四年春公得寒疾命中官以御醫來視賜藥物五年奉命往甘肅同總兵議邊務察視守備還奏稱首六年夏喪父給傳歸既葬遂命起復是年冬喪母公奏歸守制時已下詔巡狩北京不許七年春內閣胡公金公及公奉命扈從北征甘肅總兵何福奏降酋脫脫不花等率部來歸命公往同福處置還奏上悅遂奉命持節往亦集乃之地封福爲寧遠侯八年

春車駕北征本雅失里公三人仍扈從至驢駒河命公先齎勅還報皇太子復還北京冬扈從還南京九年春奉命母喪遣中使護送既還皇太子命公侍諸皇孫學且命公曰勅則有成公盡心不怠重修高皇帝實錄命胡廣胡儼王淮及公爲總裁十年二月賜告命并追贈父母妻冬甘肅守帥西寧侯采琥奏叛寇老的罕逃居赤斤蒙古衛將爲邊患時豐城侯李彬鎮陝西遂勅彬率師剿之且命公往與彬計度十二月還奏餉道險阻今汝塞人疲馬瘠不可行且小醜不足煩王師遂勅彬旋師無幾級者復歸十一年春從狩北京十二年三月從征瓦剌時望孫侍行上命胡金及公三人凡行營有暇即與講析義理聞其聰明尚賢司官闕命公兼之既還勅翰林修性理五經四書大全公三人皆爲總裁十四年陞翰林學士仍兼庶子扈從南歸十五年春復扈從巡北京十六年夏進高廟實錄賜宴春胡公沒公掌翰林院事茲見親密一時廷臣抑恩多縱忌公抗直發其私適大學閑祭酒衆共舉公實欲疎之上不聽公遂奏

言十槃指并五府六部都察院章留中不下十七年
進文淵閣大學士仍兼翰林學士授奉政大夫十八
年扈從北征秋還京冬將西征親藩奏建文中江西
所聚集民兵可撤用出奏示公公對云陛下命優民
業二十年矣今復徵非上曰朕意固如此遂復三殿
災公偕金公陳便宜十數事皆見施行重賢愛民或
臨非辜必援之尚書夏原吉以兵餉不給坐繫呂震
言其柔姦侍讀李時勉嘗論事亦有言其賣直者皆
激上怒悉委曲為之辯解二十一年秋復扈從西征
駐蹕萬全一切軍務悉付公掌寧陽侯陳懋泰番王
也先士千來歸命公往議定降歸奏稱昔二十二年
後從北征中道軍餉不繼上聞之命公與金公總計
其數遂如二公言遣使諭國釋其非臣之罪下令班
師浙江三司奏處州之麗水福建之政和山寇劫掠
請勅兩都司合兵討之公言愚民為有司所苦出不
得已兵出即良民先被害願遣一敕使撫諭之不足
煩兵上從之卒如公言無事一日上從容坐帳殿諭
公二人曰東宮監國久燕政務此歸悉付以天下事

各惟優游暮年二公共對曰皇太子孝友仁厚天下
屬心先稱陛下付託上悅即次榆木川上不豫既上
賓凡沐浴齋奠飯含棺斂一切之禮悉出二公衆逆
推公先馳歸報既至同尚書蹇公等議喪禮遂議即
位禮仁宗皇帝嗣位進公太常寺卿授嘉議大夫仍
兼兩職學士通月進太子少傅授資善大夫兼謹身
殿大學士山陵事竣太監並絀極言公盡心喪事上
嘉歎即陞公工部尚書仍兼前二職賜勅褒諭三俸
俱支尚書一俸全給米洪熙元年賜誥贈三代考妣
無幾上命範白金為方寸印四枚其文曰繩愆糾繆
以賜師傳公與金公同受其一皆期之直言匡輔修
文皇帝寶錄公預總裁仁廟上賓時皇太子監國南
京遺詔召嗣位公往迎於德州既還命公同有司相
陵地宣宗皇帝嗣位修仁廟實錄預總裁高煦反在
廷多懷二心惟文臣三四人勸上親征公其首也遂
扈從討平之師還時受駢蕃之賜馬騏驎變交趾黎
利聚眾抗王師總帥孱弱不支輒與利和且為利請
立陳氏後遂以師還奏至上以示文武大臣皆勸發

兵擊利上不聽竟偃兵息民公預力為是年八月車駕北還至遂化聞國逼塞下以道隄師難並進上率鐵騎數千先馳擊之文臣獨公從既還陞少傅進榮祿大夫仍兼尚書大學士三俸俱支辭大學士俸進兩朝夏殊賜宴春又範白金為圖書刻方直剛正四字以賜公數月念先朝光臣鑒義等四人皆春秋高並賜勅褒諭命解職務朝夕左右侍論議公預焉賜玉帶加有御製詩之賜公滿三載吏部以開賜勅有忠言謹論裨益為多之褒賜宴禮部遂賜少傅誥進封三代後而扈從巡邊皆至洗馬林而還宣廟上賓公後偕有司相陵地皇上嗣位公與同官三人協志合力以勅裨益賜養特厚修宣廟實錄皆為總裁書成進公光祿大夫柱國少師兼尚書大學士如故賜玉帶時上日勤聖學命公同知經筵事五年謁告省墓賜勅褒諭加厚春給傳還中官護送既還京道覽春秋七十公仕于朝四十年皆居清密考知試者一讀廷試卷凡為人間疏果毅遇事當為奮前不疑論古人必欲出新見不肯苟同議辟率歸寬恕勤職事

盛寒暑及小疾未嘗少怠於四裔邊徼事及邊將勇怯智愚靡不通和故忤量事勢率預中內為孝友嫻之行家豐裕且有厚祿能濟窮卹患無間疏戚喜賓客善交際雖貴盛無崖岸貴賤小大皆歸心高故聞其沒也咸有嗟咨悼惜之意所著文章有燕菴集雲山小叢靜軒叢書思集北轍記訓子篇藏于家元配劉贈夫人趙劉夫人皆里宦士仲穆之女子男六恭讓錫賜貴芳貴通之女兵部主事雷潛答鎮陳順德孫潤其婚也餘在室孫男十二素儉倫俊儉信敬佐徐偉伯儀女七曾孫女二皆在室士奇與公同僚三十有九年同事四聖今內閣舊臣惟吾兩人未能退公又盡先余逝公之棄其子屬少保楊公書墓上之石余銘諸幽鳴乎凡今能文士大夫感公之德述公之行雖有之矣若交之久知之深言之信者余兩人其庶幾可無愧也銘曰

桓桓文敏通才博識遭際聖明光奮于績承明延閣著作之庭以綢以緗行華振英北裔四陸從狩萬里職典著文亦兼知武苞肅肅臆帥垣牆強重瞳蚤顧

敦養惟明晚陟三孤二公宏化恪恭朝夕敢或違暇
帝懷敦仁鞠躬承之民懷被福邇勉成之志存寬惠
行在果斷嘉謨讜議褒書有煥請告南旋曾幾何時
上下延佇而計奄來越昔內閣七人同事汪蔣三紀
我銘其四公寄考終哀榮寵光於乎文敏歿也不亡

漫士高先生墓銘

明 林 誌

永樂二十有一年二月十三日翰林典籍漫士高先
生廷禮卒于南京之官舍年七十有四其子熟還襁
以奠于長樂縣崇立里之半古山使致韓府長史楊
耀宗狀來北京俾某為詞將以刻焉先生博學能文
尤雄于詩雖談笑奮筆而猜思力摹莫及蓋詩始漢
魏作者至唐號為極盛宋失之理趣元滯於學識而
不知繇悟以入自襄陽楊士宏始編唐音正始遺響
然知者尚鮮聞三山林厔部鴻獨倡鳴唐詩其徒黃
元周元純之以聞先生與皆山王公起長樂顏頤齋
名至今閩中雅詩人五人而殘骨賸馥沾溉者多黃
終于教官周顥行曹員外即先生與皆山垣以詩遇
今上初二人自布衣召入翰林皆山即除典籍卒先
生為待詔九年始陞典籍平生賦咏流傳海內有棠
白嘯臺集曰木天清氣集毋慮千餘篇其選唐詩品
彙九十卷拾遺十卷議者服其精博能書工畫時稱
三絕書得漢隸筆法畫原於米南宮父子出入高
間方畫子畫妙貞一初識先生稱賞不寐曰異時當

為名家在翰苑二十年四方求詩畫者爭致金帛修
歲常優於祿入神堂氣融襟懷高簡善飲酒喜談
雅與人無賢愚新故益然如一素體無病晚得風狂
疾輒輟食無甚苦一日與故飲極歡夜分乃寐旦忽
昨作弗能言卒於諱駒清才不羈奈世譏或曰居士
姚陳氏采樵使治之孫先生事母孝謹年五十七
方貴未幾而母沒娶陳氏先卒葬得佳兆虛右壽藏
三十四年乃合葬三子曰熊曰熟曰熙五孫曰箕曰
澹曰默曰堅曰蕭城先生諱棟字彥恢士名廷禮漫
士其號也實宋尚書張鎮之後曾祖麟以出莅高氏
祀後無子取猶子隆為後遂從高姓是為先生之祖
系曰
吳航山川蜿蜒扶輿是生偉人間氣之符嘯風嘯雲
山含川嘯乾文坤象隨厥吐舒金石猶鳴珞珞拱趨
他人憂憂已獨于予上追杜李高岑為徒畫舫烟埃
石經元圖精聚神交賦無今古三絕何資一官而旅
春夢雲臺曉心棋墅龍門其居樓曰翫字落月綺裘
清風玉塵鴻儀溟溟游羽楚楚其神天游而蛇茲土

興化知府致仕岳君墓誌銘 明 葉盛
英宗皇帝既優辟雍密之臣累出親擢其第六人則
吾友岳山岳君正也君固奇士而工吏部忠肅公又
嘗出稱其賢上雅重之君亦自幸魚水之遭凡所陳
請所撰述所對答竭忠盡多稱旨一日湯序言變異
以占法進云姦臣未盡之故上以問君君叩首曰姦
臣未聞求之將人人自危况序術疎淺宜不足信上
悅時石曹二猾勢方張君虞其將來必不靖因極言
於上前且退而面開導之使為保全計二猾雖陽諾
好辭中實銜之蓋未幾君之禍作矣上猶惜君甚正
出為欽州同知既又追及逮繫責成甘肅之鎮夷二
猾尋踵敗上惻然有思曰岳正言是也召還將復有
所用而龍馭上升矣成化初君居母憂服闋御史有
言當亟召用君以勸忠詔仍原職吏部言當調南京
有旨其勿調命充經筵講官纂修先朝實錄適兵部
清黃官闕部院大臣會薦君遂以成化元年四月俾
知興化府以行君在官生財惠民始諱而終服號
賢守有司者或不知禮君君乃有歸志歲己丑來朝

諸教仕家居越三載為成化八年九月十一日疾卒
得年五十五公卿以下皆往弔哭莫不嗟悼曰岳先
生亡矣君子方別號泉叢幾內郭縣人曾祖德甫
祖思明父興懷遠將軍輕車都尉府軍前衛指揮同
知母大淑人劉氏君少年已能學有名二十一領鄉
薦卒業太學正統戊辰會試同考誤寘落卷中侍講
杜寧獨驚其文言於高文毅公以為此吾輩中人遂
召首選廷試第三名授翰林編修景泰三年陞右春
坊贊善兼編脩天順初元改脩撰是年六月被命入
內閣參預機務及其得罪去僅一月耳君偉觀美辭
言論灑灑動猶矩度居家孝悌交朋友有始終之誼
平生性剛而志高抱負經濟不輕屈下人有古豪傑之
風石曹事或迂議之且以未信為言直應之曰何得
以諫官處我我道當如是其為於自信如此人有不
可意事雖權責人當言即言之無宿藏而人不之察
以故愛君者雖多卒不能勝夫嫉君者之屢也配宋
氏孺人側室周氏王氏子男二曾堂皆天女六長許
祿而卒已婚者朱昱生員李經翰林編修李東陽餘

未行君之學精博旁熟莊騷左方外度數諸書無所
不覽所著經解務出新意多儒先所未發惟深衣纂
議成書文章有類博學若千卷書法晉唐可召家鳴
呼才美如君即時置華要先皇帝之明也中間蹇連
坎坷有若不遇處者然觀君今日之金緋在躬考終
瞻下目非先皇帝今上皇帝之明且仁則雖欲得此
難矣君其亦可以無憾哉以卒之年十月七日癸祖
塋之側居父兄端府軍千戶祥宸君無子率其猶子
培均坪坦壩長疏向予乞銘予為作銘慰答之亦以
慰君於地下焉爾銘曰
古有季曰其人心嗣亦有柳川壩年以死其名之長
弗繁乎此

南京兵部尚書襄毅程公墓誌銘 劉珊

成化己亥秋九月二十有七日南京致仕兵部尚書
兼大理寺卿休寧程公卒于正寢有司以訃聞詔贈
太子少保謚襄毅遣官諭祭營葬朝紳咸曰公一代
人豪而今已矣可惜雖然朝廷于其生加以亨秩于
其休槩以重書于其歿優以卹典且有蒙賢之子昌
大其業是公雖死猶不死可謂無遺憾矣既而其子
敏政慟謂予曰先生交先君子三十餘年僕又曾聆
先生一日之教茲墓中誌銘敢以為托乃誌曰公諱

信字彥實其先聞 大儒載在簡冊可考至諱社者
任宋為徽之休寧尉子孫因家焉高祖諱社任元為
承奉班都知曾祖諱長吉妣吳氏祖諱社壽國朝洪
武間謫居河間考諱晟俱以公貴贈兵部尚書兼大
理寺卿祖妣汪氏張氏俱贈夫人公以易經中正統
辛酉順天府鄉試明年第進士授吏科給事中己巳
英廟北征公偕廷臣上疏諫止不報已而師潰土木
園遼南侵京師戒嚴命公守西城上言五事曰新疏
今以振軍威募勇敢以備急用召勤王以遏南侵設

武備以防內變養銳氣以備戰守皆見采納函首也
先自西山一帶退薄都城都督孫鏜禦之失利乞領
衆入城公堅持不可躬督諸軍自城上以火鎗礮石
鼓譟為鏜聲援國引去景泰元年命公充副使持節
冊封華陽王妃凡王府有餽遺悉却之歸陞左給事
中辛未九月英廟還自迤北居南宮公後上中興國
本十事言皆剴切其敬天一事則當時天象屢變請
景皇帝隆孝友之實以答天心之仁愛聞者壯之士
中陞山東右叅政總理遼東邊餉巡撫都御史死深
葬倉官吏卒盜禮一石以上者死乃造新斛視舊加
二寸付公公立碑而火之曰使被真盜死不足卹今
故為此斛置人於死地豈情也哉遼卒至今能道其
事會以憂去轉四川公廵所至問民疾苦松潘夷人
作亂公偕侍郎羅綺進攻破其黑虎三捷諸寨天順
丁丑英廟優遇公奉表入賀時方錄景泰間上言之
人遂留公為太僕卿遼東巡撫缺員陞公都察院左
僉都御史賜敕以行守將海寧伯董興姻聯曹欽公
一切裁之以正又造戰車創義倉行贖罪法設月輪

簿凡百號令一新建州夷酋董山潛結朝鮮公使土
官修成授以成策往虜之得朝鮮授董山中樞院使
制書以還公疏曰乘其未發急遣二使問之可伐其
謀朝廷乃命一給事往朝鮮一錦衣譯者往建州兩
酋初不肯承出制書示之成相頗愕然入貢謝罪因
酋字來聚衆欲入寇公自率師巡邊營于境外者凡
三月得風濕之疾自此始都指揮夏霖事多不法與
董相結納僉事胡鼎按其罪四十公以狀聞詔中官
及錦衣郭指揮逮霖而籍之不意中途受賂乃奏虛

寔相半寇都御史因劾公聽胡僉事言妄奏調南
京太僕少卿刑部缺堂上官廷臣言非公不可召陞
右侍郎復以憂還河間成化紀元今上皇帝即位起
復公于兵部又轉左丁亥四川貴州山都掌蠻據大
壩山晉之險叛服不常陞公尚書提督軍務與襄城
伯李瑾統番漢兵討之公至永寧自督大軍入金窩
池又分四路兵期會于大壩將士依公方略用神銃
勁弩攻賊賊不得走連破二十餘寨獲銅鼓數十斬
首五千級生擒二千餘賊復走入深洞公命軍士以

土石窒其門以兵圍之月餘賊死洞中臭聞十餘里
又陰察九姓土獠之附于賊者還師撲之未及一載
都掌悉平又布置衙門邊事以定凱旋進兼大理卿
有白金綵幣襲衣之賜前此公營大壩凡兩月淫雨
不時瘴癘荐興舊恙復作至是公回上疏請老不允
辛卯春上以雨雪不降求言公復上言兵事可更張
者五兵弊可伸理者五詔下所司執政者難之未幾
三邊有事悉如公所料南京缺叅贊機務大臣廷臣
交章薦公為宜上允所請公至南京適舊出軒轅乃

與六卿合議後上言興利除害三十餘事多見諸行
他若汰貪縱摘舊典可書者尚多在南京叅贊已四
載復疏乞休上重違公志賜勅還鄉有疾若去體其
勿以安于家之語明年公還休寧里第又四年謝世
距其生永樂丁酉閏五月十六得壽六十有三葬邑
東南南山之原配林氏累封夫人子男三長即敏政
成化丙戌進士及第授翰林編修累陞左春坊諭德
學行為時所嘉次敏德太學生次敏行邑庠生早卒
女一許聘忠義衛指揮子凌雲漢孫男三壘圻壘女

三俱幼鳴呼公儀觀魁偉性資剛果六籍百子無不涉獵為詩文略不經意而雅渾可恃事親孝少時嘗力耕以養母憂廬墓側有芝產之瑞教子弟嚴而有方待內外親族恩義兼盡遇故人子矜恤振拔惟恐不及凡百玩物一不以挂目為諫官知無不言言必達大體而嫉惡太甚佐而藩及法司必以敬正輔長官不隱忌坐視以為賢掌兩京兵政及征伐俱有成績又能任怨南京參贊或欲預錢穀詞訟公曰守備機務所以謹非常若此乃有司之事也斷不可預論

皆以為得體征川貴時詔以便宜之權付公公自發兵至凱旋不爵一人不殺一人同事者以為言公曰刑賞人主之大柄懼聞外事不集而假之人若幸而事集又竊美之豈人臣之道也論者又曰此古名臣之心名臣之言可以為後世法今若放政筆進進未已能昌大其業安知天之報公不在此也晚號晴洲釣者有晴洲集若干卷藏于家銘曰

於惟襄毅晉臣之系宋儒之裔家傑其才剛大其氣於昭襄毅科第高登祿位馴至兵刑軍司留輪是寄

來哉襄毅車轍所至吾民獲利咸震蠻夷名揚當世無憂襄毅文事武備有人永繼誕昌前烈引而弗替無憾襄毅善始令終皇恩特異歸于南山垂休千祀

都察院右都御史致仕韓公墓誌銘 劉珥

大明成化戊戌十月十五日致仕右都御史韓公以疾卒于家有司以計開上遣官諭祭命有司營葬域如制其家嗣太學生文以南京司寇張公狀徵銘于元至按狀公諱雍字永熙蘇之長洲人曾大父諱彥傑積累深厚貴富弗食大父諱舉一父諱貴俱以公貴累贈都察院右都御史祖妣陳妣趙俱贈夫人資初以間右起實北京宛平縣故公之發身乃順天府庠弟子員正統辛酉中京闈鄉試明年第進士拜湖廣道監察御史時陽山縣教諭江紀苦膳天竹磨兒其父令其遠適而以死誣告紀他御史勘狀紀坐償獄未決家人累奏冤都察院檄公覆勘公四散遣人蹤跡之得磨兒于河南紀得釋且復其官聲遂大振時三司刑獄并劾奏章疏或經公手未幾巡按江西辯冤獄然奸貪所至望風解嚴廬陵泰和等縣大蛇卒至永時劫掠鄉村居民苦之有司不能制公與巡撫侍郎楊公等設法捕之得其首惡并餘黨悉置重典也遂寧代回陞廣東按察司副使迎二親就養少保

陳公循疏公歷能幹潛才堪大任陞都察院右金都御史巡撫江西公至則首推行均徭法次行歲辦法規畫周密切中時弊民甚稱便值歲饑大發倉粟賑之兼減價糶賣人得足食大順改元英廟復辟改山西按察司副使尋陞大理寺少卿仍復僉都御史與左都御史寇公深同理臺事嘗有強盜十八人當斬內二人訴為同起盜挾讐誣指寇公曰會問已明何讐之有公曰人命至重宜暫留寇不允因諍乃并指若留之後四人皆得白翰林院學士倪謙主考鄉試得罪于當路驛事校尉發其結交違有儀賓事下獄坐重典公復力諍得宥宣府錦永指揮劉敬以石亨連坐下獄寇欲坐朋黨籍其家公曰東漢時朋黨二字盡賢人君子公宜審之寇悟改擬敬得千戶調山東某衛時大同守臣奏巡撫之人上即以命公至則勅總兵恭時貪財弛備皆逮于法修飾界牆搜括隱占軍丁設法耕墾收米易銀邊用有餘而無私歛之擾桑顏三衛夷人因酋首字來誘犯獨石公出其不意擊之賊驚遁七年議改至京陞兵部右侍郎有權

責素嚙之陷以罪謫浙江布政司叅政成化改元而
黃蠻寇猖獗累征不利上命都督趙輔為征夷將軍
和勇為遊擊將軍惟總督軍務者雖其人食曰非韓
某不可後改左僉都御史以行時言者謂賊在廣東
宜逐之在廣西宜困之眾議紛紛不定公大言曰大
藤峽賊巢也舍此不圖吾未見其能濟遂肅師而行
抵廣西界議遣都指揮趙倫都指揮鄒宏副總兵范
信恭將孫振各授以方略仍檄湖廣總兵李震預備
公乃連營以進至金州謀報賊在湯洞公五發偏師
連戰皆捷生擒渠魁數人皆磔別以示軍威天振人
以修仁荔浦皆峽賊羽翼乃公兵將為二十五哨公
與總兵官領中堅進攻彌月峽賊遂平路無阻絕獲
開賜勅獎勵陞公弟睦為錦衣百戶復移師潯州益
增器械備賑賑令五哨由峽後進公督八哨從峽南
進復令二哨援於後別遣將士斷諸山口賊聞乃擊
妻孥輜重于橫嶺等崖極險處預山南立排柵木礮
石標鎗毒矢如雨而下公現其將急遂奮甲先登士
魚貫而進聲震天地縱火烈焚日色晝暝賊不能支

乃遁去公益奮眾云險不可進公曰破竹之勢不可
少緩督攻益急直抵橫嶺等崖又進至九層樓等山
壁立萬仞勢控霄漢公後計遣將士於賊所不備處
攀緣至絕頂舉砲為應衆後環攻戰數十合峽遂破
前後得大小寨峒九百餘處改大藤峽為新藤利石
山頂以紀厥功初公令士卒得一山一寨即堅守之
故賊無可反之計計生獲被虜男女以隄其功故士
無妄殺之慘又謂峽內餘孽尚存終又為患宜增土
官編管仍徙周冲靖寧二巡司于峽之上下增土人
為副巡檢復置千戶所以鎮藤縣五七種人凡可以
固峽之策無不行之先是公命將與廣東守將共勒
廉雷等處流賊猶未成績至是又分遣單官往勸旬
月間生擒斬首及奪回俘獲共四十萬一千七十有
奇凱旋至廣東提聞陞左副都御史提督兩廣軍務
公於兩廣地方相去五千餘里臣一身不克周悉宜
用都御史二員巡撫從之會以父喪守制還吳既而
六部各衙門大臣言梧州宜設總府總督等官居中
調度設賊良便從之即其家陞公右都御史總督兼

巡撫纂書總便宜行事公主築城屯軍以鎮禦地方
 鑄鐵索柱繫浮橋以絕賊船置木牌以覺察奸細出
 官卒以瘞亡卒培松櫓以葺先賢之祠大服人心凡
 年少監黃沁以公務與公不叶許奏數事公不與較
 即具疏乞休家居六七年以山水為樂君子曰明將
 保身公其有之距其生則永樂壬寅十一月九日春
 秋五十七娶王贈夫人趙金封夫人子男三長即
 文王出次教金出次敵側室王出女一適蘇州衛指
 揮使王英孫男二女二葬某山之原於乎公之為人
 爽邁洞達才識高遠居家孝友與人交有信義下筆
 為詩文思如湧泉無少凝滯居官處事動以古之叢
 傑自居每一出師必以曹彬不妄殺為法以曹翰安
 殺為戒故所至全活甚眾累謫累起未嘗置欣戚于
 其間天下士大夫無間識不識咸仰其名云銘曰
 有偉其人有碩其才發身賢科肅政蘭臺為節初終
 執法外內戎貳兵曹或嚴廷尉載傲而起督師海江
 巨寇以平吾民用康天書斯碩楊休播美秩穹是登
 儒紳罕比全聞彌著成績孔昭不進之求惟退之高

我我吳山悠悠元室勒石是銘千載無斁

明養德大夫正治上卿都察院左都御史贈太

子太保謚恭簡戴公墓誌銘 明 李東陽

都察院左都御史戴公既寢疾遺囑其從子兵馬副
指揮星曰不得以卿典崇朝廷已而禮部稽典制以
開上乃賜諭祭令有司治喪事而給驛遣官護歸其
喪監祭御史楊儀等數十人以公督學而造上合詞
上請特贈太子太保謚恭簡益於禮加隆焉公諱冊
字廷珍其先采錢塘令士先自婺源徙浮梁祖諱嗣
安以子昇貴贈陝西布政司右參議考諱尋嘉興府

學教授皆以公貴累贈南京刑部尚書公以縣學生
舉天順壬午鄉貢甲申中登進士第成化丙戌試四川
道監祭御史服闋乃授職任辰督學南畿凡考校必
以文藝為器識有請謁者孫不色拒而終一無所撓
學士帖服無凌言戊戌遷陝西按察司副使仍專學
政改如南畿地加廣雖遐陬僻壤未嘗不列修古聖
賢祠廟或治秋祀典開民間孝節事亦奏旌其門中
辰擢浙江按察使今尚清肅丁未遷福建右布政使
宏治戊申轉左布政使勤教養通財賦情法兩當論

治體者必歸之己而擢都察院右副都御史撫治鄖
陽諸府豪右多窟流聚為利公刻日令首罪民所關
田多匿稅略償所費而沒其餘嚴練兵伍自為營陣
法蜀盜野王剛越境入竹山平利諸縣守臣畏罪莫
敢發公請合湖陝兵誅其首惡縱脇從千餘人事遂
定時偉其功辛亥召入為刑部右侍郎乙卯轉左侍
郎嘗會勘荆府不法事皆得實時羣疑交訐朝廷是
公議卒行重典丙辰南京刑部尚書諫獄尤謹庚申
復召為左都御史公益自檢律務持風紀雖書簿之
細必盡稽覈嘗與吏部考察京朝官者一考天下選
職者再考宗皇帝親鞠大獄諸司震悚公從容應對
時有所開析天顏頓霽上知公清慎每廷宣而問至
移晷刻引疾求退上優詔勉留命醫賜食間有慰諭
若家人父子然者不覺感泣上亦為之動容章前浚
公上留益力公違其要若子先歸以身待命乙丑新
天子嗣位公不敢輒言去力疾視事疾再作竟不起
卒之日為十二月二十三日距其生正統丁巳二月
七日壽六十九娶夏侯氏累贈夫人陸吳氏累封夫

人子晴園子生公廕也正德丙寅吳夫人扶晴來扶
樞歸以是年某月某日葬某山之原公德性和粹中
耿耿不苟合而洞達無城府奉職守法不為物撓而
意嘗近厚祿仕四十餘年家無餘貲壹意官守雖尊
官高年猶手削章牘辰入酉出窮寒暑不變故歷中
外所至有聲績學政尤著人至今道之不衰所著有
松崖稿教卷公在同榜中夙見知厚常謂予曰子必
銘我其治命亦為太子太保周公以及子子嗚呼是
安可負我乃哭而銘銘曰

昔我孝宗嘗訪耆碩公長中臺時聞遠跡公秘不洩
曰我后之德公簡帝心帝監公直公所執法躬就繩
墨其有弗率則惟我職無曰棘棘或爾默然我法弗
或曰我無遺責世有碑玉亦鮮亮壁惟公始終有美
無擇惟帝嗣位惟父臣是武臺評廟議方懋爾績古
亦有言天壽平格有平若公壽非緣極惟所遭值及
所樹植今名在茲永耀金石

明通議大夫吏部左侍郎兼翰林院學士掌詹
事府事張公墓誌銘

李東陽

嗟呼東白公已矣公姓張氏東白其所自號竟以號
行天下皆知有張東白者而今已矣嗟乎公五歲精
爽過人書過目成誦其父松亭翁名之曰文魁寧靖
王召見令作儼對韻語大加賞歎書元徽二字賜之
因易名元徽松亭携入闕觀者塞道公至考亭拜朱
晦翁遺像輒有志所謂道學者松亭謂彼儒先易嘗
不由科舉進邪乃入南昌縣學為生都御史韓公雍

奇之曰此人瑞也後易其名曰元正字之曰廷祥天順
己卯舉鄉貢庚辰試禮部得詩魁英宗每掄材必兼
臂幹公貌雍然若不勝衣李文達公特簡為翰林庶
吉士劉文安公奉詔授業見其文豐然以驚示平授
編修考校精覈歲貢士鮮入格者癸未同考禮部得
太倉陸欽為省元人始未信後果有大名憲宗即昨
上疏請行三年長後言講學聽治用人原俗四事預
修實錄書法不苟時同官多不合者成化丁亥謝病
歸示無後仕進意名益重從之游者四遠而至藩臬

即縣至者未始不往見見則慨然自失諸言事皆累
薦起之不果居二十年值孝宗即位宏治戊申召修
實錄至則以舊勞還春坊左贊善上勸行王道疏幾
萬言入侍經筵己酉考南畿鄉貢辛亥書成還南京
翰林侍講學士癸丑念母老復謝病歸越五年戊午
召修大明會典為副總裁至復還翰林學士掌院事
孝宗隆其召特置日講兼侍東宮講讀數月以母憂
去壬戌擢南京太常寺卿癸亥召修歷代通鑑纂要
改太常卿仍兼學士侍日講甲子命掌詹事府事乙
丑考會試即奉召授吉士業一日思上疏請讀太極
圖西銘諸書上亟索內閣得之益有意大用未幾而
而龍馭上賓矣今天子繼統以侍從恩擢吏部左侍
郎仍兼學士加從二品俸初為實錄副總裁自是數
病病必連月屢上疏乞致仕優詔弗許正德丁卯滿
三載未奏十二月晦日卒公少侍父疾籲天請代喪
禮尚古事母色養惟赴召時不及躬致憾之終身遇
二弟有恩嘗連一莊歲置二百石以濟族鄰以四百
石資鄉民有司為給帖書籍其於書務博涉尤好探

經傳頗隱多所獨得一時談理學者教人各樹門戶
而公岸然不為下作易詩春秋要語四書集要太極
圖說要綱目近思錄家語解要皆未脫藁為詩文始
務奇崛勇脫蹊徑晚就平寔若出二手然類為人所
重莫為軒輊論議揭揭尤深嫉惡至不可近及再入
宦途益寬厚雖後輩寒士亦與抗禮頗或為敗抑要
其中容有所見賢者之不可測固如北天每艱於生才
才者未必用有如公者豈易得哉張之先出金華宋
季有某知隆興府避世南昌傳十餘世至公祖孟初
父仲實皆以公貴贈如公官母倪淑人生公于正統
丁巳二月二日年七十乃卒娶程淑人生二子采栗
女一適四安教諭羅翰狀元應魁子也繼黃氏孫四
女孫若干采栗喪京師卜公葬以卒之又明年戊辰
某月某日詣于請銘公亦豈易銘哉顧同官之舊四
十年餘于今矣銘曰
木生在山久乃益堅輦致于途蹶萬牛以顛貢之明
堂將棟將梁思內蠹以傷熟其生之而卒棄厥良人
村賈珠公員具有惟厥攸員曰可與大受與不在天

定不在于夫苟不自愧違卹其餘維文之絕維石之揭彼利
達者時巧時拙地靈人傑維卿印之哲百世之下山
不泐水不涸茲惟張東白之穴

明光祿大夫柱國少保兼太子太傅都察院左
都御史總制陝西三邊軍務贈太傅謚襄敏王
公墓誌銘
明 李東陽

少保兼太子太傅都察院左都御史王公之訃至自
甘州上為震悼輟視朝一日贈太傅謚襄敏給驛歸
其喪遣官諭祭命有司治喪事其子春奉狀介其嫻
友光祿卿李公遜請予銘辭至再弗獲乃叙而銘之
公諱越字世昌姓王氏世為大名潞縣人少補縣學生
景泰庚午舉京闈辛未登進士第擢監察御史英廟
後位見公奏對明暢目屬之都御史冠公深性嚴急
獨喜公凡諸道奏牘必令詳定天順庚辰起擢山東
按察使於未大同有警當道舉可為巡撫官者上以
其人貌寢意在公徵為右副都御史以行公力發政
為攻守計邊人賴之成化改元以疾告至京師上命
醫視疾遣中官慰問至再家居久之丁亥召署院事
庚寅奉命出鎮延安崖窟川擒賊四十餘人斬首百
加百還左副都御史又於黃草梁擒賊五人斬首百
二十進右都御史壬辰以後往來東西路及寧夏界

前後斬獲者倍之。癸巳進左御史。賜蟒龍衣一襲。又出巡緝。家塢斬首二百八十餘。甲午加太子少保。增從一品祿。掌院事。公言將士功有未錄者。乞移所加官祿賞之。丁酉加太子太保。進兵部尚書。兼左都御史。增正一品祿。與子出大同至威寧海。騰蘭營所在。至帥兵。擒之。擒男婦百七十。斬首四百餘。以大捷聞。勅封威寧伯。歲祿若干石。仍兼都御史。辛丑出寧夏擒賊十人。斬首百餘。廷議文臣伯以上不得進封。加太子太傅。增歲祿四百石。總五軍營兵署。前軍都督府事。提督團營。未幾出佩將軍印。克總兵官鎮大同。移鎮延綏。尋罷居安陸。宏治改元。公上疏自劾。詔許還鄉。甲寅復左都御史。致仕。丁巳兵部言陝西三邊宜得重臣專任其事。僉舉二人。皆弗稱。旨以公對。乃許之。並召至京。引見。勞資恩禮殊特。加太子太保。總制甘肅寧夏延綏軍務。鎮邊巡撫而下。悉聽節制。公累辭不許。事有未盡。使者請易置之。乃行。至則以副都督署賀蘭山後者數出。抄掠。帥兵擒之。斬首伯餘。還所掠人畜器械甚衆。上降勅獎諭。加少保。兼太

子太傅。公又哈魯為土魯番所破。久弗捷。近番首引罪。還所侵地。宜討其故。王以守之。疏上。數月未報。公慮世事機焦。勞過度。遂成疾。而卒。六年十二月一日也。公姿表奇邁。慷慨自許。論議英發。見事風生。雖以文頭久膺帥寄。歷西北諸鎮。身經數十戰。其於邊微險易。固情真偽。將士之強弱。皆歷歷在習。臆每出奇取捷。謀定而後發。同事者亦莫測所嚮。至於顛倒。才智中自為標。縱而人人咸動。樂為之用。效之者皆自以為不及其所見。所執。壯老一致。雖罹挫如而志不少衰。善獎拔士。類嘗將舉御史四人為令吏部尚書。晉公瀟右都御史。佖公體南京大理寺卿。楊公守隨。故會都御史王公濬。皆大類。武臣邊將出其門者。不可勝計。博學多聞。精及吏事。列案章奏。倉卒立辨。兵法射藝。叢碑堪輿之說。罔不該究。為歌詩。雄邁跌宕。若若弗屑。意多不存。蒙至其睦族。敦舊。賙窮。卹禮。接卑幼。如恐不及。亦可謂奇偉不群者矣。公曾祖諱類道。被誣為義民。祖諱恕。醫學訓科。考諱顯。皆嘗贈太傅。威寧伯。後復贈光祿大夫。柱國。太子太保。左都

御史三世妣皆夫人娶孫氏贈夫人繼孫氏贈淑人
再繼陳氏亦贈夫人子四長即春以時皆錦衣衛指揮
僉事次吳次耿以廕為百戶早卒女三仲適河南都
指揮梁瑤孫八煜煜昭炳燦燦煥某煜歷國子生女
孫五一適國子生李繼光一適府軍衛指揮李隆公
生宣德丙午十一月五日壽七十有三己未九月初
四日薨于大任之西麓從先墓也銘曰
大任降神鍾為偉人白簡廷執行堂外巡撫機駁兵
出禦戎國設奇制勝孰敢予侮崇階屢建一品而極
分符錫號封以大國孫居南陸言歸舊鄉王事有程
載趣其裝帝曰汝能許我西顧老非辭難難彼長路
寧夏近却誓倚胡穴玉關故鎮謀繼國純熟未大成
志則有餘歎恨而沒天其監予文以致身武以樹績
時其卷舒胡我大得輝輝耀耀星曜治之精敏風震建
柳地之聲或葉弗試其氣勃鬱上干于宵中殷于室
茫茫大津旁接雲霧剌然一飛終迎其故偉哉斯人
茲勛是方永闕其藏地下之光

侍郎章公墓誌銘

明 謝 鐸

成化癸卯春三月甲寅南京禮部左侍郎樂清章公以
疾卒于家卦聞上遣工部進士黃備營葬事賜諭祭
為公之子南京禮科給事中元應將以是歲冬十二
月甲申葬公橫嶼山之原狀公行來速銘於乎公立
朝大節赫赫在人耳目銘固不繫于有無獨念鐸之
于公仰止為者非一日銘固吾黨事也其可以辭始
鐸成化初被旨入校先皇帝實錄見公景泰中論復
儲下獄事輒嘆息泣下曰公疏動萬言而一不之載
何以示天下後世並持以告總裁官學士劉文安公
公曰諸臣奏疏凡留中者例不得書鐸曰天下事復
有大於此者此而不書將奚書公盡上其事增入之
公慨然曰業已成無益也鐸至今未嘗不以為恨於
乎銘固吾黨事也其可以辭公以己未正統進士為
南京主客主事景泰中擢儀制郎中方是時南城懷
德之變上干天變公卿百執事無一人敢昌言於廷
者公遂極言修德弭災凡十四事曰畏天戒曰任賢
理曰養聖躬曰節幸遇曰務儉約曰勤諭政曰惇孝

義曰慎賞罰曰重名爵曰華巡撫曰擇重臣曰辨異
端曰却貢獻曰汰冗官皆議切時病傳以古義而於
畏天戒悖孝義尤悖悖為大要以為臣子之邪佞要
婦之嬌妬小人進而君子退簡翟強而中國弱刑不
當罪賞不當功賦役繁重紀綱敗壞凡皆在人及陰
足以勝陽于是重氣致汾而天變見矣况上皇為天
下之父陛下為上皇之臣上皇以天下授陛下陛下
以天下尊上皇今若是九天監所在而不容以偽者
誠不可不念同氣之親惟猶子之義率群臣時見上
皇詔沂王復居儲位如此則五倫全備和氣充溢天
心自回災異日弭且曰臣非不知逆耳之言出其身
必危然臣身輕而朝廷重使朝廷事安則臣身雖死
亦無憾矣疏入上大怒逮繫獄連五日榜掠無全膚
必欲置之死天忽大風雨黃沙四塞獄遂稍緩得不
死初御史鍾同亦上言令諸司各陳所以致災者因
以復儲事風禮部先臣繇不敢對曰作死作死公疏
方其奮曰我復不言當誰言若遂言之至是乃并逮
同明年秋南京大理少卿廖莊亦能公有言詔廷璽

八十幾死且并璽公暨同同死獄中天順初首詔釋
公檢公疏無所得內臣有能舉以誦者上擊節嘆賞
即日擢為禮部右侍郎未幾同列有中公者更出為
南京禮部上特御文華殿慰遣之以白金文綺齎為
尋轉南京吏部先皇帝上賓遺詔嗣君婚禮不得過
百日公復極言三年通喪達乎天子今山陵尚新元
朔未改諒陰婚配實所未安禮官大臣爭排公賴上
聖明不之罪秩滿稍遷南京禮部左侍郎以內艱乞致
仕許之公平生以天下為己任凡朝政得失民利
病知之未嘗不言言之未嘗不盡方其未論後儲也
嘗陳太平致治十六策以至籌邊團通楮鈔藥寬恤
增解額亦屢言之蓋已亡慮數千萬言其始脫詔獄
而為禮部也山東以水災告戶部尼不行則特奏得
減租十之五王所以火災告同列執以例則特請得
賜金五百兩蓋其既語且奮而抗言護論不少挫絀
有如此者噫公歷官先後不四十年在南京者恒十
之八立朝之日益十不能一二而其反覆論諫已若
是其盛使公坐朝堂立殿陛與天子相可否爭是非

則其所以為世道計者當何如耶公初諱崙尋改論
字大經本吳姓其先閩人五代時有為閩王太傅曰
仔鈞之孫資避亂徙樂清南閩凡幾世諱開宗者仕
元為德清典史後章氏因以為姓實公之始祖也曾
祖諱性不仕祖諱新民父諱文寶皆以公貴累贈南
京禮部右侍郎公生永樂癸巳享年七十有一配朱
淑人先公九年卒子男三長元清亦先公卒次元應
以乙未進士至今官次元會以恩補國子生女一通
永嘉縣學生陳浚孫男六女四公自少敏學不事
家人生產嘗截枯竹繼晷晝夜誦不休久之出從春
官主事黃若章先生隙學及為郡學生則又從郡守
何公文淵承質疑義既歷官南北聚書幾萬卷自六
經子史以至星曆醫卜皆搜抉務遺其要以為文之
有聞世教者莫先告君之詞故平生之文奏議為多
而間發為詩亦不事雕琢而自成一家有拙稿因志
某進思錄凡若干卷藏于家公性質直坦易與人無
貴賤疏戚一笑之間洞見肺腑至其臨大事決大議
則凜不可奪自號聽大或勸公少暇以徇曰在我者

有義與命在彼者吾不知也故悅公者寡不悅公者
衆然立論立朝大節未嘗不以公為首稱於乎嚴寒
乃見松柏我國家承平之治至宣德正統而極極熾
而豐小大之臣方仰承德意以將順頌美於不暇所
謂憂治世而危明主者已絕無而僅有蓋於是得二
人焉曰翰林學士李公時勉曰翰林侍講劉公球主於
景泰之季而公實繼之公以二聖之恩克保晚節以
上婉學士公於無愧故雖不必若鍾公同與侍講公
之死然究其所立固非常試而幸或者則其於廖莊
已益有光矣於乎公固一代之偉人也哉公之群行
不止是給事君能文益別著之家乘鐸不得而論論
其繁天下國家之大者以銘公墓以補國史之缺以
明示天下後世亦公之志也銘曰
浚恒之克世具曰非吾寧為激而不以隨固守之裕
世具曰是吾寧為罪而不以恥我思古人猛虎藜藿
執與重輕發蒙振落我思古人砥柱狂瀾孰與有無
模稜兩端彼何人斯如鬼如域不有君子吁何能國
我作銘詩以告萬世紛紜鄙夫敢拜公墓

南安府知府華亭張君墓誌銘 明謝鐸

成化丁未夏六月十有三日南安守華亭張君汝弼以疾卒于華亭之故居其子寧海令宏宜將以是歲冬某月某日葬君祖塋之次屬吾台即守葉公崇禮以狀來請銘於予予尚恐後銘君也哉始予天順初與君友今茲卿黃君世顯故方伯陳君士賢會憲林君一中識君于禮部蓋三十年于茲矣慨念疇昔一代交游稱豪傑士若諸君若固落落可數予驚下病且不克既銘吾一中又銘小賢而尚恐後銘君也哉

君諱弼姓張氏汝弼其字也其先汴人八世祖稱斗山先生者宋南渡始居松江之華亭曾祖率以易教授鄉里祖子英早世父熊應以睦族稱號村君子用君貴贈兵部主事母胡氏贈安人君少穎異過人既壯以詩經領景泰癸酉鄉薦登成化羅倫榜進士倫以言事忤宰相去國君作詩慷慨送之未幾拜兵部主事轉員外郎已遂有南安之命南安兩廣要衝大山長谷亡命嘯聚為民患者益衆君下車悉捕滅之尋慮民之窮而勞役弗息也亟請諸當道者俾均節

之且得以食其力于商而橋梁道路之利因亦以時興焉既又雙溪祠百數十區為社學凡先哲之嘗蒞茲土者若張九齡李剛劉元城諸公皆特為立祠主周程二先生則既祠而又刻立吟風弄月臺以深敦景仰益於教化風俗之大者其惓惓又如此初君之來補也人咸惜之謂若君者盡留以羽儀明廷以藻繪一代太平之盛治君固不薄淮揚而卒有成績至是始謝病而歸歸之日民益相與立生祠焉歸方三年天竟不慈適以卒距其生洪熙乙巳享年六十有三而已於乎惜哉配王氏封安人子男五長宏正次即宏宜以進士拜今官次宏呈邑庠生次宏圭次宏玉次宏金女二李觀願行已其婿也孫男四性協忻恪女七所著有鶴城天趣清和慶雲諸稿凡若干卷疏東海翁又有東海手稿若干卷行于時茲君手筆也君以靈識異稟充之學問尤且不倦詩與文幾成一家草書之妙論者至推為一代冠冕然世之所謂文人者類近浮薄君獨博尚行履慨然以風節自持雖論議間雜諧謔而往往必以理勝故彭都憲鳳儀

嘗論其天公人品問學政事有如此者而君亦嘗為予戲評其所能曰人故以書名我公論哉吾自視文為最詩次之書又次之其他則非吾所敢知也恒相與一笑而寵噫昔人稱趙孟頫為畫畫所掩世莫克盡知其文章與經濟之學然則君之所以自道者其亦感於斯乎斯文非細故自文與道離而後世之所謂文人者始為大賢君子之所鄙然則文豈易能哉故予又即君之文銘之以見吾人之所謂文者正在此而不在彼也銘曰

東海之東有氣如虹凌虛厲空人曰此獄刻之鋒孰知其下文塚之雄於乎萬靈所鍾鬼護神封後千百年茲其不隕於地耶尚有考乎吾銘之公

一峯羅先生墓誌銘

頌 欽

國朝鉅儒羅先生諱倫字應魁改字葵正號一峰其先豫章人唐末徙居吉安永豐湖西代有聞人歷宋元盛武崗教授開禮公勤王死節以故族屬三百餘竈無一人臣事胡元者祖諱求仁號善耕儒雅儻樂善好施考諱修大號大山耿介忠信母李氏以宣德辛亥正月十一日生先生生時有奇祥甫五歲嘗隨李入園收果長幼競取獨賜而後受年七歲善耕先生訓於庭不匝月而童蒙諸書咸遍明年學于里師時之書里師今通遜諸生股讀諸生未成句讀而先生皆已成誦嘗收樵則携書讀之自幼勤學及省之餘未嘗釋卷年十四授徒于鄉以資親養莊重嚴毅師道卓然常曰學豈科第而已哉乃欲捐舉子業父兄不可已而補郡庠弟子員言動不苟勵志聖賢之學嘗曰

京供職三月以疾辭朝廷不允
二年章三上始得歸戊子秋抵家卧病養心之餘苦
禮記註說之繁命門人錄其要以便觀曰疾人不失
所執守也壬辰疾稍愈以族裔未化諭之以約束不
之以律令鄉人化之喪禮行浮屠除盜賊息民業安
十餘年間兼并不作鄉俗為之一美嘗欲做古置義
田有助以堂食貲者先生弗受且告之曰是錢雖公
亦不可費以之積粟賑民可也或衣之衣行遇乞人
死於途輒解以覆之乙未卧病厭翳乃於金牛山中
結茅東曰靜觀西曰正密居焉四方學者往來益眾
先生於講明性學者納之務舉業者辭焉越二年戊
戌九月二十四日先生疾革示門人曰人之為學易
筭之際可驗怡然而逝無所顧慮者見道明也遂終
先生素清儉自朝服外絁帛之衣未嘗入體歿無歆
襲具乃取敝幃以歛門人方琬輩解衣以籠友人羅
峻極責際助以棺嗣子迎柩歸隨而悼祭者數千餘

人四方赴弔者三載不絕先是夏秋間山嶽崩裂大
雨如注遂虎噬人烈風折木先生所居山脉忽墜一
井其深巨測哲人之喪而天地山川為之一變其生
蓋不偶也先生天資剛明清介淡然無欲勵志聖賢
涵養純正學貫博約才周經濟忠孝懇懇至老不衰
出處進退合乎道義片言隻字有關世教教人本之
以誠敬成之以寧靜又以小學近思開發之惓惓不
少怠先生於功名富貴真如浮雲過目惟終日乾乾
不自滿足潛修之功垂死不已而踐履益純此靜觀
正密之銘所以繼作也先生律已甚嚴而待人甚恕
自奉甚薄而贖人甚急其排斥異端以崇正學益天
性也有識之士以先生之處而委以吾道之緒冀先
生之出而望以吾道之行惜乎年不配德未老而歿
悲夫梁氏安人卒結劉氏安人子男四人梁柱榦榘
梁柱先後領鄉薦女三人一適張某其二早世以成
化辛丑十二月某日葬本里都溪四上源有一峯集
行于世愚忝先生榜進士尊事唯謹先生直弟我不
世俗讓道義相契真異姓伯仲也愚與先生俱以戊

子謁病歸餘十年而先生計至又二十五年宏治壬戌之夏其子梁柱自京師走書古宜請銘先生之墓嗚呼我尚何辭哉但以筆力綿弱不足發揚盛德是愧銘曰

先生之德正大光明先生之才奇偉汪洋先生之志聖域是藏先生之功扶植綱常嗚呼哲人日月其光醇哉醇哉百世之望

太子太保吏部尚書贈特進光祿大夫左柱國
太師謚端毅王公墓誌銘 王 鑒

國家有宿德重望之臣曰王公諱恕字忠貫仕至太子太保吏部尚書年七十八致仕今上即位遣行人即其家存問而公卒于家年九十有四上為輟視朝一日諭祭者九仍命工部治葬事贈特進光祿大夫左柱國太師謚端毅朝之公卿罔不嗟悼已又羨焉謂公祿位名壽終始具全近古所未有也公可謂一代偉人矣王世家陝西三原縣公生而魁偉高岸音吐如鍾見者異之正統戊辰登進士選入翰林為庶吉士授大理評事歷左寺副出知揚州府擢江西右布政使轉河南左布政使成化初進都察院右副都御史撫南陽荆襄流民丁內艱會荆襄盜起特起復公征勦遂勒巡撫河南進左副都御史改南京刑部左侍郎巡視河防又改南京戶部左侍郎所至有異政然猶未甚為人知也會雲南夷獠為梗改公都察院左副都御史巡撫其地時鎮守內臣私市外夷誅求無厭人莫敢問公劾之其下郭英懼而自盡沒其

寶石於官并械送其下教人于京且勸上不實異物
凡花木禽獸寶玩宜一切拒復為朝廷言者俄有旨
令致仕公怡然就道孝宗在東宮則聞公名即位召
為吏部尚書旋加太子太保公在吏部裁抑僥倖褒
獎名節甄拔淹滯中貴無敢以私干劉文穆在內閣
每有所軒輊公亦不屈守儔蔣瑞與南京科道相訐
奏科道多得貶黜瑞自如公言官中府中俱為一體
陟罰臧否不宜異同知州劉槩御史李興以忤文穆
下獄公力辨之得減死內旨以通政司經歷高祿為
本司叅議公言祿出自科目自可遠到而越次超陞
恐非所以愛之也唯以天下之官待天下之士勿以
親戚妨公義事乃止時有建白多謂業已行矣公言
天下事議未得其當雖十易之不為害若謂已行無
及則古之訥諫如流若豈皆未行乎公遇事輒言有
不合即引疾求退上每溫詔留之執政有不悅謂其
好名者太醫院判劉文泰因誣奏公公疏辯下文泰
獄鞫問事遂白而公求去益力詔先之命衆傳以歸
有司給役米既歸日優游園林讀書著述不輟言者

每欲起公不果以正德三年四月二十日卒明年月
日葬某原公在揚州屢折獄獄歲幾且疫發倉廩給
醫藥全活不可勝記襄陽賊平首帥欲誅兵搜山因
公言而止東南大水衆庶咸望公奏蠲歲額公獨持
其議以軍國之計重也然所免各郡亦且數十萬而
人莫之知舊例應天鎮江太平寧國廣德官田歲半
徵而民田全免久之民田多歸豪家官田多歸下戶
公乃為之損益官田量減其耗民田稍增之公私便
焉公曾祖諱彥成祖性真孝仲智皆贈光祿大夫柱
國太子太保吏部尚書曾祖妣某氏祖妣張氏妣周
氏累贈一品夫人公先娶益氏繼張氏俱累贈一品
夫人父文封一品夫人子男五承祐都督府經歷承
祿義官承祥順天府通判承禮義官承裕吏科給事
中女二孫男十二統綬基野郎簡潛璿璠璠璠璠
女九曾孫男四女四安邦安民安國女二公所著有石渠
意見四卷拾遺二卷玩易意見一卷詩文十卷歷代
諫議錄一百二十卷渭河通志二十卷奏議若干卷
銘曰

國有正氣曰唯忠義忠義斯存國勢乃尊侃侃王公
奮自三原歷事五朝正色危言其言雖何別邪與正
邪正既分國是斯定逆鱗屢犯犯且弗傷唯公之誠
唯先皇之明帝曰先臣國之蒼莠卹典榮名有加於舊
公如汲黯逆亂殺謀公如裴度邪佞所仇公雖亡矣
神豈云邈上騎箕尾下壯河嶽刻碑詔後唯味之覽

石田先生墓誌銘

明 王 鏊

有吳隱君子沈姓諱周啟南字而世稱之唯曰石田
先生先生世家長洲之相城里曾大父良琛始開田
以大其家大父孟淵考恒吉皆不仕而以文雅稱先
生風格潔修眉目娟秀外標朗潤內蘊精明書過目
即能默識凡經傳子史百家山經地志醫方卜筮稗
官傳奇下至浮屠老子亦皆涉其要撮其英華發為
詩雅深辨傳聞闡變化神怪疊出讀者傾耳駭目其
體裁初規白傅忽變眉山或兼放翁而先生所得要
自有不凡近者書法浩翁道勁奇屈間作繪事筆墨
煙雲波濤花卉鳥獸蟲魚莫不各極其態或草草點
綴而意已足或輒自題其上時稱二絕一時名人皆
折節內交自部使者郡縣大夫皆見賓禮縉紳東西
行過吳及後學好事者日造其廬而請焉相城居長
洲之東偏其別業名有竹居每黎明門未開舟已塞
港矣先生固喜客至則相與譙笑咏歌出古圖書器
物模撫品題酬對終日不厭間以事入城必擇地之
僻隲者潛為好事者已物色之此至則屢滿戶外矣

先生高致絕人而和易近物敗夫收監持紙來索不見難色或為贊作求題以售亦樂然應之數年來近自京師達至閩浙川廣無不購求其蹟以為珍玩風流文翰照映一時其亦盛矣先生自景泰間已有重名汪郡守許欲舉應賢良不果王端毅公巡撫南畿尤重之延問得失而先生終不及時政曰吾野人也於時事何知然每聞時政得失則憂喜形于顏面人以此知先生非忘世者初先生事親色養無違母張夫人以高壽終先生已八十而孺慕毀瘠杖而後興茅病瘵終年與同卧起館嬰妹撫孤姪皆有恩義尤喜獎掖後進有當其意者為延譽不已先生娶于陳生子曰雲鴻官崑山陰陽訓術早卒廢子復孫履皆郡學生先生以正德四年八月二日卒壽八十有三後相履治喪以壬申十二月二十一日莫相城西陳字行之原所著有石田稿石田文抄石田詠史補志客坐新聞沈氏交游錄若干卷獨其詩已大行于時文徵明曰石田之名世莫不知知之深者宜莫如吳文定公及公關其潛而掩諸幽則唯公在予諾為銘

曰
或隆之位而慙其受或致之秩而修其有較是二者
吾其奚取覽堯石翁擬衆遺棄發為輝煌震驚一世
彼榮而庸庸戚皆是相城之壚湖水沄沄於戲邀矣
我懷其人

自撰墓誌銘

明 劉 忠

野亭字子直別號野亭其世系姓氏里族載於先少傳公銘誌中茲不具野亭年二十三舉河南成化甲午鄉薦二十七舉進士改翰林庶吉士除編修纂脩憲廟實錄成陞侍講九載陞侍讀學士乙丑今上即位以春宮講讀恩陞學士明年陞南京禮部左侍郎未旬日陞本部尚書丁卯轉南京吏部尚書尋被召改吏部尚書兼翰林學士掌詹事府事入內閣專掌誥勅是年秋九月仍以尚書兼文淵閣大學士泰預

機政尋晉少傅兼太子太傅武英殿大學士尚書如故十月以病老具疏請休退未久自是疏七八上皆荷溫旨勉留辛未春省墓歸歸未幾再求休退乃俞允仍賜勅并月給米五石歲撥輿夫八名廕子元嗣為中書舍人時年六十也歸之日有先公敝屋數楹城之南有別墅一區田百畝桑棗榆柳百餘株建又於居舍後鑿一小池放一舟其中每當春暖秋晴病起意適之時或駕輿登野或張席命舟徜徉自放於水雲林月之際其所獲賜餘則歲分十之三四以頒

諸流離貧賤者間嘗進元詞諭之曰吾老且病沒之日勿請奠祭諡贈勿干名筆為誅文詩輒有一於是吾不汝子英文成或者乃曰公筮仕幾四十年所歷非一官各有所職今何為不書茲予雖以文翰著銜其所職則啟沃輔翼有關於上下者頗重大予於是無一能効焉書之徒以自貽愧也公孤寡階而居之若不能一日安者茲予性峭直狷介既無功業以為顯明之資又乏依昂以為植立之地不即去則罪日大愧日集士夫清議并以先所有者而奪之矣其歸而居家雖杜門謝客然猶有車馬遊從之樂有貧賤周恤之惠若未能絕意于世者蓋游從之樂所以章君上之賜周恤之惠所以修君上之恩外此則非所知焉其不敢有恤典文誄之請者蓋無實德而尚虛名此予平日所深耻者今若是使予昭昭累士夫之餘議冥冥為地下之愧魄矣尚幸有不死可持之以見先祖考於九泉者自揣生平無大過尤此心無少負焉耳今附諸石者得來世子孫皆當嘆予不負以副其所無負者野亭配王氏同邑知縣覽女貞順柔

則內範嚴整於女紅之事九精巧封孺人夫人今晉
封一品大人生景泰甲戌八月二十六日今年六十
五歲黃氏生女二長王出適醫官姚銀次黃出適生
貢尹郊俱早寡子一即元嗣亦黃出孫男文孫女恩
孫梅孫俱幼野亭生景泰壬申八月十五日誌成於
正德戊寅九月十五日時年六十有七也沒之日久
近未可卜元嗣續當饒諸銘詞之末銘曰

嗚呼野亭胡為而生胡為而仕胡為而歸胡為而死
蓋其生也藉天地之委和其仕也濫皇明之介祉考
諸已考諸人則歸有餘裕委者遂濫者收則死獲所
止嗚呼世有為野亭嘆者曰如斯如斯後有為野亭
嘆者曰乃爾乃爾

戶部尚書忠定韓公墓誌銘 明 楊一清

嘉靖丙戌二月十五日致仕太子太保戶部尚書韓
公以疾卒於家有司以聞上若曰是惟先朝耆舊清
修忠亮望重一時其贈特進光祿大夫太傅諡忠定
賜誥命諭祭九壇有司給付棺木喪儀異器為營葬
域皆特恩也公諱文字貫道別號質菴姓韓氏成化
間舉丙戌進士授工科給事中遷右給事中出為湖
廣布政司右叅議轉左叅議擢山東左叅議宏治間
擢雲南左布政使尋擢都察院右副都御史巡撫湖
廣督理軍務改巡撫河南召拜戶部右侍郎改吏部
進左侍郎尋擢南京兵部尚書叅贊機務召拜戶部
尚書正德改元時賊瑾恃從寵舊恩竊持機柄威福
自恣勢焰薰灼士大夫側足六道路以目莫敢頌言
其非公倡于諸公卿科道云若是不已將危及廟社
乃合辭抗章暴其罪狀請置之法以安人心武皇始
而覺悟既乃為羣姦所惑置之弗問瑾由是益橫乃
矯詔降公職級致仕又矯令落職閑住瑾伏誅以廷
薦得復舊官致仕今上嗣登大寶賜勅遣官存問特

加太子太保階光祿大夫勳柱國有司月給米四石
歲給輿轎六人且賜之誥命贈其先世悉如其官廕
一孫為光祿寺署丞嗚呼公之所以得於天得於君
者可謂至矣莫宜有銘其子陝西泰政士奇以請于
予予與公少聯官給舍雅相好中雖南北執掌相見
必歡洽謝事後通問訊不絕士奇及其昆弟又予提
學所造士紹固當予屬然以公平生政跡甚多而晚
年抗疏誅瑾一節尤卓犖奇偉故先書其大者如此
乃按都憲張公汝霖所著狀而銘之公上世出相州
宋魏公之裔七世祖諱永避金亂徙山西之洪洞因
以籍為曾祖諱昌祖諱淵父諱肅皆以公貴累贈光
祿大夫柱國太子太保戶部尚書曾祖妣李妣吉氏
皆累贈一品夫人公生時吉夫人夢紫衣人語之曰
吾送文潞公與爾父因以文名公少文思益發頌成
化乙酉鄉薦以登進士其為給事特節指韓藩行冊
封禮贈遺一無所受嘗與同官會勅總制憲臣要功
起邊釁及薦起前吏部尚書曹南李公兵部尚書河
湟王公辭涉近倖憲皇怒幾不免勘理遣帥諸不法

事酌情與法輿論稱平吏部屢薦為都給事中為忌
者所沮竟以九載滿考始得遷官外藩其為恭議提
督武當山兼撫流民救神恤民一劇宿弊禁鎮守中
貴侵漁節省浮費以其羨餘易穀萬餘石備賑改理
司事分守襄南平稅理克勘處夷情聲望日起恭議
以右轉左蓋昔所無亦忘者沮之耳其在雲南雪冤
疏滯尤多為湖廣巡撫會征貴苗接濟軍儲底於成
功被勅獎諭武昌諸郡歲荒上疏乞蠲租停稅民稍
解倒懸移撫河南懷孟以北旱饑民多流徙檄令所
司發銀分賑多所存活民方東作牛種無所於出公
令官措而給之是歲大熟民乃安守備武臣有不律
者按而治之群屬凜凜其為戶侍佐尚書太原周公
清冗食革實錄化遷吏侍署部篆久之采資望用人
廉繼精當南京參贊尚書缺人僉謂非公不可至則
留守一新屬歲饑米價騰踊死者相枕籍公咨戶部
將官軍糧俸預支三月以濟人急度支以未得命為
辭公曰救荒如救焚民命在旦夕安能忍死以待即
得罪吾請當之遂發米十六萬石米價漸平人不病

擢往者留都事惟內守備令是聽公多所裁定上下
稱便焉孝廟亮其公勤故有地卿之命屢辭不獲嘗
召見諭以盜法積弊欲議處釐革以充邊餉陳六事
指摘弊端甚剴切孝廟嘉納行之於是數十年積弊
大蠹掃除殆盡屬時大略大長相繼西北邊情告急
命將出師經費不貲又值更化之初賞賚所費不可
勝紀公悉心經畫至志履食供應固缺追完羽流幻
妄之徒所盜內帑錢物載抑戚畹中貴占奪和買民
田及舉正高占引盜乞討織造皆事干權倖怨望叢
集人為公危之公裕如也武皇登極命侍經筵親耕
籍田與九推以列賜白金文綺寶劍幸太學擇真先
師孔子預分獻禮吏部尚書缺言官交薦公又為忌
者所沮盛未幾而伏闕之章上奇禍作矣時其長子
士聰為高唐知州士奇刑部主事謹皆勒令除名瑾
內衛未已乃揭摘部曹遺失簿籍舊事械繫至京下
詔獄考訊欲置之死公與司馬東山劉公同在圍園
倡和自若人服二公雅量理官狀上仍稱旨罰栗一
千石監押赴大同覲納贖以他事赦次罰栗二千餘

石自是產業蕩然貧稱資以給公亦不以為意越二
載罪人伏辜詔還職給并士聰士奇俱得致仕兩京
言官交薦公才望氣節足勝大任不報予在吏部數
薦之亦不果止國是既定公論大明而公年逾八十
老且病不任事矣公雖不出而璽書誥命先後疊降
所以尊崇獎勵之者近歲所無天下想望其風采有
裴晉公韓魏公之風焉而天不畀之上奇邇爾考終
是可惜也公素少疾家居好吟詠老尤能作楷行細
字已卯患感風疾左手足不能舉延醫問藥竟未收
全功又越八年而卒卒之前二日雷電大作屬殞之
辰烈風四起天宇晦冥牙者如市皆哭盡哀中外
聞訃俱痛惜不已公家居行義可述者甚多鄉里
化之惟恐惡聲入其耳平生有贊卷奏職歸田錄若
干卷行於世原配張贈一品夫人蔡卒獨居三十年
恒念糟糠不再娶距生正統辛酉九月二十六日八
十有六子三長即士聰起鄉薦次即恭政君才諱行
業方獨用於時次士賢起鄉薦歷官開封同知以公
老乞侍養進階兩淮運司同知致仕孫男七長廷彥

以詹補國子生俊光祿寺典簿次廷臣中壬午鄉試
次廷瑞即受詹光祿署丞考次廷承國子生次廷偉
登丙戌進士授南京戶部主事次廷棟廷選習舉業
孫女四長適國子生郭瑤次適李旦張元憲都憲之
子一尚幼會孫五景休景維景愈景俊景傑曾孫女
三諸子卜以卒之年月日葬于邑東大錫溝之新原
所予因憶國朝文臣諡忠定者惟少師襄公一人襄
公重厚博大為當代名臣公德量器與之同而得位
行志則未若襄公之顯且久也至論其嫉惡之嚴任
事之勇襄公之在當時恐亦無能勝之哉是宜銘銘
曰
河山聖靈希世之奇奮其六翮乘風以飛周覽八極
止于帝廷以世所施亦昌其辭苟利于國死生以之
有姦作孽太阿倒持請借尚方鍊以徇之我躬弗恤
奚以官為不死者天先名而歸帝有錫命尊之養之
炯然而逝以莫不悲以終視始公不恤死有歸新所
其藏在新後千百年壤之樹之

明南京吏部尚書致仕進封新建伯王公墓誌
銘
明 楊一清

正德己卯寧濠稱亂江西鳩集群盜發數百艘而東
遠近震動巡撫南贛都御史王守仁伯安傳檄隣境
舉兵討賊時其父南京吏部尚書王公致仕居會稽
有傳伯安遇害者人謂公曰盍避諸公曰吾兒方舉
大義吾安避之或曰伯安既仇賊賊必陰使人行不
利於公避之是也公笑曰吾兒能棄家討賊吾何可
先去以為民望祖宗功澤在天下賊行且自斃吾為
國太臣恨老不能荷戈首敵即有不孝猶將與鄉里
子弟共死此城耳因使人趣郡縣宜急調兵糧為備
禁訛言勿令搖動人心鄉人竊視公晏然如常時眾
志亦稍稍定茲不旬日而伯安之援報至矣初賊濠
東下將趨南都伯安引兵入南昌奪其業賊聞大恐
急旋舟伯安帥吉安知府今都憲伍君文定等大戰
於鄱陽湖賊兵風靡遂擒濠并其黨與數百人獻俘
於闕嗚呼自古奸雄搆亂雖有忠臣義士必假以嚴
月乃能削平禍難伯安奮一呼以身臨不測之淵

呼吸之間地方大定公聞變從容群覓聚賊屹不為
動伯安得直前列國不嬰懷面顧以成懋績公之雅
量伯安之精忠義勇求之載籍可多見哉及是武廟
南巡權奸妬功構飛語陷伯安跡甚危眾慮禍且及
家公竅若無聞卒已今皇帝入嗣大統始下詔表揚
伯安以公名還京師因得便道歸省尋論功封推誠
宣力守正文臣特進光祿大夫柱國新建伯又以廷
推恩南京兵部尚書叅贊機務錫之誥券封公勳階
爵邑如子俾子孫世其爵適公誕辰伯安捧觴為壽

公蹙然曰吾父子乃得復相見耶賊濫之亂皆以汝
為死矣而不死以為事難猝平而平之然此仗宗社
神靈朝廷威德豈汝一書生所能辦此譴構橫行禍
機四發賴武廟英明保全今國是既定吾父子之榮
極矣然福者禍之基能無懼乎古云知足不辱知止
不殆吾老矣得父子相保哺下孰與犯盈滿之戒覆
成公而毀今名者耶伯安跪曰謹受教公自是日與
姻黨置酒宴樂歲暮舊疾作嘉靖壬午春二月十二
日終於正寢得年七十有七未屬續時使者以部咨

將新命至公尚能言趣諸子曰不可以吾疾廢禮宜
急出迎既成禮慨然而逝計開工賜諭祭命有司治
葬事伯安偕諸弟卜以卒之明年秋八月某日葬公
即東天柱峯之南之原具書或使督詣鎮江請予銘
公墓予義官外制官太常按公班行不鄙謂予以知
言見待予還南京太常尋贈以文公校文南畿道舊
故甚洽正德丁卯公取嫉權奸歸致仕予亦避讓講
謝病歸杜門不接賓客公直造內室慰語久之伯安又
予掌經時首引置曹屬號知己公銘當予屬頌以江

西之雙閣繫公父子大節特先書之乃按公門人國
子司業陸君深所著狀摘而叙之曰公姓王氏諱華
字德輝號資菴晚復號海日翁嘗讀書龍泉山中學
者稱為龍山先生上世自瑯琊徙居會稽之山陰後
又自山陰徙餘姚四世祖諱性常有文武才國初為
誠憲伯所薦仕至廣東恭議峒苗為亂死之高祖諱
彥達祕湖漁隱年六十娶父屍自苗壤歸莫痛父死
志弗疏終其身人稱孝子會祖諱與瑋號避石翁學
精於易嘗望得震之大者謂其子曰吾後再世其與

與其父乎祖諱世傑號槐里子以明經貢為太學生
卒父諱天叙號竹軒初以公貴封修撰後與槐里公
俱贈嘉議大夫禮部右侍郎今以伯安功俱追封新
建伯祖妣孟氏封淑人妣岑氏累封太淑人進封太
夫人公生正統丙寅九月孟淑人夢其姑抱緋衣玉
帶一童子授之曰婦事吾孝孫婦亦事汝孝吾與若
祖弓于上帝以此孫畀汝世世榮華無替故公生以
今名名長兄以榮名符夢也公生而警敏始能言槐
里公口授以詩歌經耳輒成誦稍長讀書過目不忘
六歲與群兒戲水濱見一客來濯足以大醉去遺其
所提囊取視之數十金也公度其醒必後來恐人持
去以投水中坐守之少頃其人果踰而至公迎謂曰
求爾金耶為指其處其人喜以一錠為謝卻不受年
十一從里師授業日異而月不同歲終里師無所施
其數年十四嘗與諸子弟讀書龍泉山寺寺故有妖
物為祟解傷人寺僧復張皇其事諸生皆畏氣走歸
公獨留居妖亦寢滅僧以為要假妖嚇恐且試之百
方不色動僧謝曰君天人也異時福德何可量弱冠

從學張公時敏試其文與少傅水齋謝先生相甲乙
張公並以狀元及第奇之召遂起故家世族爭禮聘
為子弟師浙江方伯祁陽翁君良擇師於張公張公
曰必欲學行兼優無如王某者翁親造其館賓禮之
請為子師延至祁陽湖湘之士聞而來從者踵相接
居第之梅莊別墅中積書數千卷日夕誦讀其間學
益進祁俗好妓飲公峻絕之三年如一日祁士有化
服者歸連舉不利成化庚子發解浙江第二人明年
辛丑廷試第一甲第一人授翰林院修撰甲辰充廷
試彌封官丁未同考會試宏治改元戊申與修憲廟
實錄充經筵官己酉滿九載以竹軒公憂去癸丑服
闋遷右春坊右諭德丙辰命為日講官賜金幣四品
服公在講筵音吐明暢詞多切直每以勸聖學戒逸
豫親仁賢遠邪佞為勸孝順嘉納焉丙侍李廣方貢
辛嘗講大學衍義至唐李輔國結張后表裏用事眾
以事頗涉嫌欲諱之公朗然誦說無少避忌左右皆
縮頭吐舌上禁聞之不暇罷講遣中官賜尚食皇太
子出閣詔選正人輔導用端國本公卿多薦公自是

日侍東宮講讀眷賜加隆戊午命主順天鄉試辛酉
再主鄉試應天得士為多壬戌遷翰林學士食從四
品祿命授廣吉士業修大明會典為纂修官書成遷
詹事府少詹事兼學士掌院事與編修通鑑纂要
最遷禮部右侍郎仍兼日講武廟副位遷祭江淮諸
神乞便道歸省以奉太夫人年高乞歸便養不允明
年改元丙寅賊瑾竊柄士夫側足立爭奔走其門求
免禍公獨不往瑾衛之時伯安為兵部主事疏瑾罪
惡瑾矯詔執之幾斃廷杖眾南流以去瑾復移怒於
公尋知為微時所聞名士意稍解與公一見且將柄
用焉公竟不往瑾益怒丁卯遷南京吏部尚書猶以
舊故致慰莫必往謝公復不行遂推尋禮舊事與公
不相涉者勒令致仕既有以其同年友事誣毀之者
人謂公當速白不然且及罪公曰是為能晚我我何
忍評吾友後伯安復官京師聞士夫論及此將疏辯
於朝公馳書止之曰汝將重吾過耶公性至孝初竹
軒公病報至當道以不日當還官宜出受新命公卧
家不出日憂懼不知為踰月卦始至勸勉幾喪生

莫穴湖山遂廬墓下墓故虎穴虎時群至不為害久
且益馴人謂孝感化致仕岑太夫人年近百歲公壽
過七十猶朝夕為童子嬉戲以悅親左右扶掖不怠
須斯去側太夫人卒塊坐辟踊過毀致疾及莫徒跣
數十里疾益甚竟以是不起處諸昆弟為友愛祿食
贏餘恒與共之視其子若已出氣質醇厚坦坦自信
不立邊幅議論風生由聚而發廣庭之論入對妻孥
無要語人有片善亟稱之有急惻然赴之至人有過
惡則盡言規斥不少回曲坐是多遭嫉忌然人諒其
無他則亦無深怨之者識宏而守固百務紛沓應之
如流至臨危疑震蕩眾披靡惶惑獨卓立毅然不為
變若是蓋有人不及知者矣公之學一出於正書非
正不讀客有仙家長生之術來說者則峻拒之曰修
身以俟命吾儒求法長生奚為儉素自持貨利得喪
不屑為意棲居厄于火質積一空親朋來救焚者款
語如常為詩文取達意不以雕刻為工而自合程度
所著有龍山稿坦南草堂稿禮經大義諸雜錄進講
餘抄等稿共四十六卷藏于家初配贈夫人鄭氏淵

靜孝慈與公起微寒同貧苦昭昭蹟以秦舅姑既貴
 泰倫不衰壽四十九先公三十六年卒建室趙氏封
 夫人側室楊氏子男四長即伯安守仁名別號陽明
 子其學運於理性中外士爭師之稱陽明先生次守
 倫太學生次守文郡庠生次守章女一適南京工部
 都水郎中同邑徐愛初鄭夫人附葬穴湖已而改殯
 郡南石泉山石泉近有水患乃卜今地葬公云惟古
 賢人君子未遇之時每以天下國家為己任出而登
 仕其所遭際不同而其志有遂不遂非人之所能為
 也公少負奇氣壯疆志存用世顧其業恒在文字間
 而未能達之於政際遇孝宗講筵啟沃聖心簡在柄
 用有期不幸龍馭上賓弗克厥用晚登八座旋見沮
 於權奸偃蹇而歸豈非天哉然有子如伯安所建立
 宏偉卓犖凡公之所欲為而禁不得施用者皆於其
 子之身而顯施大發之公又親及見之較之峻登大
 受既久且壽而泯無聞于世者其高下榮辱宜如何
 也王公之先有植槐於庭蔭後三公者趙石翁大有
 之占其類是乎銘曰

孰不有母孰如公母壽七十之喪僣僣拜舞百歲而
 終歸得其所孰不有子公子天下士實其忠勤以傳
 其事不有其身惟獨之義是子是父父先武勳在
 冊府帝錫之爵未其生不負而歿不朽銘以要諸人

光祿大夫柱國少保兼太子太保禮部尚書武英殿大學士致仕贈太傅諡文襄帝公墓誌銘

明 楊一清

嘉靖丁亥春二月少保兼太子太保禮部尚書帝公以目疾久未愈求致仕先是凡三上疏乞休不允至是上若曰卿學行才識朕所簡注方賴輔成化理而卿疾猶留志不可奪宜勉從之特加武英殿大學士以示優異然不欲卿遠去賜第京師月俸支如故尚書謀議以臣不違賜勅為宣朕志卿其承之蓋自國

初以來文臣得謝恩禮之優未嘗有是命下而公卒是月十日也訃聞上悼惜為輟視朝一日贈太傅諡文襄諭祭九壇初喪文出御製備述君臣始終之義聽者感動給官舟遣行人馮震護喪歸其鄉凡葬事則遣工部主事張淑督有司治之又官其子中為尚寶司丞卿與之優亦前此所未有嗚呼上之所以待公者如此地下有知亦可以自慰矣子忠將以四月某日扶柩祭京師還蜀葬於遂之涇水壩弟家陵之原其弟翰林修撰春狀公事行率中哭詣子請為誌

銘訥諸幽子與公為知已公未嘗負子子亦何忍負公按公諱書姓席氏字文同別號元山系出蜀潼川州之遂寧七世祖友軫以上譜牒遺失無所於考及軫生福號橫崗學博而遂寧遊元草廬吳先生之門橫崗生汝霖汝霖生思恭思恭生璵公大父也父祖憲娶於吳是生公少穎敏強記既冠為古文有時名補縣學生宏治己酉舉鄉試庚戌第進士壬子授山東鄒城知縣地曠人稀川歲溢為患賊繁民苦輸公察其所疾苦若而釐革之勸民墾闢荒畝生業漸拓轉徙他郡若多來歸作新甯舍以其餘力謀諸生講說科目漸多得人癸丑歲饑倡義民輸粟擇人公地為粥食之多所全活嘗效古人五保甲法守望相助盜賊莫敢入境戊午召入為都水主事去之日范祖遜道留之不獲為立生祠事之皆清江嚴漕舟稅不苛而財用裕所規置條格代理者遵行之至于今考漕運額未作誌附以已見庚申改戶部陞員外郎甲子雲南書晦公疏言致災之由係天下不係一方因論列時政荐廟嘉納辛酉陞河南按察僉事理也

政時兵部議奏勸復之曰舊額以足兵食所司承望
風旨許民產以徵屯稅訟獄興公為緩其徵民
待奏後溫記二縣民訟河難地至殺人積十餘年不
決撫按屬公勘處公諭民曰汝等爭地耳思戕民命
乎否為直之使汝不復爭也歲大饑撫按議賑時縣
守中貢甚橫督修黃河諸工役腹削無算所在縣然
公曰第停工役禁剋削不煩賑濟撫按從之民稍安
田賊流劫汝鄆間公督軍剿平之賜白金文綺正德
己巳陞貴州提學副使吏方士鮮知學公立教約迪
以正道時王伯安謫龍場驛公每學擇其秀者一二
人集省城書院延伯安為師士始開古道趨正學庚
午進賀萬壽表歸至河南予自陝西被詔為司徒過
諸驛舍中詢之曰河南省試黃河策其出乎乎曰然
予曰貴州宜無勞子河事關係頗重非子孰克任之
予入朝尋轉吏部薦公河南承政意以河事屬之而
公以外艱歸其卿矣癸酉服闋北上擢浙江按察使
風采一新訟牒填委決斷如流剔姦剷蠹雪冤釋誣
老吏無所措其手甲戌遷山東右布政以丁內艱去

丁丑服闋補雲南雷益州土官構怨為亂道塞撫按
受命撫勦議以屬公公遣人諭以禍福指授夷兵方
略到期平之夷首伏誅事聞被賚白金文綺遷福建左
布政宸濠之變公募軍二萬赴援道聞賊平而歸建
道山書院以記閩中諸賢擢右副都御史巡撫湖廣
定藩戶則以均徭役築沿江堤岸以備水患蕪得省
城號三虎者置之法人心稱快長沙知府貪酷顯著
而巧於附麗願得旌獎公發其贓以萬計坐謫戍嘉
靖改元以大禮稱號事聞常召義當正有所論列道
聞詔下乃止尋陞南京兵部右侍郎以獻帝尊親恩
贈祖及父如其官祖母及母俱淑人尋南京戶部京
軍乏糧與怨公規畫得銀數萬給之稍安貽書執政
奏截運儲五十萬以給軍餉南直隸大饑戶部議發
銀賑貧公疏謂江北漕場廩鳳諸郡災傷為甚蘇松
常鎮次之畿寧池太又次之執政始議遣大臣往賑
公適上賑粥要議眾喜曰此任幸屬此公也時賊等
塞近人至相食盜起莫可制公受命講求時宜謂給
散銀米寔滋弊端且畿民命在旦夕若待編審事定

將無遺類矣設粥則所賑皆貧民乃令州縣每十里一局先發見銀市米為粥饑民趨之全活者若干萬衆盜賊漸解乃以奏截運儲及戶部所發銀給粥兩月饑孽稍蘇始定議米銀間月惠給人活實惠甲申春南京刑部主事今禮部侍郎桂公夢以公及吏部員外郎今少詹事方獻夫大禮疏錄奏上下其議再命遣官徵入京懷公者乃咸謂賑粥非善誇議紛起公疏乞終事尋以稱本生詔下工公來事乃得卒三月時陞禮部尚書公疏辭不允南北言官交章劾公又疏休致以全臣節溫旨褒答仍命吏部趣之入京五月公再疏乞休并上所撰大禮考議有謗公侵賑濟銀者乞差官覆勘上遣近臣偕戶部及法司會查公渡疏乞放還不見使者趣相望於道公不得已北行至德州聞百官伏闕被逮繫上疏乞省學士豐熙等未許仍趣至京陛見初廷臣執議以為人後者為之子謂今上宜孝孝母昭聖太后稱本生為叔父母上勉從之既下詔矣然終以為疑公及今兵部侍郎張公聰少詹事霍公翰抗議謂上以聖祖兄終

弟及之訓入建大統非為人後者尊號宜具寔以稱廣合古經禮爭論數年幾成聚訟至是上下公等及廷臣先後所奏會文武百司集議於朝衆論既定卒如公等言合疏以請大禮始告成為公謂禮成之後宜圖新政以答人望乃疏列十二事皆指陳時政觸犯忌諱言人所不敢言者而言官復有所劾公杜門三上疏乞罷俱不允乃出視事乙酉大同五堡軍叛殺衆將及撫臣又奪總戎印并令旗焚之却死罪將官朱振於獄求立為帥朝廷懼後振謀兵以討其亂因命禮部請新印給振公疏以唐潘鎮之禍為鑑宜追究原印不宜輕給與執事意忤銜之著丞何淵奏獻帝宜附太廟公引漢宣帝故事請於南城北建廟廟奏可乃定世廟之議修憲皇帝實錄命公為監修官公上所修大禮集議四卷纂要二卷降手勅加太子太保賜白金五十兩給燕衣四襲頒書於天下梓行之公又疏辭加官不允丙戌二月會試為知貢舉官廷試充提調官五月偶感暑疾在告目漸失明又具疏辭上遣中官齎賜牲酒食米瓜蔬來問疾又賜

詩遣官慰問以獻皇帝寔錄成進少師兼勅如故賜
白金文綺鞍馬公以世廟告成宜做宋郊祀報恩之典
將光日議禮獲罪諸臣從寬矜貸詔獎答又疏舉禮
部尚書起復羅公欽順自代重修大禮全書以公為
總裁公立朝僅二載有餘所賜賚白金文綺者十一
賜宴禮部者四賜文獻進考敏一歲獻皇帝宸翰及
達中官齋酒米蔬肉來問疾者各三賜詩者一又賜
三代誥命贈曾祖父祖父父俱少保數太子太保禮
部尚書曾祖妣祖妣妣俱一品夫人乞休荷溫旨讓
答十有四日望勿藥將用之內閣典機務而公不可
起矣比屬續時呼弟修撰及子中丞榻前曰自檢平
生清苦體國一念可贊鬼神即死無媿工若問遺言
第曰願朝廷親君子遠小人分別邪正審於取舍而
已語畢而逝公生天順辛巳四月五日壽六十有七
配張氏封一品夫人子三長即中次恕舉卒次和庵
國子生女二長適順天府推官譚閔次適御史陳講
男孫三俱幼公孝友天至有弟四人詩與記先卒撫
諸孤如已子次即修撰次承舉進士為給事中寶公

誨之於成公讀書信道學求理性窮探苦索務窺蘊
奧居常以卑自牧主義之所在則勇往直前無忌避
言若不出諸口至當大事決大疑發幽析紛則盡其
明辨衆莫能奪取與一介不苟門庭如水然不以其
自負且以先人跡其行履素孚於人作官所至聲聞
藉甚却使者剴薦未嘗不及其名官至侍郎尚書計
日可得而直以議禮之疏與衆不合譚言遂與一倡
百和牢不可解公方自信不疑謂公論在萬世不待
辯而達禮君子固有先得公心之所同然者矣初桂
公疏上或勸公宜勿承不然將忤衆得罪公不肯以
書質予予復之曰公既寔有此疏今安得不承亦據
其所見者耳何必同此尚書命下或止公不宜來予
曰上命若是公不去恐衣冠之禍起矣比公入朝聖
心悅擇上下相安消重禍釋隱憂不可謂無功也是
時上方面新政理公特被知遇假之歲月所建明樹
立可量哉天顧喪其明又遺其年使不克大究厥施
以沒嗚呼其命也夫銘曰
惟士窮經或不達於政公以經術飾其政令析繁舉

劇心得乎應要其終卒歸乎正當風春禮衆恃公以
定士有從政或未開於禮公執典禮以佐天子謂禮
弗習如跳地弗視群咻奈何曰有人配匪衆之狗惟
權度在己我求天知亦求同理食少慮多云胡不傷
能畏其目不奪心以明煌煌禮書匪裁曷彰有命自
天公不起在床帝聞曰嗟我鑒斯亡曷顯我忠曷遂
我良辭以誅之公雖歿有耿光稽行易名無忝文襄

明榮祿大夫太子太保刑部尚書見素林公墓

誌銘 明 楊一清

今皇帝嗣位之初勅名致仕都察院右都御史見素
林公於其家尋以廷薦陞工部尚書公具疏辭溫詔
褒答不允又與維吏部尚書不果嘉靖壬午春正月
公強就道既而改刑部尚書遂間又上疏辭再荷溫
旨不允且趣其來以五月四日入京陛見上注視久
之朝紳皆動色相慶曰見素先生來矣立朝僅十四
閱月疏乞歸輒荷慰留且遣鴻臚諭意特免朝參在
部治事公甫出又辭疏凡八上情益迫上重違其志
從之加賜書俾乘傳以歸有司月給公廩三石歲
給人夫四名供役使命有司歲時存問公以聖恩過
重又上疏辭不允癸未八月陞辭賜酒饌寶鑑以行
大夫士留之不得設祖餞之都門外立傾朝省相顧
慨嘆曰見素先生歸矣家居踰年得末疾具疏預辭
身後卹典且及時政薦名臣教人以助輔德士大夫
每遇諸人輒問公眠食起居卜其安否為世重輕越
三年丁亥病且革草遺奏勸上勤學親賢任人圖政

保養聖躬恭衍皇儲及再辭卹典遣其仲子適上之
比齋曠野伯子達授遺言曰吾莫當莊所費不通四
五十金毋煩官府至絕猶強作聲曰聖躬曰皇儲不
及他事遂卒是年四月六日也計關於朝縉紳交相
悼惜曰見素先生亡矣遂以書投適告哀于予曰先
子海內之交今惟我公一人身後之託匪公曷賴予
因憶宏治壬戌與公同官留都嘗謂予曰我二人後
死者當為銘誌言無食子謹識之嗚呼孰知果踐斯
言於二十六年之後哉公俊名待用字見素其號世
為莆人出唐九牧卽州刺史蘊後國朝有為寧國教
諭者諱圭稱普儒公高祖也曾祖諱據祖諱宗號敬
齋為揚州教授亦師儒父諱元旭號鞠莊母黃氏以
公貴祖若父俱累贈工部尚書祖母母俱累贈夫人
公生秀朗比就外傳穎敏異常兒年十六卽善屬詞
岳蒙泉先生時為莆守甚加賞識年十七祖病劇祖
母欲為之娶辭弗肯明年祖母復病強之娶以祖未
大祥固辭不肯君子已知其志向之不凡矣補郡庠
主游心理學業專尚書而也經亦多誦習學古文辭

科舉業若不屑為意成化丁酉舉於鄉戊戌連得進
士西涯李文正公見其所著作語人曰是他日當以
文名世者後利部主事遷署員外卽明習刑書執法
不苟而卒歸於平恕陳白沙先生以薦至京公日與
講學大有所得時妖僧純曉挾近倖梁方以秘術進
得被殊眷發內帑銀數十萬營建大鎮國永昌寺公
上疏極論之請斬純曉而黜方言甚激烈憲廟怒不
可測公自公必死料理家事待罪於闕下尋詔下獄
加刑對益厲後府經歷張嚴上疏論救併下獄捕逮
方得姚州判官嚴宗州知州時言路久塞臺諫喋不
敢作一語由是公二人直聲振海內人化之風朝陽
云三原王端毅公在留都疏乞還之以勵忠會元日
聖鑒慈廟感悟遂復南部丁未孝宗踐祚廷臣交薦
之惟雲南按察副使俗崇釋信鬼鵠慶元化寺稱有
活佛歲時士女會集勒爭以金泥其面公按鵠慶命
焚之父老言犯之能致寃煩緣公與約續薪同之果
寃即止已而無驗遂焚之得金數百鎰悉輸之官代
民償通邑費邊方諸淫祠三百六十餘區所在學宮

做撤其材新之咸趙州以所得盜贖銀四千餘兩
為工作費城民不擾暴客遂戢民為立生祠事之
上官奪印相讐殺公開誠諭之多感懼送印出不煩
安遠近諸夷憚其威信莫敢不服宏治辛亥用薦擢
按察使調湖廣風儀整肅屬吏斂不敢犯禁正私儲
有忌之者以弗諱吏部擬為延緩巡撫江西陝西左
右布政皆不報公乃上疏陳時政且引疾乞休不待
報徑歸時年四十五已而言官交章論薦起為廣東
右布政使辭不赴庚申起拜南京都察院右僉都御
史提督巡江黃理孫江至南京再疏乞歸不許時江
防顧弛公悉心經畫多所釐正正身率物與張簡肅
公至名清約都人化以有唐楊綽之風為陝西地震
水溜公疏援古人徵應指其時忌又疏乞錄正人以
端國本時武廟在東宮謂宜預教因薦謝方石階靜
夫楊方震諸賢堪任輔導廷議屢推戶禮二部侍郎
皆不果壬戌江西盜起言者以守臣不職勒遣公往
巡視公至榜示盜許自新抵新昌親入賊巢渠首王
五率眾出營擒四十餘賊自効凡有名首賊出片紙

指示巨姓悉諭之餘孽稍解散巡撫吏定約處稅
糧均徭役廢務一新又建義倉義學義塚以阜俗戒
軍藩祿糧價值以裕民論府殿易琉璃瓦之非至引
莊公叔段弑王凡杖為言時寧濠雖橫未有逆萌每
裁抑之或疑其過卒乃服通歷所至問民疾苦脩南
元公狄梁公二祠丁母方夫人憂歸守制武宗嗣位
兩京言官交章論薦得旨起用吏部奉奏為右都御
史南北直隸巡撫南北兵刑二部侍郎皆報罷江西
士夫群疏於朝乞還公乃擢右副都御史巡撫公疏
力辭俄丁艱莊公憂瑾竊柄蓄逆諸紳多被奇禍公
憂之忽有詔命尋改巡撫湖廣又改四川藍鄙之寇
方劇公陳師鞠旅領軍今故事將致賊而撫之恩報
賊將攻保寧也縣即取道救之猝遇賊於華隴軍與
直抵其巢巢朝廷德意示以福禍賊頃首伏地公曰
吾撫汝賊羅拜而謝約日請降既而淫雨溪溢賊夫
期疑阻遂公黨將謀擾州縣要害川兵晚不能支公
取將領等命新以徇既而資之諸軍股東皆願立功
自贖於是何定者先發諸軍併力擒斬盡之自是連

戰皆捷賊衆披靡人畜死者枕藉漢溝渠魁多授首
捷聞降勅獎勵時兩川所在皆賊衆四十餘萬公督
兵進剿凡戰皆捷擒斬勅數千級俘獲無算已而江
津賊曹甫復起公開報馳赴幸未元日衆賊醉無備
乃夜半蓐食衝鋒而往圍而燒之遂斬曹賊前後所
得賊級又千數百人藍郭餘寇復熾公督兵追勦賊
勢窮蹙撫然猶狐疑計緩我師總制尚書洪公誘其
渠帥四十八人執之捷聞降勅獎勵晉公右都御史
賜白金文幣公辭陞賞不允江津餘寇方四等收合

數萬人來攻江津公追逐大敗之擒斬尤多捷聞復
被銀幣之賜初播州土官楊友興其兄愛爭襲已奏
華其宣撫職既乃以萬金賂瑾求復公言亂階不可
啟宣撫不宜復忤瑾意會瑾誅乃得無事公又奏瑾
雖誅權猶在近倖安知後無復瑾者乃請朝廷擇取
宗室育之宮中召用先朝舊臣劉健謝遷林瀚王鏊
韓文以脩復舊政意指斥新用事者屬公請致仕忌
者謂盜已衰易與耳即可其請命下朝論大駭科道
乞留不果公歸蜀人號哭追送之未幾而兩川之寇

復作矣癸酉甲戌予在吏部奏起公連薦南北學院
事及兵部尚書皆不果已卯寧蕨人反科道又交薦
公未用卒已公年七十一在藩卽久知其名故首被
召用未入覲上疏乞親近儒臣與相可否以臻至治
且言自古人君未有不親君子而能成治者又言新
詔之筆所謂壞極而不得不革者也然貴近之臣或
稱不便圖有變更不知一革變則諸革盡變未宜壞
天下公議時近倖寢有用事者故疏及之既蒞任命
侍選庭會暑罷講公疏言學貴緝熙禹惜分陰且平

旦未與物接其氣清明善念易開正言易入不宜輒
罷是時寺觀齋醮祈禱疏闊異端省不經之費歲輔
役多民困富室盡投陵戶免役公奏處陵戶以定事
體近倖家人私賈番貨勒未報忽內批貨給主公請
究請托及營救者得旨仍沒官內監奏補匠役公謂
啟釁階亂不可從皆人所難言者內侍某寵擅一時
其私人某犯法御史併劾某事下刑部寅緣內降取
付詔獄公言奉詔則廢法守法則違詔臣寧違詔不
敢廢法上尋悟不深究公立朝掾正甚多而此舉士

論尤快之在任速屢起累罷雅志林壑不繫心得喪
官皆不及滿考閑居不忘愛國聞朝廷進一善人行
一善事則喜否則戚然不樂遇歲早率先請禱發廩
蠲賦消弭寇患皆指授所司為之或不便於民輒以
直告鄉人有直曲不能平者得其一言無不曉感去
性儉約在官一介不苟取茹淡服蔬蕭然若寒士深
厭末俗侈靡欲以身為鄉邦表率主義所當舉義畧
無新惜鄉隣貧不能存者歲給以粟喪助之棺衾婚
嫁助之財率以為常而暮功之親尤為御家嚴整事

父母曲盡孝誠治喪與祭一循家禮鞠莊所遺推與
諸弟一第無子家獨裕公不與子以姪後之人以為
難葺上墳墓而九牧之墓資費尤多擇地重建邵州
忠烈祠祠田以俟族祀為鄉先賢修祠立後尤好接
引海內名流後進之士極力獎與多成大名書非正
不讀作文上遡先秦追韓歐遺軌而本之六經一出
於正詩宗唐杜陵乃出入黃山谷陳無已間初視之
若有隱澁語久而咀嚙悠然有餘味為碑板流播通
四方求者日踵接于門有見素詩集文集各若干卷

梓行于世配方氏果封夫人子三人長即連起進士
累官南京吏部郎中志行克肖人比諸范純仁云次
適以周即庠生皆文而向正不忝父風男孫及南及
人及祖及士女十人公之生景泰壬申二月十日得
壽七十有六葬在某山其墓以某日事狀出兵部侍
郎山齋鄭君亦詳且核據而書之如此所未及者皆
之銘銘曰

何物浮屠竊我民憂禍水沒淫孰障而支廬居火書
公唐逮之川人恃險習亂成性招莫我馴與之不靖
活我建我公宋忠定劉初百蔡丹青炳如一大不獲
罪寔在子宋范希文唐陸敬輿不苟為同不矯為異
無人無我惟求其是忠信所孚斯人諒只反澆而淳
植儒以起後死有託謂我知已大書特書國有信史

明經表孝廉文林郎監蔡御史梅峰陳先生墓誌銘

正德乙亥陳先生如賓書林墳成明年丙子得自肯
哭既而母封太孺人張氏卒先生號哭獲地如疾謂
山齋曰吉云未可知吾平生所事見素所友執事又
甚謂予曰畢竟如何予曰吾而兄也勉就樂以觀天
意私叩其家無一新衣為之盛備甫畢氣絕十二月
十有六日也是日天氣慘黑道路流數吊者皆失聲
先生無子予立其族子遠揚為後與松崖山齋治其
喪守馮君以棺來助越明年正月六日遠揚奉張奉
先生塋配贈孺人鄭氏以墓塋土未乾德人先趨意
其如何士民具此行群請之守帥言之地撫王君應
鵬以開禮部覆可蓋巧賜額表宅里進之鄉賢以祀
月給米以卹其家始先生以孝廉為吏部所知奉食
學祿養母辭建以布政使陳君珂薦上特嘉清苦月
賜米三石資養又辭上溫旨諭受及是命三曠典也
先生諱茂烈字時周陳為瑞安大川顯姓曾祖伯洪
功陞興化衛總旗傳慶四又傳贈吉安府推官善祥

為先生父父卒先生甫十四歲家貧忍食以飽黃氏
祖母讀書時夜分黃憫其贏喻止遂點燈點誦究心
道學作省克錄自考黃卒苟所居者其餘直貢山碧
瀨以英二表親貢土石墳成間日一視父之三五日
一視哭盡哀而還胡憲副榮重古行禮為子師會試
道遇趙徒附之者幸在抵京師如封付之附者請半
先生曰某省去君若存何半大學試第一進士出使
東廣盡却贖金修禮陳白沙因領靜一之誨退而與
東所私論難為吉安推官持大體開主誠通以民瘼
之熱豪家利寡婦財誣詐婚所從守志夫制悍妻嫁
有娠之妻既生子歸承其業族人爭之驗與好火為
類爭者媿服時張守本以嚴擊強徐輔以寬當道尚
深峻徐聞解為霽信孚上下官有賢薦而民有去思
郡志列在名宦考績歸主淮以乏寒具凍幾死所知
覆以飯養為政為監蔡御史袍服樸素借騎一牝馬
身若無官而自係風紀之重尚書伯者子受賂崔省
以道士起皆根植自固言者屢劾不動先生再劾佞
去而崔猶留先生以母老乞終其養供母外短床飯

希不辭一政懷身治畦一餐頤給薪此則執小油益
 妻子服食粗糲一女而彭惠安孫輔嫁其涼薄皆人
 甚不堪而泰然自足日坐斗室究極五經四書之旨
 體驗心身隨得隨錄常曰儒有向上工夫詩文時土
 並耳孝廟上賓與予相對慟哭逆瑾亂政相對憂憤
 至羅織重罰以恣毒士夫先生曰某僅有死耳予起
 征藍先生杜門養靜怡頌深而充養熟隱表粹行對
 天地質鬼神鄉國有懼先生知為愧予嘗評第物品
 黃憲官寧之右得在孔門可幾閔冉程朱高弟子無
 儀焉薦者謂唐約如石守道而養獨純孝行如徐仲
 車而所處尤困殆未足盡著予識先生諸生韓洪洞
 問蕭人物予曰從吾又問以先生對韓曰以蕭再指
 一書生耶予曰是友自純家居相信尤深每晤言豫
 慮消熄宿疾為頓愈先生亦惟予言獨契嗚呼由今
 其後斯人耶予既誌其壙又銘其墓其先生私耶張
 壽八十九先生壽五十八墓五窆封孺人蔣及余壽
 立預焉銘曰
 化樞物也陶靈範精光氣之會公得其清星爛日章

後先輝映迄宋宗儒于斯為盛公有正悟意往神趨
 靜存動克一真自如搜竄記聞亦敏則有探幽索微
 元象誰受世局斯下和論崩端始風幸還亦允斯觀

明故中順大夫温州府知府文公墓誌銘

楊循吉

宏治丁巳冬十一月上起南京太僕寺寺丞文公於
家以為温州知府公抵廟堂書力辭不果從遂以單
舟赴任至之日首犗繫徒千人民大悅既而以法約
豪強咸尊於令設施詳明惠洽黎庶尊禮耆德風以
丕厚蓋一年而政化茂行竟用己未六月乙未卒於
官年五十有五凡遺所著文章總三十卷別為奏議
三卷鄉瑯漫抄一卷嗚呼偉哉公諱林字宗儒其先
衡山人永丞相信公之族高祖俊卿元末鎮遠大將
軍湖廣管軍都元帥佩金虎符鎮武昌曾從祖定開
從高皇帝平偽漢賜名添龍功授荊州左護衛千戶
曾祖定聰從其兄兵中署散騎舍人始徙浙而祖惠
遂居長洲不仕父洪易州涑水教諭贈太僕寺丞母
陳氏贈安人繼母顧氏呂氏以詔恩封太安人公
舉成化壬辰進士官保尹公方典銓除令數人獨以
公為永嘉曰此吾所知能作繁者也公其時英敏精
悍尤銳于治每聽政必開門縱人入觀環前後無禁

剖決神異輒傳為故事有貴堅者事李中監為暴於
境上率不能制公設策捕而斃之獄聚緝快者數郡
名遂籍籍他所為梗草皆類是於是旌為浙令第一
而知者咸期以大用父喪解職起服再知博平邑小
無事惟以勸農訓士為業人甚宜之而抗悍權要猶
向風益勵鑿渠運學雖居弗久亦具有勞可書乙巳
以積名遷朝眾咸議公必為御史當茲落有所為或
曰斯人在小官尚剴訐如是況列之臺端乎竟補南
京太僕寺丞太僕政久弛弗振部內吏皆驕不奉法
公為奏按其敎人逆著為令得提問官吏其後又以
留都教場將官不當換官為又不送烙凡劾大小犯
總等四十餘人皆抵罪而辭有所連不少借鑒為之
清公盡心為事深究其法以必致報國自效為已任
曰吾言卒聽其可有見而弗獻遂調叙古今事宜論
蓄收之計上為策三篇冀其道行初兵部尚書為公
嘗延公問邊略公辭以未習因請論焉遂以謨重至
是疏下即識其便者檄公為之會公尋以移疾歸歸
凡六年不起而溫人以其永嘉之政思得公甚故朝

廷以為守其民喜若獲父母窮山谷皆提携出迎惟
恐後而不得見溫多訟多盜俗尚鬼好溺女公悉為
科條處分莫不備善即獄屋空境之暴無一敢肆民
生女皆育而前後所毀淫祠治盡又作族範訓其民
而導以化本溫用是清謹未生駢聽其在郡凡達上
七疏皆賦役章程不可已之事中一疏以災異自劾
求退而論鎮守剝民尤切百姓益敬事公無敢欺而
公思歸日甚將圖潛逃人輒知之閉其城不得行乃
留視事以迄於歿然而積疾哭喪溫之人亦於公無
廢禮焉公博通當世之故遇事敢言以獻替為心上
初即位大廷讜論公適朝京師遂進聖政十事畢輸
所學皆本諸經術立議醇正得匡益之美其在博平
又論邑內德府賜田子粒謂官校徵收不便極陳利
病乞付有司自具以納既上或傍懼嗾指疑事巨糾
公不卹卒從所請其去歟焉公嘗曰為吏而無建明
其何以職蓋其志存忠愛固天性然也公為人雅喜
交遊其於官無所不可為而尤事持廉臨終或請所
囑大言曰我男子死即死耳何復言人謂公惴惴不

挽至沒猶壯滋可歆憚云公配新氏先卒贈安人後
配吳氏封安人而仲弟孫以進士令郟城且顯於時
子男三人奎璧俱縣學生次室尚幼孫男三人孫女
三人奎等卜以卒之年十二月丙申葬吳縣梅灣之
原乃以狀求碑銘以志銘曰
烈烈文公信國是承克肖劉大敵氣孔盈色絡洙泗
知權守經忠慤自許久惟邦禎公才既優仍為政理
連宰二邑威肅風紀司民之牧衡東旋履庸靖乃人
納于仁軌帝寵休嘉式選之朝俾職廡園大閱于鄧
以咸西夷國武先昭司馬曰賢拜疏以薦舍猶未歸
虞晦用宴山有芳馨道在若息溫人謳思食異公出
天子有命往恢故蹟德風載揚爰徵治實赫焉方隆
胡頌之亞有墓於梅來旌翩翩既耕有田斯菲其旋
何以世之重光永延刻銘茲石用質幽元

墓誌銘五

明二

南京禮部尚書致仕贈太子少保諡文恪月湖先生楊公墓誌銘

羅欽順

國朝士夫留心理學者蓋往往有之以余所聞若河津薛文清公崇仁吳聘君安仁胡敬齋所見若蘭谿章文懿公晉江蔡虛齋豐城楊文恪公則君子之論皆無間然者也文恪公之學開端用力得之其父復菴先生復菴師胡先生九韶胡之師即聘君也淵源固有所自若夫旁搜博取窮深反約則公所自得爲多其乎居之應酬立朝之議論篇章之著述政事之

敷施大抵自其學術中出可謂名實相副者矣乃今已矣公諱蘄字方震號月湖一號畏軒姓楊氏世家豐城邑中曾祖諱德義祖諱行素父諱崇仕終永州知府復菴其號也以公貴祖父俱贈南京禮部尚書祖妣某氏妣劉氏俱贈夫人公自幼穎悟過人成化丁酉以邑庠生中鄉試第一丁未會試第三廷試賜同進士出身改翰林庶吉士移疾家居庚戌授南京戶科給事中丙辰內艱服闋改刑科戊午以便養請改南京兵科初管後湖黃冊即奏行清查法請與戶

部委官各行回報以相參對由是所察戶籍無不實
若兵部議贍洪武永樂年間冊公奏言年遠冊或不
完暴之天下姦且日滋非便然遠年之冊誠戶籍根
源宜添造冊庫稀架薄堆以便揭查晒晾從之公志
切匡時以經筵講學爲出治之本疏每上必懇懇致
意嘗因地震劾奏用事大臣首薦張元楨吳寬李東
陽王鏊劉戡宜備日講講讀書宜用大學衍義時論
建之吏部尚書王恕被譴力言公卿中不可無恕所
宜優禮請斥遠譴和無爲所惑楊茂元盛應期因事

獲譴坐奏乞叙復他所論薦如周英周孟中王鴻儒
張吉王雲鳳劉元劉大夏謝鐸林俊曹瑋等皆有時
名屢上時政便宜凡十數事又兩因邊鎮有警陳言
備禦數事朝廷采納幾盡又嘗論宋儒周程張朱從
祀之位宜右漢唐諸儒又因闕里重新請更立木主
以革裔教未用識者惜之庚申陞南京光祿少卿嘗
入賀千秋節陳言輔導元良其說尤備間考瀾藩卿
試得士爲多丁卯陞南京太僕少卿俄遭外艱服除
陞南京通政司右通政前此軍民投狀或緩不行公

謂政主於通不宜任情行止悉分送所司仍存其底
備考壬申冬陞順天府尹屬醜園犯邊命將出師者再
所須車輛約費銀千兩公以水旱連年根本宜慮力
言於兵部移大興通運所餘銀以給之仍奏免派補
又奏免夏稅一萬五千餘石又令農民改撥者量入
資爲賑濟備民甚賴之慮各屬巧取民財每歲辦創
作底簿具載其都數撒數使上下通曉無能爲弊凡
徵稅則例卿飲義節悉加裁定遇鄉會二試所需悉從
官給盡草和買借辦之援府收例銀前後幾二十萬

公立法簡而有制類解既便且絕侵欺昌平縣以歲
辦不前奏准陞州請轄密雲順義懷柔三縣三縣復
奏不堪事下公議乃均車輛十之六於三縣使州無
偏重釐各官馬夫銀於均徭使不得多取定陵戶貧
富撥補之法使不得影射皆著爲令公名素高人或
疑其用及是見其施設優裕計皆經久相與信服翕
然乙亥春陞南京禮部右侍郎疏論交修論廟祀論
巡遊語皆切至駕臨舊都即奏言臣僚冠服當如朝
儀又請謁太廟皆得俞旨今上登極用廷薦陞尚書

首進太學衍義節畧有旨褒答又申論大禮以堅上意諸卿佐皆附名焉前後凡八疏乞休癸未春未去益力上察其情詞懇切特允所請賜勅給驛月廩與夫皆從優典公歸則取勅中語扁其堂曰願保杜門却掃縉紳益歸重焉乙酉三月十三日以疾卒於正寢其生景泰壬申八月十一日享年七十有四巡撫都御史陳公洪謨以聞上嗟悼贈太子少保贈諡文恪遣官諭祭者再并治塋域以丙戌十二月二十二日塋邑東銅湖之原東向公配贈夫人陳氏前卒至是遷柩子男三長畋邑庠生次放陝州判官俱戴室陳出次畋邑庠生女一適國子生丁森俱戴室黃出孫男一女四公事親篤於養志間嘗移祿以具甘旨其自奉蓋甚薄也敬事伯父友愛諸弟姪始終無間清約嚴重望之凜然就之則言溫氣和有足感發人者愛人好士一出於誠意士有同郡者數輩病於逆旅日往存問或不祿殯歛皆親蒞之自初下第歸及仕且顯從遊者日益衆每講說旁引曲證務令得聖賢指歸乃已平生所著有文集六十卷劄記三卷奏

議四卷家規一卷所述有新增河洛淵源錄先天後天圖學考證太極圖纂要分類程氏遺書二程年表西銘旁通皇極經世塔鑰象山語類洪範纂要禮樂書皇朝名臣言行錄皇明理學名臣言行錄選註風雅源流唐詩詠史絕句白沙定山詩星畧算學發明綴算舉例醫學舉要名醫錄凡二十餘種初公疾且甚遺言諸子銘我必羅整菴及卜塋得日甚迫至是其季敬始克以公命來告欽順於公有世契交久逾厚其敢以淺陋弗稱辭行狀乃公門人孫荊州存所述既詳且信是誠得所據矣惜不能盡書也銘曰學以為己惟明與誠惟聖有謨詒我發程明必無疑誠必無偽仰止聖賢庶幾可至卓哉文恪情及群書既采其蘊爰握其樞篤信力行隱顯一視有煥其光文章政事事君惟敬非道弗陳臨民惟簡小大歸仁典禮留都公則既老疇不知公用公不早平生著述其書滿家衡道之嚴毫釐敢差生為醇儒沒承顯諡元室有銘徵於百世

凌溪先生墓誌銘

明 李夢陽

嘉靖五年十二月乙丑中奉大夫雲南左叅政凌溪先生卒於家越明年十二月庚申葬郭東三里官左原先是訃至大梁其友人夢陽既為位哭將絮酒束芻使使往奠之會其弟應辰以書狀來徵銘曰先生天下士也先生固雅善公敢以銘請而其子藩致懇辭更苦讀之令人淚霑霑下曰凌溪以文崇其身所謂世人皆欲殺者乃天亦忌之使弗延耶夫人者顧子誄之備矣乃其心康之文足白之矣而予復奚言者

志曰凌谿先生姓朱氏名應登字升之揚之寶應人也生而聲奇童時即解聲律諳詞章十五盡通經史百家言其父江陵者異之然懼其踰也約之古凌谿悟乃著申臆賦以見志而力彈於淵學於是饒醇探鬱程猷經用噴英摘華樹聲藝林矣年二十舉進士時顧華玉麟劉元瑞麟徐昌穀積卿號江東三才凌谿乃與并奮競騁吳楚之間敎為俊國一時篤古之士爭慕響臻樂與之交而執政者顧不之喜惡抑之北人樸恥乏黼黻以經學自文曰後生不務實即詩

到李杜亦酒徒耳而柄文者永弊襲常方工雕浮靡麗之詞取媚時眼見凌溪等古文詞愈惡抑之曰是賣平天冠者於是凡號稱文學士率不獲列於清街乃凌谿則拜南京戶部主事陰欲困之凌溪割勢斷錯乃顧亨於官而學愈淵居無何陞延平知意州郡史必難乃凌溪為之愈益亨乃於是陞陝西按察副使使提學凌溪開正學院群秦士高等其中置官設徒豐餼嚴約談經講道至者且數千指風教大行文自韓歐來學者無所師承迷昧顯則我明既興隆本雖切然與要未聞也及凌溪等出創觀駭疑大不容於人人各以所不勝相壓而凌溪性挺直不解假詞色於人更哆憎口恨不即寘之幸例調荒裔往禦魑魅尋陞叅政卒罷去凌溪歸潛伏草莽中溫繹前業期十年盡償所願而今亡矣噫嗟嗟悲乎悲乎人忌之天亦忌之耶夫城眉胎禍才美殃毀順往逆來孰非爾者然英人志士每甘心窮約而不悔者徒以人者難必而天者足恃也十年之內徐何載淪凌溪胥沒天實忌之矣人何尤哉噫嗟嗟悲乎悲乎凌溪生

成化十三年正月己未得年五十醫旨曰先富後貧
病從内生言淺狹之易折也凌溪廊落易直憎口日
哆而聽之如蒼蠅過耳斯其量可與億億心者道
哉退研精耽推訂律歷運數譬史質經底詮名實流
覽今古橫睨宇宙視軒駟直躬狗耳大命中奪爾志
長畢非天忌之而誰忌耶卒之日適邑官來謁揖讓
而氣絕斯病内生之否邪噫嗟嗟悲乎悲乎凌溪他
所奇節隱行與凡歷履宦業忠孝友義言動細小莫
之具述第述其生死大槩關運數者如此詩文則自

有集行於世江陵公諱訥封南京戶部主事配范氏
封安人江陵父瓘以處士州郡徵之不應嘗與修英
廟實錄處士父宗泰宗泰父彥明往會凌溪面咨其家
世趙宋間名之修者居於吳爲學官宋季北徙徐名
實臣者元初爲將軍元季徙寶應我朝名昉者通判
耀州後謫戍爲京衛兵然莫詳其系次凌溪娶於陶
亦封安人子一曰藩孫子女各一藩篤古世其家學朱
氏弗衰矣銘曰
陸有時洋湖有時桑不萌者人於惟其文凌溪子墳

原缺

明故中奉大夫四川右叅政崔公墓誌銘

明 李夢陽

嘉靖五年十一月廿六日中奉大夫四川右叅政崔公卒
於家年八十有八歲矣先是其子南祭酒銑抗疏求致仕
歸是故公之終所事無憾焉君子謂祭酒能子矣公諱陞
字廷進號南郭學者稱南郭先生其先樂安人也有諱大
者生彥和彥和生剛趙庫大使後累贈中憲大夫延安知
府大使娶於蔡後贈恭人以正統十四年十二月十四日生公
於安陽乃後遂籍安陽公童時會父失官貧兄五四各出自
營獨次兄父母居日一食然猶樸也而公於書顧益攻久之
悍母蔡憐之泣謂曰兒從兄貴不易效抑公弗聽顧愈益
攻書年廿六李給事中者見之異焉遂女以女後封
淑人明年爲成化乙酉公舉于鄉己丑登進士第拜
都水主事改武選以父憂起改主客又以母憂起武
選擢職方員外郎出知延安府陟叅政敬歷中外凡
三十餘年公既以力致青雲巨才洪識卓越倫輩
而冰蘗奮勵無殊寒約遂能輝前裕後慶流于子
孫至今相人訓學誨德必曰不見南郭公少時貧邪

今人凡少貧至貴顯必婪而公主客時番人有踰請者業賂鈞樞者許之矣日趣上議而公執弗命名番人夜持玳瑁奇香各十餘斤餽公斤之出旦聲其事遂寢公雖歷三部階五品然僦屋而居兢兢如火時出則一瘦馬青布袍耳僅日出拾馬遺淑人李維諸新主變之故自爲郎官識者業以台輔期之矣先是星變求言公與餘干蘇章同奏豎闔干政妖僧蠱惑援底陰壬竄逐忠良所致又言兵部尚書王恕今之伊傳不宜置之南京奏入不報而他言者或頗入宮

禁秘審上爲之怒於是書言者六十人姓名於屏擬升則絀其級不則遠惡地於是吏部故遲公獲免孝宗即位乃有延安之命遣都瘡耗習猾而俗喬公至立規畫固局鑰謹簿書節浮浪省遊宴時出入退果萊私園乃清疆場數徵稅平徭役鋤豪橫招流逸壅荒閒實康庾乃始葺廢墜療疾疫敷行布惠煦邪崇禮興學誨徒咸鑿鑿名實詳具行狀中先是成化末郡大饑民大半亡漢中山谷中公蒞郡復者十六七會屢豐斗米數錢耳斯不足觀政邪公嘗見宜川知縣

唐來馬鞍驚曰鞍如是華耶廉其價近百金曰有一鞍道百金者邪遂收按之果盡獲其貪狀黜來又杜文祥者延之巨猾也見公惠而實易之每大言曰崔誠好貧官也聞其自少貧吾起大獄必使之寤意公聞之必闕節而公佯若不知者已而有發其殺人事者公鞠之然罪不至死遂生之議者謂公內明而外容剖大決疑靡動聲色頗似雅主亦相之山川之鍾歟而不知履堅貞識體負氣自即署時定矣在郡七年擢四川右叅政宏治丙辰監營壽王宮於保寧役者數萬人費數而力舒戊午逆甲王於境民無擾者人稱之公行部勾稽既詳顧又喜廉臧否與僉事曲銳齊名蜀人語曰崔叅曲僉屹如雪山常如松茂得瘡疾久弗愈己未秋遂致仕歸歸三十年至是卒公恭儉出於天性少壯隱顯一耳故能芻蕘樵文錦布緇輪奐蓬茅器無飾銀服無裁綺家居檢書課農灌溉花竹年踰八十則日焚香靜坐精神內瑩聰明長存出入不杖屨之日顏面猶生也雖天畀之遐如報公者然祿位未極議者每有蒼生之憾斯非命而何耶

嗚呼傷哉公生子三長南祭酒也次鉉次弢女亦三長適丁璽千戶次適賈澤次適張吉俱學生孫子四滂舉人次汲次涌次洋女六長聘樊剛錦衣衛指揮次適劉仁學生次適李世隆次適張宗茂學生餘尚幼曾孫子一士桌女一公卒之明年月日葬彪澗之兆與李淑人合淑人先公六年卒業自有志刻石銘

曰

積之豐用之嗇中折其翼井濊終食象賢肖德有瑗有實妥公茲域聚靈發祥虎變鶯翔英英洋洋後其

大昌乎

高處士合葬誌銘

明 李夢陽

高處士者大梁人也名瑾字彥節年六十八歲正德四年二月五日而卒葬鄭門塋矣後十有二年爲正德辛巳而其配侯氏亦卒以明年正月廿七日啓處士窆合焉侯氏少其夫二歲卒之年七十八矣生二男子長曰珣東明縣丞擢知縣又知東光次曰珵從弟提殺之二女子一歸周錦驛丞一歸陸澍典膳珣生三男子長曰爵次曰仲嗣縣學生次曰叔嗣舉人珵一男子曰愛李子曰孔子有言善人吾不得見之矣得見有恆者斯可矣予誦其言未嘗不酸心流涕也蓋重傷時俗之偷云夫惑廢成真溺華忘實礦金璞玉非其人莫識也乃人見藝材辯博豪縱赫霍輒歛讐慕效稱賢或戎冠飛纓氣使威喝則又嗟羨敬事之迹令閭閻山野個朴自脩力田飭行之夫閭閻無聞不見禮於華流吁時之偷亦甚矣乃余今幸知高處士處士固閭閻人也夷考其行則孝弟儉直者也少事母歲時上壽自歌舞爲歡事其二兄旦趨侍上食而退出則爲執鞭或道旁伺顏色益猶事

父云長而喜誦書史說先王然不務裘馬不喜酒不
畜媵婢嘗歲暮出取負欠割券馳一空車歸里人望
見盡笑之處士不較也珣丞東明也強逆處士官郎
載額曰吾自不入公府今公府居耶會舊令代之去
問處士曰我孰與新令賢處士然然熟視之已而曰君
似弗如也令嘆服其直人又言處士家居里巷子弟
見之爲起拜肅立僮僕假借不復關白其主人雞豚
放猶一家斯亦足爲淳風矣侯氏若岩之女也事姑
猶夫事母事二嫂猶夫事二兄嫂之子提殺璐也侯
與處士計曰吾尚奈有珣奈何令伯氏無後卒出之
獄以百金詣處士謝處士不受詣侯謝侯亦不受曰
吾利而金出汝耶君子謂夫婦者足爲德驂美者
矣而顧咸聞沕閭閻弗彰吁足傷已足傷已珣之知
東光也亦強逆侯侯弗往曰汝父不怙公府吾獨能
跋涉就汝也人言侯即老親戚子弟罕得見其面禮婦
人問答不踰閭出則擁蔽其面殆斯之類也夫叔嗣
曰吾先有上人也高皇帝定天下也立幟以定民曰
赤幟軍白幟民曰義者傳白幟遂徙大梁從民義生

一子九九生一子清清娶李氏生三子聰讓處士銘
曰
墨不能朱石不能糜松柏冬榮厥操詎移居約履難
驗秉觀頤我蹟彼蹶彼昭我晦匪財而富匪爵而貴
蹈貞服朴是曰民良高恰布衣孝弟直方閭里起敬
閨人贊襄臧獲循循子孫赫昌今之梁孟考世莫識
不有曰季孰知冀缺不有景升孰欽龐德我言匪無
徵此銘石

滙亭先生墓誌銘

明 李夢陽

先生姓徐氏郢城人也名聰字聞博嘗寧滙上於是稱滙亭先生力行篤學苦節清修以廉孝聞春母病思櫻非時無從得先生泣禱行彷徨叢薄間遇櫻歸母食之愈人大異之稱徐孝子夫冬林之笋水溪之魚固非時者也精誠之至氣變以之故巢幕之雀避舍之蚊君子不謂之恠也斯亦足以知天矣今例第不以孝文則第孝子乃爲諸生攻文文又弗第也乃以貢爲醴泉縣學訓導云李子之西也嘗往來奉天之墟是時訓導罷矣乃土人猶往往能道訓導行事季子聞之則慨然而嘆曰吾不試故藝向使渠非小試之安知不目其兀兀之腐夫訓導之訓其徒也先行而後文制外以養內講肄以端其習考覈以程其規模的以大其業宏博以遠其思抑揚以應其志夏楚以鼓其氣久之士慨然若失也勃而變已翕而從翻然而革訓導乃忻忻喜曰吾志其行矣於是構齋植竹我冠委裾講唐虞周孔之緒而乾州學會官缺檄訓導往攝之久之而乾之徒猶其徒也於是人始知訓

導敬重之謂之才醴泉飢錢參政者出帑金千緡訓導賑之或謂錢奚捨縣而任學也錢曰人也孝廉孝則不忍人廉則不愛金飢婦有剝膚食者縣捕之將磔之市訓導見之則泣曰不能使之不飢而能使之不膚乎非情也夫剝膚救斃耳而今磔之是以斃易斃也令釋之人間之愈敬重訓導謂其才乃使攝其縣事縣以之治於是豪人懼歸我侵田於學志行矣無何免去或咎之訓導直晒曰子謂我兀兀腐夫耶其亭滙上也年向衰矣猶聚徒說先生顧益篤即大寒暑罔輟也晚病目省延接矣至遇經生學子則顧繾綣竟日李子曰予之南也當度滙矣於是又獲知滙亭先生云而滙上人益至今稱恭儉鯁直篤行耽學必首先生先生宣德乙卯三月廿七日生卒正德辛巳九月一日年八十七歲娶陳氏義士陳某女先卒繼廿氏壽官甘鍾女年五十三歲亦先卒甘生徐固舉人女聘舉人趙應式卒側室趙氏生徐確女適袁昂卒徐生曰於乎吾父幸有聞抑孰知吾母者母貞懿寡言起家勤矣追孝遠矣逮下患矣途路瘁矣然

弗壽弗貴矣抑孰知母者按徐氏諱侯國初始徙郢城城西三四里許其世墓也以正德年月日葬應亭先生於墓而二配合銘曰

梗楠在山匠氏之恥和璞終韞玉人其鄙囊穎攸脫乃飲乃歸剗耀刮垢鉤蹟探微約之身授其文以擬其嗣人先民哉

恭議韓五泉墓誌

明 王九思

五泉子者姓韓諱邦靖字汝慶朝邑縣人也自稱五泉子父曰蓮峰先生諱紹宗仕爲按察副使母恭人閻氏蓋宏治戊申閏正月初一日子時生五泉子是夜恭人夢五色雲中奏咸韶之音已而玉女十餘持葢擁一童子入室覺而生五泉子五泉生而靈異三歲而能誦古詩百首四歲而通孝經小學五歲而讀論語文王至德篇掩卷若有思者蓮峰先生問之對曰卽如是武王非矣八歲而通舉子業十四歲而舉於鄉二十一舉正德戊辰進士予與武功康德涵愛其才推爲庶吉士不果明年己巳拜工部虞衡司主事乃奉部檄十庫監收庫官官不爲禮五泉子自坐前席官官怒給曰卽尚書至因起徹坐五泉子詰之答曰公無預庫事者止一飯耳五泉子曰然則我當去矣答曰當署案五泉子曰豈有署案不預庫事者乎竟前席坐署案尋又監收黑窑廠主廠者宦官厚燕接殷勤之數五泉子不顧自起視秤分毫無所假宦官雖怒甚然無可奈何未幾抽分浙江市舶去矣

先是抽分部使者往往避嫌乃重取於商爲羨餘以
自白五泉子乃下令曰非巨木若竹木成器者不稅
稅課舊領府幕官乃奏議寄布政司不與府幕官以
部使者侵漁而府幕易與耳又奏議以爲抽分司刑
獄宜下按察司以防出入詔皆奏可故事抽分司覬
鎮守太監歲千金是時鎮守劉太監者又谷大用之
黨五泉子固不與金劉太監怒久知其爲人不怒愈
益敬之會宦者從京師來倚其近倖索抽分錢甚急
劉太監從旁勸曰幸無求韓主事我富有以贈公也
及代入奏乃課額不足部尚書及工科給事中皆以
法劾五泉子五泉子亦自劾求罷會國老有知其故
者賴以無事壬申春南北畿內河南山東諸郡盜起
天子命將征勦工部官例一人前除當前除者數人
皆懼不敢往言之部尚書有泣下者次不及五泉子
部尚書知五泉子素勇可使數目五泉子五泉子毅
然請行後亦天祐幸不害比歸選員外郎都水司出
奉部檄清查直隸山陝諸路歷年班匠銀兩既見其
民貧乃奏議罷徵是時急於用財不許後以乾清宮

災竟罷可而天子於是方以災異下詔求直言者五
泉子歸止上疏曰夫民者樂安而思治惡危而厭亂
向背之際甚可畏也臣竊見陛下自即位以來朝政
不修經筵罔御盤遊無節狎近群儉摧折骨鯁之臣
閉塞諫諍之路百度乖違庶事叢勝府庫空竭閭閻
流散盜賊災異薦至迭興危亂之形已成社稷之憂
將大頃者乾清宮災陛下下詔求言在位群臣疏論
剴切時政缺失指陳略盡天下之人皆以爲天心仁
愛啓祐聖衷必將延覽聽納草既往之愆圖維新之
化澤潤生民永昌社稷在此一舉不意陛下徒事虛
文不修寔政凡諸過舉仍遵往轍臣工章疏罔有施
行而部官黃體行乃又以言罷去天下人心莫不驚
然沮喪以爲陛下遭此大異因循恬安尚復如此陛
下無悔悟之期天下無治安之日渙散文雖不可收
結書曰民可近不可下下尚不可况使之離哉夫親
離若家散民離者國搖故漢儒有土崩之言先哲有搏
沙之喻臣每念及此寔懷隱憂伏望陛下以社稷爲
念將各官章疏采擇施行將前後言事得罪之人并

黃體行取回錄用于以收既散之心心還將來之福
澤天下國家不勝慶幸疏上天子震怒下錦衣衛獄
給事中李君鐸率衆論救之乃得奪官爲民其後御
史師君存智范君輅給事徐君之鸞皆奏起用皆不
果卒已秋今上即位起爲山西左叅議分守大同於
是感激奮勵單車就道草奸平獄權豪斂跡然分守
道故無印由此多弊乃奏議請照提學官事例給關
防不報是時天子修定策功封爵太濫而高山陽和
諸衛軍士奉例開懇草場數千餘頃皆爲豪家占種
乃前後上疏論列又皆不報未幾大同歲饑人相食又
奏議請發內帑賑濟不許爲之撫然泣下輟食將再
論之或曰君之心蓋矣不從者責有所歸也獨奈何
自苦如此答曰言而不從自謂己責已盡而委咎於
人此詐臣之自便而釣名者之爲也復抗疏論列累
千餘言不報侍郎臧公鳳經略邊務嘗奏書薦之而
曰臣見左叅議邦靖顏秀夙成操心平正問學博洽
議論淵源使之提學必能以身率士裨補治道巡撫
都御史楊公志學給事中俞君集亦奏薦之皆不果

五泉子慮其舊疾復作乃上疏乞歸於是都御史張
公文錦奏留之而謂宜陞本道兵備副使以慰軍民
之望然歸志已決乃復上疏報未下即行御史朱君
寔昌奏書薦之而曰邦奇邦靖學問自相師友君節
交相砥礪乞將邦靖病痊起用邦奇者苑洛子也吏
部具奏上報曰如御史議西歸之日軍民遮留道上
以萬計號泣不忍舍去五泉子亦爲泣下而嘉靖癸
未二月初十日抵家於是謁孔子廟揖縣令拜先壟
牲見於祠堂稱觴壽母與諸兄弟燕會終日甚樂也
乃十八日病損食不豫洛子爲迎醫甚衆乃愈益病
四月初十日衣冠如平生呼苑洛子曰我其逝矣十
九日必大雷雨即爲我戒衾衾又曰先君之歸在是
月二十一日我強待之好作忌辰也十九日果大雷
雨苑洛子爲正冠然已不能語而搖首苑洛子泣曰
待二十一日乎乃首之及二十日而苑洛子復問曰
歸在明日乎不應苑洛子痛哭曰吾弟力不支矣又
首之已而果卒距其生蓋三十六歲云蓮峯先生病
寢處其側者四月餘及卒哀毀幾死其事伯兄縣令

君邦彥及苑洛子及處其弟國子君邦翊極兄弟骨肉之愛有朋友忠告之益又嘗爲其姊李孺人吮疽鄉人蓋嘗立碑表其孝友云而其愛民之仁律己之廉食用之儉細行之必矜臨事應接之敏其事皆可書者不具書其在浙得代歸而同年趙推官者以屈安人病無子買女婢遺之拒不受此又人所難能者書之以爲世法

徐昌國墓誌銘

明 王守仁

正德辛丑三月丙寅太學博士徐昌國卒年三十三士夫聞而哭之者皆曰嗚呼是何促也或曰孔門七十顏子最好學而其年獨不永亦三十二而亡說者謂顏子好學精力瘁焉夫顏子雖既竭吾才然終日如愚不改其樂也此與世之謀聲利苦心焦勞患得患失逐逐終其身耗勞其神氣奚啻百倍而皆勞死黃馘此何以辨哉天於美質何生之甚寡而壞之特速也夫絕龜以夜出涼風至而元鳥逝豈非凡物之盛衰以時乎夫嘉苗難植而易稿芝榮不踰旬蔓草雖而益繁鵲巢他燬遍天下而麟鳳之出間世一睹焉齒周以降清淑日浼而濁穢薰積天地之氣則有然矣於昌國何疑焉始昌國與李夢陽何景明數子相與砥礪於辭章既殫力精思傑然有立矣一日諷道書若有所得嘆曰弊精於無益而忘其軀之弊也可謂知乎巧辭以希俗而捐其親之遺也可謂仁乎於是習養生有道士自西南來昌國與語悅之遂究心元虛益與世泊自謂長生可必至正德庚午冬

陽明王守仁至京師守仁故善數子而亦嘗沒溺於
僻釋昌國喜馳往省與論攝形化氣之術當是時增
城湛元明在坐與昌國言不協意沮去異日復來論
如初守仁笑而不應因留宿曰吾役異人五金八石
之秘服之冲舉可得也子且謂何守仁復笑而不應
延曰吾慕黜吾昔而遊心高元塞兌斂華而靈株是
固斯亦去之藐藐於世遠矣而子猶余拒然何也守仁
復笑而不應於是默然者久之曰子以予爲非邪抑
又有所秘邪夫居有者不足以超無踐器者非所以

融道吾將去知故而完於埃壘之表子其語我乎守
仁曰謂吾爲有秘道固無形也謂吾謂子非子未我
是也雖然試言之夫去有以超無無將奚超矣外器
以融道道器爲偶矣而固未嘗超乎而固未嘗融乎
夫盈虛消息皆命也纖巨内外皆性也隱微寂感皆
心也存心盡性順夫命而已矣而奚所趨舍於其間
乎昌國首肯良久又曰冲舉有諸守仁曰盡爲之性
者可以冲於天矣盡魚之性者可以泳於川矣曰然
則有之乎曰盡人之性者可以知化育矣昌國俛而

思蹶然而起曰命之矣吾且爲胡甲吾且爲流澌子
其照然屬我以陽春哉數日復來謝曰道果在是而
奚以外求吾不遇子幾亡人矣然吾疾且作懼不足
以致遠則何如守仁曰悻乎曰生寄也死歸也何悻
津津然既有志於斯已而不見者踰月忽有人來訃
昌國逝矣王湛二子馳往哭盡哀因商其家事其長
子伯虬言昌國垂歿整衽端坐託徐子容以後事子
容泣昌國笑曰常事耳謂伯虬曰墓銘其請諸陽明
氣益微以指畫伯虬掌作冥冥漠漠四字餘遂不可

辨而神志不亂嗚呼吾未竟吾說以時昌國之及而
昌國乃止於是吾則有憾焉臨歿之託又可負之昌
國名禎卿世姑蘇人始舉進士爲大理評事不能其
職於是親老求改便地爲養當事者目爲好異抑
之己而降爲五經博士改雖爲京官數年卒不獲封
其親以爲憾所著有談藝錄古今詩文若干首然皆
非其至者昌國之學凡三變而卒乃有志於道墓在
虎邱西麓銘曰

惜也昌國吾見其進未見其至早攻聲詞中乃謝棄

脫淖垢濁修形鍊氣守靜致虛恍若有際道幾朝聞
避夕先逝不足者命有餘若志璞之未琢豈方頑礪
隱埋山澤有虹其氣後千百世曷考斯誌

西河散人墓誌銘

明 韓邦奇

西河散人郭守道自號也散人者散散之人八極之
表淅落之淵舉萬物莫得而拘焉乾坤不得覆載我
日同不得照燭我雨露不得霑濡我四時不得寒燠
我陰陽五行不得化育我究其本真歸諸大源莫容
莫破莫得而名焉又其次爵祿不能維繫我貨利不
能引誘我功名不能羈絆我寵遇橫逆不能感激我
若千仞之鳳萬里之鵬飛翔扶搖于天衢之外人孰
得而攀之散之義大矣守道自號也何居考其言論
幾於窺次散之意乎守道天資異趣冒襟脫落觀其
外循循乎若無懷氏葛天氏之民也叩其中其莊南
華列元洞之儔歟郭氏闕之大族祖父以來中衰矣
守道裕然自適若無不足者既老猶不長尺寸初里
人以守道之能能大郭氏者勸之營產業爲妻子計
守道曰法聞之斯世羈棲之宅也夫婦偶合之情也
兒女邂逅之恩也吾身性真之主也夫羈棲若至暫
也性真者至重也偶合之情邂逅之恩至輕也夫營
全於至暫之寓者愚哉至重以趨至輕者惑法弗能

智亦安敢愚法弗能惑亦安敢惑法不敢愚且惑故不敢勞勞然以傷吾真也有嘗守道於市者若罔聞知人或爲之怒曰郭守道何有於豎子耶顧爲之辱於市守道曰人之所爭者勝也彼嘗吾吾固勝矣今夫人於羣衆之中曰某德之表也則將欣然而悅之矣某德之棄也則將忿然而怒之矣彼無故而嘗吾於市彼德之亡衆所耳目也彼固自嘗而頌吾德矣焉用較有司兩舉鄉飲皆不就或謂之曰鄉飲禮法之所在也深衣幅巾所以示成德也斯固榮名之所

焉守道曰吾叟何悲也叟曰吾傷乎流水之無盡吾生之易窮也吾始成童吾祖父携吾舟於斯國若是之蕩蕩也吾壯而客於江湖之外幾往而幾歸固若是之蕩蕩也古今之代謝生死之相繼吾如水何哉守道曰叟過矣往者過來者續叟見水之無盡也然過者過矣過者未嘗續也焉用悲叟曰子亦何悲也守道曰吾見叟之悲而悲之又以見物我之同情矣水與吾同一體也又何羨於彼乎正德丁丑十二月十一日守道疾革呼諸子曰生寄也死歸也如久客於外而得返鄉園樂莫大焉諸子可勿深哀遂卒年八十三守道諱子法守道其字也吾朝邑大慶關人配張氏子男二長侃起家幾萬金秦府典膳闕雖幾千家莫侃並焉娶趙氏繼娶張氏次爵克佐侃守業娶王氏女一適李倫先卒孫男五孫女七侃之子希孟娶潘希閔聘張氏一適商人樊會一適商人王廷祿一適庠生韓邦達一適商人楊鼎爵之子希會娶衛氏希冉聘王氏希顏未聘一適秦府典膳姚本源一適商人何騰一幼未字銘曰

守道又有言曰地無撮勺之土天無呼吸之氣江河
巍巍而高泰華滔滔而逝晝昏昏而夜昭昭象兩翼
而鶴兩齒茫茫宇宙孰生孰死載觀斯言亦敬之旨

資德大夫正治上卿太子少保吏部尚書贈太
子太保許公墓誌銘

明 景 陽

公諱進字季升號東崖姓許氏河南靈寶人系出周
文叔至隋楚州刺史法光先生唐燕國公紹紹生國師
為左相國師生力士洛州長史力士生敘敘敘生
輔軋海東慰勞使輔軋生經同州刺史因家同州經
生克一克一生田田生承宣宋給事中承宣生待用
國子博士待用生巨圭舉進士巨圭生宗都官員外
郎宗生才舉進士贈少傅才生簡端明殿學士簡生
東遷長安東生祥祥生佐金大定中進士佐生炳軍
千戶炳生威兵馬都元帥因西征過靈寶愛其風土
秀麗遂卜居梁村焉威生本本生玉俱百戶玉生五
五生九九娶何氏生仕信仕信娶同邑禮部員外郎
陳歲女生實實娶焦氏生安定教諭娶何氏實生公
十歲隨教諭公任安定授禮經天順壬午領鄉薦成
化丙戌舉進士授監察御史按治甘肅俱克樹風裁
太監汪直妄殺建州夷人以冒功御史強珍劾之直
誣奏彌建入獄公具疏劾直留中不出人多危公已

而得旨珍誦成遼東公奪俸又劾奏直黨摘發直暇
煉之獄憲廟是之遂禁緝防官校直怒公竟以章疏
字訛中之杖於朝幾殆壬申擢山東按察副使爲鄉
試監臨官同事者欲私一貴介公堅不可乃止東昌
武弁子懷金歸與所厚生遇飲於酒家暮散武弁子
被殺且無首執生於官不勝拷掠即誣伏公知其冤
私念必酒家殺之又意貧人得意必易貨忽通召邑
商人莫測其故至則驗閱私歷見酒家以殺之次三
日易布數疋一鞠即服始獲死首於空桑中人以爲

神明爲其他類此者甚多定治戊申遷廣西按察使
未幾擢右僉都御史巡撫大同贊理軍務屢條陳邊
事上多從之武邑王聰沐克縱不檢公奏黜爲庶人
太監石巖貪暴公劾之巖銜公誣公擅用旗幟謫袁州
知府甲寅遷陝西按察使時北寇大寇甘涼以公爲
左僉都御史巡撫甘肅公處置得宜屢有新獲邊陲
遂安哈密舊爲羈縻滿屬捍禦西戎與土魯番構
隙其酋牙蘭遜忠順王陝邑而據其城池爲患幾二
十年公遣人於罕東赤斤等處宣布恩威時加犒賚

得其歡心爭爲用命乃統官軍至肅州命副總兵彭
清出嘉峪關調赤斤罕東等處兵馬聲援直抵哈密
克復攻城破之日城中土人爲牙蘭脇從者八百
人聞兵至懼誅登高臺不下公開諭之始下當時有欲
屠之以圖功者公不從卒得全活丙辰遷右副都御
史巡撫陝西丁巳年召爲戶部右侍郎進左侍郎賜
誥進階通議大夫贈祖考皆如其官贈祖妣妣配張
氏封繼高氏俱爲淑人蔭孫一人爲國子生刑部主
事鄭徽無罪下獄公爲疏雪之彗星見公與周司徒

上言宜加修省明用舍省糜費等事庚申北寇寇大
同上命兼左僉都御史提督宣大諸軍事法令嚴峻
忤權貴竟坐奏劾將官不公勒令致仕公歸築東崖
精舍遊息其中若無意於世者而廷臣論薦凡四十
餘疏正德乙丑乃起公未行改兵部左侍郎提督京
營兵馬尋進兵部尚書賜蟒衣上疏勸上勤學問戒
游逸上嘉納之每於團營操練必指授方略而南北
各邊事機處置周悉凡權貴請託多執不從改吏部
尚書賜玉帶加太子少保階資德大夫正治上御賊

瑾東政與公不協誣以他事令致仕久之又令冠帶
閑住庚午八月十八日卒於正寢歛時聞空中有聲
如雷先是有流火入宅蓋不偶也享年七十有四賊
瑾敗朝廷用言者復公官遣官諭祭營葬贈太子太
保配張氏邑處士張本女有賢行先卒繼配高氏側
室翟氏子男八曰詔張出舉人早卒曰誥給事中改
檢討出爲全州判官曰讚御史改編脩出爲臨淄知
縣曰記曰詩邑庠生曰詞曰論俱高出曰誌翟出女
三一適浙江按察司僉事楊惟康一適生員普曰利
一適國子生趙抃孫男七曰佳曰備曰佩曰偁曰偕
曰位孫女二公器宇魁梧賦性端方肆力經史作詩
文春容典雅性至孝嘗承教諭公庭訓捷破指甲後
每舉指輒感泣不已事二兄敬愛甚至家素饒裕而
自奉儉約甚惡貪婪歷官垂四十年冰蘖之聲始於
一節議者謂公剛方正大縉紳選倚其邊功類韓琦
明斷包拯立朝大節貶黜不屈類唐介晚年退而不
用用而未究人以爲歎然祿位名壽兼備子孫蕃衍
科第不乏天之所以報公者未有艾也所著有東崖

集憲臺議平番始末諸作正德辛未某月某日葬於
邑城南石嘴山北麓狀其行者禮部侍郎李公遜學
也銘曰

於維我公爲國元元維文維哲星麗於吳維正維直
蕩蕩周道功在邊陲西北用保勇茹強禦鬼域爰掃
知洞幽晦煩冤以溲名蓋區宇既推孔好志薄層霄
氣卑峰嶸我公之生嵩卽河洛寔不愛賢我公之歿
詎曰物化騎箕天表石山之麓實維公兆佳氣鬱鬱
山水環抱蔭茲後昆萬世斯紹

改齋王君墓誌銘

明 鄒守益

嘉靖甲申秋七月二十五日改齋王君以諫卒於位其配胡孺人恐死歸其喪伯兄恭仲兄愚奉任太宜人命以季弟慈次子東爲喪主越十有四年丁酉尚未克塋彭山季侯謂竹墟屠侯曰吾有司預有責焉乃徵縣庀塋改其子弟謀曰是其可以閑於官卜吉縣東之蹊徑附於十世祖孝子叔可之塋坎山離向以秋九月十八日襄事而虛其右以疎胡孺人孺人泣謂慈曰而兄所與遊率海內豪傑然其密通而存

者宜莫若東廊子慈致其詞甚哀相與淚潛潛下志曰改齋姓王氏諱思字宜學系出晉太傅導其家於吉自南唐處州節度使諱崇文始其徙太和自宋戶部侍郎知諫院諱贊始世以儒有聲國初諱沂以儒行徵說書授官不拜高祖諱伯貞知廣東瓊州府有遺愛祠在瓊會祖諱直少傳吏部尚書贈太保諡文端有傳在國史祖諱楨好學篤行文貞楊公作說王以擬其德考諱休歷官廣西知太平府孝友仁惠整巷羅公銘之改齋生長詩禮中八歲能詩十歲能文

弱冠而舉於鄉是時豪與自許廓如也及卒業南雍與天下士磨礱手書矯輕警惰於座求信國文公像奉以出入及遭外艱塋祭不愆於禮正德辛未第進士以選入翰林讀中秘書每試輒先同列獨不爲應酬文字曰美其辭以悅人吾才所不能悅文以美辭而眩是非吾心所不敢先達嘉其志及授編脩時有倖進爲臺諫所糾慨然乞別授曰進以禮退以義君子俾身自有定法若誘於利而合怵於勢而殉如鄙夫何或咎其立異曰鄙夫非尚同也乎哉聞者咋舌

去甲戌秋上封事以爲孝宗敬皇帝之子惟陛下一人當爲天下萬世自重宜親享大廟孝養兩宮總攬乾綱緝熙聖學豈可嗜酒以荒志好勇以輕身維是任喜怒移威柄弛紀綱摧士氣召天變言甚切至謫潮州三河驛驛丞便道省母以二僮自隨郡守闕景韓書院居之一時俊傑咸從之游陽明王公鎮虔檄使贊軍議曰志行高古學問淵源直道難於趨時長才堪以濟用君感其知與李君子庸偕至尋寧藩變作奪裳宵赴軍門功成亟歸口不言勞庶辰再入潮

自遠請業益盛隨材曲就語疊疊不倦諸生傳錄而宗之新天子改元召諸以直諫謫罷者咸復其位乃改齋自三河入翰林加從六品俸又錄寧庶人功帶吏九品俸預修先帝實錄同考癸未試事充經筵講官夙夜寅恭隱然負公輔望甲申大禮議起與同列疏諍不報既而文端公瑩有水患得請改塋矣七月之望復預伏闕號諫下獄杖朝堂越十四日遂不起驚其居不售無以爲殮公卿察舊相率贈而殮之以歸歸之日送車塞道無不咨涕泣者配廬陵胡氏其父大學生宗大選於諸生而歸之專一而順協相以濟常置側室竟無子有女二長適同邑張司空之孫庠生律次未字今適鄉進士劉教教緝其遺言多散軼得詩三卷文六卷語錄一卷傳於世世襲學湮往往逐時好以羊島自餒其崛起者分門標榜臨深谷以爲高而無欲之要大公順應之學直蹶踣而莫之任若改齋所立加人一等矣而尊尊親師友如弗及講學虔州深求致知格物之實復趨小瀛與甘泉港公切磋所謂動靜兩忘者將融而一之以究大業

以益之不敏方約卧雲玉華玩月武功以盡償所願大命不永甫四十有四悲夫天之不相斯文也改齋資稟華奇而充以學力視豐饒崇卑直如芻狗其之三河也夜半舟飄巨石緣石以坐浩歌達旦及杖以歸猶手書贈廣德詩適動如平時疾革妻女問所欲言止書思母二字其於死生達矣夫復何恨方同志彙集書諷改齋增側室爲俎豆計改齋笑曰大丈夫當爲天下萬世俎豆胡戀戀於兒女子今果詞學宮如所言云東湖吳公曰挺然其節似徂松溫然其和似崑山玉涇野呂公叙曰聞過而喜以季路欲寡未能似遽伯玉世以爲確論銘曰
玉有時燬松有時剪維路維遠百年其顯以忠耜孝永妥於茲嶽

楊黼先生墓誌

明 李元陽

楊黼太和蟠溪村人也素好學讀五經皆百遍訓誨鄉里子弟口不言人過尤好釋典口絕羶味工書善篆籀人勸其入庠校應舉必當有獲笑曰性命不理而理外物乎畢竟何用庭前有大桂樹縛板其上題曰桂樓日夕偃仰其中詠歌自得嘗以方言著竹枝詞數千首皆發明無極之旨每出遊遇林泉會意輒留連不能去然以父母在堂不欲遠離家雖貧躬耕數畝以爲養親甘旨但求親悅不顧餘也一日聞蜀

有無際大士悟道因辭親往訪之半途遇一老僧問曰何往曰欲語無際老僧曰見無際不如見佛曰佛安在曰汝但回遇着某色衣履者即是佛也遂回數日無所遇暮夜至家叩門其母聞聲喜甚即披衾倒屣出戶乃向來老僧所言佛狀也自此知父母是佛不用遠慕由是竭力以事親不下桂樓註疏孝經數萬餘言引證羣書極談性命編摩皆小古篆作字研滴既乾欲下取水研池已盈不知其故自是常然人以爲孝所致禿筆盈家作筆塚於西原以瘞之爲銘

以志示不忍棄也父母歿爲傭以營葬塋畢入鷄足山棲於羅漢壁之石窟中十餘年壽既八十子孫迎歸一日沐浴令子孫拜吾明日午時行矣人見無恙不之信以爲戲言時至誦偈而瞑家人哭泣棺殮既畢子孫親戚皆在柩前燈火熒熒見其自外而入大笑自稱名曰楊黼先生今日事終了也家人驚呼曰爹回來也遂不見蟠溪距城北約二十里城中親友及素所往來之家一時皆見其來言笑如平生而不知其已入棺一日矣李子曰昔邵康節先生將殯於

伊川祖嘗自洛陽舉喪時司馬溫公二程橫渠四先生在這半室棺墜蓋底空然無復有康節軀矣此理何居豈欲破世儒之執耶不然黃帝騎火龍上升堯攀龍舜冲舉顧非吾儒之宗祖乎小子何足以識此竊因蟠溪先生而有感焉故爲之立傳

兵部武選員外郎贈太常少卿謚忠愍楊公繼
盛墓誌銘
明 徐 階

公諱繼盛字仲芳別號叔山忠愍者謚也國朝之制
非大臣不得與於易名公位下乃得謚者今皇帝御
極邇觀化源謂公死諫節甚偉宜尊顯以勵士大夫
故奉遺詔贈公太常寺少卿蔭子應尾爲國子生而
特賜今謚其義則取諸危身奉上在國遘難云初公
舉嘉靖丁未進士授南京吏部驗封主事師事大司
馬苑洛韓公盡通其天文地理太乙壬奇兵陣之學
名聲重一時辛亥遷兵部車駕員外郎當是時大將
軍仇鸞驕然心憚鹵欲利啖之以緩兵請與鹵爲馬
市有成議矣公上疏斥其不可者十辯其說之謬者
五鸞因詆公撓邊計惑衆心詔錦衣衛逮公置訊獄
具貶狄道典史踰年擢之諸城尋遷南京戶部主事
又遷刑部員外郎調兵部之武選嘗獨居深念至夜
分配張安人問其故公曰吾受上恩思有以報耳安
人曰嚴相國方用事此豈君直言時耶公不應而心
自計欲報恩其道莫如去姦人使不得亂政遂以登

丑正月疏論少卿嚴嵩十罪五姦請詔二王問狀公
意以嵩在位久其黨與布滿中外上即問必不肯言
而今皇帝以明聖在東府冀一召問可盡得其實嵩
更借以爲譟詔逮公訊所以引二王者公具對侃侃
至斷指出腔不易詞詔杖公百送刑部獄卽史君朝
賓議從輕比而其長貳皆嵩黨竟當公詐傳親王令
旨絞公之將受杖也或遺之蚺蛇膽却不受曰椒山
自有膽或謂公勿怕公笑曰豈有怕打楊椒山者及
擊刑部劄甚吏畏禍莫敢視公公乃自破甕碗剝右
股出血數升已復手小亦剝左股去其腐肉旁觀者
咸爲戰慄公顧自如在獄三年以乙卯十月晦死西
市臨刑賦詩云浩氣還太虛丹心照千古平生未報
恩留作忠魂補天下相與涕泣傳誦之嗚呼士方平
居語及節義往往扼腕張眉目自謂能之一旦臨患
害僅如毛髮輒心忤色變不敢出一詞或走匿以規
苟免有能自奮如其言者寡矣未有蹈必死而不悔
者也偶出不意蹈一死及既脫率深自懲創毀方以
爲圓又或自滿足不復肯爲危言正色者有矣未有

慷慨激烈赴再死而不顧者也公始忤仇鸞偶不死奔走絕塞間稍稍微用去訖繫時無幾痛苦之狀宜猶在心目自安人所以語公與古牛衣之說亦何以異而公不懼不惑卒直諫以殞其生此其視唐子方諸人且猶過之矧世碌碌者即公死之歲刑部郎今藩叅王君世貞爲求救於嵩所厚嵩曰行卜之其子世蕃不可而其黨鄢懋卿等亦相與爭曰不殺某所謂養虎自貽患也故公竟死公死而地爲震者累年其後給事中今中丞吳君時來刑部主事今中丞張

君紳太僕卿董君傳策相繼論嵩嵩又將殺之奏上地忽震先皇帝悟而止由是觀之精誠之至天地且爲之動矣嵩業已仇公等其必欲殺公不足怪彼黨嵩者獨何心夫其道嵩以殺公恐遺患也然公死七年先皇帝用御史今中丞鄒君應龍言罷嵩政逮世蕃謫戍嶺南又二年御史今中丞林言潤發世蕃逆狀詔棄市籍其家則夫所謂患者果可以計免否也公死時應尾尚幼藩叅君與其友吳君國倫徐君中行宗君臣倡諸縉紳經紀其後事兵部主事今中丞

王君遵歸公喪且以女婚其次子由是諸君者相繼獲罪而藩叅家禍尤酷今十有二年公既受恩卹於朝又以御史却君杰請詞保定賜額曰精忠諸君亦次第登用而嵩之黨則盡已斥逐嗚呼後之欲爲君子小人者可以鑒矣公先世小興州人洪武中有諱伯源者奉詔從容城傳四世至青青生贈兵部署員外郎富是爲公考公生以正德丙子五月十七日年僅四十子二長即應尾次曰應箕皆張安人出昔年甲辰公領鄉薦卒業國學予時爲祭酒奇公文因

日進公爲講說經義與所以立身事君者公亦不鄙而聽之故予與公相知深公死予悲之倍於衆數謀於中丞王君視諸孤而日跂望於恩恤之及去年卒聞末議然後所以悲君者獲少紓萬一焉月日應尾改葬公某山之原奉藩叅君狀來徵銘予義不得辭也爲據公大節俾歸而納諸墓中若公居家之行執道之政詳具公所謂年譜及藩叅君狀銘曰萬物稟氣以爲命公生其中得厥正位卑身仆益自奮君恩必報以死殉人必爲憤地爲震歲星一終天乃

定羣姦漸滅主明聖易名建祠錫贈廡制詞前後相
輝映嗟公一死重孰並我銘揭之爲世鏡

戶部主事周蹟山公墓誌銘明 王慎中
士有奮微起陋立人本朝沾一命之寄無當世之責
而懷憂世之心無正君之任而愧衮職之闕亦其志
然也然而慮過其身之所居言踰其位之所守則有
思出其位行越其思之說出而攻之慮過其身慮未
遂而身逢其歿言踰其位言不行而位貽其危則有
徒喪其身無益於君之說羣而誚之夫使身違其責
而皆逃其憂位非其任而並諱其言猶有當責受任
者也若夫畏逢殃爲不濟而全其身懼貽危爲無裨
而固其位則是莫有憂與言之者矣彼爲思出其位
無益於君之說者豈誠其心之所然哉陰持全身固
位之私計而陽爲是說以自解脫耳議論不明於世
而節義不立於朝其失蓋由此夫君仕爲戶部主事
在朝六品官耳督儲視權有可舉之職會計當出納
平防範謹勾稽詳君既能其職矣而憂盛世危聖主
蒿目怛喪常若一日不能安食而居於位者其志然
也君以言獲罪偶斃杖下其心固能不悔也君天也
安所逃之受死如受命爲東南西北之行亦事之所

不能逃者也而余有以知君之無悔者君居家孝與兄弟友與人交信而能敬爲戶部始監草場總督德州倉儲最後推崇文門商稅皆利權易染君絕無所近如置玉涅中漸而不入其白暈如也非衣糲食扶冊吟誦不安舊聞思廣所業於世之賢人志士口講神注雖不能盡交意常以爲向而謹趨捨慎操術卓然必爲君子矣其應詔一疏冀以微誠感悟非爲求死也主上怒其越職過直薄擬示儆非欲其死也而君不幸死蓋命也使其杖而不死其憂當益切其言且益多必不爲少挫以敗其志或守封疆備障園患至禍及必能以身殉職不苟免以幸其身此予所以知君之心而斷其無悔於當日之死也君姓周名天佐字宇弼泉州晉江人嘉靖乙未進士娶吳氏女三人以兄天正之子日還爲子上疏建杖之日爲辛丑五月六日下詔獄兩夕卒五月八日也距生正德辛未二月一日爲年三十一耳其仕不久其年不永其學專銳而方進其行勤修而日敏進而未見其止勉而不及至於成獨其志皎然可知也憶君喪歸時余

友人昆陵唐君順之寓書於予曰不可使周君無傳子以文名世周君又鄉人也子必勉之余奉唐君之教不敢失而君之父封主事公琅以狀委余曰實不能葬亡子賴諸當路之賄與縉紳之遺賈地後市之理賢蓋山之麓穿墳堅密將以是歲甲辰十一月十五日葬矣願有誌余不敢辭予惟唐君之不欲君無傳也亦偉其言而哀其死也余誌君之墓獨論其志詳言庶世之求君者不徒偉其一疏而哀其一死也然以余文之陋如此知不足副唐君昭書相勉之意而有孤封主事公之託矣其何以慰君於地下耶銘曰

以爲如是而可以死耶非君憂主之意以爲不可以死耶亦非所以明爲臣之義以一死爲足以傳耶則君之好修不止於是以爲不足傳耶則其節已昭然而若此

明故滁州判官龍北山墓誌銘 明羅洪先

正德丁丑陽明王先生以都御史督軍度南日與士人談學於是慶吉士人多出門下吉水國子生龍履祥父北山聞先生之風因履祥以見顧執事終身翁爲人跌宕慷慨喜交遊大起庭宇常歌舞飲燕爲豪絕不類吉水士人然與之策事九轉機發莫能相亂貌清吉昂鼻多髯頗似先生先生悅之以爲軍門參謀携之巡視閩中至豐城聞宸濠反同事者錯愕口噤莫知計所出先生易舟南趨吉安翁寔贊之義兵起集田僮百十人頗資備鎧伏以從先生慮濠速發南都無備欲以僞符疑兵綴之然濠謀四出諸群士人積疑於威多以耳目應計泄事且不測獨翁出入帷幄密授方畧親信義子割愛遣之往往陷虎口不返吉水士人素重自守而耻外援見翁先後所爲若是莫不鄙薄之謂有他望如翁昔日罵履祥云云者翁亦避匿不敢露濠既擒先生上公卿書曰致仕縣丞龍某等或詐以兵徵以撓其進止壞其事機或爲書反問以離其心腹散其黨與陰謀秘計蓋亦諸將

士所不與知而守苦艱難亦有諸部領所未嘗歷蓋紀寔也嘉靖初論功賞以翁嘗爲大足丞既致仕遠授直隸滁州判官住廬一子爲冠帶總旗論孝多以爲屈而昔之鄙薄者口寔益張翁不爲悔後九年先生有田州之役復徵以從是時將撫盧蘇王受而二酋方疑先生給已陰持兩端擁衆二萬人投降實來觀霧先生遣翁諭意翁乃數騎往蘇受之衆露刃如雪環之數十重呼聲震天翁坐胡床引二酋跪前宣朝廷威德與軍門寬厚不殺之意辭懇聲厲聲厲意態閑暇二酋故書物色先生形貌竊疑以爲先生潛來成俯首獻款誓不敢負議遂定自先生擒濠以來權閭以譏構攘功公卿以猜嫌嫁禍翁爲之詭辭致凶遠傾防變得於目授意使之餘而應於謾對立談之頃有高才弟子不能爲力而獨寄心腹爪牙以出萬死於一生者先生既卒功賞廢閣翁抱耿耿無所向退而重光於家年八十有五以卒蓋非經世故之久擅才智之用莫有知翁之爲奇也翁名先字冲虛其先爲永新人

銘曰方敦遜乘指驪爲黃鹽車驥服孰辨驚良芳草
懷人知己病士千載一時才機畢試欲施後世必附
青雲志業有聞其又何云

薛西原先生墓誌銘

明 唐順之

西原先生姓薛氏名蕙字君采先生憫學者溺於多
岐作約言學者執言詮以求見聖人之心而不能自
見其心也作五經雜說方士穿鑿乎性命之外而不
知養性之爲養生也世儒泥象於有無之內而不知
無爲之爲有爲也作老子解先生之學無所不窺不
名一家中歲始好養生家言自是絕去文字收斂耳
目澄慮默照如是者若干年而卒未之有得也久之
乃悟曰此生死障耳不足學然因是讀老子瞿曇氏
書得其虛靜慧寂之說不逆於心己而證之六經及
漁洛諸說至於中庸喜怒哀樂未發之謂中曰是矣
是矣故其學一以復性爲鵠以慎獨爲恬以喜怒哀
樂未發爲契以能知未發而至之爲寂自是收斂耳
目澄慮默照如是者又若干年而後信乎其心其自
信之確也而後著之於書嗚呼心學之亡久矣有一
人焉倡而爲本心之說衆且譁然老佛而詆之矣學
者避老佛之形而畏其景雖精微之論出於古聖賢
者且惑而不敢信矣先生直援世儒之所最詆者以

自信而不惑其特立者歟先生少嘗刻縵於詩世絕
吾其工今所傳西原集者其少作也既有志於道則
棄不復爲難爲之亦絕不較工與否然西原集世爭
慕效之而約言老子解好言希矣先生以正德甲戌
舉進士授刑部貴州司主事病免起爲刑部某司主
事以才調吏部驗封司主事嘉靖中先生在吏部歷
考功司郎中而罷後十八年辛丑正月九日以病卒
於家年五十有三其罷也坐論大禮先生自爲刑部
時值武廟南狩抗疏諫禍巨測先生晏然後大禮之
議起迺譏爲人後解爲人後辨奏入下獄已而復其
官然已爲權貴人所不憚矣已而竟主給事中某構
先生罪先生上書訟坐是罷後所構事解吏部數移
文促先生赴官時權貴人且張甚曰是可塞裳而蹈
淵也哉竟屢薦不復起先生貌醜氣清與之接不待
叩其學而知其浮游埃壒之外其行已素峻潔表裡
皎然一無纖好惡無所假借其才雖高然坦易洞朗
破去崖岸豪傑皆慕與之交其庸衆亦無所嫉者獨
以一二權貴人故至一斥不用先生方且藝圃灌花

澹如也而當世咸共惜之先生居鄉絕不肯爲人干
請至戚里有疾親爲之檢方製藥嘗脫綿襖施凍者
或曰焉得人人而濟之先生曰吾不愧此心耳先生
始號西原居士後匾其齋曰大寧齋更號大寧齋居
士而世猶稱西原 先生云薛氏故隸偃師國初
以成武平遂爲亳人祖琇父封吏部主事曰鑑自封
主事君而上皆不顯然世推長者妣楊安人生三子
先生其仲也與其季瑩皆無子而伯兄蘭有一子曰
存先生與蘭友愛甚其沒也蘭爲之經紀其喪將塋
先生於亳城南先塋之次而緘其遺書請銘於余無
何蘭使人來達銘且告葬期曰卒之歲某月某日近
矣曩先生嘗寫書於余叩以致虛極守靜篇與未發
之中其旨同異余未及復請於先生也竊妄意之言
中則虛實動靜貫之矣言致虛則遺乎實矣言守靜
則遺乎動矣寂而未嘗無感而未嘗有吾儒之所指
爲虛靜也乎內有健而不出外有折而不入老子之
所指爲虛靜也乎以是復於先生先生其許我哉雖
然先生之註老子則可謂得其髓者矣乃竊取先生

之意而爲之銘曰在昔先明握元化樞人皆競巧已
獨若愚吾師嘆焉其猶龍乎勞勞末學校業日繁豈不
莞然而撥其根維聃之生寔是熙毫寂寥至今西原
有作閉戶獨窺微言五千參諸孔庭獲我同然孔曰
未發時曰靜虛立教有二其究豈殊譬如入海所貴
得珠其所從入孰一其途自是反躬精思力踐然
一悟與天游衍毫之南墟有鸞其噴鳴吁西原其高
何存

吏部文選司郎中東城林君墓誌銘

明 唐順之

嗚呼吾友東城林君古所謂教行君子也紛華盛麗
耳目之好一不藏乎其外環巧慧辨機智之習一不
鈎乎其心潔以律乎其身一束脩之問畏之若苞苴
然讓以裕乎其人一輿臺之賤接之若賓友然行必
愜乎人之所安故不爲鬼崖巔嶺之行言必衡乎力
之所抵故不爲要眇浮闊之言嘉靖辛丑十一月二
十日以吏部文選司郎中卒於京師年四十有四訃
於朝朝之士群奔走弔哭訃於鄉鄉之群奔弔哭皆
曰吾人死矣君之卒也出其橐得銀四兩不能棺其
寮友爲之棺以歸歸不能葬即守朱君州守黎君贈
之錢以塋而黎君又使君之友陸位等狀君之行來
請銘朱君黎君君在文選時所選廉平吏治其卿者
也君諱春字子仁始號方城以其先福建福清縣方
城里人後改東城祖諱某父諱宏母某氏自君幾世
而上有諱閔者始有福清以從戎隸泰州守禦所故
君爲泰州人林氏自徙泰州未有以儒顯者爲儒自

君始後君貴始贈其父宏爲吏部文選司主事而封
母某氏爲太安人君始以寤政幾廢書者屢矣君讀
書居常以竹筒注膏繫衣帶間惟所適則出膏於筒
燃火讀書君父爲漕卒君又獨與母妻織屨織屨讀
書率以夜不睡嘗日中不能收貫米於隣不得君行
歌自若家人頗非恆之君自若君是時堅苦已如是
已而受學於知州王君某與其鄉先生王君汝止兩
王君故王陽明先王弟子君因此始聞致良知之說
則心喜之至夜中睡醒無人處輒嘖嘖自喜不休遂
欲以躬踐之則日以硃墨筆點記其意向臧否醇雜
以自攷鏡久之乃悟曰此治病於標者也於是駸駸
有意乎反本矣戊子舉鄉試壬辰舉會試第一登進
士第選戶部廣西司主事調禮部主客司主事又自
禮部調吏部文選司主事吏部故於崖岸鎖門謝賓
客雖親故人不在拜示自尊重而吏部以提熱柄政
雖諸寮中率自獨狹相猜抵君色溫氣柔不以行能
先人其在諸寮中峻峻下之唯謹其在同志中雖其
名位絕不相埒若峻峻下之唯謹門無留賓日所出

部則偏走刺答諸賓客或羅致諸賓客講學意悉然
如也諸賓客人人自以林君親己其尤厚者則相與
挾衾被褥且往宿觀寺中講學竟夕以爲常後爲郎
中官重益多事矣然猶如此以此諸寮中雖其志行
與君絕不入者亦謂君長者不復猜也而善類因君
以聯者爲多君自束髮至蓋棺未嘗一日不講學然
君本以長厚清苦繩墨自立其於學也亦因其質之
所近君爲主事是時縉紳之士以講學會京師者數
十人其聰明解悟能發揮師說者則多推山陰王君
汝中其志行樞實則多推君與吉水羅君達夫羅君
於朋友中最沉密矣然君猶面玩羅君以其露才也
君之自斂可知矣王君汝中灑落而君小心周慎畫尺
寸不敢失兩人操行不同然君獨心敬王君又自病
其毀譽諸根未能銷伏未能撤諸障礙慙慙以認王
君其書札往來者七八其面諭者不記爲主事久之
轉驗封員外郎已而調文選司員外郎居一年母安
人病癱卧君謝病歸養君居鄉則益峻峻謹是如故
儒生時家無一錢亦不以取於人家有一錢亦必以

施於人侍母安人病病少間則出寓政所讀書處萬
壽宮者與其故友人及鄉之後生講學而以其間走
安豐就其故師王君叩所疑義每往必喜幸以爲聞
所未聞君於師推王君汝止於友推王君汝中君居
官有未識王汝止者君與之言必曰吾師心齋說如
是君居鄉有未識王汝中者君與之言必曰吾友龍
溪說如是其讓善多此類而黎君爲泰州守者故令
如掣雅慕君如是構安定書院以延君以胡安定先
生其鄉人也君至如掣爲諸生陳安定之教經義治事

合一之說君既以行誼表御曲又津津善論人無幾
微倦色泰與如掣及旁邑之士多因君風起者居久
之赴官補稽勲郎中調文選郎中君自爲吏部主事
泰州守其黜而虐君請於尚書黜之泰君鄉也尚書
趙起曰某未有劾者奈何君曰不實則罷主事遂以
其人調邊地頃之南御史劾章至則其人也竟黜之
後君赴官泊淮淮守某以次謁諸過客舟始及君供
張又薄若不知君爲吏部者後淮守入覲考下當遠
調君爲稽勲郎中白尚書以過淮事薦其廉靜懇乞

留之更得調永平四郡二者其一遠嫌者不敢爲其
一怙勢者不能爲而君爲吏部若此然君長者常護
人短其請黜泰州守事則尤爲所難君既長選事益
思薦進賢人慎擇監司守令洗刷奉其職然事有曳
掣或不能進如所欲爲則君自謂曰選曹之職欲上
通於君與相冢宰之心下通於選人與天下人之心
相冢宰之心未必選人於天下人之心選人與天下
人之心未必相冢宰之心選曹居其間欲兩合焉難
矣雖然求無負乎吾心足矣君始調文選會御史論

君受辟坊銀事雖衆以爲妄然君獨自念束髮競競
砥行曹黜染居常引咎不愜欲解官又業已爲之既
任事又曳掣縮縮不自得曹又多事君日夜其間固
甚瘁居無何病一夕卒卒之日猶在曹不自知病病
且革乃舁歸舍先是君嘗會朋友講曾子致手足意
懇惻聞者皆沐浴未數日君遂卒君問學幾二十年
其膠解凍釋未知其何如也然自同志中語質行者
必歸君君娶李氏封安人子四人晚暉曜昕曉傑而
材能似君者也爲庠生妻某氏暉聘某氏女一嫁王

用賓孫男一女一塋以卒之明年某月某日墓在某所君不喜爲華詞其舉第一應試文字及後所爲詩古文務理道質而不艷如其人始君幼不知書父故苦貧也不能資君以書以餘子給事千戶王某所某奇君令與某子王烈同學書君自是始舉書後父數見君讀書且喜且嘆之曰兒讀書固吾然書可飽乎因取其書欲燒之君婉辭跪謝乃解後君貴常思王氏厚報之自王烈以下禮節稱謂歲時起居一不改於政餘子時銘曰

君嘗有言天然之門盎然出之不作好醜不爲我偶不爲人觴大心之屬如彼日月光照四垂樓臺殿閣莫壞鼠穴亦所不遺藏疾於藪有茹其垢蓄德之資有如寶然玉金在前其耀不施君子若愚賸賸妹妹不其淺而我顧君語勒石於墓式昭世規

明故錦衣衛經歷贈奉議大夫光祿寺少卿青霞沈公墓誌銘
明 王世貞

當先皇帝己酉庚戌間余守尚書刑部郎而沈公繇清豐令入爲錦衣衛經歷數從故尚寶丞張遜紫飲沈公少飲輒醉醉則擊缶鳴鳴誦出師二表赤壁賦已慷慨曼聲長嘯泣數行余私心慕異之而亡何國闌入塞都門不啟天子坐西齋宮憂之亡所出會國獲我中貴人爲護書附以進曰予我幣通貢即解圍不者歲一斃而郭時華亭公領大宗伯要諸大臣以御朝請而天子下其書大宗伯會文武群臣計即予貢弗予孰使甫就計國子司業趙先生貞吉曰國所謂貢者也耶彼傳城而軍我城下盟耳竊以爲天子御奉天門出內帑饗士驛言若旌功臣國當自退而檢討毛先生起齋嚙言吾姑寬國以予貢而出之而後議守便趙先生建叱之爭之堅而沈公復爲申趙理刺刺不休大宰夏公恠而問曰若何小吏也沈公曰攝之曰大吏噤弗言故小吏言胡恠也且不已至辱臣死耶大宰意不自得罷而華亭公持衆議上

竟弔予貢次日天子出視朝有所誅進矣當是時沈公氣甚壯欲力吞鹵幾得以身當一面畢見其長乃上疏言請以萬騎護陵寢萬騎防通州餉而合勤王之師十餘萬鼓而薄其墻歸必大勝報聞罷蓋是時相嚴嵩獨貴幸用事數寢抑邊事不以報而見事急則若爲開言路有所誅進者將帥當事臣迴誅益入賄居間嵩以免而其進有時賄賂價暴起言者日以益嵩日以重於是沈公飲張丞所泣而歎曰詩不云乎歆歆訛訛亦孔之哀謀之其臧則具是違謀之不臧則具是依已矣亡所信吾謀矣吾即不死而苞苴日熾然過我而集於西第何也且夫社稷何賴焉乃抗疏言相嵩父子翼虎鼠社稷國大計諸慘之以謝天下太宰阿私亡所異同宜從詔以公昔歲諱諱亡人臣禮今復誣詆大臣自爲名廷榜之數十謫田塞外而先是趙先生亦坐他法謫斥矣沈公當田保安倉卒寄妻子廣柳車未有舍而保安賈某者傍晚公曰公非上書誅嚴氏人即得之入從家而家沈公公始有居矣里長老問知沈公狀咸大喜助薪爨而

遣其子弟來從學中稍與語忠義大節則又大喜而塞外人懸爭爲公譽相嵩以快公公亦大喜日相與譽嵩父子以爲常至爲偶人三象唐相林甫宋相檜及相嵩而射之語稍稍聞嵩父子銜之切骨思有以報公而侍郎楊順來總督順故嵩客也前大帥某業以選懷避鹵俟其解則縱吏士取死人首甚者夜檄避兵人僇之以爲功沈公廉得其首主名貽書請之前大帥悲既得代即以屬順曰是故抗乃公事者丁己酉大入破應州堡四十餘順見以爲失事當生益縱吏士殺僇避兵人上首功以自解而公復廉得其狀貽書請順語加峻且賦詩及樂府者二或謂公遷人非有言責毋爲爾公怒曰吾嚮者豈亦有言責耶若視眼在否而欲盲我夫殺人而欺其君以要賞吾誓不與共天順聞益恚以其私人經歷金詔魯指揮羅鑑走嵩子世蕃所曰是天也結死士擊劍習射將以間而取若父子世蕃曰吾固知之即以屬巡按御史李鳳毛鳳毛譔爲謝曰有之竊陰已解散其黨矣鳳毛得代歸還爲光祿少卿而御史路楷來楷又嵩

客也世蕃爲酒壽楷而使謂順曰幸爲我除吾瘍事
成大者侯小者卿順則與楷合契捕諸白蓮教通商
者竄公名籍中以謀叛聞而前大帥時理兵部無異
取中旨僇公籍其家而予順一子錦衣千戶楷候遷
五品卿寺順猶怏怏曰丞相負我薄我賞猶有所不
足乎謀之楷取公二子杖殺之而移檄越達公長子
諸生襄至則日掠治困急且死會給事中吳君時來
上疏論順楷候國大罪上怒相嵩不及爲之地急下
緹騎捕治順楷而襄得釋居久之相嵩敗世蕃死死
御史維新復論順罪而微爲襄理還其諸生今皇帝
初詔旌言事者沈公寬始太白贈光祿少卿贈祭錄
一子太學襄用諸生久次膺貢上春官伏闕上書極
言總督順巡按楷殺人奸黨狀而給事時亮瓚相繼
以封事請詔可捕順楷司寇獄論抵罪始沈公以而
讀書有異質從故王伯安先生游先生一再與語
奇之曰生千里才也辛卯舉鄉試又七年成進士爲
溧陽令其治以搏擊豪強術赤子爲急用伉儷忤御
史得調荏平以父憂歸服除補清豐令愈自刻苦有

患愛聲故錦衣帥陸炳聞而賢之請吏部得公爲經
歷至則與均禮不敢以分加公公愈益發舒嘗從世
蕃酒所世蕃虐所狎客給事飲非其任強灌之公
即以灌世蕃曰吾代客酬也當國掠近郊時都門閉
公急謂陸公勿閉門閉門予敵民矣陸公爲言於上
而許之所入男女以巨萬計公既謫保安而屬歲大
祲傾囊裝作粥粥饑者收百里內骸買地而瘞之其
人率相與爲祠生祀公公於詩文援筆立就奇麗甚
而不能盡削其牢悻憤激之氣往往多楚聲竟以是
獲禍其傳者十不能一二人讀而憐之沈公諱鍊字
純甫別號青霞山人其死以丁巳之十月十七日距
其生丁卯得年五十有一父處士公璧母俞夫人娶
於徐有丈夫子四長即襄次襄次瓚即死於公難者
也最少子家以緝免襄既白報公讐推太學恩褒而
身之金陵謁吳君表其墓已復之吳興謁不佞某志
而銘之以慰公嗚呼公有子矣銘曰
爲國擊嵩不勝公徙爲嵩擊公勝而公死公死不死
神煒煒者億百千祀嗚呼嵩乎嵩乎順乎楷乎死而死矣

光祿大夫柱國少師兼太子太師吏部尚書中
極殿大學士贈太師高文襄公拱墓誌銘

明 郭正域

嘉隆之際相臣身任天下之重行誼剛方事業光顯
者無如新鄭高公而先後處兩才相之間先為雲間後
為江陵雲間善藏其用籠天下豪傑為之羽翼善因
時耳江陵負豪傑之才其整齊操縱大畧用高公之
學而莫利居先彼方割及此猶坦腹蓋公之瀕死者
屢矣志不盡舒才不盡酬悲夫公沒且二十四年而

嗣子務觀乃得請易名之典上予謚文襄謚法因事有
功曰襄上念公功在社稷也既得請而務觀乃敢乞
誌文按狀公名拱字肅卿其先為洪洞人六世祖曰
成者避元兵徙新鄭居焉成生二二生亮亮生旺旺生
魁繕部郎中魁生尚賢光祿少卿娶於沈舉六子兄
拔南京銓都御史擢金吾衛千戶弟操才右軍都督
府經歷揀鳳陽通府公生而狀貌瓌奇苦學問攻經
義為文不好瑣屑而沉雄開爽出人意表年十七魁
其鄉辛丑成進士改翰林院庶吉士授編修時分宜

華亭各以計相頌公無所見厚薄穆宗為裕王出閣
講學居外府公為講官先生在開道王目屬而心儀
之時人心洶洶王日懷叵測兩府雜居謔言肆出公
周旋卿中竭力盡心王深倚重之考滿陞侍讀戊午
典順天試尋陞侍講學士在府凡九年陞太常寺卿
管國子監祭酒事王賜金繒甚厚哽咽不能別公雖
去講幄府中事無大小必令中使往問一日思先生
甚親書懷賢二字遣中使賜至第無何又書忠貞二
字賜之又書啟發宏多四字賜之壬戌陞禮部左侍

郎兼學士知貢舉科場諸弊百五十年所不能正者
革之殆盡癸亥改吏部左侍郎兼學士掌詹事府事
時少宰缺公當往公曰吏曹事不令兩侍郎知吾無
以報上而徒以虛名鎮百僚無以為也竟辭不就乙
丑主考會試所為程士文奇傑縱橫傳誦海內六月
陞禮部尚書兼學士禮曹故自詞臣往不習吏事樊
孔叢雜公吏事精核每出一語奸吏股慄俗弊以清
丙寅進兼文淵閣大學士恭預機務未幾召入直賜
直房食用乘馬時方御膳界之閣臣入直西苑自世

皇中年始有事在直無事在閑世皇諭閣臣曰閣中政本可輪一人往徐文貞竟不往曰不能離陛下也袁文榮亦不往曰不能離陛下也公正色問文貞曰公元老常直可矣不才與李郭兩公願日輪一人詣閣中習故事文貞拂然不樂會世皇不豫入直諸公各移具出時江陵公尚為學士以公事至語公曰君父病篤臣子移具可乎公愕然曰吾意乃如此竟不出而吏科都給事中胡應嘉有所授旨遂以是劾公曰皇上違和正臣子籲天請代之時而拱乃為歸計此何心也蓋以此激怒世皇為傾公計會世皇疾革不省覽龍馭上廟華亭公於袖中出草詔欲以遺命盡反先政公謂語太峻與安陽公對案相向曰先帝英主四十五年所行非盡不善也上親子非他人也三十登庸非幼小也乃明於上前揚先帝之罪以示天下如先帝何且黜事先帝幾欲止矣紫皇殿事誰為之而皆為先帝罪乎土木之事一丈一尺皆彼父子視方略而盡先帝罪乎詭隨於生前而詆毀於身後吾不忍也相視淚下語納聞外廷而忌者側目矣

會上改元問閣臣於是四臣各擬二字上上竟號隆慶則公擬也人謂上意在公又議登極賞軍事公曰祖宗無此自正統元年始也宣帝以親藩入繼時尚殷富遂倍之今第如正統事行則四百萬之中可省二百萬矣竟如嘉靖事行而司農苦不支會有言大臣某者其人實有望不當擬去而首擢重違言者意乃以揭請上裁公曰此端不可開先帝歷年多通達國體故請上裁今上即位甫數日安得遍知群下賢否而使上自裁上或難於裁有所旁寄天下事去矣乃竟請上裁西人嫌益聞言者爭謂公擅矣而胡應嘉故以危機中公會大計給事中欽被黜應嘉上疏論救諸公以應嘉亂政黜為民公以嫌故不敢出一語而外廷爭謂公去應嘉矣於是歐陽一敬輩論劾公不少休時公初在政府無大異而三月之間言者三十餘疏公亦力請去疏十二故事拾遺不及閣臣而南給事岑用賓御史尹校遂以公拾遺公自念非請病無以謝人言遂力求去穆皇驚問左右曰先生病耶左右對曰病甚穆皇猶弗忍良久得請賜馳

驛遣行人護送又賜銀幣以歸既抵家猶有白金蟒袍之賜越一載上思公不置詔還內閣兼吏部事公至慨然以天下為己任凡晨理閣事午視部事謂公門無片楮公曰是奚足哉大臣以體國為忠以匡國為美區區小廉細節耳寧足多乎往熙陟取辦倉卒不無紕繆公集諸司官各授之策曰吏部職在知人不易知也幸諸公早計之某也德德何如某也才何如書諸冊某也不德不德何如某也不才不才何如書諸冊某也所自死某也得之何人書諸冊皆親封記之月終以復於予慎之哉予且以此見諸君賢每歲所得凡百八十餘冊以為參驗以故賢否不淆然陟允當北南頻年入犯中外以兵事為憂公曰大司馬安危所係至重也不得其人由儲之不豫少司馬止二員此無事時耳聞邊事未免假於他官或遇總督之人未免移於他處假他官則非本職不便行事移他處則補於東缺於西彼此候代動經歲時不得履任門庭誰禦請於兵部增侍郎二員一遇巡閱即以一人往邊方員缺即以一人往凡邊方險隘南情緩急將領賢否

士馬強弱皆已曉暢方略素定遇大司馬員缺即以補之如此而稱乏用必不然也兵乃專門之學儲養本兵大臣當自司屬始兵部司屬職在軍旅而不擇其人泛然以用又往往選為他官今宜特高其選而以有智謀才力者充之使其專官於此不復他遷如邊方兵備即以司屬往邊方撫臣即以兵備往邊方總督即以撫臣往而總督與在部侍郎時出時入以候尚書之缺如此而稱乏用必不然也邊方之臣又宜特示優厚使其功名常在入先他官不得與之論年月脫或不稱則律以法使其功常在入後如是而猶不盡力必不然也邊方總督之臣在邊日久著有成績當令回署以休暇之後不妨再出使其精神不疲而智慧不竭以勤王事為濟必多得旨報可已又上疏曰方今邊徼用兵惟是薊遼宣大延綏寧夏甘肅而南則閩廣是數處者一有警有所處分祇慮奏報多不中窺請於是數處擇知兵事者一二人使為兵屬彼有身家之慮凡山川險易將領賢否奏報虛實功罪真偽可一問而得請以是為參伍之資得旨報

可著為令甲已又上疏曰臣惟邊方有司有疆場之責才者猶懼不堪即優禮而鼓舞之猶恐不振乃官其地非雜流則遷謫待之既薄志意驟阻又何望於展蓋徒以地苦其人而曾不顧人之苦其地也徒以邊方為遠而不知遠安然後適安也請擇年力精強才氣超邁無通武事者調用有能係惠困窮俾皆樂業者以三年為率比內地超等陞遷有能捍患禦敵者以軍功論不次擢用即由此為兵備為巡撫為總督無不可惟以治效不以資格功名之路既開則凡有借口邊方以圖倖進者不可不為一定之說則遼則昌平順義密雲懷柔薊州玉田豐潤遵化平谷遷安撫寧昌黎樂亭延慶永寧保安樂山西則河曲臨縣崞縣代州五臺繁峙定襄寧寧鄉岢嵐嵐縣典縣靜縣保德大同懷仁渾源應州山朔州馬邑蔚州廣靈廣昌靈邱陝西則固原靜寧隆德安定會寧蘭州環縣安塞安定保安清澗綏德米脂葭州吳堡神木府谷其他不得概以邊稱得旨報可時酋甚警朝臣無經戰者人心震恐公乃以尚書陳希學曹邦

輔侍郎王遂各帥師背城列陣以待以京尹栗永祿南都御史護守山陵又起都御史劉燾于天津守通糧而以總督王崇古譚綸專征勦無內顧以侍郎戴才理餉是歲也幽竟不入霜降獄獄故事府部皆在冢宰當執筆至是大司寇意公閣臣不屑往公曰上命我視吏部部事皆吾事也第須得情耳不至如往年問法司故牘唯唯耳於是秉燭視獄詞漏盡不休晝則長諸司議於朝房凡二十日往歲矜疑不越三四十人至是出冤獄一百三十九人內王金華六人謂以硝黃損失帝聖躬以子殺父律置極典公驚曰豈有子為天子而殺父之讐五年尚然在錄者乎先帝臨御四十五年享年六十以正寢天下所共知今家以非命天下後世將謂之何遂上疏明其說有旨皆釋之往大計時銓曹祇問藩臬為黜陟公多所參伍或衆否獨留衆可獨黜其黜者必告以故無不擢服稱神明謂前此未有也已又策天下有司曰各地方有何賢才尚隱淪有何亮頑尚梗正有何利當興何所沮而弗興何害當革何所畏而弗革皆得言之

今封識以告天下事皆在目中矣時天下重制科輕
科貢公曰天下制科處其三科貢處其七是崇其三
棄其七也乃疏請惟賢是視不計科貢除吏時其善
地多留而不除名曰養缺公曰民方無主吾何以留
為祇留以供用且以供人之用耳吾無所用又不供
人用則何留焉於是命選司凡所有缺悉揭諸門外
使衆見之故事推陞時皆主事揭授郎中呈於冢宰
公曰堂有侍郎司有員外疏皆列名而事不與聞何
居此不過欲行其私耳吾其改是令抱牘至後堂二
侍郎同所屬揭之即冢宰欲有所上下不能也鹽馬
之法暨遠方府守人皆薄視之以故善政無聞請以
賢者往不得復有低昂積穀遇貧薄之區則何以取
盈完糧當苦寒之地則何以足數如是特頒其額而
官不苦難教官暨驛遞開壩等官本無民社而竟處
以他省遠方便有官者不得赴而去官者不得歸乃
請特設本省人皆稱便他如開王親內轉之例覆一
甲讀書之規正撫按舉劾之差覈京官考滿之實分
進士講律之會定王官陞授之條議有司捕盜之格

遂使朝無偏黨官無煩苛九州四海雷動風行矣廣
東昔稱樂土後爲盜區上官計無可施每以撫爲得
策公請以殷正茂爲總督促其勦除勿致養寇而廣
東即邑多除制科寬其薦額勿拘成數遂使廣東亂
民樂業而向化矣先是貴州撫臣白土官安國亨叛
逆當勦久而不克公復偵知國亨非叛而巡撫者輕
聽讒而偉功也乃以少卿阮文中往受計行阮至貴
得實如公言然徂於浮議語多依違公復之書曰民
夷異類順逆殊途稍有釁隙當自處分不可過言於
君父之前君父威在必伸一有叛逆便撲滅可但已
乎事非其真過以言之則將何以處也安國亨安智
裔族自相讐殺何謂叛逆而撫臣以告國亨禍不測
且國苟全有司不原其情激而成變即以爲叛逆之
證可恨也國亨上疏乞哀叛逆者若是耶有司仍以
叛逆論之使朝廷欲開釋而無由國亨欲投順而無
路且智國亨讐也智在省則國亨疑畏日深是挑之
使鬪而增吾多事也愚謂國亨有罪而不可輕言叛
逆安智當有安置而不可省居時彼中號令未明國

亨疑畏不肯赴理聲言撫臣以勸誘我殺我乃擁兵
自衛於是撫臣上疏請兵糧為征勦計公曰嘻誤矣
國亨不出者疑畏深也處以叛逆彼將叛逆自為也
彼裔酋耳族滅何為時在閭思之旋牀而走同官者
曰公何旋牀走公曰思貴州事耳從之則非計無從
則失威今撫臣疏請征勦而國亨亦奏辯吾意兩行
之而以一科臣往勘彼聞勘官且至以身既在勘當
不敢殺我我出聽理乃可以自明而乃治其本罪亂
或可戢也胥曰善公召職方郎中至授意遂得請而

以科臣賈三近往公復面授方略乃國亨聞科臣且
來果喜曰吾生矣吾豈叛逆者哉語達京師先是阮
約以五事而國亨母子狐疑不出至是乃將漢邑犯
人王寬吳瓊阿第輩獻出而母子出就理輸銀四萬
一千有奇抵罪蓋科臣未至而事已定矣故黔國公
沐朝弼既謝事請入南京赴莖撫按奏曰沐昌祚政
事清明以致歲豐朝弼逼走昌祚不知所往請將朝
弼錮南京毋令回鎮兵部來問計公曰誤矣雲南守
巡故以挫沐為丰采今又其故智耳鎮之人衆所

寓目而謂不知所往昌祚孺子耳安能感動天地曹
弼安能為虐如有罪朝廷以檻車逮之如之何其黷
之令歸耳後數日昌祚奏至請還其父且言撫按所
奏非也廷臣益信公神明有如撫按言則今何以處
北商僉答孫把漢那吉來降邊報至中朝人心洶洶
聞知所指公曰是奚足懼顧老酋其孫耳總報者至
曰酋婦甚愛其孫而老酋甚懼其婦泣欲得孫耳公
曰爾敢擁兵來索吾必殺之令退去爾果退去公請
加那吉指揮使賚以章服又語邊臣令盛其驕從騎
馬街行使衆見之老酋初意中國殺之也乃聞不殺
又加以官又美衣食騎馬街行大過望而又知不可
得於是公請下令獻我叛人趙全等以贖其孫奄酋
果以計招全等全等皆中國人而為爾用居板升領衆
數萬所居左曰鳳閣右曰蟾宮門曰宣化牆屋皆繪
龍鳳往歲破城殺吏皆其為也世皇懸重賞購之得
其一爵通侯然竟不可得乃請許那吉歸又令邊臣
以緋袍金帶鶴蓋鼓吹送之又宣諭僉答曰那吉是
我中國臣若善視之老酋夫婦既喜得孫而又見其

榮麗南向取胡帽叩首呼萬歲而封貢事之議起矣
先生親詣射所面質全等全果曉駕異常次李自馨
者諸生也凡數十言不能了者全一言而畢先生因
問爾今歲不入故全曰爾豈能不畏死哉頃是處有
兵是處有糧人有鬪志莫敢入耳遂投獄盡磔於市
全等顧其屬九人曰吾屬被擒邊事寧矣至封貢事
爾哀求日懇而中朝疑畏日深盈廷之議有如鼎沸
動以求人講和為辭公曰天下之事以己求人機在
人以人求己機在己宋人求和於爾機在爾故曰講

今爾求貢於我機在我直計之而已彼曉曉者豈為
國籌利害哉徒念重大恐有不致留為後言耳乃請
封俺答為順義王其餘都督指揮千百戶有差而套
爾吉能等亦請額如例而三邊總督難之公擬旨切
責又貽之書三邊宣大似難異同異同則宣大之市
方開而三邊之擾如故豈無俺答之人稱吉能而擾
三邊者乎亦豈無吉能之人稱俺答而市宣大者乎
是宣大有市而又擾也三邊若擾而實市也同則兩
利異則兩壞總督者議始協於是俺答進馬謝恩吉

能亦附焉而西北沿邊一帶民狎其野穡人成功
雖深夜獨行無誰何者矣於是公上疏曰嘉靖十九
年北國遣使求貢不過貪賞資與互市之科耳邊吏
倉卒不知所策當事之臣憚於主計直却其請新使
絕之以致黠爾怨憤擁衆大舉此往歲失計之明驗
也今天祐國家請貢稱藩可以息境土之蹂踐可以
免生靈之荼毒可以省內帑之供億可以停士馬之
調遣乘此閒暇修我邊備若見寧息遂爾偷安則從
此邊備寢弛卒然有變將何以應是臣等謀國之忠

反成誤國之罪矣請每歲特遣才望大臣四臣閱視
以今視昔錢穀贏幾何兵馬增幾何器械整幾何其
他屯田鹽法以及諸事拓廣幾何果有成績論武功
爵若襲故常罪如失機上嘉納之益今三十餘年而
疆域晏如也爾既貪我則物爾中婦女亦貪我繒帛
惟恐罷市我得伸縮而制之諸所為貢市費者即取
諸襄日募府出征之費不及半耳爾得我金錢非盡携
以歸也我之群商又因而為利而我數十年所全百
萬之命所省百萬之費可按籍而求屈指而論也蓋

漢人五餌之策公實用之矣穆皇久不出欽天監卜吉且視朝鐘鼓嚴傳宣閣下急公疾趨而至則穆皇已立於墀矣執公手北行至乾清宮公不敢入穆皇顧曰送我公承旨直至乾清宮上御榻坐手猶未釋也有旨高閣老夜宿乾清宮門外公謂張公吾二人去一留是示人重輕也吾為公奏得旨二閣臣皆在乾清宮門外薄暮又奏曰禁地非人臣所宜宿願宿闕門陛下有召可頃刻而至上可之百官出十八日御體漸復公具疏請上懲忿寡慾覽奏甚喜越二日聖恙復劇公流涕無已四月二十四日申刻宣內閣受顧命司禮監以二札一授皇太子一授公益遺詔也公泣奏曰受陛下厚恩誓以死報奏畢大哭兩宮亦大哭二內臣扶公長號以出今上登極公上言五事一謂御門聽政玉音親答以見政令出自主上二謂題奏繁文難以遍閱自有節要詣先籤出以便者覽三謂事必面奏乃得盡情四謂大小草奏俱發內閣者詳若或未經發擬徑自內批者容臣等執奏五謂官民章疏當行當止未有留中之理得旨報可而

同事者遂以此用問翌日有旨遜公公自乘驛車去道傍之人有流涕者公歸杜門謝客口不言時事未幾而有王大臣之獄柄人將借以殺公已差五校往新鄭有所逮會廷鞠之日白日盡瞑迺大臣瞪目仰面備極拷略竟不識所謂高公次日殺王大成而公獲免不敢復見一人矣公素好讀書作問辨錄十卷春秋正旨一卷本語六卷邊略五卷綸扉外彙四卷掌鈐題稿三十四卷南宮奏牘四卷政府書答四卷綸扉集一卷程士集四卷外制卷二卷日進直講十卷獻忱集四卷萬歷六年卒於家祭葬止半給又二十餘年值建儲大典嗣子務觀具疏上有旨高某擔當受降北酋稱臣功不可泯贈太師諡文襄廕一子尚寶司丞三十年不白之冤至今雪矣公生於正德七年壬申卒於萬歷六年凡得年六十七歲受室中年張氏累封一品夫人無出嗣子務觀尚寶司司丞諸子務本務滋俱錦衣衛官生務實武英殿中書務觀六子杠棧楠檉榆樟

封宜人亡妻左氏墓誌銘 明 李夢陽

左氏者李夢陽妻也左氏益廬陵人曰仁宏若生泰
州知州輔輔生宗人府儀賓夢麟而儀賓婚廣武郡
君成化乙未十月己丑生左氏於汴即君者鎮平
恭靖王孫王周定王第八子也左氏生十六年歸李
氏李氏者陝以西人也李子父曰奉直君奉直君為
封邱溫和王穀授居汴而挈其子夢陽來初李子幼
婚奶咸不之婚也曰教授微而貧及約左氏儀賓則
顧獨喜入白其母并即君氏母即君乃亦咸不之婚
也曰夫非李教授兒耶微而貧儀賓曰李氏子才竟
婚李氏是時李子生十有九年矣明年為宏治辛亥
左氏生子枝云諭年壬子李子舉陝西鄉試第一癸
丑登進士第左氏從季子京師會姑舅連喪季子西
於是從而西戊午李子拜戶部主事居京師左氏復
從京師已從通州已未孝宗皇帝上聖慈仁壽太皇
太后尊號封左氏安人給勅命壬戌李子權舟河西
務左氏從河西務明年李子餉軍西夏挈左氏還過
汴是時儀賓母儀賓亡矣獨即君而左氏翟冠翠翹

揚輓曳裾見焉其行于子也哲而順瑣而流珠即君
喜已而泣顧謂侍人曰向謂李生微而貧乃今若此
矣因道儀賓語云云愈益泣而慟乙丑李子進戶部
員外郎會今皇帝上兩宮尊號左氏進封宜人給誥
命兩咸美詞云明年丙寅為正德元年李子進郎中
是年冬尚書洪洞韓公率百官彈宦官劉瑾等以彈
事出李手明年正月薦遷李子奪其官於是左氏從
李子還而潛大梁墟中已巳左氏究有婦矣庚午瑾
誅明年李子起江西按察使副使提學是年左氏有
孫壬申李子迎左氏於江西左氏舟河行值橋舟破
僅免入江過馬當帆脚打撞人落江沒及湖口風逆
困崖下迴渦中舟突岷石時時驚於是左氏怖欲死
計繫之登石免甲子李子以與江御史構從理官於
上饒而徙左氏星子會訛言賊遇星子於是左氏自
徙於潯陽是年李子官復罷道潯陽就左氏浙江入
漢至於襄陽將居焉會秋積雨大水堤幾潰左氏曰
子不心大梁非患水邪大襄汴災殊矣且蘇門箕穎
之間可盡謂非邱壑地哉李氏悟於是挈左氏歸歸

而左氏病踰年骨立死死之日正德丙子五月丁未
年四十二矣翌日性莫左氏烹牲腸腸自團織文理
陰陽狀若流蘇垂綫夾耳提襟在上李子觀之哭愈
慟曰嗚呼神哉於是賦結腸之篇李子哭語人曰妻
亡而然後知吾妻也人曰何也李子曰往予學若官
不問家事今事不問不舉矣留賓酒食稱賓至今不
至矣即至弗稱矣往予不見器處用之具今器棄擲
弗收矣然又善梓損往醢醬鹽豉弗乏也今不繼舊
矣鷄鴨羊豕時食今食弗時度矣妻在內無嘻嘻門
予出即夜弗扃也門今扃內嘻嘻矣予往不識衣垢
今不命之幹不澣矣縫剪描刺妻不假手不襲巧咸
足師今無足師者矣然又假手人往予有古今之慨
難友言而言之妻今入而無與言者故曰妻亡而然
後知吾妻也李子買大陽之山嘉靖某年月日墓左
氏山下松檟栢柳負坎抱離四山三水是山也鈞州
北三十里里曰東張南稱祀裏右嵩前潁左連具茨
嗚呼匪志曷彰匪銘曷藏志防虞銘永處矧吾妻矧
又吾知吾妻於是志之而復銘之而刻之石銘曰

坎而宮汝藏汝封亦既考終汝曰弗約而修伸妍而
短屈惟屈與伸由人匪人繹而思之我心如焚迺竟
汝分生雖汝分沒共汝墳萬祀千秋孰短孰修汝樂斯邱

傳一

名賢上

漢至明上

鮑出傳

東漢 魚 秦

鮑出字文才京北新豐人也少游俠與平中三輔亂出與老母兄弟五人家居本縣以饑餓留其母守舍相將行採蓬實合得數升使其二兄初雅及其弟成持歸為母作食獨與小弟在後採蓬初等到家而噉人賊數十人已略其母以繩貫其手掌驅去初等怖恐不敢追逐須臾出從後到知母為賊所略欲追賊兄弟皆云賊衆當如何出怒曰有母而使賊貫其手將去煮噉之用活何為乃攘臂結社獨追之行數里及賊賊望見乃共布列待之出到回從一頭所賊四五人賊走復合聚圍出出跳越圍斫之又殺十餘人時賊分布驅出母前去賊連擊出不勝乃走與前輩合出復追擊之還見其母與比舍姬同貫相連出遂復奮擊賊賊問出曰卿欲何得出責數賊指其母以示之賊乃解還出母比舍姬獨不解遙望出求哀出復斫賊賊謂出曰已還卿母何為不止出又指求哀姬比我嫂也賊復解還之出得母還遂相扶持客南陽建安五年關中始開出來北歸而其母不能步行

兄弟欲共興之出以輿車歷山險危不如負之安穩
乃以龍盛其母獨自負之到鄉里鄉里士大夫嘉其
孝烈欲薦州郡辟召出出曰田民不堪冠帶至青
龍中母年百餘歲乃終出時年七十餘行喪如禮于
今年八九十才若五六十者

晉故征西大將軍長史孟府君傳

晉 陶 潛

君諱嘉字萬年江夏鄂人也曾祖父宗以孝行稱仕
吳司空祖父揖元康中為廬陵太守宗葬武昌新陽
縣子孫家焉遂為縣人也君少失父奉母二弟君娶
大司馬長沙桓公陶侃第十女閨門孝友人無能間
鄉閭稱之冲默有遠量弱冠情類咸敬之同郡郭遜
以清操知名時在君右常歎君溫雅平曠自以為不
及遜從弟立亦有才志與君同時齊譽每推服焉緣
是名冠州里聲流京邑太尉潁川庾亮以帝多民望
受分陝之重鎮武昌并領江州辟君都廬陵從事下
郡還亮引見問風俗得失對曰嘉不知還傳當問從
吏亮以塵尾掩口而笑諸從事既去喚弟翼語之曰
孟嘉故是盛德人也君既辭出外自除吏便步歸家
母在堂兄弟共相歡樂怡怡如也旬有餘日更版為
勸學從事時亮崇修學校高選儒官以君望實故應
尚德之舉太傅河南褚裒簡穆有器識時為豫章太
守出朝宗亮正旦大會州府人士率多時彥君在坐

次甚遠張問亮江州有孟嘉其人何在亮云在坐卿
但自覺歷歷觀遂指君謂亮曰將無是邪亮欣然而
笑嘉褒之得君奇君為褒之所得乃益器焉舉秀才
又為安西將軍庾翼府功曹再為江州別駕已卯令
征西大將軍熱國桓溫參軍君邑和而正溫甚重之
九月九日溫游龍山恭佐畢集四弟二甥咸在坐時
佐吏並著戎服有風吹君帽墮落溫目左右及賓客
勿言以觀其舉止君初不自覺良久如廁溫命取以
還之廷尉太原孫盛為咨議參軍時在坐溫命紙筆
令嘲之文成示溫溫以著坐處君歸見嘲笑而請筆
作答了不容思文辭超卓四座歎之奉使京師除尚
書剛定即不拜孝宗穆皇帝聞其名賜見東堂君辭
以脚疾不任拜起詔使人扶入君嘗為刺史謝永別
駕求會稽人喪亡君求赴義路由永興高陽許詢有
萬才辭榮不仕每縱心獨往客君縣界嘗乘船遊行
適逢君過歎曰都邑美士吾盡識之獨不識此人惟
聞中州有孟嘉者將非是乎然亦何由來此使問君
之從者君謂其使曰本心相遇今先赴義尋還就君

及歸遂止信宿雅相知得有若舊交還至轉從事中
郎俄遷長史在朝隤然伏正順而已門無雜賓嘗會
神情獨便超然命駕運之龍山顧景酣宴造夕乃歸
溫從容謂君曰人不可無勢我乃能駕御卿後以疾
卒於家年五十一始自總髮至於知命行不苟合言
無參矜未嘗有喜愠之容好酣飲逾多不亂至於任
懷得意融然遠寄苟若無人溫嘗問君酒有何好而
卿嗜之君笑而答曰明公但不得酒中趣爾又問聽
妓絲不如竹竹不如肉答曰漸近自然中散大夫桂
陽羅含賦之曰孟生善酣不愆其意光祿大夫南陽
劉耽昔與君同在溫府淵明從父大常菱常問耽君
若在當已作公否答云此本是三司人為時所重如
此淵明先親君之第四女也凱風寒泉之思實鍾厥
心謹按采行事撰為此傳懼或乖謬有虧大雅君子
之德所以戰戰兢兢若履深薄云耳贊曰孔子稱述
德修業以及時也君清蹈衡門則令聞孔昭振綱公
朝則德音允集道悠運促不終遠業惜哉仁者必壽
豈斯言謬乎

陶靖節傳

梁 蕭 統

陶淵明字元亮或云潛字淵明潯陽柴桑人也曾祖
侃晉大司馬淵明少有趣博學善屬文穎脫不羣
任真自得嘗著五柳先生傳以自况曰先生不知何
許人也亦不詳姓字宅邊有五柳樹因以為號焉閒
靜少言不慕榮利好讀書不求甚解每有會意欣然
忘食性嗜酒而家貧不能恒得親舊知其如此或置
酒招之造飲輒盡期在必醉既醉而退曾不吝情去
留環堵蕭然不蔽風日短褐穿結簞瓢屢空晏如也
嘗著文章自娛頗示己志忘懷得失以此自終時人
謂之實錄親老家貧起為州祭酒不堪吏職少日自
解歸州召主簿不就躬耕自資遂抱羸疾江州刺史
檀道濟往候之偃臥瘠餒有日吳道濟謂曰賢者處
世天下無道則隱有道則見今子生文明之世奈何
自苦如此對曰潛也何敢望賢志不及也道濟饒以
梁肉麾而去之後為鎮軍建威參軍謂親朋曰聊欲
絃歌以為三徑之資可乎執事者聞之以為彭澤令
不以家累自隨送一力給其子書曰汝且夕之費自

給為難今遣此力助汝薪水之勞此亦人子也可善
遇之公田悉令吏種秫曰吾嘗得醉于酒足矣妻子
固請種秔乃使二頃五十畝種秫五十畝種秔歲終
會郡遣督郵至縣吏請曰應束帶見之淵明嘆曰我
豈能五斗米折腰向鄉里小兒即日解綬去職賦歸
去來微著作郎不就江州刺史王宏欲識之不能致
也淵明嘗往廬山宏命淵明故人龐通之齎酒具于
半道栗里之閒邀之淵明有脚疾使一門生二兒舁
藍輿既至欣然便共飲酌俄頃宏至亦無迂也先是
顏延之為劉柳後軍功曹在潯陽與淵明情誼後為
始安郡經過潯陽日造淵明飲焉每往必酣飲至醉
宏欲邀延之坐彌日不得延之臨去留二萬錢與淵
明淵明悉遣送酒家稍就取酒嘗九月九日出宅邊
菊叢中坐久之滿手把菊忽值宏送酒至即便就酌
醉而歸淵明不解音律而蓄無絃琴一張每酒適輒
撫弄以寄其意責賤造之者有酒輒設淵明若先醉
便語客我醉欲眠卿可去其真率如此郡將常候之
直其釀熟取頭上葛巾漉酒漉畢還復著之時周續

之入廬山事釋慧遠彭城劉遺民亦遁跡匡山淵明
又不應徵命謂之潯陽三隱後刺史檀韶苦請續之
出州與學士祖企謝景夷三人共在城北講禮加以
讐較所住公廨近于馬隊是故淵明示其詩云周生
述孔業祖謝響然臻馬隊非講肆較書亦已勤其妻
翟氏亦能安勤苦與之同志自以曾祖晉世宰輔耻
復屈身後代自宋高祖王業漸隆不復有仕元嘉四
年將復徵命會卒時年六十三世號靖節先生

袁友人傳

梁江淹

友人袁炳字叔明陳郡陽夏人其人天下之士幼有
異才學止不覽文章倣儻清曠出一肯任心觀書不
為章句之學其篤行則信義惠和意罄如也常念蔭
松栢詠詩書志氣跌宕不與俗人交悅眉暫仕歷國
常侍員外郎府功曹臨湘令粟之入者悉散以贍親
其為節也如此數百年來有此人焉至乃好妙賞文
獨絕於世也又撰晉史奇功未遂不幸卒官春秋二
十有八與予有青雲之交非直銜杯酒而已嗟呼斯
才也斯命也天之報施善人何如哉何如哉

故東州節度使盧公傳

唐 李 華

盧坦字保衡河南人父璽贈鄭州刺史坦少孤初任
韓城縣尉歷宣城縣華河南三縣尉其吏河南知捕
賊杜黃裳為河南尹謂坦曰某家子與惡人遊破家
產公為捕賊盡使察之坦抑曰凡居官終始廉白祇
人俸錢者雖歷大官亦無厚蓄以傳其能多積財者
必剝下以致如其子孫善守之是天富不道人之家
也若恣其不道以歸於人坦以為宜故不使察黃裳
驚視因使升就坐自此日加重及黃裳為吏部侍郎

將授以太常博士會鄭滑節度使李復表請為判官
得監祭御史薛盈珍為監軍使累侵軍政坦每據理
以拒之盈珍嘗曰盧侍御所言皆公我 不違也有
善吹笛者大將十餘人同啓復請以為重職坦適在
復所復問曰衆所請可許否坦笑曰大將等皆久在
軍積勞正遷以為右職奈何目薄欲與吹笛少年為
列耶復告諸將曰盧侍御言是也大將慙遽走出就
坦謝且曰向聞侍御言某等羞愧汗出恨無穴可入
李復病甚盈珍以甲士五百人入城州人皆駭恐坦

遽止之盈珍不敢違復率盈珍主兵事制以姚南仲
代盈珍方會客言曰姚大夫書生豈將才也坦私謂
人曰姚大夫外雖柔中甚剛又能斷監軍若侵之必
不受禍自此萌矣若從公喪而西必遇姚大夫吾懼
為所留以及禍遂潛去姚果以牒來請終以不遂得
解及盈珍與姚有隙從事多黜死者王緯觀察浙西
兼鹽鐵使請坦為轉運判官及李錡代請如初轉殿
中侍御史錡所行多不循法坦每爭之詞旨深切聽
者皆為之懼累求去不得凡在錡府七年官不改錡
惡狀滋大坦慮及難反非可以力爭遂與裴度李約
李絳維以罷去後數年詔追錡入錡遂翦兵士殺留
後以留己因發兵取宣州為其將所擒送斬死順宗
皇帝寢疾王叔文居翰林決大政天下慄慄坦說宰
相韋執誼連白立皇太子以樹國本執誼深納其言
將以為殿中侍御史時御史中丞亦以為請王叔文
使人請坦將以為員外郎知揚州留後坦假他辭不
受叔文不說故事皆不行及王叔文敗出坦遂為殿
中侍御史推德輿為戶部侍郎請為本司員外郎尋

轉戶部兼侍御史知雜事未久遷刑部郎中知雜事如故亦縣尉有爲御史臺所按者京兆尹密赦之上使品官釋之坦時在宅臺吏以告坦白中丞請覆奏然後奉詔品官遽以聞上曰吾固宜先命所司遂使宣詔乃釋數月遷御史中丞賜紫衣分司東都尋歸西臺初上禁絕罷鎮節度使等獻財貨載於赦條時山南節度使柳晟浙東觀察使閻濟美皆罷鎮有所獻坦劾奏之晟濟美皆白衣待罪上召坦對因曰柳晟閻濟美所獻皆家財非刻下卿勿劾坦對曰陛下所以布大信於天下者赦令是也且兩臣首違詔臣職當舉奏陛下不可以失大信於天下上曰朕既受之矣如何坦對曰出歸有司以明陛下之德上善之竟爲宰相所寢李錡之誅有司將自淮安王之下墳墓皆毀之宰相不敢言坦奏曰李錡與國同族其反逆不道身既斬死并殺其子罪塞矣若將追毀祖父墳墓臣以爲不可淮安王有佐命之功且國真又死王事漢誅霍禹不毀霍光之墳旁遺愛伏誅罪不誅於元齡此前代及聖朝之故事也康誥曰父子兄弟

罪不相及若將易之母乃罪及良臣且傷大體乎上改容曰非卿言何由知此遂命停毀仍禁杜樵給伍尸守淮安王之墳以示不忘其功上策試賢良方正之士有懷書策入者將深罪之坦奏言四方不明知所犯必以爲策辭抵忤宜輕其責上從之江陵節度使裴均入爲僕射行香時將處常侍諫議之上坦引故事及姚南仲近例以爲節裴均怒曰姚南仲何足爲例耶坦應曰姚僕射但不是勅使耳何不足以爲例也遂爲均所排改右庶子坦初爲殿中當杜黃裳爲相故事遷凡二十有三月而至中丞及居官守道正言日聞而人忘其遷之速也數月宰相裴均白以爲宜歛池等州都團練觀察處置節使兼御史中丞宣州刺史劉闢之逆其婿蘇強生誅死強兄宏爲晉州從事自免歸人莫敢用坦奏言蘇宏有才行以其弟強生誅死劉闢反誅宏與強相去三千里必不通謀以強廢宏非陛下惜財之意因請宏以爲判官上曰假令蘇強當時不就誅尚且宜隨材而任之況在其兄邪遂得請及在宣州江淮大旱米價日長或說

節其價以救人坦曰宣州地狹穀不足皆他州來若制其價則商不來矣價雖賤則無穀奈何後米斗及二百商人舟米以來者相望坦乃借兵食多出於市以平其直人賴以生當塗縣有渚田久廢坦以為歲旱苟貧人得食取傭可易為功於是渚田盡闢籍傭以活者數千人又以羨錢四十萬代稅戶之貧者故旱雖甚而人忘災五年冬遷刑部侍郎充諸道監鐵轉運使減冗職八十員自江之南補置付之院監使無所與數月轉戶部侍郎判度支坦更歷重位以朝

廷是非大體為己務故多所陳請或上封告泗州刺史薛謩為代北水運使時蓄馬數百匹有異馬不以獻者事下度支乃使巡判官往驗之未返上遲之使品官劉泰所索其事坦上陳以為陛下既使有司驗之又使品官往豈大臣不足信於品官乎臣請先罷免疏三奏上於是遂追劉泰所請賦於州郡者或非土地所有責厚價以市之他境坦悉條奏各去其所無罷宣歙言支米收其價以移之於湖南免江南鹿脂配之郡汝州以韓重華為代北水運使開廢田列

柵二十益兵三千人歲收粟二十萬石八年西受降城為河所壞城使周懷義上言宰相議徙天德故城坦以受降城張仁愿所作當磧石得制北狄之要害若避河流宜退三數里其費不多天德故城北倚山去河甚遠失制國要地非便因使水運使察視遠近利病以圖進上使品官強文彩覆之文彩言與坦合上召坦使條陳將行之竟為宰相所奪乃出坦為劔南東川節度使問懷義數月憂卒燕重州代其位遂移天德故城軍士歸怨因殺重州屠其家初坦與宰相

李絳議論多合絳籍為已助及坦出半歲而絳罷坦至東川盡罷兩稅外山澤鹽井權率之籍裔人歌之綿劔二州有通文成州路每歲奏發二千兵以防西蕃其實不過一二百人坦乃奏於衝地置戍鎮之上誅蔡州詔發兵二千人於安州每朔望使人問其父母妻子其有疾者與之藥故兵士皆感恩無逃者及薨贈禮部尚書

太學生何蕃傳

唐 韓愈

太學生何蕃入太學者廿餘年矣歲舉進士學成行
尊自太學諸生推頌不敢與蕃齒相與言於助教博
士助教博士以狀申於司業祭酒司業祭酒撰次蕃
之羣行焯焯者數十餘事以之升於禮部而以聞於
天子京師諸生以薦蕃名文說者不可選紀公卿大
夫知蕃者比肩立莫為禮部為禮部者率蕃所不合
者以是無成功蕃淮南人父母具全初入太學歲率
一歸父母止之其後間一二歲乃一歸又止之不歸
者五歲矣蕃純孝人也聞親之老不自克一日揖諸
生歸養於和州諸生不能止乃閉蕃空舍中於是太
學六館之士百餘人又以蕃之義行言於司業楊先
生城請諭留蕃於是太學闕祭酒會陽先生出道州
不果留歐陽詹生言曰蕃仁勇人也或者曰蕃居太
學諸生不為非義葬死者之無歸哀其孤而字焉惠
之大小必以力復斯其所謂仁歟蕃之力不任其體
其親不任其心吾不知其勇也歐陽詹生曰朱泚之
亂太學諸生舉將從之來請起蕃蕃正色叱之六館

之士不從亂茲其勇歟惜乎蕃之居下其可以施於
人者不流也譬之水其為澤不為川乎川者高澤者
卑高者沈卑者止是故蕃之仁義充諸心行諸太學
積者多施者不遐也天將兩水氣上無擇於川澤潤
路之高下然則澤之道其亦有施乎抑有待於彼者
歟故凡貧賤之士必有待然後能有所立獨何蕃歟
吾是以言之無亦使其無傳焉

李紳傳

唐 沈亞之 文粹

李紳者本趙人徙家吳中元和元年節度使宗臣錡在吳紳以進士及第還過謁錡錡舍之與宴遊晝夜錡能其才留執書記明年錡以驕聞有詔召稱疾不欲行賓客莫敢言紳為言不入不得去會留後使王澹專職為錡具行錡蓄怒始發於澹陰教士食之初士奔當勞賜者皆會府中受賜與中貴人臨視次至中軍士得賜者俱不散齊呼曰澹逆可食既盡即執中貴人嗚曰尔寧逆家欲寧飽寒腹曰請所欲曰為我家書報天子幸得復錡位貴人懼偽諾之召書記以疏聞紳聞之止入錡內匿索不得及中貴人至促錡行錡益怒急召紳授我紙筆令採書上讀紳坐錡前佯惴怖戰管搗紙下札皆不能字輒塗去累數十行又如是幾盡紙錡怒罵曰是何敢如是汝欲下從而先人耶對曰紳不敢惡生直以少養長儒家未嘗聞金革鳴今暴及此且不知精神在所誠得死在畏苦前幸耳錡復制以兵刃令易紙復然傍一人為錡言曰聞有許侍御縱者尤能軍中書紳不足與等

請召縱縱至錡銳意自舉授詞採書無不可錡意逆幽紳於潤之外獄兵散乃出縱竟逆死贊曰李錡之賊江東也其抗節者有李雲李紳雲則山中劉騰為書以大之而紳之蹟未及禍且紳職錡肘腋下舉動顧盼有一不誠則支體立盡衆手而紳亦不顧而曉然自効如此可謂臨大節而不可奪者耶

李賀小傳

唐 李商隱 文粹

京兆杜牧為李長吉集序狀長吉之奇甚盡世傳之
長吉姊嫁王氏者語長吉之事尤備長吉細瘦通眉
長指爪能苦吟疾書最先為昌黎韓愈所知所與游
者王參元楊敬之權璩崔植為密每旦日出與諸公
遊未嘗得題然後為詩如他人思量牽合以及程限
為意恒從小奚奴騎距驢背一古破錦囊遇有所得
即書投囊中及暮歸太夫人使婢受囊出之見所書
多輒曰是兒要當啞出心始已耳上燈與食長吉從

婢取書石墨疊紙足成之投他囊中非大醉及吊喪
日率如此過亦不復省王楊輩時復來探取罵去長
吉往往獨騎往還京洛所至或時有著隨弃之故沈
子明家所餘四卷而已長吉將死時忽畫見一緋衣
人駕赤蚪持一版書若太古篆或霹靂石文者云當
召長吉了不能讀歛下榻叩頭言阿婆老且病賀不
去緋衣人笑曰帝成白玉樓立召君為記天上差
樂不苦也長吉獨泣遘人盡見之少之長吉氣絕常
所居窓中耿耿有煙氣聞行車嚙管之聲太夫人急

止人哭待之如炊五斗黍許時長吉竟死王氏姊非
能造作謂長吉者實所見如此嗚呼天蒼蒼而高也
上果有帝耶帝果有圓圓宮室觀閣之玩耶苟信然
則天之高邈帝之尊嚴亦宜有人物文彩愈此世者
何獨番番於長吉而使其不壽耶噫又豈世所謂才
而奇者不獨地上少耶天上亦不多耶長吉生二十
四年位不過奉禮太常中當時人亦多排擯毀斥之
又豈才而奇者帝獨重之而人反不重耶又豈人見
會勝帝叩

桑懌傳

宋 歐陽修文鑑

桑懌開封雍邱人其兄慤本舉進士有名懌亦舉進士不中去遊汝潁間得龍城廢田數頃還而力耕歲凶汝旁諸縣多盜懌曰今願為耆長往來里中察奸民因召里中少年戒曰盜不可為也吾在此不汝容也少年皆諾里老父子死未斂盜夜脫其衣里志父怯無它子不敢告縣羸其屍不能葬懌聞而悲之狀疑少年王生者夜入其家探其篋不使之知覺明日遇之問曰爾諾我不為盜矣今又盜里父子屍者非

爾耶少子色動即推仆地縛之詰共盜者王生指某少年懌呼壯丁守王生又自馳取少年者送縣皆伏法又嘗之却城遇尉方出捕盜招懌飲酒遂與俱行至賊所藏尉怯陽為不知以過懌曰賊在此何之乎下馬獨格殺數人因盡縛之又聞襄城有盜十許人獨提一劍以往殺數人縛其餘汝旁縣為之無盜京西轉運使奏其事授郟城尉天聖中河南諸縣多盜轉運奏移繩池尉殷古險地多涂山而青灰山尤阻險為盜所恃惡盜王伯者藏此山時出為近縣害當

此時王伯名聞朝廷為巡檢者皆授名以捕之既懌至巡檢者偽為宣頭以示懌將謀招出之懌信之不疑其偽也因謀知伯所在挺身入賊中招之與伯同卧起十餘日信之乃出巡檢者反以兵邀於山口懌幾不自免懌曰巡檢授名懼無功耳即以伯與巡檢使自為功不復自言巡檢獻俘京師朝廷知其實罪黜巡檢懌為尉歲餘改授右班殿直永安縣巡檢明道景祐之交天下旱蝗盜賊稍稍起其間有惡賊二十三人不能捕拒密院以傳召懌至京授二十三人

名使往捕懌謀曰盜畏吾名必以潰潰則難得矣宜先示之以怯至則閉柵戒軍吏無一人得輒出居數日軍吏不知所為數請出自劾輒不許既而夜與數卒變為盜服以出迹盜所嘗行處入民家民皆走獨有一媼留為作飲食饋之如盜乃歸復閉柵三日又往則攜其具就媼饌而以其餘遺媼媼待以為真盜矣乃稍就媼與語及群盜輩媼曰彼聞桑懌來始畏之皆遁矣又聞懌閉營不出知其不足畏今皆還也某在某處某在某所矣懌盡鈎得之復三日又往厚

遺之遂以實告曰我桑澤也煩媼為察其實而慎勿泄後三日我復來矣後又三日往媼察其實審矣明且部分軍士用甲若干人於某所取某盜卒若干人於某處取某盜其尤彊者在某所則自馳馬以往士卒不及從惟四騎追之遂與賊遇手殺三人凡二十三人者一日皆獲二十八日復命京師樞密吏謂曰與我銀為君致閤職澤曰用賂得官非我欲况貧無銀有固不可也吏怒匿其閤以先短使送三班三班用例與馬監押未行會交趾獠叛殺海上巡檢昭化諸州皆警往者數輩不能定因命澤往盡手殺之還乃受閤門祇候澤曰是行也非獨吾功位有居吾上者吾乃其佑也今彼留而我還我賞厚而彼輕得不殺我益其功而自伐乎受之後慙吾心將讓其實歸已上者以奏蒙示予予謂曰讓之必不聽徒以好名與詐貶譏也澤歎曰亦思之狀士顧其心何如爾當自信其心以行譏何累也若欲避名則善皆不可為也已余慙其言卒讓之不聽澤雖舉進士而不甚知書狀其所為皆合道理多此類始居雍邱遭大水

有粟二廩將以舟載之見民走避溺者遂棄其粟以舟載之見民筑歲聚其里人餉之粟盡乃止澤善劍及鐵簡力過數人而有謀畧遇人常畏若不自足其為人不甚長大亦自修為威儀言語如不出其口卒狀遇人不知其健且勇也

廬陵歐陽修曰勇力人所有而能知用其勇者少矣若澤可謂義勇之士其學問不深而能者蓋天性也余固喜傳人事尤愛司馬遷善傳而其所書皆偉烈奇節士多讀之欲學其作而惟今人如遷所書者何少也乃於遷特雄文善狀其說而古人未必然也及得桑澤事乃知古之人有然焉遷書不誣也知今人固有而但不盡知也澤所為壯矣而不知予文能如遷書後人讀而喜否姑次第之

范景仁傳

宋 司馬光文鑑

范景仁名鎮益州華陽人少舉進士善文賦場屋師之為人和易修教參知政事薛簡肅公端明殿學士宋景文公皆器重之補國子監生及貢養院名皆第一故事殿廷唱第過三人則為奏名之首者必執聲目陳以祈恩雖考校在下天子必擢真上列以吳春卿歐陽永叔之耿介猶不免從衆景仁獨不然左右與竝立者屢趣之使自陳景仁不應至七十九人始唱名及之景仁出拜退就列訖無一言衆皆服其安

恬自是始以自陳為恥舊風遂絕釋褐新安主簿到官數旬時宋宣獻公留守西京不欲使與下吏共勞辱召置國子監使教諸生扶蒲又薦於朝為東監直講未幾宋景文公奏同修唐書及用參知政事王公薦召試學士院詩用彩霓字學士以沈約郊居賦雌霓連蜺讀霓為入聲謂景仁為失韻由是除館閣校勘殊不知約賦便取聲律便美非霓不可讀為平聲也當時有學者皆為景仁憤鬱而景仁處之晏然不自辨為校勘四年乃遷校理丞相龐公薦景仁有美

才不汲汲於進取詔除直秘閣未幾以起居舍人知諫院仁宗性寬仁言事競為激訐以采名或緣受憎汚人以帷箔不可明之事景仁獨引大體自非關朝廷安危繫生民利病皆闕略不言陳恭公為相嬖妻張氏皆殺婢御史劾奏欲去之不能得乃誣之云私其女景仁上言朝廷設臺諫官使之除讒惡也審如御史所言則執中可斬如其不然御史亦可斬御史怒共劾景仁以為阿附宰相景仁不顧力為辨其不然深救當時之獎識者題之仁宗即位三十五年未

有繼嗣在祐初暴得疾旬日不知人中外大小之臣無不寒心而畏避嫌殺相倚杖莫敢發言景仁獨奮曰天下事尚有大于此者乎捨此不言顧惟扶掖細微以塞職是與負國吾不忍也即上言太祖捨其子而立太宗周王既薨與宗室子養之宮中陛下宜為宗廟社稷計早擇宗室賢者優其禮數試之以政與國天下之事以率天下人心章累上寢不報景仁因闔門家居自求誅譴執政或論以奈何致干名希進之人景仁上執政書言繼嗣不定將有急兵鎮義

當死朝廷之刑不可死亂兵之下此乃鎮擇死之時
尚何暇顧干名希進之嫌而不為去就之決哉又奏
稱臣竊原大臣之意恐行之而事有變故畏避而為
容身之計也萬一兵起大臣家中族首領顧不可保
其為身計亦已疏矣就使事有中變而死陛下之職
與其死於亂兵不猶愈乎乞陛下以臣此章示大臣
使其自擇死所聞者為之股栗尋除兼侍御史知雜
事景仁因辭不變乞解言職就散地執政復論以上
之不豫諸大臣亦嘗建此策今姦言已入為之甚難

景仁復上執政書云但當論事之是非不當問其難
易況事早則濟綏則不及此聖賢所以貴機會也諸
公謂今日難於前日安知它日不難於今日乎謂今
日姦言已入不可弭他日可弭乎凡見上面陳者三
奏章者十有七朝廷不能奪乃罷諫職改集賢殿修
撰頃之拜知制誥遷翰林學士英宗即位中書奏請
追尊濮安懿王事下兩制議以為宜稱皇伯高官大
國極其尊榮大忤執政意更下尚書省集百官議之
意朝士必有迎合者既而臺諫爭上言為人後者為

之子不得顧私親今陛下既為仁宗後若復推尊濮
王是貳統也殆非所以報仁宗之盛德衆論鼎沸執
政欲綏其事乃下詔罷百官集議曰當令禮官檢詳
典禮以聞景仁時判太常寺即具列為人後之禮及
漢魏以來論議得失悉奏之與兩制臺諫議合執政
怒召景仁詰責之曰詔書曰當令檢詳奈何遽列上
邪景仁曰有司得詔書不敢稽留即以聞乃其職也
奈何更以為罪乎會宰相還官景仁當草制坐失於
考按不令故事加侍讀學士出知陳州今上即位復

召還翰林王介甫參知政事置三司條例司變更祖
宗法令專以聚斂為務斥逐中直引進姦倖景仁上
疏極論其不可朝廷不報景仁時年六十三因上言
即不用臣言臣無顏復居位食祿願聽臣致仕章累
上語益切直介甫大怒自草制書極口醜詆使以本
官戶部侍郎致仕凡所應得恩例悉不之與於是當
時在位者皆自愧景仁名益重於天下介甫雖詆之
深入更以為榮焉景仁既退居有園第在京師專以
讀書賦詩自娛客至無貴賤皆野服見不復報謝故

人或為具召之雖權貴不拒也不召則不往見之或時乘興出遊則無遠近皆往嘗乘藍輿歸蜀與親舊舉飲賑施其貧者周覽江山窮其勝賞期年然後返年益老而視聽聰明支體尤堅強嗚呼曷使景仁枉道希世以得富貴家屈辱任憂患豈有今日之樂邪則景仁所失甚少所得殊多矣詩云愷悌君子神所勞矣又曰樂只君子遐不作景仁有焉客有問今世之勇於逆變者豈曰有范景仁者其為勇人莫之敵客曰景仁長僅五尺循循如下勝衣矣其勇豈曰何哉而所謂勇者而以瞋目裂眦髮上指冠力曳九牛氣陵三軍者為勇乎是特匹夫之勇耳勇於外者也若景仁勇於內者也自唐宣宗以來不欲聞人言立嗣萬一有言之者輒切齒疾之與倍畔無異而景仁獨唱言之十餘章不已視身與宗族如鴻毛後人見景仁無恙而繼為之者則有矣然景仁者冒不測之淵無勇者能之乎人之情孰不畏天子與執政親受之至隆者孰若父子執政欲尊天子之父而景仁引古義以爭之無勇者能之乎樣與位皆人所貪或

老且病前無可冀猶戀戀不忍捨去况景仁身已通顯有聲望視公相無跬步之遠以言不行年六十三即拂衣歸終身不復起無勇者能之乎凡人有所不能而人或能之無不服焉如呂獻可之先見范景仁之勇決皆余所不及也余心誠服之故作范景仁傳

文中子補傳

宋 司馬光 文鑑

文中子王通字仲淹河東龍門人六代祖元則仕宋歷太僕國子博士兄元謨以將略顯而元則用儒術進元則生煥煥生蚪齊高帝將受禪誅袁粲蚪由是北奔魏魏孝文帝甚重之累官至并州刺史封晉陽公謚曰穆始家河汾之間蚪生彥官至同州刺史彥生傑官至濟州刺史封安安康公謚曰獻傑生隆字伯高隋開皇初以國子博士待詔雲龍門隋文帝嘗從容謂隆曰朕何如主隆曰陛下聰明神武得之於天發號於今不盡稽古雖負堯舜之資終以不學為累帝默然有間曰先生朕之陸賈也何以教朕隆乃著興衰要論七篇奏之帝雖稱善亦不甚達也歷曷樂騎氏銅川令棄官歸教授卒於家隆生通自元以來世傳儒業通幼明悟好學受書於東海李幼育受詩於會稽夏瑛受禮於河東關即受樂於北平霍汲受易於族父仲華仁壽三年通始冠西入長安獻太平十二策帝召見歎美之然不能用罷歸尋復徵之煬帝即位又徵之皆稱疾不至專以教授為事弟子

自遠方至者甚衆乃著禮論二十五篇樂論二十篇續書百有五十篇續詩三百六十篇元經五十篇贊易七十篇謂之王氏六經司徒楊素重其才行勸之仕通曰汾水之曲有先人之弊廬足以庇風雨薄田足以具饗粥願明公正身以治天下使時和年豐通也受賜多矣不願仕也或謂通於素曰彼賈慢公公何敬焉素以問通通曰公使可慢則僕得矣不可慢則僕失矣得失在僕公何據焉素待之如初右武侯大將軍嘗若弼嘗示之射發無不中通曰美哉藝也君子志於據德依仁然後遊於藝也弼不悅而去通謂門人曰夫子矜而慢難乎免於今之世矣納言蘇威好蓄古器通曰昔之好古者聚道今之好古者聚物大學博士劉炫問易通曰聖人之於易也沒身而已矣况吾儕乎有仲長子光者隱於河渚嘗曰在險而運奇不若宅平而無為通以為知言曰名愈消德愈長身愈退道愈進若人知之矣通見劉孝標絕交論曰惜乎舉仕公而毀也任公不可謂知人也見辨命論曰人事廢矣弟子許牧問恩不害義儉不傷禮

何如通曰是漢文之所難也廢肉刑害於義省之可也衣弋綈傷於禮中焉可也王孝逸曰天下皆爭利而棄義若之何通曰捨其所爭取其所棄不亦君子乎或問人善通曰知其善則稱之不善則對曰未嘗與久也賈瓊問息諺通曰無辨問止怨曰不爭故其鄉人皆化之無爭者賈瓊問群居之道通曰同不害正異不傷物古之有道者內不失貞外不殊俗故全者賈瓊請絕人事通曰不可瓊曰然則奚若通曰莊以持之言以應之來者勿拒去者無追汎如也則可

通謂姚弋能文或曰簡通曰茲所以能也又曰廣通曰廣而不濫茲又所以為能又謂薛收善接小人遠而不疎近而不狎顏如也通嘗曰封禪非古也其秦漢之侈心乎又曰美哉周公之志深矣乎寧家所以安天下存我所以厚蒼生也又曰易樂者必多哀輕施者必好奪又曰無赦之國其刑必平重歛之國其財必貧又曰廉者常樂無求貪者常憂不足又曰我未見誹而喜聞譽而懼者又曰婚而論財商賈之道也又曰居近而識遠處今而知古其為學乎又曰輕

譽苟歿好憎尚慙小人哉又曰聞諺而慙者謔之階也見譽而喜者倖之媒也絕階去媒謔倖遠矣通謂北山黃公善醫先飲食起居而後針藥謂汾陰侯生善筮先人事而後交蒙大業十年尚書召通蜀郡司戶十一年以著作郎國子博士徵皆不至十四年病終於家門人諡曰文中子二子福郊福時二弟凝績評曰此皆通之世家及中說云爾元譔仕宋至開府儀同三司績其福時之子勔劾劾皆以能文著於唐世各有傳余竊謂先王之六經不可勝學也而又

奚績焉茲之庸能出於其外乎出則非經矣苟無出而續之則贅也奚益哉或曰彼商周以往此漢魏以還也曰漢魏以還還固之徒記之詳矣奚待以續經然後人知之必也好大而欺愚乎則必不愚者孰有從之哉今其六經皆亡而中說亦出於其家雖云門人薛收姚弋所記然余觀其書竊疑唐室既興與福時輩依竝時事從而附益之耳何則其所稱朋友門人皆隋唐之際將相名臣如蘇威楊素賀若弼李德林李靖竇威房元齡杜如晦王珪魏徵叔達薛收

之徒考諸舊史無一人語及通名者隋史唐初為也亦未嘗載其名於儒林隱逸之間豈諸公皆忘師棄舊之人乎何獨其家以為名世之聖人而外人皆莫之知也福時又云凝為監察御史劾秦侯君集有反狀太宗不信之但點為姑蘇令大夫杜淹奏凝直言非事長孫無忌與君集善由是與淹有隙王氏兄弟皆抑不用時陳叔達方撰隋史畏無忌不為文中子立傳按叔達前宰相與無忌任相將何故畏之至沒其師之乃使無聞於世乎且魏徵實總隋史縱叔達曲避權貴微肯聽之乎此余所以疑也又淹以貞觀二年卒十四年君集平高昌還而下獄由是怨望十七年謀反誅此其前後參差不實之尤著者也如通對李靖聖人之道曰無所由亦不至於彼彼道之方也必無至乎又對魏徵以聖人有憂疑退語董常以聖人無憂疑曰心迹之判久矣皆流入於釋老者也夫聖人之道始於正心脩身齊家治國至於安萬邦和黎民格天地遂萬物功施當時法垂後世安在其無所至乎聖人所為皆發於至誠而後功業被於四

海至誠心也功業迹也奚為判哉如通所言是聖人作偽以欺天下也其可哉又曰佛聖人也西方之教也中國則泥又曰詩書盛而秦世滅非仲尼之罪也虛元長而晉室亂非老莊之罪也齊戒修而梁國亡非釋迦之罪也苟為聖人矣則推而放諸南海而準推而放諸北海而準焉有可行於西方不可行於中國哉苟非聖人矣則泥於中國獨不泥於西方邪秦焚詩書之方詩書之道盛於天下秦安得滅乎莊老貴虛無而載禮法故王衍阮籍之徒棄其風而鼓之歸譚論心情欲以至九州覆沒釋迦攝前生之因果弄今日之仁義故梁武帝承其流而信之嚴齋戒弛政刑至於百姓塗炭發端唱導者非二家之罪也誰哉此皆議論不合聖人者也唐世文學之士傳道其書者蓋獨李翱以比太公家教及司空圖皮日休始重之宋興柳開孫何振而張之遂大行於世至有真以為聖人可繼孔子者余讀其書想其為人誠好學篤行之儒惜也其自任太重其子弟譽之太過使後之人莫之敢信也余恐世人譏其憎而累其美故米

其行事於理可通而所言切於事情者著於篇以補
隋書之闕

徐復傳

宋 曾 鞏

徐復字希顏興化軍莆田人嘗舉進士不中去不復
就博學於書無所不讀尤通星歷五行數術之說世
罕有能及者為人倜儻有大志內自勵勵不求當世
之譽樂其所自得謂富貴不足慕也貧賤不足憂也
故窮門漏屋敝衣糲食或至於不能自給未嘗動其
意也遇人無少長貴賤皆盡恭謹其言前世因革興
壞是非之理人少能及狀其家未嘗蓄書益其強記
如此也及定中李元昊叛詔求有文武材可用者恭
知政事綏綬天章閣侍讀林瑀皆薦復詔賜裝錢州
郡迫趣上道既至仁宗見復於崇政殿訪以世務復
所為上言者世莫得聞也仁宗因命講易乾坤既濟
未濟又問今歲直何卦西兵欲出如何復對歲直小
過而太一守中宮兵宜內不宜外仁宗嘉其言復又
獻所為邊防策太一主客立成歷洪範論上曰卿所
獻書為卿留中必欲官之復固辭迺官其子晞留復
登聞鼓院與林瑀同修周易會元紀歲餘固求東歸
仁宗高其行禮以束帛賜號冲晦處士復久遊吳因

家杭州州將每至必先加禮然復未嘗肯至公門范仲淹知杭州數就復訪問甚禮重之仲淹嘗言西兵既起復預言罷兵歲月又斗牛間嘗有星變復言吳當大疫死者當數十萬人後皆如其言復平居以周易太元校學者人或勸復著書復曰古聖賢書已具願學者不能求吾復何為以微名後世哉晚取其所為文章盡焚之今其家有書十餘篇皆出於門人故舊之家復卒時年七十餘既病故人王稷居睦州欲往省之復服曰未以五六月之交尚及見子稷未及往至期復果已死其終事皆預自處子晞年五十餘亦致仕官至國子博士復贈尚書虞部員外郎復死十餘年而沈遘知杭州脩其居曰高士坊云贊曰復之文章存者有慎習贊固蒙養等篇歸於還求諸已不矜世取罷余論次後事頗采其意云若復自扶汴濁之中隱約於閭巷而不改其操可謂樂之者矣

方山子傳

宋 蘇軾 文鑑

方山子光黃間隱人也少時慕朱家郭解為人閭里之俠皆宗之稍壯折節讀書欲以此馳騁當世然終不遇晚乃遊於光黃間曰岐亭庵居蔬食不與世相聞棄車馬毀冠服徒步往來山中人莫識也見其所著帽方偉而高曰此豈古方山冠之遺像乎因謂之方山子予謫居於黃過岐亭適見焉曰嗚呼此吾故人陳慥季常也何為而在此方山子亦矍然問予所以至此予告之故俯而不答仰而笑呼予宿其家環堵蕭然而妻子奴婢皆有自得之意予既聳然異之獨念方山子少時使酒好劍用財如糞土前十有九年予在岐山見方山子從兩騎挾二矢遊西山鵲起於前使騎逐而射之不獲方山子怒馬獨出一發得之因與予馬上論用兵及古今成敗自謂一世豪士今幾時耳精悍之色猶見於眉間而豈山中之人哉然方山子世有勲閥當得官使從事於其間今已顯聞而其家在洛陽園宅壯麗與公侯等河北有田歲得帛千匹亦足以富樂棄不取獨來窮山中此豈

無得而然哉予聞光前問多異人往往陽狂垢污不可得而見方山子儻見之與

巢谷傳

宋 蘇 轍 文鑑

巢谷字元脩父中世眉山農家也少從士大夫讀書老為里校師谷幼傳父學雖朴而博舉進士京師見舉武藝者心好之谷素多力遂矣其舊學蓄弓箭習騎射久之業成而不中第聞西邊多驍勇騎射擊刺為四方冠去遊秦鳳涇原間所至支其秀傑有韓存質者尤與之善谷教之兵書二人相與為金石交熙寧中存質為河州將有功號熙河名將朝廷稍奇之會瀘州公兄弟擾邊諸郡不能制乃命存質出兵討之存質習蠻事邀谷至軍中問焉及存質得罪將就逮自料必死謂谷曰我涇原武夫死非所惜顧妻子不免寒餓囊中有銀數百兩非君莫可使遺之者谷許諾即變姓名懷銀步行往救其子人無知者存質死谷逃避江淮間會赦乃出予以鄉閭故幼而識之知其志節緩急可托者也予之在朝谷浮沉里中未嘗一見紹聖初予以罪謫居筠州目筠徒雷自雷徙循予兄子瞻亦自惠州徙昌化士大夫皆諱與予兄弟遊平生親友無復相聞者谷獨慨然自眉山誦

言欲徒步訪吾兄弟聞者皆笑其狂元符二年春正月自梅州遺予書曰我萬里步行見公不自意全今自悔矣不旬日必見死無恨矣予驚喜曰此非今世人古之人也既見握手相泣已而道平生逾月不厭時谷年七十有三矣瘦瘠多病非復昔日元脩也將復見子瞻於海南予慰其老且病止之曰君意則善然自此至儋數千里復當渡海非老人事也谷曰我自跡未即死也公無止我留之不可聞其橐中無數千錢予了之困亦強資遣之船行至新會有蠻隸竊其橐囊以逃獲於新州谷從之至新遂病死予聞哭之失聲恨其不用吾言然亦奇其不用吾言而行其志也昔趙襄子屯於晉陽知伯率韓魏決水圍之城不沒者三板縣釜而焚易子而食群臣皆懈惟高恭不失人臣之禮及襄子用張孟談計三家之圍解行賞群臣以恭為先談曰晉陽之難惟恭無功曷為先之襄子曰晉陽之難群臣皆懈惟恭不失人臣之禮吾以是先之谷於朋友之義實無愧高恭者惜其不遇襄子而前遇存實後遇予兄弟予方雜居南裔與

之起居出入蓋將終焉雖知其賢尚何以發之聞谷有子家在涇原軍中故為作傳異日以授之谷始名穀及見之循州改今名云

李伯淵奇節傳

元 曹居一

居一北渡河常欲作李伯淵傳既少暇且未詳其事竊有待焉歲戊申夏臥病相州俄故人僧洞然過客舍因語及鄉士辰之變之後之事始悉伯淵誅崔立之所自益惠安長老恩公有力焉初京城荒殘恩公徙居皇建院一日莫夜侍者入告曰有戎衣腰金符者醉墮馬門外從者不能起或致寇吾得無累乎令視之識者謂總帥李伯淵也使扶詣方丈懇俟其醒語之曰當此大喪亂公何心嗜酒如是生為男子與其徒沉溺於亂世曷若立身後不朽之榮名哉伯淵

矍然若有契於義者見於邑黎明乃召同志黃憫元帥者相與拜恩公師焉居無何往詣恩屏人而言曰崔立狂豎乘國家傾危天子播越輒敢叛亂乃爾吾欲誅之久矣師謂男子身後不朽之榮名其在是耶思拒不可曰爾何遽出此連禍語殆非老僧所敢聞者伯淵泣且誓恩察之誠也乃握手嘆曰吾情亦不能匿矣公知老僧故不去此禍亂之地否吾天地間一閑人目相州遭遇宜宗荷國厚恩二十餘年矣圖

報萬一此何愛焉在吾教中有大報恩七篇是固當為者但患力微援寡事不濟耳今幸聞公舉非常之事樹萬世之名使老僧朝見而夕死無憾合爪如願曰惟以必中為公賀未幾適驛使有相因者伯淵因之入見崔立紿曰丞相避擾不出則今日之事有大不安者立欲出心動乘墮輒欲回伯淵厲聲曰我輩兵家子偶墮馬又何怪焉因強其行至故英邸之西通衢中忽有人突出抗言曰岳事願丞相與我作主且呼且呼伍伯訶不止直詣立馬前挽其鞅時伯淵

驂石即拔刃抱而刺之洞貫至自中其左掌與之俱墜馬崔尚能語曰反為賊奴所先隨斃伯淵暨黃憫等五人實共其事乃大呼曰所誅者此逆賊耳他人無與焉稍稍鼠竄蜂逝帖如也遂磔崔立之尸祭於承天門下一軍哀號聲動天地翌日奔宋恩公在其行時甲午秋七月也嗚呼金之亡也以忠義聞者不為不多至於表表獨見於後世者得三人焉壬辰正月陽翟軍潰奉御完顏陳和尚死戰陣其罵敵不屈似顏果卿癸巳正月京城不守同判睦親府烏古孫

李吉死宗廟其守節自盡似北地王諶甲午正月祭
州陷石丞完顏仲德死社稷從殺者幾千人彼敬翔
之死國田橫之感士有不足方者太史公曰非死之
難處死為難蓋貴得其死所也來獻遇害光武賜策
曰憂國忘家忠孝彰著此三人者有之今夫伯淵不
幸不得在三人之列然可重者身非出於素官世祿
雖在軍伍中未嘗為國家所知况當易代革命之後
雖育有之勇安所施而一旦蔑視擁軀手誅叛逆孰
祭亡社立君臣之義竟不墮冠讎孤軍出奔偉哉後
世視之亦三人之亞歟李姓伯淵名也或云燕都
寶坻縣人餘不可考姑載此奇節以附野史之末云

何長者傳

元 胡長瑞文類

何長者敬德無字或號之為孤巖善人上海縣浦東
民家子撰謹不妄語顧善積蓄會計事吳郡張瑄行
船筦庫不十年贏羨莫可勝數一髮不以自私瑄父
子方倚之重而敬德棄去矣杭吳明越揚楚與幽薊
策密遼鮮俱岍大海固舟航可通相傳胥山海門水
中流積淮淤江沙其長無際浮海者以竿料淺深此
淺生角故曰料角明不可變越云淮江入海之交多
洲號為以吳濱海處皆與汝相望其民頗與汝民同
俗類剽悍急而狡宋李罕群亡賴子相聚乘舟鈔
掠海上朱清與瑄最為雄長陰部曲曹伍之當時海
濱沙民富家以為苦崇明鎮特甚清嘗備楊氏夜殺
楊氏盜妻子貨財去若捕急輒引舟東行三日夜得
沙門島又東北遇高句麗水口見文登商維諸山又
北見燕山與碣石往來若風與鬼影跡不可得稍息
則復來亡慮十五六返私念南北海道此固運且不
遂淺角識之廷議兵方興諸事招懷奏可清瑄即日
來以吏部侍郎左遷七資最下一等授之令却其徒

屬為防海民義隸提刑節制水軍江南既內屬二人
者從宰相入見授金符千戶時方輓漕東南供京師
運河溢淺不容大舟不能有里五十里輒為堰潏水
又絕江淮溯泗水呂梁彭城古稱險要會通河未鑿
東阿往平道中車運三百里轉輸艱而索費重二人
者建言海漕事試之良便省上方注意嚮之初年不
過百萬石後乃至三百萬二人者父子致位宰相弟
姪甥壻皆大官田園宅館徧天下庫藏倉廩相第望
巨艘大舶帆交蕃裔中與騎塞隘門巷故與敬德等
商皆佩於覓金符為萬戶千戶累爵積貲氣意自得
敬德方布衣蔬食汲汲以施貧賑乏為事勸瑄父子
毋嗜進厚贓以速禍瑄雖不能盡用其言頗亦損拾
今江南北二人夫婦父子施錢處徃徃而在二人者
既滿盈父子同時腐幾殆盡沒貲產縣官黨與家破
禁錮而敬德固無一毫髮累會杭氏施天水院橋
東地廣袤十餘畝敬德即建天澤院為大釜而炊調
食羹豐潔芳腴延方外士行而欲休倦而欲息者常
五六十人大德十一年大饑鉅僧方清焚散徒敬德

素履為人信重資施倍多他時來者益衆無意拒邑
厭官為設糜仙林寺中饑民殍者不為哀止敬德請
杭好善有材智人凌郭楊李僧道心性澄六七八人又
擇饑民得強壯者四五十人借菩提寺作粥夜鬻置
大甕中明旦饑民以至先後為次列堂廡下或溢出
門外道上相嚮生虛其前以行粥約各持器來食無
持則假與兩夫舁一人執杓挹以注器中食已以次
去日鬻米七八石至十石始六月三日止八月十三
日凡七十日饑民無死寺側近與徃來道上民食粥
念爭奮大呼歐擊人敬德詰其前亞拜乎者愧悔
請後不復乃止明年春敬德請破衣集諸好善人收
聚遺骸枯骸數十萬具語在破衣傳中夏為粥如昨
歲始五月朔日踰三十六日敬德死年五十七後十
八日所餘錢米亦盡遂止緇素咸曰胡不延長者至
中書今窮人無所賴矣天澤院不復納雲水僧饑疫
棄尸如山父美為掩云沈子南者莒中故相裔孫嘗
為義烏丞至元十三年兵自義烏作執之如甌得不
死歸客杭猶存妻二女貧甚新水傭僦急則如敬德

告必得粟錢帛布比十年不厭嘗謂予上海有善人者憐而乞我秘其人既而假予家僮負米問之則敬德也可不謂長者哉

胡先生曰故老言家嘉熙四年歲行庚子大饑趙悅道尹臨安府發廩勸分恐弗暨奪民死中而生之初悅道無子養南外宗室子孟傳一夕夢之帝所嚴衛如大朝會議既謁贊道之陞由昨階端笏屏息抑首俸躬不敢仰視帝告曰與權汝無子抹荒功多賜汝子九人下再拜指首庭中寤以告家已而生八子

與孟傳門九賊星父記於書當時湖州作糜食饑人糜脫釜猶沸湯器中人急得糜食已輒仆死百步間饑未至死食糜者百無一生婺州顧籜米作糲熟而寒之約饑民旦由東門入與之糜使之北門賦糲西門飲以藥復至東門給錢米出宿逆旅舍與為買薪蘇旦洗沐廣舍不逼棲十人明日復然竟去無一人死長者夜作粥貯大甕中蓋悲湖州事也有意哉

陳孝子傳

元 胡長瑞文類

孝子氏陳名斗龍字南仲五世大父詢避家靖康亂繇許徙家抗昌化縣猶號穎城散人以自表大父景純大母阮年高宋故事郊祭明堂裡祀東朝廷上壽咸詔賜高年爵民歲百太學生鄉貢進士父母九十皆得九品官封告授大父迪功即太母孺人父澤澤民治書應寶祐三年臨安府舉取元朴下第六名文解嘗從葉公采學葉學李公方子李學薇國文公澤民既屢次尚書禮部不中度游清獻公為相趙忠惠公為尹公為宰以行能上之招致弗就築室百丈豁上講所學時太皇太后籍未下郡縣內附微獨不奉詔謚作婺源境上聲動旁近縣澤民挈妻與子廬深險處以避一歲所病止中斗龍才才三已能奉飲劑廢眠忘食精神請減己年延父弗效毋盛也尋亦病死斗龍憂喪毀廬墓哭聲哀切感動行路人有群鴈集其上飛鳴三日夜鄉里為鴈靈有知將葬澤民門人士相與私誼澤民文節參政文公及翁題墓上曰文節先生後斗龍娶妻有四子女鄉先生孫公朝

瑞以溫州路儒學提舉言斗龍侍病服喪廬墓時事
移提學得推擇為宗晦書院山長將之旣斗龍之妻
之父之甥盛冲告斗龍曰若母王產若未一歲歸錢
唐聞其家在清湖中斗龍大驚且哭即日與婦訣具
裝行曰必與母俱歸若弗能得何歸為初澤民以妻
無子也以幣如錢唐求宜子者得王清湖斗龍生永
周時王歲期適滿遂去吳越俗以女事人期歲歸父
母或三五七歲有子女尚不聽留惻惻恐失後聘鬻
幣物女曰不得自制此禮所謂妻母嫡子他子以為
庶母家以諸母如是而去者或欲比之棄黜以義斷
子不得母薄乎此論也豈嘗得罪於其父哉長孺之
妻之父徐公道隆伯謙甫母微亦抗人產已去歸既
長求之百方弗得議用六十歲時母生己日始為齋
賽三年及是歲之元日以大理鄉直齋章閣提點浙
西路刑獄公事死吳興之難已天下若是者固不少
使其季世政教修明如乾道淳熙時風厚俗美男義
女貞又安得是則其遂不克振可知也斗龍至清湖
訪求母家及其故時比鄰涉二三十年又經亂離固

無在者矣逢白髮媼於其處揖而問焉告曰我知之
我家與若母比屋我與若母為兒時作伴侶嬉遊相
好若母自昌化歸無幾時與我言當往江東已而泣
下我方盛年大識其語之為悽楚也亦弗問無州有
聞兩夫舁若母竹輜西去又折以北與若諸鄰者百
十家獨老身斗龍謹識之即入江東海濟江踰淮復
還饒徽信廣德寧國往來數郡聞昔年一夕舍永豐
縣禮賢鎮之逆旅人怪斗龍數過問焉告之故且使
偵之其入驚曰吾主人小婦王自言家清湖今王老
矣豈若以耶走施氏告良久出詢斗龍父時門巷兒
名歲甫去老婦哭出斗龍哭前拜母子未嘗相見而
自知其為子為母也施氏曰若母無子女我家以母
還斗龍留三日奉母歸竟如其言母歸之歲夏四月
徽盜作溢出昌化境上殺人掠子女奪畜產貨財張
甚斗龍為廬百丈山身自負母婦擁後未至山廬路
逢盜數百人斗龍置母商處稽首曰壯士斗龍幼不
知母去壯長聞母在江東行求母六年母歸未百十
日即相遭於此斗龍若請夫婦嘗死母老誰當養母

者盜咨嗟相約遠去且語徒勿更至此山驚毋傷孝
子心里中人家頗賴之以免斗龍嘗時甘瓜園中秋
養母病渴甚思食瓜而非瓜時斗龍視空篋中荒荒
然披之異根合莖並蒂兩實者二摘以奉啖即日渴
已疾平明年園之天羅瓜如甘瓜者亦二王至今茲
尚安健也斗龍作百文谿書院祠三君子侑以澤民
將延師教里子弟學又以百文源山地五百畝為義
山鄉鄰饑歲所葛族根續食死以葬連營花赤阿思
蘭取縣學鄉鄰之言及初陽縣尹章君碩所移事狀

廉之而校銳請旌表斗龍知歲惡民饑官賦食旁干
自請無用是妨疏政益其意不欲人知去年斗龍來
錢唐將從長孺問學與之語誠可以為孝弟忠信者
心欲為之傳以風厲人子屬其縣士孫壽國錄始末
以求且曰縣人之所願得也遂定次其言如右

胡先生曰陳嬌姓有虞氏苗裔周興配胡公以元女
大姬而國之陳紹重華祀為王室三恪及其亡也子
孫用國為氏自秦漢來陳氏孝弟忠信立名當時而
著見後世如大邱長輩類何可一二數孝子固其後

也馮沛遺風餘嚮猶有在者哉

葉秀發傳

明 宋 濂

葉秀發字茂叔其先由括徙金華爲金華人秀發師事呂祖儉唐仲友極深性理之學以餘力爲文輒擢慶元丙辰進士第弟子慕之從其學者歲至數百人初授福州長溪簿丁父憂而歸服除轉慶元府學教授秀發嘗著論語講義發越新意以誨諸弟子且曰聖門授業之源無過此書然義理無窮倘一切沿襲舊說吾心終無所得若欲見諸行事是欲假他人之器以爲門用之於己且惴惴焉不以爲便况欲假人

乎哉時鉅儒樓鑰史彌華妻昉鄭性之楊簡袁熒皆器秀發與之交而於簡問難尤切每至日晏忘食簡自謂有所啓發得遇詹願葉四子爲喜葉蓋指秀發也秩滿闕陞循從政郎建寧府政和令丁母憂服闋調安慶府桐城丞金人犯蘄黃二州桐城爲鄰壤萬目睽睽不相保騎兵將迫家人號泣求避秀發叱之曰此正臣子竭力致身之日雖死何憾苟先去之如一邑生聚何修城浚濠日爲備禦計會金人使謀者至秀發擒之亟斬於城門以徇金人計沮不得近邑

賴以完事定制闢忌其功不自已出上其擅斬非法降迪功郎未幾再叙改合入官授宣教郎知徽州休寧縣俄以前事論奪秀發退居十餘年無一毫歛望意獨憤李誠之之寃上書訟於朝初誠之守蘄斬陷一城士卒皆戰死無降者誠之亦望闕再拜投劔自刎議者不錄其忠反咎其不能全人故秀發不平而訟之言辭明烈聞者降歎史彌遠當國人有自桐城來者彌遠以秀發事爲問其人歷言撫綏安定之詳且謂某等得保首領至今皆葉桐城之賜不然已無

桐城父史彌遠頌之從容問參知政事宜繒其言同彌遠歎曰幾失賢矣即日起發擢知真州楊子縣轉奉議郎差監都進奏院越七日命知高郵軍高郵爲淮東緊治時尚繹騷弗寧秀發上五策一曰防海道二曰審邊城三曰擇武守四曰練軍實五曰畜財用而以正人心作士氣爲之本言多聽高沙三十六湖水高而田下隄防不固則千里一壑民且無稼秀發建石隄以距水勢漸洩有恒無乾溢之病其後馬光祖來爲守行隄上思秀發功構堂樊梁之堤以祠焉

尋轉承議郎疾作上書乞致事特陞朝奉郎已而疾甚力劾去貪墨吏人勸其何自苦如此秀發曰不可吾死後彼必殘吾民以逞同列來問疾整襟對坐惓惓以究心還事為祝無他言其忠義出於天性至死不變如此紹定庚寅九月卒年七十卒之日惟遺書籍數篋敝衣一襲至無以為歛當屬纊時民夢秀發擁高牙大纛入嶽祠民疑其為神遂肖像而祠其中云秀發商險一節臨事惟可以義勸不可以勢利劫澤物之心則若饑渴然居田里日有犯私鑄者縣令趙善琛欲重其刑而連坐之秀發曰刑一成而不變君子所盡心焉縱姦固失傷善亦豈得為哉善琛為之止有悍戾者日嗜鬪富人嫉之欲以嘯聚之名置於法秀發白於郡守鄭如剛曰血氣之爭則有之嘯聚則未之聞也民因得不死秀發卒後累贈朝議大夫學者尊之曰南坡先生所著書有易說周禮說論語講義及詩文行於世子夢澤孫振祖皆出仕能以清白世其家云

贊曰濂嘗讀國學進士王若訥記秀發桐城斬謀

事未嘗不流涕而歎也當金人陷斬士大夫折盡僥倖者或納款賣降之不暇有若秀發者官僅一丞耳則不顧妻子嬰城固守法宜在所褒嘉顧以擅斬而罪之果何道耶譬有丈夫焉居深山中盜欲舞刀劍斂其財先遭盜偵以營虛實其諫怒殺偵者丈夫乃不責盜而責諫可乎不可也國之政如此將何以致平治耶采自是而微矣嗚呼自古當季世變黑為白倒上為下若斯之類甚衆人所不能禁而秀發安之抑賢矣哉

謝翱傳

明 宋 濂

謝翱字皋羽福之長溪人後徙建之浦城父鎬性至孝居母喪行服廬墓終身不仕通春秋著春秋衍義左氏辨證傳於時翱世其學試進士不中落魄漳泉二州僞僞有大節會丞相文天祥開府延平長揖軍門署咨事參軍聲動閩楚間已復別去及宋亡天祥被執以死翱悲不能禁隻影行浙水東逢山川池榭雲嵐草木與所別處及其時適相類則徘徊顧盼失聲哭嚴子陵臺孤絕十丈時天涼風急翱挾酒登

設天祥之荒亭隅再拜跪伏酌畢號而慟者三復再拜起悲思不可遏乃以竹如意擊石作楚歌招之曰魂朝往兮何極莫來歸兮閨水黑化為朱鳥兮有味焉食歌闌竹石俱碎聞者為傷之然其志汗漫超越浩不可禦視世間事無足當其意者獨嗜佳山水如鴈山鼎湖蛟門候清沃州天姥野霞碧鷄四明金華洞天搜奇扶秘所至即造游錄持以誇人若戴七寶歸者游倦輒憩浦陽江源及睦之白雲邨尋隱者方鴈吳思齊晝夜吟詩不自休其詩直遡盛唐而上不

作近代語卓卓有風人之餘文尤新拔峭勁雷電恍惚出入風雨中當其執筆時瞑目遐思身與天地俱忘每語人曰用志不分鬼神將避之其苦索多類此藝睦人士翕然從其學前至元甲午去家虎林西湖上前代遺老尚多存者咸自詫見翱晚明年乙未以肺疾作而元年四十七瀕死屬其妻劉氏曰吾去鄉千里交游唯方韶卿吳子善寂親不翅兄弟慎收吾文及吾骨投之韶卿即鳳子善即思齊已而鳳等果至與方幼學方煮馮桂芳翁登登之弟衡薛翱子陵臺南以之篆殉代石表之曰粵謝翱墓初翱以朋友道喪盡興越無掛紉者思合同志士名作許劬錄勒諸石未就復為建許劬亭於墓右從翱志也翱無子其徒吳貴祠之月泉書院云翱好倚抱獨刻厲憤激直欲起古人從之游不務諧於沉俗意所不顧萬夫莫回也每慕屈平托興遠游自號唏髮子遇談勝國事輒悲鳴頃促涕泗潛然下士有苟合而氣志得者憎聞翱翱自若也所著手抄詩八卷雜文二十卷唐補傳一卷南史補帝紀贊一卷楚詞芳草圖譜一卷

宋鏡歌鼓吹曲騎吹曲各一卷睦州山水人物古迹
記一卷浦陽先民傳一卷天地間集五卷東坡夜雨
句圖一卷浙東西游錄九卷餘倣秦楚之際月表作
獨行傳及左氏傳續辨歷代詩譜皆未完所選唐帝
柳諸家詩及東都五體詩不在集中

贊曰翱一布衣爾未嘗有爵位於朝徒以被天祥之
知麻衣繩履章皇上澤間若無容其身使其都重祿
受社稷民人之寄其能死守封疆決矢翱不負天祥
肯負國哉翱蓋天下之士也昔田橫不降漢拔劍自

刎客之從死者五百人若翱之志其有類橫之客者
非耶吾聞諸任先生云

余左丞傳

明 宋 濂

余闕字廷心一字天心唐元氏世居武威父弘喇藏
卜官合肥遂為合肥人母尹氏夢異人生闕闕生而
髮盡白家貧年十三始能就學嗜欲甚淺不知有肉
味惟甘六藝學若飴嗜之不厭與河南張恒游恒臨
川吳澄弟子善談名理闕之學因絕出四方擢元統
癸酉進士第授同知泗州事泗瀕淮民豪弗馴令蝕
人土田官籍之多以証去闕繩尤暴者數十不敢譁
廖甲與乙競田廖焚舒廬舍舒婦偶母子同死遂
寘灰爐中証之闕為白其事泗無麥民以乏故事弗
闕闕上之中書定為令凡無麥者減賦代還長老爭
進金為壽闕謝去後闕往桐城道逢故民皆羅拜焉
首相隨信宿而別俄召入應奉翰林文字轉中書刑
部主事三月之間既滌冤滯獄五百上官忌其才議
寢不合闕上宰相書言狀又不報投袂而歸居亡何
復召修遼宋金三史拜監察御史上疏言守令最近
民欲萬國治責守令反是政龐宜用殿最法力行之
便上從之藩王府諸校白晝收金道上勢如狼闕覲

遺六十人上思治切議遣秦使者亦至執關臂曰誠如君言知關忠亮不怨關在位知無不言言稍直無忌人勸關少辟禍關曰吾縱懼豈不知批逆鱗為危委身事君身雖殺弗悔也改中書禮部員外郎關議復古禮樂其言精鑿有徵聞者斤為迂濶弗用安西郭氏女受聘未行會夫卒郭自縊死有司請旌其門關以過於中庸不可以訓格不下出為湖廣行省左右司郎中廣西多岐山負粟輸官者厄於道險費常倍關命以為帛代輸右丞沙班姑權自用多錄其私入關每訖詞沮之會莫徭蠻反當帥師又止不行無敢讓之者關揚言於庭曰右丞當往受天子命為方岳重臣不思執弓劍討賊乃欲自逸耶右丞當往沙班曰郎中語固是如芻飼不足何關曰右丞第往此不難致也關下令趣之三日皆集右丞行章宣慰白願以娉律香贊關關覺重辟之香中果胎黃金章嘆曰余贊遠官多矣潔如水壺惟余公一人復以集賢經歷名入預修本朝后妃功臣傳運輸林待制出金浙東道廉訪司事發奸摘伏聽察若神州縣聞關至

貪墨吏多解印綬去釐定賦無藝役小大各遠度關遣官履畝實之徭賦平衛士無養以沒入田分隸學官郡長然只吉台肆毒殘衛民民重足立關鞠治之獄上行御史臺臺臣與其有連反以事劾關關歸青陽山已而丁母氏憂關日夜悲號有甘露降於墓君子以為孝感至正壬辰天下名動平章政事免思兒不花方統戎淮南承制起關權淮西宣慰副使分制安慶安慶距城皆盜柵人爭謂不可往關毅然請行從間道入推赤心待人罷其苛賦轉粟以哺饑夫八社民翕然歸關知民可用乃帥之破雙港砦甚固小路若髮關被甲荷戟直前賊空砦出關殺傷相當至日是賊殊死戰關不勝退復收散卒誓曰死則死此爾何生為一鼓而進大破之諸砦畏威次第降關益繕城浹濠礪戈矛分屯耕郊外田民懼不能者遣軍士護之耕賊來輒與戰一日賊四合旌旗蔽野鼓譟之聲震天地關縱象騎數十大喊而出賊勢披靡遣兵擊之斬首數千級當是時淮東西皆陷獨安慶歸然存賊來戰又數敗賊銜之偽作尺牘通城中諸

大姓約期日反冀關捕戮之關曰我民安有是命悉
焚去賊計窮復令關故人街鬻許大明以甘言說降
關命率出以鐵椎擊碎齒類懸其皮東門滿山有虎
傷入關造文檄山神使驅虎虎出境功上中書朝廷
俾為真陞同知淮西宣慰副都元帥賜以上等及黃
金束帶江西諸官軍動號萬掠玉帛殺嬰兒寘戟
上以戲沿江州郡患苦之獨不敢近城下即近出師
搗退之或服其義至有來歸充將校者漢河兵屯潯
陽命使司帥壯士百輩腰刀直入關主供億關叱左
右收縛赴獄且上既言貓餘素不被王化其人與禽
獸等不宜使入中國他日為禍將不細後竟如關言
轉淮南行省參知政事尋改右丞賜二品服關益自
奮誓以死報國立旌忠祠以厲將佐時集祠下大聲
謂曰男兒生則為章孝寬死則為張巡許遠不可為
不義屈意氣慷慨甚丁酉冬賊大集諸部圍城戰艦
蔽江而下樵餉路絕兵出數失利戊戌正月七日城
陷關猶率衆血戰身中三矢賊呼曰余將軍何在吾
將官之有生致者予百金關戰首罵曰余恨不嚼碎

汝肉吐餒鳥為寧復受汝官耶賊怒舉長鎗欲刺關
關遂自刎沉江死年五十六其妻耶卜氏聞之亦率
其子得臣女福章赴水死諸將卒慟曰余將軍不負
國我等可負余將軍即從而死者千餘人朝廷知其
忠贈關榮祿大夫江浙行省平章政事謚曰忠愍追
封夏國公關為人剛簡有智無職不宜為為即有赫
赫名所至薦賢旌孝義如恐後每解政開門授徒蕭
然如寒士五經悉為之傳註多新意詩文篆隸皆精
緻可傳

贊曰於戲關真入豪也哉獨守孤城逾六年小大二
百餘戰戰必勝其所用者不過民間兵數千初非有
熊虎十萬之師直激之以忠義故甘心效死而不可
奪也雖不幸糧絕城陷以死而其忠精之氣炯炯上
貫霄漢必榮為列星流為風霆散為卿雲凝為瑞露
關雖死而其不死者固自若也然而關死於君而能
使妻死於夫子死於父忠孝貞節萃於一門較之晉
卞壺家又似過之矣於戲關果入豪也哉余來江左
見其門生故吏言關事多至泣下因想見戰守處江

流有聲而斷雲落日淒迷於莽蒼間猶足以動人悲思因擬其行事成傳以示為人臣者

濂既作余廷心傳又見其門人江河言當廷心死時其妻滿堂生一子甫晬棄水濱有偽萬戶杜某呼曰此必余參政子是種也良不可殺竟捐所鈔諸物懷子以去今三歲矣人或戲子曰汝父何在子橫指拂喉曰如此矣此一事也池州判官李宗可斬人也李嘗文身又號為花李善梁視賊欲吞廷心兄蘭嘗以女歸之又來舒命權義兵萬戶統新軍守水砦前後多戰功賊來破城李橫槊入賊中殺死甚衆聞廷心死馳馬還家娶妻孥謂曰余相公死國吾亦義不屈汝等毋不死為人所魚肉技劍無大小盡殺之出解甲據胡床中坐取酒飲至醉復衣甲自刎死此一事也嗚呼仁者宜有後而義烈之士聲光可流於無窮濂雖不文惟恐其失墜也故復附著於篇

王冕傳

明 宋 濂

王冕者諸暨人七八歲時父命牧牛隴上竊入學舍聽諸生誦書聽已輒默記暮歸忘其半或牽牛來責踐田父怒撻之已而復如初母曰兒痴如此曷下聽其所為冕因去依僧寺以居夜潛出生佛膝上執筆映長明燈讀之琅琅達旦佛像多土偶得惡可怖冕小兒恬若不見安陽韓性聞而異之錄為弟子學遂為通儒性卒門人事冕如事性時冕父已卒即迎母入越城祀養久之母思還故里冕買白牛駕母車自

被古冠服隨車後鄉里小兒競遮道訕笑冕亦笑著作即李孝光欲薦之為府吏冕罵曰吾有田可耕有書可讀肯朝夕抱案立庭下倚奴使哉每居小樓上客至僅入報命之登乃登部使者行郡坐馬上求見拒之去去不百武冕倚樓長嘯使者聞之慙冕屢應進士舉不第歎曰此童子益為者吾可溺是哉竟弃去買舟下東吳渡大江入淮楚歷覽名山川或遇奇才俠客談古豪傑事即呼酒共飲慨悲吟人斥為狂奴北遊燕都館秘書卿秦不花家秦不花薦以館

賦是曰公誠愚人哉不滿十年此中孤兒遊矣何以
棟仕為即日將南轅會其友武林盧生死灤陽惟兩
幼女一童留燕俵俵無所依冕知之不遠千里走灤
陽取生遺骨自挈二女還生家冕既歸越復大言天
下將亂時海內無事或斥冕為妄冕曰妄人非我誰
當為妄哉乃攜妻孥隱於九里山種苴三畝粟倍之
樹梅花千莖杏居其半芋一區薤韭各百步引水為
池種魚千餘頭結茅廬三間自題為梅花屋嘗做周
禮著書一卷坐卧自隨秘不使人觀更深人寂輒挑
燈朗讀訖而撫卷曰吾未即死持此以遇明主伊呂
事業不難致也當風日佳時操觚賦詩千百不休皆
鵬鵬海怒讀者毛髮為聳人至不為賓主禮清談竟
日不倦食至輒食都不必辭謝善畫梅不減楊補之
求者肩背相望以繒幅短長為得米之差人識之冕
曰吾藉是以養口體豈好為人家作畫師哉未幾汝
頤兵起一一如冕言皇帝取婺州將攻越物色得冕
真幕府授以諮議參軍一夕以病死冕狀貌魁偉英
鬚鼻磊落有大志不得少試以死君子惜之

史官曰予受學城南時見孟采言越有狂生當天
大雪赤足上潛岳峰四顧大呼口遍天地間皆白
玉合成使人心膽澄徹便欲仙去及入城戴大帽
如徒穿曳地袍翩翩行兩袂軒翥譁笑溢市中予
甚疑其人訪識者問之即冕也冕真恠民哉馬不
羈駕不足以見其奇才冕亦類是夫

杜環小傳

明 宋 濂

杜環字叔循其先廬陵人侍父一元游宦江東遂家金陵一元固善士所與交皆四方名士環尤好學工書謹飭重然諾好周人急父交兵部主事常允恭死於九江家破其母張氏年六十餘哭九江城下無所歸有識允恭母者憐其老告之曰今安慶守譚敬先非允恭友乎盍往依之彼見母念允恭故必不遺棄毋毋如其言附舟詣譚譚謝不納母大困念允恭嘗仕金陵親戚交友或有存者庶萬一可冀復哀泣從

人至金陵問一二人無存者因訪一元家所在問一元今無恙否道上人對以一元死已久惟子環存其家直驚洲坊中門內有雙橋可辨識母服破衣雨行至環家環方對客坐見母大驚顧若嘗見其面者因問曰母非常夫人乎何為而至於此母泣告以故環亦泣扶就坐拜之復呼妻子出拜妻馬氏解衣更母濕衣奉糜食母抱衾寢母問其平生所親厚故人及幼子伯章環知故無在者不足附又不知伯章存亡姑慰之曰天方雨雨止為母訪之苟無人事母環

雖貧獨不能奉母乎且環父與允恭交好如兄弟今母貧困不歸他人而歸環家此二父道之也顧母無他思時兵後歲饑民骨肉不相保母見環家貧兩止堅欲出問他故人環令勝女從其行至暮果無所遇而返坐乃定環購布帛令妻為製衣食自環以下皆以母事之母性褊急少不愜意輒詬怒環私戒家人順其所為勿以因致輕慢與較母有痰疾環親為烹藥進匕筋以母故不敢大聲語越十年環為太常贊禮郎奉詔祠會稽還道嘉興逢其子伯章泣謂之曰太夫人在環家日夜念少子成疾不可不早往見伯章若無所聞第曰吾亦知之但道遠不能至耳環歸半歲伯章來是日環初度母見少子相持大哭環家人以為不祥止之環曰此人情也何不祥之有既而伯章見母老恐不能行竟紿以他事辭去不復顧環奉母彌謹然母愈念伯章疾頓加後三年遂卒將死舉手向環曰吾累杜君顧杜君生子孫咸如杜君言終而氣絕環具棺槨殮殯之禮買地城南鍾家山葬之歲時常祭其墓云環後為晉王府錄事有名與予

交

史官曰交友之道難矣翟公之言曰一死一生乃知交情此非過論也實有見於人情而云也人當意氣相得時以身相許若無難事至事變勢窮不能蹈其所言而背去者多矣况既死而能養其親乎吾觀杜環事雖古所稱義烈之士何以過而世俗恒爲今人不逮古人不亦誣天下人哉

宋太史傳

明 王 偉

宋太史者名濂字景濂婺之金華人也其先有諱憲者官大理寺爲易講師弟子衆至數千人唐武德間自京兆遷吳興更十四世有諱榮者私謚文通先生通尚書春秋有才而不及用周廣順中徙于義烏隱居覆釜山又七世至宋嘉定初有諱栢者復遷金華其地曰潛溪又五世乃爲景濂自其父祖而上世爲峻儒雖隱約鄉里間不顯著而詩書之澤被於人者多矣景濂在姪僅七月爲嬰兒時英多疾甫六歲即能讀古文書過目輒成誦爲詩歌有奇語操筆立就人異之呼爲神童年十五六里人有張繼之長者也告其父曰是子天分非凡當令從名師即有成耳乃携之入城府俾受業聞人廖吉先生習易詩書春秋通焉爲舉子業課試每居諸生右其友胡君翰曰舉子業不足爲景濂蓋爲古文辭乎遂與俱往浦陽從吳萊先生學吳先生博極經史善爲古章句景濂學之悉得其蘊與父之文章之名籍然著聞矣景濂爲文初若不經思而用意極精密當時鄉先生翰林侍

制柳公賁翰林侍講學士黃公潛皆大儒天下所師
仰景濂各及其門執弟子禮而此兩公者則皆禮之
如朋友柳公曰吾邦文獻浙水東號為極盛吾老矣
不足負荷此事後來繼者所望惟景濂以絕倫之識
而濟以精博之學進之以不止如駕風帆於大江中
其孰能禦之黃公曰吾鄉得景濂斯文不乏人矣景
濂所為文多經二公所指授柳公謂其渾雄可喜黃
公謂其雄麗而溫雅甫田陳君旅知言士也為之序
曰柳公之文麗蔚隆疑如泰山之雲層鋪疊湧者莫
窮其端倪黃公之文清圓密切動中法度如孫吳用
兵神出鬼沒而部伍不亂景濂之文其辭韻沈鬱類
柳公體裁簡嚴類黃公蓋以景濂為能兼二公之所
長矣翰林學士承旨廬陵歐陽公元於二公為行輩
嘗評景濂文氣韻沈雄如淮陰出師百戰百勝志不
少懈神思飄逸如列子御風翩然翫舉不沾塵土辭
調兩雅如殷自周彝龍紋湯戒古意獨存態度多變
如晴躋終南衆騁前陳應接不暇非才具表長識焉
千古安能與於斯其為當世所稱許如此於是二公

相繼即世而景濂踵武而起遂以文章家名海內至
正中用大臣薦擢將仕佐郎翰林國史院編脩官自
布衣入史館為太史氏此儒者之特選而景濂素不
嗜仕進固辭避不肯就會世亂益韜閤不欲事表顯
乃入小龍門山著書成二十四篇曰龍門子凝道記
又著孝經新說周禮集註等書皆傳於學者初宋南
渡後新安朱文公東萊呂成公並時而作皆以斯道
為己任發實呂氏倡道之邦而其學不大傳朱氏一
再傳為何基氏王柏氏又傳之金履祥氏許謙氏皆
登人而其傳遂為朱學之世嫡景濂既聞因許氏門
人而究其說獨念呂氏之傳且墜奮然思繼其絕學
每與人言而深慨之識者又足以知其志之所存矣
景濂於天下之書無不讀而析理精微百氏之說悉
得其旨要至於佛老氏之學尤所研究用其義趣製
為經論絕類其語言宜諸其書中無辨也青田劉君
基謂其主聖經而奴百代馳騁之餘取老佛語以資
嬉刺譬猶飲梁肉而茹苦荼飲茗汁耳景濂狀貌豈
厚美髯然目短視尋丈之外不能辨人形而雪邊月

下繩頭之字可讀也性疎曠不吾事檢飾賓客不至
則累日不整冠或携友生徜徉梅花間索笑竟日或
獨臥長林下看晴雪墮松頂雲出沒叢莽間悠然以
自樂世俗生產作榮之事皆不暇顧而篤於倫品處
父子兄弟夫婦間盡其道與人交任真無鉤距視人
世百為變眩捍闔閭若不知知之亦弗與較縱為人
所賣不復恤而人亦無忍欺之者用是咸稱焉有德
之君子景濂所為文別有蘿山吟藁三卷潛溪內外
集三十卷又有浦陽人物記五卷或謂可比五代史
云義烏三碑曰世稱太史公司馬遷好游南上會稽
浮于沅湘北涉汶泗過梁楚足跡半天下其文雄深
雅健善馳騁有奇氣以游政也吾觀宋太史以文章
擅名今世殆前無古人使其生遷時與之相頡頏不
知其孰為先後矣而其足跡未嘗踰鄉里豈世之稱
遷者固不足信耶遷生龍門而景濂亦著書龍門山
其所著書與遷協六經異傳整齊百家雜語以成一
家之言何異然遷謂自周公百歲而有孔子孔子後
至其身亦五百歲自待太重亦見其不知量矣若景

濂立言謙焉未始以自高此又其所為異耶

鐵崖先生傳

明 貝 璣

鐵崖先生者名維模字康夫姓楊氏世爲紹興山陰縣人母李氏夢金鉤自月墮於懷既寤生先生少穎悟好學日記書數千言父宏爲築萬卷樓鐵崖山中使讀書樓上懼性弗顯易怠去梯鐵鑪傳食積五年貫穿經史百氏雖老師弗及因號鐵崖登元泰定丁卯進士第授承事郎天台縣尹未幾丁父憂服闋改紹興錢清場司令坐損鹽久不調遂放浪錢塘興道士張雨遊西湖南山窮日夜爲樂至正初詔徵天下儒臣修遼金宋三史先生不得預史成正統訖無定論乃著正統辨其詞曰正統之說何自而起乎起於夏后傳國湯武草世皆出於天命人心之公也統出於天命人心之公則三代而下歷數之相仍者可以妄歸於人乎故正統之義立於聖人之經以扶萬世之綱常聖人之經春秋是也春秋萬代史宗也首書王正於魯史之元年者大一統也五伯之權非不强於王也而春秋必黜之不使奸此統也吳楚之號非不竊於王也而春秋必外之不使之僭此統也然則

統之所在不得以割據之地僭偏之名而論之也尚矣先正論統於漢之後者不以劉蜀之祚促與其地之偏而奪其統之正者春秋之義也彼志三國降昭烈以儕吳魏使漢嗣之正下與漢賊並稱此春秋之罪人矣復有作元經自謂法春秋者而又帝北魏黜江左其失與志三國者等爾以致尊昭烈續江左兩魏之名不正而言不順者大正於宋朱氏之綱目馬或問朱氏述綱目主意曰在正統故綱目之繫統者在蜀晉而抑統者則秦昭襄唐武氏也至不得已以始之三十六年而始繼周漢始於高帝之五年而不始於降秦晉始於平吳而不始於秦和唐始於群盜既夷之後而不始於武德之元又所以法於春秋之大一統然則今日之修遼金宋三史者宜莫嚴於正統與夫一統之辨矣自我世祖皇帝立國史院嘗命承旨百一王公修遼金二史矣宋亡又命詞臣通修三史矣延祐天歷之間屢勤詔旨而三史卒無成書者豈不以三史正統之議未決乎夫其議未決者又豈不以宋渡於南之後拘於遼金之抗於北乎吾嘗

究契丹之有國矣自灰牛氏之部落始廣其初枯骨
化形戴猪服豕荒唐怪誕中國之人所不道也八部
之後生阿保機拔其黨而自尊迨耶律光而其勢浸
盛契丹之號立於梁貞明之初大遼之號改於漢天
福之日自阿保機訖于天祚凡九主歷二百一十有
五年大遼固唐之遼夷也乘唐之衰草竊而起石晉
氏通之且割幽燕以與之遂得窺蒙中夏而石晉氏
不得不亡矣而議者以遼承晉統吾不知其何統也
金之有國始於完顏氏實又臣屬於契丹者也至阿
骨打苟述性命於道宗之世遂敢萌人臣之將而篡
有其國僭稱國號於宋重和之元相傳九主凡歷一
百一十有七年而議者又以金之平遼克宋帝有中
原而謂接遼宋之統吾又不知其何統也議者又謂
完顏氏世爲君長保有肅慎至太祖時南北爲敵國
素非君臣遼祖神冊之際宋祖未生遼祖比宋前興
五十餘年而宋嘗遣使卑詞以告和結爲兄弟晚年
遼爲翁而宋爲孫矣此其說之曲而陋者也漢之自
奴唐之突厥不皆興於漢唐之前乎而漢唐又與之

通和矣吳魏之於蜀也亦一時角立而不相統攝者
也而東史筆者必以匈奴突厥爲紀傳而以漢唐爲
正統必以吳魏爲分係而以蜀爲正綱何也天理人
心之公閱萬世而不可泯者也議者之論五代又以
朱梁氏爲篡逆不當合爲五代史其說似矣吾又不
知朱晃之篡克用氏父子以爲仇矣契丹氏背唐凡
弟之約而稱臣於梁非逆黨乎春秋誅逆重誅其黨
契丹氏之誅當何如哉且石敬瑭不受其命而篡其
國亦非正矣契丹氏虜出帝改晉爲遼漢興而人心
應漢謂之承晉又可乎繼承晉也謂之統可乎又謂
東漢四主遠兼郭周宋至興國四年始受其降遂以
周爲閏以宋統不爲受周禪之正也吁苟以五代之
統論之則南唐李昇嘗立大唐宗廟而自稱爲憲宗
五代之孫矣宋於開寶八年滅南唐則宋統繼唐不
優於繼漢繼周乎但五代皆閏也吾無取其統吁天
之歷數自有歸代之正閏不可紊千載歷數之統不
必以承先朝續亡主爲正則宋興不必以膺周之禪
接漢接唐之閏爲統也宋不必膺周接唐以爲統則

遂謂歐陽子不定五代為南史為宋膺周禪之張本者皆非矣當唐明宗之祀天自以夷齒不任社稷生靈之主顧天早生聖人自是天人交感而宋太祖生矣天厭禍亂之極使之君王中國非欺孤弱寡之所致也朱氏綱目於五代之年皆細注於歲之下其遺意固有待於宋矣有待於宋則直以宋接唐統之正矣而又何計其受周禪與否乎中遭陽九之厄而天猶不泯其社稷瓜瓞之系在江之南子孫享國又凡百有五十五年金泰和之議以靖康為遊魂餘魄此之昭烈在蜀則泰和之議固知宋有遺統在江之左矣而金欲承其未絕為得統可乎好黨君子遂作紹興為偽宋吁吾不忍道矣張邦昌迎康邸之書曰由康邸之舊藩嗣宋朝之大統漢家之厄十世而光武中興獻公之子九人而重耳尚在茲惟天意大豈人謀是書也邦昌肯以靖康之後為遊魂餘魄而代有其國乎邦昌不得筆宋則金不得以承宋是則後宋之興前宋即東漢西漢之比爾又非劉蜀牛晉族屬疏遠牛馬疑迷者之可以同日語也論正閏者猶以

正統在蜀正朔相承在江東刻嗣祚親切比諸光武重耳者乎而又可以偽斥之乎此宜不得以渡南為南史也明矣再攷宋祖生於丁亥而建國於庚申我太祖之降年與建國之年亦同宋以甲戌渡江而平江南於乙亥丙子之年而我王師渡江平江南之年亦同是天數之有符者不偶然天意之有屬者不苟然矣故我世祖平宋之時有過唐不及漢宋統當絕我統當續之喻是世祖以歷數之正統歸之於宋而以今日攷宋統之正自屬也當時一二大臣又有奏言曰其國可滅其史不可滅也是又以編年之統在宋矣論而至此則中華之統正而大者皆不在遼金而在於天付生靈之主也昭昭矣然則論我元之大一統者當在平宋而不在平遼興金之日又可推矣夫何今之君子昧於春秋大一統之旨而急於我元開國之年遂欲接遼以為統至於拂天數之符悖世祖君臣之喻逆萬世是非之公論而不恤吁不以天教之正華統之大屬之我元承乎有宋如宋之承唐唐之承隋承晉承漢也而妄分閏代之承欲以荒夷

非統之統屬之我元吾又不知今之君子待今日爲何時待今聖人爲何君也哉嗚呼春秋大一統之義吾已悉之謂復以成周之大統明之於今日也文王在諸侯位凡五十年至三分天下有其二遂誕受天命以撫方夏然猶九年而大統未集必至武王十有三年伐紂有天下商命始肇而大統始集焉蓋革命之事間不容髮一日之命未絕則一日之統未集當日之命絕則當日之統集也宋命一日而未肇則我元之大統亦一日而未集也成周不急於文王五十年武王十三年而集天下之大統則我元又豈急於太祖開國五十年及世祖十有七年而集天下之大統哉抑又論之道統者治統之所在也堯以是傳之舜舜以是傳之禹湯禹湯以是傳之文武周公孔子孔子沒幾不得其傳百有餘年而孟子傳焉孟子沒又幾不得其傳千有餘年而濂洛周程諸子傳焉及乎中立楊氏而吾道南矣既而宋亦南渡矣楊氏之傳爲豫章羅氏延平李氏及於新安諸子朱子沒而其傳及我朝許文正公此歷代道統之源委也然則

道統不在遼金而在宋自宋而後及於我朝君子可以觀治統之所在矣嗚呼世隔而後其議公事久而後其論定故前代之史必修於異代之君子以其議公而論定也晉史修於唐唐史修於宋然則宋史之修宜在今日而無讓矣而今日之君子又不以議公論定者自任而又謏曰付公論於後之儒者吾不知後之儒者又何如也此則余爲今日之君子痛惜也今日堂堂大國林林鉅儒議事爲律吐詞爲經而正統大筆不自豎立又闕之以遺將來不以貽千載綱目君子之笑爲辱恥吾又不知負儒名於我元者何施眉目以誦君子之遺經乎洪惟聖天子當朝廷清明四方無虞之日興賢宰臣親覽經史有志于聖人春秋之經制故斷然定修三史以繼祖宗未遂之志甚盛典也故知事大任重以在館之諸賢爲未足而又遣使草野以聘天下之良史才負其任以往者有其人矣問之以春秋之大法綱目之主意則槩乎其無言也嗚呼司馬遷易編年爲紀傳破春秋之大法唐儒蕭茂挺能議之孰謂林林鉅儒之中而無一蕭

茂挺其人乎此草野有識之士之所甚惜而不能倡其言於上也故私著其說爲宋遼金正統辨以俟千載綱目君子云若其推子午卯酉及五運之王以分正統之說者此日家小技之論王勃兒輩之佞其君者爾君子不取也吾無以爲論辨出見者題之謂其正大光明雖百世之下無以易之者欲獻不果去遊吳興遂至姑蘇而華亭大姓呂翁延于家誨子弟八年始除杭州四務提舉同年楊子宣爲浙省參知政事惜其才欲薦于朝疏未上卒十二年汝穎兵起南北騷然先生既受代即辟地富春山後依元帥劉九九於建德九九敗後挈家歸錢塘艱難困踣嘯歌自若十八年太尉張士誠知其名欲見之不往繼遣其弟來求言因獻五論及復書斥其所用之人其畧曰閣下乘亂起兵首倡大順以獎王室淮吳之人萬口一詞以閣下之所爲有今日不可及者四兵不嗜殺一也聞善言則拜二也儉於自奉三也厚給吏祿而奸貪必誅四也此東南豪傑望閣下之可與有爲也閣下孜孜求治上下決不使相徇也直言決不使遺

棄也毀譽決不使亂真也惟賢人失職四民失業者尚不少也吾惟閣下有可畏者又不止是動民力以搖邦本用吏術以括田租銓放私人不承制出納國庫不上輸受降人不疑任忠臣而復貳也六者之中有其一二可以喪邦閣下不可以不省也況爲閣下之將帥者有生之心無死之志矣爲閣下之守令者有奉上之道無恤下之政矣爲閣下之親族姻黨者無祿養之法有奸佞之構矣某人有假奸以爲忠者某人有託詐以爲直者某人有飾貪虐以爲廉良者閣下信佞爲忠則臣有新尚者用矣信詐爲直則臣有趨高者用矣信貪虐爲廉良則踴躍者進隋夷者退矣又有某嬖使而拜面乞生某郡太守望敵而先遁閣下禮之爲好人養之爲大老則死節之人以賣國之人衆矣是非一謬白黑俱紊天下何自而治乎及觀閣下左右參議贊審者未見其真切政病規進閣下於遠大之域者使閣下有可爲之時有可乘之勢而迄無有成之效其故何也爲閣下計者少而爲身謀者多則誤閣下者多矣身犯六畏霧閣多端不

有內變必有外禍不待智者而後知也閣下徂於小安而無長慮此東南豪傑又何望乎僕既老且病爵祿不干於閣下惟以東南切望於閣下幸采而行之毋蹈群小誤人之域則小伯可以爲錢鏐大伯可以爲晉重耳齊小白也否則麋鹿復上姑蘇臺始憶東維子之言於乎晚矣東維子益晚年所號也衆惡其直且目爲狂生時四境日蹙朝廷方倚丞相達識帖木兒爲保障而納賄不已復上書風之由是不合久之徙松江受業者益衆雖武夫悍卒識與不識皆知得其文咸重大明革命召諸儒考禮樂洪武三年正月至京師年已七十有六有疾得請歸夏六月卒太守林孟善爲買地塋之先生爲人不尚峻絕之行接引人物稱之恒過其實士以此感附之而於負者亦未嘗校曲直他日遇之如初有貴游子既破產流落松江數踵其門竟持所購倪雲林畫去左右欲辱之曰吾哀其困使往見一達官以書畫爲介耳非盜也務掩人過如此性不好飲特溺於音樂出必從以歌童舞女爲禮法士所疾一日遊盤龍塘夜抵普門寺

宿盜伺其亡盡竊所蓄物黎明家人往白之賦詩不報直語客曰老鐵在是區區長物又奚恤衆服其器家隱三吾屢遷其居有曰草元閣曰籍景軒曰柱頰樓其曰小蓬臺者以紹興之山名蓬萊示不忘鄉里云後止臺上不復下且榜其門曰客至不下樓恕老懶見客不答禮恕老病客問事不對恕老默發言無所避恕老迂飲酒不輟樂恕老狂所著春秋大意左氏君子議史鉞麋則遺音及志序碑銘贊頌古樂府近體五七言詩繞歌鼓吹曲凡若干卷行于世論曰元繼宋李之後政龐文抗鐵崖務鏹一代之陋上追秦漢雖詞涉誇大自姚虞而下雄健而不窮者一人而已湖南李祈評其所作曰玉光劍氣自不可掩身屢訕而名益昌良有以夫仕止典市官卒不得大用噫君子之所貴又豈位也哉

余遊虎林蓋嘗登伍大夫之山而望焉見夫山川迴合城廓宏固邑屋鱗次嘆曰由宋涉元休養生息其盛極矣自罹兵燹于茲二紀其殷庶之積視他郡縣猶盛天豈無壞偉不群之士雜處里閭而不自銜者安得見之以爲我憂下至山址見有一士長七尺餘戴古冠巾穿白練袍色如雪束黃絛經齊曳地目矐子炯然風約疎髯灑灑可數行通衢中高視闊步世俗莫能測余甚異之而未敢即也從其所之前遇高邱輒躡屣而上仰而若吁俯而若思歌曰陟彼高邱兮面彼圻矣維谷則崇兮陵則夷矣代有禪續兮罔測其微矣彼淪以胥兮而我則遺矣西山之人矣吾將從之歸矣莫測其所以余揖而問之曰先生爲誰瞻目熟視余久之徐曰我洛下遺民也安用問我爲余不敢詰謹識之他日見汝南生以問焉生曰此吾故人程彥澤君也君蓋河南先生純公之後其大父嘗爲言官至元大德之間以直道著君少有氣節高自稱許欲樹立奇勲名恒自誦曰夫人具性命道德

之蘊通天地萬物之情達禮樂刑政之用尤而大之使民與物不失其所是乃天職不然是自棄耳夫欲有爲要必爲天下輔相乃可此外不足盡力復自嘆曰嘻有命焉自古有志之士其不能致者蓋亦多矣縱能致之不如伊尹之於湯傳說之於高宗諸葛孔明之於蜀先主亦具臣爾然又自度上不繫於天下不繫於人而能有功德及人獨惟賢爾然我亦不喜爲世俗醫僥倖射利必爲神醫其立志如此其後遊於五湖有葛先生者以醫鳴其術甚神先生已人疾死可立起五湖間稱爲神醫君聞而喜曰是真吾師也乃營紹介爲先容先生不許曰吾術不以興庸夫君勿爲沮一日躬執幣詣先生門下以刺通先生素傲睨不即出見稍攬衣起從戶隙窺君見君神采煒然曰非庸夫也是能昌吾道者遂出見盡以其術授君故君爲醫大類葛先生會天下大亂君擇地避曰虎林地大人衆易以浮沒故來居焉是時專制方面者多自官人有薦君者輒避去曰我何可污我何可污未幾今天子革元命向之有官者不問仕輟悉

就造而君夷然如常時方自詫曰吾故民也吾故民也
也因本其所自出稱洛下遺民云汝南生陳君翰也
嗚呼世有斯人哉吾恒記幼時讀見詩人叙述武王
克商時事其稱有曰殷士膚敏裸將于京第曰帝王
革命大率然爾不知其為悲也及夫運去物改親見
其事始三復而悲之曰嗟乎士固有如此者而程彥
澤氏當亂世在衆人中而卒能自全其道嗟然以遺
民稱若欲自附於古之賢人者不其偉歟孔子斯民
也三代之所以直道而行也誰毀誰譽今去孔子雖
遠若遺民者亦其人也吾何言哉

樂枌傳

明 烏斯道

樂枌者明之定海人也性孝友家以亭戶籍官枌承
其役弗替洪武十二年春會稽錢清高氏許從兄弟
歲輸鹽痛自縊迫小民倍其輸以掩已之數事上聞
上以浙河以東凡亭之大家皆罔上賊下如一律即
遣使編各倉覆鹽有損常數者悉起赴京鞠訊咸承
罪坐輸作而枌亦在遠中方治行其仲氏稅願代往
枌曰吾之往也生死未可知設死焉吾有三子爾尚
無後其可哉稅又詣縣庭請以自代枌枌白於官曰
枌之名固不可易服力鹽事官枌也稅罔知聞使往
而被鞠必失對縣因不敢遣及枌行可一舍許稅又
追及之枌叱之去不聽即乘堦垣以塊提稅垣之塊
去者半稅度伯氏心不可回始慟哭而返十三年夏
枌果死京役中年三十有六枌讀書窮理凡醫卜地
理書無不習里之人聞其死莫不泣下其父仲本為
鄉之碩儒當被貢天官方以老乃歸而枌死惜哉論
曰枌之就禍稅之請代皆知有不免而乃毅然爭先
非友愛之篤者能之乎稅雖不死昔固分其死矣枌

雖死猶不死也古假壽之死雖下幸詩與傳記稱之
不朽者以莫假壽若也孰謂耕稅復為假壽傾動郡
縣世之兄弟有較小利害相仇虐者苟聞其風當何
如哉

胡應炎傳

明 高 啓

胡應炎字煥鄉常之晉陵人宋樞密副使宿八世孫
也父聰淮南節度計議官咸淳中應炎登進士第授
溧水尉未赴元丞相伯顏南伐師次常境知府王洙
遁朝廷以姚聞知府事復命將軍王安節都統劉師
勇將兵雜守之間等至常見應炎喜曰君吾劇孟也
得君敵不足破矣署節度判官應炎歸告聰及兄應
發弟應登曰吾家世受國恩今戎馬在郊王室將危
是吾立功之秋也父老兄弟當奉以出避吾身許國
不得復顧家矣聰應發並曰吾與汝雖父子兄弟然
於國則皆臣也圖報之義彼此同之豈可臨難而獨
免乎乃命應登侍母及護妻子出城囑曰善避以存
吾宗不幸城亡吾必死之今與汝訣矣既應聞命即
選民之壯勇者三千人自將乘城為閭晝曰吾州京
師九門不可失守然城卑塹狹兵皆市人非素所撫
循者而北兵銳且衆衆勝遠來其鋒不可當恐未易
與戰也宜樹木柵傳城益調泉繕械為守計聞然之
初洙遁時其客王虎臣盜郡印自稱知府詣伯顏軍

門獻之伯顏不知其詐命還守常而遣兵與俱及城
間等已先至不得入反以民叛告伯顏怒命元帥唆
都率步騎二十餘萬圍之應炎與安節師勇分門出
戰各累大捷殺其將校甚衆功上進直秘閣圖且久
元兵多傷斃唆都請益師伯顏遂以西域諸部兵來
會攻圍益急餉援俱絕唆都以柵堅不可拔剽近野
得婦人剝乳煎膏沃其下發火矢射之火熾柵焚又
運機石擊樓堞盡毀食盡唆都偵知之遣使呼應炎
語諭使出降應炎罵之且截紙縷置盂中若湯餅狀
者以箸引示之曰吾食甚足若欲得城需金山長老
金山長老蓋諺語謂無其期唆都聞之曰能破城者金
山長老也世呼寺主僧為長老故云即趣召金山僧
至軍間以攻城之策僧不知為計周行視城曰是城
龜形也東南其首西北其尾攻尾則首愈縮其法當
攻首從之城遂陷師勇遁聞安節死之應炎率民兵
巷戰至孔子廟前衆潰猶手刃數人乃屈遂就擒唆
都讓之曰若即嘗多殺吾將校者耶應炎曰吾欲殺
汝何將校也恨力不及耳唆都怒腰斬之時年二十

七兵入屠城聰應發皆被殺民匿溝中免者數人余
為兒童時常聞父老言元兵取常時事甚悉及壯觀
史多所未載豈蒐采有失而致然歟抑著作者有所
諱避而弗錄歟或其事多繆悠初皆無有特好事者
為之說歟是皆不可知也每竊恨焉近遇胡黼江上
間為余言其祖應炎死節始末與余昔所聞無異斯
固足徵矣夫以虎臣之奸唆都之慘與僧者妄言而
幸中其事雖微猶不可使泯况應炎之忠烈毅然如
是耶因錄其語作胡應炎傳以補史氏之闕云

唐珏傳

明 張孟兼

唐珏字玉潜會稽人也少孤能力學以明經教授鄉里子弟而養其母至元戊寅浮圖總統楊璉真伽利未璲宮金玉故為妖言惑主聽發之珏獨陳痛忿乃貨家具行資得白金若干為酒食陰召諸惡少享於家衆皆驚駭前請曰平日且不敢見今召我飲又過禮不審欲何為雖死不避珏因泣數行下謂之曰爾輩皆宋人吾不忍陵寢之暴露已造石函六刻記年一字為號自思陵以下欲隨號收之殯衆皆諾中一

人曰此日義事也然今無有知者恐萬一事露禍不測不得終志奈何珏曰吾已籌之矣要富易他骨為衆如珏言夜往收貯遺骸瘞蘭亭山後又種冬青樹為識約明日復來會出金帛為人人壽戒弗泄也珏又易宋內諸浮圖乃哀陵骨雜馬牛枯骼藥臼塔曰鎮南以為陵骨良已鎮而不知真之他存也亡何汴人袁俊為越治中招珏為子師間問曰吾聞越有唐姓瘞宋諸陵骨豈君耶坐有指珏者俊大奇之手加額曰先生義士哉殽讓不及也竊聞高義之日久矣

不意得與先生處因訊珏以故甚貧俊亟為買田宅業之先是珏卧疾一夕夢吏持文來曰帝召君速之行至見宮闕邃麗一人冕旒中坐旁一人延上殿又數黃衣進揖珏曰賴收遺骸無以報俄曰第報良田二頃有妻孥以養乃復揖及闕翻然而覺莫省謂何已而會俊料理事如夢中始悟有徵矣有謝翱者文丞相客也與珏友善嘗感珏事為作冬青樹引語甚凄苦時讀者莫不灑泣翱字昇嗣閩人亦奇士云

傳曰予讀晉世家知趙氏有後矣非程嬰公孫杵

臼莫得其孤今十七廟不食而有暴骨之難獨珏能葬之甚義乎哉嗚呼珏一布衣爾其視程公孫何媿哉千載而下有國士之風者非珏誰與

孫伯融炎傳

明方孝儒

孫炎字伯融金陵句容人身長六尺餘面黑如鐵一足偏跛持辨風生舉辭如雲人莫當其口能為歌詩元至正中丁復憂煜以詩召炎遊此兩人間日夜相切刺益好立機括下紙可盡辭米爛然驚動一時雅好酒膏與煜對飲務出奇相勝每得一奧句拍案大呼投飯起舞譁聲撼鄰所與交皆天下英俊亦以經濟自負氣豪才雄嘗輕視章句儒衆中常自許曰孫炎男子豈死蒿下耶會江淮大亂今皇帝渡江來金陵聞炎召見與語累千數百言大意陳元運將終勸上延攬賢士以成大業義明辭正上甚說之辟為江南行中書省掾每問以事炎慷慨激切所謀多合上心上愈嘉重以為可用上親征浙東炎從行以勞擢同知池州府尋陞知華陽府皆有聲己亥十一月擢行省都事是年十二月會師克處州擇守者咸以處在山澤間盜賊憑結不解難其入上既才炎遂以炎為處州刺史錢穀兵馬之籍悉以委之不取中報且以勅牒未署者付之聽其辟任炎匹馬入處州時

處州外七里皆賊巢穴獠酋點蠻猥噪虎踞不奉官府約束炎至坐廳事召城中民列堵下諭之曰元之不為天祐人共知之今四海列為七八然吾觀其志皆無以生民為心者得天下者必吾主上也至今爾民梗化未知朝廷意味者猶或握兵戲溝中自貽誅滅主上不忍加兵故命我而諭爾民將以安爾非爾汝也爾民深思之帖帖遵化則有後福不然吾恐爾民將盡為戮民叩頭拜謝誓不敢二心轉告鄉民以孫使君下可翫狎炎亦下書屬縣徧諭之數月皆化為良民炎復擇其勇健者練為兵將教習之擇其為衆所服者為之長有寇則率以禦無事罷歸為農間有小警發一符立至軍門無敢或有奸之者強族素驕蹇皆畏之如神不敢出聲語雖在數百里外亦皆縮氣喪膽民賴以安人人謂願得孫使君治吾郡時秀民有能才者見方戰爭勝負未分皆代居山谷中不肯出炎患之鈞至一二人間有才者錄其姓名為書遣使者招致之而故中丞劉基章溢知府葉琛皆為處士所推基最有名亦豪俠負氣與炎類自以為

不當爲他人用使者再往返不起以一寶釵送炎炎
作詩以爲釵當獻之天子斬不順命者我人臣不可
私受封還之草數千言開陳天命以諭基文辭甚美
基不答逡巡就見置酒與飲論古今成敗之事如傾
峽滾滾不休略無枝複基乃深歎之曰基自以爲
勝公觀公議論如此基何敢望哉炎遂致基於京師
上方征伐無一兵與炎壬寅二月賊將李某賀某叛
襲炎炎被擒幽空屋中列卒守之脅炎炎始始以生
吾能爲君用賀等知非其本情恐留自遺患以燭厲

斗酒敬炎曰以此與公談炎拔釵剖厲舉卮酒曰嗟
乎我乃爲賊輩所陷爾死大矣且不爾食賊持刀視
炎炎飲酒自如賊叱其解衣炎罵曰此紫綺衣主工賜
者吾當服以死勿解引枕而卧賊不忍伺其睡乃害
之時某日也年四十事聞上嗟悼以某年月日葬於
金陵南門外聚寶山甲辰贈徵事即洪武元年上即
皇帝位念宣勞之臣聞炎死義追封丹陽縣男妻某
氏爲賊所擒不屈死炎事親孝與人交緩急可仗遇
匱乏者解衣推食以給之所著有詩若干卷其弟子

將敬編次傳於世方某曰余年十一二時先君守齊
寧聞言炎詩千餘篇皆豪宕可喜及觀却賢釵編益
奇其辭而炎死久矣炎負氣聽其言知其爲偉然大
丈夫也故卒以節死孟子論學必曰善養氣養氣有
以夫

張孟兼傳

明 方孝孺

張孟兼者名丁金華之浦江人也孟兼為人侃侃自許涉獵書史頗有俊才為鄉里所稱會天子詔徵才能士即縣以孟兼名上擢國子學錄禮部主事遷太常寺孟兼固負自能為文常奴視同輩而是時誠意伯劉基以文重有重名與翰林學士宋先生俱為天下所尊信基氣豪不肯妄下人而獨喜稱孟兼嘗為上言今天下文章士第一為翰林學士宋濂臣基次之不敢并又其次則有張生孟兼其餘臣不知也孟

兼為基所稱愈自高然他人弗服也或稍慢之孟兼輒怒嘗以文示其鄉人視之無言笈袖中曰俟夜熟復之今弗悉也孟兼陽為好言曰頃則脩之可也退則大怒其鄉人發其所短揚言於衆為之且詆其文曰彼猶蠻夷山谷中縱為人衣前懸而後曳左侈而右欹視則工所製何敢望哉其鄉人自如不與較既而孟兼以謫輸作卿人不及言及以救出復官乃賀孟兼怒罵若見人失官則棄背不一視及復官乃更謬為卑謙賀我若真細人吾何以徑為倍坐不起迎

送其傲睨好面許人皆如此人以是不附之每為衆先生言先生曷不於上前薦我先生亦才孟兼欲薦之未有還會上欲用趙僧證周先生嘗見證文否誰所有且索之以覲時證為書與孟兼論性命先生因言太常丞張孟兼所有之詔先生召孟兼以證文至上覽畢顧孟兼謂先生曰張丞即門人也先生對曰非臣門入乃臣里中子耳且為文有才甚誠意伯劉基稱之上熟視孟兼曰生骨相薄仕宦徐徐進乃可耳毋驟也未幾除孟兼為山西按察司僉事孟兼廉

廉勁疾芒抵司糾擿奸猾無所貸株連徒黨相援引每一事殊流數十吏民見張僉事出行却皆栗然墮膽如畏花神聲聞朝廷陞副使移山東而山東布政使吳印乃鍾山主僧上親選拜官妻用金帛寵之甚厚印以見知人主目尊重禮節少簡孟兼自負其能無敵且印新用又僧也易之印俟孟兼由中門入孟兼以為印雖位大然我風憲司不當由我中門召守卒嘗之月朔望入學謁孔子畢令諸生執經講說孟兼故以語侵譏印印不平時初刊大明寶鈔印下令

使兵民吏自至庫以錢易鈔而孟魚謂此非詔印擅行之是違制也騎馬入布政司趙董條吏問罪且言將上封事言于朝其條吏皆大懾動印即上封事言孟兼見陵侮然孟兼封事終不上也上覽印言以爲孟兼凌我任用臣不遜治咎之孟兼既辱愈憤即捕爲書封事者欲論以罪印復上書言狀請去位避孟兼之橫否者且爲所擠上大怒曰彼乃敢與我抗耶吾今乃與爾抗遂械孟兼至闕下廷詰之命衛士捫髮摘擊垂死時論棄市詔印曰吾除爾害矣蓋爲之

初孟兼遂副使山東自陳父老大爲之請假上許之孟兼歸至家縣令丞皆門謁奉酒牲爲禮孟兼坐受其拜不答麾酒卻之鄉人皆勸其少遜讓和以下人孟兼不聽及于敗或憐之或快之以爲宜然孟兼中實無險賊之心祇以尚氣好高人以故爲人所陷才能者人所陷才能者人所欲得也苟無謙遜以奉之而挾以驕人其爲身害美怪哉孟兼之才使能克已下人雖不幸未必死而欲尊大其勢而眇畧他人謬矣其底于此酷厥有自我

葉伯巨鄭士利傳

明 方孝孺

葉伯巨字居升寧海東蒼里人也好讀書年二十餘有名於鄉黨選爲縣學弟子員善說禮凡朋友有婚喪必禮相之爲人耿介不能藏人短見人不善立折之不顧其喜怒人知其然它終亦不恨也以年長通經術陞入太學未久詔諸生分教河北子弟伯巨得平遙縣待諸生如子諸生亦愛之如父兄洪武九年星變下詔求言伯巨曰今天下有三事最切其二事易見而爲患小其一事難知而爲患大此三者積於吾心久矣縱不求吾猶將言之况有明詔乎即爲書言三事曰分封太侈也求治太急也用刑太煩也今四方平矣民庶思治矣而不務以寬厚御之視誅殺人如滅螻蟻使民不獲安息欲以圖治難矣夫國治於亂世之餘猶理絲於棼亂之後緩之則端緒可得欲速則膠結而不可理今病民不安奸邪不止朝夕異令賞罰不準君勞於上臣困於下治烏可治乎此二者人皆知不可然非敗亡之根也所謂分封太侈者天子畿內地止千里而燕秦晉楚踰千里之國以

對年少未達事之王無事則易驕佚有事則易為僭
亂此人所未知而臣所謂為患難見者也語皆切直
上大怒曰小子乃何敢踈間吾家骨肉我見之且心
憤況使吾兒見之耶遂取以來吾將手射之而啖其
肉耳伯巨至丞相乘上喜乃敢奏詔繫刑曹問狀瘦
死獄中其同時言事有鄭士利士利字好義亦寧海
人嘗為縣諸生其兄士原以儒薦為河南懷慶府同
知遷湖廣按察司僉事士利因告於師去侍其兄遊
學有名洪武九年天下方校錢穀策書空印事起凡
主印吏及署字有名者皆逮繫御史獄獄凡數百人
士利兄亦以河南時空印繫獄中天子方怒空印事
以為欺罔行省諸臣二十餘輩守令署印者皆欲置
之死佐貳以下榜一百免死為軍遠方丞相大夫皆
知空印者無它罪可怒莫敢諫士利獨歎曰上不知
以為空印大罪誠得人言之上聖明寧有不悟懷欲
言之適星變求言士利曰可矣既而讀詔有假公言
私者罪之久之士利曰吾所欲言者為天子殺無罪
為可痛耳吾兄非主印者固當出需吾兄杖出乃言

言吾死不恨其兄死出士利乃為書數千言言數
事而於空印事最詳其意以為誠欲深罪空印者恐
奸吏得挾空印紙為文移以虐民耳臣以為文移必
完印乃可今考校策書合兩縫印非一印一紙之比
縱得之亦不足用況不可得乎且錢穀之數府必合
於省省必合於戶部其數誠不可懸斷預決必至戶
部而後定省府遠者去戶部六七千里近者三四千
里待策書既成而後用印則往來之難非期年不可
至故必先印而後書此權宜之務所從來遠矣何
足深罪且國家諸法必明示之天下而後罪犯法者
以其知不可而故犯之也自立國以至於今未嘗有
空印之律有司丞相不知其罪今一旦捕而誅之則
何以使受誅者甘心而無詞乎朝廷求賢士而置之
庶位得之甚難位至於郡守者皆數十年所成就通
達廉明之士非如草管然可刈而復生也陛下奈何
以不足罪之罪而壞足用之才乎臣竊為陛下痛惜
之其書既成欲上者數矣而未決每歸逆旅則閉門
俯首而泣泣數日其兄子侍行者疑而問之曰何所

苦乎士利曰吾有所念耳我以觸天子怒必受禍然
殺我活餘人我更何恨遂持書詣丞相府士利短小
容貌如常人見丞相禮頓倨丞相問何書士利曰吾
將為天子言之丞相何問也丞相因御史大夫入奏
上覽書大怒詔丞相大夫雜問誰教若為必有主謀
者士利笑曰願吾書可用與否如何耳且吾業既為
國家言事自分受禍人誰為我謀乎辭卒不屈然猶
輪作終身而竟殺空印者

二孝子傳

明 王叔英

余在象中往往聞孝子慈弟義婦事未嘗不為之感
激流涕欲錄傳之以為世勸而恨不得其詳洪武某
年間有兄弟二人以其伯兄生法當死各自縛為當
刑者哀訴于午門願代兄死上問其故二人者言曰
臣少無父非兄無以至今日今兄當死誠不忍兄兄
死而獨存故願以二身贖兄一身惟陛下聽之上疑
其非誠或有教之者因許其代而戒行刑者曰弟試
其人如有難色則殺之無難則舍之之二人者皆延
頸待刃道止不殺一時見聞者無不歎息泣下上大
嗟異之將赦其兄命未下御史大夫陳寧獨以為不
宜以是卒殺其兄此可謂慈弟也又得婦四人為其
一人夫為變得罪臨刑戒之曰吾死汝少年貧以為
為守當再嫁耳慎勿嫁軍人農人樵夫庶可相保也
語時當深整上謂夫曰汝尚未知吾志乎遂投于壑
而死其一人夫臨刑脫首簪布酒肉啖之曰吾當與
子共死也時視其夫河橋上夫既死即自投于河又
其二人妯娌也其夫兄弟以黨人受戮家人財產盡

沃于官婦人則當給為婢其妯娌二人相謂曰吾夫已死吾二人縱無他辱於義猶難獨生況又有他辱乎遂皆自經而死是四婦者可謂義矣余欲各為之傳以傳於世既不得其人之姓名與其事之詳以是孰不得發以余一人所聞如此則余之所不聞者可勝道哉余觀前代史傳求其事之卓絕如此者蓋寡豈多有其事將亦如余之不聞其詳而不得錄耶抑異時誠少有之而特盛於今耶余固不得而深辯矣然幸而得其詳者為可使之無傳乎余於同邑得一人焉曰陳圭得同郡得一人焉曰朱煦皆孝子可書也作二孝子傳

陳圭字錫元台州黃巖人也其父叔宏與其鄉人多警圭常諫之後其警人以賊告叔宏罪當死圭以狀告於通政司曰圭為子不能諫其父以陷於不義得罪死此圭之不孝所致義當死罪於圭之身原圭父使將自新誠不勝至願通政司以聞上大喜曰不意今日乃復有孝子宜赦其死俟天下百官朝覲將播告之為天下勸頌之刑部開濟奏曰罪有常刑不宜

屈法以開僥倖之路請論如法遂聽圭代父死而謫其父叔宏隸兵雲南聞者皆歎圭之孝而惜其死嗚呼圭之死固圭之志也於圭何憾哉

朱煦台州仙居人也家世儒者母楊氏性嚴急過諸子未嘗借色辭少不如指必答擊至馴伏乃已煦事之盡恭順之道其伯父二人長季敬次季誠煦皆善事之二伯父俱有令望嘗稱之曰是姪真猶子也其父季用由薦知福州洪武十八年詔天下盡革今歲以上有司積歲官吏為民害者季用視事僅五月爾以例起入京吏一以法論罪作城須役嚴償重日用錢數十緡季用又病痢被楚謂煦曰吾賢力豈足堪此吾旦夕死矣汝勿深憂但收吾骸歸葬耳煦惶懼不敢離左右復戒二弟熊正共守不敢守寐季用由是不得死時役告枉者甚眾令益嚴告而謫隸兵雲南者二人被極刑者四人矣煦不顧死而陰與父僚友同役者謀曰吾無術以脫吾父矣訴不訴皆死萬一吾父由訴獲免雖幾死萬萬無憾遂陳其辭于通政司通政司為陳於上上觀其情遂赦季用而復其

官同時以煦告得免復官者一十四人皆拜煦父謝
曰微君有孝子吾儕骨肉為城下土矣已而煦感疾
死其十四人者哀臨猶已子季用傷煦死病益甚亦
死或者以煦冒死得免為幸而又以其父子終俱死
為命嗚呼為煦者知盡子職而已其他曷足計哉

傳二

名賢下

明下

伯中公傳

明解縉

觀我名子尚入試名觀臨川吳文正公更字之曰伯中幼警敏嗜學不以食息廢口不絕吟諷精思妙契至忘寒暑與客言談乃皆不知雖在塵撓茫無所覺幼時大父莊公山先生藏書萬卷竊讀殆遍大父久而方覺己甚奇之受學于季大夫主靜先生先生善導誘與嘗舉所見采諸儒諸老宿德儀容嘉言善行令人竦然伯中益自刻苦父萬安君清曠不仕家僅給無餘獨處一室隘甚人不堪晨起供灑掃園蔬灶

下書冊不離手簞食瓢飲炊菽數進且啖且讀未嘗知味天文地理兵刑歷律靡不精究尤深于易考索史如指掌著采書一千卷天文星歷一卷地理若干卷衍八陣圖註五經刊書致一卷作萬分歷推步如神作儒家博要四書大儀周易義疑通釋古賦擱江網策場備要四書今行于世家君嘗夢于東門嶺采儒者數十人衣冠儼然進而揖之其一人曰我朱元晦也聞有解觀我者善學汝知之乎答曰叔父也遂與之俱來醒而告之伯中乃獨喜自是名譽日炎起

矣從學者益衆天歷己巳與弟蒙俱試江西主事林興祖欲以為首彭士奇私於夏日致興祖怒甚捧兩卷却立搢下徐第為四五乃兄弟不失倫焉士論慶之同上春官不合乃留與吳文正公論辨星歷采書流誦古今不遺一字語嘗通夕文正公遂以采書屬之至順辛未南還壬申舉于鄉再不第至正癸未翰林典藉危素奉詔來修三史伯中至京上書其畧曰遼與本朝不相涉又其事已具五代史雖不論可也所當論者采與本朝而已而所以定二國之統者蓋有四焉六曰明國朝之大體二曰稽先哲之成法三曰證時賢之確論四曰審事變之微權恭惟世祖皇帝龍興朔土征伐四克啓運立極前無所因蓋此班固所謂得天統者也當是時金源餘孽尚假息河南至太宗皇帝然後平中原之地踐為荆榛所得戶口無百萬當是時采猶夾攻之好世祖皇帝之至元十三年然後平采以上接百王之統東西之地繁盛富庶所得戶口乃一千三百萬是皆居天下十分之八由是論之天朝平金在先而事體輕平采在後而事

體重今議者乃欲以先後為尊卑而不知本輕重以正其大體且得以辨其先後不通之說夫今之制職先至者居右議者之論益本于此臣愚觀之先至者宜居右先去者可居右乎正猶人家長幼先生者為兄先死者得為兄乎推之於國先興者為尊先亡者得為尊乎此先後之論所以不通也若論輕重則理易明矣今之斷例二事俱發以重者論是重可以該輕輕不得以掩其重也在禮祖有功宗有德太祖皇帝以開創啓運之功廟貌為祖世祖皇帝以平宗混

一之功亦廟貌為祖蓋以啓運平宋二者俱重故也議者乃欲援金以為正統如此則承金統者實在太宗皇帝然既以守成之德稱宗即平金之事為輕明矣若天朝正統截自此始則推之于前而太祖皇帝得天統者不白矣引之于後而世祖皇帝接百王統者不著矣此輕重之理所以易明矣有宋則及于漢而過唐其君則有若太祖太宗真宗仁宗有若高宗輩皆賢明之主大臣則有若韓王李文靖公寇萊公王沂公有若范文正公富鄭公韓魏公司馬溫公

李忠定公張忠獻公趙忠簡公皆傑出之佐理道學則有周程張邵朱呂之繼統論文章則有歐蘇王魯之名世論隱逸則有陳搏魏野林逋之清高論忠義則有若李若水楊邦義李芾文天祥之死節類皆炳炳烺烺足以追跡三代漢唐比之隘矣至于遼則與宋相鄰百五十年金則首末百二十年遼惟聖宗興宗二主歷九十年金惟世宗章宗二主歷四十餘年皆與宋講和號為承平然以元魏孝文興禮樂崇文治方之恐猶有逕庭也然則宋之為宋比之漢唐有光逾金之為金比之元魏而尤歎譬之鳬雀短長其天素定恐非人力所得繼續增損也臣愚謂當稽先哲之成法者此也先世郝文忠公謂綱目既正蜀漢之統而舊史尚仍陳壽之作乃著續後漢書以反之正姚文公謂昭烈既以帝後主尚襲舊號乃著國統離合論以裨其闕元清河公作淮安王神道碑言宋承中華之運世祖皇帝紹建撫圖淮安王弼成至統正獻公修世大典其叙平宋曰世祖皇帝遂能一六合以上接百王之統又述補邵一首曰元魏伯

而王者也宋周之期功也遼之伯曰抱珥也此非有
愛于宋而私之也獨東原謝端著書以主金遼亦欲
自爲非死而已未嘗謂可加于宋也且既以高爲徽
宗的傳非漢晉疏屬之比則昭烈元帝猶未得承正
統于高宗復何疑焉甚者欲破五代史黜周以四代
史夫五代賢君僅有周世宗而歐陽文忠公史筆與
司馬子長雄欲易之以進劉君而使契丹不幾下焉
又幽之甚乎臣愚所謂証時賢之確論者此也或者
又曰金人嘗甘心于徽欽靖康統絕則金當續矣臣
愚應之曰周幽王嘗陷西戎之難平王東遷宗周泰
離矣仲尼作春秋乃始明尊周之大義則周之統未
嘗由幽王而遂絕也晉懷愍亦惟青衣之辱元帝南
渡神州陸沉矣宋子作綱目亦復帝晉之統則晉之
統未嘗隨懷愍而遂亡也聖賢經世立法正以存天
下之大防焉耳春秋書楚公子虔誘蔡侯般殺之于
申夫諸侯不書名春秋法也時書名者惡其譏諫
憑陵誘執中夏之君而戕之也金人之在靖康專以
講和誑惑爲術賣國之臣從而信其欺屏微守備括

金帛鉅億以填溪壑卒誘執二帝驅迫三千口于絕
域其懷護縱毒奚翅楚夏之所爲哉仁人志士至今
爲撫卷憤惋夫狙詐狐媚以取天下石勒猶且羞之
矧大道爲公之世子抑惟天朝以淳龐忠厚天心修
史垂訓所以法取春秋永昭鑒戒若中華正統強不
義者遂可躡居恐傾奪成風人欲肆而天理滅矣或
者又曰高宗不能復讐嘗屈節稱臣于金豈復得居
正統臣愚又應之曰唐高祖稱臣於突厥矣然頡利
卒爲太宗所擒唐之統固自若也而何有乎突厥晉
高祖嘗稱臣于契丹矣入汴卒不能爭漢則晉統
自有繼之者而何論乎契丹大抵倉卒舉事不能使
義自立而屈已稱臣于人豈待智者而知其失策故
繼世之君幸而如太宗則立雪其恥不幸如出帝則
自底滅亡然而中夏有主則一夫之存亡固不容以
變其統此五代史記所以系漢系周而初無與于契
丹也有如高宗之失策特誤于奸臣而又爲梓宮太
后屈耳方是時粘罕既死兀朮屢挫劉錡大捷于順
昌而岳飛乘勢獨立有虎視燕雲之勢陝西山東兩

河忠義之士謂毛起自非秦檜矯詔殺飛舉垂成之業而棄之則金人其能坐而有之哉及孝宗繼世定為叔姪之國則金世宗已讓高宗為兄與澶淵之盟無幾矣延乎理宗遂夾攻蔡城雖伏天兵之力然而珍其祀屋其社亦足雪九世之仇恥矣蓋金之興既在宋後而其亡也又在宋前宋統始終自當屬于皇元彼何與於此哉臣愚所謂審事變之微權者此也誠以此說而勘會之則羣疑氷釋大道天明正宋統以蔡舉遷金公議表會之著人心壓服永有辭于萬世矣

時任事多右金統又夷夏之辨當時所諱書上大忤羣公亦徑歸其後書成天文律歷多竊取公餘論姪孫緡以洪武己巳嘗錄是書於華蓋殿奏之亦庶幾公之意也公嘗于居近虎邱山講學後又建山東書院于金釵嶺扁曰嚴澤齋弟子自遠至者甚衆公授徒廣陵廣陵天下繁華極處也然歌舞未嘗近公整齊嚴飭目光如炬人敬畏之至正丁卯再舉于鄉明年試春官臨川吳常見其文知之恐其復入也強詆黜之物論沸然太史公時在當坐上怒曰先

生何書而至是耶當有慙色公因至曾監傾動來觀曰不識解觀何狀乃爾奇時即公遂絕意仕進至辛丑陳友諒以書招之遂往勸以息兵守境友諒不從謝病解機務為太常禮儀院判養病著書江舟破死焉歸塋里之上斛山娶古城劉氏子五人

周是脩傳

明 楊士奇

周是脩諱德以字行周吉之泰和爵譽里名家其先諱矩者嘗顯於南唐至宋累累有科第其支裔徙灘江里是脩之所自出也是脩少孤貧自奮於學從游鄉先生胡渚樵渚樵以孫妻之又從國子學錄蕭執先生明詩經初舉霍邱縣學訓導入見太祖高皇帝擢為周府奉祠正高皇帝上賓之明年有告言王過失事王府官屬皆下吏是脩以書諫得免改衡府紀善預修纂翰林教陳論國家大計及指斥用事者誤國用事者怒衆共挫折之是脩屹不為動太宗文皇帝靖難之師既渡江駐金川門宮中悉自焚是脩入應天府學繼而死明日臣民推戴文皇帝繼大統教月御史言是脩不順天命請加追戮上曰彼食其祿自盡其心一無所問是脩內貞外和有孝友忠信之行非其義不苟取襟懷坦明灑落而冲澹悠然其學自經史百氏下至陰陽醫卜之說靡所不通為文章未嘗締思援筆立就而雍容雅贍詞理條達稍暇著述吟咏不虛寸晷所著有詩小序詩集議詩譜論語

韓使傳為

類編廣衍太極圖觀感錄綱常懿範通言家訓芻蕘集進思集是脩汲汲尊誘人善人有過失恒為之隱以是無少長賤貴皆樂親之明於知人所薦士如梁用之劉叔安皆知名當世是脩之學雖問未純然於明綱常為世道計必身履之而不徒託之空言豈非卓然特立者歟是脩卒年四十有九時鮮胡蕭梁皆見諸文字然屬倉卒不及詳今二十有八年矣知是脩者獨余在每追念君子清白之節文皇帝日月之明既照其心豈當遂致泯沒故述為小傳以授其子

尚書王文安公傳

明 陳敬宗

公諱英字時彥別號泉坡其先太原人祖宗達宋迪功卽仕於臨州遂家金谿曾祖頌貞元季以書經魁江右入國朝退隱於家祖子爲父修本並以儒行稱母曾氏公生十一歲而失怙母淑人教之比遊邑庠刻苦嗜學登永樂甲申進士第時太宗文皇帝方銳意育才命翰林學士解縉選進士穎異者與狀元曾榮等通得如二十八宿之數俾盡讀文淵閣古今書命大官日給珍饈月賜燈油之費數召至便殿問以經

史諸子虛實或至抵方退公在翰林吉士中每爲儕輩所推讓後上以繪緯事重以公與今冢宰王真皆慎密可任並揀入秘閣進呈機密奏疏歲戊子預修太祖高皇帝實錄丁亥授翰林修撰扈蹕巡狩北京丙申陞翰林侍講戊戌寔錄成賜襲衣綵段鈔錠壬寅胡寇犯邊二月上親征公扈從至潤樂兒海五月旋師過威遠鎮李陵城已四十里上召公曰聞李陵城有石碑可往視之復遣錦衣衛官校隨之以行時城被鹵殺掠燒燬一空惟城北門有石出尺餘掘土

拭磨觀之額曰李陵臺驛令謝君德政之碑其文畧可讀其陰刻達魯花赤等官姓名明日公傳奏其故上曰此碑既鐫有難輶姓名異日邊鹵見之必以此地爲己物爾宜再往擊碎之用火燬沉之河以絕其爭端公如旨而往既還奏上喜謂公曰秀才二十八人讀書者朕需爾爲用正好宣力勿憚勞苦因問曰朕率師伐鹵爾試言成功如何公對曰胡寇犯邊罪在不宥但聞天兵親征必遠走漠北臣願陛下幸毋入險窮追也上笑曰朕爲天下國家計秀才之言惟不欲窮兵黷武耳復謂曰凡軍中一切動靜或諱言之類爾有所聞卽來密奏又諭太監孟驥曰秀才有事卽令人見毋阻六月上駐驛安平鎮立功官軍因有過不與口糧者多相聚悲泣曰吾等糧盡必死道路矣公以爲言且曰此皆壯士也願陛下宥其過而與之恩則異日必得其死力上悅卽命兵部尚書李慶人給口糧并載衣甲驢一疋甲辰上復親征遼西還次榆川晏駕時仁宗皇帝在東宮命尚書蹇義夏原吉學士楊榮揚士奇侍郎王直與公同定喪禮議

國政宿內閣凡七日仁宗皇帝嗣位加恩賜白金綵段八月進秩侍讀學士尋陞右春坊大學士兼翰林侍讀學士明年乞歸省賜鈔二千緡俾馳傳而還宣宗皇帝即位嘗召入便殿謂曰洪武中學士有宋濂吳沉朱善劉三吾永樂初則解縉胡廣俱有重名念汝當講經史陳道義以啓沃朕心罔俾前人獨專其美賜肉醢及鈔千緡命入內閣參預祕事嘗奏乞分俸養母于家上允其請宣德庚戌修太宗仁宗兩朝寔錄成賜白金綵幣襲衣陞詹事府少詹事兼翰林侍讀學士履賜金珣琥珀麒麟帶壬子正月開太淑人曾氏喪上命禮部賜祭工部造墳遣中官阮童護公奔塋冬十月奉哀還朝寵遇日隆不時召對正統間開經筵公為講官陳說詳明於文儀之外多其規諫之語其講章于退朝之際人爭去以為珍寶修先宗皇帝寔錄與少師楊士奇楊榮同為總裁寔錄成賜金百兩綵段鞍馬進秩禮部左侍郎兼翰林侍講學士癸亥正月奉旨出禮部事講官如故乙丑瀏江台寧等府民遭疫問久旱公至紹興大雨水深二尺

灌獻之夕雨止星見明日又大雨田野沾足人皆喜曰此侍郎雨也布政使孫厚貞等陪祀請作御祭感應記刻石於廟而還丙寅公奏京師去冬少雪今年旬春徂夏雨澤不降種不入土小民缺食此皆臣等政事不修激怒上蒼所致伏望陛下施賑恤之恩臣等宜益省愆戒飭仍乞齊沐祈禱以格天心上從其言果大雨五日先是公奏請致仕不許至是年七十復上章乞罷政吏部言公精力未衰不允戊辰八月上特旨禮部南京禮部尚書明日謝恩畢內傳旨曰

上以卿先仕先朝多效勤勞陞秩南京得安伏視事在位二年以疾終是為景泰元年五月十七日也春秋七十有五計聞上悼惜賜謚文安命仍賜祭塋

大司馬三原王公傳

明 王 傑

公姓王氏名恕字宗貫別號介菴陝西三原世家其有諱永清號渭川處士者公始祖也以公貴累贈兵部尚書公天性穎敏幼有大志數歲西園翁命之學即知嚮慕長益淬礪正統辛酉以易經中鄉舉繼遊太學乃舉戊辰進士第入翰林為庶吉士擢大理左評事出知揚州府累遷江西河南左右布政使入為都察院右副都御史奉勅撫治南陽荆襄流民會襄陽盜起命公起復征勦賊平乞終制下許尋巡撫河南

再改南京戶部左侍郎時內閣大臣有言雲南地切交趾蠻夷土官易生變宜選剛正與智識超卓者往撫之上命改公都察院左副都御史受勅以往未幾陞右都御史而議者又謂南京根本重地守備非公不可改公南京都察院右都御史尋陞南京兵部尚書仍參贊執務所以眷注而寵綏之者蓋未艾也公博學多才練達政事而果於為善其始為大理獄多所平反嘗條陳刑罰下中者六事上嘉納之著以為令比及為揚州聽訟折獄咸得其情有一老婦

嘗証隣人為盜公閱其賊有二裙一寬而長一短而窄老婦謂其子婦之裙其隣謂其嫂與妻之裙公詰老婦曰爾一人之裙詎宜有長短廣狹不同耶遂明其非盜有二人爭牛公給之曰一牛而二人爭之吾將焉歸盡以入官命左右搜出之其一人默然一人喧爭不已公以與爭者曰此已物也故恡惜於此人稱公為神明云乙亥丙子旱澇相仍民饑且疫公發廩賑貸不待上報遣醫治療給之饘粥所全活者不可勝紀民既安乃擇士之明敏者處之郡齋躬自訓

迪繼又作資政書院以養士自是舉進士者累不乏人公在揚凡五年苞苴不行門無私謁比去江西為之立碑頌德以志思焉癸未廣州千餘流賊劫賴之安遠縣公率兵勦捕獲其渠魁吳廣華等餘衆悉平成化乙酉南陽金斗山豪右爭鎮殺人守土者莫能制公至彼始閱月即擒為首者寘于法餘悉解散未幾襄陽盜起勢甚猖獗公偕平變將軍李震調兵征討會于南漳進兵至大木廠搃其巢穴皆奔潰復遣裨將追擊之失利衆心洶洶謂南漳無城可守欲退

保襄陽公曰賊雖驟勝黨與尚寡舍險就易非其所長必不敢易我而來况南漳乃襄陽之藩籬衆皆視為輕重苟一舉足則遠近望風奔遁賊若乘虛而躡其後非為失南漳雖襄陽亦不可保矣衆曰保此固善賊來何以為計公曰奉命討賊賊至出戰戰或不失利委身致命此吾分也何以去為己而賊果不來衆始服公料敵之長既而連疏請兵丙戌三月元惡劉千斤就擒捷奏奉勅獎勵九月獲石和尚等千餘人械送于京賊遂平公乃疏防患安民六策皆見之施行其初破賊也首帥欲縱兵搜山公固止之因下令曰獲賊當生致軍門遂斬擅殺者復榜示流民諭以禍福俾之復業於是山谷之民感公德惠於是乃圖像奉祠丁亥二月奉勅巡撫所至問民疾苦興利除弊是歲夏旱蝗公禱於濟瀆大雨三日乃止既命有司捕蝗復上疏請赦國朝故事非始即位及大祥異不輒肆赦公以一疏之人而使數萬生靈獲被重恩謂非忠格于上而言聽計行者耶丁酉二月公至雲南既宣布德意遂下作奸犯科之禁俾圖自新於是

官屬民夷望風悔罪而政令為之一新三月復上疏言啓邊釁之由及交人窺伺之意因陳禦邊方畧數事五月劾鎮守中貴私通外國攪擾羌方諸不法事其罪首指揮郭景自盡餘械送隨行數人及輸所沒入寶石諸物于京六月陞右都御史勅諭至即日上疏陳謝有居萬里炎荒之地荷九重優渥之恩捧黃麻而感泣持白簡以汗顏既蒙信任而無疑敢不捐生以圖報之語未幾中貴以黃鸝鵲諷公貢獻公不可彼以自進公上疏極言其不可受曰臣聞漢之時鼠巢于樹野鵲變色識者以為不祥夫鸝鵲本綠羽而變黃正與野鵲同其變又不知果何取於此而又進之書曰不寶遠物則遠人格即今外夷久缺朝貢交人漸至不臣正臣隣無怠無荒修文德以來遠人之日也豈宜役耳目之玩忽不虞之戒伏望明降詔旨痛却此貢不報九月又上疏言駕帖不可無印信凡駕帖下諸司則用司禮監印信刑科掛號皇城諸門俱用照出關防印子所以防詐偽也今日戶汪清齋駕帖至即中鍾簾所既無印信又無關防臣慮事

体不一設若駕帖內有賜死重事而無印信可驗則人將死乎將不死乎果出上意而不死是違君命而罪愈重脫非上意而死之是孤臣節而法愈輕又云昔者交趾鎮守非人以致邊方覆沒一夫啓釁以致麓賊反叛費不貲之錢谷損無限之生靈至今父老言之莫不疾首蹙額今日某等所為之事殆有甚焉又不據戎戍二月至南都掌院事上言內庫歲久物貨當焚毀者宜以易銀為造官艦之費江北五衛京操官軍亦宜如王瓚言放回彼處操守以失居重馭輕之道蓋公自參贊以來因革損益獨任己見用是不免為同事者所忌是歲五月毘陵地震有聲聞生白毛公引咎自責乞罷歸田里不許七月條陳六事其最切要言東南民力久屈於饋運而兩京收糧內外官多苛政害人尚書秩滿上以公所任事重職專止勿赴京就給誥命制詞有剛介不阿端方有守之褒五月上疏時事其大者罷織造却禽鳥花木之貢俾軍民息肩愛戴聖德不報七月上章言九事復請出羨餘米八十石修築常州府城是年江南夏旱秋

水公奏免蘓松常鎮應天太平六府秋糧六十五萬餘石及湖州等有糧二十六萬及馬草以羨餘待納嘉興秀水嘉善二縣水災糧一萬二千石有餘三月上疏乞休致不允四月上念民困未獲命公賑贍公周行拊循區畫措置可謂無所不用其心而常不以語人故民有不知而陰受其惠者矣七月又言四事其一言臣近聞有中使至將謂朝廷軫念貧民恐臣奉職無狀故特遣近臣出內帑遠來拯救已而又聞中使乘紅百餘艘載鹽數千引來市玩好之物臣初未以為然及至果為市買玩好似此聲勢張皇未免搖擾群縣臣恐遠近傳聞使狂夫得以藉口且當此儉歲夫何纖造旁午貢獻絡繹奢侈之風競起倖進之門大開遂使爵賞冗濫名器混淆徭役繁興財力日屈欲斯民之不貧且盜得乎願陛下留神深思速返前使上遂追遣官陰戒中使慎無生事且俾過近四方聞之皆壯公之言而頌上之明也先是南昌張元禎編修繪砥柱圖題贊其上云倚此柱天樞此配地軸此係大風雷驚不碎大波濤推不去以此柱而

兩京士大夫亦有稱公為當代第一人者時上用常
州府監生湯蔡言其鄉人段銓有古書名截江網廬
岐僧院有古畫刻絲作羅漢觀音像遺蔡馳傳取之
公聞之遂以為言其大要謂帝王之學與常布之學
不同帝王身兼治教之責以為億兆之主故其學不
在乎博在乎知要至於諸儒訓詁簡編浩瀚既非帝
王所能徧觀盡讀他如老氏之書佛氏之學神仙之
說黃白之術清靜寂滅妖恠妄誕尤非帝王所當留
意也諸葛武侯云宮中府中俱為一體陟罰臧否不
宜異同今日之賞罰亦必如此而後可不如此則同
功異賞同罪異罰而人心不服矣凡此皆馭世之要
道帝王之首務也三月太監段英奉旨往撫松等府
造藥梅水梅所至誅求無藝五月公復疏言欲盡大
臣之道必須遵守祖宗之法而不為勢利所奪可也
且祖宗時差內官出外公幹凡所奉勅書或聖旨帖
子必明著所幹公事所取物數是以來使無過求多取
之弊有司無橫征暴斂之擾太監王敬齋來帖子止
云採取藥餌收買書籍初無拘集富家鉅室索取金

銀寶玩之由而敬動以朝廷為名迫脅需求無有紀
極東南列郡為之騷然今王敬未回而段英踵至計
其所造藥梅水梅價值不過用銀千兩英所取銀已
六千兩而復有酥合油牛黃沉香乳香毯綵綾諸物
之求臣惟遵守祖宗之法不敢擅發分帑歛民財以
阿順其意彼必謂臣打攪進貢懷嫉怨之心進毀謗
之言此臣所以欲盡賊而心不安也又中官妄加益
引復上疏言臣惟自古人臣之事君以聲色貨利珎
奇方術為容悅以取寵幸者未有不壞天下之事者
也臣聞太監王敬之來江南朝廷止賜鹽七千引以
為物直而敬所發寧國等府衛鹽至一萬五千餘引
其價可直銀八千兩而敬所得至三萬二千餘兩餘
鹽八千引不知從何而來餘銀二萬四千兩不知作
何取用括索蕪常等府金銀餘三千兩珎玩可數百
事臣又聞千戶王臣本非勲賢專美左道而太監王
敬都無智術悉聽指揮剝削軍民以覲寵幸隨俗迷
其所得金銀寶玩之數以聞而公猶以為未盡也復
上言臣於去年初聞太監王敬之來聲勢張甚是以

昧死上聞乞取回京繼聞遣人齎奉駕帖追及徐州
不知王敬何緣不回愈無忌憚亦惟隨行千戶王臣
舍人張麟之言是聽鸞益責鈔需索金銀寶石搜括
玩器書畫組織綵妝五毒紅紗麝官損民難以數計
夫所謂五毒者虎蜈蚣蠍蛇蝎也以此五物織
而為衣用之午節謂可辟邪人驟見之反謂不祥顧
乃暴殄天物害蒸民如此即此觀之餘可槩見臣
又聞王臣素為奸詐無籍小人以左道邪術得幸父
子同為美官非惟虛糜廩祿抑且有玷名器夫金銀
乃天地之精氣非智術所可為昔文成五利既以此
欺漢武今王臣復以此欺陛下此忠臣義士所為之
痛心而扼腕也先是王敬等到京既誣奏常州知府
知縣又誣奏公上因公前數章知敬等罪惡遂不問
容遣人偵敬盡得其贓污狀乃收捕下獄訊讞具服
王臣斬首王敬資死謫孝陵衛同惡張麒等十八人
皆遠謫至是公聞孫仁被逮上疏申救之仁竟得免
重譴以復任焉十月遣人召王臣首象之江南所嘗
被害郡邑聞者莫不稱快咸謂公之力且頌皇上之

聖明十一月上疏言僭遼之畧大要以安內攘外為
本而歸之君身甲辰正月聞上苑監錄事邵義以傳
奉職遷蘇州府通判公具疏論之畧曰蘇州固有通
判三員今復增邵義一員是為額外冗官官冗則事
不一而民擾矣邵義先為錄事正九品官也今驟遷
通判正六品也無乃有壞選法選法壞則士無定志
而奔競之風起天下之事日益壞矣二月出巡回至
常州得吏部移文脩述去年十二月二十七日所奉
勅旨有云這廝每多係冒籍更名朦朧授職好生欺
詐便將劉珣等部革了職不許在京潛住于寶凌
忠降寺丞鄒存敬降中書舍人李孜省降左叅議還
留照舊辦事公得報喜甚乃嘆曰皇上聖明凡用人
之非行政之失是惟不知知之未嘗不改觀治王敬
等罪與罷邵義等官可見矣公至是以十疏請老未
遂退休故謝章有云惆悵屢陳未遂歸休之願焦勞
方切忽承簡擢之榮爰茲瀝血以輸誠終擬鞠躬而
盡瘁然則公雖以止足為戒而亦未嘗不以天下為
憂也公平生忠義之氣遇事感發凡有所見必盡言

之而亦有未盡聞于人者往在刑曹時聞順德知府黎永明以歐公使人獲譴澗江布政使劉福等以督造段足不如法致罪二事已會赦而不原公具疏言詔者國之號令數思澤感人心而示信於天下者也當黎永明等犯罪之時為法司者能如釋之之勢泰陛下聖明寬仁未有不賜命允黎永明等未有不蒙恩宥天下後世未有不稱陛下如文帝稱執法之臣如釋之者而乃阿順至此比聞鎮守內臣有許問四品官及受民詞之命公又具疏言國家律令有云凡在京及在外五品以上官有犯奏聞請旨不許擅問按察司及有司見問公事但有干連軍官及承告軍官不公不法等事須要密切窺封奏聞不許擅自勾問又有例下許鎮守總兵等官接受民詞此祖宗之成憲嗣皇所宜遵守而不易也今某者欲專大權假以貪官急政為詞朦朧奏請提問四品以下職官朝廷一時不察允其所奏又許接受軍民詞訟某雖有才識可以委用終係內廷近侍稽之祖訓條章自有本等職掌而糾劾提刑非其所司今不分四品五品

不問文職軍職并聽提問是祖宗累世之憲章田斯人而變革朝廷百年之綱紀由斯人而廢壞臣竊痛心二疏累千餘言皆委曲詳盡使其如前諸疏盡聞於上皆見施行其有益于天下國家豈小補也哉予聞之君聖則臣直君信諫則臣有功公之言在朝廷信已剴切功在社稷信已卓偉使非遇我皇上聖德寬仁納諫何以致雍熙太平之治哉公為人鯁亮峭直好善惡惡出於誠意憫時悼俗有甚護疾故自申成以來身雖在外而其心無日不在朝廷雖縻職一方而其志未嘗不在天下蒼生噫如公者古之所謂社稷臣者是歟非歟

論曰宋韓魏公雖在外而其心常係社稷至身老而心益篤或有時聞更祖宗一法度壞朝廷一綱紀則終日不食富鄭公使國功甚偉每不自以為功至知青州活飢民四十餘萬嘗自言過於作中書二十四考矣公至性揚以至撫南畿其所全活以億萬計客距止四十餘萬至其愛君憂國之心發於至誠故知無不言言無不盡嬰鱗觸諱死生以之又不但終日

而不食而已也書曰為上為德為下為民公其有焉
而世方以阿意順旨為賢剝膚椎髓為能吁亦可以
鑒矣

余肅敏公傳

明 李東陽

公姓余氏諱子俊字士英眉之青神人也少為縣學
生景泰辛未登進士第授戶部主事有兩貴家爭田
公承部檄案之其一以地名偶通其姓執為己業公
曰張家灣盡屬張家耶事乃直以精敏聞遷員外郎
知西安府歲饑甚發廩出貸仍為指畫如數償之會
有西師餽餉不乏西安水鹵民苦沒宋龍首渠久廢
或議引潯河水自丈八頭置埽于城以洩于隍積澤
既久城直壞公因丈八之制開新渠貫城中經漢故
城達於渭以免公私之患人稱焉余公渠巡撫都鄉
史項公忠上其治行賜勅旌異成化初陝西布政使
有下職者戶部尚書年公富請黜其人而以公待之
吏部謂其侵官年力辦不能得都御史林公總亦薦
公巡撫延綏相度邊地巡徼行數十里盡得形勢上
疏言北鹵正統初始渡河守臣乃立石為界置榆林
諸營堡外又築墩臺以勝賊天順後鹵規知河套所
在入屯其內而我屯守反在其外請於公邊墩臺之
隙築牆建堡又於界石之隙因山剗削其高若城每

二三里則為敵臺崖皆連北下絕又於中空築短牆橫一斜二如偃月狀以為偵敵避射之所蓋自清水營之紫成岩至寧夏之花馬池東西延袤二千里凡為堡十有二壕塙崖砦八百有奇小墩七十邊墩十有五又移定邊安邊二營於近地或以為棄地可惜公謂我朝永樂間以東勝難守亦嘗棄之今二營就險可守獲利耕牧省轉輸廢是地未嘗棄也又請置榆林衛取通兵當勾及成南土者之子孫以益之凡內邊曠地皆墾為屯田歲獲數萬石立武學以教子弟之俊秀者軍中器用巨細畢具率範鐵為之識以歲月至蔬果之內亦隨宜教藝而時巡省之自是兩過城下必嚙指相顧莫敢近又言河套要地宜令大同遊兵備湖州山西遊兵備灰營宣府遊兵有警調用行之至今以功轉左副都御史進右都御史移鎮陝西陳彌盜安民數事涇陽有舊堰不利灌溉每治輒輟公鑿山開道溉田千餘頃又鑿南山道直抵漢中以便餽餉秦免岷河池三衛之戍南方者萬有奇易置北方更戍者六千有奇又以陝所易者分戍胡

盧味豫莊城設平南鎮戍二千戶所領之岷番作亂充其四族斬首四百級捷聞賜勅獎勵有北國畏威西戎遭魴之語召拜兵部尚書論功陞從一品祿加太子少保賜金馬璫帶文綺麒麟服遼東守臣阿權責意請征建州內附夷人以為功公議不可因請別遣重臣制之以敗其謀不得則極論其啓釁失利之故宜寘重法上賜詰問閣部待罪公獨承之云皆臣子俊所為上怒亦解時貴州守臣言藩州苗賊為患請調兵會勦公謂變在四川而貴州言此以為要功者因極論天時地利皆不可與兵乃己以星變上言請禁貴家奪民田罷中官之用事于外者復往北邊節制諸軍公行邊自宣府至大同築外城置樓櫓造戰車數千兩為練武圖以教士卒錦衣百戶常瑛者附勢亂政謫戍宣府後妖言事覺公坐以死法斬于都市時論快之慮近戚之希恩亂爵者上言馭世務以大德不以小惠莊將務以公義不以私恩因乞骸骨恩禮益厚比在床褥猶手制奏稿念湖廣四川荒甚陳珥災禦盜之術至寢不能寐再遣醫視疾弗廖

己酉二月二十二日辛年六十一上聞訃震悼報視
朝一日賜寶璽萬貫命有司給棺歛具贈特進光祿
大夫太保謚肅敏子襄舉進士授戶部主事亦有賢
聲公嘗教之曰誠能動物人惟積誠自能銷偽又曰
人固貴剛然不可使人畏之如虎識者以爲名言贊
曰予嘗接令公談即事論事必欲窺見諸行往復曲
折大抵皆國家天下計也及跡所施設歷歷可指數
而在陝西功爲多在延綏爲尤多蓋以公邊數十戶
屹成巨鎮爲陝之保障雖童兒女婦莫不知頌其功
及用于北邊值時與地有所不合役未及興而衆
山動或者乃并延綏之績爲疑然則大臣之排辟議
任衆忘以成大功者不亦難哉夫民不可與慮始可
與樂成固也以吾士大夫爲國家天下計亦爲是言
何哉必若所言則都重位饗厚祿者將譖于傷財害
民累歲積資計日受代而不復知有天下不至於大
壞極弊不止也嗚呼世安得有勵志動事惟日不足
如陶士行者乎予故傳公俾凡有更責者勸焉

一峰先生傳

明 陳獻章

吾平生有故人曰羅倫字彞正吉之永豐人宋羅開
禮之後也性慷慨樂善不疑人欺遇事無所迴避有
不可輒面斥人舉成化丙戌進士策對大廷頃刻萬
言中引程正公語人主一日之間接賢士大夫之時
多親宦官宮妾之時必執政欲節其下句倫不從直
聲震於時奏名第一爲翰林修撰會內閣大學士李
賢遭喪去官朝廷留之臺諫皆不敢論說倫詰其私
第告以不可孝公始以其言爲然既數日復上疏歷
陳古今起復之非是且曰如其不然必準富弼故事
終喪劉珙故事言事反復數千言一本于天理人心
之不容已者孔子曰勿欺也而犯之倫以犯顏敢諫
爲大救時行道爲急其負荷之重未嘗一日忘天下
故發憤如是疏奏遂落職提舉泉州府舶司倫雖見
逐而士論益榮之由是天下之士爭自刮磨向之不
言以養忠厚者爲之一變而終倫之世臺省未聞有
起復者矣倫雖以此爲人所知然亦以此取疾於人
明年召復脩撰改南京供職尋以疾辭歸開門授徒

日以誣經爲業垂十年卒于退居之金牛山世之知倫者不過以其滄沛之文奇偉之節果敢之氣而已至其心之所欣爲而力之所未逮未必盡知也嘗欲做古置義田以贍族人或助之堂食之錢謝而弗受或衣之行遇乞人死于途輒解以覆之客晨至留具飯其妻語其子曰瓶粟罄矣之旁舍干之比舉火日已近午亦曠然不以為意提舉泉州官例應得折薪錢其人欺以乏告即放遣之不復問予嘗遣人訪之山中結茅以居取給於隴畝往來共樵牧若無意於世者時或作為文章以發其感慨之意而人亦莫之知也論曰倫之必爲君子而不爲小人較然矣如倫之才少貶以徇人雖欲窮晦其身寧可得耶以其所學進說於上世目之爲狂何足怪也孟子稱豪傑之士雖無文王猶興若倫者今所謂豪傑非歟無導于前而所立卓然人莫能奪之又曰倫才大不及志其青天白日足稱云

湯允勛傳

明 程敏政

湯允勛字公讓濠梁人其曾祖佐高廟取天下是爲東甌襄武王允勛少負才好使氣貌類河朔人兩眸睜然髭鬚起如戟年十五六入學爲生徒日記數萬言學有舊版文千餘字允勛騎馬過一門成誦應天尹下學傳籌召諸生允勛獨後至當筭大呼折尹聲撼庭木尹愧憤卒筭之允勛攘袂走出學門題詩府署合扉上有從今袖却經綸手且向江頭理釣絲之句遂去學出遊江湖上凡吳越間豪家富室爭延致之周文襄公轉運江南聞其名召之至曰王孫能作啓事否允勛請紙筆即席具狀幾萬言類宿構者皆切當世務文襄奇之上書薦其才有文武具驛召赴京時于少保方督諸軍請試之立允勛將臺下萬卒環視于公摘古今將畧及諸事舉以問允勛應對如洪鐘不能屈左右嘖嘖歎賞于公亦撫寧曰吾子誠有才入對以爲錦衣衛百戶正統末英廟北狩朝廷遣使通問已命中書舍人趙榮擇可副者衆舉允勛詔以千戶如鹵鹵大酋脫脫不花問中國事云何榮

未及對允勅前語之又時於坐上箕踞岸幘朗誦其所著平遠論函首色變既出謂中國譯者曰彼髡何為哉恨不殺之耳景泰中詔舉將才胡忠安公言允勅才可用進署指揮僉事時典兵者多忌允勅不令治事允勅亦時時歎息其功名不偶放浪詩酒間京師大率以為狂所與游最善者侍講徐有貞教授馮益太醫劉溥英廟復位有直入用事然亦陰嫉其才不推薦之允勅亦不登其門天順中校事者甚橫李文達公多裁之而文達嘗召允勅與語允勅張口論天下事及古今成敗一生盡傾文達愛其才將薦之校事者遂撫拾允勂往年江南受賕事下之獄怒而辱之允勂詬罵不絕口至詆之為奴然允勂實出急于人而不立券無以自白遂謫為民荷校出都城故人有唁之者允勂仰天笑曰吾子以指揮為足榮一湯允勂邪掉首行弗顧成化初遇需恩復其官再用言者言詔以裨帥出守孤山堡孤山在延安西國歲入之守者多以軍敗黜允勂得詔曰噫吾死矣夫孤山無郭有他郡之來戍者七百人戰則為債軍守

則為怯敵如此雖諸葛武侯復生亦難乎免矣抵鎮草封事數千言大率謂朝廷宜先城孤山聚糧募死士又移書當路言狀遂憤憤吐血數升卧不能起已亥酋入寇主將閉城門不出兵酋大掠子女而東允勂怒髮上指曰死國分也力疾而起戎服跨馬率麾下百餘人邀酋於境上力戰數十眾寡不敵遂死山下是年八月也允勂為人軒翥倜儻直欲起古豪傑與之友視世之瑣瑣者以為齷齪不足與語好以氣雄人不問名位卑顯有不可意奮然去不顧或遂罵之至其人面赤下必資甚有挫之者江陰知縣布利於民將受代允勂率少年數人直入縣廳反縛之狀其罪送之上官上官大駭并收下獄凡數歲會赦乃得釋夏郎中時正嘗於坐上與之藏鉤不勝而怒語侵允勂允勂就坐上捽之下拳之蹴之象客為之股栗又嘗遇友人家見道士在坐與語不合而罵之道士不知其允勂也稍稍有憾色允勂極之幾死與人言出入經史子籍縱橫闡闢隨意所如有問古名將者允勂以張巡岳飛為第一其人曰岳將軍則

聞命矣張睢陽何如人允勛頃目曰子不觀其對全狐潮之語乎卿未識人倫焉知天道自唐以下誰有為此語者其所見如此詩豪邁奇崛如風雨晦冥中電光翕發使人不敢正視又如雷斧斷崖石下墜下測之淵觀者褫魄每就人席上操觚立成數十張有名能詩者多為其所懾或不能措一語以遜平生著述有五雲清唱風雅遺音東谷集千餘卷無子

史官曰予少與允勛游知其人使不死為大將將數萬兵出陰山其功名當不左古豪傑下顧獨青

血草莽中天也或者謂允勛類太史公所謂游侠乃大不然允勛行事雖若任俠然扣其所得朱豕郭解直奴才耳烏足以比允勛焉

揚義士傳

明 張汝弼

天順間錦衣衛都指揮門達怙寵驕橫凡忤之者輒嗾覘卒潛致其罪逮捕考掠使無詰證莫可反異由是權傾一省言者結舌其同僚袁彬直不屈乃証以重情考掠成獄內外咸寃之莫或敢廢也京城有楊墳者戍伍之餘夫也素不識彬而為之上疏曰正統十四年駕留鹵廷臣悉奔散逃生惟袁彬一人持校尉之役乃能保護聖躬備嘗艱苦及駕還復辟授職旌勞公論稱快今者無人奉勅卒然付獄考掠備至罪定而後附律法司雖知其枉豈敢辨明陷彬於死雖止一夫但傷公論人不自安乞以彬等御前審錄庶得明白死者無憾生者亦安臣本一莽草茅身無祿秩見此不平昧死上言遂擊登聞鼓以進彬仍送衛獄而達因是欲盡去異己者乃緩頰死使誣少保吏部尚書華蓋殿大學士李賢指使項佯諾之達遂以聞命中貴會三法司鞠于午門前項乃直述所言皆由己出於賢無預達計不行而彬猶降黜居第盡毀未幾英宗升遐言者斯劾達罪舉項事為證達

謫死南丹彬復舊職而代達總衛事成化初修英宗實錄稱義士楊瑄云瑄字景和其先某處人父為漆工宣德間嘗遣人至倭國傳泥金画漆之法以歸瑄遂習之而自出己意以五色金鈿並施不止舊法純用金也故物色各稱天真爛然倭人見之亦酢指稱瑄以為不可及蓋其天姿敏悟於書法詩格不甚習而往往有造妙處故其藝亦絕出古今既不避權奸為此義舉人亦莫敢以一藝目之有欲授之官不就遂隱於藝以自高焉華亭張弼論曰義者無所為而為合天下之公論者是也使維公論發之以私則其中已不義矣若瑄者於彬無恩於達無隙又非言官以圖塞責也特以公論所激挺身以突虎口其不死者幸也勇于行義何如哉然此公論具人面目者皆能知之而高冠長裾號稱科第人物者乃低徊澳沒井為之掃門捧溺無所不至而醜然自得誇諛於人何利害之移人乃如是其烈耶聞瑄之風亦可以少愧矣

夏忠靖公傳

明 王 鏊

公諱原吉字維禔其先會稽紹興人父時敏洪武間以布衣召見授湘陰教諭遂占籍焉公領鄉薦入太學被選禁廡書誥太祖見而異之賜衣一襲又遣人詞諸生笑傲謹譚獨公端坐儼然事竣當署上曰夏某端厚君子也實授戶部主事尚書郁新與語奇之曰夏某才器老夫不及也諸曹事難處者悉與裁之同官庾疑日環左右劉郎中某者耻以事煩多為新所詰責深街之嚴正大朝劾諸司怠事者上曰宥之新請罪之者再三上怒曰是誰教汝以要勤耶新免冠謝得已旦率諸曹入謝劉出奏曰聖明洞見尚書果人教之意欲中公上問新為誰對曰堂後書算生實教臣臣愚過聽抵牾此乃下書算生于獄劉嗾生盡引公衆不肯劉他日復奏曰夏某專尚書柄前事某實教之上曰聞原吉甚有裨于尚書汝欲陷之耶劉與書等生皆棄市三十一年陞戶部右侍郎未幾充採訪使巡福建公明寬大時楊文敏公榮為邑庠生公器之贈之詩有莫使祥麟後馬牛之句榮遂冠秋

試太宗入公時鎮新州有執公以獻者上曰夏某奉
公守法轉戶部左侍郎或譖之曰彼建文用事人不
宜大用上曰夏某太祖之臣也彼忠於太祖故忠於
建文又豈不忠於朕哉旋進尚書凡貢賦役制悉命
詳定兩浙大水命公往治且命都御史俞齊水利集
賜之編詢故老水之源委時役兵民數萬撫恤之人
盡力布衣徒步晝夜經畫目為之赤盛暑或持蓋
至曰衆皆赤體暴日中吾何忍求涼決壅滯修堤補
濬溝洫治橋梁築水入海水下為患又奏發粟萬餘
石以賑饑給牛具種子與貧民吳人懷之姚廣孝還
自浙西上首詢公廣孝曰夏某古之遺愛也召還掌
部事請裁冗食平賦役均出入勿使勢要種鹽以防
商賈勿使富貴專錢以沮貨易禁包攬侵欺之弊清
倉場廣屯種皆立定規凡倉庾府都戶丁田賦盈縮
之數各書小帖于袖時一閱之一日上問天下糧數
公對某處幾何某處幾何毫髮不爽蓋親信之時陞
賞靖難功臣又大封親藩征討四夷創宮殿增置武
衛添設百司費億萬計皆取辦于公初建北京宮殿

採木運餉者命公出巡視給以錦衣官校四十人律
治怠事者公登車即諭官吏軍民各虔乃事吾將出
巡蓋恐犯者衆也人人感悅而事集秋八月召還時
上將北巡命掌行在戶禮二部都察院事扈駕至北
京又命兼掌刑部八年親征北邊命輔導皇孫留守
北京燕掌行在六部都察院大理寺事諭之曰朕以
房元齡委卿卿其盡心輔導時京邑諸司草創公每
旦入朝獨近宸前參決機務退至政事堂即官御史
抱案盈庭公口應手判不動聲色北奏行在南啟東
宮京師肅然七月駕還北京公見便殿曰卿輔皇孫
居守事安民安衆決機務咸當朕心公曰陛下之訓
皇太孫遵行之臣何功之有翌日上諭群臣曰夏某
輔導皇孫今之周公也十一月扈駕還南京仍掌戶
部事尋命輔導皇太孫周行鄉落見鄉老令一一陳
其風俗疾苦或賜之帛給之糜至一村店取蓐黍進
曰願陛下味此以知民艱皇太孫為嘗之有一人犯
駕欲罪之公言上命所至無擾罪之非上意也既又
輔皇太孫閱武于郊九載奏績上親宴之便殿諭廷

臣曰夏集高皇養成賢德欲觀古名臣此其人矣遂命與姚廣孝監修國史十一年扈駕巡北京與皇太孫同居上營之後日親啟沃十四年九月皇太孫自北還南京公輔行所至必陳山川險易民生休戚風俗美惡太孫甚重之稱為先生而不名所過兵民晏然十五年扈從幸北京十八年北京宮殿成命公召皇太子太孫于南京且諭以授受之意十月公先馳奏上復命公迎之且曰東宮其緩行公至鳳陽迎見道上旨東宮曰雖有旨吾敢緩乎因手書付公與楊士奇詢訪沿途軍民利病政事得失以備顧問及至上問東宮來何速對曰陛下慈注之深東宮孝思不得不切也上善其對十九年三殿災公言愛民所以敬天乞蠲逋負及芻糧採辦金銀課程優恤流移以回天意從之詔求直言言者多云建都北京不便主事蕭儀言之尤峻上怒誅之時科道亦多云不當輕去金陵上曰方遷都時吾與大臣密議數月而行言者同勅大臣上命言官與大臣俱跪午門前對辯都御史陳英言科道皆白面生不知大計上命左右至

午門問衆皆呼罵言官公獨奏曰御史給事職當言路且應詔陳言臣等備員大臣不能協贊大議臣等之罪也上悅兩宥之時公雖居戶部實兼九卿之事凡軍國要務必與公面議召見便殿或闕門語移時左右莫知所言公退則恟恟若無所預者交趾平上問公陞賞孰便公對賞費于一時有限陞費于後日無窮乃陞尤功餘皆班賚西域法王來朝上將親勞之公曰彼慕化而來宜示以君臣之禮且上如是下必有甚焉禮義從此大壞上曰爾欲效韓愈耶他日法王見便殿上命公拜公曰王臣雖微加于諸侯之上況夷狄乎臣恐一屈膝有辱天子大臣死不敢奉詔上笑曰卿過侍郎楊勉之拜爾候遠矣山東妖人唐賽兒黨三千餘人至公入奏曰諸所俘俱平人悉原之衆遮道呼公生我公叱曰朝廷之恩我何與焉谷庶人逆謀既彰上疑長沙有通謀者公曰謀出于彼居人何與臣敢以百口保之上元節觀燈臣民同樂公奉太夫人往觀及晚宴燈山上顧公問曰聞爾母來觀燈公對曰歸矣因徹御案賜之第原啟至京

召見賜酒饌歸又遣人送之舟中行李蕭然異日上
顧問曰聞卿弟行橐甚空公對曰臣俸資先已寄歸
適無所贈上曰何不告朕因賜異布數匹十九年議
親征北鹵群臣無敢諫者公曰我受國厚恩不可不
死許約尚書方賓同諫曰公但來吾自言之入叩頭
言頻年師出無功軍馬儲積十喪八九況今災青屢
作內外俱疲聖體少安遠涉風沙誠未便上怒乃命
公整邊儲于口北賓懼自縊遂併籍公家命錦衣官
立取回至則方啟殿理儲錦衣促之公曰姑竣畢此
不然恐有侵盜死吾安之不以累公及至上問征鹵
得失公對如初歷言自古不勤遠畧之意命繫於內
官監皇太孫屢請赦之上命中使覘之因問曰上待
公厚今擊之暴亦有怨乎公曰風雨霜露無非教也
何敢怨上意頗解猶繫之駕至榆木川下豫顧左右
曰夏原吉愛我八月計至仁宗時為皇太子親臨繫
所公趨出皇太子立中庭泣曰揚榮報父皇已賓天
公伏地哭不能起上命起曰卿可出視事公曰先帝
罪人未聞遺詔何敢出駕曰命賜御厨饌咨以國事

公言方今民力竭于東南戎伍疲于漕運宜幸南京
以蘇民困上曰朕意亦然復以詔條事宜訪公公請
賑饑寬負省賦役罷西洋寶航雲南交趾採辦金寶
香料各處開辦金銀課程上即位復公戶部尚書賜
冠帶衣服靴襪被褥帷帳器用公以母喪不受上御
西角門朝顧問左右何不見夏尚書蹇義對曰母喪
乞歸守制上曰卿可勉留之公至便殿乞守制上曰
卿國之老臣正賴共濟艱難卿云有喪我無喪乎如
卿辭職朕亦不當在此退上十餘疏終不允皇太子
正位東宮命兼太子少傅時呂震為太子少師位在
公右上諭鴻臚命引震列公下即進公太子太保兼
太子少傅尚書如故三俸兼支公同辭下已許辭太
子少傅俸素忠激以風鑑得幸太宗上以其言常不
遜首欲誅之公曰忠激同當罪然禮父母所愛待之
終身不衰今山陵未畢刑近侍之臣不可乃罷忠激
官每朝罷必呼公等二三大臣近御展前或隨至便
殿面議政務凡內外諸司所進章疏命擬旨公擬旨
多云某部知道或以問公公曰予奪之柄非臣下所

敢專故付之六部定其可否而復取上裁則事有所分而權不下移也洪熙元年欲下寬恤之詔公請廉貧民增官吏之俸以勸廉弛山林湖海之利以與民寬逋負以安流徙積粟養將士禁差占屯田之官以妨農務皆採行之冬久無雪上作憂民吟命公和之兼賜王常翰林進呈詔詞上親增二語曰勿謂崇高而難入勿謂有所從違而或怠又召公至宸前賜絕憇糾繆銀印一諭曰聞皇考賓天時歎卿忠愛自今朕有過舉但具奏以此封識進來朕不憚改手勅欲

除醫劉鞭背連坐妖言誹謗之刑公與二三大臣密議以聞從之命兼禮部事時賜正直手印押以便處分且以旌公之正直也時山東淮徐諸郡累歲旱澇公以為言即免夏稅及秋糧之半一切科派悉罷之未幾勅公曰古者斧斤以時入山林今山西樵採者根株悉拔宜斬之以徇公言伐薪過當罪止不應請從律上曰吾過矣賜田五頃八里庄建第二所于兩京李時勉廷評過激諭公等曰李時勉當朝辱脫言已天顏大變公進曰時勉小臣豈能損傷聖德願以

震天威下法司議罪之未晚仁宗賓天皇太子監國于南京中外洵有漢庶人之憂太后命軍國事悉依公裁處公密謀急迎駕駕將至群臣出迎太后留公佐襄王監國上見輔臣首問夏某安在襄義等莫對上不悅至京慰見太后方知所以留卿之意卿輔朕有年朕倚卿非他人比卿當以事皇祖者事朕加賜寶帶表裏公同塞三楊同心輔政時與公等面議久坐賜茶或命退殿庶少休復至宸前論議退朝之暇時獨召公密問或袖出小帖付公公亦有所白于

上漢庶人反擢輔臣奸邪亂政以公為首上夜召公等入議公免冠頓首曰臣罪當死上曰彼借卿為兵端耳命分坐屏左右密議楊榮首勸上親征上難之顧公公曰往事可鑒機不可失也臣昨見所命將語臣而泣其臨事可知兵貴神速卷甲趨之所謂先人有奪人之心也楊榮言是上意乃決躬率六師兼程而往師臨城庶人欲降猶令人繞城罵公眾人既得大被思賞賜閤者三掖朝參公同辭曰舊制非勲臣不敢用上曰卿輔導非勲而何十月交趾請降廷議

疑其詐也更欲與兵討之公曰兵疲矣譬如靡伏于身未潰則憂不測已潰則宜進平和之劑俟血氣調和自愈若惟毒之攻心腹內虛復生他患莫若因其請降許以復國自新二揚議亦同遂偃兵息民天下賴之十一月皇太子生赦天下公與塞泰對便殿上悅命留侍宴上顧公醉笑曰卿能復飲乎公頓首曰臣飽沃天恩醉矣顧塞猶醒酌三巨觥飲之將退上顧公有欲言之色問曰卿有言乎因近辰前密請早建皇儲為宗社之本上曰然當泰太后行之二月以議國本功便殿獎諭賜範金銀印八尋加翠纓銀鑿玉鈎玉帶三月命游西苑隸人問曰龍衣而髯非至尊乎上曰顧公下馬謝曰不能檢下臣之罪也上曰朴哉斯隸賜之鈔命登舟游太液池上顧曰以操以御群卿之力上射鳬獲之烹以啖二三臣又親酌玉觥以飲公曰卿啟沃良多今老矣可不盡懽苑多奇石諭內臣吳城隍所欲與公取小者一二秋八月復侍游東苑上指草舍一區曰此朕致齋之所師古人剪茅之義公曰陛下言及此天下蒼生之福也

九月扈駕巡邊賜寶刀上取公索授嘗之笑曰卿亦食此寵擢公曰臣食此足矣隨行將士尚多餒者命取上供賜公將士俱加犒還京上念公等四人年高且師保之重以寅亮為職勿煩庶務持勅輟部院務俾專論道左右隱然拜相之意未幾扈駕閱武郊外至兎兒山上怒諸將之不虔也命褫其衣公言將帥國之爪牙倘寒凍至斃是以微罪而殺重臣上起入帳內公隨之上曰卿且休矣公曰陛下憐臣至矣諸將瀕于死獨不必念之乎上曰為卿釋之日數召公使者數千輩交道廐有賜馬甚靈召命將至馬必嘶嚙聞者以報而使者至矣嘗張燈宴群臣悅甚指公等曰此朕擎天柱也賜紫瑛硯象牙翠花筆龍香墨水精鎮帛玉筆格為條肯用公誕辰親繪壽星圖詩有獨生申甫扶鴻運之句又親繪秋香梅竹二圖文禽非熊春霖魚遊春水圖賜焉服食器用銀幣無虛日嘗命尚方取一翠甌賜公既乃笑曰卿夫人得無競乎加賜一馬又製束髮玉冠二上用其一以賜公曰使後世知吾君臣一體也五年春兩朝實錄成

上賜宴餐旦入謝幕歸得疾卒上臨朝聞訃遂輟朝流涕還宮議加封公爵楊士奇曰文官不許封公侯此例不可開也乃贈特進光祿大夫太師諡忠靖公識量寬宏人莫能測僚屬有善采納不遺有小失必掩護每曰人才難得一加譴責則自沮矣有郎汚精微批懼甚公入奏曰臣之罪也詔與易之過淮陰馬速從者遂之公寄聲遇客客不應而嘗之從者執以詣公笑而釋之諱有盜銀杯者獲不治仍予一杯以去有進士戲坐公車或以告公曰有志呂震為子乞官上問公公曰震有守城功可與震嘗詆公柔奸者也平江伯靖難時欲害公公後薦總漕運二人心服焉或問量可學乎公曰某幼時有犯未嘗不怒始忍于色中忍於心久則無可忍矣又曰處有事如無事處大事如小事尤樂薦引士類不使人知仁皇欲用李衡為兵侍吏部不知詔問公始知由公之薦周文襄為長史有薦為郡守者公曰郡守不足以展其才尋致大用襄城伯李隆守備南京黃忠宣贊理漕運皆所薦也金尚書以疾在告赴塞忠定飲上聞

之不樂曰以疾不朝而宴于私可乎命繫之公曰大臣可殺不可辱金某老矣而繫之非刑不上大夫之意也或短揚文貞于上者公力為之辯故語詞有推賢盡誠之語每朝廷行善政或謂之曰此天子之明群公之力吾何與焉九奏草皆焚之曰不可彰吾直也贊曰國朝名臣皆稱三楊塞夏今觀忠靖歷事四朝列聖之推誠于公公之竭忠蓋于上何其盛也何司寇喬新云公初巡福建所至問民疾苦吏治得失其瑣屑悉付之有司嘗出漳州北門見舊塚將頽問左右曰元達魯花赤迭理彌實之墓乎死下降故塋此公曰忠臣也命整其墳樹碑表之他日至福寧見道傍一草庵問之曰元福寧尹王伯顏與其子祠子婦潘死節于此公曰一門忠孝無愧水壺命遷其主於室其少也若有神焉戴大笠出入恒道之閭有明遠接多妖宿者必死公獨宿竟夜晏然豈神明護持之耶其在吳中治水利至于今稱之

愧齋先生傳

明 王 鏊

愧齋先生陳姓名名字師召福建莆田人為人古貌古心於世故細碎未瑣瑣殊若無所憾又遇人無貴賤賢愚輒傾盡小事無不可輒曰也罷人戲稱爲也罷先生又稱愧齋先生居官三十餘年頽然而已胸中是非輕重涇渭甚辨與人交際鎔銖不爽遇大事有不可必如其志自羅倫王徵等貶斥中外結舌以言爲諱先生爲編修上疏曰竊見近年災異屢見雨暘愆期翰林論思之地臣敢不竭其愚臣觀春秋二時陛下雖間御經筵以講聖學然勢分尊嚴上有所疑未嘗問下有所見不敢陳願於退朝之暇擇一二儒臣有學行者引對便殿少霽天威有疑輒問務使聖心渙然而止方今人才日降言路日塞異端日熾宜召還致仕吏部尚書李秉修撰羅倫編脩張元禎評事章懋給事中王徵新舉人陳憲章置之臺諫革去法王佛子真人位號禁止創建寺觀則正人用言路開妖妄息不報司禮監黃賜母死省寺監院無弗帛祭翰林猷未之詣也一日徐侍講璦言於衆

曰時且如此猷得不往焉衆或應或默先生忽奮然大怒作而言曰堂堂翰林相率而拜內臣之門天下其謂何斯文其謂何詞氣憤激聲淚俱下於是言者大沮事遂已汪直之在西廠也氣焰烜赫出沒如鬼神一日有校士突入兵部郎中楊仕偉家收縛仕偉拷掠及其妻屬衆駭莫敢問先生其鄰也登墉呵之曰爾何人敢爾不畏國法其人曰爾何人敢爾不畏西廠先生曰爾欲知我乎我翰林侍講陳某也聞者爲之縮頸劉文穆之起復也先生自南京與書止之文穆不悅其後當路有缺吏部擬先生文穆輒沮之曰某腐儒也不可用先生由進士爲庶吉士授編修進侍講擢南京太常寺少卿九年乃進卿云先生爲文典實有理致尤運于經學四方舉子質經者填門塞坐得一語人人各厭其意外顯仕多出門下者太史公曰語有之仁者必有勇勇者不必有仁信哉余觀愧齋先生平居恂恂語若不出口至其疏時事叱邇卒排衆議何其壯也於乎其所謂篤行君子者乎

擬丘先生傳

明 蔡 清

先生名喬新字廷秀姓何氏世家於之廣昌宋寶謨
閣直學士謚文定公坦之裔吏部尚書東園先生第
三子也少多疾九歲始就外傳讀書穎敏過人年十
一讀通鑑綱目輒了其大旨有問者條舉其首尾若
道目前事聽者忘倦刑部尚書匡山魏公侍郎豐城
丁公皆以偉氣期之翰林修謨周君中規嘗至先生
書齋見壁間懸新城朱文徽所寫丹鳳鳴陽圖中規
因歎文徽多能先生徐曰此非學者所當為也中規
異之因問所閱何書對曰陳子樞通鑑續編也曰子
樞書法視朱子何如曰先輩著述非後生所敢議然
呂文煥之降元不書其叛張世傑之溺海不書其死
節曹彬包拯之卒不書其官紀義軒則採怪誕不經
之談書遼金則失內夏外夷之義似未有當也中規
大驚因曰東園曰三郎學識不易及也景泰庚午赴
江西鄉試時姑蘇韓公雍巡察江右欲私見之先生
辭不往及入試主司天台章先生服得其文擢置第
一監察御史周君孔明以東園方典銓衡懼招物議

乃移置第六明年會試禮部名在甲榜翰林學士江
先生淵亦避嫌移置一榜例授教職辭不就及東園
致仕乃登進士第親政上部嘗奉使淮而巢縣令閻
徽少學于東園以白金文綺為贈先生力却之徽曰
吾以壽吾師非贈君也先生曰子欲壽吾親因他人
致之則可因吾致之則不可卒不受東園聞之喜曰
吾兒如是吾無憂矣景泰七年春擢南京禮部主客
司主事務甚簡終日閉戶讀書宗伯姚公重之語
人曰何主事方為時用恐其不習於政奈何乃檄先
生收擢先生平斗斛謹出納嚴勾稽而痛懲奸吏之
侵漁者姚公喜謂先生曰推是以往無施不可矣會
丁東園憂解任歸家樞密陳文定公父塋廣昌世稱
吉壤其子孫貧甚欲鬻其墳為東園宅兆先生曰暴
人之父而塋吾父吾不忍為也繼丁母憂服闋改刑
部陝西司主事先生盡心庶獄無大小必求其情武清
農家婦牧牛于野二戎卒驅其牛去婦號而請之不
予錦衣衛捕盜者執之以為強盜送刑部議其罪先
生曰此白晝奪人物非強盜也律當徒又有強盜舍

送旅分所却彩綰遺主翁事覺巡微者并主翁執之以為同盜先生訊得其情曰此與盜分賊耳當與強盜殊科司寇陸公喜曰子慎刑如此不愧廷翁矣遷本部廣東司員外郎錦衣衛隸廣東司其官拔特侍衛親軍恣橫冒禁法司每優容之先生曰法者天下之公也有犯輒捕治不貸由是官拔悚懼相戒不敢犯修英廟寔錄命各部採撫事當紀載者為書上之司寇以屬先生及書上吏館以保南陽李文達公聞之曰嚴寔而飾以文視諸司惟騰吏牘者大不侔矣遷本司郎中錦衣衛百戶有逐其舅之子而奪其財產者舅子死其孫訟於官指彈使素彬囑先生抑訟者先生執不可悉奪財產歸其孫彬怒欲因事陷先生遣現事者百端騰撫卒無毫髮可指為罪者先生任刑部久凡法比禁例俱通其本末陸公及侍郎太原周公新安程公鄒水董公皆重之有大獄其必以屬先生章疏當上者輒使其草吏部尚書古曹李公知先生材且賢屢薦於朝陞福建按察司副使暨抵任浙寇千餘人考寧等縣盜採銀礦所過剽掠先

生募鄉兵擊之斬首數百級擒其魁浙寇敗走福寧士豪尤氏暴橫殺人出入以兵甲旬隨縣官捕之輒抗拒不服幾二十年先生設方畧致其父子置於法福清薛氏以所居瀕海歲出諸蕃互市事覺聚眾欲為亂先生掩其不備盡獲其渠黨海道以寧福安寧德銀礦久絕有司責民供歲課民多破產先生具奏減二縣銀課三之二行部與化問民所病皆曰洪武初官以牛貸民耕而徵其租牛物故已久而徵租如故民以是病先生以聞遂蠲其租都察院副都御史滕公巡撫福建檄先生分巡汀邵延建先生徧歷諸縣訪民利病而興除之清流之歸化里介乎將樂沙縣之間民恃其險僻不供徭賦先生白滕公即其地置歸化縣其民法令龜山先生將樂人子孫徵其墳塋蕪穢其書院亦為戎卒所據先生修其墳復其書院且籍廢寺腴田百畝俾其子孫耕以奉祀焉典番舶中官死鎮守太監分其餘財遺三司先生力辭不得迺受而輸之庫陞河南按察司福建都指揮僉事武成以先生薦授閩職及先生行以屏帶銀器為贖

先生笑而却之曰我知君君何不知我邪成慙而退
河南大旱人民艱食舊制賑貸民至秋罷先生曰全
賑貸止于秋者以秋成可仰也今秋田無收賑貸可
已乎命郡縣如舊賑之至春熟乃止流民入境無食
者發粟為粥食之無衣者以庫藏帛給之所全活不
可勝計河南守薛昌鹿邑全胡宏杞縣令李文中皆
以貪暴病民而有強援它使者不敢問先生勸其罷
或徙或黜鈞州民趙甲飲于陳乙酒肆乘夜渡河溺
而死甲之子訟于官謂甲與乙聞乙殺而投諸河乙
以鍛鍊慘酷自誣服坐繫數年先生識之曰酒肆民
居櫛比使闕必有聞之者肆距河且十里負屍投之
必有見之者奈何以單辭成罪乎命有司驗甲屍腦
皮裏有沙石忤作定為溺屍遂破械出之都御史陽
城原公招額流民至河南引先生自助先是都御史
項公驪遂流民死者千餘及聞原公至皆逃匿先生
馳至山谷委曲諭之流民感泣願附籍者六萬餘戶
兩覲京師同觀者多重載以遺權貴先生假車以行
所載書籍朝服而已陞湖廣右政使剗襄大水漂溺

千餘家巡撫都御史劉公微先生賑之先生躬自撫
循發粟以贖其食而給錢使葺其居民咸安焉荆民
以徭役不均訟于臺劉公又微先生理之先生驗其
丁口登耗貲產厚薄列為九等以輕重授役焉民咸
稱便成化十七年冬十一月陞都察院右副都御史
巡撫山西兼督三關兵備時山西連歲旱飢米價騰
躍先生發倉粟三十萬減價糶之民賴以濟北鹵寇
邊先生伏兵灰溝營旬至與戰斬獲甚衆陞左副都
御史奏勅清理刑獄辨沉寃察隱惡咸當人心律重
情輕者具以聞多得未減召為刑部左侍郎屢辨
疑獄請託無所徇屬官畏其嚴莫敢恣睢者鹵苗小
王子寇大同殺邊將畿內驚駭紫荊居庸二關尤急
先生奉勅巡邊相險者築城堡簡精壯礪器械為戰
守備嘗獲鹵謀知小子王營在邊守者多老弱又請
選精兵間道出搗之會鹵設遁下果用山西大飢人
相食逃徙他境者什四五上命先生往賑之許便宜
行事先生請于朝發內帑并資淮益得銀數萬兩又
勸富室及僧道士得粟數十萬石選司府官分郡賑

濟死者爲叢塚塋之又僦民疏溝渠而賞以粟所活凡三十萬人招回復業者十四萬人播州宣慰使楊愛與其庶兄友不睦友奏愛脅僭淫暴等罪且云有異謀朝廷命先生即訊因愛以行命先生言楊氏據有播州六百餘年其民知有楊氏而已一旦見其酋長囚禁群夷驚疑恐至生他變乞審驗虛實重者監候輕者發遣上從之既而訊鞠具得其情友寔欲奪愛宣慰肆爲誣周先生具以上請且慮其兄弟相讐殺遷友它郡邊夷以安今上皇帝即位陞南京刑部尚書到任僅二月召爲北刑書先生在南都嘗言沿江蘆洲率爲中官據有訟者輒云買物進奉今陛下既罷貢獻乞以蘆洲給還軍民由是悟中官意暨刑部拒絕請託凡大小之獄一以法律從事或脅以禍福皆不顧錦衣衛官校出入逮捕但責駕帖到臺啓不與聞先生言舊制提取囚犯必給精微批所至此疏乃行則矯詐無所託駕帖不必此疏則有偽無由辨乞乃給批便又因京師大水恐内外刑獄有冤枉者乞選官審錄庶以弭災又言京師軍民習邊語服

商服此亦伊川被髮野祭之類也乞出榜禁約上皆從之兩以疾卧家上皆命醫診治又遣中使臨問賜以酒米肴蔬屢疏乞罷上不允然以執法不阿群少多不悅御史鄒魯等乘風誣奏先生不自辨但解印待罪且乞致仕既而有旨仍令先生掌印亦固辭及錦衣衛逮證佐鞠之知魯等所奏皆誣詞上乃命先生致仕賣宅即行抵家不接人事鄉人罕得見其面大理寺以鄉屠助及南京六科十三道累奏欲起先生權貴多忌之者竟不用宣慰楊愛聞先生致仕遺使致金銀爲壽并獻名梓可爲棺者先生拒不受或訊其近名先生曰吾道當如是也自初仕即自誓不營利不可權貴不以愛憎爲賞罰守其誓終身性剛介寡與歷官皆久而後還自以好學公退書聲琅然開戶外雖親事亦手一編不少置聞人有異書輒假錄之藏書三萬卷皆手自讐校所著有宋元史臆見周禮集註撤丘稿所編選有文苑群玉唐律群玉續編百將傳勳賢琬琰集皆藏於家

尚書黃公傳

明 李夢陽

尚書黃公者封邱人也名紱字用章其先洛人高祖克讓始徙封丘克讓生思豫思豫生秀秀生中中生黃公初高皇帝兵起思豫掌太常寺以罪編氓沅州已又軍平越衛於是平越沅州封邱洛皆有黃氏乃後有尚金陵死中收其貲尚重慶娶于張生公重慶於是重慶亦有黃公生之夜夢老人抱嬰兒曰送塞尚書為汝子長依舅氏張宗琦宗琦為麻城學職從如麻成歸如平越補衛學生正統丁卯以春秋中雲

南鄉試第五明年登進士第除行人陞南京刑部員外郎郎中出為四川參議參政進右使轉湖廣左使陞右副都御史巡撫延綏進南京戶部尚書政左都御史尚書仍舊黃公廉峻直執遇事臨發正色山立即重忤時貴弗恤智巧所避公毅然肩之人率竊笑其呆然亦以是獲名郎中時人業以硬黃目之矣部堂嘗缺官公署堂印諸察事之即猶堂官也亦才識超之之故譚千戶者大猾也善權顯貴人嘗奪民產場顯貴人無敢為民直者公直之竟歸之民為參議

督松茂諸倉兼備其兵釐革宿弊擒豪惡數百人舉勅將官各當邊類以寧參政如崇慶旋風擁輿不得行公曰汝寬氣邪姑散予園之至州齋沐禱夢翌日清其因無驗乃禱諸城隍夜果夢若有神言州西寺者寺去州四十里邊路而巢山公旦起率州官吏兵往諸寺園捕之有僧少而惡詰之無牒使酷至塗其額曉洗之則有巾痕乃鞠訊之遂盡暴其奸惡云寺後有巨塘凡投宿人則殺之沉塘中衆分其財有妻女則分其妻女又攢與李節陽王親也侵盜官糧巨萬數王為之密公按之悉如法公雖錢穀司然善摘發奸伏以是威行境中嘗道川東青神令望風解印綬走為右使秦開建昌銀礦許之大盜周主簿者哨衆抄掠撒公平之公謂盜起于煩苛宜少寬養而闢官以方貢橫飲公抗不從閹擠移近省陞左使時兩京工興徵銀二萬例派民公以庫積餘充又勢豪馬快船債萬生逼索又剝王秦徙墳塚公悉不從省費巨萬又計銅僧繼曉於是威惠大行繼曉之來也勢焰灼人公私謂諸公曰曉以妖術媚上遂與眠食共

之今避而反鄉名掃墓而實逃生耳乃今武昌府銅
之後堂陽尊禮之居無幾曉果敗檻送京斬之西市
公在蜀嘗忤閹臣萬安銜之三年六推威抑公知乃
亦連疏乞罷凡三上已乃有巡撫延綏之命首勅參
將郭鏞都指揮鄭印李鐸王琮葭州吏知州等又計
捕豪奸張綱乃于是拔才能察幽隱問疾苦飭廢墜
於是申疏令修器械嚴警邏節候望邊政為新公見
飲馬婦片布遮其下體乃悲以慚曰嗟乎士之貧至
此極乃驅之戰守耶于是令豫支米月三會詔毀菴
寺公使汰尼解軍門給配鰥士人人大懽悅無不願
為公死者及公去尼有攜子女拜送路傍者云公既
官六曹蓋無所顧忌威稜嚴然特旨改掌憲院天下
方仰望風采公自以歷侍五朝中外凡五十年懃直
崖異忤人獲名伏禍難測又盛滿宜戒乃引耳懇乞
骸骨居無何疾作竟不起年七十有一所為奏議及
政蹟并所著文詩悉棄不留晚嗜參同契疏精一道
人塘陽子有註本獨存國制文極於六曹尚書官之
北斗天造不論憂憂經綸惆悵太宗北征全國是屬

三揚公亮寅協熙績臺省坐臻太平君佚臣勞所謂
代天之相英廟之遇文達略似馬周吁俞一德審畫
顯斷萬幾積震局體一變成化問忠良外植三原河
州單縣封丘巍然章出居則岳屹動則雷擊大事芥
斯小細海畜惟懼倖幸請劾必強使見之者畏聞之
者懾斯其人死生富貴足動之哉然較之天順以前
則殊矣時與位不同邪委任權力殊耶宏治中華容
洪洞鈞陽靈寶陽曲盧氏金陵安福咸稱名鄉然志
存納約行在精審苟濟其事小枉安焉局體又變矣
雖形迹尚暴義遵矯直亦運數然歟自言路志仲毀
譽進黜氣酸滿盛公鄉欽避正德以來遂靡靡難觀
亦諸人甘寵飾譽稍有嘉美便立祠樹碑要歌微頌
鏤板鐫石惟恐不流今信後也此意既橫機巧自生
工言論務彌縫斯又一變然黃公為左都則嚴甄御
史量能委之火其差簿於庭曰事責得人耳資勞久
近豈立官者意哉當是時言官能毀之黜否邪斯為
政在人邪抑時不同邪公焚奏草自泯其嘉美視沒
沒流今而信後者又何如邪江潮食鹽錢鈔民苦包

攬捥勒呻吟公爲尚書力條其折微銀狀以聞至今行之便此其事比之汲汲流今信後者得與失不較然白哉公年二十六舉進士始室孫郎中鏞女也生子揖霖彬封宜人贈夫人繼室魯衛鎮撫宣姊生子杞拒封夫人益終其身無妾婢云彬工部司務拒光祿寺署正公卒之日皇帝驚悼遣祭勅有司營塋墓在長葛馬陵岡

太白山人傳

明 李夢陽

太白山人者吳越間故人也終吳越間莫知其所自來人問其姓名山人曰我孫姓一元名問其字曰我字太初問何以稱太白山人曰我秦人也嘗接太白之巔於是稱太白山人云於是人始知山人爲秦人而不知秦何人也山人善詩有招逸才嘗出秦四游浮湘漢躡衡廬踰河涉泗謁閭里登岱嶽之峰憩日觀日出焉奇之駭叫狂走人頗異之然弗識之也於是山人節南走吳會吳會人識山人又識山人詩於是爭禮敬山人山人同善說元虛又膚瑩渥頰飄飄望之如神仙中人於是愈敬禮山人而好異之士踵接於門矣山人往來越湖間多在支硎南屏山寺中鉅家則爭造寺饒山人美飲食鞋服以是饒裕冠佩之士慕名來訪山人輒供具懼洽竟日酒酣暢歌意態超脫令人起塵外之思人士或事功人說及時事山人則又善說時事率鑿鑿副名實於是人士轉相譽稱焉孫人聞四方矣一日山人病且革倉皇屬其友曰死葬我佳山幸題我墓曰明詩人孫一元之墓

已而山人甦起而憤曰幾負我志而吳越人以是現知山人初無羽化術徒空談放浪形骸稍稍疑避而山人則顧益說世務恒切甚不平其詩亦多為憤激悲壯之音於是用世之士顧益喜之樂與之交義投情合犯濤弄月扣舷和歌伉俪一笑每自許於世無雙西湖舉人施侃者雅喜山人而病其放因說之居山人然之於是買田苕溪之旁又說之婚則婚侃妻妹張氏喜山人者聞之則移書相慶曰太初為全人矣是時建業劉麟龍霓從居湖與吳亢陸崑暨山人結杜游號苕溪五隱山人始講吾儒性命之學無何病作竟死年三十七矣李夢陽曰吾不識孫山人何如人未之面也往劉子過夷門蓋數稱山人風神藻雅云曰與之游令人坐忘而山人亦時時寄來然予竟莫如其何人也

太傅王文恪公傳

明 王守仁

公諱鏊字濟之王氏其先自汴扈宋南渡諱八百者始居吳之洞庭山曾祖伯英祖惟道考光化知縣朝用皆贈光祿大夫柱國以傳無太子太傅戶部尚書武英殿大學士妣三代皆一品夫人公自幼穎悟不九十六隨父讀書太學太學諸生爭傳誦其文一時先達名流咸屈年行求為友侍郎葉文莊提學御史陳士賢咸有重望于時見而奇之曰天下士於是名聲動遠適成化甲午應天鄉試第一主司異其文曰蕪子瞻之流也錄其論策不易一字乙未會試復第一入奉庭對眾望翕然執政忌其文乃置一甲第三時論以為屈授翰林編修閉門力學避遠推勢若將浼焉九載陞侍講憲朝實錄成陞右諭德尋薦為行講學士兼日講官每進講至天理人欲之辯君子小人之用舍必反覆規諭務盡啟沃方奏上遊後苑左右諫不聽公講文王不敢盤于遊田上為罷遊講罷常召所幸中官李廣戒之曰今日講官所指殆為若等好為之時東宮將出閣大臣請選正人以端國本

首薦用公以本官兼諭德尋陞少詹事兼侍講學士
既而吏部閣侍郎又遂以為吏部時北酋入寇公上
籌邊八事雖忤權倖而卒多施行公輔之望日隆於
是災異內閣謝公引咎求退遂舉公以自代武宗在
亮閣內侍八人荒遊亂政臺諫交章中外洵洵公協
韓司徒率文武大臣伏閣以請上大驚怒有旨召公
等至左順門中官傳諭甚厲衆相視莫敢發言公曰
八人不去亂本不除天下何由而治論議侃侃韓亦
危言繼之中官語塞一時國論倚以為重然自是八
人者竟分布要路瑾入柄司禮而韓公遂逐內閣劉
謝二公亦去矣詔補內閣缺瑾意欲引冢宰焦衆議
推公瑾雖中忌而外難公論遂與焦俱入閣瑾方威
鉅士類按索微瑕輒枷械之幾死者累累公至言於
瑾曰士大夫可殺不可辱今既辱之又殺之吾尚何
顏於此由是類從寬釋瑾銜韓不已不欲置之無敢
言者又欲以他事中內閣劉謝二公前後力救之乃
皆得免大司馬華容劉公以瑾舊怨逮至京將坐以
激變土官岑氏罪死公曰岑氏未叛何名為激變子

劉得斌死或惡石淙揚公於瑾謂其築邊太費屢以
為言公曰揚有高才重望為國修邊乃可以功為罪
乎瑾議焚廢后吳氏之喪以斌迹公曰不可服可以
不成葬不可以苟景泰汪妃薨疑其禮公曰妃廢不
以罪且復其故號葬以妃祭以后皆從之當是時瑾
雄傾中外雖意不在公然見公開誠與言初亦見聽
及焦專事嬖阿議彌不協而瑾驕倖日甚毒流縉紳
公遇之不能得居常戚然瑾曰王先生居高位何自
苦乃爾耶公日求去瑾意愈沸衆虞禍且不則公曰
吾義當去止乃禍耳瑾使伺公無所得且聞交贊亦
絕乃笑曰過矣於是懇疏三上許之賜璽書乘傳歲
夫月未以歸時方危公之未去咸以為異數云公既
歸吳屏謝紛囂悠然山水之間究心理性尚友千古
至其與人清而不絕於俗和而不淆於時無貴賤以
長成敬慕悅服有所興起平生嗜欲澹然吳中士夫
所好尚環賞觀遊之具一無所入惟喜交辭翰墨之
事至是亦皆脫落雖會出之自然中年嘗作明理充
己二箴以進德砥行及充養既久晚益純明凡所著

述必有所發其論性善云欲知性之善乎蓋反而內
觀乎寂然不動之中而有至虛至靈者存焉湛兮其
非有也實兮其非無也不墮於中還不雜於聲臭當
是時也善且未形而惡有所謂惡者哉惡有所謂善
惡混者哉惡有所謂三品者哉性其猶鑒乎鑑者善
應而不留物來則應物去則空鑑何有焉性性虛也
惟靈也惡安從生其生於蔽乎氣質者性之所寓也
亦性之所由蔽也氣質異而性隨之譬之珠焉碌於
澄淵則朗碌於濁水則昏碌於污穢則穢澄淵上智
也濁水凡庶也污穢下愚也天地間膈塞充滿皆氣
也氣之靈皆性也人得氣以生而靈隨之譬之月在
天物各隨其分而受之江湖淮海此月也池沼此月
也溝渠此月也坑塹亦此月也豈必物物而授之心
者月之魄也性者月之光也情者光之發於物者也
其所論造後儒多未之及居閑十餘年海內士大夫交
章論薦不輟及今上即位始遣官優禮歲時存問將
復起公公已沒時嘉靖三年三月十一日壽七十五
矣贈太傅謚文恪祭葬有加禮四子延誥中書舍人

延素南京中軍都督府都事延陵郡學生延昭尚幼
皆彬彬世其家史臣曰世所謂完人若震澤先生王
公者非邪內裕倫常無俯仰之憾外際明良極祿位
聲光之顯自為童子至於耆耄自廟朝下逮間巷至
于偏隅或師其文學或慕其節行或仰其德恭隨所
見異其稱莫或有瑕疵之者所謂壽福康寧攸好德
而考終命公殆無愧爾矣無錫邵尚書國賢與公壻
徐學士子容皆文名冠一時其稱公之文規模昌黎
以及秦漢純而不流於弱奇而不涉于怪雄偉俊傑
體裁截然振起一代之衰得法于孟子論辯多古人
未發詩蕭散清逸有王岑風格書法清勁自成得晉
唐筆意天下皆以為知言陽明子曰王公所深造世
或未之能盡也然而言之亦難矣著其性善之說以
微見其樂使後世之求公者以是觀之

資政大夫南京都察院左都御史臨漳石公璞

傳

明 崔 銑

石璞字仲玉臨漳人初爲監察御史遷江西按察司副使接察使山西布政使璞剛直有治才所在著稱在江西時有民娶婦三日矣婿婦往拜其家婿先歸婦後失之適索不獲婦翁訟婿殺女婿不勝榜掠自誣服云素尸前塘中官使人求之果得尸獄成獨璞疑曰殺人而棄尸非深怨者不如是也彼初婚方燕好胡乃爾爾出因謂曰爾辭信乎因叩頭曰信連死

公之賜也屢問皆然璞計無出乃齋沐焚香祝曰此獄開網常萬一其婦與人私其夫既受污名又枉死於理安耶望天以夢覺我夜果夢人贈一麥字璞思曰兩人夾一人也獄有歸矣比明械囚首令符時行刑囚未出璞見一童子竊向門內窺璞令人召入曰爾羽客胡爲至此得非爾師令爾偵某因事乎童子大驚吐實果二道士素與婦通見匿之稿麥中江西人號曰斷鬼石在山西時議脩禿廟一夕大風拔木積廟前皆掠梁材後進工部尚書正統戊辰河決榮

陽經漕濮至陽穀入漕河潰沙灣東入海命璞治河決口塞明年己巳處州盜起命璞討之平景泰辛未也先寇獨石命璞兼大理寺卿往璞充餉勒兵修垣守險及康定帝賜璽書爾忠勤善謀素爲邊人信故命爾事平進太子太保改兵部尚書丙子湖廣苗叛民李珍魏元冲往爲用道之寇掠作議文湖湘訖言騰民用大擾又命璞往璞以計生得珍元冲檻送京師苗平還治郡事數年致仕天順庚辰英皇召大學士李賢謂曰石璞純臣也聞其尚健然貧爲我以璽書召來璞至京上召見文華殿璞服青袍繫角帶入上曰吾賜爾緋玉敝乎璞叩頭曰臣平生以孤忠養無結納今臣自分填溝壑矣臣自知亡他途必臣有罪當誅謹耳上說是時璞微贖乃命掌南京都察院事成化初致仕歸五年卒後渠子曰銑正德初奉旨充孝皇實錄參對官見國史載石公功令求諸其家亡有也長老道公數事載之足見其素槩石公在山西其夫人與諸僚妻燕歸慍曰彼多金珠綺采吾布褐襤其不稱布政妻也石公曰爾何坐曰席首曰使

吾墨於憲汝安得居此坐且我素不以妻子故宦彼金珠綺采者後欲居汝席得乎明年其夫果有以墨敗者石公自司馬歸彰德無冗第假太僕行署居後竟不能治第有司令其家納金以行署長歸以予少聞城西孫平村高平渠南有石尚書別業已卯春始過焉傍坼作屋二楹痺甚且閣屋左茅舍垣內僅一畝予訊其老僕屋即公居蓋毛則易之屢矣分歸買田僅百畝其孫貧四十畝售朱氏安陽某自典史歸石公許往其家盛治具几上陳銀匱前列金杯十餘公見之問曰爾宦幾年曰未一考也曰胡歸乎曰刁民誑我貪奪職石公曰使吾治爾爾焉能還鄉里哉拂衣出

吳尚書傳

明 崔 銑

吳廷舉字獻臣嘉魚人洪武中其祖戍梧州遂隸戎籍成化癸卯年十九舉于鄉丁未舉進士授廣東順德知縣潔己如水字民如子減賦息訟乃刻家禮實行之都御史屠浦檄吳公至督府與之言甚溫吳公曰廷舉越境奔命宜有地方重事請發令順德權鰭屠為修家廟吳公曰守土官非奉舊例新恩一夫不敢役分金不敢用遂辭出屠令他邑成之市舶太監給銀買鵞吳公即用之買二疋曰奉此為式如不中意請還金且為雷產也太監怒取金去御史汪宗器惡吳公曰彼專抗上官市已能何也吳公壞淫祠汰觀寺以其材作土垠書院賢館及修學宮御史會而按其直竹木碎屑俱列斤兩鄉大夫二子犯盜並論死吳公生其少子標其戶曰盜後少子政行乃泣懇曰公念先人廉直故存後今盜其門大為先人辱請就死吳公為撤之御史即捕盜令自首賂知縣乃毀門表不即理前事盜曰盜死分也不敢誣廉令加以嚴刑不場口是時吳公因服梏于日詣訟所分析所

費無私盜狀上御史大慚令釋吳公宏治丙辰屠入
為吏部尚書遷吳公成都同知一年以憂回起改松
江上疏請修軍政二事廣東盜起馬端肅劉忠宣薦
陞兵備僉事征十三村池水盜平之改兼鹽法正德
己巳也遂瑾方用事天下鎮守恣橫吳公劾太監滿
忠二十罪又奏有旨取省帑解京皆非正費曰貢進
內也曰司禮打點錢賂劉瑾也又疏便宜事忠亦列
上吳公眾鞠之無狀止以枉道回械首吏部前主事
宿建輩謀謀之天官張綬取閱其諸藁心賞其能言

於瑾凡械首十二日放鴈門克軍再月赦瑾亦誅晉
雲南副使江西參政討桃源賊用兵已歷年總制臣
數易官顧其私兵不協力費以萬計吳公雅多智畧
勇不避難及逢盤錯益喜哉決前已數用勝兵茲則
設奇取捷不用甲冑出入輕脫諭責解散反為賊得
奉之入巢周衛耀威叔公求撫吳公如前責諭詞色
亡撓久之伺得賊中要領因用其巨力而謹微輕者
許以利令其僕妻賊女遂執其酋公亦出一鼓平之
晉廣東右叅政立番舶進貢交易之法平驛通之役

弊更患除矣嶺西猺獞作亂命兼兵備副使經畧湖
南饑吳公以副都御史賑濟辰州土官相讐公立約
便平又疏六事陰備寧濠之變當道不用濠反君子
曰用吳公曲突之謀無患矣濠嘗遣使遺天官陸完
金簡曰宜急易孫燧代之者某俱可吳廷舉切勿
令其來濠賊邏者獲之今上召為兵部右侍郎上疏
犯輔臣改南工部又改南戶部晉右都御史理南畿
折豪強植貪弱禁私驛止妄工吳公長身而瘠面如
削瓜敝衣帶穿不修藻飾神采英毅志誠雄偉言行

必自信人鮮能奪之視財利如糞土妻子冒饑寒而
施予不較有無晉南工部尚書即書歸歸二年卒所
居湫隘門巷不容鷄飛無郭外田邱墓之寄十餘畝
卒之日無衣以飲無棺以殯都御史姚鏐為營辦靖
州土官持金來謝德却不受及是各來弔哭平生為
友誼見良士身下之忘其人已在大學南城羅玘四
十餘以貲貢吳公悅其父奇兄事之景鳴病痢一僕
瘞而死吳公為煮粥負之登廁一晝夜十數反景鳴
病瘞同登進士語人曰玘四十前生我者父母四十

後獻臣生我也在順德同年鄒智疏柄臣奸邪為所
陷謫石城吏司死吳公資之歸其喪于蜀倖成都梓
其遺文順德生員梁景行五而文吳公與之友宗烈
棄晉江令還壺山吳公數薦于朝嘉靖初起為鎮江
同知大學士揚一清再附重人入閣其族子留者千
官府害理人宗烈獨治之鞭其奴改王府長史請於
王至蒼梧視葬已宗烈亦卒嘉魚李承箕世鄉不仕
善為古文布衣李孔修子長苦攻詩皆所厚善忠宣
公在廣左轄吳公在令至省忠宣館之省衙尺書稱
大夏頓首吳公好讀書無不窺索積至萬卷好薛文
清及胡敬齋錄采其要言作詩效陳白沙覽者見其
志簡牘情理精切規人所不及無諛詞套草煩悉剴
當俱未編次為集卒時年六十有六論曰銳平生頗
識當世賢士大夫如吳公真才潔履厚行定力鮮儼
也銳嘗謂之曰許友死未知公然否此外公優為之
嗟呼吳公衣食人廣惠矣妻子不能延朝夕服政四
十年百瘁九死皆歷之不能一月安于朝推下賢哲
不憚屈己其卒未聞報德者孟子曰命也

姚善傳

明史鑑

姚善湖廣安陸州人也字克一建文初知蕪州府蕪
州承元季侈汰之後豪右田宅輿服多踰檢高皇帝
制法整齊之誅夷狼籍詳者用是持其長短巧詐蜂
起疏為難治善明達治體周知人情嚴而不刻容而
不弛執而不泥簡而不遺煩而不苛又數請謁郡中
名士錢芹王賓韓奕等訪問吏治得失民生休戚俗
化淳漓以同革之由是吏民皆顧尚廉耻好善趨義
不復為非小大樂茶化為善俗郡中大治號為天下
第一片初聞善命謂使者曰明公郡將也芹誠以得
見為幸然畏禮而不敢往也明公苟宏下士之風請
伺月朔詣學宮時為停須吏芹將走見也使者返命
善許之至期先一日芹沐浴更衣適學宮夕焉坐以
待旦須善至見之善嘗使吏餉芹祿米而吏誤送俞
貞木家貞木往見善曰竊聞錢芹絕糧久矣明公此
舉當以婦之貞木自揆不得濫受此賜敢辭善知吏
誤遽曰鄉誠欲餽錢先生將因君為紹介耶以藉手
耳君毋庸辭錢先生引有餽也賓家在陋巷無妻子

奴僕獨與母居善每候見賓輒舍輿屏徒從步趨至門以指扣門者三賓問曰何人則對曰姚善及賓往報謁輒于府門外投刺再拜而退善及知自追延賓賓辭曰非公事實不敢入也突隱于壑間善將來見之乃避于上方山善追至上方夾又泛小舟入太湖矣善歎曰韓先生所謂名可得而聞身不可得而見也後數同賓往請乃得見文皇帝稱兵南伐索太常卿黃子澄等甚急南朝乃匿子澄善所北兵日深善起兵拒之詔以善為督蕪州松江嘉興常州鎮江五

郡軍馬未及戰為庾下許千戶等所縛并縛子澄獻于文帝皆周之義九族後有沈魯者以詩吊之曰倉卒勤王五郡兵南風無力北風鳴清忠自托巴湖月穢史何曾說果卿聞者悲焉同時有王觀者池州人也洪武初以許觀中庭試第一後改王觀建文中知安慶府加侍中師勸王兵屯江上文帝渡江知事已去觀乃衣紅袍自沉于江死之文帝即位詔族其家以觀妻配象奴行至大中橋觀妻止橋上探懷中鈔授象奴給云買餅餌餉所抱幼女伺象奴去急抱女

溺橋下水中又有周是修者泰和人也為衛府紀善與纂修翰林文帝入南京日是修入應天府學文廟中自縊死是日有中書舍人聶同文因走迎新天子天熱走急死途中同文臨川人子大年以詩名

贈太傅謚文康梁公儲傳 明 霍 韜

公立朝四十年多有掩蔽無所誇其功故人不得知聞謗不辨謗言日積居之恬然德德於人不責報人賴公德以自庇覆反操戈向公公亦不較海內後進不面公徒聞謗公云云亦相附和毀公故世罕知公者正德間秦王請陝之邊境蓋其封壤內交嬖臣江彬朱寧宦者張銳皆有賂焉之祈武皇帝詔與之兵曹臣奏曰太祖皇帝有令禁茲土不得畀藩封武皇帝曰與之兵科臣執奏曰茲土遂畀秦藩恃太祖皇帝制武皇帝曰業已與之六科十三道諫臣各執奏曰秦王請蓋封壤不可聽許武皇帝曰朕念親親與之勿距大學士楊公當草制念曰若遂草制畀地秦藩恐貽後虞執不草制則忤帝怒辱不可測遂引疾不視事大學士蔣公亦繼引疾公曰如皆引疾孰與事君武皇帝震怒內臣督促草制公承命草上制曰昔太祖皇帝著令曰此土不畀藩封非吝也念此土廣且饒藩封得之多畜士馬饒富而驕奸人誘為不軌不利宗社今王請祈懇焉朕念親親其畀地于王

王得地宜益謹毋收聚奸人毋多畜士馬毋聽狂人勸為不軌震及邊方危我社稷是時雖欲保全親親不可得已王慎之母忽武皇帝覽制駭曰若是其可虞其勿與回天之力決於數詞然公未嘗自以為功也正德己卯武皇帝躬巡邊羣臣諫曰萬乘不宜輕出乃自稱威武大將軍巡邊云詔宰臣草威武大將軍勅大學士楊廷和引疾不草勅大學士蔣冕亦引疾武皇帝御左順門召大學士梁儲面促草勅儲奏曰勅不嚴草帝曰何迷命對曰凡事可將順獨勅不可草帝曰何不可對曰陛下為君乃自卑而臣臣草勅是臣名君故不可帝震怒手飯立曰不草勅齒此飯儲免冠解衣帝伏地涕泣曰臣有罪今日就死也日陛下猶憫臣若遂草勅他日陛下覺而怒曰臣儲無禮以臣名君顯戮臣臣罪死不可赦武皇帝察其誠款擲飯起不促草勅君子曰儲固誠能悟主然帝之仁明殆亦不可誣也已己卯宸濠反武皇帝議親師羣臣諍曰不可大學士楊廷和梁儲蔣冕亦曰不可武皇帝曰朕親視師廷和儲冕議居從曰如皆從蹕

孰與守如皆守孰與圖上之危艱乃議揚公居守曰社稷是保梁公蔣公從是時也三公蓋聯股肱而共成一人之身矣武皇帝視師南都議幸蕪淞荆豫云又議南都郊大學士儲晃奏曰南都郊仁祖皇帝配天北都郊太祖皇帝太宗皇帝配天若遂南都郊配位不知所裁定武皇帝乃不郊又將南幸儲晃手奏行在門外請母南幸自卯至酉汗浹背武皇帝遣內臣諭起對曰臣未奉俞旨不敢起武皇帝乃俞曰不南幸儲晃乃起君子曰江南不擾二公之力也宸濠未反時多內交士夫凡所餽皆有記藉濠誅後閱餽籍惟厚齋梁公晉溪王公無受餽世人猶多指此疵二公皆不察之過也厚齋自入仕至歸老負郭不增寸土廣郡沈同知尚經曰順德南海番禺梁厚翁田無百畝所有者香山浮坦從化賊巢不食之士耳平日於人之餽未嘗却隨計其直酬之歸老日家無餘財嘗見一匠人何云公歸間日議建祠安祀其先計工匠之直曰需八金匠何六往曰未有以給也盡少需尋不能營給嗣竟不克建公在位日乃王御史秦

請典刑公田給事中賦請沒公之貲代天下輸租之半劉瑾焉詔抄公之家公在南京報聞皆不動也上御極言官連䟽劾公假宸濠衛兵故縱反者請置詔獄正其罪公不辨惟曰余只致仕去已勿論宸濠衛兵事由也劾者猶不已久之知與宸濠衛兵非公也實石齋揚公當制正德九年三月十五日也舊例凡閣下當制擬旨人親署銜著筆跡故不得誣移之他公惟引罪連三䟽乞致其仕無片言自辯公去位後大臣被劾無不辯者然後知公之大

坦上翁傳

明 李 默

坦翁年八十餘常披褐扁舟往來太湖間湖中人不識也入城即輒繫舟峴山隱處郡大吏造請不能得予自浙左轄被召遇湖物色適之則前司空劉公麟也社中諸君故彰之南坦不知輒呼爲坦上翁云翁字元瑞本安仁人先世以武功起家累調南京廣洋衛副千總世數德誼至公始以經術舉應天登宏治丙辰進士是時外戚張氏貴幸頗驕橫亂法臺諫繫之逮治甚急翁與同年歸安陸崑抗章申救敬皇爲之霽威事稍解繼除刑部主司進員外郎以才選錄畿內囚所疏雪冤痛無慮數百人老吏謝弗及轉郎中擢守紹興漢劉寵故處也在郡精核廉敏甫五十日郡政大和逆瑾卹翁去守不修謁猶掇郎中時瓊細廢爲郡人編氓爭致贖公曰勞苦諸君吾治不逮前劉散蒙一錢惠邪既去越人肖翁像爲小劉祠語在太宗伯王公華記中時與吳琬施侃龍寬及陸昆定交因徙居於湖山人孫太初亦以羈旅入杜湖中風雅稱中興焉瑾誅起知西安遭內艱去郡其得泰

人心與卻賻贈無異越時服闋遷陝西參政屬閩內饑餉數入朝遺貴臣督兵將厚賦軍興諸司持異莫敢翁曰靖邊以爲民也饑年加賦內難獨不可卹邪使者色沮會有起閩陳訴者命與參政共圖其便議遂寢翁亦嚴覈侵漁括逋負邊儲竟以不之餘年擢雲南案察使謝病歸嘉靖更化起爲太僕寺卿擢副都御史巡撫北畿復引疾章三四上始得請時論方高公才節再起爲大理卿陞刑簿右侍郎陞工部尚書水衡泉貨之府高潔士頗避之翁咨曰吏部選才廉充曹任仍請築外幣刷四司之財貯之特銓主事一人與臺臣同典出納上嘉翁意賜庫名曰節慎自是財無汜出更有廉名寔自翁始凡工部上供率閱內府所見微輒消典式不受覆覈翁條上最甚者十二事得旨裁之中貴人用是切齒會上遣近璫督造龍袍於蘓松公謂尚衣自有常供請停便上以爲忤勒令解職久之猶以顯陵工部處奪官追前過也翁既飲德嘉遜益遠世紛里中不復知有鉅公其於文能以冲泊雅淡之詞發現瑋奇崛之氣幻渺之音穠纖

之色皆真與神會書法宗義獻以還尺牘片簡人爭
實之至與人談詭往往出微辭疎妙趣雖家孺俚生
咸樂自近云早奉元理兼達天命嘗請浚川王公廷
相預作墓銘今聰明色澤彌老不衰其天全也惟不
貪生故能長生信矣心慕樓居無力築作友人文內
翰徵明為寫層樓圖遺之嘗懸置北壁下命之曰神
樓賓至則陳法書名墨以為娛叩以時事即不答公
卿臺僚騰章交薦公不知也性素清約疏布自喜獨
事繼母及遇異母弟鳳尤獨恩禮先人田廬悉以委
之其不以豐約累志如此初翁僦居溧陽予嘗遣門
人候之翁引至卧內見四壁惟掛書數束他無長物
又二十年賜予于峴山逸老堂了無宿具臨以乳羊
博市沽風雨蕭蕭欣然達旦惟其真也默所觀古今
人好名檢者或缺略富文藻者或寡風節康之寔難
若翁者所謂文質彬彬非歟

五忠傳

明 鄭 曉

雲庵和尚名暨不知其姓靖難初方黃之獄殺幾萬
人即下殺謫戍窮邊不死於道死於邊者又幾萬人
當是時和尚壯年始慟哭落髮為僧西南走重慶重
慶大竹善慶里山水奇絕可廬和尚又走善慶里里
壩中有隱士杜景賢知和尚非常人與之遊往來白
虎諸山山旁有松栢灘灘水清駛林篁森蔚和尚欲
寺焉景賢豪有力亟為之寺寺成和尚率其徒數人
入居之所夕誦經山中人不知書謂且誦佛經乃不
知其誦易乾卦也景賢曰和尚相釋而誦儒不可可
亟誦佛經景賢意和尚不宜誦儒書恐有踪跡然又
不肯顯言言恐和尚走去以故婉解之乃和尚亦知
景賢意遂棄儒經不誦誦觀音經寺因名觀音云和
尚好觀楚詞時時買楚詞袖之登小舟急棹灘中流
朗讀一葉輒投一葉於水投已輒哭哭已又讀讀終
卷乃已衆莫測其云何景賢固知之然亦不問和尚
和尚好酒不戒酒日注酒一壺俟客客至輒飲客不至
拉樵牧豎入飲飲半酡呼兒童歌曰我歌爾和歌竟

慎焉而寐和尚頌形秀無指柔白剪剪落筆成章詞
不甚功密然意氣渙發又能感愴人曰和尚當建
文壬午為御史不數月帝遜位和尚同起跡以死死
之日其徒問曰師即死宜銘何許人和尚張目曰松
楊問其姓名下答和尚有詩若干篇今且百四十餘
年尚未敢顯行于世

河西傭不知何許人建文四年夏六月成祖入京即
帝位傭被葛衣走是冬至金城行乞京中金城邊地
極寒傭常衣葛衣明年過河西依莊浪豪魯家為傭

傭亦取值稍聚錢買羊裘披之雖寒必覆故葛衣葛
破縷縷竟不肯脫故葛衣或曰破衣曷不肯棄直問
問不答傭錢稍有餘走市買牛肉酒與諸乞兒食飲
傭力作倦時時自吟哦或夜聞其哭泣声永樂中有
留都官從來總兵至莊浪者識傭欲與語走南山中
避旬月留都官去乃還有問留都官傭何人者留都
官亦不答在莊浪數年病且死呼主人謝囑曰我死
勿殮我棺幸西北風大起大無埋我骨魯家從其言
川中補鍋匠亦不知何許人往來夔慶間為補鍋

每至州邑不過三日即去去或後來夔慶人有欲學
補鍋者即教之補鍋不索謝錢直令負擔從有後曹
學者至即遣先學者云如是數年夔慶間人識之皆
稱為老鍋匠補鍋或與錢布米不擇當食與之食即
不復索錢錢稍聚囊中遇風雨寒暑不出補鍋即
出錢買酒飯自食飲常寄宿蕭寺中忽夔州市中有
馮翁者遇之相顧愕然已而相持哭哭已相牽入山
岩中生語竟日學補鍋者屏不得聞二人語語已又
相持哭且別去言今永訣不可復相見已竟莫知其

所終蜀中峨眉亭常有建文遺臣題詩云一箇忠臣
九族殃全身遠害亦天常夷齊死後君臣薄力為君
為回首陽

馮翁亦不知何許人在夔州以章句教童子給衣食
能為對句及古詩詩輒自題馬二子或馬公或塞馬
先生嘗作詩大書壁間比見補鍋匠歸即剗去詩曰
夜夢何奇特龍飛天漢津朝橫滄海曲夕過滇池濱
光采皆五色蜿蜒無損鱗淵田變間張主籍高旻時
蓋永樂甲申乙酉間未幾辭主人去莫知所終

東湖樵夫居浙東臨海東湖上日負柴入市口不貳
價建文壬午文皇即位詔至臨海湖上人相率走縣
聽詔或歸與樵夫曰新皇帝登極矣樵夫驚曰皇帝
安在或曰火燒宮走矣樵夫慟哭遂投湖中死竟不
知姓名

論曰余聞之陶徵士齊二客魯兩生史並失其名操
行之難而姓名翳然撫卷長嘆不能已已余獨幸雪
庵輩忍垢茹荼卒晦其名以下滅其族也悲哉

都御史韓公宜可傳

明 雷 禮

韓宜可字伯時浙江紹興府會稽縣籍山陰縣人元
正間行御史臺辟為幕祿毅然拒之太祖初郡縣
以歲貢薦授山陰縣學教諭尋轉楚府錄事洪武十
年拜監察御史持風紀下避權勢九年左右御史陳
寧胡惟庸中丞冷節侍坐上從容燕語宜可直前長
跪出懷中彈文劾陳寧胡惟庸冷節險惡如忠奸佞
似直恃功怙寵內懷反側擢置臺端擅作威福乞將
三人斬首以謝天下太祖怒曰三人事朕盡賊豈有
反側之心快口御史非陷大臣者錦衣衛監問尋釋
之為江西按察司僉事時官吏有罪笞以上悉乞鳳
陽毋慮為數即上疏論刑以禁淫惡一民執合論其
情之重輕事之公私罪之大小而施舍之今官吏有
罪不問公私而悉乞鳳陽小人之幸君子殆矣乞分
其公私以合輿情上可之命定于律即今律所載者
十三年歸朝京上賜沒官男女散入諸司為奴婢宜
可不受且以為非聖人政即上疏極論罪人不挈古
之制也有事隨坐法之濫也官吏有罪厥辟勿宥國

之典也罰其妻子何居况男女人之大倫婚姻踰時尚傷和氣合門連坐豈聖明所宜此必有以夫榮妻子享其樂夫既犯典章富隨坐以重其罰進說者豈盛德之事聖人仁政之所宜行哉乞除之天下幸甚上曰汝言是著爲令後坐事將辟上御謹身殿鞠之時天朗氣清忽雷火遙殿上驚而言曰得非枉此人耶雷乃息宜可獲免封二十餘事皆報可未幾以例罷歸十九年行取到京命撰祭鍾山大江文諭日本征烏魯詔作充舜禹湯傳言論皆稱旨特除山西右布政使二十一年以事安置安南二十三年以翰林院檢討陳性善薦其德行文學再起爲雲南參政尋陞都察院左副都御史在臺以鋤奸顯忠爲已任百寮悚惕不敢犯未幾卒于官時大星墜地檻馬皆驚人以爲應宜可云

明瑞敏傳

明雷禮

少保明公諱世寧字永清別號靜庵杭仁和人也家舊吳棄貨產不營慨然思經濟天下弱冠補昌化學生受知吳提學伯通有靈芝孤鳳之褒宏治五年舉鄉試第二故事計偕者給路費百金公以浙青竟辭其半明年第進士歸例得枋其門耻閱謁鎮守中貴人棄之去初除德安推官時岐府開國百需蜩集群從怙勢橫甚悉以法裁之且諷王曰此朝廷法即殿下家法果何敢不守此朝廷民即殿下千百人立國根本果何敢不恤王由是賊下無敢作奸者及請民間開墾湖田充柴炭巡撫葉與之公指畫利害娓娓乃止在郡屢平抑獄民以不冤其除苛賦清里甲諸條盡俱可爲經久之法陞南京刑部主事歷員外郎郎中帝城多威富能說是非成敗人公憫憫然不報挽西寧侯家訟久滯更九司十三道不決公一鞠即得其情案遂判顧金箔者富翁也被羅織致大辟顧公雪白每過門必稽顙而去機戶顧謙乾沒官銀累萬祈辭罪於公不能干逆瑾愬下南道阿奉者疏出

之幼公為枉牘後上直公擬抵出者罪其情文比制率類此兩應詔求言疏邊務十事并條動學問慎輔葉廣延納重守令公用人汰冗費俱探核本原鑒如也然其強果允屬人固以是賢之而亦多詆忌積三考出知廣西太平郡陋甚所錄率土官習不庭參至則推心群夷絕餽獻或他出過其營卑騎入坐帳中縱閱騎射乃還子弟應保襲者輒為任之夷僚帖然孚格於是思明黃文昌羅陽黃景明若盈李萬榮全若許榮高華皆素桀驁一呼即匍匐皆下惟太平知州李瑄負固跳踉不已乃密檄龍英州趙元瑾扼而執之積禍頓息又建置壺關限隔北寇屹然為一方巨防至今賴之未幾以母喪解官民惻惻然不忍失正德七年服闋補寶慶初往武岡朝珉王聞珉府受詞繫人取其財下諭里老奉有令旨必并其人送府驗實啟行為者弗貸以政府人相戒毋犯後王索民校急公曰先王初封校尉通食沙衛永賈四府今校回寶慶一府他日子孫分封繁衍其可支乎王曰御史奏得旨矣公曰御史奏錯知府當奏改耳王器其

直無恨意巨鎬偕鎮守王潤以事至郡岳吻于民難餐公折以法潤歛手其從人以左道寓郡輒報之悉射平民者又執之潤街公最深而猶稱公好官云其郡屬糧則繁漫奸不可詰乃額田均糧一色徵之民省歲供之半閩境盡驪曰明父活我矣踰年陞江西按察司副使兵備東鄉嚴谷架阻群盜鼠穴其間日肆抄掠為饒信患公遇盤錯益喜截決怙亂如樂庾二陳邦四等悉設計擒賊之其革心如王養一者至為奏原其死既而遷縣授城經武療饑民安然安矣公嘗調征桃源擒賊巢調征毛方援吳廷舉調征建昌衛益府皆冒矢石為士卒先又城廣昌城南豐城新城迄今不被寇其功竟為督府所銜不叙會宸濠有反狀人莫敢言獨瘋憂上疏曰江西之禍不止盜賊可慮者事王自得衛兵威誅日橫騷擾閭閻鈐束官吏禮樂政令漸不出自朝廷臣請教王自治其國勿撓有司以防未然君子曰用胡公曲笑之謀無患矣而當事者泄泄漫下其章濠恚恨甚賄用事者計欲殺公講飛言誣為離間親親逮捕之公已遂徧建

按察使歸省濠族其黨巡御史潘鵬發卒襲公公
間行自投禁獄被掠服無狀後行江西會勘欲別附
他罪於是給舍御史交訟其免不已用事者迫人言
得減死論謫戍遼東十四年六月濠舉兵反都御史
王守仁倡義兵俘濠廷議是役也惟王公達權戡亂
亦惟明公先幾代謀故驚形潛匿以致於殲滅若斯
之速也特起戍中為湖廣按察使尋晉右僉都御史
巡撫四川今上更化以忠直受知益展盡底蘊無隱
首動上取大學衍義一書朝夕省覽以光聖德及言
內擒江彬外擒宸濠均當論功昔附宸濠今附江彬
均當論罪武臣如指揮牟斌執法受罪內臣如周儀
守正殺身宜一體褒錄以示公平無不諫切當上心
者松潘內外熟番舊為蜀藩衛後漸背叛上存東南
二路通救援緣守臣弛備南路亦塞乃疏安撫方畧
在用人才添兵將吏賞罰足財用事下兵部議行之
亡部龐氏者自其祖父請分設長官司近者兵備官
議不可許又疏龐氏裂地設官雖稱衛使實為筠連
等縣扼賊喉襟從之便梏曹不用今龐壽襲職竟為

龐政所殺人始服其讖嘉靖元年晉吏部右侍郎未
任升父喪三年詔議禮皇帝尊號廷臣諍論多被扑
除名蜀江淮荐饑公免喪家居具孝親保民一疏乞
定追崇大禮肆赦群臣小過使各陳救荒弭亂之策
以成今日急務又言新進議禮一言適合未必事事
之皆是老成執禮一言過當未必事事之皆非聖明
惟天地日月三無私心照臨於上可也凡數千言不
果上既言者欲遷蹟陵于燕山極論遷葬利害乞嚴
絕檢士君臣協恭惟任賢保民為務并前疏並進上
嘉納之四年起兵部左侍郎公前謫遼東熟知京東
一帶利病進備邊二十五事復憂時事獻三經講議
引大學泰誓好惡之章以戒媚嫉尚書惟辟作福之
章以重威柄易大傳不出戶庭之章以慎幾微辭多
中群忌皆留中大禮成與加俸辭以在廷議禮臣時
在家欲枉言治道於後故僭言大禮於前况屬論定
之餘不敢冒領又進知人官人二十事會言者劾公
啟告密之漸遂力求退改南京吏部左侍郎六年晉
南京工部尚書甫二月以左都御史微道改刑部尚

書尋用唐事霍韜言加太子少保仍左都御史掌院
事公入持大體申明職掌上疏勸上務執中之學遇
事當喜怒者則又臨時省察其中節與否而後發至
論聽言用人詞嚴義正聞者壯之執政請禁私謁公
言臣官以察為名人非接其貌聽其言無以察其心
邪正才之短長若屏絕士夫徒按考語則毀譽失真
而求激揚之當難矣上是其言不禁坐臺閱月執政
計改公刑部尚書公實安之於中外諸司結要必究
情比法於理不可執議懇惻弗但已太監則聰與運
舟爭道有與援誣官兵攘其織造資貲幾二千人抗
疏不宜廣追驚遠近得從寬決至秋脫事敗仗罪而
公言蓋信陳九疇者故以兵備巡撫有事并肅而敗
土魯番兵于時總制西事尚書彭澤秉政則大學士
楊廷和也土魯番據哈密城劫忠順王印以要市中
國縱反間傾九疇當事者有憾於楊彭二公欲乘九
疇事連坐之噉檢人王邦奇聶能遷陳哈密淪陷番
達入寇釁起九疇於是下九疇獄擬大辟公昌言于
朝曰使世寧司刑而殺一忠臣寧先殺世寧執政持

不可乃密疏為彭陳申理上矍然大悟曰豈我巡撫
都御史殺來償同子命耶九疇得不死成邊揚彭亦
免于逮七年春有司奏黃河清并露降方告謝齊宿
忽風霾異常公求黜應變不聽則上勤學恤民任官
十事俱報可八年轉兵部尚書加太子太保公辭言
井肅之危可慮川蜀之危無慮中原兵將錢穀可備
可慮臣才性不堪再辭不允則陳列兵政曰定武畧
崇憲職重將權增武備更賞罰御士夷足邊儲絕弊
源正謬誤惜人才九十條詔許蒞部次第舉之始拜
命大臣建議銷兵如潞城之賊留不欲討討者必治
其罪公援古權今力辨其非議遂寢職方左郎中數
通邊將寵賂無厭且蔑視三司馬公疏劾去而風弊
大奸整刷十五既芒部沙保一支遂官却印攻圍畢
節議者欲革流官復隴氏之後公言壽政讐殺二十
年今隴勝或沐壽子而驟復其土官是階禍也莫若
降勅諭川貴各土官賜之定命其芒部原設四長官
司能守土安民即不復立府如願立府土流惟彼所
欲有一人作亂者三人共滅分其地疏上忤執政意

中沮之會上魯番大將牙木蘭率衆來降而土魯番誘瓦剌入寇索其羈使且求開貢公言番夷變詐非由起釁今圖復哈密無益而歲受土魯番之挾我為奸利則宜有覺而速改之且陳轉危為安之策甚悉喜功者有所軒輊不盡用其策公又疏請增武備足遏備薦馬吳陳九疇施儒揚必進堪統軍旅上為起吳將用之他亦付所司議行矣桂家宰等詆公侵官格不用公遂引疾求去且以任人圖治之要為上極言之然多違衆求去益力疏三上乃許致仕優賜輿人月廩未幾再起南京兵部尚書奏贊機務遂稱疾篤猶力贊上圖廣嗣育容受直言愛惜人才九年以疾卒壽六十三贈少保謚端敏公宏才遠慮深識天下之務遇事斤斤執典不以禍患休沮雖獨立寡諧周旋卿佐不滿三暮而神采英銳必欲贊匡至理不苟且以寄官寵至於清約自守常如寒士而恤宗人之孤獨與人之舊德當酬及鄉先進之裔有流落者雖傾貲賙之不吝豈沒而可祭於社者耶平生所著有大學衍義補膚見二卷春秋志疑八卷讀易私

記四卷奏議存稿若干卷滄州退兵事略一卷德安太平實慶雜稿共三卷姚源建昌征案東鄉撫案共一十卷詩文二卷目錄年譜若干卷論曰士以直道事人顧不難哉以胡公之忠鯁稽古展藴期而勵焉將若何而極也然自其為推官挺挺特立而擠之散即既以是蹶及為郎強果以徇其職而再擠之惡郡則又蹶至逆濠魚然于時在位者悚息避禍矣而公獨首犯之豈其情於保哲者哉既天悔既起躋路九死之餘而充言蹇蹇迄不以挫撓非聖明灼知倚任於上而能顯其聲施若此其卓卓難矣傳曰國有道不變塞焉強哉矯公真其人哉彼揚己取名瞭然使戶曉者蓋胡公之細耶

李崧峒先生傳

明表

李公諱夢陽字獻吉陝西慶陽人也母夢日墮懷中寤而生公故名年十八舉鄉試第一明年宏治舉進士丁內外艱戊午授戶部主事倡爲古文辭以變衰陋斷自秦漢而止六代以下弗論也已丑進員外郎外戚壽寧侯張氏怙寵驕縱開張皇店奪民莊田聲焰薰灼莫敢問公獨上疏論語侵中宮昭聖大怒孝廟不得已下公錦衣衛獄拷掠詰責辭氣無所撓孝廟生文華殿召見大學士劉公健李公東陽謝公遷

問李夢陽宜如何劉公叩頭對曰夢陽狂直不足深罪孝廟色變李不敢對叩頭叩頭而已謝公從容對曰李夢陽雖狂然其心無他竇欲効忠於陛下孝廟曰謝先生言是有旨夢陽復職一日孝廟獨召見兵部尚書劉公大夏問曰日來外間事何如劉公對曰近釋李夢陽中外歡呼聖德如天地之大孝廟曰初下夢陽獄中中人皆勸朕杖之其意竇欲殺夢陽以快宮中之怒使朕負殺直臣名其不忠如此朕故釋之劉公曰陛下此事即堯舜之心也正德改元丙寅

進郎中太監馬永成劉瑾等盡亂朝政給事中劉蔭陶詣相論奏而大臣未有言者戶部尚書韓公文日流涕憂憤公進曰大臣同國休戚此而不言焉用彼相韓公慷慨曰吾當言言而獲罪報先皇於地下耳乃令公草奏文多載籍中疏入詔廷議其事而八人者環哭上前乞命事中變瑾遂召入司禮監而中官王岳范榮皆竄死明年丁卯大臣多罷免瑾知韓疏公手草也蓄恨不已矯旨奪劉公健等四十八人官放歸田里榜爲人黨公與焉然瑾必欲殺公又明年戊辰矯旨羅織公罪械下逮京師再下錦衣獄公之內弟左國王者間行徒步從公上書康狀元海勉以大義賴力救得免放歸大梁庚午瑾敗卒未起公江西提學副使振起古學力變宿習褒獎義節訓正禮俗士翕然向風時宸濠懷逆招致文學凡吏江西有才名者即啗以厚利否則威劫之以公有大名折節下之公初不爲動久之墮其術中乃公不知也公既材高負氣不肯同流俗人人多忌之而江御史某與公有嫌遂相奏許天子命大理卿燕忠體勸下公廣

信獄摧苦殊甚公不稍為屈竟文致問住而布政使鄭岳適為濠所陷公素與岳不相能岳既得罪謂公傾之也濠敗辭連公賴刑部尚書林公俊力救得亡窮治乃後大臣暨撫案數論薦不用嘉靖辛卯就醫京口還大梁病卒所著有空同集若干卷余戊子歲使大梁以書投先生辱賦答相逕行一見甚鵲談讌累日夜是後人從大梁來先生必有書遺辛卯所以著集見託屬續之日遺言必索先生表吾墓而先生之子伯材馳書京師曰亡父落落大節世或未盡知子必傳之嗟乎先生之名同天壤歟可也而何藉於于世有不知先生輒開口雌黃者請三復於斯文論曰昔人言文章與時高下不具然哉漢氏去古未遠然自遷向雄固而下亦鮮彌矣唐則韓柳宋則歐王蘇氏父子咸以所長擅稱而說者猶多低昂謂宋之不逮唐猶唐之不逮漢也我明文章發於金華教子而宋劉二公雍容述作潤色鴻業特尚典則雖奇麗不足而朴醇有餘要亦氣運熙洽使然也列聖紹統人文昌朗暨宏治間李公夢陽以命世之雄材洞

視元古謂文莫如先秦西漢古詩莫如漢魏近體詩莫如唐乃與姑蘇徐貞卿信陽何景明作為古文辭以蕩滌南宋胡元之陋而後學者有所準裁彬彬郁郁篋以尚矣李公材最高其人負奇氣傲脫一世以是得奇禍坎壈終其身世咸疾之如讐嗟乎斯人也豈世俗所能容哉

陳紫峰先生傳

明 王慎中

嗚呼士散於塲屋之業而回陋浮濫捨其心術專一經以自業茫焉浩首尚不能通其義以傳於絕尺之文又烏知所謂聖人之學哉宿革末生相尋以敝自虛齋蔡先生出乃始融釋羣疑張主新意推明理性於字析句分之間以與前儒相統承虛齋之學方顯士猶鮮能習其傳而紫峯陳先生生稍後自以其意為前儒文公朱氏之學未嘗聞虛齋之學也一日虛齋得其聞於故長史李本齋公所嗟異久之李曰此

吾徒也虛齋瞿然曰吾乃得此人為友足矣於是遂為師弟子虛齋得先生而其學愈尊蓋虛齋有託於先生而先生無所待於虛齋也先生之書布於四方家而有之學者治經求通於朱氏微先生之書如瞽者失相從禽無虞矣今書肆所板四書淺說易經通典是也嗚呼可謂盛矣先生姓陳名琛字思獻別號紫峰學者稱為紫峯先生正德丁丑進士始授刑部主事乞為南京戶部以便養轉南京吏部考功請告家居就家起為貴州按察僉事調江西僉事皆學政

並辭不赴考功督學皆美官假令徊翔不去與牽挽而出又當有美於是者穹階峻秩當世有用人之柄者急欲得先生畀之以自詭得賢之名先生乃勇退而堅卧略無遲回顧望意世竟不得而榮之蓋為太母安人之養也篤於天性而不見其可有懷之爵祿由其大以推其細則先生之學著於書者非苟能為言而已也家居却掃一室俯仰其間察見消長於草木葩卉榮悴開落之際景象委蛇與物共得一枝一葉照映闡極人所同視而先生茂對之趣獨遠矣時放於山硯水涯漁樵相問或寅緣原隰農圃滯談彼各自為語言先生觀物感唱然有所樂不問其解否也絕跡公門監司辟邑諸大夫冀睹其面為快注意傾下先生折簡相報或報以一詠而已其有報不報惟意所到不視名勢崇劣禮數隆汙為度量也由先生之大推之既無可懷之爵祿又烏有可羨之勢利可畏之毀譽哉宜其浩然自適而一無所累也先生任仕不久事功無所表見為刑部好在生人不喜於得情為戶部謹於利邈不以自汙此皆砥行植節之

士所能不足以論先生之大也昔由求言志千乘之國方六七十里之邦自課之功所以使民有勇而能足者可計歲而見效何其確也若夫及春而制裕浴沂水而風舞雩此何為者然孔子喟然而深與者乃不在彼而在此其意可知也以先生之高使與曾點並時而生同門而學則鑒然舍瑟之曾點必不異撰於先生而喟然之嘆先生宜越由求而見賞矣始丁丑榜得士吾郡最有名給事史筍江公于光今食事林次厓公希元中丞張淨峰公岳與先生並以經學為海內巨工張公尤號為閑博而傑於文給事公淡于仕進與先生同趨好滯一官以卒食事公喜事功齟齬於世迭起迭仆卒無所就中丞公方據融頭事功為一時絕出然林公悔其顛蹶張公亦以酬俗成務為多憂而恨道之艱行未常不高先生之決而慕其清也

張簡肅公傳

明 羅洪先

國家當盛治之時必有維持培植之人生于其間其博厚純寔剛介平恕若出於天性而不可已未嘗有矯矣眩飾纖靡慘薄之態入於見聞是以朝廷刑賞簡當公議清明天下趨向咸歸一時君子恃之得以無恐譬之少壯之年元氣充滿起居以時嗜好有節自足以凝精而握固不待服食導引之外助嗚呼此其所係何如哉某數歲時有知聞先大夫與客談皆弘治時事且謂當時六卿大臣江右有安福張公浮梁戴公二公行事酷類古人至若剛嚴難犯張公又其最也我朝政在內閣士之始進以翰林為極選而競進者率規計恐後公與華容劉公堅避不往且曰願就部曹習為民事為國家建勲業甚幸沒沒徒老文字竊所耻也於是自兵部郎中出為浙湖兩藩擢副都御史巡撫山陝進尚書都御史掌院事歷仕凡四十年所在咸有樹立縉紳之間倚以為重其後閣瑾用事憚公執法相尼一日假內降促令致仕公去而綱紀廢矣悲夫公致仕時瑾遣人道偵之禁假官

舟且不得與有司見公乘散艇至徐州洪觸石敗漏
適先大夫以工部治洪夜且半聞扣署聲問之知為
公也於是密往慰勞時寒甚衣盡濡乃解囊治具相
投鷄且鳴易所乘便舟以行臨發公慨然曰吾受先
帝厚恩恨莫能報願君後生吾有孫當以今夕事語
之必且遂吾志也先大夫灑泣而別後洪先既長見
公孫御史鰲山詢其所聞於公良然御史者即公所
指之孫也御史嘗為余言公初為郎中奉使畿內夜
遇盜劫其囊得俸銀七兩慚悔而去一旦屠人告衙

隸易公銀同官給之曰焉知非張衙銀乎屠叩首曰
張衙惟有俸銀以是知之是時為浙右轄尊貴家口
衆矣口料肉止一斤公子某以歲久來者體魁碩食
幾數人公笑曰吾固慮汝不飽也尋遣歸楚中任滿
庫羨銀二萬餘公盡籍錄之副在諸司歸見路夫人
戲曰汝常笑吾貧今羨二萬不已富乎自夫人侍公
至是始聞戲言則為應曰得子孫無飢寒常如今日
足矣於是相顧一笑公不獨在官無所私也即以小
物餽遺亦必有義路夫人卒有以悅莫若公返其人

御史從旁問故公曰悅以為莫知我廉矣不知悅非
真物也我故返之孟子曰身不行道不行於妻子觀
夫人之言與其處子者益可信矣此至隱細者也當
陝西用兵即有俘獲止以地方事入奏不為張大語
故事兵部多幸外功冒恩賞衙公所為妨已數窘詰
之竟不少變及督漕運入京諸閹用事者聞公名樂
與結納因李西涯戴浮梁傳新喻三公通姓名復以
名香為壽冀得往謝公固辭曰三公以公會故得朝
夕某則不敢三公強之公不得已各報以幣使者纔

入內城急追還曰幾誤矣吾平生無內交忍一旦自
敗乎其後劉公薦公於上上曰朕非不知張數華但
武難為人耳公之處已若此然遇人無問善惡休戚
相通不為峭厲山西鎮守閩人劉卿以公不便已入
賄於朝移之陝西及代者至親視無禮悔思至於泣
下掌院當考察京朝官三山林公為吏部欲清汰鄙
薄以厚風俗公於中欲多保全有坐帷箔訪者咸欲
黜之公曰彼不幸而有遭非其罪也曷譴之使自勵
嘗曰寧夫不明無為不仁林公亦莫能奪瑾之害縉

紳也多訶倉庾之虧以為奸賊公坐楚中耗損三百石禍且不測翰林武功康公與高陵呂公皆公嘗識士也康恃瑾鄉里故以弄語調瑾曰公陝人也陝人愛張某如父母忍相薄耶瑾意始解其後呂與御史云然呂素明康之寃言之將以揚康也然公忠厚之報如是乃見夫喜功者易於矜而持正近於刻公捐辭美秩視若贅疣竊念一時意氣激發若可矯強至於功名之際不事表暴與人款款而自操之潔凜於冰霜非博厚純實剛介平恕迭用而不悖者焉足以語此古人有言人臣執法而不求情盡心而不近名出死力以捍社稷使天下之心繫於一人而已不與公不其庶幾乎宜其遭遇聖明先資畢效以身壯國速擯斥而不悔也蓋嘗因先大夫所論推之當宏治時朝廷之上未嘗無小人也雖其憚於公議限於刑賞欲亂君子之所為而不可得亦以君子者以其道相勝是以得久於位稍行其言以遂其維持培植之力若公者是也彼徇俗以就功名之會委曲以極時之艱斯人也吾莫得而詰矣惟任己者倖倖以自是

暇暇以自異其始未嘗不藉口於公輩也然饑寒之處或奪於妻孥利害之機或間於朋友買直則訐細陰而忘大體好剛則觸凶虐而啓釁端理不制欲之流誠不勝私之積內之堅凝外無孚感卒之不免於矯戾眩飾纖靡慘薄之歸而小人相乘翻為鑒戒國家元氣同以摧傷若是者視公何哉使其有以自勝即不幸擯斥矣其於世豈竟無所補哉此余所以語公行事語若頌而不厭也竊緣世誼別為列傳抑亦傳史闕文冀或風於君子也

胡行恭傳

明 王時槐

胡行恭字民敬泰和人幼孤穎敏強記家貧為童子師取資供母晨起櫛沐伺寢門問所宜苦以為常母既沒家無餘資或竟日絕炊手一卷坐中庭曠然若不為意性好讀書貧不能購則時時從人乞假手錄至數十部殫思天人之際究極物理之原每有志會輒箋疏其義故善里中刑部郎周尚化周砥節剛廉乃獨推重行恭一日貽書議及詔旨裁抑生員可否行恭報書至再極陳其不可狀且曰裁抑之說起於

青衿之子請謁公事假私蹊以謁員此固流弊之甚僕則以為周士之貴泰士之賤皆有由來非可以一罪士也夫欲導為射示人操矢欲導為御示人執轡今盡以科舉而督實行是猶誨射而示警誨御而示矢也豈可值乎故科舉之外必行薦舉則篤行之風倡必坐舉主則憑私之路塞就有儉邪之人懷無狀之心者不得刺其間矣乃欲為定額以抑之不亦後乎周得書歎服且曰使薦舉法行則首詣公車舍行恭其誰即行恭雖伏蓬蒿不忘當時其誨子以實

行為學而戒務名富貴利達一不置諸口子天鳳能遵其教嘗從寧都何公秦黃公弘綱聞陽明先生之學初疑信半久之中夜體認瞿然有悟曰是有本之學也乃著自信篇又以理非在外特著理論以正後儒之謬云

右春坊右諭德劉公戡傳 明 王時槐

劉戡字景元安福人成化乙未進士及第授翰林編修進侍講宏治改元命戡使交趾時交趾吞占城侵緬甸頗岌驚僉難其行戡被命即從兩乘肩輿道南寧直抵其境交人驚曰昔之使者皆航海來颺播蔽洋貿重易奇今豈天人耶何其簡速也郊迎館候視昔倍恭陪臣拜跪據大明集禮受之不與交一語至之日頒詔明日宴畢遂行交王大恐曰一國生靈命懸天使餽金珠犀象戡一不顧既行復遣陪臣要於路期必致之戡書其初入關詩曰歸裝若有關南物一任關神降百殃以示之交人益敬悚初戡至交交地苦炎暑其館伴進一象骨扇及出關以其扇返之交王遣使入謝表有廷臣清白之語進右春坊右諭德諭年卒戡配胡氏早盲數請置貳室不聽臨終索紙書曰劉伶之鍾既荷莊叟之骸如遺無一語及家事所著有晉軒集

周主事傳 明 楊爵

周主事名天佐字宇弼號磧山福建晉江縣人登嘉靖乙未進士授戶部廣東司主事以言待罪死於獄中楊爵曰凡天佐其他行實爵未能詳知今不記姑記其死之歲月日時與其所由以死焉耳辛丑年春爵以監察御史上封事大畧謂雪雨不可為祥瑞頌之謂權奸不可為忠信而邇之謂土木之工不可不止謂朝講之禮不可不修謂和親之妨政害治者不可不斥謂讜言之益國與民者不可不聽凡此皆爵一時愚昧之見狂妄之詞信有罪矣二月初四日干冒宸聰初五日械繫下獄十三日夜復蒙笞撻備極拷掠血淋漓衣前襟盡成赤紫色桎梏桎鎖晝夜困苦間伺警惕罔敢踈寬坐卧處血流地上可手杯之履襪衾苦之類為血所沾若滯於水中然天威震動之下人人悚懼謂爵必死而不可救矣延兩月餘憂四月初九日九廟災天子詔百官使言時政闕失天佐應詔上疏其畧曰陛下以宗廟災變痛自脩省凡政事闕失許各衙門條陳且欲務闕國體民瘼不許

迄濫彌虛應故事仰見皇上畏天之誠求言之切治
道更新之會轉災為祥之機也大小臣工孰不感惕
思効其愚乃今闕政猶有在而忠言未盡聞此何故
與實以聖明采察之廣未宣而臣下畏望之心猶存
也蓋示人以言未若示人以政也臣時即欲冒昧上
陳但聞詔書且下意曠蕩之恩必首及楊爵今復不
蒙恩有臣展轉思之心實未安况明旨既許條陳苟
有所見寧忍終默國家置言官以言為職楊爵所言
之事豈逃庸見惟以過直犯難誠可矜察而爵今在
獄中已經數月且聖怒之下一則曰小人一則曰囚
犯以盡言極諫為小人則為緘默逢迎之君子不難
也以奉直納忠為囚犯又孰不能為容悅寡過之臣
哉言行君子之所以動天地人君一喜一怒上帝臨
之陛下試一思焉其所以怒爵而罪之者果合於天
心否耶昔人謂雷霆之所摧折萬鈞之所覆壓者爵
既遭矣身非木石命且不測萬一先朝露而殞是使
諍臣飲恨直士寒心楊爵一身之利害不足深惜而
所關係聖德之損益不細也方今陛下恭默思道畏

天勤政聖心洞然臣願察爵之疏原爵之心特賜釋
放仍乞明示嘉納不吝旌爵之忠謹以風天下之直
則聖德如天地之廣如日月之明由此而天意不
未之有也疏上有詔周天佐笞六十下鎮撫司獄牢
固梏囚天佐體幹細弱其手桎微寬可自脫出守者
以鐵鍊貫楮目中令不能轉側絕其飲食三日死矣
當此九重赫然之際爵實延一息以待旦暮之盡而
人孰不以爵為戒哉天佐以未信疏遠之小臣執以
是非好惡之常理奮筆於言論之間而納其區區之
忠竊焉宜其言出而身即死也故法凡死獄中者司
官必具題死者日時緣故請監察御史刑部主事各
一員驗其屍然後出之蓋慮有不得其死所以重人
命廣德愛也天佐笞之甚重兩臂爛裂腹上俱青黑
色驗者御史主事立屍傍吏驗屍訖高告曰遍身上
下並無他故止因急病身死御史主事即據其所言
題請出屍未驗屍時天晴日燠俄而雲霧橫空震雷
微雨屍出雷已天佐妻某氏候門外見屍出以頭觸
地幾死柩真寺無不悲痛民有張弼者祭於柩前而

哭之人曰子與舊相識子曰否吾傷公忠諫而死是以痛之深也嗚呼可痛哉可痛哉爵與天佐未嘗一相識亦未嘗以名相通天佐初下獄爵不知天佐為何許人亦不知其言何許事也既而知之思欲以識其面貌然各聞於幽室中困於桎鎖又天佐以救爵故下獄故獄戒諭甚嚴凡廁所往來必問其期未得一相遇焉然爵一念惻惻洒泣恐天佐不能堪其困苦之甚而思有以寬解之呼一人即膝上手作困卦二字以潛慰天佐乃示以困亨大人吉無咎之義也聞天佐首之且微有笑顏獄中人有以宜自寬心語為天佐慰者天佐應之曰事無所自為則死吾所當安吾心何不寬乎五月初六日下獄初八日未時死爵亦未得親哭其屍終不得一見其形容也死之次年福建一士夫來獄中爵問以天佐事其人曰天佐年甚少風神清秀當謂其少年柔順而已不知其己之剛烈能作如此事傳聞其無子死時一女在既死之後又生一女未知是否又聞其父母兄弟俱在家甚貧亦未知是否極停數月其妻歸葬于閩中嗚呼

遭際之不易蓋自古皆然也士當總非藏而修之於家塾焉承師模範執典訓必明與心誓而期以終身之踐履事親無或有不孝焉事君無或有不忠焉及名登仕版心荷天工此心所在君恩所在固造次顛沛而罔敢易也顧以脂韋依阿之風勝而三極大中之矩泯然於流靡波蕩之洶湧而承以孑然獨立之一身斯時必欲上不負吾君下不負所學其不殺身而成人世之恨者鮮矣天地為之震動萬人為之流涕焉嗚呼天也命也不肖爵之罪也復何尤

練侍郎傳

明 陳德文

齊景公有馬千駟死之日民無得而稱焉伯夷叔齊餓於首陽之下人到於今稱之誠不以富亦祇以異詩言諒哉吾讀傳遺錄至稱練子寧死事未嘗不嗟咨津津淚下而不能已夫王燭死畫龔君實死彭成烈矣而子寧死尤慘且烈洪武十八年高皇帝庭策士子寧禮部奏名第二入對言朝廷用人徇其名不用其實小善遽進而小過遽戮之以有限之人才供無窮之誅殺因歷陳古人所以教養任用之道書教

千言擢進士及第授翰林修撰子寧蓋新淦人少與金幼孜遊嘗謂幼孜子異日良臣已當為忠臣革除中以吏部侍郎改御臺副都御與聞國政靖難師起子寧疏曹國公李景隆觀望不忠願斬以繫鼓又憤激請先伏誅皆下聽會衡府紀善周是脩靖江直史蕭周道疏詆用事者罪忤用事者子寧獨奮曰國家事至此尚不惜人言顧所論吾過有無何如衆於是釋是脩等不論文皇帝繼統召子寧貢問不屈死親族以下生徒死者數十百人猶有言建文之臣不順

天命請追戮之帝曰彼食其祿自盡其心又語學士楊榮曰練子寧在朕當用之夫王燭龔勝亦不死死不託孤唐寄採薇積餓從容引決子寧固親信誼均休戚不得同日語也恒言烈士殉名練子寧豈殉名者抑即仲尼所稱求仁得仁者非耶志曰昔聞練子寧幼從鄉長竹莊先生學命詩水竹村居子寧曰千山暮雨石泉通一夜春雷長籥龍迴其志少則然矣高皇帝聖性嚴重子寧布衣慷慨犯之今其言固在也非見定於素哉夫士無直言敢諫必不伏羲死節

子寧蓋臨難無苟免者死重於泰山矣子寧死百餘年同知王佐哀所著名金川玉屑集其文章始出提學副使李夢陽祠子寧新淦即金川書院建浩然堂嗟乎即使子寧同蹇夏慕王魏崇官豐祿不過師保死則僅其子孫祀之耳余聞新淦峽江人士各爭子寧為縣人競立祠祀焉較諸其子孫孰多寡哉是以君子樹勲立名當知所重輕則知所以處生死

孫忠烈公傳

明 王維禎

孫忠烈公者餘姚人也名燧字德成為人沉毅有大
畧而與人王公守仁錢塘人胡公世寧同舉于鄉正
德丙子孫公以都御史巡撫江西會寧庭人宸濠反
孫公伏節死人至今壯之云宸濠者驚害多知人也
好生事不靖術人有孝生者揣濠知其指乃為妄妖
言誦諛濠喜厚賞術人因以其言起陽春書院以
當王氣濠由此乃為反謀焉濠府中宦者劉言南昌
人李士實王春皆阿濠畫計曰大王即欲有所為可
先請獲故護衛之奪者以當上指幸許即有兵其他
以漸圖之是時正德甲戌也天子嬖都督錢寧樂官
臧賢兩人擅權用事濠遣人賂兩人兩人為矯詔復
護衛如故濠見計遂為謀反滋甚而士實等因言安
福人劉養正有才畧知兵濠乃招養正而養正益為
妄言誦諛濠大喜日夜集吉士實春養正四人與計
謀乃招納四方有罪亡脫及勇力材藝之子各數千
人為衣食匿處諸司頗皆覺知然憚不敢發也是時
孫公方為河南布政使而胡公世寧為江西副使胡

公乃陰上書告其事濠聞即復遣人賂兩嬖人因遂
誦胡公謫戍遼東濠懼觸衆憤不使乃復開館延士
為講聖人之學明己能好善禮士若此也聞中人故
江西提學副使李夢陽者以詞賦高一代罷而寓居
大梁濠使人請陽春書院詩其節詐要名如此有頃
孫公自河南還江西覩濠姦憂之乃進諸司計曰即
濠發奈何當是時適副使許公達嘗南昌部中乃孫
公即又喜而令許公陰圖之而自下檄部中無城者
亟築無糧者亟蓄無兵衛者可亟練丁壯居僻治遠
者為奏立縣治以便約束於是進賢有城安義有縣
縣各有兵兵皆有餉悉如令濠念孫公每一令出城
為己備又懲胡公世寧往事意孫公必有奏乃置人
要路密諾之由是孫公凡七奏皆不得奏畧曰夫濠
列為藩王親為宗室至富至貴矣乃今所為臣甚惑
之府中使齎重寶往來京師者趾相錯于路此何以
故也鄙陽賊凌十一閹念四吳十三者吏捕之急濠
匿賊於西山祖塋中吏不能得夫匿賊安用乎慎乎
太監畢真由江西之徙淞江也濠厚贖為別別時辟

左右審囑畢真者肯之夫審囑背公厚驢結好非藩王所宜有也其他類罪甚多不具論論今踪跡可疑慮者其後孫公見秦格益懼濠旦夕且舉事乃令兵局使兵器於他所益復下檄諸郡設兵備焉正德己卯言官言濠不軌也上遣重臣欲往奪護衛按其事濠恐乃召吉等四人謀曰今使者來即訊我乃翁事敗矣不如遂反四人曰然因共定計迨濠之次日鎮巡諸司咸入府謝濠乃伏賊兵於殿內諸司拜未畢濠奮鷹高足立露臺大呼曰方今天子巡幸在外

太后召我監國汝等云何於是孫公抗聲對曰既有詔請出詔令衆觀之濠見孫公不可奪素亦憚許公乃以問許公許公曰是安得此悖妄之言乎吾有赤心豈從汝反耶濠怒叱賊兵縛孫公許公孫公奮臂推縛者指濠罵曰汝賊且不見天乎天無二日吾豈有二主哉吾死一身耳且見若種之漸滅也濠怒甚縛者持銅鍾擊折公臂曳公及許公至惠民門外害之其時同附者或從或默濠立即偽授劉吉太監令提督軍務李士賓國師王春劉養正俱偽軍師令人

請兵局取兵無有乃括民間農器炊釜造兵器歷二十日始就濠乃從妃婁氏宮人百餘人登舟趨南京又留兵守南昌遣所親婁伯之橫峰招兵道出進賢城進賢知縣劉公源清殺婁伯而濠兵先鋒攻安慶者又不下濠甚憂焉其時巡撫贛州都御史王公守仁以行部道聞變乃駐節吉安移文遠近令各以兵赴義於是諸郡練卒一呼響應居一月兵集數萬所過供餉未嘗乏絕則皆孫公前爲之所也於是吉安太守伍公文定制孫公及許公木主於文山祠率所集兵以文哭之諸軍皆感泣因遂督兵至南昌擊破之兵入濠宮人留宮中者多自縊死濠駐兵王家渡聞南昌破悵然曰大事去矣吾安適歸矣於是泣下官兵遇濠於樵舍風逆官兵戰不利俄而風順王公令實茅於舟順風舉火濠兵焚溺死者無算婁氏赴水死濠易舟挾宮女四人而遁官兵追及濠投水水淺濠不死遂併宮女執之劉吉李士賓王春劉養正就皆縛而凌十一閭念四吳十三等脫而至安義安人縛三賊獻俘事聞天子念濠懿親不欲加誅令自

裁諸與濠通謀者皆以輕重伏誅李提學答濠詩有
規詞免罪其入濠府中謝宴默而不能抗義者皆減
死謫配居無何而殺皇帝棄群臣不及錄孫公今天
子即位首褒孫公贈禮部尚書謚忠烈詔江西爲立
祠賜額曰旌忠與許公並祀之廕子堪錦衣衛千戶
世襲公配楊氏封夫人公赴江西時不以夫人隨公
死報至揚夫人哭之哀其時昧旦天劃然忽斷燦燦
若目見者譁曰天眼開矣以濠就擒日考之則此未
擒一日事也子堪徒跣赴難至而濠已擒伏公棺跽
之乃更治棺殮啓棺公面顏若生異香蒸蒸自棺中
起江西人大詫焉以為鬼神不欲死之也初孫公至
江西治厠舍得古鏡于深溝中背刻二十有四字其
文曰光運忠扶日月心感天揚賔忠獨難塞天不世
內靖斯以昭明字畫奇怪觀者多下識後孫公死好
古者以意辨之其文乃著焉孫公自始仕歷七官皆
有大功德具在國史中孫公三子長子堪今官都督
僉事仲子堪尚賓卿季子陞吏部左侍郎三子者皆
天下士也堂天於以報孫氏哉胡公世寧濠滅後復

官卒至兵部尚書王公守仁封新建伯
論曰夫孔子不語神非無神也有之而弗語之也世
傳宏治壬子制之文場中夜既半場中人見東西立
巨人二人一衣緋一衣綠合言曰三人好作事已
忽不見是年孫公胡公王公遂同舉卒之寧濠之變
胡公發其姦孫公折其氣王公平其難三人相次成
功二巨人告之矣豈非神哉夫奇瑰非常之士不可
恒有有之皆天帝意也彼修一職立一節者豈不謂
賢以扶世翊運能哉

陳公慤公傳

明 薛應旂

陳公慤公名選字士賢浙江臨海人宋國子司業左輔之後由婺徙台之僊居再徙臨海公父員韜宰新城有惠政後為御史按閩訊沙冠費從者數萬人悉釋之卒官福建右布政使人以為未食其報嗣當有入生公自少端慤寡言立志以古聖賢自期潛脩獨詣不求人知唯以克己求仁為要因自號克己景泰庚午舉浙江鄉試天順庚辰以會試第一人成進士授監察御史會脩撰羅倫論大學士李賢遭喪起復

謫官諸在言路者默若罔聞公獨抗疏直之倫雖不復而賢亦竟沮天下自是始畏公議及按江西務持大體布按長貳有過早獻諫者公曰有憲綱在安自寧大吾不敢也悅不以道吾不願也諸皆動色相戒舊習頑革既提學南京默浮崇實寬嚴得中校士一以德行理道為本試卷明列諸生姓名並不彌封編號曰吾不自信何以信於人和所歷郡縣居宿學宮端坐沉黙以身率教每令諸生讀小學習六禮體認經典措之踐履徒文無益也士習翕然丕變時御史

大夫長洲韓雍以功業顯頗尚崇飾方憂制家居聞公至悉屏儀衛曰毋令陳御史知也是其所推服者豈獨諸生焉爾哉成化初遷河南按察副使整飭兵備尋改提學其所設教一如南畿中州學者咸慶得師會倖奄汪直被命巡即國威倖人主都御史以下咸匍匐趨拜公獨長揖直怒曰爾何官敢爾公曰提學直愈怒曰即提學便如何爾寧大於都御史也公曰提學何可比都御史但宗主斯文為世表率雖死不可屈節直見公詞氣嚴正舉止安舒而諸生儼集署外知不可犯遂改容曰先生既無公務相關自後不必來見矣公即徐步而出尋轉按察使政尚易簡釋繫囚除苛細凡諸宿弊名為舊規者一切罷革獨於賦吏不貸然受賂百金者要辭但列六七錢或問之公曰汚人惜財如惜命若責賂厚彼孽而貨權人則法撓而難除矣然亦權以待茲時非正法也自是官屬歛戢父老歡呼載道未幾開母喪即日奔歸行李一肩士民泣送者數千人立生祠祀之服除擢廣東右布政使踰年轉左時嶺南苦鎮守中官權剽璫

僭竊然公乃嚴條約章和買減泛徭為惠養計會肇慶大水公即具奏災傷狀因體勘展轉民命旦夕竟便宜發倉賑之市舶太監韋眷縱恣括起籍富民供辦公奏減之眷復以私艦通番為番禺知縣高瑤發覺浸貨鉅萬都御史宋冕等不敢詰公獨移文獎瑤眷深憾之番人馬力麻者貿貨海口詭稱藉門答刺國貢使眷利其珍奇將許焉公發其偽逐之又有撒馬兒罕使臣泊六灣還國枉道至廣謂將往滿朝加市稅稅入貢所適震驚公乃上言臣聞西旅貢獒召公進諫越裳獻雉周公致規蓋不惟防玩好之言漸寔以杜窺伺之萌也迺者珍禽奇卉旁午徵求外夷小醜探聽舉動豈真有貢獻之誠惟以邀賞賜之利陛下必以為娛玩之物於民無損不知奸貪憑藉因緣為利招引殊方營圖攘剋即如後稅本非澤國所產假借意指入海宣索驚擾寰中貽譏海外是陛下忽細行之矜而為大德之累也疏入留中眷知中官戚疾公乃誣撫公黨比高瑤和同貪墨上怒遣刑部員外郎李行會同巡按御史徐同愛鞠之行同愛畏

眷不敢反異漫賂公所黜吏張聚令誣執公聚不從行等阿眷執聚拷掠聚曰死即死矣安敢以私憾滅公義偏正人也行等羅織無所得乃誣公矯制發粟意在侵欺張聚屬官志圖報謝論罪當徙奏入詔奪公官遺錦衣衛千戶張福建公士民數萬人號泣遮留以衛士辟除乃得出省城至南昌疾作卒于石亭寺時年五十八友人翰林張元禎為治殮事以疏綏累尸而已或咎其薄元禎曰公平生清苦殮以時服此公志也張聚乃上言臣聞周公元聖而四國之謗乃致上疑於其君魯參大賢而三至之言不免搖惑於其母是豈成王之不明參母之不親哉凡以口能鑠金而毀能銷骨也陛下臨御區宇明並日月恩同父母詎圖怙冒之中尚雅屈抑覆盆之下復有沉寃竊見廣東布政使陳選素崇正學夙抱孤忠子處群和之問獨立衆憎之地太監韋眷通番敗露知縣高瑤按法陳選移文嘉獎以激貪懦固監司之體也奈何采是徐同愛怯勢保姦首鼠兩覩以致韋眷橫行胸臆穢濁節愛惑聖明勘官李行承眷順指鍛鍊

成獄竟無左驗臣本小吏以誣誤觸法為選罷黜寔臣自取非還有加於臣也眷乃妄意臣必憾選以厚賄嗾臣令扶同陷選臣雖胥徒亦知廉耻安敢欺昧心術顛倒是非眷既知臣不可利誘乃嗾行等逮臣於理彌日拷掠身無完膚臣甘死顯天終無異口行等乃依傍眷語文致其詞劾選勘災不實擅便發倉曲蔽屬官意圖報謝是毀共姬為憂姬詒夷齊為盜竊也本年嶺外地震水溢漂民廬舍屬郡交牒報災老弱張口待哺而撫按藩臬若罔聞知選獨抱隱憂

食不下咽謂展轉行勘則民命垂絕其何能待所以便宜議賑志在救民非有他也選素剛正不堪屈辱乃為勘官凌侮憤懣成疾旬日而殂李行幸其就死不為醫療又潛遣養子系以選死報眷以快其忿小人佞毒交結權倖一至於斯司寇之屬要在詰姦刑暴安取此輩為也夫選砥節奉公橫罹讒構君門萬里孰諒其冤臣以罪人擯斥田野棄來自給百無所圖報敢冒死披陳甘心愚戇者誠痛忠廉之士卽屈抑之冤長護佞之奸為聖明之累也奏入不報第以

他事罷眷鎮守弘治初工部主事莆田林沂疏雪公冤詔復官禮葬正德中追贈光祿卿謚恭愍薛應旂曰余少時聞里中長老往往談公為提學御史時行事心竊慕之及長走仕途見縉紳先生輒稱公為真道學益勤向往迺承乏兩浙學政過公里第知公加詳見張縉疏不覺憮然自失謂縉胥吏乃能若是昔孔明之于李平廖立不是過矣人心其不死哉彼常眷不足責也宋曼徐同愛李行叨冒襟裾顧甘心狗彘此又何說焉公固不待余傳而傳余因校士之暇特為公書之以付台士泐張縉得以附見云

興濟伯楊善傳

明 王世貞

楊善字思敬其先自太原徙而北平後北平進稱順天而善爲順天大興人少補北平諸生不甚通經濟而性沈敏能爲人筮事時年甫十七而文皇帝起義兵則已知善名署典儀所引禮舍人從事睥睨間文皇帝即位之明年召補鴻臚寺序班二年改鳴贊又四年進司賓署丞選侍昭皇帝於青宮又八年進右寺丞又六年進爲卿善偉風儀工舉止音吐如洪鍾每朝謁引進奏時上目屬之而又重文翰與學士楊士奇楊榮善旣家都城以積著起資治居第郭外有園亭花木之屬諸公休沐有所宴賞則善家若歸又時時饋遺名果餌不絕以是大得公卿間聲而中貴人亦多好之者卿之十二年滿考遷禮部左侍郎明年從北征至土木師潰間行達京師時已六十五矣足軼不爲倦國犯京師以善晚暢軍事改都察院左副都御史使佐于謙營九門外郭以與鹵角數有功進右都御史自侍郎至右都御史皆領洪臚寺事而時太上皇帝在漠北元旦故事自朝正出即相率于

朝房投謁稱賀善獨流涕曰此何時也太上皇帝何在而我曹稱賀耶衆愧爲之止而時所遣使漠北若王復王榮李實皆以庶僚假卿佐以往皆不得要領而李實得一見太上頗倨而其辭覲然國始挾太上請我賂不甚警欲奉之還而朝意更緩爲鹵首也先貴王復等非大臣故遣善然絕不爲奉迎計亦不予善一錢而善乃悉其貲不足則貸之中貴人悉益布綺繡師比阿錫女紅線紉之類以往既至而也先所使館伴者來與飲帳中而詭善曰土木之役為何六師抑何弱也善曰當是時六師之勁悉南征而中貴人振欲邀太上幸故里一不爲戰備故輕以卒予敵而今者南征之士悉歸可二十萬而又募中外材官技擊得三十萬悉教以神鎗砲火弩射命中百步之外洞人馬腹透七札又用言者計沿邊要害皆隱金椎三尺所植蹄立穿刺客林立夜度營幕若猿猱而皆已矣置之無用矣問何以言無用曰和議成方且歡飲若兄弟而又何用也因賂之其人悉以語也先次日善入謁乃大賂之也先喜坐定善乃前責之曰太

上皇帝朝太師所使使必三千人歲必再即稚子亡
弗資者金帛器服絡繹載道而太師乃背盟好而見
攻何也也先曰然則奈何削我馬價又予我帛時有
剪裂幅不足者我是以攻汝善曰非敢削馬價也太
師之馬歲益增價亦不繼而不忍拒是以微損之太
師自度價所得比前孰多也先曰若其稱者胡語是
也善復曰帛有一二剪裂幅不足者諸通事為之也
事露而誅矣即太師所使進馬有劣弱而貂皮敝豈
太師意耶也先又曰若善因復進曰太師之攻我兩
矣所燬殺剝剔以數十萬計而太史之部曲寧無有
血吾乃者上天好生太師獨好殺夫是以數有雷警
今若能奉太上歸我和好不絕器弊溢於穹廬而黎
庶彼此俱逸不亦快乎也先益喜曰若者因謂善歸
而太上皇帝有重寶來購乎善曰太上得重寶而歸
我太上皇天下後世謂太師貪重寶也歸我太上皇
而不索重寶天下後世以太師貴信義而賤貪黷令名
奕奕何況我之德太師無已而重寶以漸繼也也先
大悅曰若者遂以善見太上皇善再拜進醪糲問萬

壽侍立不敢坐也先數目太上皇太上皇謂善太師與
汝坐則坐善頓首曰曰君臣之禮雖草野寧敢廢哉
也先嚙指顧其下曰咄咄汝曹中國禮乃若此遂以
輕騎奉太上皇與善歸歸而上以非初遣旨薄其賞
僅遷左都御史仍掌寺事而大司馬謙心許之其從
行子弟有得官者易東官加太子太保時太上皇在
南宮元旦朝正出復且修投謁善復泫然曰太上皇
不受賀何我曹乃相賀也識者益稱之善始事中貴
人揀後更事中貴人吉祥等而與石亨比會景帝病
善伺知亨吉祥有迎太上皇謀遂與之合而發南宮
錮太上皇即位封奉天翊衛推誠宣力武臣特進光
祿大夫柱國興濟伯尋加號守正改文臣歲祿一千
二百石予諸券世世承襲改領左軍都督府尋加禮
部尚書兼領部事有四子一為勲衛一為指揮食事
一為千戶一為鎮撫而從子及養子官锦衣者四人
旬日之間恩賜赫奕所陳請無不允幾與石亨張軌
埒又嘗陰薦李賢入內閣而定襄伯郭登故有幾微
於上亟疏善使鹵功請位之三公獲以身免於是亨

吉祥忌之稍稍間於上漸疎絀而明年善亦卒矣年七十五贈興濟侯謚忠敏子宗自勲衛襲四歲例奪為金吾衛指揮使孫增尚公主授駙馬都尉善雖負才辨以巧取功名而儉忤多岸谷其為序班坐事下獄庶吉士章朴亦坐事下獄與相押言家有方孝孺集時方窮治孝孺黨善從借觀而密奏之上遂誅朴而復善官最後于謙王文之僂陳循等之竄皆有功焉善死或云見謙文為崇而李實者時以右都御史撫湖廣中旨奪職為民

李于鱗傳

明 王世貞

李于鱗者諱攀龍其家近東海自號滄溟云當其業成時海內學士大夫無不知有先生者而自其六七友人居恒相字故其為于鱗獨著于鱗之先世濟南歷城人父實以貲事德莊為郎善酒任俠不問家人生產繼娶於張夢日入懷而生于鱗生九歲而孤其母張影相弔也且緝繡不足以資修脯而自其挾冊請益塾師為之避席者數年補博士弟子與今左長史許君邦才少保殷公士修結髻亂交晉江王慎中來督山東學司于鱗文擢諸生冠然于鱗益厭時師訓詁學問側弁而峨若古文辭者諸弟子不晚何語咸相指于鱗狂生狂生于鱗蔑然不屑也曰吾而不狂誰當狂者亡何舉其省試第二人三年始成進士試吏部文選司其明年移疾歸久之疾良已同考順天試獲雋居多又明年授刑部廣東司主事于鱗既以古文辭創起齊楚間意不可一世學而屬諸曹無事悉取諸名家言讀之以為紀述之文厄於東京班氏姑其狡狴者耳不以規矩不能方員擬象成變日

新富有今天尚書莊子左氏檀弓考工司馬其成言班如也法則森如也吾撫其華而裁其衷琢字成辭屬辭成篇以求當於古之作者而已操觚之士不盡見古作者語謂于鱗師心而服求高以陰操其勝於人耳目之外而駭之其駭與尊賞者相半而至於有韻之文則心服靡言間蓋于鱗以詩歌自西京逮於大曆代有降而體不沿格有變而才各至故于法不必有所增損而能縱其風授神解於法之表句得而為篇篇得而為句即所稱古作者其已至之語出於筆端而不見跡未發之許為天地所秘者創出於胸臆而不為異亡論建安而後諸公有不徧之調于鱗以全收之即其偏至而不相角者不啻敵也當于鱗之為主事選員外郎以至山西司郎中曹事寢以劇守文法無害而其文日益進大司寇有著作輒以屬于鱗藉藉公卿間然于鱗竟無所造請于贊不為名計出曹羸馬蹙蹙歸杜門首一編矣其同舍郎徐中行梁有譽不佞世貞及吳舍人國倫宗考功臣相與切劘千古之事于鱗咸弟畜之為社會時有所賦咏人人

意自得最後于鱗出片言則人人自失也于鱗雅不欲以刀筆見長然其聰敏最號公平柄臣子銜邊帥不通賄中以法欲置之死于鱗持不可後其人卒自奮功名至大將俄出守順德問所以守順德者于鱗曰使吾僕僕途道事嚴客券鱗鞠臆睨上官之色而進之則具有所不能晨興坐堂皇揖屬吏考計延見鄉老問疾苦為興脫若承蜩笑于鱗之守順德可一戰所不報最則曰君子之至於斯也吾或未之見也奏記臺使者手自削牘牘多古文辭語為其名高也者而已之然于鱗高自洗濯勤於大要居久之政聲流通三輔前後尉薦亡慮數十隣郡嚴事于鱗若大府以故得請白諭志嘗觸馬牧地垂三千金留永濟倉粟毋灌輸京師以餉戍卒裁將作供比真定十之二益永年傳於沙河即鄆界中寬二邑力移鄆尉置鉅鹿官亭扼盜衝又移巡司黃榆嶺為晉趙關前後爭得之臺使者毋以難也于鱗又謂京師仰東南餉不時至而燕齊汴趙遼河百里而近者毋出賦錢皆賦菽粟浮於河達京師緩急一策也時頗趨之滿

三載贈父寶如子鱗官母張為太恭人尋擢陝西按察副使視其學政于鱗謂陝古西京也先朝士大夫北地外多陽浮慕古文辭而時雜之思以實反其始有徵矣亡何其鄉人股中丞來督撫以檄致于鱗使屬文于鱗不憚曰副使而屬視學政非而屬也且文可檄致即會其地多震動念太恭人老家居遂上疏乞骸骨拂衣東歸吏部才于鱗而欲留之度已發無可奈何為特請予告故事外臣無予告者僅于鱗與何仲然二人耳于鱗歸則構一樓田居東眺華不注

西邑鮑山曰它無所溷吾目也繡衣直指郡國二千石干旄屏息巷左納履錯於戶戶柰于鱗高枕何去亦無所報謝以是得簡貴聲而二三友人獨殷斯過從靡間時徐中行亦罷官家居坐客恒滿二人聞之交相快也于鱗乃差次古樂府擬之又為錄別諸篇及它文益工不脛而走四裔然居恒邑邑思一當世貞兄弟曰大兒孔文舉小兒楊德祖吾其季孟間哉而世貞則抱損不敢以鴈行進也大司空朱公衡時巡撫伺于鱗間迫之為置酒惟甚自是諸公推轂于

鱗者相踵而會今上初大徵召耆碩于鱗後用薦起浙江按察副使常視海道篆按數軍實一切治辦俄遷布政司左參政奉萬壽表入賀道拜河南按察使中州士大夫聞于鱗來鼓舞相慶而于鱗亦能摧亢為和圓方互見其客稍稍進無何而太恭人捐館扶服還里不勝毀病因父之小間尋暴心痛一日卒年五十七所著白雪樓集三十卷行於世子駒博學能文有父風

二孝子傳

明 耿定向

二孝子都逸其名氏予聞諸長老先生言為紀其大凡云其一丐子也行乞吳市中吳門有貴人月夜道橋上聽其下有歌唱聲者下觀之則丐子也坐一老嫗塊上以所丐得酒捧缶而跪進焉唱蓋以侑云貴人訝詰之丐子驚喜曰僕寡人聊為阿母歡耳貴人嗟良久歸明日轉相語稱異焉後時時人窺之見所娛其母者多類是自此諸貴人每宴輒置餘豆間曰以待孝乞兒也吳下至今口其事云其一居浙之長

興里蓋推魯人也獨事母有至性其舊業俱以養母故至衰落僅餘屋數椽矣其從父猶贏於貲一日飲諸婢呼孝子侍婢多豪貴人饌且賕甚孝子未及衆即私念曰令何緣得致我母前耶則時時目左右盼每伺賓所不顧急揭諸井脫品裹紙納袖中未見一再御即御若未嘗旨焉紙盡而袂已盈盈矣縮縮逡巡席間復私念曰令何緣客罷即致我母前耶會席闌酒酣主人出金卮酒貴客貴客不勝酒以卮置接簷間覆以瓦先問歸俄侍者報亡其卮衆客欲自明

約曰請急扃戶令人人袒檢之必得乃已孝子兩手捫袖中至羞澀也會卒不得計即謬曰由我詰出之則曰匿他所矣至後再詰之則又謬曰求諸所不得或為他人乘也奈何然當卒償之耳詰辰從父責所償孝子願鬻其屋且曰幸稍寬我俾先儼屋奉母居令無訝也不爾懼傷母氏心從父雖嗔恚聽其語亟道母氏已默然心動矣無何貴客憶前卮乃折簡主人語以故且曰昨蒼黃歸未有白也將無枉君家僕耶主人如言檢之得急呼孝子至孝子猶謬對如初從父曰痴兒吾業已得卮知非若矣顧若何苦自誑負不韙名孝子始吐實淚淋漓下曰某苦不能勉奉母氏歡而兒女態若此諸貴客在設令把我袖將大詰我且重為叔父羞故寧爾爾從父大感悟曰若欲孝乃力不能我即贏餘兩豚犬兒能似爾萬分一不耶乃召前坐工客遍語之曰是子如是如是恐與吾見二視哉卒三分其產令得終奉母氏焉聞其族里至今多禮讓人謂遺風所漸云

贊曰孔子有言啜菽飲水盡其歡斯之謂孝乃丐子

殆契是乎世之力能具五鼎八珍前羅而不能令其親一開顏者豈少哉令人脉脉感愴矣或曰行乞至詬耻辱親也不知彼營營競進者視乞墻行何殊矣究所止能以親顯不即懷肉至自誣事若甚駭可憫乃其顧養一念則古額封人奚加焉卒感叔氏風施後世有以也夫

李掾傳

明 耿定向

李掾者余里中人也名梅學初爲臬司幕下掾當世宗賓天詔下諸司哭臨時掾伏庭下哭獨哀督學顏冲宇氏義之因署司刑功曹云掾兄弟凡四人掾爲嫡且長餘孽子掾父廬諸孽而疏薄掾田宅便利者悉與諸孽故諸孽富厚而掾獨窘其大父不平欲訟諸官掾跪大父膝下泣曰弟吾手足父鍾愛弟即愛我奈何以腐鼠傷父意且也控孫訟子以子懟父匪桑大父乃已里人稱其讓尋母死掾廬墓所凡三

年往見廬墓者率爲廬居或爲窆乃掾焚焚獨棲莽間暑雨一蓋嚴冬一藁席耳又苦貧日不免以拮据生理出出必返即深夜必至墓所一夜至墓近溪潄忽雷雨暴作溪漲不可渡乃持蓋立溪上望墓踊號曰母兒在此母兒在此如是者連旦又一夜雪積數尺許隣有耆儒張姓者意掾苦雪或他之也深夜往矚之席藁卧雪中翳沒不可辨環視久之始見雪夜中隱隱一髻張蓋嗟嗟轉告人人近歲其父死亦廬墓側如喪母里人稱其孝掾前從事刑曹也憲長方

某氏亦廉其賢特令督臬獄舊吏督獄者值憲囚時可坐得若干金乃據受令即自榜獄中曰諸囚犯於刑者中多以賄故上令吾督獄者執法耳若干法而賄賄何如此囚一毫不以自浼且從家囊糧具體粥以飼囚之無告者又有囚法不應死據檢牘得其情請於憲長生之絕口不言恩其人懷百金致私為同曹據取後察知德由據也乃置酒飲間更薦幣加金為壽據艱然振手去人又稱其廉且仁云據往歲飾介紹謁余余重其行見之據故古貌又冠履敝惡賸

然一田夫也余間與友人談經史或舉其凡未悉其求或憶其意偶忘其辭據從旁代對每多助余始知據亦常涉獵經史者詢其少師里儒張高高師郭先生慶善甫善甫王父成之門弟子也其行誼蓋有本矣耿子曰夫也命夫其不幸而不生於元和永建之年乎藉令生丁其際父已公卿矣乃據故不善治生其家日落里人無識者咸矜其迂而行輩或反嫉其矯士貴遇乎哉雖然若原憲高柴輩得聖人為依歸則又不可謂不遇也據幸受知冲宇矣

歸氏二孝子傳

明 歸有光

歸氏二孝子予既列之家乘矣以其行之卓而身微賤獨其宗親隣里知之於是思以廣其傳焉孝子諱斌字汝威早喪母父更娶後妻生子孝子由是失愛父提孝子索大杖與之曰毋徒手傷乃力也家貧食不足以贍敗將熟即譏譏罪過孝子父大怒逐之於是母子得以飽食孝子數困匍匐道中比歸父母相與言曰有子不居家在外作賊耳又復杖之屢溺於死方孝子依依戶外欲入不敢俯首竊淚下鄰里莫

不憐也父卒母獨與其子居孝子擯不見因販鹽市中時私其弟問母飲食致甘鮮焉正德庚午大饑母不能自活孝子往涕泣奉迓母內自慚終感孝子誠懇從之孝子得食先母弟而已有饑色弟尋死終身怡然孝子少饑餓面黃而體瘠小族人呼為菜大人嘉靖壬辰孝子戲無疾而卒孝子既老且死終不言其後母事也繡字華伯孝子之族子亦販鹽以養母已又坐市舍中賣蔴與弟終締友愛無間繡以事坐繫華伯力為營救繡又不自檢犯者數四華伯所轉

責者計常終歲無他故才給蔬食一經官事耗其母錢終始無愠容華伯妻朱氏每製衣必三襲令兄弟均平曰二叔無室豈可使君獨被完潔耶叔之亡妻有遺子撫愛之如己出然華伯人見之以為市人也贊曰二孝子出沒市販之間生平不識詩書遭罹屯變無恒產以自潤而不變其行斯亦難矣華伯夫婦如鼓瑟汝威卒變頑嚚考其終皆有以自達由是言之士之獨行而憂寡和者視此可愧也

張司徒家傳

明 李維楨

張公名孟男字元嗣河南中牟人也少讀書郭外僧寮寄徑廢河白晝行旅斷絕公恒以鷄鳴中夜獨往來若有物前導者即雨淖不塗足同舍生跡之大驚知當似其速祖矣蓋公之先十二世有仕元為禮部尚書者云舉進士除廣平李官廣平燕趙之交其俗大氏精急高氣勢報仇過直輕為姦吏善舞文而公所摘發得情傳比中律一日可結竟大獄數十老胥抱案拱立然而簡易寬恕無鍛鍊周內以立聲名廣平人去後見思既用治行高等徵故事徵者詣侍御史及中丞臺辭皆有饗禮侍御史已與公為期質明謁中丞就邸中治具饗公比出而待御史憲公失期是夫謂旦暮給事省中據我上不屑就也中之銓曹出公丞漢中郎事白擢順天府治中已徙司寇尚書員外郎已徙宗伯省已徙尚璽丞治中威儀伍伯二人朱障泥裏壯荆馬首前唱喏司寇郎一人青障泥宗伯郎一人右執荆左執胡牀而已尚璽丞與治中同而腰帶無花不得執象笏都人為之語曰張公三宦

騶減半宦無厚橐帶花落象齒不足繼以竹是時高文襄以閣臣攝冢宰其夫人公姑也隆慶初徐文貞當國與文襄共事不相能既召用頗修卻而儉人爭寘力焉所舉進士為六曹郎者改除兩都臺省百許人貨行於言罪成於手皂囊白簡如蝸蟻矣鄉人河內武安之屬數招權顧金錢道路以目公守散曹罕交人事歲時起居夫人則文襄置酒便坐歡燕諧謔終不及他一日詰夫人卿家尚璽何為踈我夫人對曰天下事方在公掌握公不以妾故昵妾猶子猶子

不敢以私請公安知免矣當為公賀文襄笑曰卿言大佳少司寇曹公考文襄姻家與公抗志清妙外絕榮觀譽輯朝野標的當時謂之中州二室言其正體巍然也會先帝晏駕梓宮在殯太皇太后暨仁聖皇太后未封正酷暑俄傳三旨同下削文襄籍人心震駭門生故吏散走公驟馬之文襄即入其門無人門焉者入其閨無人閨焉者文襄反袂拭面涕沾袍怖哉諸大夫遂無化我也吾不早知子生無相見死無相哭公慰之曰四時之序成功者退公士之甚勇之

甚何為言此幸而退致足樂耳執筆食與四脰脯祖文襄於郊文襄下韋蒲木健而執手吾夜思子之言嘉子之行若熟之有濯也幣以為席鞍以為几大嚼而別江陵執政有震主之威為紳岐意於楚或勸公數候問之公不可卿者不昵吾戚而今親所踈乎君子比德以贊事不引黨以封己吾克位九列無職競焉即私見何所置辭長安奕棋吾慣習矣俛眉承睫諧附貴勢今安在哉殷鑒不遠君無復言江陵亦悉公不黨為丞四年遷少卿少卿一年遷卿卿三年遷

南京太僕少卿三年考績客言江陵遇公不薄何自外公曰執政以我不阿故相見知柰何員知己江陵均受禍視文襄烈矣公名愈重三年四遷自太僕太常太理三卿為少司空皆在南京三年考績以少司空行通政事又三年為少司寇為左司徒踰年為南司空未上移南司徒上不視朝中外言事多報聞罷或留中公為通政疏言祖宗朝日一再御門臣司日取事重大者請與諸大臣面計可否凡臣民封事急則應時裁決緩不過三日又摘起數引奏者至御前

承旨下之諸司上八月不視朝矣災異頻仍星辰繆越坤靈震動年穀不登人相食啖白骨委積臣聞人之於天也以道受命人之於人也以言受命不若於道者天絕之不若於言者人絕之羣臣久不見至尊進無所關其忠退而上書置不省覽人誰受命下閣上聳隔鬱幽滯天地否塞不亟采納施行欲以抹擬災異必不得之數也日者粵人翟縉祖輩稱故都御史李材功蔡人喜彥科輩訟故金曹世卿冤頌繫兵馬司索體不繼莫必其生虧損盛德臣職在喉舌責望所歸不任款款之忠上稍為聽受而中貴人閹說者謝絕之妄加詆譭居一歲請張杜口覆沒信眉則誦聲作矣留都賦積逋巨萬請重總督糧儲之權課殿最憑黜陟於是飛輓鱗次歲入數倍可支七年而諸郎分權者如蟻附羶為量豐約均勞逸差先後遞出入金夫不便也噴有煩言公力謝病歸散髮衡門若將終焉中外推轂舊臣以公為首五歲起家仍故官疏辭不允既至主者白金不滿五萬財足兵兩月餉憂賞不與焉公酌緩急定期會權貨遷通有無迨

憂而稟賜一無所誦士不呼庚癸商不得射時收倍稱之息府庫倉廩有贏而島寇播夷作難宮殿數災少府水衡時取給無乏長子早世守藏吏以百金調棺殮詰所從來曰羨也公愀然柰何以私喪廢公帑夫仲尼之於伯魚非耶卻不受修倉席竹故取諸司空公最得贖鍰二千建府庫左倉三厰司空不知也父而司空嘆曰廉不為名公之謂矣六年考績加太子少保益感奮華萼公家之務既病議分水先支倉儲及詔除虧折諸大利害伏枕具草以是勞瘁日甚凡五乞骸骨上優詔慰留而最後病力慕史魚屍諫為遣疏屬其子上之曰臣頂戴曲私越從濇泥歷事三朝年踰七十未博翰音實愧於懷臣故羸劣善病從間以來逆害飲食寢以沉困恐先狗馬填溝壑不能輸寫心力仰負隆天重地之恩視不可含伏惟陛下初載覽總大麓經營天物政非惠利不圖於心制非舊典不訪於朝百工允釐方陸無事今殊不然臣備員地官所徵賦於天下十不及一皆鬻男女割骨肉之餘也臣以催科為職臣職不廢而民病矣民為

邦本聚財以病民虐民以搖國有臣如此安所用之
頃者中人四布伐山竭澤算及鷄豚戶口消亡諸臣
法言巽語交滿公車臣何敢贊臣在官言官天下之
財止有此數財之所生止足其用諸所與利豈有異
術率巧名以費衆多方以剝下民之所有不增而官
之所收日廣則不得不浚民生計索而正賦又不敢
闕此臣所以持籌嘆息一日不能安其位也宇縣水
旱薦臻京邑死者枳路上方珠寶之奉河隄榷舊之
費歲無虛日六戚不保并為盜賊夫經大業者不在

兵威而在德澤濟大用者不在利權而在人心弘大
統者不在邊疆而在中國西夏底平緬酋授首倭闖
藩籬敗之絕域至神武矣曾不足補中國之虛耗解
萬姓之怨讟土崩瓦解勢甚可虞宜沛德澤收人心
強中國永延令緒在陛下一身無遠求也郊廟朝講
曠廢幾二十年六卿九列百司庶府間其無人鞠為
茂草言責官守之臣仰屋嘔嘆流涕相對疹穰妖孽
書不絕上史冊所罕聞見陛下無恐懼誠心無修省
實政第傳旨云宮中微惕令臣下致齋耳果有誠心

實政當復郊廟朝講如初年寒暑不輟然後引進羣
臣甄別邪正去者與衆捨之勿開僥倖之路留者與
衆用之勿滋屈抑之恨為官擇人不因人而廢官為
事責官不因官以誤事撤中使錄舊德停採造發帑
藏以代常供則德澤暢人心悅缺畝皆為囊筐閭閻
皆為金湯隱憂博禍庶有豸乎陛下聖神高出百王
失此不為至於根株交瘁兵食并訕雖欲改圖無及
矣鳥之將死其鳴也哀人之將死其言也善臣無善
言而切哀鳴非哀其身之死為陛下抱杞人之憂耳
伏惟憐察疏行明日而公卒士大夫讀其言而悲之
司寇趙公偕諸寮奏公清忠大節羽儀表著宜有殊
錫以旌鴻碩上下禮官議其宜贈太子太保遣內使
治葬祭有加等公歆而失母未仕而失父深用銜恤
入廟展墓諸哀端所觸淚數行下事仲父季父如事
父母所居園史凝塵飲食衣服器用猶惡終鮮兄弟
同氣之親綴食弗殊婚姻鄉黨施各有差年位彌高
不銘平昔時意中年有加賦數十年物力因以彫剋
白當事者蠲除之邑人歡若更生比尸祝焉口不

言人短所獎拔材俊士甚衆士無知者或知而稱謝
自詭曰無有鄉所擢公侍御史後亦官卿貳見公夷
然無幾微之間喜愧參并嘗讀書至克勤於國克儉
於家極賞其言服之終身中子孝廉民表有文學虛
靜恬淡宅心事外人倫之勝業也舊史氏曰昔者鄭
楚之攝也舉國若狂使鄭不可得親易使楚不可得
疎難余入仕四十年所見俗之移人約有四端理學
則貴虛無騰口說廉介則崇矯激夷等威謹正則多
建白競攻敏達則事繳繞擅紛更張公有一於是乎

司馬子長稱萬石建陵張叔其人皆長者而病塞侯
微巧周文處調漢興削觚爲圓宇內日化及乎武帝
朝稱說天下長者止此耳當今之時乃有張公豈易
也哉公素好史記繕寫數過於中有深會矣

王少湖先生敬臣傳

明 馮時可

野史氏曰夫學者博觀元覽猶必考信於躬行孔子
曰文莫吾猶人也躬行君子則吾未之有得然則爲
學在躬行若斯之切也而世儒紛紛務張皇以立門
戶苛說渺論出蒼天而入九淵綜厥行事曾不異於
奎之人此何以貴焉余雅多王先生行誼因載其事
以勵學者先生名敬臣陽湖王公庭子也始孩而倍
母畜繼母郝安人所以餌代乳故體甚羸稍長就外
傳誦書輒了了讀詩至野有死麕章廢卷曰孔子故
鄭聲而是詩何爲存哉必漢儒誤入其已刪者宋儒
承陋而不能辨耳陽湖公不能難也年十齡值清明
節書几云天何以清人何以濁天何以明人何以昏
見者驚其早慧陽湖轉國子博士先生年十四隨侍
長安誦四箴註悟孔子求仁之旨而嘆曰學在是矣
心者動之主心無妄念則非禮之動安從生夫天下
之事未有不攝於此心至其體習而心忘則至精所
感溢而神理爲之曲中如輪扁之斲規矩矩其精
殆也由是居處必以禮自準雖燕藥必正襟危坐無

情容踰數年父命先生應舉泣不忍離再被命始行陽湖雖久宦家無資斧先生歸而廬居甚隘則寄寓天王寺中驚書易象有饋餐者却之不已則書壁云不食嗟來食寧爲溝壑夫其人乃止饋年十九籍博士弟子員執贊謁莊渠魏公而考道焉時學者皆力爲奇傑文自振而先生獨默坐澄心曰學不聖賢雖虐詞凌厲君子不貴也年二十一婚盧氏女相見如賓朝夕共省郁安人而郁安人性卞急臧獲稍拂意即沈漬至毀器擊床先生宛解之者萬方不聽則跽而進湯安人擲之地因入寢室先生蒲伏待命未得久之天旦矣陽湖觀察建寧先生從游居二年陽湖請終養歸而先生當戶晨昏伏臘奉盥請柅觴豆饌饗無不窮親有招先生飲者以妓佐歡先生見曰吾何以衣冠坐塗炭邪稱疾而返自是遂絕燕會祖母俞得老疾先生進匕劑逾月不解帶既沒操踊號泣如孺子慕至見陽湖則拭淚不敢爲毀容陽湖服闋參藩江右而先生奉郁安人於家視疹瀝惟謹先後嫁妹者三皆傾橐以助衿襦愈於己女治閨內外井

井不施槌而舍中見無敢通飲食狎游者陽湖致其仕歸則先生每擊鮮邀文太史王吏部陸尚寶過爲親娛不令知所縣置陽湖出飲無論寒暑必逢衣大冠送於中堂戒侍者曰若任也乃公或飲逾量湏若節之迨歸雖夜分必擁篲迎於戶或風雨則逆諸途己酉歲得寒疾劇甚見所倚簣微傾曰此非得正而斃也侍者整之將死嘆曰長者在堂而身先蒿里哉死逾時復蘇經旬而愈則以陽湖命養病別墅次年始歸子舍而配盧氏夫郁安人驢先生曰身不行道不行於妻子閉戶省愆不御內者十有三年陽湖疽發於背先生親自吮吮臥床下者數月陽湖慰令少休無苦也卒不敢寧戊午歲郁安人終哀如喪祖母三年未嘗見齒人不知爲繼母也既而長子卒陽湖爲置二勝人先生雅不歡也陽湖曰若虞燕女溺志而不虞我一綫恩哉先生乃勉從數歲不乳竟謝遣之甲子督學耿公聞其行超格貢焉強之赴京以親老力辭即邑或交以篚謝不納而惟以防金惠三族曰此國恩也願共霑之陽湖老而足不良於行先生

復絕內移床倚親所卧如是者三年久之陽湖病轉劇一夕十數便先生卧不交睫微聞警歎則躍然起立爲代鳩扶未幾陽湖捐館則哀如喪郁安人者遺田數百畝以其租贍三族曰此父遺命也宗人莫不感泣相率而喪陽湖總者如功功者如暮至賓客慕義而賻賻者亦視喪郁安人什倍矣先生鮮兄弟友愛諸從疴癢如其身諸表姪率子視焉聞館舍勵之學婚嫁必任不以歲誦辭至其自奉則一食脫粟終歲單絀蓋五十年如一日也嘗命僕以銀器質子錢

家誤與金器促僕還之子錢家勞僕以布僕不受也曰主行德而我顧爲利乎陽湖嘗謁客歸途過他家僕倚醉踞而詈與人辟之其人逾益詬詈直至廳事呼姓名撞擊戶扉諸蒼頭忿欲復之先生曰是人下遲必死若無庸輕六尺以與較婉言謝之其人歸不數日死里中服其早見先生嘗謂議論不如著述著述不如躬行故遇人多杜口不談自見耿公公勗之曰子須以言論素後人聖賢無獨成之學俗雖敝不可諉也由是多所勸諭五十以後弟子來從

游者四百餘人或刻厲相責談一意事聖賢學不爲兩端自解諸賓客聽講者戶外趾常獵獵諸生以二六日會禪興寺辨論鋒起先生徐以約言定之莫不浹然水釋嘗云學者不可標立門戶門戶若立增長言詮爲弊滿大吾道至公至大惟不見乎道則有是非有彼我苟見乎道則方寸大觀物無不可萬派千枝不離於一又何是非彼我哉先生於學無所不窺而猶以慎獨爲標的曰聖賢論學總先於慎獨身體之自可見慎獨之要曰研幾也審則也盡之矣幾善惡也研之而後知否則混於惡矣則帝衷也審之而始得否則雖善而下猜非天命人心之本體矣又曰親長之際祗席之間慎獨之基本乎薄其基何以成九仞之山也哉其本何以發千霄之木也又曰學者眼界不高則不足以達神化胸襟不大則不足以俾天地骨格不堅則不足以負荷無窮聽其言者興起甚衆吳俗慕親晉故逸咨雅儀檢先生益循以法冠婚喪祭儀節品式準於家禮遠邇相倣雋者不敢踰厲而拙者有所遵循自是風俗一變先生檢擇若處

子而奮迅行義則如壯夫慈愛若桑門而諄切誨人則若嚴師其與門弟子所稱述皆庸言庸行無有驚世駭俗之論至於優而柔之曲而暢之使人日改月化而不自知則有出於言語動作之外矣余自黜歸與先生談推學問甚洽也曾與予論文曰余州四部吾懼其啓學者以靡聞也徐廸功著撰甚富而行者三四卷吾貴其能捨矣彼不能捨者有三多欲也好勝也自是而不知也有是三者斯賊道哉又曰六經文之本也今之爲文者舍六經而效子史本之則無譬之祠惡池以爲河祀配林以爲岱何當耶諸生有專事靜坐者有汎覽子史者先生曰靜坐則繫心博觀則奪志豈所謂主一無適而通達萬變者哉自是諸生學之有鵠矣先生不尚言而言自藹然聽之有味不工文而文自斐然玩之無窮所著有父訓家禮纂游武夷記行於世馮子曰天下之言學術者衆矣守虛靈者以溟滓爲宅執象器者以筌蹄爲奧猖狂叫呶詭僻固陋而不自知其非至其下者則佔俾爲學齒頰爲師卑卑焉以逐時好取世資而已矣尋常

踐履視爲贅行若夫嚴於屋漏以對越上帝人域是域以上達天德獨先生有焉昔蔡中郎作碑惟郭有道無愧余之傳先生也亦然

傳三	列女	家乘	自述	方外	技術	諷諭	廝役	假託
----	----	----	----	----	----	----	----	----

傳	列女							吏
---	----	--	--	--	--	--	--	---

龐娥親傳

晉 皇甫謐

酒泉列女龐娥親者表氏龐子夏之妻祿福趙君安之女也居安爲同縣李壽所殺娥親有男弟三人皆欲報讎壽深以爲備會遭災疫三人皆死壽聞大喜請會宗族共相慶賀云趙氏疆壯已盡唯有女弱何足復憂防備懈弛娥親子清出行聞壽此言還以啟娥親娥親既素有報讐之心又聞壽言感激愈深愴然隕涕曰李壽汝莫喜也終不活汝戴履天地爲吾門戶吾三子之羞也馬知娥親不手刃殺汝而自斃倖和陰市名刀挾長持短晝夜哀酸志在殺壽壽爲人凶豪聞娥親之言更乘馬帶刀鄉人皆畏憚之比鄰有徐氏婦憂娥親不能制恐逆見中害每諫止之曰李壽男子也凶惡有素加今備衛在身趙雖有猛烈之志而強弱不敵邂逅不測則爲重受禍於壽絕滅門戶痛辱不輕也願詳舉動爲門戶之計娥親曰父母之讐不同天地共日月者也李壽不死娥親視息世間活復何求今雖三弟早死門戶泯絕而娥親猶在豈可假手於人哉若以御心況我則李不可得

殺論我之心壽必爲我所殺明矣夜數磨礪所持刀訖扼腕切齒悲涕長歎家人及鄰里咸共笑之娥親謂左右曰卿等笑我直以我女弱不能殺壽故也要當以壽頸血汚此刀刀令汝輩見之遂棄家事乘鹿車伺壽至光和二二年二月上旬以白日清時於都亭之前與壽相遇便下車扣壽馬叱之壽驚愕迴馬欲走娥親奮刀斫之并傷其馬馬驚壽擠道過溝中娥親尋復就地斫之探中樹蘭折所持刀壽被創未死娥親因取壽所佩刀殺壽壽護刀瞋目大呼跳梁而起娥親乃挺身奮手左抵其額右掩其喉反覆盤旋應手而倒遂拔其刀以截壽頸持詣都亭歸罪有司徐步詣獄辭顏不變時祿福長漢陽尹嘉不忍論娥親卽解印綬去官弛法縱之娥親曰讐塞身死妾之明分也治獄制刑君之常典也何敢貪生以枉官法鄉人聞之傾城奔往觀者如堵馬莫不爲之悲喜慷慨嗟歎也守尉不敢公縱陰語使去以便宜自匿娥親抗聲大言曰枉法迷死非妾本心今讐人以雪死則妾分乞得歸法以全國體雖復萬死於娥親

畢足不敢貪生為明廷員也尉故不聽所執娥親復
言曰匹婦雖微猶知憲制殺人之罪法所不縱今既
犯之義不可逃乞就刑戮願身朝市肅明王法娥親
之願也辭氣愈厲而無懼已尉知其難奪彊載還家
涼州刺史周洪酒泉太守劉班等並共素上稱其烈
義刊石立碑顯其門閭太常宏農張奐貴尚所履以
東帛二十端禮之海內聞之者莫不改容贊善焉大
其義故黃門侍郎安定梁寬述述娥親為其作傳

楊烈婦傳

唐 李 翱 文粹

建中四年李希烈陷許州既又將盜陳州分其兵數
千人抵項城縣蓋將掠其玉帛俘繫其男女以會於
陳州縣令李侃不知所為其妻楊氏曰君縣令也冠
至當守力不足死焉職也君如迷則誰守侃曰兵與
財皆無將若何楊氏曰如不守縣為賊所得矣倉廩
皆其積也府庫皆其財也百姓皆其戰士也國家何
有奪賊之財而食其食重賞以合死士其必濟於是
召胥吏百姓於庭楊氏言曰縣令誠主也雖然歲滿
罷去非若吏人百姓然吏人百姓邑人也墳墓在焉
宜相與致死以守其節忍失其貞而為賊之人耶眾
皆泣許之乃徇曰以瓦石中賊者與之千金以刀矢
傷之者物中賊者與之萬錢得數百人侃率之以乘
城陽氏親為之費以食之無長少必周而均侃使與
賊言曰項城父老義為不賊矣皆悉力守死得吾城
不足以威不如亟去徒失利無為也賊皆笑有強箭
集於侃侃傷而歸楊氏責之曰君不在則人誰肯固
矢與其死於城下猶愈於家乎侃遂忍之復登陴項

城小邑無長戟勁弩高城深溝之固賊氣吞焉卒其
徒將從起城而下有以弱弓射者中其帥墮馬死其
帥布烈之婿也賊失勢相與散走項城之人無傷焉
刺史上侃之功詔遷絳州太平縣令楊氏至茲猶存
婦人女子之奉父母舅姑盡恭順和於娣姒於卑幼
有慈愛而能不失其貞者則賢矣辨行陣明攻守勇
烈之道此固公卿大臣之所難厭自兵興朝廷注意
龍旌守禦之臣憑堅城深池之險儲蓄山積貨財自
若冠胄服甲弓矢而馳者不知幾人其勇不能戰其
智不能守其忠不能以死棄其城而走者有矣彼何
人哉若楊氏者婦人也孔子曰仁者必有勇楊氏當
之矣

李翱曰凡人之情皆謂後來者不及於古之人賢者
自古亦稀况獨後代邪及其有之與古人不殊也若
高懸女楊烈婦者雖古烈女其何加焉予想其行事
湮滅而不傳故皆叙之將告於史官

竇烈女傳

唐杜牧

烈女竇氏小字桂娘父良建中初為汴州戶曹接桂
娘美顏色讀書甚有文李希烈破汴州使甲士至良
門取桂娘以去將出門顧其父曰慎無戚必能滅賊
使大人取富貴於天子桂娘既以才色在希烈側復
能巧曲取信凡希烈之密雖妻子不知者悉皆得聞
希烈歸蔡州桂娘嘗謂希烈曰忠而勇一軍莫如陳
先奇其妻竇氏先奇罷且信之願得相往來以姊妹
叙齒因徐說之使堅先奇之心希烈然之桂娘以姊
事先奇之妻嘗問謂曰賊兇殘不道遲晚必敗如宜
早圖遺種之地先奇妻然之興元元年四月希烈暴
死其子不發喪欲盡誅老將校以卑少者代之計未
決有獻含稅者桂娘曰希烈子請分遺先奇妻且以
示無事於外因為臘帛書曰前日已死殯在後堂欲
誅大臣希烈臣烈須自為計以來染白凡如含稅先奇
祭九見之言於薛育曰兩日希烈稱疾但佐藥曲雅
祭晝夜不絕此乃有謀未定示暇於外事不疑矣明
日先奇薛育各以所部兵謀於衙門請見希烈子迫

出拜曰願公為號一如李納時正已死先奇曰爾父

悖逆天子有命因斬希烈及妻子亟匕首以獻暴其

尸于市後兩月吳少誠殺先奇知桂娘謀因亦殺之

請試論之希烈負桂娘者但劫之耳希烈僭而桂娘

妃復寵信之於女子心始終希烈可也此誠知所去

所就逆順輕重之理明也能得希烈權也姊先奇妻

智也終能滅賊不顧其私烈也六尺男子有祿位者

當布烈叛與之上下者眾矣此豈才力不足邪蓋義

理苟至雖一女子可以有成大和元年予客遊于汾

陽路出荊州松滋縣攝令王港為某言桂娘事港年

一十歲能念五經舉童子及第時年七十五尚可日

記千言當建中亂希烈與李納田悅朱泚朱滔等僭

詔書徵爭戰勝敗地名人名悉能記之聽說如一二

日前言竇良出于王氏竇港之堂姑子也

竇烈婦傳

唐司空圖文粹

河南竇氏朝邑令畢某之妻也四年秋同民叛其帥

李德裕走蒲令挈其孥竄望仙里既夕盜作乃仇家

也持令壞其首志必死之令妻蔽捍泣且拜益急乃

持其袂重傷猶不置令竊視竟得逃匿而免里人列

狀於府賚之酒帛暨亦馳乘而至幾死者數矣連逾

月方克偕全愚寓居渭濱得傳聞於里中梁生生言

孫史續者苟當和平紀王庭琛瑞之美誠幸矣然傑

異之操化葉宗族里閭俾男必為貞夫女必為烈婦是

有國有家皆賴之豈徒炫於視聽哉愚以為知言乃

著其傳贊曰蓄千金之資雖云憂患尚有不妄其室

者況臨危觸難何以相保哉且婦人女子扣盃足以

駭之而白公之下獨不顧死以免其夫是果能一於

所從而不悔者也豈化漸之有所自也吾知為臣為

妾者必繼有其人免貽史氏之愧矣

節婦馬氏傳

元 元明善

馬氏參知政事楊公居寬之繼室錢唐民家女也至元十四年桑葛奏立尚書省奪中書樞要又以計傾罷之先誣居寬等死沒入其帑以馬氏賜衛士馬氏託狂疾叫呼遺矢溺不可近竟免侵迫楊氏陰贖之歸遂削髮廬墓誓死不嫁後桑葛敗事得昭雪而馬氏以無子乞歸錢唐養其獨親楊氏許之日紡績給食凡十有餘年大德七年十月乳生瘍或曰當迎醫不尔且危馬氏曰吾楊氏寡婦也寧死此疾不可男

子見竟死時年四十餘嗚呼節義於人大矣一或執之不變雖孱夫弱婦使強悍之人降心相下何乃英聲壓世而臨利害之頃一失所守無異禽犢死等尔不義而生無寧義死此烈丈夫之所以焜耀也馬氏亦足稱哉

六烈女傳

明 李夢陽

儒生劉德舉來言六烈女事李子聞之泣然而涕出劉生曰夫子奚慟也李子曰予益傷焉臣不終云於乎死生亦大矣往逆瑾之亂予實丁焉當是時人士大都以昧行問之曰救死爾又曰死瑾無謂於乎死生亦大矣彼紛紛笄褱之人乃顧若是烈邪自死瑾無謂之說興於是昧者公言於朝羣議於巷偶語於途以逮至則問金多少為罪重輕於是天下吏日考掠柱拮之咸金通也下歛而上聚公簿而顯輸曰姑救死爾夫為臣宜若是否耶設靡昧瑾能盡死之耶於乎死生之際難矣彼粉黛笄褱之人乃顧若是烈耶予益傷焉於是作六烈女傳

陳氏者陳傑女也年十八聘楊瑄居無何瑄卒女痛哭將死之父母不許欲往哭瑄又不許女則竊剪髮屬珠氏往置其夫懷汴俗聘女生年月日朱綺金子與男家號定婚帖於是瑄母以定婚帖襲其髮懷瑄葬焉而女乃遂卸容飾素笄縞衣居無幾父母謀改聘女縊而死天順五年六月十一日也後五十三年

爲正德甲戌瑄有姪永康者改葬瑄而求陳氏骨合
馬二骨朽矣髮定婚帖獨鮮完劉生曰葬之三年而
岐穀了爪產之墓李子曰世人益多言青陵臺事予
竊疑爲連理之木比翼之禽今以岐穀了爪觀之不
其信邪

張氏者李傑妻也年十八歸傑踰年而夫病且死怪
其手訣曰我死汝必更然善侍後人矣妻泣矢之曰
君死妾死不顧更也傑死張氏謂棺匠曰棺大之夫
性喜寬大也其父母曰棺第狹之勿大匠從其父母
狹其棺張氏哭毀其狹棺曰不大不棺也棺成自縊
而死

高氏者夏永昌妻也嫁三月而永昌病死高氏欲從
之然家人防之嚴則日主前焚香竊祝曰永昌俟我
其母知之泣謂之曰汝今十九年耳奈何輕死高氏
曰嗟母謂百年永耶然均死耳竟縊死

劉氏者魏相妻也相之死也祖姑王媿婦有決志乃
引婦登樓同寢婦哭之連旦不輟聲已絕其祖姑曰
我幾渴甚祖姑信之下樓取水食婦以手巾二幅接

縊於梁上年二十一矣

王氏者孫林妻也林病貧無以療王氏賣衣辦湯藥
夜籲天祈身代之林死則匍匐哭不絕聲水漿不入
口者二日乃潛詣後園桑樹自縊死

張氏者田孝子妻也孝子曰田銳嘗割股療母病母
死廬墓三年於是稱田孝子云孝子有甥宿舅鋪而
夜殺其鄰鋪客盜其財於是逮孝子獄無何孝子死
出其屍塋爲之崩張氏之死也或勸之矣則恸哭曰
我與田銳夫婦二十年矣彼既爲孝子我獨不得爲

節婦耶竟死

今按六女者皆祥符郭門西人也六十年間烈者六
焉足謂之興矣聞風者激抑地之靈使然耶李子曰
予以六女而重傷時俗之偷也孔子曰匹夫不可奪
志乃人不欲死顧詭人曰我死弗獲死今以六女事
觀之然邪否邪夫鉅鑊之嚇盈諸耳甘綺之誘戰於
中人鬼之間湏臾是決乃六女者方視死如歸求亡
如飴道間伺隙如探金樓玉惟恐後時而弗獲也斯
其死可奪邪不可奪邪夫粉黛笄偉之人至微也窮

聞敵聞傾頽下賤之女非有閨閣之儲文史之訓父兄之指揮聞見之聞卓也而一旦有如此者彼冠裳鳴珮之夫口先王而講詩書者乃往往狼貪而狗生患難之至不化爲齏粉則永決鼠竄矣於乎極矣予於六女安得不重傷時俗之偷也劉德舉曰斯舉也予倡首義於鄉人復白其事於官司災業爲六女立廟廊西贊曰貴非必爵揮豈惟華有碎而完有凶而嘉於烈陳女甘心未嫁槁骸竟變並蒂則瓜岐穗離離載嘉者永五女繼興奮義執情墮軀捨生展哉令名於惟六女生猶鴻毛死而遽巍山岳其高瞻廟者拜通里者式無貴無賤無識不識即跡揆心持獨驗同古今一感人心至公熊掌取譬凡全是恥爾忠爾孝敢告君子

孝烈婦唐貴梅傳

明 楊 慎

烈婦姓唐氏名貴梅池州貴池人也笄年適朱姓夫貧且弱有老姑悍且淫少與徽州一富商有私宏治中富商復至池一見婦悅之自拊心曰吾無頭風何以老嫗虛拘哉乃密以金帛賂其姑姑利其有誨婦淫者以百婦勿聽迫之弗聽加以箠楚弗聽繼以炮烙體無完膚終不聽乃以不孝訟於官通判慈谿毛王亦受商之賂倍加官刑幾死者數商猶慕其色冀其改節復令姑保出之親黨或勸其吐實婦曰若然全吾名而汙吾姑非孝也及夕易袿獨經於後園古梅樹下及旦姑不之知也將入其室挺之手持桑枝且罵且行曰惡奴蚤從我言又得金帛且享歡樂今定何如而自苦乎入室無見尋之至樹下乃知其死姑大慟哭之親黨咻之曰生既以不孝訟之死乃稱嫗心何哭之慟姑曰婦在吾猶有望婦死商人必倒贓吾哭金帛不哭此惡奴也尸懸於樹三日顏如生樵夫收兒咸爲墮淚每歲梅月之下影影見其形冉冉而沒有司以礎於府官之故終不舉余曷氏喻

士積薄遊至池州稔聞其事作詩予之歸屬慎為傳其事嗚呼婦生不辰遭此悍姑生以梅為名死於梅之株水操霜清梅乎何殊既孝且烈汗青宜書有司失職嗟哉可吁乃為作傳以附露筋碑之附

莊節婦傳

明 吳國倫

太史公嘗悲巖穴之士名湮滅而不稱嗟乎巖穴之士猶有稱者而獨處身泥垢若所謂男而脅婢女而婦奴即有奇節不得負青雲之士以傳豈賤其人而羞稱之乎夫管仲父之舉甯戚也以婢知其詩周大夫有其婢賢為能忍辱甘死以全其主父母不可謂細行矣曾不得少掩見至如翟家婢青死其主女即因主女見列由古及今其不得有所因而稱者又何可勝數予予所聞里中莊八兒死節事竊不勝其悲矣八兒郡富口人莊寧女寧父祖三世為莊家奴遂冒莊姓八兒年十六嫁劉學良學良亦人奴子越一年病卒葬舍傍八兒執喪甚哀日舉案進食哭奠于墓妻絕復甦久之為舅姑所厭欲嫁之八兒以死拒又數月有少年傭耕者見八兒悅之求為贅婿其舅姑業已納聘而使八兒母從更之八兒自度不能抗佯許焉傭遂為期以請至期八兒與其姊方晨舂私謂姊曰明日不相舂矣姊不解其意少還又與市易簪曰他日見簪母相忘如益疑之至暮忽改新粧出

拜舅姑舅姑不知其訣也以爲將受婿而喜之須臾
入室自經死夫八兒以人奴子爲人奴婦至微賤矣
又年少質弱即依違其舅姑非有門閥可損質訓可
辱也顧獨視再適爲汚而甘死若飴茲不凜凜丈夫
女哉彼以富人子而有文君名人子而有文姬豈得
與八兒論貴賤哉語曰金生沙礫珠出汚泥信矣信
矣

傳

家乘

上谷郡居家傳

程 順

先妣夫人姓侯氏太原盩厔人行弟二世爲河東大姓曾祖元嵩當五代之亂以武勇聞劉氏偏據日錫士於烏河川以控寇盜亡其爵位父道濟始以儒學中科弟潤州丹徒縣令贈尚書比部員外郎母福昌郡大君刁氏夫人幼而聰悟過人女工之事無所不能好讀書史博知古今丹徒君愛之過於子每以政事問之所言雅合其意常嘆曰恨汝非男子七八歲時常教以古詩曰女子不夜出夜出秉明燭自是日

暮則不復出房間刁夫人素有風厥之疾多夜作不知人者久之夫人涕泣扶持常連夕不寐年十九歸于我事舅姑以孝謹稱與先公相待如賓客德容之盛內外親戚無不敬愛衆人游觀之所往往捨所觀而觀夫人先公賴其內助禮敬尤至而夫人謙順自牧雖小事未嘗專必稟而後行仁恕寬厚撫愛諸庶不異已出從叔幼姑夫人存視常均已子治家有法不嚴而整不喜笞扑奴婢視小藏獲如兒女諸子或加呵責必戒之曰貴賤雖殊人則一也汝如是大時

能爲此事否道路遺棄小兒屢取養之有小商出未還而其妻死兒散逐人去惟幼者始三歲人所不取夫人懼其必死使抱以歸時聚族甚衆人皆有不欲之色乃別糴以食之其父歸謝曰幸蒙收養得全其生願以爲獻夫人曰我本以待汝歸非欲之也好爲藥餌以濟病者常大寒有負炭而擊者家人欲呼之夫人勸止慎勿爲此勝則貧者困矣先公凡有所怒必爲之寬解唯諸兒有過則不掩也常曰子之所以不肖者由母教其過而父不知也夫人男子六人所存唯

二其愛慈可謂至矣然於教之之道不絕也纔數歲行而或陪家人走前扶把恐其驚啼夫人未嘗不呵責曰汝若安徐寧至陪乎飲食嘗置之坐側嘗食絮羹皆叱止之曰幼求稱欲長當如何雖使令輩不得以惡言罵詈之故順兄弟平生於飲食衣服無所擇不能惡言詈人非性然也教之使然也與人爭忿雖直不石曰患其不能屈不患其不能伸及其稍長常使從善師友游雖居貧或欲延客則善而爲之具其教女常以曹大家女誡戒之嘗教告家人曰見人

善則當如己善心共成之視他物如己物必加愛之
先公罷尉廬陵赴調寓居歷陽會叔父亦解掾毗陵
聚口甚衆儲備不足夫人經營轉易得不困乏先公
歸問其所爲嘆曰良轉運使才也所居之處鄰婦里
妯皆願爲之用雖勞不怨始寓丹陽僦葛氏舍以居
守舍王氏翁妯庸狡前後居者無不苦之夫人待之
有道遂反柔良及遷去王妯涕戀不已夫人安於貧
約服用儉素親戚問紛華相尚如無所見少女方
數歲忽失所在乳妯筆悲泣叫號夫人罵止之曰在

當求得苟亡失矣汝如是将何爲在廬陵時公字多
恠家人告曰物弄扇夫人曰熱爾又曰物擊鼓夫人
曰有槌乎可與之後家人不復敢言恠恠亦不復有
遂獲安居夫人有知人之鑒姜應明哲中神童第人
競觀之夫人曰非遠器也後果以罪廢順兄弟幼時
夫人勉之讀書因書綫貼上曰我惜勤讀書兒又並
書二行前曰殿前及第程延壽先兄幼時名也次曰
處士及先兄登第願以不才罷應科舉方悟夫人知
於童穉中矣寶藏手澤使後世子孫知夫人之精鑒

夫人好文而不爲辭章見世之婦女以文章筆札傳
於人者深以爲非平生所爲詩不過三二篇皆不存
獨記在歷陽時先公觀親河朔夜聞鳴鴈至爲詩曰
何處驚飛起雖離過草堂早是愁無寐忽聞意轉傷
良人沙塞外羈妾守空房欲寄迴文信誰能付汝將
讀史見姦邪逆亂之事常掩卷憤嘆見忠孝節義之
士則欽慕不已常稱唐太宗得禦戎之道其識慮高
遠有英雄之氣夫人之弟可世稱名儒才智甚高常
自謂不如夫人自少多病好方餌修養之術甚效從

先公官領外偶迎涼露寢遂中瘴癘及北歸道中疾
革召醫視脉曰可治謂二子曰紹爾也未終前一日
命順曰今日百五爲我祀父母明年不復祀矣夫人
以景德元年甲辰十月十三日生於太原皇祐四年
壬辰二月二十八日終於江寧享年四十九始封壽
安縣君追封上谷郡君

周宜人傳

明 羅洪先

員外公配周氏余王大母也以先大夫貴始贈安人
進宜人父德柔祖叅議公紀宜人長宦卽貴重矣比
歸員外公主家政故無長物食指繁日有賓客之事
經衛公剛嚴難事飲食供具稍違程節輒詬怒不御
員外公率諸孫跪解或竟日不得命宜人自入門兢
兢掄過以織紵補不給聞堂上詬怒聲卽以手自撻
含涕向杼袖亦竟日不敢食諸妯娒慰勞良苦宜人
曰我不善爲婦取怒翁大人非翁大人苦我也自非
大疾病與大故未嘗一日不在杼袖間亦未嘗一日
不簪簪含涕然竟不能令家有長物先大夫在三子
中最善事母宜人亦鍾愛之先大夫從外傳晝歸宜
人顧曰兒饑來卽卽投杼取殘食哺之先大夫見突
無煙受食返半意以讓母也宜人曰何不盡啖先大
夫曰我飽固不能強宜人心憐之撫其首遣曰我兒
何慧也卽又反面涕泣然承睫下不忍令兒見之嗚
呼悲矣宜人年三十九夭於產難後二十四年而員
外公卒余皆不得見第歲時侍先大夫御燕私或節

序持觴爲壽輒掩泣曰天乎胡不令我父母嘗醬肉
庖酒少厭兒心乎因自述少時事若此又言宜人背
棄後從外傳不能償束脩傳強持書篋去乃發憤自
閉空舍中誦書父不我省也一日聞書聲從戶外窺
曰汝能然乎則又掩泣曰使母在能織紵斷不令我
至此嗚呼吾從兄弟且八九子侄十餘人皆宜人之
一身也此數十人皆今且餘蠹書而殘鼠惡矣家無
嗚嗚之戚人員訖訖之色雖強之學不從也而見人
菜色鵲衣者卽族屬莫肯與揖卽相揖首不俯目且
流視彼知昔日何如哉公與宜人日遠先大夫遺言
不聞將無有見遺器而訕譏者乎噫嘻

傳

自述

五柳先生傳 并贊

晉 陶 潛

先生不知何許人也亦不詳其姓字宅邊有五柳樹因以爲號焉閒靖少言不慕榮利好讀書不求甚解每有會意便欣然忘食性嗜酒家貧不能常得親舊知其如此或置酒而招之造飲輒盡期在必醉既醉而退曾不吝情去留環堵蕭然不蔽風日短褐穿結簞瓢屢空晏如也常著文章自娛頗示已志忘懷得失以此自終贊曰黔婁有言不戚戚於貧賤不汲汲於富貴味其言茲若人之儔乎酬賜賦詩以樂其志

無懷氏之民歟葛天氏之民歟

五斗先生傳

王勣

有五斗先生者以酒德遊於人間有以酒請者無貴賤皆往往必醉醉則不擇地斯寢矣醒則復起飲也常一飲五斗因以爲號焉先生絕思慮寡言語不知天下之有仁義厚薄也忽焉而去倏焉而來其動也天其靜也地故萬物不能榮心焉嘗言曰天下大抵可見矣生何足養而稽康著論途何爲窮而阮籍慟哭故昏昏默默聖人之所居也遂行其志不知所如

醉吟先生傳

白居易

醉吟先生者忘其姓字鄉里官爵忽忽不知吾爲誰也宦游三十載將老退居洛下所居有池五六畝竹數千竿喬木數千株臺榭舟楫具體而微先生安焉家雖貧不至寒餒年雖老未及耄性嗜酒耽琴淫詩凡酒徒琴侶詩客多與之游游之外棲心釋氏通學小中大乘法與嵩山僧如滿爲空門友平泉客韋楚爲山水友彭城劉夢得爲詩友安定皇甫朗之爲酒友每一相見欣然忘歸洛城內外六七十里間凡觀寺卽墅有泉石花竹者靡不遊人家有美酒鳴琴者靡不過有圖書歌舞者靡不觀自居守洛川韋布衣冠加以宴遊召者亦時時往每良辰美景或雪朝月夕好事者相過必爲之先拂酒壘次開篋詩酒既酣乃自援琴操宮聲弄秋思一遍若興發命家僮調法部絳竹合奏霓裳羽衣一曲若歡甚又命小妓歌揚柳枝新詞十數章放情自娛酺而後已往往乘興復及鄰杖于卿騎遊都邑肩舁適野舁中置一琴一枕陶謝詩數卷舁竿左右懸雙酒壺尋水望山率情便

去抱琴飲酌興盡而返如此者凡十年其間日賦詩約千餘首日釀酒酌數百斛而十年前後賦釀者不與焉妻孥弟侄慮其過也或譏之不應至于再三乃曰凡人之性鮮得中必有所偏好吾非中者也設不幸吾好利而貨殖焉以至于多藏潤屋賈禍危身奈吾何設不幸吾好博奕一擲數萬傾財破產以至于妻子凍餓奈吾何設不幸吾好藥損衣以食鍊鉛燒汞以至于無所成有所誤奈吾何今吾幸不好彼而自適于杯觴諷詠之間放則放矣庸何傷乎不猶愈于好彼三者乎此劉伯倫所以聞婦言而不聽王無功所以遊醉鄉而不還也遂率子弟入酒房環釀饗箕踞仰面長吁太息曰吾生天地間才與行不逮于古人遠矣而富于黔婁壽于顏淵飽于伯夷樂于榮啟期健于衛叔寶幸甚幸甚餘何求哉若捨吾所好何以送老因自吟咏懷詩云抱琴榮啟樂縱酒劉伶達放眼看青山任頭生白髮不知天地內更得幾年活從此到終身盡爲閒日月吟罷自哂揭甕撥醅又飲數杯兀然而醉既而醉復醒醒復吟吟復飲飲復

醉醉吟相仍若循環然緣是得以夢身世雲富貴幕席天地瞬息百年陶陶然昏昏然不知老之將至古所謂得全於酒者故自號爲醉吟先生于時開成三年先生之齒六十有七鬢盡白髮半禿齒雙缺而觴咏之興猶未衰顧謂妻子云今之前吾適矣今之後吾不自知其興如何

江湖散人傳

唐 陸龜蒙 文粹

散人者散誕之人也。心散意散，形散神散，既無羈限。為時之怪民，束於禮樂者外之。曰：此散人也。散人不和，社從而稱之人，或笑曰：彼病子之散，而目之子，反以為其號何也？散人曰：天地大者，也在太虛中一物耳。勞乎履載，勞乎運行，差之晷度，寒暑錯亂，望斯湏之散，其可得和水土之散，猶有用乎水之散，為雨為露，為霜雪水之為，為瀦為如，為潢為汙，土之散，封之可崇，穴之可深，生可以藝，死可以入土之為，墳不可以為埏埴，不可以為孟，得非散能通于變化，為不能耶？退若不散，守名之莖，進若不散，執事之權，莖可守耶？權可執耶？遂為散歌，傳以志其散。

補亡先生傳

宋 柳開

補亡先生，舊號東郊野夫者也。既著野史，後大探六經之旨，已而有包括揚孟之心，樂為文中子、王仲淹、齊其述作，遂易名曰開。字曰仲塗，其意謂將開古聖賢之道于時也。將開今人之耳目，使聰明明也。必欲開之為其塗矣。使古今由于吾也。故以仲塗字之。表其德焉。咸曰：子前之名甚休美者也。何復易之不若無所改矣？先生曰：名以識其身，義以誌其事。從于善而吾惡夫畫者也。吾既肩且紹矣，斯可已矣。所以吾進其力于道，而遷其名于己耳。庶幾吾欲達於孔子者也。或曰：古者稱己孤，不改若是，無乃不可乎？先生曰：執小禮而妨大義，君子不爾為也。乃著名解以祛其未悟者，眾悉以為然。先生始盡心于詩書，以精其奧。每當卷歎曰：嗚呼！吾以是識先師之大者也。不幸其有亡逸者哉！吾不得見也。未知聖人之言復如何？如耳。尤于餘經，博極其妙，遂各取其亡篇以補之。凡傳有義者，即據而作之。無之者，復已出辭義焉。故號曰補亡先生也。先生凡作之書，每執筆出其文，當蒙若

書他人之辭其敏速有如此無續功而成之者苟一舉筆不終其篇雖十已就其八九亦棄去不復作矣衆問之先生曰吾性不喜二三而爲之者方出而或止之辭意遽紛亂從後強繼以成之亦心竟若負病矣或問之曰子之補亡篇于古不足當其逸于今不足益其存無妄爲乎先生對曰然縱不能有益于存亡庶勝乎無心于此者也旣而辭義有俱亡不知其可者慮人之惑先生即昏先立以定其是非用質其言要先生常謂人曰夫六經者夫子所著之文章也與今之人無異耳蓋其後之典教不能及之故大于世矣吾獨視之與汝異耳先生乃手書九經悉以細字寫之其卷大者不過滿幅之紙古謂其中箱之者亦不過矣而誦之日盡數萬言未嘗廢忘有講書以教後學也先生或詣其精廬適當至虞書堯典篇曰日中星鳥以正仲春說云春分之昏南方朱鳥之星罕見觀之以正仲春之氣也先生乃問曰然夫云日中星鳥以正仲春者是仲春觀朱鳥之星以正其候也且云朱鳥者南方之宿以主於夏也旣觀其星以正其候卽

龍星乃春之星也春主於東方可觀之以正其候也今何不云是而反觀朱鳥之星何謂也說者不能對惟云傳疏若是無他解矣先生擇其座者曰起前吾語汝夫歲周故春之居其始四星各復其方聖人南面而坐以觀天下其序春時朱鳥之星當其前故云觀之以正仲春矣四座無不拜而言曰先生真達云經者也所以于補于不謬矣先生于諸經若此者不可過紀先生又以諸家傳解箋注于經者多未達窮其義理常曰吾他日終悉別爲注解矣大以鄭氏箋詩爲不可曰吾見元之爲心務以異其毛公也徒欲強己一時之名非能通先師之旨且詩之立言不執其體幾與易象同與若元之是箋皆可削去之耳又以論語集解闕注者過半曰古之人何若是吾聞韓文公昔重注之今吾不得見吾將不筆又慮與韓旣死使吾有斯艱也天乎哉先生每請中說歎曰後之夫子也續六經矣世故道否吾家不免有之甚乎年之始成也逝矣天適與其時行之爲事業堯舜不能尚也苟不死天下何有于唐哉先生以房杜諸子散

居厚位叶佐其主遇其君不能揚其師之道大其師之名乃作書以罪之先生所行事人咸以爲非可與伍惟范杲有復古之什以頌其德以其能復敦于古故賦復古以其能行仲尼之道故賦闕里以章別當世之人能作野史故賦踵孟以其能解子雲之書故賦先堆以其或筆削其韓文之繁者故賦剛韜以其將來太常第故賦多文以其必首冠于四科故賦高第以其後天王俾不家食故賦出祿以其將果得其位則指南于吾道故賦指南未以釋經終其篇謂其

章明經旨永休于世用故賦釋經先生見之曰范杲知我矣天之未喪斯文哉天之若喪斯文也則世無范矣范杲是言矣開寶中先生來京師遂刻石爲記于補亡亭內以誌其已之事後從仕于世而行其道焉論曰孔子沒經籍遭秦之焚毀幾喪以盡後之收拾煨燼之餘者得至于今用之也其能繼孔氏者軻之下雖楊雄不敢措一辭以至亡篇闕而其名具載設虛位也使歷代諸君子徒忿痛而見之矣故有或作而補之者大亦不能過其百一力益不足繼也隋

之時王仲淹于河汾間務繼孔子曰續六經大出于世實爲聖人矣是以門弟子佐唐用王霸之道貞觀稱理首永十八君之祚尚非其董常輩之曾及也於乎知聖人之道者成聖人之業矣吾猶不得見王氏之書乎觀夫補亡先生能備其六經之闕也辭訓典正與孔子之言合而爲一信其難者哉若王氏之續六經蓋自出一家之體裁比夫補亡篇力少殊耳所謂後生可畏者雖經籍尚能補之矧其餘者哉不可謂代無其人也

六一居士傳

宋 歐陽修 文鑑

六一居士初謫滁山自號醉翁既老而衰且病將退
休於潁水之上則又更號六一居士客有問曰六一
何謂也居士曰吾家藏書一萬卷集錄三代以來金
石遺文一千卷有琴一張有棋一局而常置酒一壺
客曰是爲五一爾奈何居士曰以吾一翁老於此五
物之間是豈不爲六一乎客笑曰子欲逃名者乎而
要易其號此莊生所謂畏影而走乎日中也余將見
子疾走大喘渴死而名不得逃也居士曰吾固知名
之不可逃然亦知夫不必逃也吾爲此名聊以志吾
之樂爾客曰其樂如何居士曰吾之樂可勝道哉方
其得意於吾物也太山在前而不見疾雷破柱而不
驚雖饗九奏於洞庭之野閱大戰於涿鹿之原未足
喻其樂且適也然常患不得極吾樂於其間者世事
之爲吾累者衆也其大者有二焉軒裳珪組勞吾形
於外憂患思慮勞吾心於內使吾形不病而已悴心
未老而先衰尚阿暇於五物哉雖然吾自乞其身於
朝者三年矣一日天子惻然哀之賜其骸骨使得與

此五物偕返於田廬庶幾償其夙願焉此吾之所以
志也客復笑曰子知軒裳珪組之累其形而不知五
物之累其心乎居士曰不然累於彼者已勞矣又多
憂累於此者既佚矣幸無患吾其何擇哉於是與客
俱起握手大笑曰置之區區不足較也已而歎曰夫
士少而仕老而休蓋有不待七十者矣吾素慕之宜
去一也吾嘗用於時矣而訖無稱焉宜去二也壯猶
如此今既老且病矣乃以難彊之筋骸貪過分之榮
祿是將違其素志而自食其言宜去三也吾負三宜
去雖無五物其去宜矣復何道哉熙寧三年九月七
日六一居士自傳

無名君傳

宋 邵 雍 文 鑑

無名君生于冀方老于豫方年十歲求學于里人遂盡里人之情己之滓十去其一二矣年二十求學于鄉人遂盡鄉人之情己之滓十去其三四矣年三十歲求學于國人遂盡國人之情己之滓十去其五六矣年四十求學于古今遂盡古今之情己之滓十去其八九矣五十求學于天地遂盡天地之情欲求己之滓無得而去矣始則里人疑其僻問于鄉人曰斯人善與人群安得謂之僻既而鄉人疑其泛問于國人曰斯人不妄與人交安得謂之泛既而國人疑其陋問于四方之人曰斯人不能器安得謂之陋即而四方之人又疑之質之於古今之人古今之人終始無可與同者又考之于天地不對當時也四方之人迷亂不復得知因號為無名君夫無名者不可得而名也凡物有形則可器可器斯可名然則斯人無體乎曰有體有體而無跡者也斯人無用乎曰有用有用而無心者也夫有跡有心者斯可得而知也無跡無心者雖鬼神亦不可得而知不可得而名而況於

人乎故其詩曰思慮未起鬼神莫知下由乎我更由乎我更由乎誰能造萬物者天地也能造天地者太極也太極者其可得而知乎故強名之曰太極太極者其無名之謂乎故嘗自為之贊曰借爾面貌假爾形骸弄丸餘暇閑往閑來人告之以修福對曰吾未嘗不為善人告之以禳災對曰吾未嘗妄祭故詩曰禍如許免人須誦福若待求天可量又曰中孚起信寧煩禱无妄生災未易禳性喜飲酒常命之曰太和詩曰不佞禪伯不謏方士不出戶庭直祭天地家素業為儒言身未嘗不行儒行故其詩曰心無妄思足無妄走人無妄交物無妄受災災論之井處其陋綽綽言之無出其右羲軒之書未嘗去手堯舜之談未嘗虛口當中和天同樂易友吟自在詩飲歡喜酒百年升平不為不偶七十康強不為不壽此其無名君之行乎

鐵笛道人自傳

明 楊維禎

鐵笛道人者會稽人祖闔西出也初號梅花道人會稽有鐵嵒山其高百丈上有蒼綠梅花數百植層樓出梅花積書數萬卷是道人所居也泰定間以春秋經學擢進士第仕赤城令轉錢清海鹽皆不信其素志輒棄官將妻子遊天目山放于宛陵毘陵間雲中雲間山水最清遠又自九龍山涉太湖南沂大小雷之澤訪縹緲七十二峯東抵海登小金山脫烏巾冠鐵葉冠服褐毛寬博手持鐵笛一技自稱鐵笛道人

鐵笛得洞庭湖中冶人緱氏子嘗掘地得古莫耶無所用鎔為鐵葉筒之長一尺有九寸竅其九進於道人道人吹之竅皆應律奇聲絕人世江人老漁狎道人時時唱清江歌乃道人為作迴波引和之仍自歌曰小江秋大江秋美人不來生遠愁吹笛海西流又歌曰東飛鳥西飛鳥美人手弄雙明珠九見鳥生雛城中貴富人聞道人名多載酒道人所幸聞笛道人為一弄畢便卧遣客即客不去卧吹笛自如也嘗對客云笛有君山古弄海可養蛟龍可呼非釣天大人不

發也晚年同年夫有以遺才白于上用元纁物色道

人于五湖之間道人終不起道人性疎豁與人交無疑二雖病凶危坐不披文則弄札翰或理音樂素不善奕書謂奕損閒心畫為人役見即屏去至名山川必登高遐眺想見古人風節曠邁非常人所能測也與永嘉李孝先茅山張伯雨錫山倪鎮昆陽顧瑛為詩文友碧挑史釋臻疑歸史釋現清容史釋信為方外友其文有驚世者有三史統論五千言太平綱目二十策歷代史鉞二百卷詩有瓊臺曲洞庭襟吟五十卷藏於鐵嵒山云

贊曰有美人兮冠鐵葉之卷卷服兔褐之纓纓雷浦之濱兮鐵嵒之巔喻陰呼陽兮履坤載乾萬竅不作兮全賴於天其漆園之傲吏兮緱山之遊仙也耶

傳

方外

莫月鼎傳

明 宋 濂

莫月鼎諱起炎湖州月河谿人高祖儔宋政和壬辰進士第一祖慶父濠連起爲顯官月鼎生而秀朗肌膚如玉雪雙目有射人之光習科舉業三試於有司不利乃絕去世故從事於禪觀之學脇不沾席者數年已而着道士更名洞乙自號爲月鼎入青城山丈人觀見徐無極受五雷之法又聞南豐有鄒錢壁者得王侍宸斬勘雷書秘不傳乃亟往求委身童隸事之會鄒病將遣去月鼎拜且泣具以寔告鄒驚嘆即以其書相授於是月鼎召雷雨破鬼形動與天合雖嬉笑怒罵皆有神物從之者寶祐戊午游河東大旱馬廷鸞方守紹興迎致月鼎月鼎建壇場瞑目按劍呼雷神役之俄天地晦冥震霆一聲大雨傾注隍陵聞之賜詩一章謂其爲神仙云元世祖至元己丑遣御史中丞崔或求異人江南物色獲之見帝於灤京內殿帝詔近侍持果穀觴之時天色爽霽帝曰可聞雷不月鼎對曰可即取胡桃擲地雷應聲而發震撼殿廷帝爲之改容復命請雨雨立至如紹興時帝

大悅賜以內府金繒月禺碎截之以濟寒寒者帝疑其物微因盛有所資亦不受尋有旨俾掌道教事月禺以年耄辭遂給驛南旋益放於酒無日不醉醉輒白眼望天陰飈翛翛起衣袖間嘗與客飲西湖舟中當未日如火客請假片時雲覆之月禺咲拾果殼浮觴面頰之雲自湖畔起翳於日下蕃釐觀道士中秋方會飲觴既舉有雲蔽月久不解月禺時寓觀中道士知其所為急召寘筵端且謝過月禺以手指之雲散如洗山氓爲鬼物所憑狂蕩不可制通索月禺不值忽遇諸酒肆月禺大罵含酒喫之暨歸物怪已思賣餅師積餅于筐時被物竊去月禺召雷轟雲中斬獠獠首投于前市魁娶婦道爲白猿精所攝抵門但空車焉月禺禹步如有指麾狀狂飈遽作飄婦還舍問之婦云方在此不峰不知何以至此也月禺陽狂避世不妄與人接然頗聞病疫者有來告急或以蟹中黃篆符與之或摘草木葉噓氣授之無不立愈者故咸以真官稱真官謂其能主土地上鬼神其靈異之跡士大夫多言之不能盡成庚寅寅屬其徒王繼

華曰明年正月十又三日將化於汝家及期瞑目而坐繼華問身後事月禺搖手曰俟五事備可也夜將半風雲雷霓兩交作月禺索筆書偈忽然而逝壽六十九繼華奉遺蛻至于蘇之長洲陳公卿去丹霞道院三里而近月禺所受侍宸諸書寶秘一如郝不輕授人唯繼華及無涯潘氏得其傳餘有求者隨其器小大淺深自撰符篆與之亦多驗繼華授張善淵善淵授步宗浩宗浩授周元真皆解狎雷致雲雨而元真尤號偉特若行默法能使群鵲迴翔壇上云

史官曰魯陽提戈而麾日退三舍鄒衍仰天而笑六月降霜夫以匹夫之微精誠而格天且應之況葆真之士乎所謂葆真之士其慮冲其志靜虛其神凝以全故其一語默一吸噓誠可嘯呼麾斥鞭笞魑魅於指顧之間矣嗚呼此術然也則夫有事周孔之學以致中和之功者其鬼神遠又為何如哉泰天地而妙萬物固自有在也世之人胡不爾思隨物變遷至與人道弗類其可悲也夫抑亦可慨也夫予總修元史已類月禺入釋老傳或以爲涉于怪神止之然予心

竊感也復別書之以示元學者

邵道人傳

明 李夢陽

邵道人者蜀人也至慶陽年七十餘矣道人不欲言凡所願指色授故莫究所自來然見之者率知其異人也道人館於鐘樓街周家藥土被衲無晝夜露坐即中諸子弟少年爭來事道人道人凡所願指色授之諸子弟少年無不當道人意者道人喜有病病者家請往乃令病者張目又令其唯即可活道人則目諸弟子而諸弟子即置飯病者前道人出其袖中鐵尺橫飯上誦大悲咒已起尺摩病者瘡矣脫不活道人則趨而出病者家以死日請道人則出其指示日數如其指數然道人不取錢每歲自正月始活一人取其布尺裏衲裏完弗取也病者家脫有見飯飯道人以梳列諸案無問多少道人食之若加飯更以梳列之不食也若見飯是草惡食道人即喜食之曰更為造美食道人則不食其見飯或謀葷物道人曰第擇去葷物終不欲更造也道人喜飲水鄉野人聞之爭來請願觀道人飲水道人微笑領然之弟子前置水道人目弟子令鄉野人自置水亦以梳列諸案無

問多少道人飲之若冬月水冰則聞道人齒間澆澆
聲頃之肩湧面紅汗數簌下若雨也道人與予世父
同時世父患脛瘍久不愈以問道人道人曰此祟也
若往聘於某氏乎謂其女陋也將更聘之女慚而縊
死此其祟也世父大驚伏地頓首曰柰何道人曰今
遇我三日解矣三日瘍果瘥居十餘年忽謂諸弟子
曰吾將歸歟諸弟子曰先生福慶之人慶之人無敢
慢先生者何遽言歸耶道人不應一日道人令設几
三層而坐其上諸弟子始悟其歸謂死也環守之夜
有登几而伺其息者道人猶揮絃墜焉夜半霹靂隱
隱起屋脊若戈士甲馬戰鬪之聲諸弟子震懾伏地
天明起視則道人死矣
贊曰子不語怪若道人者何如人哉二氏惑世亂政
而道人口悛悛不欲道辭急人之難覺而後已嗚呼
是所謂進於墨者非耶

傳

技術

全景明先生傳

明 程敏政

全先生寅字景明山西安邑人少聰警失明無所事
事乃受易師學悉究義經畫外之旨而以京房斷占
多奇中正統間父清游雲中挾景明與俱三邊吏士
有問身體戚及軍利鈍成敗必就景明決之由是全
先生之名聞四方已巳秋酋酋也先大入邊英廟北
狩陰遣使命鎮守中貴人裴當問景明景明筮得乾
之初九附奏曰庚午歲仲秋車駕當還還後七八年
必復辟英廟心識之時忠國公石亨以恭將守雲中
賢景明引為上賓動必咨之翌景帝嗣位酋蓋喊召
亨還總京營亨以清有幹畧為以自輔景明因侍行
至京時也先復入寇京師戒嚴亨召景明問計景明
筮之曰無能為也且彼氣已驕戰之必克酋果敗去
庚午也先欲奉英廟北還時率以為詐獨武寧伯朱
謙上書懇請朝廷持不放發景明力言于亨曰酋人
順天舉義我中國反失迎奉之禮獨不為夷狄嘆乎
亨遂與少保于公協議遣使酋果奉承輿來歸賓庚
午秋也英廟以太上皇居南宮三年錦衣皆揮盧忠

上變外議洵洵忠一日屏人請筮景明以大義叱之
曰是兆大山死不足贖忠懼而佯狂為風然後兩宮
乃安忠後伏誅如景明言景帝之弗豫也中外以儲
嗣未定為憂景明亟言于亨曰公國柱石當委身致
命以安宗社今危疑之際不卒定大計禍且不測亨
意遂決夷廟復辟將官景明景明固辭乃命工范金
鑄陰陽神靈四字為筮錢十八文製象牙盒貯之以
賜又賜象牙金酒盃一白金彩幣若干會清以荷揮
食事將出蒞徐州上曰全寅得無偕往乎其授錦衣
衛百戶在京居住景明後固辭不允景明見亨寵位
已極每因筮以持滿之道反覆戒之弗納卒及于禍景
明當景泰天順間名公卿大夫無不延接者然一語
不及私事惟抑邪興正濟艱狀危可致力則諄諄不
少回避遇古今圖史及異書必令人傍誦聽之至老
不倦又緣名字之義自號啟陽今八十有六歲尚康
無恙三子長鑾以材武自見官錦衣衛百戶次鑒治
易為進士業次銳以善書士隸中書舍人
論曰昔嚴君平卜筮與人子言依于孝與人弟言依

于順與人臣言依于忠各因勢導之以善益賢而隱
于卜肆者也若全景明先生因閭君平之風而有慕
焉者歟其禮於名流不免于權貴壽而有子老子聖
世非倖也使司馬季主不見知于宋忠賈誼郭景純
不免于王敦之難其術猶矣而其所得又景明之所
不滿者歟

傳

諷諭

負荅者傳

唐 王 勣 文粹

昔者文仲子講道于白牛之谿弟子捧書北面環堂成列講罷程生薛生還省于松下語及周易薛收嘆曰不及伏羲氏乎何辭之多也俄而有負荅者瞻瞻然委擔而息曰吾子何歎也薛生曰奚何為者而微我嘆負荅者曰夫麗朱者丹附墨者黑蓋繫斯而得之也今吾子所服者道而猶有嘆是六腑五臟不能無受也吾是以問生曰叔聞之師易者道之蘊也伏羲氏畫八卦而文王係之不逮省久矣以為文王病也吾是以歎負荅者曰文王焉病伏羲氏病甚者也昔者伏羲氏未畫卦也三才其不位乎四序其不行乎百物其不生萬物其不森乎何營營乎而費盡也自伏羲氏洩道之密漏神之幾分乘太和條裂元氣使天下之智者說道進出曰我善言象而識物情陰陽相應遠近相取作為剛柔同異之說以駭人志於是知者不知而太朴散矣則伏羲始兆亂者安得亂歟而嗟文王負其荅而行追而問之居與姓名不答文中子聞之曰愚者也

無心子傳

唐 王 勣

東臯子始仕以醉謔罷鄉人或謂之東臯子不屑也退著無心子以見趣焉
無心子寓居於越越王不知其天人也拘之仕無喜色泛越若而從越國之式曰有穢行者不耻俄而無心子者以穢行聞於王王黜之無愠色退而將遊于茫蕩之莖適勸之邑而遇機士機士撫髀而嘆者三曰嘻子賢者而以罪廢無心子不應機士曰願受教無心子曰爾聞蜚廉氏之馬說乎昔者蜚廉氏有二馬一者朱鬣白羃龍駘鳳臆蹶如奔終日不釋鞍竟以熱死一者重脰昂尾駘頤駘膝蹶齧善變奔而散諸野終年肥遁是以鳳凰不憎山栖蛟龍不羞泥蟠君子不苟潔以羅患聖人不避穢而養生東臯聞之曰善哉不可以加之矣

丐者王承福傳

唐 韓愈

丐之為技賤且勞者也有業之其色若自得者聽其言約而盡問之王其姓承福其名世為京兆長安農夫天寶之亂發人為兵持弓矢十三年有官勲棄之來歸喪其田土手授衣食餘三十年舍於市之主人而歸其屋食之當為視時屋食之貴賤而上下其丐之備以償之有餘則以與道路之廢疾餓者焉又曰粟稼而生者也若布與帛必蠶績而後成者也其他所以養生之具皆待人力而後完者也吾皆賴之然

人不可偏為宜乎各致其能以相生也故君者理我所以生者也而百官者承君之化者也任有小大惟其所能若器皿焉食焉而息其事必有天殃故吾不敢一日捨緩以嬉夫緩易能可力焉又誠有功取其直雖勞無愧吾心安焉夫力易強而有功也心難強而有智也用力者使於人用心者使人亦其宜也吾特擇其易而為無愧者取焉嘻吾操緩以入貴富之家有年矣有一至者焉又往過之則為墟矣有再至三至者焉而往過之則為墟矣問之其隣或曰噫刑戮

也或曰身既死而其子孫不能有也或曰死而歸之官也吾以是觀之非所謂食焉息其事而得天殃者也非強心以智而不足不擇其才之稱否而冒之者耶非多行可愧知其不可而強為之者耶將貴富難守薄功而厚饗之者耶抑豐悖有時一去一來而不可常者耶吾之心憫焉是故擇其力之可能者行焉樂富貴而悲貧賤我豈異於人哉又曰功大者其所自奉也博要與子皆養於我者也吾能薄而功小不有之可也又吾所謂勞力者若立吾家而力不足則心又勞也一身而二任焉雖聖者不可能也愈始聞而惑之又從而思之蓋賢者也蓋所謂獨善其身者也然吾有識焉謂其自為也過多其為人也過少其學揚朱之道者耶揚朱之道不肯拔我一毛而利天下而夫人以有家為勞心不肯一動其心以畜其妻子其肯勞其心以為人乎哉雖然其賢於世之患不得之而患失之者以濟其生之欲貪邪而亡道以喪其身者其亦遠矣又其言有可以警余者故余為之傳而自鑒焉

梓人傳

唐 柳宗元 文粹

裴封叔之弟在光德里有梓人欸其門頗備隙宇而處焉所職尋引規矩繩墨家不居斲斷之器問其能曰吾善度材視棟宇之前高深圖方短長之宜吾指使而羣工役焉捨我衆莫能就一宇故食於官府吾受祿三倍作於私家吾收其直大半焉他日入其室其牀闕足而不能理曰將求他工余甚笑之謂其無能而貪祿嗜貨者其後京兆尹將師官署余往過焉委羣材會衆工或執斧斤或執刀鋸皆環立嚮之梓人左持右引執杖而中處焉量棟宇之任視木之能舉揮其杖曰斧彼執斧者奔而右顧而指曰鋸彼執鋸者趨而左俄而斤者斲刀者削皆視其色俟其言莫敢自斷者其不勝任者怒而退之亦莫敢愠焉畫宮於堵盈尺而曲盡其制計其毫釐而構大廈無遲遲焉既成書於上棟曰某年某月某日某建則其姓字也凡執用之工不在列余圍視大駭然後知其術之工大矣繼而歎曰彼將捨其手藝專其心智而能知體要者歟吾聞勞心者役人勞力者役於人彼其

勞心者歟能者用而智者謀彼其智者歟是足為佐天子相天下法矣物莫逆乎此也彼為天下者本於人其執役者為徒隸為卿師里胥其上為下士又其上為中士為上士又其上為大夫為卿為公離而為六職判而為百役外薄四海有方伯連帥郡有守邑有宰皆有佐政其下有胥吏又其下有嗇夫版尹以就役焉猶衆工之各有執伎以食力矣彼佐天子相天下者舉而加焉條其綱紀而盈縮焉齊其法制而整頓焉猶梓人之有規矩繩墨以定制也擇天下之士使稱其職居天下之人使安其業視都知野視野知國視國知天下其遠邇細大可手據其圖而充焉猶梓人畫宮於堵而績於成也能者進而辭之使無所施不能者退而休之亦莫敢愠不銜能不矜名不親小勞不侵衆官日與天之英才討論其大經猶梓人之善運衆工而不伐藝也夫然後相道得而萬國理矣相道既得萬國既理天下舉首而望曰吾相之工也後之人循跡而慕曰彼相之才也士或談殷周之理者曰伊傅周召其百執事之勤勞而不得紀焉

猶梓人自名其功而執用者不列也大哉相乎通是道者所謂相而已矣其不知體要者反此以恪勤為公以薄書為專術能矜名親小勞侵吏官竊取六職百役之事聽聽於府庭而遺其大者達者焉所謂不通是道者也猶梓人而不知繩墨之曲直規矩之方圓尋引之短長姑奪衆工之斧斤刀鋸以佐其藝又不能備其工以至敗績用而無所成也不亦謬歟或曰彼主為室者倘或發其私智牽制梓人之慮奪其世守而道謀是用雖不能成功宜其罪耶亦在任之而已余曰不然夫繩墨誠陳規矩設高者不可抑而下也狹者不可張而廣也跡我則固不繇我則圯彼將樂去固而就圯也則奉其術然其智愚爾而去不屈矣道是誠良梓人耳其或嗜其貨利惡而不能捨也喪而制量屈而不能守也棟橈屋壞則曰非我罪也可乎哉可乎哉余謂梓人之道類於相故書而藏之梓人蓋古之審曲面勢者今謂之都料匠云余所遇者楊氏潛其名

種樹郭橐駝傳

唐 柳宗元 文粹

郭橐駝不知始何名病痿癢然伏行有類橐駝者故鄉人號之駝駝聞之曰甚善名我固當因捨其名亦自謂橐駝云其鄉曰豐樂鄉在長安西駝橐駝種樹凡長安豪富人為觀游及賣果者皆爭迎取養視駝所種樹或移徙無不活且碩茂蚤實以蕃他植者雖窺伺做慕莫能如也有問之對曰橐駝非能使木壽且尊也能順木之天以致其性焉爾凡植木之性其本欲舒其培欲平其土欲故其築欲密既然已勿動勿慮去不復顧其蔭也若子其置也若棄則其天者全而其性得矣故吾不害其長而已非有能碩而茂之也不亦耗其實而已非有能蚤而蕃之也他植者則不然根拳而土易其培之也若不過焉則不及焉苟有能反是者則又愛之太慈憂之太勤旦視而暮撫已去而復顧甚者爪其膚以驗其生枯搖其本以觀其疎密而木之性日以離矣雖曰愛之其實害之雖曰憂之其實害之故不我若也吾又何能為哉問者曰以子之道移之官理可乎駝曰我知種樹而已理

非吾荼也然吾居鄉見長人者好煩其令若甚憐焉而卒以禍旦暮吏來而呼曰官命促爾耕勗爾植甯爾獲蚤繰而緒蚤織而綾字而幼孩遂而鷄豚醵而聚之擊木而召之吾小人輒殫饗以勞吏者且不暇又何以蕃吾生而安吾性耶故病且怠若是則與吾業者其亦有類乎問者喜曰不亦善夫吾聞養樹得養人術傳其事以為官戒也

宋清傳

唐 柳宗元

宋清長安西部樂市人也居善藥有自山澤來者必歸宋清氏清優主之長安醫工得清藥輔其方輒易醵咸譽清疾病死傷者亦皆樂就清求藥冀速已清皆樂然響應雖不持錢者皆與善藥積券如山未嘗詣取直或不識還與券清不為辭歲終度不能報輒焚券終不復言市人以其異皆笑之曰清蚩妄人也或曰清其有道者歟清聞之曰清逐利以活妻子耳非有道也然謂我蚩妄者亦謬清居藥四十年所焚券者百數十人或至大官或連數州受俸得其餽遺清者相屬於戶雖不能立報而以賒死者千百不害清之為富也清之取利遠達故大豈若小市人哉一不得直則怫然怒再則罵而仇耳彼之為利不亦翦翦乎吾見蚩之有在也清誠以是得大利又不為妄執其道不廢卒以富求者益衆其應益廣或斥棄沉廢親相與交視之落然者清不以怠遇其人必與善藥如故一旦復拘用益厚報清其遠取利皆類此吾觀今之交乎人者炎而附寒而棄鮮有能類清之為

者世之言徒曰市道交嗚呼清市人也今之交有能
望報如情之遠者乎幸而疾幾則天下之窮困廢辱
得不死士者衆矣市道交豈可少耶或曰清非市道
人也柳先生曰清居市不為市之道然而居朝廷居官
府居庠塾鄉黨以士大夫自名者反爭為之不已悲
夫然則清非獨異於市人也

傳

新役

阿寄傳

明 田汝成

阿寄者淳安徐氏僕也徐氏昆弟別產而居伯得一馬仲得一牛季寡婦得阿寄阿寄年五十餘矣寡婦泣曰馬則乘牛則耕踉蹌老僕迺費我恭養阿寄嘆曰噫主謂我力不若牛馬耶迺盡策營生示可用狀寡婦悉簪珥之屬得銀一十二兩昇寄則入山販漆暮年而三其息謂寡婦曰主無憂富可立致矣又二十年而致產數萬金爲寡婦嫁三女婚而卽齎聘皆千金又延師教兩卽既皆輸粟爲太學生而寡婦則卓然財雄一邑矣頃之阿寄病且死謂寡婦曰老奴馬牛之報盡矣出枕中二楮則家計鉅細悉均分之曰以此遺兩卽君可世守也言訖而終徐氏諸孫或疑寄私蓄者竊啟其篋無寸縑粒粟之儲焉一嫗一兒僅敝緇襦而已嗚呼阿寄之事予蓋聞之俞鳴和云夫臣之於君也有爵祿之榮子之於父也有骨肉之愛然重饗豐綬者或不諱爲盜臣五都之豪爲父行賈臣良獻苦否且德色也迺阿寄村鄙之民衰邁之叟相嬖人撫髻踵而株守薄業戶祚彫落溝

壑在念非素聞詩禮之風心激寵榮之慕也迺肯畢心殫力昌振鑑基公爾忘私斃而後已豈尋常所可及哉鳴和又曰阿寄死矣見徐氏之族雖幼必拜騎而遇諸塗必控勒將教旨武以爲常見主母不睨視女使雖幼非傳言不離立也若然卽縉紳讀書明禮義者何以加諸移此心也以奉其君親雖謂之大忠純孝可也

傳

假託

毛穎傳

唐 韓愈

文粹

毛穎者中山人也其先明眎佐禹治東土養萬物有功因封於卯地死為十二神嘗曰吾子孫神明之後不可與物同當吐而生已而果然明眎八世孫皀世傳當殷時居山得神仙之術能匿光使物竊姬娥騎蟾蜍入月其後代遂隱不仕云居東郭者曰鮑狡而善走與韓廬爭能廬不及廬怒與宋鵠謀而殺之醢其家秦始皇時蒙將軍恬南伐楚次中山將大獵以懼楚召左右庶長與軍尉以連山筮之得天與人文

之兆筮者賀曰今日之獲不角不牙衣褐之徒缺口而長鬣八竅而跌居獨取其髦簡牘是資天下其同書秦其逆兼諸侯手遂獵圓毛氏之族拔其豪載穎而歸獻俘於章臺官遂其族而加束縛焉秦始皇使恬賜之湯沐而封諸管城號曰管城子日見親寵任事穎為人強記而便敏自結繩之代以及秦氏無不纂錄陰陽卜筮占相醫方族氏山經地志字書圖畫九流百家天人之書及至浮圖老子外國之說皆所詳悉又通於當代之務官府簿書市井貨賤注記惟

上所使自秦皇帝及太子扶蘇胡亥丞相斯中車府
令高下及國人無不愛重又善隨人意止直邪曲巧
拙一隨其人雖見廢棄終然不沒惟不喜武士然見
請亦時往累拜中書令與上益狎上嘗呼為中書君
上親決事以衡石自程雖宮人不得立左右獨顏與
執燭者常侍上休方罷顏與絳人陳元宏農陶泓及
會稽褚先生友善相推致其出處必偕上召顏三人
者不待詔數俱往未嘗怪焉後因進見上將有任
使拂拭之因免冠謝上見其髮禿又所募畫不能稱
上意上嘻笑曰中書君老而禿不任吾用吾嘗謂君
中書君今不中書耶對曰臣所謂盡心者因不復召
歸封邑終於管城其子孫甚多散處中國 皆冒
管城惟居中山者能繼父祖業太史公曰毛氏有兩
族其一姬姓文王之子封於毛所謂魯衛毛明者也
戰國時有毛公毛遂獨中山之族不知其本所出子
孫最為蕃昌春秋之成見絕於孔子而非其罪及蒙
將軍杖中山之蒙始皇封諸管城世遂有名而姬姓
之毛無聞顏始以俘見卒見任使秦之誠諸侯顏與

有功賞不酬勞以老見驟秦真少恩哉

倉庚傳

明 楊 慎

梁武帝代齊錄居齊宮後庭雅齒在潘余之亞者損之又損尚濫乎百數却后心妒焉帝間居一日覽大荒經云倉庚食之令人不妬遂下令虞人收捕此鳥終野籠山佛首爭獻者盈軒墀乃敕中庖以爲宮膳旦旦不繼他肉后與帝食而甘之帝心冀其術之速驗試問后曰此餘耳可以分諸夫人乎后即輟箸不食帝曰荒經曷余欺乎其諸食力尚淺耶將盡脯其餘倉庚中有老而慧者鼓職作人語而稱曰余西裔之羽臣也余祖逮事庖羲氏庖羲氏之佐有鳥鳴者主建福是釐百羽命余祖曰而仁鳥也其司春候錄茲以還奕世載育及周文王邑於岐山西申有鳳鳥者覽其德而下之羣鳥皆往從之萃於岐下維時風翔者露翥者雨舞者霜皦者朝嘲者夜咬者以萬計復有己人之北翼蜀山之文翰方山之孔鳥善芳不昧翦翠華首咸集宮樹王及後宮不之奇也而余族獨著形管焉其詩曰維葉萋萋黃鳥于飛爲其有助於德象也二號髣獻引弓飛土而逐之后曰非所以

養童心也戒勿彈周公白文王命羅氏境內特賞不捕焉今帝不欲爲文王則已欲爲文王盍赦微軀帝曰爾曷知周文王試爲我言文王后妃之德何如庚乃喜而躍曰驚知之驚知之匪后妃之德實文王之烈日者天之明月者地之紀夫爲妻綱象日明使婦從夫故月紀月載魄於西由勝以升嫡月載魄於東由嫡以逮勝帝笑曰禮失乃求諸鳥乎爲我說之庚引脰曰驚何知驚何知月之朔也君以規朔不近內焉后亦辟焉月始魄左勝六人迭御三夕象微陰也月成魄右勝六人迭御三夕象漸陰也月成弦三夕而世婦迭御焉月成采三夕而御妻迭御焉月之幾望后當一夕陰將盈也月之端望后當一夕陰極盈也月之后望后當一夕陰不終盈也自是三夕仍降而御妻三夕薦降而世婦三夕還降而左勝三夕復降而右勝及月之夕也君以掩身不近內焉后亦辟焉象月以進象月以退授銀環告進也正金環告退也施元的告辟也鳴珮玉告節也由勝以升嫡本微而著盛由嫡以逮勝自盛以下微勿使陰厭陽勿使

柔乘剛嗣續以昌壽命以長此陰禮教六宮而頌聲
洋溢萬方也又公此制於天下諸侯有副宮大夫有側
室士有妾當夕侍夜做是爲節當此時豈伊無險陂
王制鰭之妬亦何能爲周制之蕪久矣而欲委罪於
微禽變性於纖羽不亦異乎且荒經之誕非神農之
術也帝而信之是不知也沉眈之專非周文之制也
帝而行之是不仁也負此二愆不可以君羽族而況
君江東乎帝聞庾言懼然側席却后聞之慨然無色
乃命寫其言於斧扆行其制於永巷却后播然更爲
速下之行庾之力也帝喜曰徒信古陳編不如倉更
言乃故之不殺封爲金陵郡公唐世有號金衣公子
者即其後也

謚議

弔文

祭文上

謚議

謚議

改議

駁議

答駁議

私議

謚議

帝后

臣寮

仁宗謚號議

宋 王 珪

臣伏奉勅命以七月二十九日集官於南郊壇告天請到大行皇帝謚曰神文聖武明孝皇帝差官撰謚議交廟號文者臣謹上議曰

臣聞元精磅礴濟萬物而不昭其迹者薦名曰天至德汪洋澤萬世而不有其功者建謚於帝伏思在昔帝王生膺大名終紀大行使金聲而玉振之以詔厚無窮之聞者帝莫盛於堯舜王莫隆於禹湯也蓋易名之典下不得誅上古者將為至尊之謚必質於郊

然後定之故所以推天下之至美明天下之至公雖天子不得以自尊也洪惟大行皇帝躬上主之姿承累聖之序派大漢之豈弟履放勛之欽明苞富有之業而能守以約攬泰定之勢而弗恃以安固常邈然馳視所未形倏然積思所不及謂天命之匪易迺嚴恭戒懼庶以答靈心之顧謂民懷之靡常延延容煦沐庶以陶善類之歸知括萬慮而不可曠思滲四根而不可形如兩儀之無不燾載如三辰之無不臨燭於時脩廢官繼絕世禮高年勸力穡減常賦抑末游

虛己以遇豪俊之材降志以從忠直之諫振立賞罰而權衡之章明典禮而黼黻之宥恕刑獄而蕩滌之惠哀困窮而衣食之人情莫不欲逸愛其力而不勞人情莫不欲壽輔其生而不傷群公庶尹罔弗夷正相與謀王之朝殊鄰絕區罔弗億寧相與慕王之境父父子子兄兄弟弟罔弗順祇相與立王之塗蓋仁政之施沛然其若是莫之能禦也矧復耕籍於千畝之田裕祭於先王之廟報天之誠篤則八莫於圓丘嚴父之志盡則再侑於明堂宗室既蕃則廣諸分王之愛邦統未昭則豫有主器之屬下議樂之詔以效鐘石之和置寫書之官以綴經墳之學通英教席國講藝也凝機後宇資味道也藻思粹發窮聖作也飛毫灑落肆天縱也知聲色之靡伐於德義於是乎屏燕飲之娛知雉兔之獲殫於精神於是乎絕盤遊之欲念組織之塵則卻服御之華念土木之費則損宮室之麗由是阻命不欲久戍勞師而遂納玉闕之誓南望肆靈不欲深入薄冠而自致葉衡之僂時則有隋沙轆漢卓聲之貢委應圖合譯湯滴之瑞叢四十

二年於茲可謂海內大治矣竊述義皇之前負序莫
索其詳自詩書之載探厥所元終都攸卒未有如茲
之盛者也方將勦鴻休受永祐豈圖神機歆厥邦馨
上延仙鼎已成不返荆山之御玉衣雖在空陳渭水
之遊嘉原既新同軌迫至張鳳蓋於北極引龍輶之
卣巡比萬國所以推心三靈為之變色有司繇是飭
舊典冊丕稱皇哉鏐乎幾有以妥王靈而炳帝烈也
謹按謚法一民無為曰神經天緯地曰文通達先知
曰聖保天定功曰武照臨四方曰明慈惠愛親曰孝
若乃群生嘒嘒鼓之舞之不知至化之所自然非至
神序制禮作樂際天接地燠然而大恊非至文乎永
惟宗廟之奉實發先識以建大本非至聖序戴白之
老不識兵革之警非至武序遐未荒昧之情格於聰
明而無所遺非至明序惇叙九族以述夫祖先之志
非至孝乎粵廟號之建尚矣惟其歷古聖賢之君莫
不極所以尊明令顯之稱又或至於代相襲之夫仁
者聖之盛德豈獨未有以當之者邪抑當時鴻儒鉅
學乃畧於稽求將天之所啟期以克配大行之廟乎

詩云維天之命於穆不已此之謂歟惟功以創業為
祖德以守成為宗皆尊尊之大誼也
大行皇帝尊謚
宜天錫之曰神文聖武明孝皇帝廟曰仁宗臣謹議

丞相故太保贈太師苗晉卿謚議

唐 獨孤及

太師稟天純懿爲唐股肱兩朝當國庥績維允論道賦政送往事居協恭東華動罔違德惠和以懋其事明哲以保其身昔嘗懸衡九流部竹四郡刀尺之下無滯用襦袴之內無貧人洛陽居守東夏輯睦天寶之季二京爲戎皇輿南狩億兆左袵太師踐危機不場心處橫潰不忘國奮身拔迹於豺狼之口道不汙而節不奪忠之大者至德乾元中天下多故皇綱未

張肅宗修漢宣故事用刑名繩下而太師以曹參爲師持清靜守職勵翼王度將順事典人亦寧一朕歆茂焉能知人能官人慎選乃僚言刈其楚至有拔群萃而取公器不五六年比肩袞職者光映冊府當代榮之漢史稱胡廣與故吏陳蕃並爲三司太史有焉夫九德咸事寬爲之首百工惟時哲則能惠宜其享天眉壽爲國元老古者生以行觀其志沒以謚易其名字之美惡視行之大小後代或三字以表德貞惠文子是也或二字以彰善鄴文終侯留文成侯是也

蓋其迹大名威則禮優謚崇太師德冠縉紳位侔周召將加誄謚之制宜以鄴留爲准謹按大戴禮體和居中曰懿文賢有成曰獻稽千載之令典合二名以配德請謚曰懿獻謹議

唐御史中丞盧奕謚議

唐 獨孤及

盧奕剛毅而忠直方而清勵精吏事所居可紀天寶十四歲洛陽覆沒于時東都人士狼狽鹿駭猛虎磨牙而爭其肉居位者皆欲保性命而完妻子或先策高足爭脫羿彀或不耻苟活甘飲盜泉奕獨正身守位蹈義不去以死全節誓不辱勢窘力屈以朝服就執獨慷慨數賊梟獍之罪觀者股慄奕不變其色西向而辭然後受害雖古烈士方之者鮮矣或曰洛陽之存亡操兵者實任其咎非執法吏所能抗師敗奔去之可也委身寇讎以死誰慙其以爲不然勇者禦而忠者守社稷是衛則死生以之危而去之是智免也於忠何有哉荀息投身於晉不食其言也仲由結纓於衛不避其難也石可勤其官而水死守位而忘軀也伯軀待保軀而死死先禮而後身也彼四人者死之日皆於事無補夫豈愛死而賈禍也以爲死輕於義故蹈義而捐生古人書之使事君者勸然則祿山之亂大於里至孔惺廉察之任切於元冥之官分命所繫不當保母逆黨兵威烈於水火于斯時也

能與執干戈者同其勛力挽之不求推之不去豈不以師可虧免不可苟身可殺降不可奪故全其特操於白刃之下孰與懷安偷生者同其風哉謹按謚法國國忘死曰貞秉德遵業曰烈奕執憲戎馬之間志藩王室可謂國國矣國危不能拯而繼之以死可謂忘死矣歷官十一任言必政事必果而清節不撓去之若始至可謂秉德矣先黃門以直道佐時英嗣之以忠純可謂遵業矣請謚曰貞烈謹議

贈尚書石僕射孫奭議 宋 宋 和

博士宋祁議曰僕射清明莊重體恭而用健暢和吸
精儲爲英華在布衣韋帶有深沈不器之韻緩頰彈
冠賓于王門是時宋興四十餘歲天子上文嚮學聞
太平之原薪樞髦士克布臺閣而未有卓然以儒名
家僕射由經生博貫前載乃以詩之多識書之知達
易之肆而隱春秋之婉而微禮之肅雍樂之易良參
勸講授爲薦紳倡始執據聖道淘汰羣疑斗杓所建
遂成寒暑珎璜所觸自然宮徵歷官上庠居爲時宗

既而籍內禁閣踐諫省殿曹之任入進其孰出詭其
辭批鱗同憚職衆無闕在憲王臣匪躬在說命朝夕
納誨惟僕射舉之愛莫助之屬今上清明厥初物色
舊老寶曆丹書之問進對華光之塗用階告猷式克
躋聖和榮稽古覽中眇論惟僕射有之是以似之及
宸幄歸道安車稅駕天文襲餞士倫嗟挹俾耆而艾
以歿元身大君廢朝行路相弔時布所須一出長府
密章如等昭飭下泉信乎令終之高顯大雅之明哲
矣謹按謚法體和居中善問周達曰宣如僕射處躬

彌冲在醜忘競不居物業不爲謚增其讓如范宣其
慎如子孺能體和矣內治家事外施邦政接士無貌
言祝神無規解協用通介時其進退能居中矣行成
東脩節貫華皓終以碩望顯升師臣其所薦士皆足
以經哲東猷敷育皇極遜遠時譽常如不及以年得
謝嚮考終之福生平素守鮮如晨葩信善問矣建白
紬次百餘篇傳經見義質聖行遠藏于冊府副在家
楹推明則董仲舒博洽則劉向其周達矣節惠知行
請謚曰宣謹議

張忠定謚議

宋 劉 敞

太常禮院謚故禮部尚書張公曰忠定太子中允直集賢院同判吏部尚書曹劉敞覆議曰尚書布衣之時任俠自善破產以奉賓客而借軀報仇往往過直及讀書爲文折節受學則真厲明白務求道真至於策名試吏傲儻奮發思自見於世不令己失時益有古賢之風而神宗聖考知人善任使每盡其用雖專斷於外而上不疑此其所以感激慷慨能成功名者也夫英偉卓犖之人固自負其材可以意氣忠信結而不可以祿位貨利取也尚書再在蜀及他臨淮皆朝廷所倚重或兵荒之餘而言聽計從德澤下流民到於今稱之蓋君之圖任一則士之報施重不其然歟自宋興以來具百年言治者甚衆其直己以事上盡心以撫下生有榮名死有遺愛者尚書殆無與並焉末年以疾害於朝諤不至大位士君子以爲恨今主上甄德念功使有司追賜之謚而曰康方公正安大慮竊以謂無間然矣請從博士之論以充太史之錄謹議

陳執中謚榮靈議

宋 韓 維

執中幸得以公卿子遭世承平因緣一時之言遂至貴顯皇祐之末天子以後宮之長問所以葬祭之禮執中位爲上相不能總率群司考正儀典以承答天問知治喪皇儀非嬖御之禮追冊位號於宮闈有嫌建廟用樂踰祖宗舊制執中曰而行之曾不愧憚遂使聖朝大典著非禮之舉此不忠之大者閨門之內禮分不明夫人正室疎薄自絀庶妾賤悍逸不制醜聲流布行路共知此又治家無足言者夫宰相所當秉道率禮以弼天子正身齊家以儀百官執中不務出此而方杜門深居謝絕賓客曰我無私也我不黨也豈不陋哉謹按謚法寵祿光大曰榮不勤成名曰靈執中出入將相以一品就第可謂寵祿光大矣得位行政不爲不達死之日賢士大夫無述焉可謂不勤成名矣請合一法謚曰榮靈

歐陽文忠公謚議

宋 李清臣

太子太師歐陽公歸老於其家以疾不起將葬行狀上尚書省移太常請謚太尚合議曰公維聖宗賢臣一世學者之所師法明於道德見于文章究覽六經羣史諸子百氏馳騁貫穿述作數十百萬言以傳先王之遺意斯文卓然自成一家比司馬遷楊雄韓愈無所不及而有過之者方天下溺於末習爲章句聲律之時聞公之風一變爲古文咸知趨尚根本使朝廷文明不愧於三代漢唐者太師之功予教化治道爲最多如太師真可謂文矣博士李清臣得其議則閱讀行狀考按謚法曰唐韓愈李翱權德輿孫逖本朝楊億皆謚文太師固宜以文謚吏持衆議曰太常官長有曰文則信然不可易也然公平生好諫爭當加獻爲文獻無已則忠爲文忠衆相視曰其何如則又合議曰文獻疊犯廟謚固不可忠亦太師之大節太師常參天下政事進言仁宗乞早下詔立皇子使有明名定分以安人心及英宗繼體今上即皇帝位兩預定策謀有安社稷功和裕內外周旋兩官間迄

于英宗之視政蓋太師天性正直心誠洞達明白無所欺隱不肯曲意順裕以自求便安好論列是非分別賢不肖不避人之怨誹徂疾亡身履危以爲朝立事按謚法道德博聞曰文廉方公正曰忠今加忠以麗文宜爲當衆以狀授清臣爲謚議清臣曰不改於文而傳之以忠議者之盡也清臣其敢不從遂謚文忠謹議

姚文公謚議

元 柳 貫

天地真元之氣一會則聖神代作揚熙秉耀承華協瑞以開太陽而必有不世出之臣挺生其間攬結粹精數爲制述於以增煥盛德大業而贊之三五載籍之上蓋數百年而德一二人焉其有關於氣運者如是豈徒乎文哉乃若先正魏國許文正公之在吾元實當世祖皇帝恢拓基圖之始倡明道宗振起東學一時及門之士獨稱集賢大學士姚公燧爲能式纂厥緒以大其承然觀公之言而考夫文正之學則其機籥之相須殆不啻山鳴而谷應雲起而龍翔也故大德至大皇慶之間三宗繼照天下又寧而公之文章蔚爲宗匠典冊之雅奧詔令之深淳固已挾去浮靡一返古轍而銘志箴頌之雄偉光潔凡鏤金刻石招德襲功者又將等先泰兩漢而上之以闕夫作者之域排沮詆訾不一二而家傳人誦已十百雖欲揜之孰得揜之哉他日良史執筆以傳儒林則公在文正之門豈直儕之游夏而已也易曰黃裳元吉文在中也然則以之節惠公奚嫌焉謹按謚法博文多見

曰文敬直慈惠曰文靖謚之曰文

蕭貞敏公謚議

元 劉 致

聖王之治天下也必有所不召之臣蓋志意修則驕
富貴道義重則輕王公蟬蛻塵埃之中翱翔萬物之
表不事王侯高尚其志者以之傳曰舉逸民天下之
民歸心焉故必蒲車旌帛側席以俟其至冀以勵俗
興化猶或長往而不返亦有既至而不屈則束帛
貲責于丘園者治天下者以之也於吾元得二人焉
曰容城劉因京兆蕭糾君始由平章咸寧王野仙薦
世祖徵不至授陝西儒學提舉繼而成宗武宗仁宗
累徵授國子司業集賢直學士未赴改集賢侍講又
以太子右諭德徵始至京師授集賢學士國子祭酒
諭德如故尋得告還山年七十七以壽終士君子之
趣向不同期各得所志而已彼不求人知而人知之
不希世用而世用之至於上徹帝聰鶴書天出辭蘿
動色巖戶騰輝猶堅卧不起不得已焉始一至卒不
挽其節不隳所守而去亦可謂得所志也已方之於
古則嚴光周黨之流亞歟雖其道不周於用而廉頑
立懦兩俗興化之功亦已多矣且其累徵而不起整

出而即歸不既貞乎以勤自居其好古好學之心不
既敏乎按謚法清白守節曰貞好古不怠曰敏請謚
曰貞敏

吳文正公從祀議

明 楊士奇

臣等欽遵考得元翰林學士所著書及奎章閣侍書學士虞集所狀澄事行蓋澄自十歲得宋儒朱熹所註大學讀之即知爲學之要專勤誦讀次讀語孟中庸亦然遂大肆力於諸經十五專務聖賢之學致踐履之實以道自任其所自勵有勤謹敬和自新自脩消人欲長天理克己悔過矯輕警惰顏丹一理等銘其教學者有學基學統等等篇深得濂洛關閩之旨考正孝經校定易書詩春秋脩正儀禮小戴記及邵

雍張載之書有易春秋禮記纂及易纂言外翼皆所以啟大道之堂與開來學之聰明傳之百世而無弊也時朝廷屢起之乃就國子監丞稍進司業一言不合即自解去後屢徵復起亦不久於位進退之際卓然君子蓋元之正學大儒許衡及澄二人衡遭世祖功在朝廷澄在朝之日雖淺其職論思教成均勸講經筵咸積誠意預大議論大事咸引古道而功在學者尤多故二人之沒皆謚文正衡在當時已列從祀澄既後出又卒於元衰之際當時已有建議宜列從祀

者屬元綱日頽未及舉行今澄所著諸書具在我國家崇儒重道大明四書五經及性理之旨凡澄所言皆見采錄以惠學者蓋澄問學之功殊熹以來莫或過之而從祀諸賢自荀況下至范甯語其事功皆未及澄今若升澄從祀孔子廟庭列諸許衡之次允愜斯文之公議昭國家之盛典謹議

謹議

駁議

駁韋巨源謹昭議

唐 李 邕

韋巨源與韋后繼叙源流佞媚官爵謬說特祥取媚中宗識者嗟憤及韋庶人之難出至都街爲亂兵所殺太常博士李處直議謹曰昭戶部員外郎李邕駁之曰三思引之爲相阿韋托之爲親無功而封無德而祿同族則醜止安后他人則附邪楚客謚之曰昭良恐不當處直仍固請依前議邕又駁之

夫古之謹在乎勸沮將杜小人之業冀長君子之風故爲善者雖存不貴仕而沒有餘名此賢達所以砥節也爲惡者雖生有所辜死懷所懲此回邪所以易心也嗚呼巨源嘗未察斯而乃聞義不從與惡相濟蓄罔上之志協群兇之謀苟容聖朝貪昧厚祿自以宰臣之貴不崇朝而賈害者固鬼得而誅之也彼則匹夫之微未受命而行刑者國人得而誅之也拙明之憤斷焉可知天地之心自此而見矣頃者皇運中興功臣翼政時序未幾邪逆執權姦惡者拜爵於私門忠正者降黜於藩郡巨源此際用事方殷且於阿韋何親而結爲昆季於國家何力而累忝大官此則

開通中人附會武氏託域社之固亂皇家之基其罪一也又國家之事在祀與戎酌於禮經陳於郊祭將以對越天地光揚祖宗既告成功以觀海內惟昔亞獻不聞婦人阿韋蓄無君之誠懷自達之意潛圖帝位議啄皇孫昇壇擬儀拜賜明命將預國事無守國章巨源創述於前悖逆演成於後時有禮部侍郎徐堅太常博士唐紹蔣欽結彭景直並言之莫從其罪二也又上天不弔先帝遇毒悔禍無衛阿韋將篡畫計未果逆心尚搖周章夷猶倉皇遂謬於是太平公

主矯為陳謨上官昭容詔草遺詔故得今上輔政阿韋參謀將大業垂成而休命中輟者職由巨源躡韋溫之足楚客附巨源之耳泉聲遠發狼顧相驚以阿韋臨朝以韋溫當國其罪三也又人為邦本財實聚人奪其財則人心自離無其人則國本何恃巨源屢踐台輔專行句徵廢趙條章崇尚侵刻樹怨天下剝害生靈兆庶流離戶口減耗況以三思食邑住在貝州時屬久陰災達多雨租庸蠲免中令昭明匪令獨然自古不易三思慮其封物巨源啟此異端以為稼

穡淫沈雖無菽粟蠶桑織紵可輸庸調致使河朔黎人海隅士女去其鄉族鬻其子孫飢寒切身朝夕奔命其罪四也但巨源長於華宗仕於累代作萬國之相處具瞻之地蔽日月之層輝負邱山之重責今乃妄加哀還安能分謗者哉

謚議

答駁謚

唐丞相謚文貞楊綰謚議代太常答蘇端駁謚

唐梁肅

謚曰有國之典序以位叙其德沒以謚易其名名之
小大視德之美惡蓋書其著而略其微要其終而明
其義故曰謚以尊名節以一惠耻名之浮於行也楊
文貞體淳素之質協時中之德爰自下列至于宰司
秉心不渝動必由道與夫立功立事開物濟衆不同
日語矣而清儉厲俗明哲保身曰文與貞在我惟允
秉公議者其誰曰不然今奉符謂公與元載交游嘗

為載薦引載咎惡惡歸於公斯乃昧於觀行定謚之
義且非君子成人之美也請區而評之昔荀爽為董
卓所舉致位三公及卓數亂漢政可謂甚矣而漢史
曾不以卓之過累於慈明晏子陳氏俱事齊湣陳志
邪而晏志正春秋亦不以陳之惡延於平仲是知道
不必合事不必同則載之於公其事可見況當秉鈞
而公不參大政載以時望慕我或則靜守中因踈為
簡適見清節又有發載之惡皆漏泄致辭患自微也
庸可殺乎及夫載覆其餽公膺大任任職月淺屢以

疾辭位且不安安可以啟悟而責之乎昔季文子三思無食粟之馬衣帛之妾君子以為忠楊公以大名厚位出入三朝無宅一區無馬一駟志於清白交不諂瀆可不謂貞乎掌訓誥秉銓衡處成均貳宗伯潤色王度無替厥美加以敏而好學見善如不及可不謂文乎謹按謚法貞之例有三清白守節曰貞大憲克就曰貞憂國忘死曰貞文之義有六經緯天地曰文道德博聞曰文愍人接禮曰文不耻下問曰文慈惠愛人曰文修德來遠曰文名既不備事亦殊貫又安可以二王三恪私家廟祭之關係責於一名哉若其美果在一名則士文伯孔文子且無經緯天地之文孟武伯甯武子又非克定禍亂之武若以廢禮不稱其名據孫辰縱逆祀不得謚文管夷吾臺門反玷不得謚敬是知謚名之道取其所長則捨其所短志其大行則遺其小節使善惡決於一字褒貶垂於將來蓋先王制謚之方也若綜覈名實形於公論宜取坦然明白彰於遐邇者今或乘人之意肆誣謗之辭所謂扶瑕剝骨說非正議也且聖人無全能才不必

備以鄭公微立言正耻君不如堯舜其節大矣而昧於知人許公環固執條詔廷沮邪計其志明矣終不能守故春秋為賢者諱過傳稱不以一青掩大德語曰無求備於一人蓋二公所以為文貞也若曰百行所歸九德咸事如周公之文宣然後擬議則千古莫嗣而謚典絕矣安在一二蘇魏足為定制乎謹上參典禮近考故事楊公之名請如前議

答嚴郢駁丞相故江陵尹御史大夫呂誼謚議

唐 獨孤及

博士獨孤及議曰呂誼任宰相日淺當時會肅宗躬親萬務庶政羣臣畏威奉職而已雖有謨謀於巖廊之上莫由有知之者其荆門之政爲仁由己畧見於事其恩惠被於物風謠存乎人故人得而稱之謚名之際敢不關其所疑而錄其尤者著者有司之職也其閔實訟獄在未執政之先前議之詳矣敢辱再告至若推進名賢使登大任既同溫室之樹且行狀所

不載孔子曰君子於其所不知蓋闕如也故不書今奉符令必用二字且以忠配肅謹按舊儀凡歿者之故吏得以行狀請謚於尚書省而考行定謚則有司存廷辨可否宜在衆議今駁議撰謚異同之說並故吏專之伏恐亂庖人尸祝之分違公器不私之誠且非唐虞師錫僉曰之道昔周道衰孔子作春秋以繩當代而亂臣賊子懼謚法亦春秋之微旨也在懲惡勸善不在哀榮在議美惡不在字多文王代崇周公殺三監誅淮夷晉重耳一戰而霸諸侯武功盛矣而

皆謚曰文以冀缺之恪德臨事寡僉之忠於其國隨會之納諫不忘其師言身不失其友其文德不亦優乎而並謚曰武固知書法者必稱其大而畧其細故言文而不言武三代已下朴散禮壞乃有二字之謚二字謚非古也其源生於衰周施及戰國之君漢興蕭何張良霍去病霍光俱以文武大畧佐漢時致太平其事業不一謂一名不足以紀其善於是乎有文終文成景桓宣成之謚雖瀆禮甚矣然猶褒不失人唐興參用周漢之制謂魏徵以王道佐時近文直言枉諫愛君而忘身近貞二德並優廢一莫可故曰文貞公謂蕭瑀端直鯁亮近貞性多猜貳近褊言褊則失其審正稱貞則遺其悵狹非一言所能明故曰貞褊公其餘舉凡推類大抵准此皆有爲之也若迹無殊途事歸一貫則直以一字目之故杜如晦謚成封德彝謚明王珪謚懿陳叔達謚忠溫彥博謚恭岑文本謚憲韋巨源謚昭唐休璟謚忠魏知古謚忠崔日用謚昭其流不可悉數此並當時赫赫以功名居宰相位者謚不過一字不聞其子孫佐吏有以字少稱

屈者由此言之二字不必爲褒一字不必爲貶若褒貶果在字數則是堯舜禹湯文武成康不如周威烈王慎觀王也齊桓晉文不如趙武靈魏安釐秦莊襄楚考烈也杜如晦王珪已下或成或明或懿或憲不如蕭瑀之貞福也歷攷古訓及貞觀以來制度似皆不然今奉所議云國家故事宰相必以二字謚未知出何品式請具謹當以爲按據若忠者臣事君之常道苟靖恭於位雖則非忠非有炳然之異則不以爲謚如議獄緩死任賢舉善德之美者然肅者威德克就之名足以表之矣月令曰孟秋天地始肅詩曰曷不肅雍又肅肅王命仲山甫將之肅嚴也敬也忠之屬也天地不肅則歲不成宗廟不肅則禮不立軍旅不肅則人不服肅之時義大矣哉以謹之從政也威能開邪德可濟衆故以肅易名而忠在其中矣亦猶隨會竇侖之不稱文豈必因而重之然後爲美魏晉以來以賈詡之籌策賈逵之忠壯張既之政能程昱之智勇顧雍之密重王渾之器量劉惔之鑒裁庾翼之志畧彼八君子者方之東平宜無慙德死之日並

謚曰肅當代不以爲貶何嘗微一字二字爲之升降乎謹上稽前典下據甲令參禮經而究其行事請依前謚曰肅謹議

重議郭知運

唐 獨孤及

博士獨孤及議曰禮時爲大順次之將次葬易名時也古有關禮追遠請謚順也假如諸侯五月而葬魯惠公之薨也有宋師至隱公元年十月己改葬不以踰時廢禮又公叔戌請謚適當葬前謹按禮經曾不言己葬則不可追謚況帝王殊塗不相沿襲新禮則死必有謚不云日月有時今請易名者五家無非葬後苗太師一年矣呂諲四年矣盧奕五年矣顏杲卿八年矣並荷褒寵無異同之論獨知運以其子不幸遂以過時見抑苟必以己葬未葬爲節則八年與五十年其緩一而與奪殊制無乃不可乎議云己孤暴貴不爲父作謚此謂其父無位而子居大官不當以己之貴加榮於父也禮不云乎父爲士子爲大夫葬以士耳若知運者處方面之寄位列九卿茂勲崇名與衛霍侔飾終之禮宜加於他將一等豈待因依嗣子然後作謚今之專征者雖逢風雲化爲侯王其祖父爵位與知運蓋者鮮矣奈何懼名器等於草芥以是殺禮竊謂近誣乾元以來累有詔追贈百官祖父

內外文武其餘之先悉蒙恩錫或音徽久沐或墓木已拱受大名貴位於九原者以萬數未嘗以碣代遠近爲限夫贈謚一也贈者一時之寵謚者不刊之令今以歲久而廢易名是王澤決於天下而獨隔於一人也當開元二年吐蕃以舉國之師入五原塞擊析之聲聞於秦雍知運與郭虔瓘討平之以張王室當時微知運則汧隴之西左衽是懼今朝廷方將命將帥以征不服討不庭宜褒之以勸握兵者安可以葬久而廢大典況夫謚法者蓋考其言行事業之邪正必以字褒貶之使生者聞美謚而慕觀惡謚而懼不待賞罰而賢不肖皆勸是一字之謚賢於三千之刑本非爲歿者之子孫以爲哀榮寵贈之具假令知運無子且未嘗立勲苟位至上將則謚不可廢豈以其子之存亡爲請謚之可否竊稽載籍徵諸舊章易名之禮請如前謹議

謚議

私議

朱公叔私謚議

漢 蔡邕

漢益州刺史南陽朱公叔卒門人陳季珪等議所謚云宜曰忠文子陳留蔡邕議曰昔在聖人之制謚也將以勸善彰惡俾民興行賢愚臧否依事從實雖文武之美幽厲之穢罔不具存自王公以降至於列國大夫皆以配號傳於無窮秦以世言謚而黜其事漢興以來惟天子與五等之爵然後有之公卿大臣其禮闕焉歷世彌久莫之或脩益州府君貫綜典術率由舊章始與諸儒攷禮定議加陳留府君以益州之謚是後覽之者亦無間焉今子重纂襲前業不忘遺則孝既至矣禮實 謹覽陳生之議思忠文之意恭之章典稽之謚法夫萬類莫貴乎人百行莫美乎忠故夏后氏正以人統教以忠德然則忠也者人德之至也而猶有三焉孔子曰進思盡忠又曰臣事君以忠奉上之忠也曰爲人謀而不忠乎又曰忠焉能勿誨乎謀誨之忠也春秋左傳曰小大之獄必以情情忠之屬也又曰上思利人曰忠撫下之忠也三者人之則而忠行乎其中益州府君自始事至沒身忠言不

輒乎口忠謀不已乎心其在帝室正身危行言如砥
矢策合神明憲憲之諫文章具存奉上忠矣其在部
臣匡救善藻精白一心疑不我聽者果有蹟覆不測
之禍謀諷忠矣爰救益州時值凶荒勞心苦思勤恤
庶事誅斃貪暴糾戢貴黨雖有強禦當官能行夫豈
淫刑將有利也發墓盜柩議而不罪夫豈漏奸察以
情也撫下忠矣位在牧伯職掾納言秉權食祿實有
年數而居無蓄好財貨不益舊糲食布衾絮謂之精
麗者皆魯季孫行父卒宰厄家器無衣帛之妾無食
粟之馬君子曰相三君矣而無私積可不謂忠乎而
謚曰文子春秋外傳曰忠文之實也然則文忠之彰
也忠以爲實文以彰之事通義合兩名一致是忠貞
儉之稱文也邾子蓬條卜遷於繹史曰利於民不利
於君公曰民苟利矣孤何與焉於是遷而遂卒謚曰
文公是危身利民之稱文也衛大夫孔圉謚曰文子
子貢疑焉惟敏而好學不耻下問仲尼與之是勤學
好問之稱文也府君所在屢以忤違陷以深患苟除
民害生死以之前後三黜一罹疾廢於身危矣兼包

六典命世作師猶復宗事趙叟示有攸尊能下問矣
有一於此猶可以稱況乃忠兼三義文備三德於古
志不悖而謚法亦曰宜矣本議曰忠文子按古之以
子配謚者魯之季文子孟懿子衛之孫文子公叔文
子皆諸侯之臣也至於王室之卿大夫其尊與諸侯
並故以公配春秋曰劉卷卒葬劉文公公羊傳曰劉
卷者何天子大夫也經又曰王子虎卒左傳曰王叔
文公卒而如同盟禮也此皆天子大夫得稱其禮與
諸敵體故也又禮緣臣子咸欲尊其君父故雖侯伯
子男之臣自稱其君咸得曰公及其卒也異國之人
稱之皆然是以邾子許男公以葬春秋之正義也以
列言之則府君王室亞卿也有王叔劉氏之比以臣
子之辭言之則有邾許稱公之文雖無土田而其位
是也今曰公猶可若稱子則降等多矣懼禮廢日久
將詭時聽周有仲山甫伯陽嘉父優老之稱也宋有
正考父曾有尼父配謚之稱也父雖非爵號與同禮
天子諸侯咸用優賢異亡順乎門人臣子所稱之宜
可於公父之中擇一處焉使不得稱子而已

恭承嘉惠兮侯罪長沙側聞屈原兮自沈汨羅造託
湘流兮敬弔先生遭世同極兮乃隕厥身嗚呼哀哉
逢時不祥鸞鳳伏竄兮鴻象翱翔聞昔尊顯兮讒諛
得志賢聖逆戔兮方正倒置世謂隨夷為濁兮謂跖
蹠為廉莫邪為鈍兮鉛刀為銛吁嗟默然生之無故
兮幹棄周鼎寶康瓠兮騰駕罷牛駢蹇驢兮驥垂兩
耳服鹽車兮章甫薦履漸不可久兮嗟若先生獨離
此兮兮訊曰已矣國其莫我知兮獨壹鬱其誰語鳳
漂漂其高逝兮固自引而遠去襲九淵之神龍兮沕
深潛以自珍倘燦爛以隱處兮夫豈從蝦與蛭蟻所
貴聖人之神德兮遠濁世而自藏使騏驎可得係而
羈兮豈云異夫犬羊般紛紛其離此尤兮亦夫子之
故也歷九州而相其君兮何必懷此都也鳳凰翔於
千仞兮覽德輝而下之見細德之儉微兮遠矜繒而
去之彼尋常之汙瀆兮豈能容夫吞舟之魚橫江湖
之鱣鯨兮固將制於螻蟻

弔親武帝文

晉陸機

元康八年機始以臺郎出補著作游乎秘閣而見親武帝遺令慨然歎息傷懷者久之客曰夫始終者萬物之大歸死生者性命之區域是以臨喪殯而後悲親陳根而絕哭今乃傷心百年之際興哀無情之地意者無乃和哀之可有而未識情之可無乎機啓之曰日蝕由乎交分山崩起乎朽壤亦云數而已矣然百姓怪焉者豈不以資高明之質而不免卑濁之累居常安之勢而終嬰傾離之患故夫以回天倒日之力而不能振形骸之內濟世夷難之智而受困魏關之下已而格乎上下者藏于區區之木光乎四表者翳乎葦爾之土雄心推於弱情壯圖終于哀志長算屈于短日遠跡頓于促路嗚呼豈特替史之異闕景默黎之怪類岸乎觀其所以顧命冢嗣貽謀四子經國之略既遠隆家之訓亦宏又云吾在軍中持法是也至于小忿怨大過失不當效也善乎達人之謹言矣持姬女而指季豹以示四子曰以累汝因泣下傷哉曩以天下自任今以愛子託人同乎盡者無餘而

得乎亡者無存然而婉孌房閨之內綢繆家人之務則幾乎窒與又曰吾嬖好妓人皆著銅雀臺於臺上施八尺牀總帳朝脯上脯精之屬月朝十五日輒向帳作伎汝等時時登銅雀臺望吾西陵墓田又云餘香可分與諸夫人諸舍中無所事學作履組賣也吾歷官所得綬皆著藏中吾餘衣裘可別爲一藏不能者兄弟可共分之既而竟分焉亡者可以勿求存者可以勿違求與違不其兩傷乎悲夫愛有大而必失惡有甚而必得智慧不能去其惡威力不能全其愛故前識所不用心而聖人罕言焉若乃繫情累於外物雷曲念於閨房亦賢俊之所宜廢乎於是遂憤懣而獻弔云爾

接皇漢之末緒值王塗之多違佇重淵以育鱗撫慶雲而興飛運禮道之載德乘靈風而扇威推羣雄而電驚舉勅敵其如遺指八極以遠略必翦焉而後經釐三才之闕典啟天地之禁闡舉修綱之絕紐大音之解徽掃雲物以貞觀要萬塗而來歸丕大德以宏覆援日月而齊暉濟元功於九有固舉世之所推彼

人事之大造夫何往而不臻將覆簣於浚谷降爲山
乎九天苟理窮而性盡豈長筭之所研悟臨川之有
悲因梁木其必顛當建安之三八實大命之所艱雖
光昭於曩載將稅駕於此年惟降神之綿邈渺千載
之遠期信斯武之永喪膺靈符而在茲雖龍飛於文
昌非王心之所怡憤西夏以鞠旅汴秦川而舉旗踰
鉅京而不豫臨渭濱而有疑冀翌日之云廖彌四句
而成災詠歸塗以及旆登峭澗而竭來次洛汭而大
漸指六軍曰念哉伊君王之赫奕實終古之所難咸
先天而蓋世力盪海而拔山厄奚險而弗濟敵何強而
不殘每因禍而禔福亦踐危而必安迄在茲而蒙昧
慮嘿閉而無端委軀命以待難痛沒世而永言撫四
子以深念循膚體而頽歎迨營鬼之未離假餘息乎
音翰執姬女以嘯痺指季躬而淮馬氣衝襟以嗚咽
涕垂睫而汎瀾逢率土以靜寐飛彌天乎一棺浩宏
度之峻邈壯大業之允昌思居終而恤始命臨沒而
聲揚援貞吝以甚恤雖在茲而不戚惜內顧之纏綿
恨求命之微詳紆廣念於履組塵清慮於餘香結遺

情於婉孌何命促而意長陳法服於帷座陪窈窕於
玉房宜備物於虛器發哀音於鶯倡矯威容以赴節
接零淚而薦觴物無微而不存體無患而不亡庶聖
靈之響像想幽神之復光苟形聲之翳沒雖音景其
必藏徽清絃而獨奏進脯脯而誰嘗悼總帳之冥漠
怨西陵之茫茫登雀臺而羣悲眴美目其何望既睇
古以遺累信簡禮而薄葬彼表版於何有貽塵謗於
後王嗟大戀之所存故雖哲而不忘覽遺籍以慷慨
獻茲文而悽傷

帝瑁王宏遠華池豐屋廣延賢彥園莊生垂綸之象
記先達辭聘之事盡真人於刻楠之室載退士於進
趣之堂可謂託非其所可弔不可讚也其辭曰邁矣
莊周天縱特放塊授其生自然資其量器虛神清
窮元極曠人偽俗季貞風既散野無訟屈之聲朝有
爭寵之嘆上下相陵長幼失貫於是借元虛以助弱
引道德以自獎戶詠恬曠之辭家畫老莊之象今王
生沈淪名利身尚常女連耀三光有出無處池非巖
石之溜宅非茅茨之宇馳屈產於皇衢畫茲象其焉
取嗟乎先生高迹何局生處巖岫之居死寄彫楹之
屋託非其所沒有餘辱悼大道之湮晦遂含悲而吐
曲

貞元十一年九月愈如東京道出田橫墓下感橫義
高能得士因取酒以祭爲文而弔之其辭曰
事有曠百世而相感者余不自知其何心非今世之
所稀孰爲使余歎歎而不可禁余既博觀乎天下曷
有庶幾乎夫子之所爲死者不復生嗟余去此其從
誰當秦氏之敗得一士而可王何五百人之援援而
不能脫夫子於劍鉞抑所寶之非賢亦天命之有常
昔關里之多士孔聖亦云其遑遑苟余行之不迷雖
顛沛其何傷自古死者非一夫子至今有耿光踈陳
辭而薦酒魂髣髴而來享

予屈原文

唐 柳宗元

後先生蓋千祀兮余再迹而浮湘求先生之汨羅兮
擘蘅若以薦芳願荒忽之顧懷兮冀陳詞而有光先
生之不從世兮惟道是就支離搶攘兮遭世孔疚華
蟲薦壤兮進御羔裘牝雞咩兮孤雄東喙哇咬環
觀兮蒙耳大呂董喙以爲蓋兮焚棄稷黍猗猗之
知避兮宮庭之不虞陷途藉藉兮榮若繡繡擗折火
烈兮娛娛焚舞讒巧之嘒嘒兮惑以爲咸池便媚鞠
惡兮美邇西施謂謨言之怪誕兮反寘璫而遠違臣
重猶以諱避兮進能緩之不可爲何先生之凜凜兮
厲鍼石而從之似仲尼之去魯兮曰吾行之遲遲柳
下惠之直道兮又焉往而可施今夫世之議夫子兮
曰胡隱忍而懷斯惟達人之卓執兮固僻陋之所疑
委故都以從利吾知先生之不忍立而視其覆墜兮
又非先生之所志窮興達固不渝兮夫難服道以守
義矧先生之惻惻兮陷大故而不貳沈穢瘞珮兮孰
幽而不光荃蕙蔽匿兮胡久而不芳先生之貌不可
得兮猶髮鬢其文章託道編而歎喟兮渙余涕之盈

睚呵星辰而驅詭恠兮夫孰救於崩亡何揮霍大雷
電兮苟爲是之荒茫耀慘辭之矐朗兮世果以是之
爲狂哀余哀之坎坎兮獨蘊憤而增傷諒先生之不
言兮後之人又何望忠誠之既內激兮抑銜忍而不
長羊爲屈之幾何兮胡獨焚其中腸吾哀今之爲仕
兮庸有慮時之否臧食君之祿畏不辱兮悼得位之
不昌退自服以默默兮曰吾言之不行既喻風之不
可去兮懷先生之可忘

弔古戰場文

唐 李 華

浩浩乎平沙無垠，復不見人。河水縈帶，群山糾紛。點
兮慘怛，風悲日曛。蓬斷州枯，凜若霜晨。鳥飛不下，獸
挺亡群。亭長告余曰：此古戰場也。常覆三軍，往往鬼
哭。天陰則開，傷心哉！秦歟？漢歟？將近代歟？吾聞夫齊
魏徭戍，荆韓召募。萬里奔走，連年暴露。沙草晨牧，河
冰夜渡。地闊天長，不知歸路。寄身鋒刃，腦髓誰訴？秦
漢而還，多事四夷。中州耗斁，何世無之？古稱戎夏不
抗，王師文教。失宣武臣，用奇奇兵。有異於仁義王道。
迂澗而莫為，嗚呼噫嘻！吾想夫北風振漠，胡兵伺便。
主將驕敵，期門受戰。野豎旌旗，川回組練。法重心駭，
威尊命賤。利鏃穿骨，驚沙入面。主客相搏，山川震眩。
聲折江河，勢崩雷電。至若窮陰凝閉，凜冽海隅。積雪
沒脛，堅冰在鬚。驚鳥休巢，征馬踟躕。續無溫壺，指
裂膚當此苦寒。天假強胡，憑陵殺氣。以相翦屠，徑截
輜重。橫攻士平，都尉親降。將軍覆沒，屍填巨港之岸。
血滿長城之窟。無貴無賤，同為枯骨。可勝言哉！鼓衰
兮力盡，天竭兮旌絕。白刃交兮寶刀折，兩軍盛兮生

死決降矣哉！終身夷狄，戰矣哉！骨暴砂礫，鳥無聲兮。
山寂寂，夜正長兮。風淅淅，冤冤結兮。天沈沈，鬼神聚
兮。雲羃羃，日光寒兮。草短，月色苦兮。霜白，傷心慘目。
有如是耶？吾聞之，牧用趙卒，大破林胡，開地千里。遁
逃匈奴，漢傾天下，財殫力痛，任人而已。其在多乎？周
逐穰狁，北至太原。既城朔方，全師而還。飲至策勳，和
樂且閑。穆穆棣棣，君臣之間。秦起長城，竟海為關。荼
毒生靈，萬里朱殷。漢擊匈奴，雖得陰山，枕骸遍野，功
不補患。蒼蒼繄繄，民誰無父母？提攜捧負，畏其不壽。誰
無兄弟？如足如手，誰無夫婦？如賓如友，生也何恩？殺
之何咎？其存其沒，家莫聞知。人或言將，信將疑。賄
賄心目，寢寐見之。布奠傾觴，哭望天涯。天地為愁，草
木淒悲。弔祭不至，精魂何依？必有凶年，人其流離。嗚
呼噫嘻！時邪？命邪？從古如斯，為之奈何？守在四夷。

祇明祀而言旋兮指槐里以西征停策憩於道傍兮
觀高邱之崢嶸即故老而訊之兮惟武皇之茂陵整
冠裳而疾趨兮謁遺廟以屏營淒風起於叢棘兮鼙
鼓嘯於幽壁慨雄心之靡託兮悲曼志之無成惟君
皇之御極兮遭炎靈之方熾陋堯禹爲未足遵兮平
祖武而弗肯繼內濟民以自殖兮外震威乎遐裔
騁車轍於八方兮候神人於海澨建千門於萬戶兮
碑土木之奢麗希軒轅之勝化兮永傲睨乎斯世何

業之易襲兮洪謨鬱而難宣雖暫弱於戎胡兮生民
流弊而不痊奇禍機於丘壘兮妃允丁毒而銜冤
諒還心於厲滅兮抑天道之致然闢土疆之宏廓兮
曾元宮之莫固赫兵革之繁庶兮委周衛於葦露城
闕之崇敞兮求斷礎而無所後宮之韶冶兮僅得傳
其塚墓像祈連以旌武兮壯魄之已腐嗚呼哀哉形
必有盡兮孰不有亡匪君皇之獨然予尚奚爲隱憫
而理違惟祈生之已甚兮或妖誑而過望謂長年而
卒老死兮斯足垂戒於昏荒明固有所不達兮智固

有所短偉才畧之英邁兮哲與愚其相半賴聖表而
默然邪芳兼善悔而能斷雖人恫而財竭兮終克免
乎危亂悼往者之無知兮尚來者之可誅感盛衰而
相襲兮仰昊天而永歎

弔九江驛碑材文并序

唐 歐陽詹

弔傷而有辭者也噫九江之驛碑其可興辭而弔歟
斯碑之材昔太師魯國顏忠肅公所建祖亭之碑也
公素負辭華代之銘誌多公之辭又好採異留名之
致頃為湖州牧州產碑材石每使工琢之與辭兼行
磨礪而成常心使用者不可勝數斯碑也終山之窮
僻得之於自然跌本有龜護頂有螭雖不甚成而擎
躍儼與如神如靈公神而珍之精選所處湖州無稱
立罷守歸朝載而途卜出蘇臺入毗陵亦無稱立轉
丹陽遊建業亦無稱立次江州州南有湖湖東有山
蛟奔螭引直到湖心頓址之處則茂林峭石勢環氣
勝非往時所睇而神祖祠曰祖將軍廟在焉公觀其
說秀與碑材叶即日以酒脯奠其祖神出錢五萬造
亭曰祖亭南香爐峯北潯陽城九江為亭千艘歷階
亭既就公製亭之文手勒斯碑而立之公文為天下
最書為天下最斯亭之地亦天下最廉資三善加以
斯碑之奇相持萬古而採異留名之致一得也後典
州吏於州之九江驛有修壞之勞狀其未績乃取斯

碑刻公之述真己之述今為九江驛之碑焉予旅建
江州稅于茲驛祠部員外郎鄭恕同之鄭與州將嚴
士良共為手說而俱以相示嗚呼先賤後貴世之常
也先貴後賤人之傷也以祖亭方九江驛則蘭室鮑
肆矣以魯公之文方今之文則牢醴糟糠矣以魯公
之札翰方今之札翰則錦綉象麻矣以魯公之用方
今之用則諸夏夷狄矣痛哉斯碑出祖亭入九江驛
失魯公之文得人之文削魯公之札翰題人之札翰
亡魯公之用就人之用是去蘭室而居鮑肆捨牢醴
而食糟糠脫錦綉而服象麻然諸夏而即夷狄可悲
之甚者況我質天成必將可名魯公所以卜擇敬慎
如彼而常人無良黷辱如此與夫有道而黜無罪而
別投四裔禦魑魅何以別也石不能言豈其無冤故
弔之情違乃傷理悌乃冤人實有之物亦應然嗚呼
子碑寃可予知陰陽子材豈曰無意必有以殊方頌
以異與顏表勝以殊則明從吏居卑以異奚桂子產
既授子不終致悠悠彼蒼何嗟及矣美玉抵禽高冠
藉足有賴子碑先榮後辱繼世生哲詎無賢芳將觀

于斯將悼于斯廢滌所黷而復攸宜屹屹子碑如神
如祇人得以專天造何爲其不然矣其不然矣

悲制谿古藤文

唐 舒元興

刺溪上縣四五百里多古藤株析逼土雖春入土脉
他植發活獨古藤氣候不覺絕盡生意予以爲本乎
地者春到必動此藤亦本於地方春且死色遂問谿
上人有道者云谿中多紙工刀斧斬伐無時掣剥皮
肌以給其業噫藤雖植物者溫而榮寒而枯養而生
殘而死亦將以有命於天地間今爲紙工斬伐不得
發生是天地氣力爲人中傷致一物疾癘之若此異
日遇數十百郡洎東維西雍歷見書文者皆以制紙
相夸于寤寐見制藤之死職止由此此過不在紙工
且今九牧士人自專言能文章戶牖者其數與麻竹
相多聽其語其自安重皆不啻握驪龍珠雖苟有曉
寤者其倫甚寡不勝衆者亦皆斂手無語勝衆者果
自謂天之文章歸我遂輕傲聖人道使周南召南風
骨折入於抑揚皇華中言偃卜子夏文學陷入於淫
靡放蕩中此肩握管動盈數千百人數千百人筆下
動數千萬言不知其爲謬誤日月以縱自然殘藤命
易其桑葉波波顏杳未見止息如此則綺文妄言華

誰非書刺紙者耶紙工嗜利曉夜斬藤以鬻雖舉天
天下為刺豁猶不足以給況一刻豁者耶以此恐後
之日不復有藤生於刺矣大抵人間費用苟得著其
理則不枉之道在則暴耗之過莫由橫及物物之資
人亦有其時其斬伐不為天闕予謂今之錯為之文
者皆天闕刺豁藤之流也藤生有涯而錯為文者無
涯無涯之損物不直於刺藤而已予所以取刺藤以
寄其悲

弔鑄鍾文

宋 秦 觀

嘉魚縣傍湖中比歲大旱水皆就涸而夜嘗有光怪
赫然屬天鄉人相與誌其處而掘之得古鑄鍾焉其
形有兩鑿如合兩瓦面左右九乳總三十六于鼓鉦
舞鋪銜旋幹之類考之不與合者無幾縣令施君謀
獻之太常未果乃輸武昌庫中會其守解秩佐攝之
事見而惡之曰郡得背時器畜之不祥也亟命投于
兵器之治嗚呼物之不幸有如是邪昔九江吏盜忠
肅之碑材寘其所述歐陽詹聞而弔之以詞予悲夫
鑄鍾鼓樂之器先王所以被功德而和人神審音之
士至有振車鐸于空地而求之者非若九江碑材因
人而貴也而辱于泥塗無所自故遇其非鑒以觸廢
毀好古之士焉得默默而已予乃作文以弔之詞曰
嗚呼衆方之生譌形殊器更首述尾雌雄相廢朝為
美姬夕為焦悴或奇偶之相續或九升而一躡清鉞
和熙刑王眇責生犢失明得駿折解洞所遇之參差
莽循還于一氣傳曰黃鍾毀索元在雷鳴余始以為
不然今乃信之矣嗚呼鑄鍾何世所為質不呈剛形

不露奇協律中度渾如天資掩抑雖久不見瑕疵爰
有兩樂三十六乳厥音琅然小大隨叩昂所挺之瑣
偉而偶沉于幽陋辱泥塗之污漫厭鱗鬣之腥臭嗟
筍簾之一辭遠月宏之幾穀幸陽愆而水涸天日悅
其復觀謂庭貴之是克獲效鳴于金奏何夜光之暗
投卒按劍而莫售嗚呼赤刀大訓天球河圖秦璽漢
劍趙璧隋珠捷爲之磬汾陽之鼎曲阜之履大澤之
孤歷世相傳以華國都下至咸斗錯刀羯鼓之棖破
鏡缺符遺簪隨珎信無益于經綸猶見收于好事是

鍾也郊廟所薦樂之紀綱統和元氣舞獸儀鳳令大
河而更清便左角其不芒變化風俗返乎義皇而乃
廢于深淵出而遇毀殆藻盤之不如刳牛鐸之敢企
此義夫志士所爲疾心而切齒也然余聞之陰精之
純燥氣之苟雖從火革其質不變一晦一明昔者既
然憤而復起可無畢乎嗚呼鍾乎今焉在乎豈復爲
激宮流羽以嗣其故乎將憑化而遷改服易制以周
于用乎豈爲錢爲鐸爲銓爲釜以供耕稼之職將爲
鼎彝以効烹飪之功乎豈爲浮圖老子之像巍然瞻

仰于縞素乎豈爲麟趾裏蹄之形翕然玩于邦國乎
豈爲千越之劍氣如虹電掃除妖氛于指顧之間乎
將爲百鍊之鑑湛然如止水別妍醜于高堂之上乎
新故相代未始云畢紛然殊途必有一出決不泯沒
草亡木卒嗚呼鐸鍾又將奚卹

祭文

滄州精舍告先聖文

宋 朱 熹

恭惟道統遠自羲軒集厥大成允屬元聖述古垂訓
萬世作程三千其徒化若時雨惟顏曾氏傳得其宗
達思及興益以光大自時厥後口耳失真千有餘年
乃曰有繼周程授受萬理一原曰邵曰張爰及司馬
學雖殊轍道則同歸俾我後人如夜復旦熹以凡陋
少蒙義方中靡常師晚逢有道載鑽載仰雖未有聞
賴天之靈幸無失墜逮茲遇老同好 來落 一邱
群君伊始探原推本敢昧厥初冀以告虔尚其昭格
陟降廷止惠我光明傳之方來永永無斁今以吉日
謹率諸生恭修釋菜之禮以先師克國公顏氏卹侯
曾氏沂水侯孔氏鄒國公孟氏配濂溪周先生明道
程先生伊川程先生康節邵先生橫渠張先生溫國
司馬文正公延平李先生從祀尚饗

己卯春釋菜先聖文

元劉因

聖代天言明告萬世寥寥方冊孰傳聖言天啟聖心
程朱將命堦晦後闢聾聰替明謂當後人承此遺澤
孰云剽盜資我而文肆焉多岐孰會其一徒爲瞻仰
有側此心因早躁狂若將有志中寔脆屈未立己類
揆厥無成實由貪懦時馳意去凜不自容顧念初心
愧焉如失今此闕館惟我之求講學有徒進脩有地
研窮參訂亦復有書千古遺言于今學者尚有裨益
少慰此心但懼悠悠復循前軌惟神啟迪實有臨之

祭轟文

唐獨孤及

天地不仁神明無親惟正足與若響之答敢有象恭
滔天構孽稱亂國有明罰神其捨諸賊臣劉展假寵
多難散包狼心竊發蠱毒將數虐于我上下神祇使
東溟揚波群動昏墊皇帝震怒按劍授鉞命我上將
底天之伐於是虎牙鷹揚之臣叱矛犀渠之群橫
行而東我伐用張月羽雲旗以先啓行方將歷潯陽
下南陵收京口掃建業斷梟獍以鸞鼓封鯨鯢爲京
觀俾萬里浪破三象霧廓今以令月吉日整駕即路
是用徵福于爾有神惟神降衷尚弼予志敢告無靡
旗無綪膠無汰軸無積車命五將護野萬靈并轂令
天地氛祲望風掃除魑魅魍魎罔不率俾莫我敢遏
爲神祇羞尚饗

潮州祭神文

唐 韓 愈

潮州刺史韓愈謹差攝潮陽縣尉史虛己以特羊廩
蓋之奠告于太湖神之靈愈承朝命爲此州長今月
二十五日至治下凡大神降依庇貺斯人者皆愈所
當率徒屬奔走致誠親執祀事于廟庭下今以始至
方上奏天子思慮不能專一冠衣不淨潔與人吏未
相識知牲粢酒食器皿滯弊不能嚴清又未卜日皆
不敢薦見使攝潮陽縣尉史虛己以告神其降監尚

其二

潮州刺史韓愈謹以清酌服脩之奠祈于太湖神之
靈曰稻既稔矣而雨不得熟以獲也蠶起且眠矣而
雨不得老以簇也歲且盡矣稻不可以復種而蠶不
可以復育也農夫桑婦將無以應賦稅繼衣食也非
神之不愛人刺史所失職也百姓何辜使至極也神
聰明而端一聽不可濫以惑也刺史不仁可坐以辜
惟彼無辜惠以福也剗剗雲陰卷日月也幸身有衣
口得食給神役也充上之須脫刑辟也遷牲爲酒以

報靈德也吹擊管鼓備香潔也拜庭跪坐如法式也
不信當治疾殃殛也神其尚饗

祭馬當山上水府文

宋 呂 誨

惟神道靈水府雄據長江濟物利人載在祀典然風波重阻帆檣交會物貨貿遷者商人之利也又如冒官販墨侵漁下民重裝以還者貪利之吏也是皆行險徼幸日進千里而不知其徑者利汨於中豈計于險易一有傾覆固其宜矣至若鱸尾相啣率鍾致石遠奉公上固有期會豈得已者又況忠臣義士忘軀報國一言忤時謫斥萬里雖葬於魚腹未厭仇人之欲與夫徇福誠異趣爾意天地設險阻舟楫濟不通皆有所謂神據險阻受國封爵濟物利人福善禍淫乃其職爾今狂蛟肆怒乘風鼓浪恣其覆沒陷危若是果威靈不能制耶彼安濟者皆其幸耶誨六年中再得罪沿沂上下者四移麾晉陽舟次于是適值風濤幾為淹溺三日未霽故具牢醴禱訴所誠神其監焉

祈雨祭漢景帝文

宋 歐陽修

縣有州帖祈雨諸祠縣令至愚以謂雨澤頗時民不至於不足不敢以煩神之視聽癸丑出于近郊見民稼之苗者荒在草間問之曰待雨而後耘籽又行見老父曰此月無雨數將不成然後乃知前所謂雨澤頗時者徒見於城郭之近而縣境數百里山陂田畝之間蓋未及也修以有罪為令於此宜勤民事^神以塞其責今既治民獄訟之不用又不求民之所急至去縣十餘里外凡民之事皆不能知顧然慢于事神此修為罪又甚于所以來為令之罪惟神為漢明帝生能惠澤其民布義行剛威靈之名照臨後世而尤信于此土之人神其降休以答此土之民之信

祭城隍神文

宋 歐陽脩

雨之害物多矣而城者神之所職不敢及他請言城役用民之力六萬九千工食民米一千五百石衆力方作雨則止之城功既成而又壞之敢問雨者於神誰尸更能知人不能知雨惟神有靈可與雨語吏竭其力神祐以靈各供其職無愧斯民

告峨山龍湫文

元 劉 因

嗚呼一邦之望有峨惟山山之精深聚而淵泉山川惟形有神棲之雲雷雨露神實司之今是邦之凶旱極矣豈神之靈坐視而不恤哉蓋雨暘之數出于天非神之所得專也雨暘之咎由於人非神之所得而釋也是以使函蓄靈潤雖欲發之而不得也雖然山川之神受命于天而主佑下民者也今欲佑之而不得矣則當為之請命于天昭昭在上安有不從由是言之神雖欲無責烏得而無責也且小民至愚窮且極矣而無所歸誠則為淫昏之鬼是求夫淫昏之鬼乃神之所當屏黜而下民之災亦神之所當誘相也今氣運已窮矣窮則必通或天降之雨則小民必歸功於淫昏之鬼而惑信愈篤孰能禁之今是邦之大夫致禱於神則是禱其所當禱矣既禱其所當禱而當禱之神能隨其禱而應之以雨使既足而又周濟焉庶小民之愚知天地之間自有名山大川之正神實能闔闢陰陽而神妙造化而境內吏民之所當敬修其壇壝潔其牲幣而事之而向之所謂淫昏之鬼者真不足信矣如是則人情世教或自此而變之則鬼

神之患又不但一雨而已矣如其不然則是雲雷之澤神其不可司之旱乾之虐神實不恤之天命之職可急而曠之惑邪之俗可助而成之又何望焉又何望焉敢告

沅州禱雨告神文二首 明 薛 瑄

維年月日謹差沅州知州李果以清酌之奠告于明山之神曰凡山之高大表為一方之望者為其能興雲雨也明為沅之傑然挺出荒服以神為之主也宜乎祀典代承而莫敢去也逮茲秋旱為虐禾將盡槁而民無以處也神司膏澤胡吝不與也御史虔誠遠告神必惠然許也元雲勃興斯須而天宇也四野大獲欣欣觀子女也民獲報祀進牲醑也吹擊管鼓式歌且舞也御史當修神之名播中土也尚饗

維年月日差知州李果以清酌之奠告于城隍等神曰間者秋旱為虐一何極也是用有所於羣神羣神聽果不惑也有雲鬱興一雨滿三日也晚稻將穡神賜以實也山稼將枯神賜以粒也小民將饑神賜以食也百用將竭神賜以給也官宜即罰神賜以釋也凡百有心感神德何以報神選肥潔也詞以侑之神來格也神惠其醴之承事永無數也尚饗

祭涿頭山神文

明 王守仁

惟廣谷大川阜財興物以域民畜衆故古者諸侯祭
封內山川亦惟其有功於民然地靈則人傑人之無
良亦足以爲山川之羞茲土爲盜賊所盤據且數十
年遠近之稱涿頭者皆曰賊巢耻莫大焉是豈山川
之罪哉雖然清列之井冀穢而不除久則同於厠溷
矣丹鳳之穴鴟狐聚而不去久則化爲妖窟矣冀穢
之所過者掩鼻妖孽之窟人將持刀燔燎環而攻之
何者其積聚招致使然也誠使除其冀穢刮剝滌蕩
將不終朝而復其清鳩孤逐而鸞鳳歸妖孽之窟還
而爲乎祥育瑞之所矣今茲土之山川亦何以異於
是守仁奉天子明命來鎮四陲憤涿賊之克恃民荼
毒無所控額故通者計擒渠魁提兵撫其巢穴所向
克捷動獲如志斯國人怨天怒天人應順之理將或
茲土山川之神厭惡克殘思一洗其積辱陰有以相
協假手於予今駐兵於此彌月餘旬雖巢穴悉已掃
蕩擒斬十且八九然漏殄之徒尚有潛逃小民不能
無怨於山川之神爲之遁逃主莽淵藪也今予提深

入豈獨除民之害亦爲山川之神雪其耻夫安舊染
棄新國非中人之情而況於鬼神乎今此殘徒勢窮
力屈亦方遣人投招將順而撫之則慮其無革心之
誠復遺患於日後逆而弗受又恐其或出於誠心殺
之有不忍也神其陰有以相協使此殘寇而果誠心
邪即益佑其衷俾盡攜其黨類自縛來投若水之赴
壑予將隄沿停書如有設詐懷奸即奪其魂張我軍
威風驅電掃一鼓而殲之茲惟下民之福亦惟神明
之休壇而祀之神亦永永無忤惟神寔鑒國之

祭從弟敬遠文

晉 陶 潛

歲在辛亥月惟仲秋旬有九日從弟敬遠卜辰云窆
永寧后土感生平之游處悲一往之不返情惻惻以
推心淚慙慙而盈眼乃以園果時醪祖其將行嗚呼
哀哉於鑠吾弟有操有槩孝發幼齡友自天愛少思
寡欲靡執靡介後已先人臨財思惠心適得失情不
依世其色能溫其言則屬樂勝朋高好是文藝遙遙
帝鄉爰感奇心絕粒委務考槃山陰淙淙懸溜暖暖
荒林晨採上藥夕開素琴曰仁者壽竊獨信之如何

斯言徒能見欺年甫過立奄與世辭長歸萬里邈無
還期惟我與爾匪但親友父則同生母則從母相及
韶齒並罹偏咎斯情寔深斯愛實厚念疇昔同房之
歡冬無絪褐夏渴瓢簞相將以道相關以顏豈不多
乏忽忘饑寒余常學仕纏綿人事流浪無成惧負素
志敝策歸來爾知我意常願攜手寘彼衆意每憶有
秋我將其刈與汝偕行舫舟同濟三宿水濱樂飲川
界靜月澄高溫風怡逝撫杯而言物久人脆奈何吾
弟先我離世事不可尋思亦何極日徂月流寒暑代

息死生異方存亡有域候晨永歸指塗載陟呱呱遺
稚未能正言哀哀喪人禮儀孔閑庭樹如故齋宇廓
然孰云敬遠何時復還余惟人斯昧茲近情蒼龜有
吉制我祖行望旒翩翩執筆者涕盈神具有知昭余中
誠嗚呼哀哉

自祭文

晉 陶 潛

歲惟丁卯律中無射天寒夜長風氣蕭索陶子將辭
逆旅之館永歸於本宅故人懷其相悲同祖行於今
夕羞以嘉疏薦以清酌候顏已冥聆音愈漠嗚呼哀
哉茫茫大塊悠悠高爰是生萬物余得爲人自余爲
人逆運之貧簞瓢屢罄婦姑冬陳含歡谷汲行歌負
薪翳翳柴門事我宵晨春秋代謝有務中國載耘載
耔迺育迺繁欣以素醴和以七弦冬曝其日夏濯其
泉勤靡餘勞心有常閒樂天委分以至百年惟此百
年夫人愛之懼彼無成惕日惜時存爲世珍沒亦見
思嗟我獨邁曾是異茲寵非已榮涅豈吾緇粹兀窮
廬酣酒賦詩識運知命疇能罔眷余今斯化可以無
恨壽涉百齡身慕肥遯從老得終奚所復戀寒暑逾
邁亡既異存外姻晨來良友宵奔葬之中野以安其
魂宵宵我行蕭蕭墓門者侈宋臣儉笑王孫廊芳已
滅慨焉已邈不封不樹日月遂過匪貴前譽孰重後
歌人生實難死如之何嗚呼哀哉

祭屈原文

南宋 顏延年

維有宋五年月日湘州刺史吳郡張邵恭承帝命建
旗舊楚訪懷沙之淵得捐珮之浦弭節羅澤臙舟汨
渚局遣戶曹掾某敬祭故楚三閭大夫屈君之靈
蘭薰而推玉纈則折物忌堅芳人諱明絜曰若先生
逢辰之缺溫風忌時飛霜急節羸芳遶紛昭懷不端
謀折儀尚貞蔑椒蘭身絕郢闕跡徧湘干比物荃蓀
連類龍鸞聲溢金石志華日月如彼樹芬實穎實發
望汨心歔騰羅思越藉用可塵昭忠難闕

祭處士仲長子光文

唐 王勣

歲月日隣人王勣謹以魚醴之奠敬祭仲長先生之靈曰明道若昧進道若退鳥飛知還龍亢必悔嗟嗟夫子理融其內不恃不求無憎無愛古人有言微妙元通誠用以審養正以蒙嗟嗟夫子允執其中不見其始孰知其終蕩蕩心跡悠悠默語周覽人事退居河渚何去何從誰求誰與聊同聚散亦均寒暑大矣夫子其生若浮至矣夫子其死若休卿黨不懼朋友不憂素琴猶在黃經尚留老策不婚梁鴻難偶徒無續莫室無箕箒嗟嗟夫子豈圖其後金玉滿堂莫為之守凡我故人素服臨梅萼巾從窆桐棺以遷墳不易攏坎不及泉苟無怛化于何問天道性既喪仁義鋒起祭非古也禮之為始吾從其俗敢告夫子清樽薄奠神其歆止

為崔常侍祭牙門姜將軍文

唐 王維

維大唐開元二十五年歲次丁丑十一月辛未朔四日甲戌左散騎常侍河西節度副大使攝御史中丞崔公致祭於故姜公之靈嗚呼天子命之建旗西門帶甲十萬鐵騎雲屯橫挑強胡飲馬河源嗟爾永健表為牙門牙門伊何全齊大旗四方有事誓死鳴轂前有血刃後有飛鏃其氣益振大呼馳逐翩翩白馬象孤離服戈森其喉矢集其目嗚呼天下無事今上好文爾有餘勇莫敢邀勲腰鞬白首蹉跎塞雲死于裨將誰統前軍家本秦人靈車東轎長天積雪邊城欲暮麾下行哭前旌抗路身有寶劍不佩而去轅有代馬悲鳴踟躕嗚呼我誠軍吏令送爾歸既素我服亦朱其衣點虜未滅壯士長辭牢醴以祭太息歎歎尚饗

祭柳子厚文

唐 韓愈

維年月日韓愈謹以清酌庶羞之奠祭于亡友柳子厚之靈嗟嗟子厚而至然邪自古莫不然我又何嗟人之生世如夢一覺其間利害竟亦何校當其夢時有樂有悲及其既覺豈足追惟凡物之生不願為材犧樽青黃乃木之災子之中棄天脫韋霸玉珮瓊珪大放厥辭富貴無能磨滅誰記子之自著表表愈偉不善為斷血指汗顏巧匠旁觀縮手袖間子之文章而不用世乃令吾徒掌帝之制子之視人自以無前

一斤不復羣飛刺天嗟嗟子厚今也則亡臨絕之音一何琅琅徧告諸友以寄厥子不鄙謂余亦託以死凡今之交觀勢厚薄余豈可保能承子託非我知子子實命我猶有鬼神寧敢遺墮念子永歸無復來期設祭棺前矢心以辭嗚呼哀哉尚饗

祭河南張員外文

唐 韓愈

維年月日彰義軍行軍司馬守太子右庶子兼御史中丞韓愈謹遣某乙以庶羞清酌之奠祭于亡友故河南縣令張十二員外之靈貞元十九君為御史余以無能同詔並跼君德澤剛標高揭己有不吾如唾猶泥滓余慙而狂年未三紀秉氣如人無扶自恃彼婉孌者實憚吾曹側肩帖耳有舌如刀我落陽山以尹龜孫君飄臨武林之牢歲寒充雪虐風饕顛於馬下我泗君叱夜息南山同卧一席守隸防夫軀

滯交趾洞庭漫汗粘天魚壁風濤相壓中作霹靂追程盲進驅船箭激南上湘水屈氏所沈二妃行迷淚蹤染林山哀浦思鳥獸叫音余唱君和百篇在噓君止于縣戒又南踰把觥相飲後期有無期宿界上一又相語自別幾時遽變寒暑枕臂歌眠加余以股僕來告言虎入廐處無敢驚逐以我驂去君云是物不駭於乘虎取而往來實其微我預在此與君俱膺猛獸果信惡禱而憑余出嶺中君瑛州下偕採江陵非余望者柳山奇愛其水清瀉泊沙倚石有還無捨衡

陽放酒熊咆虎嘯不存令章罰等蜩毛委舟湘流往
觀南嶽雲壁潭潭穹林攸擢避風太湖七日鹿角鉤
登大鮎起頰豕狗鬻盤炙酒羣奴餘啖走官階下首
下尻高下馬伏塗從事是遣予徵博士君以使己相
見京師過顧之始分教東生君掾雍首兩都相望於
別何有解手背面遂十一年君出我入如相避然生
闕死休吞不復宜刑官屬即引章許奪權臣不愛南
昌是幹明條謹獄氓獠戶歌用還澧浦爲人受瘞還
家東都起令河南屈拜後生憤所不堪屢以正免身
仲事寒竟死不昇孰勸爲善丞相南討余辱司馬議
兵大梁走出洛下哭不憑棺莫不親竿不撫其子葬
不送野望君傷懷有隕如瀉銘君之績納石壤中爰
及祖考紀德事功外著後世鬼神與通君其奚憾不
余鑒哀嗚呼哀哉尚饗

祭十二郎文

唐韓愈

年月日季父愈聞汝喪之七日乃能銜哀致誠使建
中遠具時羞之奠告汝十二郎之靈嗚呼吾少孤及
長不省所怙惟兄嫂是依中年兄殁南方吾與汝俱
幼從嫂歸葬河陽既又與汝就食江南零丁孤苦未
嘗一日相離也吾上有三兄皆不幸早世承先人後
者在孫惟汝在子惟吾兩世一身形單影隻嫂嘗撫
汝指吾而言曰韓氏兩世惟此而已汝時尤小當不
復記憶吾時雖能記憶亦未知其言之悲也吾年十
九始來京城其後四年而歸視汝又四年吾往河陽
省墳墓遇汝從嫂喪來葬又二年吾佐董丞相于汴
州汝來省吾止一歲請歸取其孀明年丞相薨吾去
汴州汝不果來是年吾佐戎徐州使取汝者始行吾
又罷去汝又不果來吾念汝從於東東亦客也不可以
久圖久遠者莫如西歸將成家而致汝嗚呼孰謂汝
遽去吾而殁乎吾與汝俱少年以爲雖暫相別終當久
與相處故捨汝而旅食京師以求斗斛之祿誠知其
如此雖萬乘之公相吾不以一日輟汝而就也去年

孟東野往吾書與汝曰吾年未四十而視茫茫而髮蒼蒼而齒牙搖動念諸父與諸兄皆康強而早世如吾之衰者其能久存乎吾不可去汝不肯來恐旦暮死而汝抱無涯之戚也孰謂少者歿而長者存强者大而病者全乎嗚呼其信然邪其夢邪其傳之非其真邪信也吾兄之盛德而天其嗣乎汝之純明而不克蒙其澤乎少者强者而天殁長者衰者而存全乎求所以爲信也夢也傳之非其真也東野之書耿蘭之報何篤而在吾側也嗚呼其信然矣吾兄之盛德而天其嗣矣汝之純明宜業其家者不克蒙其澤矣所謂天者誠難測而神者誠難明矣所謂理者不可推而壽者不可知矣雖然吾自今年來蒼蒼者或化而爲白動搖者或脫而落矣毛血日益衰志氣日益微幾何不從汝而死也死而有知其幾何離其無知悲不幾時而不悲者無窮期矣汝之子始十歲吾之子始五歲少而强者不可保如此孩提者又可冀其成立耶嗚呼哀哉嗚呼哀哉汝去年書云此得軟脚病往往而劇吾曰是疾也江南之人常常有之未始

以爲憂也嗚呼其竟以此而殞其生乎抑別有疾而至斯乎汝之書六月十七日也東野云汝殁以六月二日耿蘭之報無月日蓋東野之使者不知問家人以月日如耿蘭之報不知當言月日東野與吾書乃問使者使者妄稱以應之耳其然乎其不然乎今吾使建中祭汝弔汝之孤與汝之乳母彼有食可守以待燕喪則待終喪而取以來如不能守以終喪則遂取以來其餘奴婢並令守汝喪吾力能改葬終葬汝於堯人之兆然後惟其所願嗚呼汝病吾不知時汝歿吾不知日生不能相養以共居歿不得撫汝以盡哀斂不憑其棺窆不能其穴吾行負神明而使汝夭不孝不慈而不得與汝相養以生相守以死一在天之涯一在地之角生而影不與吾形相依死而魂不與吾夢相接吾實爲之具又何尤彼蒼者天曷具有極自今已往吾其無意於人世矣當求數頃之田於伊潁之上以待餘年教吾子與汝子幸其成長吾女與汝女待其嫁如此而已嗚呼言有窮而情不可終汝其知也邪其不知也邪嗚呼哀哉尚饗

祭呂衡州溫文

唐 柳宗元

維元和六年歲次辛卯九月癸巳朔某日友人守永州司馬負外置同正員柳宗元謹遺書吏同曹家人襄兒奉清酌庶羞之奠敬祭于呂八兄化光之靈嗚呼天子君子何厲天實仇之生人何罪天實讎之聰明正直行爲君子天則必達其死道德仁義志存生人天則必夭其身吾固知蒼蒼之無信漠漠之無神今於化光之歿怨逾深而毒逾甚故援呼天以云云天乎痛哉堯舜之道至大以簡仲尼之文至幽以默

千載紛爭或失或得俾乎吾兄獨取其直貫于化始與道咸極推而下之法度不忒旁而肆之中和外塞道大藝備斯爲全德而官止刺一州年不逾四十佐王之志沒而不立豈非修正直以召災好仁義以速咎者耶宗元幼雖好學晚未聞道泊乎獲友君子乃知道於中庸削去邪雜顯陳真正而爲道不謬兄實使然嗚呼積中不必施於外裕乎古不必諧於今二事相勸從古至少至於化光最爲太甚理行第一尚非所長文章過人略而不有夙志所蓄巍然可知貪

愚嘗貴險狠皆老則化光之夭厄反不榮與所痛者志不得施蚩蚩之民不被化光之德庸庸之俗不知化光之心斯言一出內若焚裂海內甚廣知音幾人自友朋彫喪志業殆絕唯望化光伸其宏略震耀昌大興行於時使斯人徒知我所立今復往矣吾道息矣雖其存者志亦死矣臨江大災萬事已矣窮天之英貫古之識一朝去此終復何適嗚呼化光今復何爲乎止乎行乎昧乎明乎豈蕩而爲大空與化無窮乎將結而爲兩曜以助臨照乎豈爲兩爲露以澤下

土乎將爲雷爲霆以泄怒怒乎豈爲鳳爲麟爲景星爲卿雲以寓其神乎將爲金爲錫爲圭爲璧以栖其魄乎豈復爲賢人以續其志乎將陰爲明神以遂其義乎不然是昭昭者其得已乎其不得已乎抑有知乎其無知乎彼且有知其可使吾知之乎幽明茫然一慟腸絕嗚呼化光庶或聽之

祭韓侍郎文

唐 李 翱

嗚呼孔氏云遠楊朱恣行孟軻拒之乃壞于成戎風
混華異學魁橫兄常辯之孔道聰明建武以還文卑
質喪氣萎體敗剝剝不讓儼花開葉顛倒相上及兄
之為思動鬼神揆去其華得其本根開合怪駭驅濤
涌雲包劉趙羸並武同殷六經之風絕而後新學者
有歸大變于文兄之仕宦因辭于難疏奏輒斥去而
復遷昇然不改正言亟聞貞元十二兄作汴州我游
自徐始得兄交視我無能待予以友講文析道為益
之厚二十九年不知其久兄以疾休我病臥室三來
視我笑語窮日何荒不耕會之以一人心樂生皆惡
言凶兄之在病則齊其終順化以盡靡惑于中欲別
千萬意如不窮臨喪大號決裂肝胃老聃言壽死而
不亡兄名之垂星斗之光我誤兄行下于太常聲殫
天地誰云不長喪車東來我刺廬江君命有嚴不見
兄喪遣使奠饗百酸攬腸音容若在曷日而忘嗚呼
哀哉嗚呼哀哉

祭尹師魯文

宋 歐陽修

嗟乎師魯辯足以窮萬物而不能當一獄吏志可以
狹四海而無所措其一身窮山之崖野水之濱猿猱
之窟麋鹿之群猶不容於其間乃遂即萬鬼而為鄰
嗟乎師魯世之惡予之多未必若愛子者之衆何其
窮而至此乃得非命在乎天而不在乎人方其奔顛
乍逐困厄艱屯舉世皆冤而語言未嘗以自及以窮
至死而妻子不見其悲忻用捨進退屈伸語默夫何
能然乃學之力至其握手為訣隱几待終顏色不變
笑言從容死生之間既已能通於性命憂患之至宜
其不累於心胃自子云逝善人宜哀子能自達子又
何悲惟其師友之益平生之舊情之難忘言不可究
嗟乎師魯自古有死皆歸無物惟聖與賢雖埋不沒
尤於文章煒然星日子之所為後世師法雖嗣子尚
幼未足以付子而世人藏之席可無墜失子於衆人
最愛子文富辭千里備此一罇冀以慰子聞乎不聞

祭蘇子美文

宋 歐陽脩

哀哀子美命止斯耶小人之幸君子之嗟子之心胸
蟠屈龍蛇風雲變化雨雹交如忽然揮斧霹靂轟車
人有遺之心驚膽落震仆如麻須臾霽止而回顧百
里山川草木開發萌芽子之文章雄豪放肆如有此
者可吁可怪耶嗟吁世人知此而已貪悅其外不窺其
內欲知子心窮達之際金石之堅尚可破碎子於窮
達始終仁義惟人不知乃窮至此蘊而不見遂以沒
地獨留文章照耀後世嗟世之愚掩抑毀傷譬如磨
鑑不減愈光一世之短萬世之長其間得失不待較
量哀哀子美來舉予觴

祭范文正公

宋 歐陽脩

嗚呼公乎學古居今持方入圓叩軻之艱其道則然
公曰彼惡公為好評公曰彼善公為樹朋公所勇為
公則躁進公有退讓公為近名讒人之言其何可聽
先事而斥羣讖衆排有事而思難仇謂材毀不吾傷
譽不吾喜誰非公徒讒人豈多公志不舒善不勝惡
豈其然乎成難毀易理文然歟嗚呼公乎欲壞其棟
先摧榑榱傾巢破殼披折傍枝害一損百人誰不罹
誰為黨論是不仁哉嗚呼公乎易名謚行君子之榮
生也何毀沒也何稱好死惡生殆非人情豈其生有
所嫉而死無所爭自公云亡謗不待辨愈久愈明由
今可見始屈終伸公其無恨寫懷平生寓此薄奠

祭杜文公

宋 歐陽脩

士之進顯於榮祿者莫不欲安享於豐腴公爲輔弼
飲食起居如陋巷之士環堵之儒他人不堪公處愉
愉士之退老而歸休者所以思自放于閒適公居于
家心在于國思慮精深言辭感激或達旦不寐或憂
形于色如在朝廷而官有責嗚呼進不知富貴之爲
樂退不忘天下以爲心故行於己者老益篤而信於
人者久愈深人之愛公寧有厭己壽胡不多八十而
止自公之喪道路嗟咨況於愚鄙久辱公知繫官在
朝心往神馳送不臨穴哭不望帷幃辭寫恨有涕漣
漣

祭石曼卿文

宋 歐陽脩

嗚呼曼卿生而爲英死而爲靈其同乎萬物生死而
復歸於無物者朽聚之形不與萬物共盡而卓然其
不朽者後世之名此自古聖賢莫不皆然而著在簡
冊者昭如日星嗚呼曼卿吾不見子久矣猶能髣髴
子之平生其軒昂磊落竄兀崢嶸而埋藏於地下者
意其不化爲朽壤而爲金玉之精不然生長松之千
尺產靈芝而九莖奈何荒煙野蔓荆棘縱橫風淒露
下走鱗飛螢但見牧童樵叟歌吟而上下與夫鷺鷥
駭獸悲鳴躑躅而唧唧今固如此更千秋而萬歲分
安知其不穴藏狐貉與麕麋此自古聖賢亦皆然兮
獨不見夫累累乎曠野與荒城嗚呼曼卿盛衰之理
吾固知其如此而感念疇昔悲涼悽愴不覺臨風而
隕涕者有愧乎太上之忘情

祭丁元珍文

宋 歐陽脩

嗚呼元珍善惡之殊如火與水不能相容其勢然尔是故鄉人皆好孔子不然惡於不善然後爲賢子之美才懿行純德誰稱諸朝當世有識子之憔悴遂以湮淪問孰惡子可知其人毀善之言譬如蠅矢點彼白玉濯之而已小人得志暫快一時要其得失後世方知受侮被謗無如仲尼巍然衮冕不祀桓魋孟軻之道愈久彌光名尊四方不數減倉是以君子修身俟援援奸惡經營一世殆榮華之消散嗟泯沒其誰祀是皆生則孤鼠死則狗彘惟一賢之不幸歷千載而猶傷自古孰不有死至今獨弔乎沅湘彼靈均之事業初未見於南邦使不遭罹於放斥未必功顯而名彰然則彼讒人之致力乃借譽於掄揚嗚呼元珍道之通塞有命在天其如予何孔孟亦然何以慰子耶爲此言寄哀一奠有淚連連

祭孔中丞文

宋 石 介

昔公爲諫議大夫知兗州臣僚有以詩千篇獻上者執政者即請進爲龍圖閣直學士上曰千首詩豈若孔某一言即日拜公龍圖閣直學士公再爲中丞風格益峻及公沒劉平戰死於陣讒賊害忠良誣奏平非戰屈乃叛耳天子怒將夷平家平家胥靡就闕寃號道途連鴈鳴中丞來平家將中丞馬言其事兩街賣販兒以數十嘆曰徒往訴耳是非孔中丞者平家慟哭而止噫至尊極者君至愚暗者民尊極則不信愚暗則難開非公至忠豈能動尊極耶非公至誠豈能感愚暗耶動乎尊極感乎愚暗公之道格于上下矣嗚呼公之生也君稱之公之死也人感之公之道全於死生也夫道格于上下爲著全于死生爲難舉是二節公之道充于天地之間矣大冬殘臘風號雲歸物慘淡心肝摧折爐烟氤氳樽酒冷冽享誠不享味公來降蒞

祭范穎州文

宋 王安石

嗚呼我公一世之師由初迄終名節無疵明肅之盛
身危志殖瑣華失位又隨以斥治功亟聞尹帝之都
聞姦興良稚子歌呼赫赫之家萬首俯區獨緹其私
以走江湖士爭留公蹈禍不慄有危其辭謁與俱出
風俗之衰駭正怡邪蹇蹇我初人以疑嗟力行不回
蒼者興起儒先首首以節相侈公之在貶愈勇爲忠
稽前引古誼不營躬外更三州施有餘澤如颺河江
以濯毒尺宿臧自解不以刑加猶盜溫仁終老無邪
講藝弦歌暮來千里溝川障澤田桑有喜戎孽獬狂
敢斷我疆鑄印刻符公屏一方取將於伍後常名顯
收士至佐維邦之彥聲之所如虜不敢瀕以其餘威
走敵完隣肯也始至瘡痍滿道藥之養之內外完好
既其無爲飲酒笑歌百城宴暇吏士委蛇上嘉曰材
以副樞密稽首辭讓至于六七遂參宰相躋我典常
扶賢贊保亂穴降荒官更於朝士變於鄉百治具脩
偷墮勉強彼閔不遂歸侍帝側卒屏于外身屯道塞
謂宜耆老尚有以爲神乎孰忍使至於斯蓋公之才

猶不盡試肆其經綸功孰與計自公之貴廡庫廵空
夷其邑辭傲許以容化于婦妾不靡珠玉翼翼公子
樊綈惡栗問死憐窮惟是之奢孤女以嫁男成厥家
孰堙于深孰缺乎厚其傳其詳以法永久碩人今亡
邦國之憂矧鄙不肖辱公知尤承凶萬里不往而留
涕哭馳辭以贊醪羞

祭歐陽文忠公文

宋 王安石

夫事有人力之可致猶不可期況乎天理之漠漠又安可得而推惟公生有聞於當時死有傳於後世苟能如此足矣而亦又何悲如公器質之深厚智識之高遠而輔學術之精微故充於文章見於議論豪健俊偉怪巧瑰琦其積於中者浩如江河之停蓄其發於外者爛如日星之光輝其清音幽韻淒如飄風急雨之驟至其雄辭闊辯快如輕車駿馬之奔馳世之學者無問乎識與不識而讀其文則其人可知嗚呼自公仕宦四十年上下往復感世路之崢嶸雖屯遭困躋竄斥流離而終不可掩者以其公議之是非既壓復起遂顯於世果敢之氣劉正之節至晚而不衰方仁宗皇帝臨朝之末年顧念後事謂如公者可以寄社稷之安危及夫發謀決策從容指顧立定大計謂千載而一時功名成就不居而去其出處進退又庶乎英魄霸氣不隨異物腐散而長在乎箕山之側與潁水之濱然天下之無賢不肖且猶為涕泣而歎歎而況朝士大夫乎昔游從又予心所嚮慕而瞻依嗚

呼盛衰興廢之理自古如此而臨風想望不能忘情者念公之不可復見而其誰與歸

祭曾博士易占文

宋 王安石

嗚呼公以罪廢寔以不幸卒困以天亦惟其命命與才違人寔知之名之不幸知者爲誰公之閭里宗親黨友知公之名於寔無有嗚呼公初公志如何孰云不諧而厄孔多地大天穹有時而毀星日脫敗山傾谷圯人居其間萬物一偏固有窮通世數之然至其壽夭尚何憂喜要之百年一蜺以死方其生時寔若囚拘其死以歸混合空虛以生易死死者不祈惟其不是生者之悲公今有子能隆公後惟彼生者可無甚悼嗟理則然其情難忘哭泣馳辭往侑奠觴

祭王深甫文

宋 王安石

嗟嗟深甫真棄我而先乎孰謂深甫之壯以歿而吾可以長年乎雖吾昔曰執子之手歸言子之所爲實受命于吾母曰如此人乃與爲友吾母知子過於予初終子成德多吾不如嗚呼天乎既喪吾母又奪吾友雖不即死吾何能久搏胸一痛心摧志朽泣涕爲文以薦食酒嗟嗟深甫子尚知否

祭歐陽文忠公文

宋 蘇 軾

嗚呼哀哉公之生於世六十有六年民有父母國有
著龜斯文有傳學者有師君子有所恃而不恐小人
有所畏而不爲譬如大川喬嶽不見其運動而功利
之及於物者蓋不可以數計而周知今公之沒也亦
子無所仰託朝廷無所稽疑斯文化爲異端而學者
至於用夷君子以爲無爲爲善而小人沛然自以爲
得時譬如深淵大澤龍亡而虎逝則變怪雜出舞鰩
鯨而號狐狸皆其未用也天下以爲病而其既用也
則又以爲遲及其釋位而去也莫不冀其復用至其
請老而歸也莫不惆悵失望而猶庶幾於萬一者幸
公之未衰孰謂公無復有意於斯世也奄一去而莫
予追豈歷世溷濁潔身而逝乎將民之無祿而天莫
之遺昔我先君懷寶遁世非公則莫能致而不肖無
狀因緣出入受教於門下者十有六年於茲聞公之
喪義當匍匐往救而懷祿不去愧古人以忸怩絀詞
千里以寓一哀而已矣蓋上以爲天下慟而下以哭
其私嗚呼哀哉

祭魏國韓令公文

宋 蘇 軾

天生元聖必作之配有神司之不約而會既生堯舜
禹稷自至仁宗龍飛公舉進士妙齡秀發東華入侍
公於是時仲舒賈誼方將登庸盜起西夏四方騷然
帝用不赦授公鈇鉞往督西旅公於是時方叔召虎
入贊兵政出殿大邦恩威並行春雨秋霜兵練民安
西夷屈降公於是時臨淮汾陽帝在明堂欲行王政
群后奏功周底于成召自北方付之樞衡公於是時
蕭曹魏邵二帝山陵天下悽怛呼吸之間有雷有風
有存存亡有兵有戎公於是時伊尹周公功成而退
三鎮偃息天下噉然曷日而復畢公在外心在王室
房公且死征還足卹嗚呼哀哉六月甲寅人之無祿
喪我宗臣我有黎民誰與教之我有子孫誰與保之
巍巍堂堂寧復有之公之云亡我無日矣慟哭流涕
何嗟及矣昔我先子沒于東京公爲三詩以徂其行
文追典誥論極皇王公言一出孰敢改評施及不肖
待以國士非我自知公實見謂父子昆弟並出公門
公不責報我豈懷恩惟此涕泣實哀斯人有內在組

有酒在樽公歸在天寧閣我言嗚呼哀哉

潁州祭歐陽文忠公文 宋 蘇軾

嗚呼軾自黜亂以學爲嬉童子何知謂公我師盡誦其文夜夢見之十有五年乃克見公公爲拊掌歎笑改容此我輩人餘子莫群我老將休付子斯文再拜稽首過矣公言雖知其過不敢不勉契闊艱難見公汝陰多士方譁而我獨南公曰子來實獲我心我所謂文必與道俱見利而遷則非我徒又拜稽首有死無易公雖云亡言如皎日元祐之初起自南遷叔季在朝始見公顏入拜夫人羅列諸孫敢以中子請婚叔氏夫人曰然師友之義凡二十年再升公堂深衣廟門垂涕失聲白髮蒼顏復見潁人潁人思公曰此門生雖無以報不辱其門清潁洋洋東注于淮我懷先生豈有涯哉

再祭亡兄端明文

宋 蘇 轍

嗚呼惟我與兄出處皆同幼學無師先君是從游戲
圖書寤寐其中曰予二人要知是終後迫寒飢出仕
于時錙掣制策並驅而馳猖狂妄行誤爲世羈始以
是得終以失之兄遷於黃我竄于筠流落空山友其
野人命不自知還復簪紳俛仰幾何寵祿適緣欲去
未遑禍來盈門大庾之東漲海之南黎蕞雜居非人
所堪瘴起襲帷颺來掀簷卧不得寐食何暇耳如是
七年雷雨一覃兄歸晉陵我還潁川願見之乃有不
然瘴暑相尋醫不能痊嗟兄與我再起再顛未嘗不
同今乃獨先嗚呼我兄而止斯耶昔始宦遊誦韋氏
詩夜雨對床後忽有違進不知退踐此甌機欲復斯
言而天奪之先壘在西老泉之山歸骨其旁自昔有
言勢不克從夫豈不懷地雖郊廓山曰我眉天實命
之豈人也哉我寓此邦有田一廛子孫安之殆不復
遷兄來自西於是盤桓卜告孟秋歸於其阡潁川有
撫輦自兄先

代范樞密祭溫公文

宋 張 耒

嗚呼天祚有邦禪之元龜篤生我公爲世父師夷齊
之清淵濶之德子產之惠叔向之直人擅其一足以
成名公兼衆德乾乾不寧九流百家金匱石室鈎索
沈隱裁其失得根柢治亂經綸皇極作爲文章有書
秩秩元圭大裘望之肅然冬暘夏水赴者爭先仁英
兩朝鍾鍾厥聲國有正人折姦于萌蒞染柔木求直
於繩我公盡規君心則寧烈烈神考體貌有德公獻
有可巖巖翼翼言有未用不敢受爵深衣幅巾歸休
於洛公則休矣四方顛顛君子野人泊于他邦聞風
懷歸于父于兄天施不齊或怨寒暑公獨何施四海
一譽元豐末年國有大事穆穆文母宥我神嗣爰立
作相媚于神人我公在庭其重萬鈞士賀于朝民歌
于塵農慶於野兵休于邊燠雨慄寒養其饑孱無痛
于饑無休于田培其本根枝葉則茂豈曰我作憲章
惟舊於赫聖考左右上帝休公於家實遺聖子卷耳
思賢夙夜周京不惑不疑成此太平公之去來人之
戚嬉人之戚嬉帝之從違豈人事耶天實爲之純仁

不才辱公之深人之相知貴相知心惟公我知洞達
表裏承其所長謂或可使申結義好邱山不移匪我
則然公實取之泚泚清洛獨樂之園嘉華春數修竹
夏寒清酌翛然我招我從琅琅嘉言有銘在躬朝偶
乏人備位樞機入與國論獲親風規六七年間爲益
不貲私祈白首從公以歸憂勞傷生公既邁疾庶幾
有瘳卒相王室國祠既誓公以喪聞我心之悲不獲
至門入哭于室公既大歛終天之情不一見面人生
有死如旦夜耳曾子將沒知免而喜公身既修公志
既畢既壽令終無有具失有如公者古今萬一任重
道遠稅駕茲日庶幾念此以紓我悲猶有鬼神實聞
我辭

祭程伊川文

宋 張 繹

嗚呼利害生于身禮義根於心伊川此心喪于利害
而禮義以爲虛也故先生踽踽獨行於世衆乃以爲
迂也維尚德者以爲卓絕之行而忠信以爲孚也立
義者以爲不可犯而達權者以爲不可拘也在吾先
生曾何有意心與道會冥然無際無欲可以係羈兮
自克者知其難也不立意以爲言兮知言者識其要
也德輶如毛毛猶有倫無聲無臭夫何可親嗚呼先
生之道不可得而名也伊言者反以爲病兮此心終
不得而形也維太山以爲高兮日月以爲明也春風
以爲和兮嚴霜以爲清也在昔諸儒各行其志或得
乎數可觀乎禮學者賴之世濟其美獨吾先生淡乎
無味得味之真死其乃已自我之見七年于茲舍乎
化有以蕃以滋天地其容我兮父母其生之君親其
臨我兮夫子其成之欲報之心何日忘之昔先生有
言見乎文字者有七分之一心繪乎丹青者有七分
之儀七分之儀固不可益七分之一心其猶可推而今而
後將築室于伊洛之濱塋先生之墓以畢吾此生也

嗚呼夫子沒而微言絕則吾固不可得而聞也然天
不言而四時行地不言而百物生惟與二三子洗心
去智格物去意斯默契斯道在先生爲未亡也嗚呼
二三子之志不待物而後見先生之行不待誅而後
徵然而山頽梁壞何以寄情淒風一奠敬祖于庭百
年之恨并此以傾

祭張敬夫殿撰文

宋 朱 熹

嗚呼自孔孟之示遠聖學絕而莫繼得周翁與程子
道乃抗而不墜然微言之報響今未及乎百歲士各
私其所聞己不勝其乖異嗟惟我之與兄胞志同而
心契或面講而未窮又書傳而不置蓋有我之所是
而兄以爲非亦有兄之所然而我之所議又有始所
共鄉而終悟其偏亦有蚤所同擠而晚得其味蓋繳
紛往反者幾十餘年末乃同歸而一致由是上而天
道之微遠而聖言之秘近則進修之方大則行藏之
義以兄之明固已洞照而無遺若我之愚亦幸竊窺
其一二然兄喬木之故家而我衡茅之賤士兄高明
而宏博我狷狹而迂滯故我嘗謂兄宜以是而行之
當時兄亦謂我盍以是而傳之來裔蓋雖隱顯之或
殊實則交須而共濟不惟相知之甚審抑亦自靖而
無愧嗚呼孰謂乃使兄終在外以違其心予亦見靡
于斯而所願將不遂也政使得聞以就其書是亦任
左肱而失右臂也傷哉吾窮之道予復何心於此世
也惟修身補過以畢餘年底有以見兄於下地也聞

兄之葬而不得臨獨南望長號以寄此酌也惟兄憐而鑒之尚陰有以予之志也嗚呼哀哉尚鑒

告先太師墓文

宋 文天祥

維己卯五月朔越二十有六日孝子祥自嶺被執至南安軍謹具香幣遣人馳告于先太師華齋先生墓下嗚呼人誰不爲臣而我欲盡忠不得爲忠人誰不爲子而我欲盡孝不得爲孝天乎使我至此極耶始我起兵赴難勤王仲弟將家遁于南荒宗廟不守遷我異疆大臣之誼國亡家亡靈武師興解后歸國再相出督身荷憂責江南之役義身四克爲親拜墓以剪荆棘大勛垂集一跌奇崛妻妾子女六人爲俘收拾骸亡息于海隅庶幾奮厲以爲後圖惡運推遷天所廢棄有母之喪尋失嫡子哭泣未乾兵臨其壘倉皇之間二女天逝剪爲圓鹵形影獨存仰藥不濟竟北其轅繫頸繫足過我里門望墓相從恨不九原爰指松楸有言若誓繼令支子實典祀事有姪曰敏我身是嗣興言及此血淚如雨嗚呼自古危亂之世忠臣義士孝子慈孫其事之不能兩全也久矣吾生不辰罹此百凶求仁得仁抑又何怨幽明死生一理也父子祖孫一氣也冥漠有知尚其鑒之

予始至南安軍即絕糧為告墓文遣人馳歸白之
祖稱暝日長往舍歿入地矣乃水盛風駛五日過
廬陵又二日至豐城知所遣人竟不得行予至是
不食垂八日若無事然私念死廬陵不失為首邱
今心事不達委命荒江誰知之者盍少從容以就
義乎復飲食如初因記左傳申包胥秦庭七日勺
飲不入口不聞有它乃知餓踣西山非一朝夕之
積也予嘗服腦子二兩不死絕食八日又不死未
知死何日死何所哀哉

望祭文丞相文

宋 王炎午

相國文公再被執時予嘗為文生祭之己而吉水張
千載心宏毅自燕山持丞相髮與齒歸丞相既得死
矣嗚呼痛哉謹痛望其再致一言 嗚呼扶顛持危
文山諸葛相國雖同而公死節倡義舉勇文山張巡
殺身不異而公秉鉞名相烈士合為一傳三千年間
人不兩見事謬身執義當勇決祭公速公童子易簣
何如天意佑忠憐才留公一死易水金臺衆氣捐軀
壯士其或久而不易雪霜松柏嗟哉文山山高水深
難回者天不負者心常山之髮侍中之血日月韜光
山河改色生為名臣死為列星不然勁氣為風為霆
干將莫耶或寄良冶出世則神入土不化今夕何夕
斗轉河斜中有光芒非公也耶

附生祭文丞相文

丞相再執就義未聞慷慨之見固難測識因與劉堯
舉對牀共賦感慨嗟惜之堯舉先賦云天留中子墳
孤竹誰向西山飯伯夷子問其下句義則謂伯夷久
不死必有飯之矣予謂向字有憂其飢而願人餉之

之意請改作在字如何堯舉然之予以寂寥短章不足用吾情遂不復賦 丞相初起兵僕嘗赴其名進狂言有云願明公復毀家產供給軍餉以倡士民助義之心請購淮卒參錯戎行以訓江廣烏合之衆他所議論狂斐尤多慷慨慙愚丞相嘉納令何見山進之幕府授職從戎僕以身在大學父歿未葬母病危殆屬以時艱恐進難效忠退復虧孝恫德感泣以母老控辭丞相憐而從之僕于國恩爲己負于丞相之德則未報遂作生祭丞相文以達丞相之死堯舉讀之流涕遂相與謄錄數十本自贛至洪於驛途水步山墟店壁貼之冀丞相經從一見雖不自揣量亦求不負此心耳堯舉名應鳳黃甲科第授簽判與其兄堯咨文章超卓爲安成名士 維年月日里學生薦大學觀化齋生王炎午謹採西山之薇酌汨羅之水哭祭於文山先生未死之靈而言曰嗚呼大丞相可死矣文章周魯科第郊祁斯文不朽可死喪父愛公師祖莫之榮奉母極東西迎養之樂爲子孝可死二十而巍科四十而將相功名事業可死伏羲勤王使

命不辱不負所學可死華元跟蹤子胥脫走丞相自叙死者數矣誠有不幸則國事未定臣節未明今鞠躬盡瘁則諸葛矣保捍閩廣則田單即墨矣倡義勇出則顏平原申包胥矣雖舉事無所成而大節亦無愧所欠一死耳奈何再執涉月踰時就義寂寥間者驚惜豈丞相尚欲脫去耶尚欲有所爲耶或以不屈爲心而以不死爲事耶抑舊主尚在不忍棄捐耶伏橋于厠舍之後投筑于目矐之餘於所希再縱求再生則二子爲不知矣尚欲有所爲耶識時務者在俊傑昔東南全勢不能解襄圍今以亡國一夫而欲抗天下況趙孤蹈海楚懷入關高非前日之頑周無未獻之地南北之勢既合天人之際可知彼齊廢齊興楚亡楚復皆兩國相當之勢而國君大臣固無恙耳今事勢無可爲而臣皆爲執矣臣子之於君父臨大節決大難事可爲則屈意忍死以就義必不幸則伏大節以明分故身執而勇於就義當以果卿張巡諸子爲上李陵降矣而曰欲有爲且思刎頸以見志其言誠僞既不可知况形拘勢禁不及爲者十八九

惟不刎刎豈足以見志况使陵降後死他故則頸且不復刎志何自而明哉丞相之不為陵不待知者而信奈何慷慨遲回日久月積志消氣餒不陵亦陵豈不惜哉欲不屈而死耶惟蘇子卿可漢室方隆子卿使耳非有興復事也非有抗誓師雖也丞相事何事降與死當有分矣李光弼討史思明方戰納劒于靴曰夫戰危事也吾位三公不可辱於賊萬一不利自當刎李存勗伐梁梁帝朱友貞謂近臣皇甫麟曰晉吾世讎也不可俟彼刀鋸卿可盡我命麟於是哀泣進刃於帝而亦自刎今丞相以三公之位兼睚眦之讐投機明辨豈堪在李光弼朱友貞下乎屈且不保況不屈乎丞相不死當有死丞相者矣自死于義死于勢死于人以怒罵為烈死於怒罵則肝腦腸腎有不忍言者矣雖鑊湯刀鋸烈士不辭苟可就義以歸全豈不因忠而成孝事在目睫丞相何所俟乎以舊主尚在未忍棄捐李昇纂楊行密之業遷其子孫於廣陵嚴兵守之至于孫自為匹耦然猶得不死周世宗征淮南下詔撫安楊氏子孫景升驚疑盡殺其族

夫撫安本以為德又反為禍幾微一失可不懼哉蜀王衍既歸唐莊宗發三辰之誓全其宗族未幾信伶人景進之計衍族盡誅幾微之倚伏可不畏哉夫以趙祖之遇降主天固巧於報施然建其暫處倨坐苟安舊主正坐於危疑羈臣尤事於骯髒而聲氣所逼猜嫌必生豈無李昇之疑或景進之計則丞相於舊主不足為情而反為害矣炎午丞相鄉之晚進士也前成均之弟子員進而父沒退而國亡生雖魏陳東報汴之忠死不效陸機入洛之耻丞相起兵次鄉國時有少年狂子持雙牘叫軍門丞相察其憂憤而進之憐其親老而退之非僕也耶痛于千載之事既負於前一得之愚敢默於後進薄昭之素服先元亮之挽歌願與丞相商之廬陵非丞相父母邪乎趙太祖語孟祖母曰勿戚戚行遣女歸蜀祖母曰妾太原人願歸太原不願歸蜀契丹遷晉出帝及李太后安太妃於建州太后疾死謂帝曰我死焚其骨送范陽僧寺無使我為鹵地鬼也安太妃臨卒亦謂帝曰當焚我為灰向南颺之庶遺魄得返中國也彼婦人彼國

后一死一生尚眷眷故鄉不忍飄棄仇讐外國况忠臣義士乎人不七日穀則斃自梅嶺以出縱不得留漢廐而從田橫亦當吐周粟而反孤竹至父母邦而首邱焉廬陵盛矣科目尊矣宰相忠烈合爲一傳矣舊主爲老死於降邱宋止而趙不絕矣不然或拘囚而不死或秋暑冬寒五日不汗爪帶噴鼻而死畏死排牆死盜賊毒蛇猛虎死輕一死於鴻毛虧一簣於泰山而或遺舊主憂縱不斷趙盾之殺君亦將悔伯仁之由我則鑄錯已無鐵噬臍寧有口乎嗚呼四忠一節待公而六爲位其間聞訃則哭

祭太保劉公文

元 徐世隆

維至元十一年歲次甲戌冬十二月望日潯州路總管徐世隆謹以清酌庶羞之奠致祭于太保劉公之靈嗚呼天興大元六十餘年王氣所鍾有開必先聖不獨出衆賢從之聖賢相違千載一時巖巖劉公首出襄國學際天人道冠儒釋初冠章甫潛心孔氏又學孫真復參臨濟其藏無盡其境無涯鑿開三室混爲一家逆知天命早識龍顏情好日密話必夜闌如魚得水如虎在山易地諸葛彌天道安道人其形宰相其心誰其似之黑衣惠琳數精皇極禍福前決誰其似之卽君康節詩詠高逸方外神遊誰其似之碧雲湯休字畫清勁筆中法具誰其似之黃山文儒扈從王師柔服哀牢公於是時蜀之葦臯堂上出奇郭江飛渡公於是時晉之杜預天既尊山人自晦公於是時唐之李泌相宅卜宮兩都並雄公於是時周之召公中統建元宣撫十道多舉名儒親草其詔至元入省命 萬機暫決大儀力辭以歸上亦知公不居細務止解中書仍居保傅官制未定公圖列之朝儀

未肅公秦閔之方其宏化儀形萬方天遽奪之今也
則亡生平少疾質明猶唱開戶視之掩書長往天子
震悼朝臣涕洟下至行路靡不哀思國事有疑誰與
稽之民歲有災誰與禳之僚友有咎誰與救之人之
老成寧復見之曩過趙郡識二大士曰蕭曰劉器量
包世混迹佛老心同孔周仁雨義風欲灑九州蕭已
先蛻獨餘藏春栽培桃李倘滿君門身為師賓門多
卿相生被殊遇歿獲大葬公既無憾我獨何悲第愧
老嫗嘗辱公知愛我文辭許我典故視草翰林持衡
文部公非私舉我豈懷恩言念知舊往哭其墳南州
孺子生芻一束真章寫心老淚盈掬嗚呼哀哉尚饗

魯齋先生陞從祀祭文 元 許 約

維皇慶二年六月十四日癸酉欽承綸旨以先師文
正公魯齋先生列于大成至聖文宣王從祀之位門
人許約等謹以清酌庶羞之奠合辭而祭之曰自太
極判而人文開庖犧作而卦畫始備物以致天下之
用成器以爲天下之利蓋肇乎乾坤者惟一理盈乎
宇宙者惟一氣人倫由是而明萬事以之而理王之
所以王帝之所以帝百世同符有一無二迄于周衰
篤生聖人有德無位遭時之屯周流天下而不我用
乃獨任乎斯文明王道於已晦振綱常而再新顏曾
再傳而得子思至孟子獨不迷其津泯泯莽莽歷歲
時之既久承承繼繼乃寥廓而無聞迨乎有宋實生
周子事無極之太原爲萬物之根底扶泰山已摧之
巔發千古不傳之秘淵淵河洛大暢斯旨天理之微
人事之著鬼神之幽至于子朱子而大備天眷皇元
我文正公實有得于此也合衆議而有歸惟前賢之
是證既鑒析而毫分亦提綱而振領盡小學之精微
爲後人之龜鏡言仁義必本諸身言道德必由乎性

動靜必循乎禮終始不忘乎敬春風藹然物我融會
水壺瑩然表裏輝映出而佐時也必欲底雍熙之和
進而事君也必欲止唐虞之聖事必探乎幾先俟其
久而乃應言治亂之所生盡天人之交勝其高也入
于無倫其近也不離于日用叙天工而振王綱正人
心而祈永命觀其運用天理而見諸行事者欲名言
而奚罄耶蓋嘗思之以百年凝道德之身千載繼絕
學之志由布衣而起田野總庶官而宅百揆明歷象
以授人時創辟雍而教胄子忠言疊疊氣不少衰爲
學孜孜老而後已蓋其所造者深所積者廣舉而措
之事業者獨高乎一世非義精而仁熟道全而德備
者疇克爾耶宜乎聖天子念之不忘崇以魏國之封
褒以文正之謚又欲嘉惠後學也乃命列于從祀之
位既相其子又撫其孫猶諄諄而不置也況約等親出
其門提耳之言面命之誨天地純全古人大體朝馬
夕馬誘掖諄至容聲警欬不遠伊邇嗚呼昊天罔極
之恩仰而思俯而感曷其有既耶

祭文下

哀辭

誄

祭文

祭許祭酒文

明 蘇伯衡

於戲人生一世盛衰休戚雖云異境自達人而觀之
真夢幻與泡影夫得吾志也既非吾榮則失吾志也
又豈吾病蓋不以窮達而損益者惟君子所性至於
人力所不能至致者雖聖賢亦歸之有命我惟先生
識高才挺博聞強記流華無競幻承家學力追先生
蘊爲德性發爲文章莫不珠輝而玉瑩聆其議論接
其威儀孰不駭視而傾聽昔先生之未出也識者見
及門之士拘者以開躁者以靜散者以歛情者以敏
固知其規模可以任國家之政際聖明之寵興喜情
然於聯聘立談之間機鳴籟應謂相見之何晚不煩
官師之職遂授斯文之柄侍經筵而領春坊奉晏閑
而陪顧問對揚惟精白之心啓沃皆典謨之訓恩禮
度越乎尋常名聲揚溢乎遠近凡其義以爲質道以
自殉知無不言言無不罄不同而比不詭以拘嗟易
所謂寥寥而冒嫉者反以爲悻悻吹毛求其疵瑕中
傷成於俄頃位甫正於辟雍車忽過夫虞嶺尚賴鴻
澤之滂沛適歸安於鄉井丹溪幽幽可遊可咏若將

終焉浩乎無悶然無賢不肖咸謂方今之時右文之運方旌四出招延英俊有如先生之老成宜膺求舊之眷而冠羣公以進摠胷中之蓄致君民於堯舜以增光於前人而垂裕於後允奈何松栢之堅貞竟同蒲柳以摧隕將善類之珍瘁抑吾道之莫償於戲天人之際消長之理蓋先生之所夙講亦先生之所自信齊幽冥於一途兮尚否泰乎奚訖而况先生之耿耿者當不隨異物而斯盡則其有生亦既異乎衆人之爲人也肉未寒而名已泯苟能如此良有餘矣而亦可以無恨吾黨所不能釋然而相與臨穴而悲哽者夫豈徒懷契分於生平誠感死生其猶醉醒

祭太史公文

明 方孝孺

公之量可以包天下而天下不能容公之一身公之識可以鑑一世而舉世不能知公之爲人道可以陶冶造化而不獲終於正寢德可以涵濡萬類而不獲蓋其後昆其所有者皆衆人之所難勉而未嘗自以爲足其所遇者皆衆人之所難處則快然委命而不置乎戚欣此紛之所以跨越前古拔羣超倫控宇宙而獨立後天地而長存者乎世烏足以知之徒傳誦其雄文執其詞者惑其意得其似者失其真彼好慕者且若此又何怪乎臧倉與叔孫宜夫公之厭斯世而不居甘遠跡於峨岷蓋將吊重華於九疑唁屈子於江濱而不忍汗乎流俗之埃塵也然則公固以死生榮辱爲夢幻得失毀譽爲浮雲六合之內孰非其第宅薦紳之士皆若其曾元尚何窮達之足云乎吾獨悲嘆而不止者上以憂乎斯道下以憫乎斯民愧受恩而未報懼來者之無聞嗚呼哀哉公其舍此而安之豈其與形俱逝與物同泯乎吾猶彷彿見公騎風馭氣歟日月而叱星辰遊乎崑崙之野出入乎

無窮之門是蓋處乎世者止七十有三年而不死者
不知其幾千萬春其遇乎人者雖若艱危而可痛而
樂乎天者不可數計而具陳而吾猶嗷嗷哭於山嶺
與水濱是皆公之所笑而奚能酬教育之厚恩嗚呼
哀哉列泰華以爲報注滄海以爲壽吾知公之不我
顧而庶幾可以報公者習其所聞以求不負乎明訓
行其所得以冀有益於黎元爾皇天與后土尚同鑒
乎斯言

祭王文節公

明 方孝孺

嗚呼天之於人無久不報之善人之於世無終不定之天
當事變之紛紛禍福險夷倒施而錯出若不可以數
推而理度及夫徐觀其後而究其所止缺慶之應未
嘗不曲當其定而無毫髮之偏辟之飄風暴雨挾雷
電而驟至遇之者駭愕眩惑以爲無復見乎白日矣
瞬息之間軒豁開朗大而山嶽江河細而鵲雀燕魚
莫不各復其常而觀兆采之爛然嗟呼先生顯剛健
之氣蘊該博之學抱作者之宏材而遭太祖之用賢
固宜得位行道以復久墜之典致四海於平治拯萬
世之顛連何期諱夫奸豎孽謀間搆卒俾倉皇奔走
於西南萬里之溟焚百不一試而身竟死於犬羊戎
酋腥羶當此之時非惟親戚鄉黨痛其不幸凡間先
生之名而知其事者靡不疑天道之回信爲之悼屈
而啣冤及今皇之繼統施大惠於八埏凡英偉奇傑
之士無不招致於殿位而恨弗能起先生於九原於
是先生之子方以才受薦擢官太學而先生平生大
節因得陳於殿陛而達於掖宸之前於是有學士之

贈於是有文節之謚褒崇閔悼極其華顯自有國之
初文臣之沒者不知其幾而成莫能比肩豈不以抑
之久也發必盛屈之甚者伸必長而天道之徵於人
者雖有遲速疾久之異而隨其所積以爲報則如符
節之合而固愆吾由是知天之可恃善之可必人患
不力於爲善而不患爲善之無傳嗟呼先生之生也
崇祿重位之榮高車駟馬之飾雖不及當時之權貴
然身沒之後彼皆漸盡腐滅而無遺而節行之傳昭
乎若星斗之揭浩乎若江漢之流姓名之著又儼若
起世而登仙乃知謬佞之排乎先生也乃所以成先
生之美哉或國之賊乎先生也適以表其志節之全彼
恣睢於一時此光曜乎萬年而先生又何憾焉其等
或從遊風昔或尚友於簡編

祭外舅蒙泉先生文

明 李東陽

嗚呼人有不必得世有不可無故君子有所任以爲重
物論有所藉而不虛愚嘗觀於古之人或不滿夫一
歎及其至也何止乎泮浚之與欽獻在朝廷則廟堂
若增而高在閭微則山嶽若增而重在鄉邑則文物
若增而都如公者勢不可以多得而今亦已矣又安
用此乎堪輿愚嘗論公之心狀公之行而不可得也蓋
能誦古人之書矣文起八代之衰道濟天下之溺忠
犯人主之怒勇奪三軍之帥如是而後舉公之節槩
如雷霆之萬威而雨露之萬澤如龍虎之萬猛而鸞
鳳之萬祥如是而後盡公之規模然公之直知者或
以辟公之儉不知者亦或以爲汚豈愚識之未臻與
抑所謂情者將人人殊也嗚呼其在天下者不敢知
愚之痛其莫予紓也方愚之未見固畏其風格高厲
進而復却者屢矣及其見也不知夏日之既晡論書
法必窮漢晉之源論文章必極馬韓之趣論理數必
探河洛之圖愚生也晚考德問學無所底定如瞶者
之於聽盲者之於途孰意公之有意於愚也門牆之

託方以爲終身幸別而復合者曾不過一再見之餘
病不侍于牀糾不越于野而寔不哭於墟愚於公之愛
可以爲辜矣公之文多既逸之藁公之門無可屬之
孤此愚志之不敢忘而力不可強而驅也平生名節
其所以報公者庶其在此公亦有以鑒愚之區區也
邪

祭學士柯先生文

明李東陽

國必有老成繫天下之輕重世必有公論別天下之
浮沉然老成不在年位之高而在才德之稱公論不
恃衆人之口而恃士大夫之心故見李司隸者傾龍
門之高見韓荊州者失侯封之貴見歐陽內翰者歎
宮闕之狀華山之峻河水之深而況託師生之分聆
道德之音者乎此愚於公所以憤懣抑鬱而涕泣沾
襟也當夫名冠甲第辭雄玉堂愚於此時固以識公
之文章秉章綰綬爵處精確愚於此固已窺公之材
畧山靜川澄水清玉瑩柱苞苴之門辭起復之命愚
於此時則又見公之德行若是者非愚之私也蓋天
下之所知而公論之所歸也故金滕石室之秘人莫
不以爲宜緣綸臺閣之選人莫不以爲遺及其降司
成之召也方藉以爲重而憂衰泰歲徘徊而未至也
皆恨以爲遲遲謂公一蹶而至於斯也嗚呼悲夫泰
山之高瞻者不知其爲勞梁木之壞造物者不自以
爲悔此人之所同而天道之不可預也千里之辭一
編之辭又豈特區區門牆之愛而已哉

祭忠臺劉侍講文

明 成 器

於戲先生能逢爲行兮比干爲心紆忠竭志兮日月
照臨慨前代任關豎之失德痛當今復因循而蹈襲
伏闕抗疏太息掩泣帝曰汝嘉寔感辱表惟彼羣姦
切齒相從幽之錦衣肆其鞠凶龍逢蒙既兮比干茹
醢雲霧霏其承宇兮天高而莫余宰顧塗粉之是甘
兮羌時事之可慨予會稽之後生兮頗忠義之是懷
鑒往事猶感慨兮腸一日而九迴側聞先生之死兮
又奚啻乎七哀扣帝關其無路兮徒煩冤而隕涕歎
楚些而招魂兮吊汨羅以爲計於是割鷄醢酒望風
奠祭懼褻於衆登彼龍崖石蓋蓋兮竹松閒閒公天
日其咫尺兮將英魂之可攀恭載拜以長慟兮跼數
袵以陳告惟蹇蹇以自完兮得死所其美悼顧棄德
而崇姦兮尾日大而不能掉彼關豎其何誅兮痛廟
堂之具臣曷其不撲滅於早兮既滔天而無津乃首
鼠以自保兮獨先生之奮身使舉朝皆抗拒兮何獨
狂之餘腐也嗟剛中而無應兮適以快其怒也屹砥
柱於洪波兮聊以示此度也視婦嫗之流輩兮直驚

鴻與脫兒也生無益於時兮貴且富其何數也吁嗟
先生之死兮定知名於孺婦也器謹志以法像兮中
心好而非浮慕也或緣此以賈既兮吾不惕以改其
素也

祭菊坡像文

明 陳獻章

先生宋代之名臣吾鄉之前哲卷舒太空之雲表震
秋潭之月淮蜀委之而有餘凝丞尊之而不屑故能
効力于當年而全身于晚節荷殿先生挺生南越廣
厚深沉清通朗徹藐予區區心馳夢謁稽首丹青點
茲頑鐵庶幾百年不遠迓報秋菊之芳寒泉之冽奚
而薦之用表貞潔

祭先師康齋墓文

明 陳獻章

維成化十八年歲次壬寅十一月日門人新會陳某
被徵赴闕道出剡江謹具牲醴告於先師聘君康齋
先生之墓曰於乎元氣之在天地猶其在人之身盛
則耳目聰明四體常春其在天地則庶物咸亨太和
絪縕先生之生孕三光之精鍾河嶽之英其當皇明
一代元氣之淳乎始焉知聖人之可學而至也則因
純公之言而發軔既而信師道之必尊而立也則守
伊川之法以迪人此先生所以奮起之勇擔當之力
而自況於豪傑之倫也先生之教不躡等由涵養以
反致知先據德而後依仁下學上達日新又新啓勿
忘勿助之訓則有見於鳶魚之飛躍悟無聲無臭之
妙則自得乎太極之渾淪弟子在門墻者幾人尚未
足以窺其闕域彼丹青人物者或未暇深考其故而
徒摘其一二近似之迹描畫之又焉足以盡先生之
神其也生長東南振超日少三十而後立志五十而
未聞道今也欲就而正諸而悲不及先生之存先生
有知尚鑑斯文尚享

告羅一峰墓文

明 陳獻章

嗚呼先生今曷焉而往始何爲而來處則猷猷之逸
民出則文章之鉅魁其洞徹不欺之心炳中天之杲
日而轟動出羣之氣殷百藝之春雷知先生者儼先
生於北海不知先生者謂松楠弗類反見目於榆槐
先生見賢必親聞善必祿遇惡必摧存而知亡遇而
能裁隨時變化有闔有開而平生念慮所存其大者
正君正朝廷正三綱正萬民正四方皇皇之憂耿耿
之忠則至死而勿類貧賤而不爲戚患難而不以回
成化己丑之夏予遇先生于南畿盍簪之雅忘形爾
汝卽三宿而後別去屢反顧而徘徊先生贈予南歸
之文予贈先生草亭之什既而各伸其戒曰我不枉
己君無鑿坏孰謂先生去官而死曹溪之約不遂麗
澤之資何有而今而後復仰望於何誰嗚呼惜哉宿
草之墓朋友弗哭禮之常也非予與先生之宜也先
生有知歆此絮醅尚饗

祭西涯李文正公文

明 張邦奇

嗚呼公之名動海內久矣而吾猶憾夫知公之希也
國家開泰平貞元之氣交構磅礴數十年乃發爲亨
嘉之會而公生焉神智天成不假人力自經書道術
以及乎百家衆技靡不通究文章詞翰極工且富以
爲一代宗而莫敢或尚焉人因得而知之矣至其察
始慮終審微知著極力殫謀以陰裨乎世道公固不
以言而人亦未易以測也先皇帝時民熙物豐百司
庶府率隸成憲公秉鈞軸無一事可見而內閣所陳
便殿所對凡以益聖心而裨治化者人未必聞其詳
也及夫儉克窮柄虐流橫濫剛者觸柔者靡公于其
間鎮以譽望之重感以德器之純左隄右防先縱後
操以全士類而銷虐端者功亦偉矣而人未或窺其
際也已而致政家居身不接匪人足不踰戶閥口不
談時事食菲衣敝室廬儉然蓋廉夫狷士或不能及
乃又掩于文章功業之盛而人或不以名言信乎知
公之深者亦或希矣其也雖未敢謂知公抑辱公之
見知己非一日天下士聞公之沒雖邈不相識亦爲

之歎歎而不自禁况久受知愛者邪顧茲肅命遐方
超莫未繇敢以腥爛遙薦重幣之下而緘詞以聲予
哀公尚有以知予之言乎嗚呼悲夫

祭故戶部尚書九峯孫公文明 李舜臣

嗚呼孫公夷夏之望一夕星隕忽報公亡公雖在野
如川無梁明明日月為慘精光公始遭遇昔舉銓司
知人則哲惟公在茲孝皇之世賢才一時寔惟公等
平衡是持文章至是其變漸衰儲喬始奮何李追隨
公寔雅量崇而進之有位感勵或者能為已復引援
常若後期郁郁乎文既興若斯至今作者猶公是資
雖公是資退若弗足巖巖宰府後公為副值時艱危
人如在木蠶彼殘夫肆其荼毒嗟此縉紳逢其窘束
或不自持望塵俯伏公本名流肯同薄俗志不少辱
官竟南遷如彼鵠鳴聲聞于天一朝雄斷取其凶慙
方以司徒召公南還雖則召還時事猶未未及用公
公竟辭責國則無人典刑殆既武皇之末言之可畏
黃河東清聖人既生自在藩邸已薦休聲復以廷議
徵公地卿時方民力困極靡贏實賴休息連年勿征
公本舊德樹立益宏既瞻百宗亦慰羣情忽然引去
十年在荆海內庶幾猶為蒼生如何昊天既喪老成
嗚呼哀哉江漢滔滔流而不息矧彼衡山雄於南域

鍾爲哲人實民之則公外閑閑而中抑抑無義不精
無施不克迨事四朝榮寵亦極宜稱耆儒爲世名德
太上有德其次有言言則可遠而德則尊惟忠惟敬
惟志之敦食無重味郭無名園古稱大臣微乎進退
進則康時退無患悔惟公裁之咸義所在道範斯存
永世不廢計聞在遠能無感慨薄莫遠將如公在對
嗚呼哀哉

祭蔣毅所公文

明徐階

昔在憲皇時稱多士凡八臨軒最後丁未有四元老
公居其一夷清惠和金聲玉色孝皇之初公侍講帷
廟如其容藹如其輝藻正義中不假言語披拂陽春
漸濡膏雨暨相武皇後先羣姦不激如川不動如山
詞義從容匡扶懇惻身名俱全上下文德唐辛之間
國方遽屯公及成都奮不顧身翼龍于淵陸狐于穴
旋轉乾坤揭照日月維公之相功在邦家長沙京口
徒以詞華維公之相卓爾全德姚江洞度自謂不及
帝方圖舊公乃抗辭成而不享勞而不尸公身則歸
公望彌重曰裴在唐曰馬在宋公年未衰庶幾復起
時卜安危道占泰否胡事之乖哲人不作靈返星躔
氣收光嶽惟公在朝善類有依公今歿矣孰主孰持
維公在野後生有式公今歿矣孰引孰翼某等無似
濫出公門哭公之歿憶公之存感非私恩哭豈私戚
維公有知鑒此素臆尚饗

祭太傅文正謝公文

明 屠應峻

嗚呼於皇純佑寔生哲人英英文正邦家之損承休
遜否玉振金聲弱冠厲翼純皇是嘉清問克揚天休
荐加奉鬯儲皇羽儀承華協贊三善仰培元德禮穆
潛光萬邦僕式帝出於震七懷厥功崇崇天樞簡茲
登庸於穆元化斟之酌之王言作命佐時若之維帝
聖哲任賢弗猜萬機禁如時咨弼諸文華肅清義我
平臺帝穆在中召公其來于時三公惟劉惟李寔惟
雍雍偕侍宸宸惟曰肱股亦曰心膂聽履則試造膝
則喜嘉謨帝俞衆則英關道洽政宣日惠于民休茲
三公推賢有容明明卿佐濟濟百工惟帝聖哲亮功
敦裕中朝休明四海咸乂昊天降威感我顯休於穆
敬皇遺疾彌留乃召三公未命是宣玉几用憑金膝
殿絨時維武皇誕膺天序彼爾伊何敢妄國紀公曰
嗟嗟維邦之武邦懸典刑其致恒辟諫書載陳帝始
弗違亦有譴人啟之禍階維爾誦誦播時天威李曰
异哉維裕克勝二公曰吁先皇有命我躬受之毋敢
顛隕公言益莊闔日以昌劉公北徂歸公南荒振衣

姚山濯纓虞江位黜志申身逸譽張英英名胄錮及
孫子滔滔東山歸逾二紀維皇中興登賢晉明皇曰
返公復之台衡明明綸命肅肅安車行人將之日馳
以驅衆曰其辭公曰就運老臣抗命時予之事我公
至止皇命焯焯國有壽考士有儀刑衆曰其留公曰
歸哉年不逮志居功履危出以恭全歸曰行義皇恩
不愆始終允備訃音自南迺徹帝聰帝曰嗟嗟是惟
崇功乃召冢宰宗伯身空錫之塚田崇邱隆隆祭以
天章靈謚休封明明敬皇陟降在天公拜稽首庶無
颺頽敦節完名範世作則民載德音史紀成績緬予
闡璫喬嶽具依南望元廬山川間之蒼言秉紼繫此
簡書畢賜膏藥茹哀陳詞

祭楊文襄公文

明 羅洪先

運菴楊公既卒之若干年今上用所司議節惠易名賜諡曰文襄舊之出入門下者感公身後之有遺也俱各撰言相弔且寓追慕之意憶嘗道曲阿訪毘陵與唐應德氏論公平生唐謂某曰世以多欲病公亦孰知其廉介者某曰何曰聞有故人餽寶珠一斗受之客既退分勞左右授之地頃刻立盡而門生有以貨歸者發囊助給率數十百金爲常夫爲天下用財而不以私蓄卽比吾一介不取可也非廉介乎某聞而頷之報應聲曰世亦以尚通病公又孰知其方嚴者唐曰何曰先君實其熟稔交也爲武選詳八年出之守郡曰此地不可無此人不知其抑也又三年轉而備兵徐州曰此地不可無此人不虞其淹也夫爲天下用人而不以私惠卽比于一介不通亦可也非方嚴乎唐聞而頷之嗚呼世之追慕公者亦嘗聞此兩言否先君承公訃泣連日曰公固愛我其忘抑與淹者不以俗人視我也嗚呼知公者不必盡形之言能爲言者或不足以知公知不知於公何與世道之

升降係之矣公如聞言其亦頷之否乎嗚呼

嗚呼學有顯晦道有險夷二者相值千載一時憶接
浙之去魯與隱几而出齊空遲遲乎故域念孰為之
提攜迨春陵之威奮起閭閻之精微或登筵而獨對
或專郡而分麾言入禍出行高毀隨龜山之召殆其
一幾幸委曲於權變竟莫拯夫傾危嗣是有作大行
易禪自陽明之復起而東南再造於瘡痍斯文天喪
國是孰資既顛摧於荒裔猶集詒而交嗤先生弱冠
早自得師閭閻侍側解悟無疑當是時也豪傑蠲聚
議論蜂馳稟承雖難聽者忘疲及其久也通其內外
與時推移洞人情之隱忽總異說之紛披蓋獨有得
於圓融不測之智而才力賡博又皆足以發之不獨
四海縉紳讓其步驟即同時儕輩幾能盡撤其藩籬
而又位在密勿久奉時咨九重眷注蓋已納之帷幄
而二三元老亦且寄之肝脾倘其稍延歲月少竭心
思調停于可否之際引納于和平之歸可使善人恃
以無恐志士展其所為則當年傳授不為虛誕無疆
宗社固得藉以維持也胡為乎賜燭之罷方淫而鼎

覆之哀遽貽繡裳之慕未厭而台圻之占莫違豈民
生之無樣抑覆載之有私吾不知得才之難而顧值
數之奇又不知自古奇數胡獨值於間世之才與夫
成功之日而顧他無與於興衰也噫嘻噫嘻洪先未
變快親先儀初入禁近朝夕相依語必剴記信如著
龜廿年睽遠書問不遺近歲以來或合或離默有
懷思報所知道遠莫致欲待來茲望而不即如何弗
悲每讀夫子振本塞源之論與真訣初心之詩未嘗
不三歎而歎歎先生已矣來日可期果能無憾於斯

否乎嗚呼

祭邱思菴文

明 唐順之

自余少時頗負迂僻空濶乎寥廓之翔而泥滓乎鄉人之處糠粃乎世故而蟻蟻乎禮法然間以語人則人漫不省焉何說余見世人所為小者計刀錐之獲大者競祈常之勳粗者土偶乎衣冠履綦細者筆舌乎儒墨是非零碎乎米鹽覓食動輒於吊慶酒餽煎鼎旋蟻無項時休則余亦不省焉何事以是蹢然四顧幾成惟人里間之間一見吾子遂託金石以為可與同心者在古為漆園生在今惟子而已自是往還旦必建燭宵必及鐘或子言而我喏或我嘲而子哢或談鋒競起或間然一默子既曉空一世而偶余余亦塊然獨居而偕子然不知者則以為吾兩人皆若狂其知者則以為相與切劘文章砥礪節氣而已至其散髮而箕踞瞬目而跳嘯其所快然會意處雖余兩人亦不能自知也但覺吾見子則然見人則不然耳及余以雕蟲末技得廁聲利之途詭脛染膏終日攢眉而子以檇櫟託跡遂忘寂寞之野茹菽飲水終日嬉嬉然子在寂寞之野而余未嘗羨子之高余涉

聲利之塗而子未嘗疑我之賦以為猶是心也余以疎率果非適用屢進屢黜得返初服以從子子見余且泣且笑曰不意子之能自全也自是相與過從議論如曩時而情好有加焉子自三十以外則已決意絕進取然子重廉耻故不能妄得一錢子性高簡故又不能治生居常授書為生卒以懶罷己而責藥為生又以懶罷而獨注意攻古文詞上摹秦漢然後以病罷棲棲環堵饘粥不聊既乃從祿仕得寧陽教諭雖非素所好然亦以謂此官可隱也蓋莊生所云蒿目而憂世決性命以繫富貴此兩者皆謂之天授而子皆解之余趨向雖與子同然能解其一而猶未能脫然於其一常以愧子而子乃更以余為是也余迫年懶病亦如子乃始不復蒿目於世而子不及見矣余知子尚以余為是邪為非是邪子交游甚簡然人或以事最忠信可仗余嘗中夜與子卧偶能一二心事妻子不得聞者子曰吾恨不為浣紗女余笑曰子之信豈待提攜哉嗟乎自子之存吾於鄉曲得友一人焉自子之沒則一人亦盡矣雖然子子桑扈也

吾豈敢以慟累子之魂耶。述吾兩人平生所以相與
於世外者。以告子。嗚呼子。死矣。其無有發余之狂言
乎。雖然。子有下死者。其尚能聽余之狂言矣乎。

祭陣亡張進擊文

明 沈 鍊

嗚呼哀哉。張公之死乎。吾得不忍慟而深悲。維天有
柱維地有維。而所以柱天維地者。舍忠義其奚為。奸
臣執柄。綱紀大虧。國寇陵員。若欺小兒。三軍望風不
戰。自疲外通。賊賂內結。權私枉授之計。落如雷枝割
人。萬面奪。而自資報功。欺主曾無愧辭。將軍初未意
義。慨然言念國恩。涕流滿腮。口誦三軍。執挺持椎。此
神鐔。雖有去無回。撲背渡河。為予登岸。受刃良多。殺
傷還。竿亦屈勢。窮精盡不。散天發震雷。朱斤而志亦
有官軍。屯聚若雲。按兵不動。誰為救焚。我亦有生汝
亦有死。何其恐。晚而無死。張公雖死。神氣長生。諸將
雖在。奄奄無聲。汝不忠義。知有權責。權責行誅。汝骨
亦碎。先死。萬榮後死。萬辱死。辱生榮。其辨如燭。汝不
自力。敗君誤國。荼毒生靈。為鬼為域。不輯其徒。不恭
其職。所遇騷然。大禹滔。惡張公有靈。誅此逆賊。逆賊
不誅。伊何為德。某等流離不在其位。敬公哀公有靈。
涕淚憂國。愛君懷仁。慕義。驛金為餞。選辭為翰。臨風
長號。痛徹霽漢。

祭三原王公文

明 李攀龍

嗚呼不天下以仁而孰與焉大臣不天下以德而孰與焉大人方公之守維揚也饑饉薦臻濟寧斯民爰發康庾不埃報章惻瘼者身蓋已沒長孺之倫以及拊循東南大水凶歲衆望翕然庶蠲賦稅公乃獨持其義而軍國是計因以免者十數郡而不億其麓乃辟三塘勾陵與繼川不蕪汾是乃仁術遵周之制矣之公之起襄陽也大盜未夷荆棘王師爰獲渠魁搗其巢穴肅清固治定維繫渤海是儀以至開府鎮中種孫興亂閭閻豎作鎮誅於珍玩公乃匪敢是求而貪婪是接他莫敢問而持憲斯憚乃沒郭英王敦用寵奸不至蔓是稱肅僚維周之翰矣林侯下獄於永昌寺也則自以其身之去就而廷爭乎極言敢諫之士秦絃罷斤於安遠候也則身以其國之是非而力挽其甄淑別惡之風社稷之士知無不言直聲動天下何未免於好名之議也君子之心爲而不有用舍隨物化亦唯恃乎大道之爲公秉銓孝宗之朝大注明良之眷志在拔奇舉而能先耿鉅鹿李襄城張莊簡

彭惠安何旸江周太原清節宏猷維時之彥豐邑數世之所培植海內善類之所推薦同陞要地類俗丕變庶元凱之可達雖異官而同操懼瓦石之相舍精題才而不援帝曰尚書元氣北斗定維阿衡家茲群后何必密勿陟降左右奏爾訏謨無不自臚其知遇隆隆其業焉以久何二三執政而莠言自口豈不仁之未遠而孤立之難乎後哉亦惟止競維人主之近戚而思有所不能私亦惟黨正維宰相之仇讐而權有所不能施及至藩郡奉職無狀又未嘗不引咎以爲辭某邦士是式高山則仰詢諸故舊百蠻是長凡九閱月而疏二十上鬱鬱重臣不可爲家祇役天官心折前修簿考中正管破九流尚論天造而此其好述番番元老誰適與謀是故先生李獻吉有言居則岳屹動則雷擊三原輩出忠良外植大事斧斷小細海畜帷幄倖幸請劍必殛斯其存亡禍福臨乎其前而已凜然有不可犯之色矣蔡介夫亦謂公本治局涉獵群籍學問益人重尤不真侍講經筵休廢特異先未有事安生忿憤斯其性與天道觀乎其深而已

淵然立時出之地矣而況立侍五朝天下跂足而望
元光燕翼入座後進扼腕而言世家美周召於當代
謂唐虞其未邇也

祭海忠介公文

明 伍袁萃

明故南京右都御史忠介海公發跡瓊臺蜚聲天壤
勾吳伍袁萃聞其風而慕之有年矣萬歷乙巳觀祭
海北會海南林憲長臭味交孚乃擬有司構祠祀公
既成祭告其辭曰公之表如皎日公之履若凝霜公
之心信于君子公之迹疑于小人公之允新于一時
公之名垂于萬世人之知公者在絕絳一疏可以見
公之繫余之和公者在終始一節可以定公之品初
厄于吳相繼厄于楚相今二相之灰冷而公之忠誠
益顯初毀于省臣繼毀于臺臣今二臣之骨寒矣而
公之聞譽彌光萃也徧閱名世衡鑑頗審或矯飾于
外觀而中情實悖或矜奮于壯年而末路頓隳全節
完名惟公一人公之神在天公之像在堂庶正者謁
之而欣然有會于心貪邪者謂之而泚然有汗於顏
即矯託者謂之亦見其足將進而趑趄也嗚呼是足
以扶植名教而振起世風矣尚鑒

祭古冢文

宋 謝惠連

東府掘城北墜入丈餘得古冢上無封域不用埴甃以木爲槨中有二棺正方兩頭無和棺題和明器之屬材瓦銅漆有數十種多異形不可盡識刻木爲人長三尺可有二十餘頭初間見悉是人形以物槌撥之應手灰滅商人以手觸物曰板棺上有五銖錢百餘枚水中有甘蔗節及梅李核小辨皆浮出_此不甚爛壞銘誌不存世代不可得而知也公命城者改埋于東岡祭之以豚酒既不知其名字遠近故假爲之號曰寒漢君云

爾元嘉七年七月十四日司徒御屬領直兵全史統作城錄事臨漳今亭侯朱林吳豚醪之祭敬薦寒漢君之靈泰總徒旅版築是司窮泉萬壑聚壤成基一柳既啟雙棺在茲捨吝悽愴縱鍾漣而芻靈已毀塗車既摧几筵靡腐俎豆傾低盤或梅李益或醯醢蔗傳餘節小表遺塵追惟夫子生自何代曜質幾年潛靈幾載爲壽爲夭寧顯寧晦銘誌湮滅姓氏不傳今誰子後曩誰子先功名美惡如何蔑然百堵皆作十仞斯齊塲不可轉壟不可迴黃腸既毀便房已頽脩

題輿念撫備增哀黃腸以栢木黃心累在棺外也房墓中室也射聲重仁
曹廣漢流渥陳祀骸府阿掩骼城曲仰美古風爲君改卜輪移北隍窀穸東麓墳卽新營棺仍舊木合塋非古周公所存敬遵昔義還祔雙魂酒以兩壺牲以特豚幽靈髣髴歆我犧樽嗚呼哀哉

維年月日湖州刺史韓愈使軍事尙推秦濟以羊一
豬一投惡谿之潭水以與鯉魚食而告之曰昔先王
既有天下烈山澤罔繩捕必以除蟲蛇惡物爲民害
者驅而出之四海之外及後王德薄不能遠有則江
漢之間尚皆棄之以與蠻夷楚越况潮嶺海之間去
京師萬里哉鯉魚之涵養卵育於此亦固其所今天
子嗣唐位神聖慈武四海之外六合之內皆撫而有
之况禹跡所揜揚州之近地刺史縣令之所治出貢
賦以供天地宗廟百神之祀之壤者哉鯉魚其不可
與刺史雜處此土也刺史受天子命守此土治此民
而鯉魚暉然不安谿潭據處食民畜熊豕鹿麋以肥
其身以種其子孫與刺史亢拒爭爲長雄刺史雖爲
弱亦安肯爲鯉魚低首下心仙仙視視爲民吏羞以
偷活於此邪且承天子命以來爲吏固其勢不得不
與鯉魚辯鯉魚有知其聽刺史言潮之州大海在其
南鯨鰲之大蝦蟹之細無不容歸以生以食鯉魚朝
發而夕至也今與鯉魚約盡三日其率醜類南徙於

海以避天子之命吏三日不能至五日不能至
七日七日不能是終不肯徙也是不有刺史聽從其
言也不然則是鯉魚冥頑不靈刺史雖有言不聞不
知也夫傲天子之命吏不聽其言不徙以避之與冥
頑不靈而爲民物害者皆可殺刺史則選材技吏民
操強弓毒矢以與鯉魚從事必盡殺乃止其無悔

祭戰馬文

宋 路 振

咸平中契丹犯高陽關執大將康保裔畧河朔而去
天子幸魏遣特將王榮以五千騎追之榮無將材但
能走馬以馳射爲事受命惟怯數日不敢行伺賊渡
河而後發賊有剽溜齊者數千騎尚屯泥沽榮不欲
見敵遂以其騎畧界河南岸而還晝夜急馳馬不秣
而道斃者十有四五天子憫之遣使祭焉因作祭
文曰

房駟之精降爲驪駉泉水呀風沆沙澌庭虎脊孤聳
龍媒驚猱丹髦曉霞的額秋星第方著幹宜東旋膺
嶮腫角起方背珠明爾其絕塞草荒八月隕霜毛縮
蹄研筋弛脈張歎惡恐噬虬猱歎噴沙散沫千里
飛雪戎人負引武士索鐵前遮後突雷動地裂忽挽
一而割百終伏楯而受洩戎官劬歲入券書蹄勁
累崇通乎鬼驅名駒大駝銜尾入塞勞其酋長節以
祖僧蜀錦吳綵積如卸陵馬歸於我也重幣入於彼
也輕於是終黃金之爲浴天池之波鼓鬣雲衢美影
星河或踈而鑿或驟而叱屈盤申禁駟駟何多帝念

神物來經遠道闕之于內殿養之于外卑飲以玉池
秣之瑶草窮冬幽塵入我河濟羽書宵飛龍馭北巡
選仗下之名馬屬閭外之武臣琬戈電燭禁旅星陳
授以長策帥以全軍將士怒兮山可擘猛馬哮兮虎
可咋何嘆惜之無勇反遽延而避敵冰霜淒淒介甲
而駢不飲不沫載渴載饑駸駸馬餒死行人嗟咨委天
骨於衢路返星精於雲霧報主恩之無及齊戎力而
何恨生芻致祭繁華惟成禮瘞於崇岡全爾全體馬如
有神知帝之仁嗚呼

哀辭

歐陽生哀辭

唐 韓愈

歐陽詹世居閩越自詹以上皆爲閩越官至州佐縣令者累累有焉閩越地肥衍有山泉禽魚之樂雖有長材秀民通文書吏事與上國齒者未嘗肯出仕今上初拔宰相常衮爲福建諸州觀察使治其地衮以文辭進有名於時又作大官臨蒞其民鄉縣小民有能誦書作文辭者衮親與之爲客主之禮親游宴饗必召與之時未幾皆化爲儒詹于時獨秀出羣加敬愛諸生皆推服閩越之人舉進士縣詹始建中貞元

間余就食江南未接人事往往聞詹名問卷間詹之稱於江南也久貞元三年余始至京師舉進士聞詹名尤甚八年春遂與詹文辭同考試登第始相識自後詹歸閩中余或在京師他處不見詹父者惟詹歸閩中時焉然其他時與詹離率不歷歲移時則必合合必兩忘其所趨久然後去歟余與詹相知爲深詹事父母盡孝道仁於妻子於朋友義以誠氣醇以方容貌藹藹然其燕私善謔以和文章切渾善往復善自道讀其書知其於慈孝最隆也十五年冬余以徐

州從事朝正於京師。詹爲國子監四門助教。將率其徒伏闕下。舉余爲博士。會監有獄。不果上。觀其心有蓋於余。將忘其身之賤而爲之也。嗚呼。詹今其死矣。詹閩越人也。父母老矣。捨朝以之養。以來京師。其心將以有得於是而歸。爲父母榮也。雖其父母之心亦皆然。詹在側。雖無離憂。其志不樂也。詹在京師。雖有離憂。其志樂也。若詹者。所謂以志養志者歟。詹雖未得位。其名聲流於人人。其德行信於朋友。雖詹與其父母皆可無憾也。詹之事業文章。李翱旣爲之傳。故作哀辭以舒余哀。以傳於後。以遺其父母。而解其悲哀。以卒詹志云。

求仕無友。今遠違其鄉。父母之命。公子奉以行。友則既獲。今祿實不豐。以志爲養。今何有。牛羊事寔既修。今名譽又光。父母忻忻。今常若在旁。命雖云短。今其存者長。終要必死。今願不永。傷友朋親視。今藥物甚良。飲食孔時。今所欲無妨。壽命不辭。今人道之常在。側與遠。今非有不同。山川阻深。今魂魄流行。祀祭則及。今勿謂不通。哭泣無益。今抑哀自強。推生知死。今

以慰孝誠。嗚呼哀哉。今是亦難忘。

哭尹舍人詞并序

宋 富 弼

亡友河南尹洙字師魯嘗爲起居舍人直龍圖閣知
渭州乙酉歲謫官漢東未幾稍遷于均疾且革訪醫
南陽以託范公醫不効遂沒焉時予官汶上又東徙
手廬距其沒所遠甚歎師魯之不得見復不得撫其
視一祭其神因追思其平生所可列恨未有以卒其
志爲辭而哭之嗚呼人皆責君實憐焉人皆富君實
寔焉人皆老君實夫焉吾知君爲深是三者舉非君
之志不吾爲哭哭必義始君作文世重溫麗諸家料
殊大道破碑漫漶貴詞不立根柢號類嗜朋爭相教
甚上翔公卿下典書制君子厭時了不爲意獨倡古
道以救其敝時俊化之識文之誥今則亡矣使斯文
不能救其源而極其致吾是以哭之始君爲學遭世
乖離掇取章句屬爲文詞經有仁義曾非所治史有
褒貶亦弗以思君顧而歎嗟時之爲鈞扶六籍潛心
以稽上下百世指掌而窺功不苟進習無匪藝今則
亡矣使所學不能信于人而用于時吾是以哭之惟
文與學二事既隆充用而表豐于時窮純深蘊積資

而爲德行乎己而已必裕形乎家而家必克今則亡
矣使賢者之行不能移人心而化大國吾是以哭之
積德既成道隨而生謀固不究動必有經列于庭則
以蹇諤見黜于邊則以威懷取寧才望既出讒嫉以
興酷罰嗣降愠色不形今則亡矣使君子之道不能
被天下而致太平吾是以哭之嗚呼師魯君生于時
實惟慨奇鍾此其美謂必有光大以奮康濟是期胡
既厚其稟而反達其萎凡粵中蘊百亡一施豈茫茫
下土天亦有所不知耶將冥冥上客人固非其所司
耶何惡不必譽而善不必提忠良而天險狼而耆涖
清參錯顛倒乖睽天其或者世不欲常泰人不欲常
熙吾疑夫激者之論差不得而信之第於師魯哭無
已而一哭而慟再哭而咽三哭而寃離四哭而腸絕
蕪而復哭哭又不足聊以寓吾之哭聲而寓于辭庶
不泯沒於陵谷

哀穆先生文并序

宋 蘇舜欽

嗚呼穆伯長以明道元年夏客死於淮西道中友人
無叔才子美作詩悼之遣人馳弔之痛夫道不光于
又次其一二行以鑑于世爲文哀之先生字伯長名
修幼嗜書不事章句必求道之本原嘗記士徒無意
處孰習評論之性剛介喜於背俗不肯下與庸人小
合願交者多固拒之談事堅明上下合古皆可錄然
好詆卿卿斥言時病謹細後生畏聞之又獨爲古文
其語深峭宏大蓋爲禮部格詩賦咸平中舉進士得
出身調泰州司法參軍收守稱其才貳郡者惡之又
嘗以言忤貳郡者守病告貳者私黜吏使誣告先生
賂其獄聚左證後召先生使衆參考之由是貳池州
中道竄詣闕下叩登聞鼓稱冤會貳郡者死復受譴
於朝後累恩得爲蔡州參軍先生自廢來讀書益勤
爲文章益根柢於道然耻以文干有位以故困甚張
文節守毫毫之士豪者作佛廟文節使以騎召先生
作記記成竟不竄士名士以白金五斤遺之曰枉先
生之文願以此爲壽又使周旋者曰士所以道者已

載名于石固不朽耳既而並召士讓之投金庭下遂
椒蒙去郡士謝之終不受嘗語之曰寧區區糊口爲
族人不高爲匪人辱吾文也天聖末丞相有欲置爲學
官者耻請謁之竟不得嘗客京師南河汜中往往醉
暮歸過地如不省持者夜半鄉人猶聞其吟誦喟嘆
聲因隙窺之則張燈危坐苦讀執卷亦出曙用是貸
其貲毋喪徒既自負視成莖日誦孝經喪記未嘗觀
佛書飯浮屠氏也識者哀憐之或厚遺則必爲盜取
去不然且病或妻子卒後得柳子厚文刻貨之售者
甚少踰年積得百緡一子輒死將還淮西遇病氣結
塞胃中不下遂卒噫吁天之厭文久矣先生意以黜
廢窮苦終其身顧其道宜不容於今世然由賦數琦
隻常羅兵賊惡少輩所辱困其節行至死不變有孤
孺且幼遺文散墜不收伯長之道竟已矣乎初先生
死梁堅自解以書走上黨遺予欲訪其文俾予集序
之去年赴舉京師歷問人終不復得一篇惟有任中
正尚書家廟碑靜勝亭記徐生墓志蔡州塔記皆平
昔所爲又不足成卷今鬻氏守蔡邇以書使存其家

且未所著文字未至問作文哀之道不勝於命命不
會於時吁嗟先生竟胡為

蘇明允哀詞并序

宋 曾 鞏

明允姓蘇氏諱洵眉山人也始舉進士又舉茂才異
等皆不中歸焚其所為文閉戶讀書居五六年所有
既富矣乃始復為文蓋少或百字多或千言其指事
析理引物託喻能盡之約遠能見之近大能使之
微小能使之著煩能不亂肆能不流其雄壯俊偉若
決江河而下也其粹光明白若引星辰而上也其略
如是以余之所言於余之所不言可推而知也明允
每於其窮達得喪憂歡哀樂念有所屬必發之於此
於古今治亂興壞是非可否之際意有所擇亦必發
之於此於應接酬酢萬事之變者雖錯出於外而用
心於內者未嘗不在此也嘉祐初始與其二子軾轍
復去蜀遊京師今參知政事歐陽公修為禮部又得
其二子之文擢之高等於是三人之文章盛傳於世
得而讀之者皆為之驚或歎不可及或慕而效之自
京師至于海隅障徼學士大夫莫不咸知其名家有
其書既而明允召試舍人院不至特用為秘書省校
書郎頃之以為霸州文安縣主簿編纂太常禮書而

職輟又以賢良方正策入等於是三人者尤見於時
而其名益重於天下治平三年春明允上其禮書未
報四月戊申以疾卒享年五十有八自天子輔臣至
閭巷之士皆聞而哀之明允所爲文有集二十卷行
於世所集太常因革禮一百卷更定謚法二卷藏於
有司又爲易傳未成讀其書者則其人之所存可知
也明允爲人聰明辯智遇人氣和而色溫而好爲策
謀務一出己見不肯躡故迹頗喜言兵慨然有志於
功名也二子執爲殿中丞直史館職爲大名府推官
其年以明允之喪歸葬於蜀也既請歐陽公爲其銘
又請余爲辭以哀之曰銘將納之於壙中而辭將刻
之冢上也余辭不得乃爲其文曰嗟明允兮邦之良
氣甚夷兮志則強閭今古兮辨興亡驚一世兮擅文
章御六馬兮馳無疆決大河兮噓浮桑聚星斗兮射
精光衆伏玩兮彫肺腸自京師兮泊幽荒矧二子兮
與翔翔唱律呂兮和宮商羽我我兮勢方馳孰云命
兮變不常奄忽逝兮汴之陽維自著乎曄煌煌在後
兮慶彌長嗟明允兮庸何傷

汪尚書

明 汪仲魯

至正十六年乙未八月丁丑長鎗畔將鎖南班陷宣
城前嘉議大夫禮部尚書汪公死之或謂公告老閒
居爲日無久可以無死嗚呼是豈知公者哉忠誠之
存靡間今昔不死則辱在在皆是况宣之城守得完
數歲無遺者臬司守將惟公是皆造城陷而公執義
就死非邪是邪頃見老成數輩與公同升于朝名望
威著一旦臨患難隱忍幸生俯伏周旋勲名委地莫
顧人指笑則公之死是邪非邪仲魯與公同出唐兵
使都虞侯公嘗歸婺源率宗族祭掃武口大田先塋
遇鄉里不以仲魯貧屢而外焉茲已二十有餘歲公
之行義卓卓載史冊惟公之死關乎世教不可以無
言也遂爲之辭以哀之其辭曰
天垂象以杳冥兮日懸潛而無輝海氛騰而魑蜮舞
兮河橫潰而滿駝悲夫人有生兮委草木而同隳孰
篤信而秉義兮偉英傑之猷爲惟松柏之孤直兮蹂
躪芳匪異茲姿雲霜慘而交墜兮色貞毅而靡虧嗟
哉夫子兮夫豈異茲閒居日已久兮忠蓋猶一日也

民皆君之赤子兮城闕亦君之虛室也憂君之憂日
靡忘兮天穆穆猶咫尺邦民惟吾視瞻兮吾舍是而
安適城之存吾與存兮城既隳吾將焉匿死義以酬
君兮殺身以成仁中庭危生兮曷有其身罵賊聲不
絕兮惟志之伸嗚呼哀哉揭日月以爲明兮昭天地
之常經彼偷生以全軀兮類禽犢之冥冥蒙羞被耻
不顧慮兮反議先生以不必死世昧夫公論兮錫文
節之嘉謚敬亭兮清秋雙溪水兮夾鏡流惟先生之
高風兮邈山川之悠悠些吾文以敬弔兮日西墜而

雲愁

余左丞

武威余忠宣公名闢字廷心曩以色目第一人登第
內任翰林太常外官州郡省憲文章政事昭昭在人
耳目退處金斗之青陽讀書一旦被命爲左丞守安
慶方危急之秋即日就道撫其疲民羸卒百戰抗賊
誓與城存亡凡幾越歲終以節義昭史冊其傳卽今
翰林宋濂所撰晉公食憲浙東時見仲魯送戴璩教
諭三詩數見問政待制鄭王還自金華俾仲魯往見

之殊蒙許與且言易之一經嘗求得古書考索積思
有年遂得見易中一字一句盡出河圖洛書自秦漢
以來人未之見今幸偶得之方將注述成書以貽後
世然未敢輕也仲魯再三舉一二疑難叩問但言子
且用工此經五七年後相見當以吾之所得者相告
非有隱也子必用工日久而我之所見者端確然後
可以面商訂爾不二三年而兵革動海內不相聞士
寅春上同安詢知有王無霸者專爲公膠錄所注易
書因求王詢之無一字存亦不能識其一語向嘗見
公答鄭待制及與江西友人書其語與昔之言無異
皆痛哉率諸友生理其壘墓而致祭焉爲辭以哀其
辭曰
大江西來兮波千里而東馳皖山峻極兮鏡雲漢之
巍巍嗟夫子之真烈兮揭日月與爭輝爰爰同安孤
城兮抗巨賊越歲年兵食絕而援寡兮民之死而靡
還唐睢陽之張許論孰爲之後先昔公之志于學兮
風志貞以自許文魁先其匪議兮非古人吾誰與政
事隨以昭兮辭翰恒譽處亦深探乎化原兮妙達乎

象辭之根謂經之字字句句兮或出乎河洛圖書之
文自秦漢以迄今兮人莫之見而獨吾有聞惜述注
之良苦兮祇爲未有傳也豈天之喪斯文兮抑神之
秘而弗吾宣也恨金華之涼宵兮那忘乎邈歎之言
也溯江流而西上兮羗徘徊乎古舒弔遺跡而故老
兮酣百戰於城隅拭殘碑而灑涕兮大節堂之渠渠
城之南我塚兮羞芹藻而薦芳風蕭蕭而蓬偃兮目
懸潯而無光跪歛衽而載奠兮慨今昔而靡忘

鄭待制

師山鄭先生名正字子美隱居講學善爲古文或以
黃犢駕小車人或笑之識者奇之嘗構精舍于里之
師山其堂曰三樂器同焉軒曰極高明集諸朋游討
論春秋筆削之旨爲之注釋曰春秋闕疑至正甲午
朝廷用大臣薦遣使以翰林待制召先生起而拜命
束書就道道中疾作遂還山適大軍駐吾新安遭謫
捕入即不屈而死卒以節義題名列史傳仲魯辱先
生之愛者每過山下仰睇翠峰遺趾如昔草樹淒迷
宜勝悲慨袖辭哀些數酬一觴其辭曰

邇練溪之寒瀨兮睇師山之崇崇仰三樂堂之遺趾
兮森莽莽之荒蕪念昔松蘿茂鬱兮與堂構之方新
友朋紛其來集兮濟冠佩之如雲繫先生之剛直兮
懼師道之莫立也申義利之辨兮謂聖賢可企而及
也春秋述而閔疑兮易經傳而有成釣岑山之深峻
兮牧西疇而偶耕方遊息而玩樂兮適四海之廷經
詔倏降九重兮徵待制於翰林宜弭龍之有策兮關
治教於來今曷半運而遽疾兮還乎吾故鄉豈終不
能以有違兮孰若遂初心之遁藏慨浮雲之萬變兮
直不可測也名匪爲身累兮義之歸乃吾責也情沉
鬱而靡申兮蔽而莫之白也從容就死兮吾心安而
理得也吁嗟先生既往兮節義昭猶日星名存史冊
而不忘兮粵千古而彌馨徘徊茲山兮採草木之馨
榮酬清觴而灑涕兮測林鳥之悲鳴

陳狀元

浚儀陳狀元名祖仁字子山壬午科以漢南第一登
第廷對策忠厚懇切天下傳誦謂有漢意繇翰林編
修遷太常博士以憂還京口辛卯春來新安以薦元

哲高則誠二進士書邀趙汾子常與仲魯偕遊黃山
孜孜講學不少輟論詩法甚詳別後數書相規勉期
望殊切且言天下將多事惟紹興風俗淳厚新米易
得約同遠于是以待天下寧晏更以兵阻不相聞近
觀史傳方知其在朝議奏折奸扶危忠君憂國辭氣
端確昭如日星終死於義是故追悼之以辭曰

瞻黃山之峯萃兮三十六之奇峯念昔陳子山兮來
躡仙子之遐蹤招予與同遊兮駕天風而戾止朝浴
乎丹砂之泉兮夕攬乎玉蓮之芳藥凌天都之峻絕

兮以周觀乎八紘慨生民之庶富兮化殆漸乎四溟
何風濤之蹴天兮乃予遠而遊乎蓬島羣仙號夫燕
逸兮至於君豈同造舟顛覆而將伯助兮終莫究其
摧墮大厦勢已傾壞兮夫豈一木之能支九廟棄弗
顧兮與翠鈿以自隨君傍徨將安適兮當奉主而北
馳成敗誰能計兮天吾而靡渝恭執事兮登載車排
國門而出兮死生與俱竟殺身兮委骨邱壙皇天鑒
厥精誠兮魂昭陽乎帝之居曾日月之幾何兮丹青
著其名譽披史傳而垂本思兮悼往昔之無己軒轅

峰猶萬仞兮倚寒空而遙峙哀見君而不再得兮颯
秋風之夕起

程禮部

前禮部員外郎程公名文字以文號黥南生吾邑人
也孝友純至獎勵後進不倦蚤遊燕文章行義爲諸
閥老所推許然安分恬退不務進取中歲始爲郎博
士任懷慶滿考來京師適賀相當國人有薦公於賀
者乃求公文余廷心貢泰甫就公索之堅拒不與二
人索之朋友得數篇以進賀相焚香拱讀稱歎不已
遂有翰林編修之命遷除御史轉任禮部貴賞天台
方氏還寓會稽之錢清僧舍道阻不克歸一日張氏
遣使追紹興路官以厚禮來饋公堅卧不顧旣而兵
四集乃往杭主貢泰甫晨謁丞相達識帖木兒還臥
疾張氏之爲平章者就謁公擁衾面內卧不同視遂
移臥西山僧寺一日疾果篤召泰甫而諭之曰吾以
累子埋我茲土勿爲塚可也泰甫爲主其喪塋後大
軍至墓皆被發惟公墓所以不塚免丁未夏魯與邑
人汪炯之杭往西山求公墓弗得還西湖書院求所

刊文集讀之不勝悲慟遂哀之以辭曰

萃材兮棟梁美輪奐兮廟堂聲飛采綯兮鼓翼而鸞
翔公之文擅一代兮諸閭老誰與頌頌進不競榮寵
兮退焉與心脩藏賀相喜文錄我知兮刻乃微吾文
章豈溝中之斷棄兮尚可取而青黃即博士嗟久淹
兮一旦致身于玉堂我多冠兮馬行桓桓官禮却兮
仰依日月之清光倏航海而南兮老將旋予之故鄉
天台險絕兮留會稽而徬徨病少駐予錢清兮張胡
高乎承筐有將卧不面頤兮勵貞節吾何敢忘兵革

四集兮適西山其孔良與疾遙往兮吾願瘞骨于此
阮貢公素相友善兮託之歎以襄悠悠天地兮吾終
焉其九藏嗚呼陟吳山遊鳳凰江山如昔兮蘇堤夕
陽求先生之墓而敬弔兮蔓露草之荒荒反湖西而
客輿兮披雄文于頹庫奉讀而長太息兮浩海濤而
飛霜

王進士

王進士名誥字伯恂吾婺源之範溪人宋奉使昌之
裔也才思俊逸人風推服甲申領江浙鄉薦丁內艱

戊子春試春官擬置魁選或以帝車賦默之既而自
悔其誤交相答責訪問謝過薦為翰林編脩辭以親
老而歸壬辰斬黃冠陷饒徽癸巳夏舉義設策應官
兵以復郡邑退則講學于鄉里乙未冬寇復至乃應
拒縣院劉哈迷之招往德興見之還喻巨室胡伯振
從義寇覺之臨難不屈死之伯振亦遇害嗚呼如伯
恂之後發起邁人固罕及而終死於義其可慨邪仲
魯既不接而銘其墓復為辭以哀之其辭曰

冰案兮日輝豔懸兮絕纖翳才華天造兮人力曷施
清波芙蓉兮匪雕飾乎聲詩文不如點兮夫豈讓乎
衡為才美信若是兮行義虧又何責學與文尚有逮
兮孰如先生之死義雪慘裂兮草枯而風利原隰求
而歎殯兮有同宗之諸昆季堂封深固兮樹森鬱乎
阮臯泥湛露而重省兮棲猿鳥之悲號空山木葉兮
聲蕭騷靈爽英發兮惆悵薰蒿墓銘有碑兮將鐫置
手岩坳徘徊而不能去兮我心忉忉日荒荒而雲曠
曠兮激松風之怒濤

朱縣尹

遂安縣尹朱倬字孟章歲辛巳領江西鄉薦登壬午
第授某州同知以憂家居服闋授文林郎遂安縣尹
廣寅同考江浙鄉試既院會于豫卽爲元哲之坐因
詢仲魯詩經無封靡於爾邦義作如何破題答曰己
在孫山之外夫復何言元哲云此友非特義高賦尤
高破自當首薦因謂之曰崇德報功之典賞延於
後世修道全德之化法本乎前王詠歎之至者感慨
之深也愕然曰此篇已錄全文在卷中諸公同擬作
本經魁竟尋賦某未見移文謄錄彌封所亦對字號
不同誰不惜之且索角端賦元哲曾錄之出與之觀
三復擊節稱歎元哲又曰此公志存乎古人之學得
夫不掛念繇是孟章相與游情義甚至與李廉諸
公皆來相見因約來春過遂安明年春仲魯往留一
月嘗自歎曰倬登科十年殊露寸祿其命也夫仲魯
應曰不患無位患所以立故君子行己立身惟安義
命不以外至者勸其心也孟章殊服此言壬辰秋宛
繇聞化趨遂安吏卒逃散孟章大書於壁曰生爲大
元臣死爲大元鬼禍患從天來不死復何以乃生公

所以待盡施以邑廬無人而焚之火逮廨舍乃赴水
死後竟無傳其事者可哀也哉追以辭其辭曰
疾風兮草萎勁節兮靡移繫遂安之賢尹兮屬真操
其匪虧邑小而荒僻兮振其靈靈全初下車兮卽興
學而誦詩風夜孔勤兮化洽而民熙一朝冠胡臨兮
靡與偕其孰禦民駭而卒逝兮誰與獨處不寔茲邑
墟兮劃烟墟其棟宇予執死余之兮天明明其吾與
風披簡冊兮矢致身乎忠良况瓊林之燕集兮克齊
君民之有望憶武林之嘉會兮豈徒事彼文章行與
義之有在今望聖謨之洋洋歲忽忽其已遠兮心耿
耿其莫忘川悠悠而波逝兮山靄靄而雲飄思賢今
之不可見兮長向風而哀傷矯修之不可渝兮發斯
文之耿光亂曰學端以粹質之純兮顯擢甲科名譽
臻兮十年未祿奚命之屯兮牛刀小試絃歌陳兮變
故莫測奚衡哉民兮之死靡忒惟志之伸兮是謂投
身以成仁兮

誄

宋孝武宣貴妃誄并序

謝莊

惟大明六年夏四月壬子宣貴妃薨律谷眾媛龍鄉
輟曉照車去輓聯城辭趙皇帝痛振殿之既間悼泉
途之己宮巡步擗而臨蕙路集重陽而望椒風嗚呼
哀哉天寵方隆王姬下姻肅雍揆景陟此爰臻國軫
喪淑之傷家疑實庇之怨敢撰德於旂旒庶圖芳於
鍾萬其辭曰

元郊細縕瑤臺降芬高唐潔雨巫山鬱雲誕發蘭儀
光啟玉度望月方城瞻星比婺毓德素里棲景宸軒
處麗絺綌出懋蘋蘩修詩賁道稱圖照言翼訓如帷
贊軌堯門綢繆史館容與經閣陳風緝藻臨蒙分微
游藝彈數撫律窮機躊躇冬愛怙悵秋暉展如之華
寔邦之媛敬勲顯陽蕭恭憲奉榮維約承慈以遊
遠下延和臨明遠怨祚靈集社慶篤迎祥皇元璫式
帝女金相聯附齊頤接萼均芳以藩以牧燭代輝梁
視朔書氣觀臺告福八頌局和六祈穀滲衡總減客
輦翟毀衽掩綵瑤光淑華紫禁嗚呼哀哉帷軒夕改
輶輅晨遠離宮天遠別殿雲懸靈衣虛襲組帳空烟

中見餘軸匣有遺絃嗚呼哀哉移風朔兮變羅紃白
露凝兮歲將闌庭樹驚兮中帷響金缸暖兮玉座寒
純孝擗其俱毀共氣推其同樂仰昊天之美報怨訖
風之徒攀茫昧與善寂寥餘慶喪過于哀棘實滅性
世覆冲華國塵淵令嗚呼哀哉題湊既肅龜筮既展
階撤雨奠庭引雙轡維慕維愛曰子曰身慟皇情於
容物崩列辟於上昱崇徽章而出窾旬照殊策而去
城闐嗚呼哀哉經建春而右轉循閭闔而逕渡旌委
鬱於飛飛龍逶迤於步步錯楚挽於槐風喝遙蕭於
松露涉姑蘇而環迴望樂池而顧慕嗚呼哀哉晨輶
解風曉蓋俄金山庭寢日隨路抽陰重局闕兮燈已
黯中泉寂兮此夜深銷神躬于壤末散靈魄於天得
響乘氣兮蘭馭風德有遠兮聲無窮

王仲宣誄

曹植

建安二十二年正月二十四日戊申魏故侍中關內
侯王君卒嗚呼哀哉皇穹神察詰人是恃如何靈祇
殲我吉士誰謂不痛早世即冥誰謂不傷繁華中零
存亡分沅天運同期朝聞夕沒先民所思何用誄德
表之素旗可以贈終哀以送之遂作誄曰
猗歟侍中遠祖彌芳公高建業佐武伐商爵同齊魯
邦祀絕亡流裔畢萬勲績惟光晉獻賜封于魏之疆
天間之祚末胄稱王厥姓斯民條分葉散世滋芳烈
揚聲秦漢會遭陽九炎光中燼世祖撥亂爰建時雍
三日樹位履道是鍾龍爵之加匪惠惟恭自君二祖
萬光為龍食曰休哉宜翼漢邦或統太尉或掌司空
百揆惟敘五典克從天靜人和皇教遐通伊君顯考
奕葉佐時入管機密朝政以治出臨朔岱庶績咸熙
君以淑懿繼此洪基既有令德材枝廣宣體記洽聞
幽讚微言文若春華思若涌泉發言可詠下筆成篇
何道不洽何藝不闢棋局逞巧博奕惟賢皇家不造
京室傾顛宰臣專制帝用西還君乃羈旅離此阻艱

奮然鳳舉遠竄荆蠻身窮志達居鄙行鮮振冠南嶽
 權纓清川潛處蓬室不干勢權我公奮鉞耀威南楚
 荆人咸遠陳戎講武君乃義發我師旅高尚霸功
 投身帝宇斯言既發謀夫是與是與伊何響我明德
 授戈編却稽顙漢北我公寔嘉表揚京國金龜紫綬
 以彰勲則勲則伊何勞護靡已憂世忘家殊畧卓峙
 乃署祭酒與軍行止算無遺策畫無失理我王建國
 百司傳又君以顯舉秉機省闈戴蟬珥貂朱衣皓帶
 入侍帷幄出擁華蓋榮耀當世芳風曉謗嗟彼東夷
 憑江阻河騷擾邊境勞我師徒光光戎路靈駭風阻
 君侍華轂輝輝王塗思榮懷附望彼來威如何不濟
 運極命衰寢疾彌留吉牲告歸嗚呼哀哉翩翩孤嗣
 號慟崩摧發軔北觀遠迄南淮經歷山河泣涕如頽
 哀風興感行雲徘徊游魚失浪歸鳥忘栖嗚呼哀哉
 吾與夫子義貫丹青好和琴瑟分過友生庶幾遐年
 攜手同征如何奄忽弃我風雲感昔宴會志各高厲
 子猷夫子金石難擊人命靡常吉凶異制此離之人
 孰先項越何寤夫子果乃先逝又論先生存亡數度

子猶懷疑求之明據靈獨有靈游魂泰素我將假翼
 飄飄高舉起登景雲要子天路喪柩既臻將反魏京
 靈輅迴軌白驪悲鳴虛廊無見藏景蔽形孰云仲宣
 不聞其聲延首歎息兩泣交頤嗟乎夫子永安幽冥
 人誰不沒達士徇名生榮死哀亦孔之榮嗚呼哀哉

夏侯常侍誄并序

晉 潘 岳

夏侯湛字孝若，熱國人也。少知名，弱冠辟太尉府掾。賢良方正，徵爲太子舍人，尚書郎。野王令、中書郎、南陽相、家報、廷還、頃之，遂爲太子僕。未就命而世祖崩，天子以爲散騎常侍，從班列也。春秋四十有九，元康元年夏五月壬辰，寢疾卒於廷喜里第。嗚呼哀哉！乃作誄曰：

禹錫元珪，實曰文命。克明克聖，允啟夏政。其在於漢，道德惟嬰。思宏儒業，小大雙名。顯祖耀德，牧充天荆。父守淮岱，治亦有聲。英英夫子，灼灼其雋。飛辯擣藻，筆繁玉振。如彼隨和，發彩流潤。如彼錦繡，列素點絢。人見其表，莫測其裏。徒謂吾生，文勝則史。心照神交，惟我與子。且歷少長，逮觀終始。子之承親，孝齊閔參。子之交悌，和如瑟琴。事君直道，與朋信心。雖實唱高，猶賞爾音。弱冠屬翼，羽儀初升。公乃既招，皇輿乃徵。內贊兩宮，外宰黎蒸。忠節允著，清風載興。決彼樂都，寵子惟王。設官建輔，妙簡邦良。用取喉舌，相爾南陽。惠訓不倦，視人如傷。乃眷北顧，解綬延喜。余亦偃息。

無事明時，疇昔之遊。二紀於茲，班白攜手。何歡如之！居吾語汝，衆實勝寡。人惡雋異，俗疵文雅。執戟疲揚，長沙投匭。無謂爾高恥，居物下子。乃洗狀變色，易容慨然。歎曰：道固不同，爲仁由己。匪我求蒙，誰毀誰譽？何去何從，莫涅匪緇。莫磨匪磷，子獨正色居屈。志申雖不爾以，猶致其身。獻替盡規，竭茲一人。僕言忠謀，世祖是嘉。將僕儲皇，奉轡承華。先朝末命，聖烈顯加。入侍帝闈，出光厥家。我聞積善，神降之吉。宜享遐紀，長保天秩。如何斯人，而有斯疾？曾未知命中，年隕卒。嗚呼哀哉！惟爾之存，匪爵而貴。甘食美服，重珍兼味。臨終遺言，永錫爾類。歛以時襲，殯不簡器。誰能拔俗，生盡其養。孰是養生而薄其塋？淵哉若人，縱心條暢。傑操明達，因而彌亮。挺軀既祖，容體長歸。存亡永訣，逝者不追。望子舊車，覽爾遺衣。幅巾失報，涕交揮。非子爲慟，而慟爲誰？嗚呼哀哉！日往月來，暑還寒襲。零露霏霏，勁風淒淒。急慘爾其傷，念我良執。遠子素館，撫孤相泣。前思未弭，後戚仍集。積悲滿懷，逝矣安及。嗚呼哀哉！

馬沂督諫有序

晉潘岳

維元康六年秋九月十五日晉故督守關中侯扶風
馬君卒嗚呼哀哉初雍部之內屬羌反未弭而編戶
之氏又肆逆焉雖王旅致討終于殄滅而烽臺有毒
驟失小利俾百姓流亡頻於塗炭建威喪元於好時
州伯宵遯乎大谿若夫偏師裨將之預首覆軍者蓋
以十數刻符專城紆青拖墨之司奔走失其守者相
望於境秦隴之僭羣更爲地既已繫沂而館其縣子
以眇爾之身介乎重圍之裏率寡弱之衆據十雉之
城羣氏如蠅毛而起四面而射城中城中鑿穴而處
負戶而汲木石將盡焦蘇之竭窮蹙罄絕於是乎發
梁棟而用之弓以鉄鏃機關既縱礮而又升焉言以鉄鏃
擊沐爲機關既縱之以燬陳焦之委稀招摘之松栢
礮散而又取上弓繫也用能薪芻不匱人畜取給
栢也招摘也摘揅也陳久青烟竊起撫馬長鳴凶醜駭而疑想乃闕地而攻掘
也子命穴浚塹窺壺鑄瓶以傾之壺鑄瓶瓶并品
坑聽之器中則將穿響詐因焚積火重之潛底藏焉
和穴處偵視也獲大麥潛匿之安西之救至竟免虎口之厄全數

百萬石之積送契書於幕府契書即錄報聖朝時若
進以顯秩殊以幢蓋之制而州之有司乃以私隸數
口穀十斛考訊吏兵以橫楚之辭連之謂杖下之大
將軍屢抗其疏曰敦固守孤城獨當羣寇以少禦衆
載離寒暑臨危奮節保穀全城而雍州從事忌敦勛
劾極推小疵非所以褒獎元功宜解敦禁劾假授詔
書遽許而子固已下獄發憤而卒也朝廷葬而傷之
策書曰皇帝咨故督守關中侯馬敦忠勇果毅率屬
有方固守孤城危逼獲濟寵秩未加不幸喪亡朕用
悼焉今追贈牙門將軍印綬祠以少牢寃而有靈嘉
茲寵崇然衆士之間微其庸誠思手若乃下吏之肆
其喋害則皆妬之徒也嗟乎妬之欺善抑亦貨首之
讐也口不言而心害之之謂喋甘茂與摯里疾爲貨
首之讐貨首以己首易人之首也語曰或戒其子慎毋爲善言固可以若是悲夫昔乘
邱之戰縣賁父御魯莊公馬驚敗績賁父曰它日未
嘗敗績而今敗績是亡身也遂死之國人浴焉有流
矢在白肉公曰非其辜也乃誅之漢明帝時有司馬
叔持者白曰吾都市手劒父讐視死如歸亦命史臣

班固爲之誄然則忠孝義烈之流慨非命而死者
縱辭之士未之或遺也天子既已策而贈之微臣託
手舊史之末敢闕其文哉乃作誄曰

知人未易人未易知嗟茲馬生位末名卑西戎猾夏
乃奮其奇保此汧城救我邊危彼邊吳危城小粟富
子以眇身而裁其守兵止加衛壙不增築樊楚羣狄
豺虎競逐羣更恣睢潛跼官寺齊萬鳩閱震驚台司
聲勢沸騰種落煽熾旌旗電鏖戈矛林植形珠星流
飛矢雨集惴惴士女號天以泣費麥而炊負戶以汲

累卵之危倒懸之急馬生爰發在險彌亮精貫白日
猛烈秋霜稜威可厲懦夫克壯霑恩撫循寒士挾纊
秦秦犬軍阻衆陵寡潛隧密攻九地之下愜愜窮城
氣若止假昔命縣天今也惟馬惟此馬生才博智贍
傾以瓶壺劇以長壘歸未見鋒火以起燭薰尸滿窟
杯穴以飲木石匱竭箕釋空虛嗣然馬生微若之餘
弓梁高礮掃松高弩守不乏城歷有鳴駒哀哀建威
身伏斧質愆愆烈將覆軍長器戎釋我徒顯誅戎帥
以生易死時克不二聖朝西顧關右震惶分我汧度

化高冠糧實賴夫子思謦謦長威使有勇致命知方
我雖未學聞知前典十世宥能表墓旌善思人愛樹
甘棠勿翦矧乃吾子功深疑淺兩造未具儲隸蓋鮮
孰是勛庸而不獲免猗哉部司其心反側斷善害能
醜正惡直牧人遠迤自公退食間穢鷹揚曾不戢翼
忘爾大勞猜爾小利苟莫聞懷于何不至慨慨馬生
破礮高致發憤固固沒而猶眠嗚呼哀哉安平出奇
如何吝嫉搖之筆端汧城之人亦猶齊趙
因田單張孟諱而安傾倉可賞

矧云私粟狄隸可頌況曰家僕言頃倉庫及所由
狄以賜之亦無不可
況用家粟私僕以生其罪乎剔子雙龍貫以三木剔奪也雙龍馬
故雙龍也三木功存汧城身死汧獄凡爾同園心焉推
剝扶老携幼街號巷哭嗚呼哀哉明明天子旌以殊
恩光寵增乃牙其門司勳班爵亦兆後昆歟而有
霧底慰冤冤嗚呼哀哉

陽給事誄

宋 顏延之

維永初三年十一月十一日宋故寧遠司馬濮陽太守彭城陽君率嗚呼哀哉瓚少稟志節資性忠果奉上以誠率下有方朝嘉其能故授以邊事永初之末佐守滑臺值國禍薦臻王畧中否獲幽閭譽劇剝司寃並并騎弩屯逼鞏洛列營緣戍相望屠潰瓚奮其猛銳志不遠難立乎將卒之間以緝華裔之衆罷因相保堅守四旬上下力屈受陷勅勉士師奔援素軍爭免而瓚誓命沈城仇身飛鏃兵盡器竭斃于旗下

非夫貞壯之氣勇烈之志豈能臨敵引義以死殉節者哉景平之元朝廷闇而傷之有詔曰敗寧遠司馬濮陽太守陽瓚滑臺之逼屬城固守投命殉節在危無撓古之烈士無以加之可贈給事中振卹遺孤以慰存止追寵旣彰人知慕節河汴之間有義風矣遠元嘉廓祚聖神紀物光昭茂緒旌錄舊勳苟有繫于貞孝者實事感于仁明末臣蒙固側聞至訓敢詢諸前典而爲之誄其辭曰

貞不常祐義有必甄處父勸君陽處怨在登賢射姑苦

夷狄果題子行間左傳苦題生子忠壯之烈宜自爾先舊勳維廢邑氏遂傳惟邑又氏自溫徂陽孤趙以降晉族弗昌之子之生立績宋皇拳猛沈毅溫敏肅良如彼竹柏貞雪懷霜如彼駢駟配服駢樹遶兵喪律王畧未恢函陝堙阻渥洛蒿萊翔馬東驚風南埃路無歸轄野有委骸帝國斯艱簡兵授才寔命陽子佐師危臺懷彼危臺在滑之坳周衛是交鄭翟是爭昔惟華國今實邊亭憑嶽結關負河榮城全折夜擊和門晝局料敵厭難時惟陽生涼冬氣勁塞外艸衰過矣獯酋秉璋犯威鳴驥橫厲霜鎬高輦軼我河縣俘我洛畿攢鋒成林投鞍爲圍翳翳窮壘傲傲羣悲師老變形也孤援澗卒無半救馬實排秣守未焚衝攻已濡禍烈烈陽子在困彌達勉慰瘼傷拊巡饑渴力雖可窮氣不可奪義立遼疆身終鋒栝嗚呼哀哉貞文隕節魯人是志汧督效貞晉策攸記皇上嘉悼思存託異予以贈之言登給事疏舊紀庸恤孤表嗣嗟爾義士沒有餘喜嗚呼哀哉

陶徵士誄

延之高始安郡道經尋陽常飲淵明舍自晨達昏及淵明卒而延之高誄

思致

宋

顏延之

夫璿玉致美不為池隍之寶桂椒信芳而非園林之實豈期深而好遠哉蓋云殊性而已故無足而至者物之藉也隨踵而立者人之薄也言人以難得為貴易致為賤也藉資藉也薄若乃巢高之抗行夷皓之峻節故已父老堯尚錙銖周漢而餘世浸遠光靈不屬至使菁華隱沒芳流歇絕不其惜乎雖今之作者人自為量而首路同塵輟塗殊軌者多矣豈所以昭末景泛餘波育晉

徵士尋陽陶淵明南岳之幽居者也弱不好弄長實素心學非稱師文取旨遠在衆不失其寡處言通見其默少而貧病居無僕妾并臼弗任蓁菽不給母老好幼就養上置遠惟由生致親之誠追悟毛子捧檄之懷初辭一府三命後為彭澤令適不偶物弃官從好遂乃解體世紛結志巨外定跡深棲于是乎達灌畦鬻蔬為供魚菽之祭纖絢緯蕭以充糧粒之費心好異書性樂酒德簡弃煩促就成省曠殆所謂國爵屏貴家人忘貧者與有詔徵為著作即稱疾不赴春

秋若干元嘉四年月日卒于尋陽縣之某里近識悲悼遠士傷情冥默福應嗚呼淑貞夫實以誄華名由謚高荀允德義貴賤何美焉若其寬樂全終之美好庶克己之操其合謚典無愆前志故詢諸友好宜謚曰靖節徵士其辭曰

物尚孤生人固介立豈伊時違曷云世及嗟乎若士望古逢集望古人而逢與之為侶韜此湛族蔑彼名級睦親之行至自非敦然諾之信重于布言廉深簡潔貞夷粹

溫和而能峻情而不繁依世尚同詭時則異有一于此兩非默置豈若夫子因心違事默置言不為人所非議畏榮

好古薄身厚志世霸虛禮州壤推風孝惟義養道必懷邦天之秉彜不墜不恭爵同下士祿等上農度量

難釣進退可限長卿棄官雅貧自免卿相字雅實舉州郡茂才教以病去

子之悟之何悟之辨賦詩歸來膏肓獨善亦既超曠無適非心即無入不自得汎汎舊嶽葺宇家林晨烟暮

霽春煦秋陰陳書輟卷置酒絃琴居備勤儉躬蕘貧

病人否其憂子然其命隱約就閑遠延辭聘非直也明是惟道性糾纏幹流冥漠報施孰云與仁實疑明

智謂天登高胡僞斯義履信局憑思順何寧年年中
身疾維疴疾視死如歸臨凶若吉藥劑弗嘗禱祀非
恤僊幽告終懷和長畢嗚呼哀哉敬述靖節式尊遺
占存不願豐沒無求賻省計却賻輕哀薄歆遭壤以
穿旋塋而窆嗚呼哀哉深心追往遠情逐化自爾介
居及我多暇伊好之洽接閭隣含宵盤晝想非舟非
駕念昔宴私舉觴相誨獨止者危至方則閨哲人卷
舒布在前載取鑒不遠吾規子佩爾實慨然中言而
發達衆速尤迂風先履身才非實榮聲有歇潛恐延
之恃才

以物憑寵以陵
人故以相誠也獻音永矣誰歲余聞嗚呼哀哉仁
焉而終智焉而斃黔婁既沒展禽亦逝其在先生同
塵往世旌此靖節加彼康惠嗚呼哀哉加彼言過于
黔婁展禽也

御史王叔齊誄

明 唐順之

余讀毅齋公事而傷之嗟乎瑾之禍烈矣然瑾竟不
能殺公于唐鏞橫被之日而公所劾侍郎某者乃能
扼公於衆正蒙征之後遂至橫棄以死然則奈何獨
罪闕哉余既高公之節又與公之子挺相友善乃為
之誄曰

丙寅初元是生孽牙誰為其也忽焉為蛇金陵鳳陽以
死宮禁星隕雷擊為國妖議公為御史執法臺端謂
此不言焉用旁冠披腹呼閭變豈虛來匪實不應請

絕內批闕見之怒碎而投地公再上章其氣彌厲弗
預焉防噬臍何益當錮甘露豈一朝夕虎豹狴狴九
閭帝居獻中不足賈禍有餘彼闕熏灼口出詔制爵
人族人專行弗忌長跪者誰金玉其帶桓桓台司望
塵亦拜大杖高枷慘於炮烙公竟不免第絕骨鏢始
繁詔獄免歸故郡謂闕可笑而又欲甚再加之罪百
計摭撻罰米輸邊積二百石鄰貸里質猶不足額書
籍亦空何況田宅宮氣有盡彼闕即誅公復其官板
茅以茹臺章薦公暨劉及謝東山
木齊次且其行竟終牖

下繫何人斯賑而匿米公爲御史上章露詆時維秉
鈞盡力以扼此士人也闕又何責在闕燭虐寬骨縱
橫曷賢不及而公猶生迨闕既誅彈冠生氣曷賢不
及而公以廢則闕之虐猶尚可逭彼奸之毒其誰能
挽嗚呼孽狐鮑鼠何世蔑有天焚日晶潛形縮首兩
晦風冥紛出爲醜公也不辰獨罹其否小大往來陰
陽纏糾再拜誅公我心孔疚

明故少保胡公誄并序

明 沈明臣

維嘉靖四十有四年仲冬日明故光祿大夫少保兼
太子太保兵部尚書兼都察院右都御史奉勅都督
浙江江福四省軍務新安胡公以達詣卒於京師嗚
呼哀哉三台中圯太星告殞夷夏同悲黃稚走哭耕
夫爲之釋耒織妾爰以下機搭佩捐珥者充閭閻相
與謠者載路雖哀鄧 面而慕羊罷市蔑以過也嗚
呼哀哉公進士高等至知益都服闋補令餘姚旋擢
監察御史出巡窮邊繼臨舊楚聲高避馬光燭埋輪
皇朝著令凡官履所先之地不得重爲巡察而公乃
以殊異超格重來漸水增波鎮山借色於時卉服外
侵僮獠內扇鯨鯢肆毒吳越邱墟旣閭江淮流血成
海朔方中山韓魏齊楚之甲已蜀藩禺麻陽永順保
靖客美思田之衆推結髻首負毒弩而橫戈拔石起
距挽強弓以揮戰士馬四集旛旗蔽野雖控弦十萬
水犀三千何足以云然一戰殲弩百支不前譬之匹
奮負矢而百禽皆奔矣故陸戰則僵尸千里水戰則
浮骸蔽江剽城攻邑剽掠虔劉殫神屠戮士女蒙汗

雖非析骸易子之危實有負沒然眉之困於是天子
震怒臨朝不怡提兵綰符一二大吏咸伏法受誅高
公乃慨然忘死誓不遺賊爰聲大義則張膽明目迭
出奇策則潛慮密謀延攬英豪選銳授甲勸以賞賜
糾以刑罰于時賊逼構李而公適行即赤城邊遽告
急輕馳星赴灼賊可餌寢酒于毒賊果自饒不戰而
斃於是授畫苗兵職之王江涇上新首三千沅尸萬
計軍威大振士氣倍百於是戎兵始知戰亦易與競
思踏軍寧旗坎壙先登之緒矣舊吳逆有壘脰陸壩
橫涇之捷東越逆有清風仙居龕山之捷皇陵四抗
夷魄盡斃牛蹄之鱗悉委命于涸轍矣狀聞天威始
霽手降褒綸起序中司載貳夏部東南軍務悉委總
督公私計禍本不難東裔之難未夷內靈猶存南國
之清無日乃用偵諜餌以重賄剪徐海葉明陳東於
吳境購王直於松浦東叔金塘後梅翁洲之績西秦
乍浦維陽之功于是六合荷清塵之期而四海罷晏
開之誓矣天子嘉迺于襄之勛使正圻父之位秩崇
宮保榮晉台孤贈先叙後光榮異常豐功顯實豈不

於赫乎昭灼於一時者哉然風波潛駭危機密發朝
霞啟暉太陽戮曜耀聚來代牧之命昌國脫走趙之
身公逆諸閣請辜分填溝壑天子明聖下詔放歸隱
悼播越反于寬政雖無忘存闕之誠亦庶幾首邱之
志矣無何復有言者蓋克霍而反讒言彌興庸人上
變汚連亞夫於是相國之微不免相國之繫時天
子雖發重問之詔而實存議勞之仁惜左右寡郵良
驥鳴之進公遂卒于獄焉嗚呼哀哉蘭茝傾頤桂林
移植激情風烈憤意雲踊是故士治受誣于王渾安
西舍寃于鍾會毗睚積蒙功不償死蓋自昔而已然
矣嗚呼哀哉屬者先帝賓天今上繼緒舊冤俱刷萬
品咸新地下無吞聲之鬼人世多揚眉之夫公獨銜
恤黃原覆盆寢日伏闕劾呂強之書段熲之功莫發
顧天之未勅之疏焉援之罪誰明嗚呼哀哉臣也昔
叨記室詔若門生提章慚郭亮之風變服魏魏即之
節使公之偉烈不著於旂常而微過未滿於聖世不
亦悲乎乃退而作誄以自傷焉其辭曰
天稟上才為國綱紀嶽瀆降靈虞帝攸祉封陳歸姓

爰謚從起炎策流聲子孟伯始首蔡孝廉姦收御史
操行潔清質戚父子安定漢居新安晉徙代鴻閣
家襲青紫顯矣集英大朝發跡祠事廬江實光祖德
卓卓令公英英慈選犀角豐盈高明昭顯磊瑩懷慨
閭廓深遠經術起家策名霄漢揚芳飛文龍章虎背
再綰邑符青越名令肅能奉公珣宣法政踔躐御史
惠文執法百寮師風三楚澄檄懸鏡不疲履案虛實
於時吳越申禍無良東鯢鼓浪短髮跳梁土孽內訌
陳葉徐王大亂之刻苛我墮疆東國南紀蕭條萬里
慘酷荼毒城邑崩毀野絕青烟關門畫鍵官無完寺
卒不一戰虎符四發微兵滿地懸師賞德曠積年歲
覆軍殄將知勇俱廢墮法干典誅及大吏駭薄舊京
皇帝震赫譬彼疾疢大風苛毒傳化上下良醫所惡
天子曰吁惡用六師不有三尺孰為我持廷議衆集
維憲克之危事不蓋誰敢先對昔有條章簡帝之內
帝曰汝憲汝其往治越禁取能以救時弊繡斧再臨起
我百廢慎用六柄為民紀統糾刑明罰肇末躋本
清江裔以報天子公曰瞿瞿椎牛享土均服振振勇

不逃死王涇出奇軍始作氣捷凱屢收群兇就磔東
土底平萬國寧謐繫首王涇何戰之慶裝露撓船
儲酒醪穴毒瓶甌醒酒群衆三軍聞志闕號百倍露
布日揚賊烏焦焯肉落登陴鼓行而進席屢勝威雷
擊霆震於蹀令公後歸先出擐甲揚鋒申明軍律誅
賞並行功罪靡失大戰十餘小戰千百知不足謀勇
不程力玩弄股掌目無全賊阻險在心前籌處畫偏
裨授策戰士用命出鑿凶門刻期取勝用裕頭屑使
當殿宣法勤身以定南國罷枕霜戈饑噉江淥夜
不薦寢重繭驅逆死不敢請夷無筋骨伏後路血鼓
音不息噫嗟令公四海承風暢於異類臣節以共凱
奏帝閔奉觴上壽帝曰在廷孰居憲右御衆牧人文
武具才中丞司馬進序棘槐以率受爵較間便宣公
曰臣憲死不敵辭受命忘家抱鼓忘身簡服士卒約
束重申建節銜命以明四方拊循和輯以肅戎行若
換耳目弗移聲章於時內孽叫囂狂奴穴裏外伏
通魁渠姦執逞志結禍鼓鑿心不可畜偷生以殉
我令公殫心作圖諱謀博畫獨運神樞柔遠剛逼左

北右北迭用周旋機弗恒寬賄成間使嚙堅文降約
解逸志厚交二黨飛渡漢渤賊落吾掌孤城圍解
人伏辜惶怖歸死執誠獻俘擄產大慈京觀彰功
殘去穢六合同風弭其百苛矧其譏惡江海環之民
無改易陸人居陸水人居水擊革除田索弓臥鼓安
居樂業甘食美服田野市井游教嬉逐鳴雞吠狗烟
火相屬民命在天挈懸我公公寔再造東岱匪庸勲
載盟府彛鑊鼎錯方仲顏行伊尚隨肩錫與蕃渥位
尊九列三孤崇階青宮並揭式昨茅土庶微高伐公
曰明聖自神以和帝天靈赫廟美孔嘉先生鍾鼓詎
敢自多威懷夷夏功名發閭閻人側目載禍及門造
作飛降競欲咀嚙爭寵害能薰胥怨即內寡休休外
乏諄諄抹殺鴻鉅指索纖薄謂功爲罪移清以濁天
皇聖明不罪言者譬功寬過放在草野回受誹謗投
杼以三群輕折軸悲何以堪迺蒙於難卒死於讒嗚
呼哀哉飛章申構赤車來徵投杯而起束身歸庭
書自理庶回天聽誰爲主國以免尹鐸怨若怨馬
哉伯樂今也不然罰善實惡卒忤貴臣禍在不測積

不相能玉雪難白嗚呼哀哉昭私難作昔人攸慨微
基厚壙崇朝而壞逐旬以弋善逝安在嗚呼哀哉
廬法命符彼新豐絕食廷尉條侯慘惻銜悽嗚咽
盡歲予豈無聖主天聽則靈伏波蒙塋薤露未明功
臣骨解天下涕零輿哀殯喪我心怛怛嗚呼哀哉小
物不勤大患終擬不善遇賓家覆身歿魚也死賄食
其亡羊蓄怨滋厚咎豈在明嗚呼哀哉成天地功子
孫必章斯理不欺吾信其常嗚呼哀哉

齊竟陵文宣王行狀

梁任昉

祖太祖高皇帝

父世祖武皇帝

南徐州高蘭陵郡縣都鄉中都里蕭公年三十五行狀公道亞生知照麟幾庶孝始人倫忠為令德公賢體之非毀譽所至天才博瞻學綜該明至若曲臺之禮九師之易樂分龍趙詩析齊韓陳農所未究河間所未輯有一於此固不兼綜者歟昔沛獻訪對於雲臺東平齊聲於揚史淮南取資於食時陳思見稱

於七步方斯幾如也初沈攸之跋扈上流稱亂陵版宋鎮西晉熙王南中郎邵陵王並鎮盆口世祖毗贊兩藩而任總西伐公時從在軍鎮西府版寧朔將軍軍主南中郎版補行參軍署法曹于時景燭雲火風馳羽檄謀出股肱任切書記遷左軍邵陵王主簿記室參軍記允楚林之求賢詠儀形之寄刀筆不足宣功風體所以宏益除邵陵王友又為安南邵陵王史東夏形勝關河重鎮選衆而舉數說斯在除使持節都督會稽東陽臨海永嘉新安五郡諸軍事輔國

將軍會稽太守太祖受命廣樹藩屏公以高昭武穆惟威惟賢封開喜縣開國公食邑千戶又以秦謀連最進號冠軍將軍越人之巫覡正風而化俗篁竹禽威義讓而失險邪叟忘其西吳龍印挾其東臯會武穆皇后崩公星言奔波泣血千里水漿不入於口者至自禹穴逮衣裳外除心哀內疚禮屈於厭降事迫於權奪而茹慙肌膚沈痛瘡距故知鍾鼓非樂云之本懷羸非隆殺之要改授征虜將軍丹陽尹良家入徙戚里內屬政非一軌俗備五方公內樹寬明外施簡惠神皋載穆教下以清武帝嗣位進封竟陵郡王食邑如千戶復授使持節都督南徐兗二州諸軍事鎮北將軍南徐州刺史遷使持節侍中都督南兗徐北兗青冀五州諸軍事征北將軍南兗州刺史兗徐接壤素漸河潤未及下車仁聲先洽玉闕靖北門嚴局朝旨以董司岳牧數與邦教分任雖重比此為輕徵護軍將軍兼司徒侍中如故又授車騎將軍兼司徒侍中如故即授司徒侍中又如故上穆三龍下敷五典開元闡以開化履鳴鍾以體國翼亮孝治

緝熙中教奪金和訟蹊田自嘿不彫其朴用晦其明
聲化之有倫繫公是賴庠序肇興儀形國胄師氏之
選允歸人範以本官領國子祭酒固辭不拜八坐以
啟以公補尚書令式是敷奏百揆時序夫國家之道
互為公私君親之義遞為隱犯公二極一致受敬同
歸亮誠盡規謀猷宏遠矣又授使侍郎都督揚州諸
軍事揚州刺史本官悉如故舊惟淮海今則神牧編
戶殷阜萌俗滋繁不言之化若門列戶說矣頃之解
尚書令改授中書監餘悉如故獻納極機絲綸允緝
武皇晏駕寄深員圖公仰惟國典僥遵遺託俯輝天
綸踴絕于地居處之節復如居武穆之憂聖主嗣興
地居旦與有詔策授太傅領司徒餘悉如故坐而論
道動以觀德地尊禮絕親賢莫敢又詔加公入朝不
趨贊拜不名劬履上殿蕭傳之賢曹馬之親兼之者
公也復以中戚重道增崇德統進督南徐州諸軍事
餘悉如故並表疏累上身沒讓成天不慈遺梁岳
峻某年某月日薨春秋三十有五詔給溫明秘器歛
以克章備九命之禮遣大鴻臚監護喪事朝夕奠祭

太官供給禮也故以勸極津門感克長樂宣徒春人
不相傾塵罷肆而已哉乃下詔曰褒崇肅德前王之
令典追遠尊威洽情之所隆故使持節都督揚州諸
軍事中書監太傅領司徒揚州刺史克陵王新除進
督南徐州體睿履正神鑒淵邈道冠民宗具瞻惟允
肇自弱齡孝友光備爰及贊契協升景業變和台曜
五教克宣敷奏朝端百揆惟穆寄重先顧任均負圖
猷以齊微二南同規往哲方范保祐永翼雍熙天不
憖遺奄見薨落哀慕抽割震動于厥心今先遠戒期
龜謀襲吉茂崇嘉制式宏風猷可追崇假黃鉞待中
都督中外諸軍事太宰領大將軍揚州牧綠綬綬具
九錫服命之禮使持節中書監王如故給九旒鑾輅
黃屋左纛輜輶車前後部羽葆鼓吹挽歌二部虎賁
班劍百人望禮一依晉安平獻王孚故事公道識虛
遠表襄融通淵然萬頃直上千仞僕妾不規其喜慍
追侍笑見其傾訖他人之善若己有之民之不賦公
實貽耻誘接恂恂降以顏色方於事上好下規己而
康於殖財施人不倦帝子儲季令行禁止國綱天憲

真諸掌握未嘗鞠人於輕刑錮人於重議人有不及
內恕諸已非意相干每為理屈任天下之重體生民
之峻華充與縕緒同歸山藻與蓬茨俱逸良田廣宅
符仲長之言邛山洛水協應史之志邱園東園錙銖
軒冕乃依林構宇傍巖拓架清援與壺人爭旦縱橫
與素瀨交輝置之虛室人野何辨高人何點躡屬於
鐘阿徵士劉虬獻書於衡岳贈以古人之服宏以度
外之禮屈以好士之風申其趨王之意乃知大春屈
己五王君大降節憲后致之有由也其乔木之奇象

石之美公所製山居四時序言之已詳文皇帝養德
東朝同符作者爰造九言實該百行遵於禍於未萌
中姻戎於茲日非直旦暮千載故乃萬世一時也命
公注解衛將軍王儉綴而序之山宇初構超然獨往
顧而言曰死者可歸誰與入室尚想前良俾若神對
乃命畫工圖之軒牖既而緬屬賢英傍思才淑匹婦
之操亦有取焉有客游梁朝者從容而進曰未見好
德愚竊惑為即命刻削投杖不暇公以為出言自口
騷騷不遑聽受一謬差以千里所造箴銘稍成卷軸

門階戶席寓物重訓先是震于外寢匠者以為不祥
將加治葺公曰此天譴也無所改修以記吾過且令
戒懼不怠從諫如順流虛己若不足至於言窮藥石
苦味滋旨信必由中貌無外悅貴而好禮怡寄典墳
雖幸物如役孜孜無怠乃撰四部要略淨住子並勒
成一家懸諸日月宏洙泗之風闡迦維之化大漸彌
留話言盈耳然殞之請至誠懇惻豈古人所謂立言
於沒而不朽者歟易名之典請遵前烈謹狀

兵部尚書國公贈少保郭公行狀

唐 張 說

公名震字元振本太原陽曲人也大父任相州湯陰令因居于魏公少儻廓落有大志儀冠雄傑身長七尺美鬚髯十六入大學與薛稷趙彥昭同業時有豪僕至寄錢四百千以為學糧忽有一人緣服叩門云五世未葬棺槨各在一方今欲齊舉大事苦乏資用聞君家信至頗能相濟否不問姓名以車載去一無所留深為趙薛所誚公怡然曰濟彼大事亦何誚

焉十八擢進士第其年判入高等時華皆以校書正字為榮公獨請外官授梓州通泉尉至縣落拓不拘小節嘗鑄錢掠良人財以濟四方海內同聲合氣有至千萬者則天聞其名驛徵引見語至夜甚奇之問蜀川之跡對而不隱令錄舊文乃上古鉤歌其詞曰君不見昆吾鐵冶飛炎煙紅光紫氣俱赫然良工煖煉凡幾日文粹得寶鉤名龍象龍象顏色如霜雪更工咨嗟嘆奇絕琉璃玉匣吐蓮花錯鏤金環生明月正逢天下無風塵幸且文粹用防君子身精光照

黠青地色文章片片綠龜麟非直結交遊俠子亦曾

親近英雄人文粹知何日文粹作中路遺棄捐零落漂淪古

獄邊雖則文粹沉埋無所用猶能夜夜氣衝天則天

覽而佳之今寫數十本遍賜學士李嶠閻朝隱等遂

授右武衛胄曹右控鶴內供奉尋遷奉宸監丞屬吐

蕃請和親令報命至境上與贊普相見宣國威命責

其翻覆長揖不拜瞋目視之贊普曰漢使多矣無如

公之誠信遠近疆界立談悉定因遺金數十斤而還

公悉以進上奏言揣彼上下之情人倦其隸役久矣

咸願早和大將論欽陵不乎四鎮獨不欲耳但國家

每歲不絕其使而欽陵常不稟命自然彼蕃之人怨

欽陵日深望國恩日甚設欲廣舉兵徒難矣斯乃公

問之微旨也必可使其上下俱懷猜阻矣則天甚然

之無何吐蕃君臣果相疑貳遂誅欽陵弟贊婆及其

兄子莽布支並來降公聲名籍甚授御史加朝散大

夫還主客郎中吐蕃與突厥連和大入西河破數十

城圍逼涼州節度出城戰破蹂禾嫁米斗萬錢則天

方御洛城門酬宴涼州使至因報樂拜公為涼州都

督兼龍右諸軍大使調秦中五萬人號二十萬以赴河西公至涼州吐蕃素聞威名相謂曰我贊普猶懼吾輩何可敵乎相率而去公收合餘衆繕修城壁施法令屯田一年而復公之功也公以涼川西拒吐蕃北有突厥久示其弱未揚天威因徵龍右兵馬一百二十萬號二百萬集于涼州營幕千里舉鋒號令時宗楚客為相素與公不協令人告變則天惶懼計無所出仁傑魏元中韋安石李嶠宋璟姚崇趙彥昭韋嗣立張說二十五人抗表請保如公有異圖並請

身死籍沒則天由是稍安兵既大集人又知教分兵十道齊進逼青海幾至贊普牙帳贊普屈膝請和獻馬三千疋金三萬斤牛羊不可勝數公大張軍威受其蕃禮而還既伏西戎震威北突厥獻馬二千疋所獲涼州人士皆放歸塞上從此方鎮肅清蕃落畏慕令行禁止道不拾遺凡所規模制作率為後法河西隴右十餘處置生祠堂立碑頌德閭立均等為其文尋有詔許入朝公素無第宅寄居友人之舍候謁入朝忽有人馬前送狀開藏前人己去狀中唯有物

數而無姓名使於樹下獲驃馬二十餘匹帛三千疋公曰豈非大學請葬之士乎因以買宅居止薛稷趙彥昭聞之皆嗟嘆良久景龍年中宗楚客韋處訥等潛結朋黨憎功害能授公驍騎大將軍兼安西大都護四鎮經略使金山道大總管時烏質勒久恃衆倨傲不屈朝廷縱兵遠掠道路不通公以衆寡不敵難以力制因率麾下數十騎徑入部落烏質勒大出兵衛出迎望見公威容端毅風鬣若神不覺屈膝因而下拜公宣國威命抗聲與語自朝至暮雲深尺餘竟不移足質勒頻拜伏語畢歸帳相去二十餘里質勒久立雪中倉卒疾發足夜暴卒其嗣子娑葛集諸將曰漢使殺我君父今須復讐大衆兵衆將追殺公聞質勒死遲明素服來吊道路相逢兵圍數匝娑葛見公忽來未之敢逼但言衛護漢使公至其帳下大器流涕因撫定其嗣蕃人大喜留教十日助其葬事娑葛獻馬三千匹牛羊十餘萬移居千里西域無事道路肅清諸蕃聞之遣使歸降者十餘國時人語之曰郭元振說殺烏質勒知娑葛與國暇有聚奏請移於

瓜州制從之會中書令宗楚客受金遂寢其事公具
以狀聞楚客恃勢囑請召公將陷之公不從又奏請
斬楚客清蕃落時韋庶人竊弄國權中宗竟不之省
也初安西南有毒河源遠在葱嶺西北河岸百步人
畜踏之者輒死公威振西域所向無不從者因驗圖
經知其源率兵三萬人雁于開康居大食等十餘國
所過之國令供資糧仍署其國王為左右總管率兵
前進北至葱嶺牙帳前十二國王兵百萬餘其河源
上有大樹高千餘尺重陰數頃大軍至日有黃龍繞
樹以口吐毒氣而拒官軍三軍悉覩焉公手書操檄
文令左拾遺張宣抗聲讀之單黃龍解樹而下公率
諸軍誅之數日方例聚而焚焉河源且絕數十里內
悉為良田在安西十餘年四鎮寧靜韋庶人知政屢
微不至因下偽詔令侍御史呂守素中丞馮家賓相
繼巡邊欲將害之未及皆為安葛等諸蕃劫殺之睿
宗卽位徵拜太僕卿勅至之日舉家進發安西士庶
諸蕃酋長號哭數百里或勢面截耳抗表請留因始
之而後卽路其至玉門關也去涼州入百里河西諸

州百姓蕃部落聞公之至貧者携壺漿富者設供帳
聯綿七百里不絕公旌節下玉門關百姓望之宛轉
叫呼聲動巖谷自朝至暮傳呼至涼州涼州城中男
女在衢路並歌舞出城咸言我父至矣通夜城門不
受禁制都督司馬逸客聞之謂公近矣陳兵出迎會
候騎至云始入玉門關都督嗟嘆良久且狀聞至京
同中書門下三品加銀青光祿大夫遷兵部尚書封
管陶縣男依舊知政事尋轉吏部尚書知選舉囑請
不行大收草澤睿宗屢下詔褒美後默啜大寇邊拜
刑部尚書充朔方道行軍大總管築豐安定遠等城
以拒賊路尋加金紫光祿大夫再遷兵部尚書知政
事仍舊元帥會太平公主竇懷貞潛結充黨謀廢皇
帝睿宗猶豫不決諸相皆阿諛順旨惟公廷爭不受
詔及舉兵誅竇懷貞等宮城大亂睿宗步肅章門觀
變諸相皆竄外省公獨登奉天門樓躬侍睿宗聞東
宮兵至將欲投于樓下公親扶聖躬敦勸乃止及上
卽位宿中書十四日獨知政事因下詔曰大臣立事
夷儉不易良相昇朝安危所繫兵部尚書同中書門

下三品上柱國館陶縣開國伯元振偉才生代宏量
匡時經綸文武今之王佐出入將相古之人傑風侍
宸宸時咨廟堂思致堯舜以期管樂朕往在儲闈洎
登寶位每觀其仗義感激願制凶邪立誠慷慨密陳
宏益爾其至矣朕實嘉之頃者泉境興謀干戈作孽
太上皇帝既命朕除討元振又馳奉宸極始則養子
為弼終則寧朕問安可謂格于皇天貫于白日元惡
既剪廢物惟新昌言是圖朕豈忘舊宜開井邑永警
山河可進封代國公賜實封四百戶物一千段子五
品官尋兼御史大夫天下行軍大元帥是歲大徵兵
衆閱武驍山兵一百萬號三百萬並奉公節度是日
三令之後上將親數公慮有大變因畧行禮上大怒
引坐森下崇徽令張說犯麟而諫上乃曰元振有保
護大功宜拾軍法流新州未至蜀開元元年冊尊號
赦曰元振往立大功保護於朕頃因閔武頌失軍容
責情於遠將收后效可饒州司馬未至卒於道時年
五十八有集二十二卷文章有逸氣為世所重公少
負氣縱橫違意磊落作尉巴蜀不脩名檢及登朝受

任屢使還方需明烈心玉立貞節言行忠正居取儉
約身體雖於皇王致君期於堯舜公務之暇手不釋
卷雖子弟家人未嘗見其喜怒前後上事切諫得失
十數道其焚其蒙草不以語人故朝廷莫知也肅宗
嘗曰元振正直齊於宋璟政理逾於姚宗其英謀宏
亮道之矣舊於宣陽里居二十餘年不至諸院馬廐
每朝迴對二親言笑歸室儼如也不問家事與仁
傑朱敬則魏元忠李嶠韋安石趙彥昭韋嗣立薛稷
張說等為忘言之友事父母孝聞父受授濟州刺史
後以為相奏請解職授銀青光祿大夫濟州刺史致
仕公歿後二親猶在自我唐授命宰臣有二親者唯
公而已

贈太傅董公行狀

唐 韓愈

公韓晉字混成河中虞鄉萬歲里人少以明經上第
宣皇帝居原州公在州宰相以公善為文任翰林
之選開召見拜秘書省校書郎入翰林為學士三年
出入左右天子以為謹應賜緋魚袋累陞為衛尉寺
丞出翰林以疾辭拜汾州司馬崔圓為揚州詔以
公為圓節度判官攝殿中侍御史以軍事如京師朝
天子譏之拜殿中侍御史內供奉由殿中侍御史入
尚書省為主客員外郎由主客為嗣部郎中先皇帝
時兵部侍郎李涵如同紀立可敦詔公兼侍御史賜
紫金魚袋為涵判官同紀之人來曰唐之復土疆取
回紀力焉約我為市馬既入而歸我賄不足我於使
人乎取之涵懼不敢對視公公與之言曰我之復土
疆爾信有力焉吾非無馬而與爾為市為賜不既多
乎爾之馬歲至吾教皮而歸資邊吏請致詰也天子
念爾有勞故下詔禁侵犯諸戎畏我大國之爾與也
莫敢校焉爾之父子寧而畜焉蕃者非我誰使之於
是其衆皆環公拜既又相率南面序拜皆兩舉手曰

不敢復有意大國自同紀歸拜司勳郎中未嘗言回
紀之事遷秘書少監歷太府太常二寺亞卿為左金
吾衛將軍今上即位以大行皇帝山陵出財賦拜太
府卿由太府為左散騎常侍兼御史中丞知臺事三
司使選擢材俊有威風始公為金吾未盡一月拜太
府九日又為中丞朝夕入議事於是宰相請以公為
華州刺史拜華州刺史潼關防禦鎮國軍使朱泚之
亂加御史大夫詔至于上所又拜國子祭酒兼御史
大夫宣慰恒州於是朱滔自范陽以同紀之師助亂
人大恐公既至恒州恒州郡日奉詔出兵與滔戰大
破走之還至河中李懷光反上如梁州懷光所率皆
朔方兵公知其謀與朱泚合也患之造懷光言曰公
之功天下無與敵公之過未有聞於人甚至上所言
公之情上寬明將無不赦宥焉乃能為朱泚臣乎彼
為臣而背其君苟得志於公何有且公既為太尉矣
彼雖寵公何以加此彼不能事君能以臣事公乎公
能事彼而有不能事君乎彼知天下之怒朝夕戮死
者也故求其同罪而與之比公何所利焉公之敵彼

有餘力不如明告之絕而起兵襲取之清宮而迎天子庶人服而請罪有司雖有大過猶將捨焉如公則誰敢譏語已懷光拜曰天賜公活懷光之命喜且泣公亦泣則又語其將卒如語懷光者將卒呼曰天賜公活吾三軍之命拜且泣公亦泣故懷光卒不與朱泚當是時懷光幾不反公氣仁語若不能出口及當事乃更疎亮捷給其嗣忠其容貌溫然故有言於人無不信明年上復京師拜左金吾衛大將軍由大金吾為尚書左丞又為太常卿由太常拜門下侍郎平

章事在宰相位凡五年所奏於上前者皆二帝三王之道由秦漢以降未嘗言退歸未嘗言所言於上者於人子弟有私問者公曰宰相所職係天下天下安危宰相之能與否可見欲知宰相之能與否如此視之其可凡所謀議於上前者不足道也故其事卒不聞以疾病辭於上前者不記退以表辭者入方許之拜禮部尚書制曰事上盡大臣之節又曰一心奉公於是天下知公之有言於上也初公為宰相時五月朔會朝天子在位公卿百執事在廷侍中贊百僚賀

中書侍郎平章事實參攝中書令當傳詔疾作不能事凡將大朝會當事者既受命皆先日習儀于時未有詔公卿相顧公逡巡進北面言曰攝中書令臣某病不能事臣請代某事於是南面宣致詔詞事已復位進退甚詳為禮部四年拜兵部尚書入謝上語問日晏復有入謝者上喜曰董某疾且損矣出語人曰董公且復相既二日拜東都留守判東都尚書省事充東都畿汝州都防禦使兼御史大夫仍為兵部尚書由留守未盡五月拜檢校尚書左僕朕同中書門下平章事汴州刺史宣武軍節度副大使知節度事管内支度營田汴宋毫穎等州觀察處置等使汴提州自大歷來多兵事劉元佐益其師至十萬元佐死子士寧代之改避無度其將李萬榮乘其政也逐之萬榮為節度一年其將韓惟清張彥林作亂求殺萬榮不剋三年萬榮病風昏不知事其子乃搜歛為士有之故監軍使俱文珍與其將鄭惟恭執之歸京師而萬榮死詔未至惟恭權軍事公既受命遂行劉宗經韋宏景韓愈實從不以兵衛反鄭州逆者不至鄭

州人爲公懼或勸公止以待有自汴州出者言於公曰不可入公不對遂行宿圃田明日食中牟逆者至宿八角明日惟恭及諸將至遂逆以入及鄆三軍緣道謹聲庶人壯者呼死者泣婦人啼遂入以居初元佐死吳濤代之及鞏亂歸士寧萬榮皆自爲而後命軍士將以爲常故惟恭亦有志以公之速也不及謀遂出逆旣而私其人觀公之所爲以告曰公無爲惟恭喜知公之無害已也委心焉進見公者退皆曰公仁人也聞公言者皆曰公仁人也環以相告故太和初元佐遇軍士厚士寧懼復加厚焉至萬榮如士寧志反韓張亂又加厚以懷之至于惟恭每加厚焉故士卒驕不能禦則置腹心之士幕於恭庭廡下挾弓執劍以須日出而入前者去日入而出後者至寒暑時至則加勞賜酒肉公至之明日皆罷之貞元十二年七月也八月上命汝州刺史陸長源爲御史大夫行軍司馬楊凝自左司郎中爲檢校吏部郎中觀察判官杜倫自前殿中侍御史爲檢校工部員外郎節度判官孟叔度自殿中侍御史爲檢校金部員外

郎支度營田判官職事脩人俗化嘉禾生白鵲集蒼鳥來巢嘉禾同蒂聯實四方至者歸以告其帥小大咸懷有所疑輒使來問有交惡者公與平之累請朝不許及有疾又請之且曰人心易動軍旅多虞及臣之生計不先定至於他日事或難期猶不許十五年二月三日薨于位上三日罷朝贈太傅使吏部員外郎楊於陵來祭弔其子贈布帛米有加公之將薨也命其子三日飲旣歛而行於行之四日汴州亂故君子以公爲知人公之薨也汴州人歌之曰濁流洋洋有聞其郭閭道謹呼公來之初今公之歸公在喪車又歌曰公旣來止東人以完今公歿矣人誰與安始公爲華州亦有惠愛人思之公居處恭無妄謗不飲酒不譎笑好惡無所偏與人交泊如也未嘗言兵有問者曰吾志於教化享年七十六階累陞爲金紫光祿大夫勳累陞爲上柱國爵累陞爲隴西郡開國公娶南陽張氏夫人後娶京兆韋氏夫人皆先公終四子全道溪全素解全道全素皆上所賜名全道爲秘書省祕書郎全素爲大理評事解爲太常寺太祝皆

善士有學行謹具歷官行事狀伏請牒考功并牒大
常議所謚牒史館請聖編錄謹狀

段太尉逸事狀

唐 柳宗元

太尉始為涇州刺史時汾陽王以副元帥居蒲王子
晞為尚書領行營節度使寓軍邠州縱士卒無賴邠
人偷嗜暴惡者卒以貨竄名軍伍中則肆志吏不得
問日羣行丐取於市不喙輒奮擊折人手足椎釜鬲
甕盎盈道上把臂徐去至撞殺孕婦人邠寧節度使
白孝德以王故戒不敢言太尉自州以狀白府願討
事至則曰天子以生人付公理公見人被暴害因恬
狀且大亂若何孝德曰願奉教太尉曰某為涇州甚
遠少事今不忍人無冠暴死以亂天子違事公誠以
都索侯命某者能為公已乳使公之人不得害孝德
曰幸甚如太尉請既署一月晞軍士十七人入市取
酒又以刀刺酒翁壞釀器酒流溝中太尉列卒取十
七人皆斷頭注槊上植市門外晞一營大譟盡甲孝
德震恐召太尉曰將奈何太尉曰無陽也請辭於軍
孝德使數十人從太尉太尉盡辭去解佩刀還老雙
者一人持馬至晞門下中者出太尉笑且入曰殺一
老卒何甲也吾戴吾頭來矣甲者愕因諭曰尚書固

負名屬耶副元帥固負若屬耶奈何欲以亂敗郭氏
為白尚書出聽吾言晞出見太尉太尉曰副元帥熟
塞天地當務始終今尚書恣平為暴暴且亂亂天子
邊茲誰歸罪罪且及副元帥今邠人惡子弟以貨竄
名軍籍中殺害人如是不止幾日不大亂大亂由尚
書出人皆曰尚書倚副元帥不戢士然則郭氏功名
其與存者幾何言未畢晞再拜曰公幸教晞以道恩
甚大願奉軍以從願叱左右曰皆解甲散還火伍中
敢譁者死太尉曰吾未哺食請假設草具既食曰吾
疾作願留宿門下命持馬者去旦日來遂臥軍中晞
不解衣戒候卒擊柝衛太尉旦俱至孝德所謝不能
請改過邠州由是無禍先是太尉在涇州為營田官
涇大將焦令謭取人田自占數十頃給與農具曰數
歸我半是歲大旱野無草農以告謭謭曰我知入數
而已不知旱也督責益急且飢死無以償即告太尉
太尉判狀辭甚與使人求諭謭謭盛怒名農者曰我
畏段某耶何敢言我取判牘背上以大杖擊二十垂
死與來庭中太尉大泣曰乃我困汝即自取水洗去

血裂裳衣瘡手注善藥旦夕自哺農者狀後食取騎
馬賣市殺代償使勿知淮西寓軍帥尹少榮劉直士
也入見謭大罵曰汝誠人邪涇州野如耕人且飢死
而必得穀又用大杖擊無罪者段公仁信大人也而
汝不知敬今段公惟一馬賤賣市穀入汝汝又不知
耻凡為人傲天災犯大人擊無罪者又取仁者殺使
主人出無馬汝將何以視天地尚不媿奴隸耶謭雖
暴抗狀聞言則大愧流汗不能食以吾終不可以見
段公一夕自恨死及太尉自涇州以司農徵戒其族
通岐來此幸致貨幣慎勿納及過泚因致大綾三百
疋大尉壻韋晤堅拒不得命至都大尉怒曰果不用
吾言晤謝曰處賤無以拒也太尉曰狀終不以在吾
第以如司農治事堂棲之梁木上泚反太尉終吏以
告泚泚取視其封識具存

吏部侍郎贈禮部尚書韓公行狀

唐 李 翱

曾祖泰皇任曹州司馬祖素濟皇任桂州長史父仲卿皇任秘書郎贈尚書左僕射公韓愈字退之昌黎其人生三歲父歿養於兄會舍及長讀書盡能記他生之所習年二十五上進士第汴州亂詔以舊相東都留守董晉為平章事宣武軍節度使以平汴州晉辟公以行遂入汴州得試秘書省校書郎為觀察推官晉卒公從晉喪以出四日而汴州亂凡從事之居

者皆殺死武寧軍節度使張建封奏為節度推官得試太常寺協律郎遷授四門博士遷監察御史為幸臣所惡出守連州陽山縣令政有惠於下及公去百姓多以公之姓名其子改江陵府法曹參軍入為權知國子博士宰相有愛公者將以文學職處公有爭先者搆公語以飛之公恐及難遂求分司東都權知三年改直博士入省為分司都官員外郎改河南縣令日以職分辦以留守及尹故軍士莫敢犯禁入為職方員外郎華州刺史奏華陽縣令柳潤有罪遂將

貶之公上疏請發御史辨曲直方可處以罪則下不受屈既柳潤有犯公由是復為國子博士改北都郎中史館修撰轉考功郎中修撰如故數月以考功知制誥上將平蔡州先命御史中丞裴公度使諸軍以視兵及還奏兵可用賊勢可以滅願與宰相意忤既數月盜殺宰相又害中丞不克中丞微傷而遂以遠逐為宰相以主東兵自安祿山起范陽陷西京河南北六七鎮節度使身死則立其子作軍士表以請朝廷因而與之及貞元季年雖順地節將死多即軍中取行軍副使將授以授之節習以成故矣朝廷之賢恬然於所安以苟不用兵為責議多與裴度相異惟公以為盜殺宰相而遂息兵其為耻其大兵不可以息以天下力取三州尚何不可與裴丞相議合故兵遂用而宰相有不便之者月滿還中書舍人賜鮮魚袋後竟以他事改太子右庶子元和十二年秋以兵老久也未減上命裴丞相為淮西節度使以招討之丞相諸公以行於是公因本官兼御史中丞賜三品服衣魚為行軍司馬從丞相居於鄆城公知蔡州

請卒聚界上以拒官軍守城者率老弱且不過千人
至自丞相請以兵三千人間道以入必擒吳元濟丞
相未及行而李愬自唐州文城壘提其卒以夜入蔡
州果得元濟蔡州既平布衣栢者以計謁公公與語
奇之遂白丞相曰淮西賊王承宗膽破可不勞用衆
宜使辨士奉相公書明禍福以招之彼必服丞相然
之公令栢者口占為丞相書栢者袖之以至鎮州王
承宗果大恐上表請割德祿二州以獻丞相京師公
還刑部侍郎歲餘佛骨自鳳翔至傳京師諸寺百姓
有燒指與頂以祈福者公奏疏言自伏羲至周文武
時皆未有佛而年多至百歲有過之者自佛法入中
國帝王事之壽不得長梁武帝事之最謹而國大亂
請燒棄佛骨疏入貶潮州刺史移袁州刺史百姓有
以男女為人隸者公計備以償其直而出歸之入還
國子祭酒有直講能說禮而陋於容學官多老族子
損之不得共食公命吏曰召直講來與祭酒共食學
官由此不能賤直講奏儒生為學官口使會講生徒
奔走聽問皆相喜曰韓公來為祭酒國子監不寂寞

矣改兵部侍郎鎮州亂殺其帥田宏正征之不克遂
以王庭奏為節度使詔公往宣撫既行衆皆危之元
稹奏曰韓愈可惜穆宗亦悔有詔令至境觀事勢無
必於入公曰安有受君命而滯留自顧遂疾驅入庭
奏嚴兵拔刃弦弓矢以逆及館甲士羅於庭公與庭
奏監軍使三人就位既坐庭奏言曰所以紛紛者乃
此士卒所為本非庭奏心公大聲曰天子以為尚書
有將帥材故賜之以節實不知公共健兒語未得乃
大錯甲士前奮言曰先太史為國打朱滔滔遂敗奔
走血衣皆在此軍何負朝廷乃以為賊乎公告曰兒
郎等且勿語聽愈言愈時為兒郎已不記先太史之
功與忠矣若猶記得乃大好耳為逆與順利與病不
能遠引古事但以天寶末禍福為兒郎等明之安祿
山史思明李希烈梁崇義朱滔朱泚吳元濟李師道
復有若子若孫在乎亦有居官者乎衆皆曰無父曰
田令公以魏博六州歸朝廷為節度使後至中書令
父子皆授節子與孫雖在童幼者以為好官窮富
極貴寵榮耀天下劉悟李祐皆居大鎮王承元年始

十七亦仗節皆三軍耳所聞也衆乃曰田宏正刻此
軍故軍不安公曰然汝三軍亦害田令公身又殘其
家矣復何道衆乃謹曰侍郎語是侍郎語是庭湊恐
衆心動遽度衆散出因泣謂公曰侍郎求欲令庭湊
何所為公曰神策六軍之將如牛元翼此者不少但
朝廷顧大體不可以棄之耳而尚書又圖之何也庭
湊曰即出之公曰若直則無事矣因與之宴而歸之
牛元翼果出及還於上前盡奏與庭湊及三軍語上
大悅曰卿直向伊如此道由是有意欲大用之王武

俊贈太師呼太史者燕趙人語也轉吏部侍郎凡令
史皆不鎖聽出入氏問公公曰人所以畏鬼者以其
不能見也鬼如可見則人不畏之矣選人不得見令
史故令史勢重聽其出入則勢輕改京兆尹兼御史
大夫特詔不就御史臺謁後不得引為例六軍將士
皆不敢犯私相告曰是尚欲燒佛骨者安可忤故盜
賊止遏旱米價不敢上李紳為御史中丞械囚送府
使以尹杖杖之公曰安有此使歸其囚是時紳方幸
宰相欲去之故以臺與府不協為請出紳為江西觀

察使以公為兵部侍郎紳既復留公入謝上曰卿與
李紳爭何事公因自辨數日復為吏部侍郎長慶四
得病滿百日罷既罷以十二月二日卒於靖安里第
公氣厚性通論議多大體與人交始終不易凡嫁內
外及交友之女無主者十人幼孤養於嫂鄭氏及嫂
改為之服暮深於文章每以為自楊雄之後作者不
生其所為文未嘗倣前人之言而固與之並自貞元
末以至於茲後進之士其有志於古文者莫不視公
以為法有集二十卷小集十卷及病遂請告以罷每
與交友言既終以處妻子之語且曰某伯兄德行高
晚方藥食必視本草年止於四十二某疎惡食不擇
禁忌位為侍郎年出伯兄十五歲矣如又不足於何
而足且獲終牖下幸不至夫大節以下見先人可謂
榮矣享年五十七贈禮部尚書謹具任官事跡如前
請牒考功下太常定諡并牒史館謹狀

張忠定公行狀

宋 宋 祁

張詠字復之年七十惟公稟尊嚴之氣凝隱正之量
粵在羈賁不借兒曹窺然志嚮高自標置就外傳即
覽群經書必味於義根學乃知於言選家貧無以本
業往往手疏墳史每有屬綴輒据庭樹槁枝而瞑苟
不終篇未嘗就舍磳礫若多節然表大厦之材居然
晚器弗示良工之朴太原王持名知人見公懼然異
之獨謂公曰唐魏文公本生此鄉故老有言後五百
年復出一佳士元精回復祭酒當之矣公謝不敢當

興國四年始遊鄴下與故上谷寇公準推轂引重時
屬鄉里命秀方國試言府將雅欽公名議為舉首夙
儒張輩者惻惻有行疏畧少文公即以微謁府盛稱
其長輩終得薦公為之下彙茅有吉爵砥相先讓夷
之風一變河朔明年進士及第釋褐大理評事知鄆
州崇陽尤厲風迹大江之南民俗文幣因以手而上
下獄為人而重輕公廉知其狀痛絕以法精力於職
趨伏如神洗其鏹薄鎮之忠厚吏樂其職多一笑而
歸休民協攸居或減年而從役就改將作監丞著作

佐郎解秩授太子中允開掌麟州軍事夏臺弗靖西
戎方強公繕起亭郭精明烽火坐贊叔教秉羽之策
多參謀姚守土之樂伐謀取勝西鄙以安端拱紀元
天田躬籍轉秘書丞明年充禮部考試官已事復倅
相州一懼之年宜為親解百斤之牘終以懇辭乞董
璞上市征以便迎養詔可其奏月餘召賜五品服知
浚儀縣俄為荆湖北路轉運使事不護上世咨其清
劾罷太守嘉賦疲堞者十數人悉條所部廢格於弊
者百餘事稜威所振吏皆股弁察廉使上其理狀重
書褒美三年遷太常為郎中再旬乘驛赴覲加錫金
紫翌日遷虞部為郎中再旬授樞密直學士賜錢五
十萬判銀臺丞進司門下封駁事兼三班院河東大
將張永德小校犯法因笞而死詔按其罪公即封還
制書白上曰永德為國牙爪居天下勁兵處若以一
部曲推辱主帥臣恐有輕上之心不納因不關銀臺
而下書樞密未幾果有營兵脅訟軍侯者公復爭前
事上輒優容謝之會賊順緣間坤維搖亂偏師數萬
鼓行而西太宗以為潢池弄赤子之兵荆蘇生大軍

之後時咨上輔崇簡守臣參豫武功蘇易簡白上曰
某甫可屬大事當一面若奉將威命降諭劇賊陛下
高枕永無西顧之憂矣乃命公知益州癸丑占謝賜
白金一百四十斤鴻御出郊不復內御子顏引道初
無辦嚴朝家方以大師未集留之半歲公潛簿所賜
上還長府其秋遂詔赴部公終不復言至道二年改
兵部猶為郎中會丁新昌郡太夫人之喪恩詔奪服
陽秋之義不以家事為辭禮經所執亦推順變之文
直考嗣歷通臣均需郎拜諫議大夫歸朝遷給事中
戶部使七旬拜御史丞咸平二年知貢舉杜絕書謁
時稱得人夏改工部侍郎知杭州五年移京兆明年
轉刑部復為樞密直學士再知益州尋加吏部猶為
侍郎景德三年罷歸領三班登聞檢院奉朝請先時
生瘍於腦至是弗損家第賜告環中造適移狀言上
酷請外藩尋知金陵兼江南安撫使岱宗成禮改尚
書左丞昇人以秩滿願留即拜工部汾雅飲至又進
禮部皆為尚書疾劇還臺求訪高子存刻需頭之奏
頭遂角巾之遊魏舒之先行後言人無知去位平津

之何恙不已詔益勉於存神倚達半年必於得謝上
不獲已出公知陳州以大中祥符八年八月一日遂
終于理下享年七十嗚呼景命弗究宗工其萎知仁
均哀職我何贖邦人改祠而為諱道路舉音以過喪
真宗聞訃震嗟追贈尚書左僕射以天禧四年十一
月二十七日權窆於陳州宛邱縣孝悌鄉謝村焉從
宜也公始娶夫人唐氏卒繼室以太原郡夫人王氏
即河陽節度使顯之女允執婦道以佐君子後公三
年而歿子從質以父任累遷至衛尉丞居公之喪一
月以毀而夭女一人適故內相王公禹偁子嘉祐母
弟說以公延賞今為虞部員外郎孫四人曰約曰綜
曰緯曰紳咸以忠厚世其家公階至正奉大夫勲上
柱國爵開國公食封三千七百戶實戶四百其大校
也公姿宇典邁謀謨沉敏道架俗表氣籠霄極任節
俠已然諾不寃不欺如玉如瑩脩詞立誠恃見強志
節書兼兩賓蓋成陰佐郡被邊遭時右武入燈封而
試馬回策若紫張狸步以射優捨矢如破總物藏密
絕人遠甚及司封駁則詳言粹儀有任隗之沈正認

臺憲則推姦觴佞有傳咸之剛簡治益部也宿師屯
結縣官乏食掾史搏手狂狡放心公乃賤舊盆鹽翔
貴困米貿遷鍾豆諷告鄉縣民或妄言沮公公斬之
以徇自是見糧大集戰士倍氣矣自不逞挺亂重城
晏閉主帥王繼恩上官正頓師入保理根不進坐失
脫鬼之托居若賈胡之留公以為將不親行衆不可
使乃勸正自當一隊以賈羣勇正許諸行有日矣公
慮其不進於是推牛宿帳具出餞之禮中坐酒酣親
舉屬軍尉曰爾曹俱有親弱在東家因思厚惡無以

塞責此行當直搗寇壘盡其嚙類平定之日東向以
報目見朝廷舉萬年之觴豈不快耶若猶老師逸囚
疲民曠日即此地還為汝死處也正由此車行深入
說道兼進殊死鏖戰盡俘凱旋公乃出車勞動擬金
大會以次論獲先命行賞皆伏公氣決不敢仰視繼
恩帳下卒繚城夜逸吏執以告公惡與繼恩不叶即
命繫投皆并一府無知者先時劫掠之際誣染尤衆
脅從有狀歸訴無階各保營壁共懷猜貳公以為鹿
不擇陰死亡生路出入其腹懼益厲階而下符移錫

說魁宿有其技黨縱歸田里譬以大恩訖無敢禁及
在任也屬六遠南牧靈旗薄伐公慮遠夷為變欲出
奇以勝之因取盜賊之尤無狀者磔死於市凜然人
望遂臻靖嘉每吏牘便文久不得判公率爾署決人
皆厭伏罰既值罪案無度情蜀中喜事者論次其詞
總為誠民集錄墨傳布雖張敞之為京兆時時越法
縱舍黃霸之守潁川人人咸知上意無以過之牧餘
抗也邁民為飢方蠲不政稻蟹無種原田苦藝民挾
盜利以冒公禁者日數百輩公一切咎遣不徇費遲

咸人故曰法亂如是人將安禁公勞之曰餘萬十
萬戶飢者七八弗挾鹽利無復生意若暴禁之彼將
圍視衡擊以擾居者則為既大矣爾曹第忍之族其
歲定則太守復以三尺律從事矣是年雖數人無從
命者富家子與壻分財不協詣府廷拜壻曰彼先子
有治命壻之子三因出遺札子不能舉其契公索酒
酌地曰彼父知人也當死之日子方冲懦託養於壻
苟子有七分之二約則亦死於壻手矣今當七分歸子
三分歸壻於是二人號慟以為神明公之操決率是

類也原其過二聖也以功名自任故力與命偕顯八
座也以方格見信故言與行危本乎直清貫以忠恕
無乞靈微福無非鬼責履重剛不陰臨大節不奪藜
藿弗採於猛獸山川寧捨於駢角若夫安世之恨謝
翁歸之滅私大有之文明小雅之愷悌公皆兼有其
美惜其未極柄用遽愆膝理上欲為相者數矣天之
不憖也悲夫公雅好著文深切驚邁以不偶俗尚自
號乖崖公尤善詩筆必覈情理故重次薛能詩序之
曰於言既苛意在言外議者以公自道也生平論著
仲氏說集之成十卷以行於代內外歸之日無插膺
之妾無雜弔之賓終齊事而乃暇取禪書而頌德漢
廷諸老恨王駿之不候天下之人為隴西而流涕斯
非遺愛遠直立功立言之極歟敢擬令猷以涓史闕
謹狀

司馬溫公行狀

宋 蘇 軾

曾祖政贈太子太保曾祖母薛氏贈溫國太夫人祖
炫祕書省校書郎知耀州富平縣事贈太子太傅
祖母皇甫氏贈溫國太夫人父池尚書吏部郎中充
天章閣待制贈太師追封溫國公母聶氏贈溫國太
夫人公諱光字君實其先河內人晉安平獻王孚之
後王之裔孫征東大將軍陽始塋今陝州夏縣涑水
鄉子孫因家焉自高祖曾祖皆以五代衰亂不仕富
平府君始舉進士沒於縣令皆以氣節聞於鄉里而
天章公以文學行義事真宗仁宗為轉運使御史知
雜事三司副使歷知鳳翔河中同抗號晉六州以清
直仁厚聞於天下號稱一時名臣公自兒童凜然如
成人七歲聞講左氏春秋大愛之退為家人講即了
其大義自是手不釋書至不知飢渴寒暑年十五書
無所不通文詞醇深有西漢風天章公當任子父及
公公惟與二從兄然後受補郎社齊郎再奏將作監
主簿年二十舉進士甲科改奉禮部以天章公在抗
辭所遷官求簽書蘇州判官事以便親許之未至丁

太夫人憂未除丁天章公憂執喪累年毀瘠如禮服除發書武成軍判官事改大理評事為國子直講遷本寺丞故相龐籍名知人始與天章公遊見公而奇之及是為樞密副使為公召試館閣校勘同知太常禮院中官奏允言元詔以允言有軍功特給國簿公言孔子不以名器假人繁縷以朝且猶不可允言近習之臣非有元勳大勞而贈以三公之官給以一品國簿其為繁縷不亦大手故相夏竦卒詔賜諡文正公言諡之美者極於文正諫何人可以當此書再上

改諡文莊遷殿中丞除史館檢討脩日厯改集賢校理龐籍為鄆州徙并州皆辟公通判州事公感籍知己為盡力時趙元昊始臣河東貧甚官苦貴糴而民疲於遠輸麟州密野河西多良田皆故漢地公私雜耕天聖中始禁田河西考虜乃得稍蕪食其地俯視麟州為河東憂籍請公按視公為畫五策宜因州中舊兵益禁兵二千廂兵五百築二堡河西可使堡外三十里虜不敢田則州西六十里無虜矣募民有能耕麟州閑田者復其稅役十五年能耕密野河西者

長復之耕者必衆官雖無所得而糧自賤可以漸紓河東之民籍移麟州如公言而兵官郭思勇且狂夜開城門引千餘人渡河酒食不為戰備遇敵死之議者歸罪於籍罷節度使知青州公守闕三上書乞獨坐其事不報籍初不以此望公而公深以自咎籍既沒升堂拜其妻如母撫其子如昆弟時人兩賢之改太常博士祠部員外郎直祕閣判吏部南曹遷開封府推官賜五品服交趾貢異獸謂之麟公言真偽不可知使其真非自然而至不足為瑞若偽為遠人笑

願厚賜其使而還其獸因奏賦以諷遷度支員外郎判句院擢脩起居注五辭而後受判禮部有司奏六月朔日當食公言故事食不滿分或京師不見皆賀臣以為日食四方見京師不見天意人君為陰邪所蔽天下皆知而朝廷獨不知其為災當益甚皆不當賀詔從之後遂以為常遷起居舍人同知諫院蘇轍舉直言策入第四等而考官以為不當收公言轍於同科四人中言最切直有憂君憂國之心不可不收時宰相亦以為當然事仁宗不許曰求直言以直棄

之天下其謂朕何公遂與諫官王陶同上疏願為宗廟社稷自重卻罷燕飲安養神氣後官嬪御進見有度左右小臣賜予有節厚味腊毒無益奉養者皆不宜數御上皆納之初至和三年仁宗始不豫國嗣未立天下寒心而不敢言惟諫官范鎮首發其議公時為并州通判聞而繼之上疏言禮太宗無子則小宗為之後為之後者為之子也願陛下擇宗室賢者使攝儲貳以待皇嗣之生退居藩服不然則典宿衛戶京邑亦足以係天下之望疏三上其一留中其二付

中書公又與鎮書此大事不言則已言一出豈可復反願公以死爭之於是鎮言之益力及公為諫官復上疏且面言臣昔為并州通判所上三章願陛下果斷而力行之時仁宗簡默不言雖執政奏事首肯而已聞公言沉思久之曰得非欲還宗室為繼嗣者乎此忠臣之言但人不敢及耳公曰臣言此自謂必死不意陛下開納上曰此何害古今皆有之因令公以所言付中書公曰不可願陛下自以意喻宰相是日公復言江淮鹽事詣中書白之宰相韓琦問公今日

復何所言公默計此大事不可不使琦知思所以廣上意者即曰所言宗廟社稷大計也琦喻意不復言後十餘日有旨令公與御史裏行陳洙同詳定行戶利害洙與公屏語曰日者大饗明堂韓公攝太尉洙為監祭公從容謂洙曰君與司馬君實善君實近建言立嗣事恨不以所言送中書欲發此議無自發之行戶利害非所以煩公也欲洙見公達此意爾時嘉祐六年閏八月也至九月公復上疏面言臣向者進說陛下欣然無難意謂即行矣今寂無所聞此必有

小人言陛下春秋鼎盛子孫當千億何遽為先不祥之事小人無遠慮持欲倉猝之際援立其所厚善者爾唐自文宗以後立嗣皆出於左右之意至旨稱定策國老門生天子者此禍豈可勝言哉上大感悟曰送中書公至中書見琦等曰諸公不及今定議異日夜半禁中出寸紙以某人為嗣天下莫敢違琦等皆唯唯曰敢不盡力後月餘詔英宗判宗正寺固辭不就職明年遂立為皇太子稱疾不入公復上疏言凡人爭絲毫之利至相爭奪今皇子薨不貲之富至三

百餘日不受命其賢於人遠矣有識聞之足以知陛下之聖能為天下得人然臣聞父召無諾君命召不俟駕而行使者受命不受辭皇子不當辭避使者不當發反凡召皇子內臣皆乞責降且以臣子大義責皇子宜必入英宗遂受命充國公主下嫁李瑋以驕恣聞公上疏言太宗時姚坦為堯王翊善有過必諫左右教王詠疾踰月太宗召王乳母入問起居狀乳母曰王無疾以姚坦故鬱鬱成疾爾太宗怒曰王年少不知為此汝輩教之教乳母數十召坦慰勉之齊國獻穆大長公主太宗之子真宗之妹陛下之姑而謙恭率禮天下稱其賢願陛下教子以太宗為法公主事夫以獻穆為法已而公主不安於李氏詔瑋出知衛州公主入居禁中而瑋母楊歸其兄瑋散遣其家人公言陛下追念章懿太后故使瑋尚主今乃母子離析家事流落陛下獨無雨露之感悽惻之心乎瑋既責降公主亦不得無罪上感悟詔公主降封沂國待李氏恩禮不衰判檢院權判國子監除知制誥力辭至八九改授天章閣待制兼侍講賜三品復仍

知諫院上疏言經略安撫使以便宜從事出於兵興權制非永世法及將相大臣典州者多以貴倨自恃凌忽轉運使使不得舉職朝廷務省事專行姑息之政至於胥吏謹謹而逐御史中丞筆官悖慢而退宰相衛士凶逆而獄不窮姦澤加於舊軍人置三司使而法官以為非犯增級於用法有疑其餘一夫流言於道路而為之變法推恩者多矣皆陵遲之漸不可以不正充媛董氏薨追贈婉儀又贈淑妃報朝成服百官奉慰定謚行冊禮葬給園簿公言董氏秩本微病革之日方拜充媛古人婦人無謚近制惟皇后有之園簿本以賞軍功未嘗施於婦人惟唐平陽公主有舉兵佐高祖定天下之功乃得給至韋庶人始令妃主葬日皆給鼓吹非令典不足法時有司新定後宮封贈法皇后與妃皆贈三代公言別嫌明微妃不當與后同表蓋引却慎夫人坐正為此爾天聖親郊太妃止贈二代而況妃乎知嘉祐八年貢舉仁宗崩英宗以哀毀致疾慈聖光獻太后同聽政公首上疏言章獻明肅太后保佑先帝進賢退姦有大功於趙

氏特以親用外戚小人故負誇天下今太后初攝大政大臣忠厚如王曾清純如張知白剛正如魯宋道質直如薛奎者當信用之鄙猥如馮季良譏謔如羅崇勳者當疎遠之則天下服又上疏英宗言漢宣帝為昭帝後終不追尊衛太子史皇孫光武起布衣得天下自以為元帝後亦不追尊鉅鹿都尉南頓君惟定安桓靈皆自旁親入繼大統追尊其父祖天下非之願以為戒時公所得仁宗遺賜珠金直百餘萬率同列三上章言國有大憂中外窘乏不可專用乾典故事若遺不可辭則宜許侍從以上進金錢佐山陵費不許公乃以所得珠為諫院公使錢金以遺其舅氏義不藏於家英宗疾既平皇太后還政公上疏言治身莫先於孝治國莫先於公其言切至皆母子間人所難言者時有司立法皇太后有所取用有司奏覆得御寶乃供公極論以為不可當直下合同司移所屬立供如上所取已乃具數奏太后以防矯偽曹佺除使相兩府皆遷公言佺無功而得使相陛下以慰母心爾今兩府皆遷無名若以遷改為功則宿

衛將帥內侍小臣必有覬望已而都知任守忠等皆遷公復爭之因論守忠大姦陛下為皇子非守忠意沮壞大策離間有端賴先帝不聽及陛下嗣位反覆華面交構兩宮國之大賊人之巨蠹也斬於都市以謝天下詔以守忠為節度副使新州安置天下快之時有詔陝西刺民兵號義勇公上疏極論其害云康定慶歷間藉陝西民為鄉弓手已而刺為保捷指揮民被其毒兵終不可用過敵先北正兵隨之每致崩潰縣官知其坐食無用汰遣歸農而惰遊之人不能復反南畝強者為盜弱者轉死父老至今流涕也今義勇何以異此章六上不從乞罷諫官不許王廣淵除直集賢院公言廣淵姦邪不可近昔漢景帝為太子召上左右飲衛綰獨稱疾不行即帝位待綰有加周世宗鎮澶淵張美為三司吏掌州之錢穀世宗私求假美悉力應之及即位薄其為人不用今廣淵當仁宗之世私自結於陛下豈忠臣哉願黜之以厲天下執政建言濮安懿王德盛位隆宜有尊禮詔太常禮院與兩制議翰林學士王珪等相顧不敢先公

獨奮筆立議曰為之後者為之子不敢復顧其私親
今日所以崇奉濮安懿王典禮宜一準先朝封贈期
親尊屬故事高官大爵極其尊榮議成珪即敕吏以
公手藁為案至今存焉時中外詡詡御史呂誨傳亮
俞范純仁呂大防趙鼎趙瞻等皆爭之相繼降黜公
上疏乞留之不可則乞與之皆貶初西戎遣使致祭
而延州指使高宜押伴傲其使者侮其國主使者訴
於朝廷公與呂誨乞加宜罪不從明年西戎犯邊殺
略吏士趙滋為雄州專以猛悍治邊公亦論其不可

至是契丹之民有捕魚界河代祁白溝之南者朝廷
以知雄州李中祐為不材還將代之公言國家當戎
狄附順時好與之計較未節及其禁傲又從而姑息
之近者西戎之禍生於高宜北狄之隙起於趙滋朝
廷方賢此二人故邊臣皆以生事為能今若還將代
中祐則來者必以滋為法而以中祐為戒漸不可長
宜教邊吏疆場細故徐以文檄往反若輕以矢刃相
加者坐之京師大水公上疏論三事皆盡言無所隱
諱除龍圖閣直學士判流內銓改右諫議大夫知治

平四年貢舉神宗即位首擢公為翰林學士公力辭
不許上面諭公古之君子或學而不文或文而不學
惟董仲舒楊雄兼之卿有文學何辭焉公曰臣不能
為四六上曰如兩漢制詔可也公曰本朝故事不可
上曰卿能舉進士取高等而云不能四六何也公趨
出上遣內臣至閣門彊公受告拜而不受趣公入謝
曰上坐以待公公入至庭中以告置公懷中不得已
乃受遂為御史中丞初中丞王陶論宰相不押常朝
班為不臣宰相不從陶爭之力遂罷公既繼之言宰

相不押班細故也陶言之過然愛禮存羊則不可已
自頃宰相權重令陶復以言宰相罷則中丞不可復
為臣願俟宰相押班然後就職上曰可陶既出知陳
州謝章詵宰相不己執政議再貶陶公言陶誠可罪
然陛下欲廣言路屈己受陶而宰相獨不能容乎乃
已公上疏論修心之要三曰仁曰明曰武治國之要
三曰官人曰信賞曰必罰其說甚備且曰臣昔為諫
官即以此六言獻仁宗其後以獻英宗今以獻陛下
平生力學所得盡在是矣公在英宗時與君誨同論

祖宗之制勾當御藥院常用供奉官以下至內殿宗
班則出近歲居北位者皆暗理官資食其廩給非祖
宗大意又故事年未五十不得為內侍省押班今除
張茂則止四十八不可至是又言之因論高居簡姦
邪乞加遠竄章五上上為盡罷寄資內臣居簡以補
外未幾復留陳承禮劉有方二人公復爭之又言近
者王中正往陝西知涇州劉浹等誦事中正而鄜延
鈐轄吳舜臣違失其意已而浹等進擢舜臣降黜權
歸中正誇歸陛下是去一居簡得一居簡上手詔問

公所從知公曰臣得之賓客非一人言事之有無惟
陛下知之若無臣不敢避妄言之罪萬一有之不可
不察詔用官即直省官郭昭選等四人為各門祇候
公言國初草創天步尚艱故即位之始必以左右舊
人為腹心耳目謂之隨龍非平日法也閣門祇候在
文臣為館職豈可使廝役為之英宗山陵公為儀仗
使賜金五十兩銀合三百兩三上章辭從之邊吏上
西戎步將寇名山欲以橫山之衆取諒祚以降詔邊
臣招納其衆公上疏極論以為名山之衆未必能制

諒祚幸而勝之滅一諒祚生一諒祚何利之有若其
不勝必引衆歸我不知何以待之臣恐朝廷不獨失
信於諒祚又將失信於名山矣若名山餘衆尚多還
北不可入南不受窮無所歸必將突聚邊域以救其
命陛下獨不見僂景之事乎上不聽遣將神諤發兵
迎之取緱州費六十萬兩西方用兵蓋自是始矣兼
翰林侍讀學士登州有不成婚婦謀殺其夫傷而不
死者吏疑問即承知州事許遵識之有司當婦絞而
詔貸之遵上議準律因犯殺傷而自首者得免所因

之罪婦當減二等不當絞詔公與王安石議之安石
是遵公言謀殺猶故殺也皆一事不可分若謀為所
因與殺為二則故與殺亦可為二邪自宰相文彥博
以下皆附公議然卒用安石言至今天下非之權知
審官院百官上尊號公當答詔上疏言先帝親郊不
受尊號天下莫不稱頌末年有建言者國家與契丹
有往來書信彼有尊號而我獨無以為深耻於是群
臣復以非時上尊號昔漢文帝時單于自稱天地所
生日月所置匈奴大單于不聞文帝復為大名以加

之也願陛下追用先帝本意不受此名上大悅手詔
答公非卿朕不聞此言著為答嗣使中外曉然知朕
至誠非欺衆數名者遂終身不復受尊號執政以河
朔災傷國用不足乞今歲親郊兩府不賜金帛送學
士院取旨公言兩府所賜以匹兩計止二萬未足以
救災宜自文臣兩省武臣宗室判史以上皆減半公
與學士王珪王安石同對公言救災節用宜自貴近
始可聽兩府辭賜安石曰常衮辭賜饌時議以為衮
自知不能當辭位不當辭祿且國用不足非當今之
急務也公曰衮辭祿猶賢於持祿固位者國用不足
真急務安石言非是安石曰不足者以未得善理財
者故也公曰善理財者不過頭會箕歛以盡民財民
窮為盜非國之福安石曰不然善理財者不加賦而
上用足公曰天下安有此理天地所生財貨百物止
有此數不在民則在官譬如雨澤憂澇則秋旱不加
賦而上用足不過設法陰奪民利其害甚於加賦此
乃桑洪羊欺漢武帝之言太史公書之以見武帝不
明爾至其末年盜賊蠭起幾至於亂若武帝不悔禍

昭帝不變法則漢幾亡爭議不已王珪進曰救災節
用宜自貴近始司馬光言是也然所費無幾恐傷國
體王安石言於是惟明主裁擇上曰朕意與光同然
姑以不允答之會安石當制遂引常充事責兩府兩
府亦不復辭兼史館修撰上問公可為諫官者公薦
呂誨誨以天章閣待制知諫院詔公與張茂則同相
視二股河及土堤利害公用都水監丞宋昌言策乞
於二股之西置土堤約水東流若東流日深北流自
淺新舊漸備乃塞其北放出御河胡蘆河下流以紓
恩冀深瀛以西之患時議者多不同公於上前反覆
論難甚苦卒從之後皆知公言賜詔獎諭王安石始
為政創立制置三司條例同建為青苗助役水利均
輸之政置提舉官四十餘員行其法於天下謂之新
法公上疏逆陳其利害曰後當如是行之十餘年無
一不如公言者天下傳誦以為公真宰相雖田夫野
老皆號公司馬相公而婦人孺子知其為君實也邇
英進讀至蕭何曹參事公曰參不變何法得守成之
道故孝惠高后時天下晏然衣食滋殖上曰漢帝守

蕭何之法不變可乎公曰何獨漢也使三代之君常守禹湯文武之法雖至今存可也武王克商曰乃反商政政由舊然則雖周亦用商政也書曰無作聰明亂舊章漢武帝用張湯言取高帝法紛更之盜賊半天下元帝改宣帝之政而漢始衰由此言之祖宗之法不可變也後數日呂惠卿進講因言先王之法有一年一變者正月始和布法象魏是也有五年一變者巡狩考制度是也有三十年一變者刑罰世輕世重是也有百年不變者父慈子孝兄友弟恭是也前日光言非是其意以諷朝廷且議臣為條例司官爾上問公惠卿言何如公曰布法象魏布舊法也何名為變若四五月朔屬民讀法為時變月變耶諸侯有變禮易樂者王巡守則誅之王不自變也刑新國用輕典亂國用重典平國用中典是為世輕世重非變也且治天下譬如居室弊則修之非大壞不更造也大壞而更造非得其良匠美材不成今二者皆無有臣恐風雨之不庇也公卿侍從皆在此願陛下問之三司使掌天下財才而黜可也不可使兩府侵其

事今為制置三司條例司何也宰相以道佐人主安用例苟用例而已則胥吏足矣今為看詳中書條例司何也惠卿不能對則詠公曰光為侍從何不言言而不從何不去公作而答曰是臣之罪也上曰相與論是非爾何至是講畢賜坐戶外將出上命從坐戶內左右皆避去上曰朝廷每更一事舉朝詆詆何也王珪曰臣疏賤在闕門之外朝廷之事不能盡知階使聞之道路又不知其虛實也上曰聞則言之公曰青苗出息平民為之尚能以蠶食下戶至飢寒流離況縣官法度之威乎惠卿曰青苗法願取則與之不願不強也公曰愚民知取債之利不知還債之害非獨縣官不強富民亦不強也公聞作法於涼其弊猶貪作法於貪弊將若之何惠太宗平河東立和糴法時米斗十餘錢草吏八錢民樂與官為市其後物貴而和糴不解遂為河東世世患臣恐異日之青苗猶河東之和糴也上曰陝西行之久矣民不以為病公曰臣陝西人也見其病不見其利朝廷初不許也而有司尚能以病民況立法許之乎上曰坐倉糴米何

如坐者皆起而不使上已罷之幸甚上曰未罷也公曰京師有七年之儲而錢常乏若坐倉錢益乏米益陳奈何惠卿曰坐倉得米百萬斛則省東南百萬之漕以其錢供京師何患無錢公曰東南錢荒而米狼戾今不糴水而漕錢棄其有餘取其所無農未皆病矣侍講吳中起曰光言至論也公曰此皆細事不足煩人主但當擇人而任之有功則賞有罪則罰此則陛下職也上曰然文王罔攸兼于庶言庶獄庶慎惟

有司之牧夫公趨出上曰卿得無以惠卿之言不樂

乎公曰不敢韓琦上疏論青苗之害上感悟欲罷其法安石稱疾求去會拜公樞密副使公上章力辭至六上曰上誠能罷制置條例司追還提舉官不行青苗助役等法雖不用臣臣受賜多矣不然終不敢受命上遣人謂公樞密兵事也官各有職不當以他事為辭公言臣未受命則猶侍從也於事無不可言者安石起視事青苗法卒不罷公亦卒不受命則以書命安石三往返開喻若至猶幸安石之聽而改之且曰巧言令色鮮矣仁彼忠信之士於今當路時雖難

語可憎後必徐得其力諂諛之人於今誠有順適之快一旦失勢必有責公以自售者意謂呂惠卿對賓客輒指言之曰覆王氏者必惠卿也小人本以利合勢傾利移何所不至其後六年而惠卿叛安石上書告其罪苟可以覆王氏者靡不為也由是天下服公先知公求補外上猶欲用公公不可以端明殿學士

出知永興軍朝辭進對獨乞免本路青苗助役宣撫使下今分義勇四番欲以更戍邊遠諸軍驍勇募閭

里惡少為奇兵調民為乾糧數飯雖內郡不被邊皆修城池樓櫓如邊郡且遣兵就糧長安河中邠三輔騷然公上疏極言方凶歲公私困弊不可舉事而永興一路城池樓櫓皆不急乾糧飯昔常造後無用府庫之宣撫司令臣皆未敢從若乏軍興臣坐之於是一路獨得免頃之詔移知許州不赴遂乞判西京留司御史臺以歸自是絕口不論事以祀明堂恩加上柱國至熙寧七年上以天下早蝗詔求直言公讀詔泣下欲默不忍乃復陳六事一青苗二免役三市易四邊事五保甲六水利此先病民七宜先罷又以

書責宰相吳充天子仁聖如此而公不言何也元豐
五年公忽得語溫疾自疑當中風乃豫作遺表大略
如六事加詳盡感深親書藏封置卧內且死當以授
所善范純仁范祖禹使上之凡居洛十五年再任留
司御史臺四任提舉崇福宮官制行改太宗大夫加
資政殿學士神宗崩公赴闕臨衛士見公入皆以手
加額曰此司馬相公也民遮道呼曰公無歸洛留相
天子活百姓所在數千人聚觀之公懼會放辭謝遂
徑歸洛太皇太后聞之詰問主者遣使勞公問所當

先者公言近歲士大夫以言為諱閭閻愁苦於下而
上不知明主憂勤於上而下無所訴此罪在羣臣而
愚民無知歸怨先帝宜下詔首開言路從之下詔榜
朝堂而當時有不從者於詔語中設六事以禁切言
者曰若陰有所懷犯非其分或扇搖機事之重或迎
合已行之令上以觀望朝廷之意以使倖希進下以
眩惑流俗之情以干取虛譽若此者必對無赦太皇
太后封詔單以問公公曰此非求諫乃拒諫也人臣
惟不言言則入六事矣時太府少卿宋彭年水部員

外郎王諤皆應詔言事有欲借此二人以懲天下言
者皆以非職而言贖銅三十斤公具論其情且請改
賜詔書行之天下從之於是四方吏民言新法不便
者數千人公方草具所當行者而太皇太后已有旨
教遣修京城役夫罷減皇城內規者止御前工作出
近侍之無狀者三十餘人或敕中外無敢苛刻暴斂
廢導洛司物貨場及民所養戶馬寬保馬限皆從中
出大臣不與公上疏謝當今急務陛下略已行之矣
小臣稽慢罪當萬死詔除公知滁州且過闕入見使

者勞問相望於道至則拜門下侍郎公力辭不許數
賜手詔先帝新棄天下天子冲幼此何時而君辭位
耶公不敢復辭以章恩遷通議大夫初神宗皇帝以
英偉絕人之資勵精求治凜凜乎漢宣帝唐太宗之
上矣而宰相王安石用心過當急於功利小人得乘
間而入呂惠卿之流以此得志後者慕之爭先相高
而天下病矣先帝明聖獨覺其非出安石金陵天下
依然意法必變雖安石亦自悔恨其去而復用也彼
稍自改而惠卿之流恐法變身危持之不肯改然先

帝終疑之遂還安石八年不復召而惠卿亦再逐不用元豐之末天下多故及二聖嗣位日夜引領以觀新政而進說者以為三年無改於父之道欲稍損其甚者毛舉數事以塞人言公慨然爭之曰先帝之法其善者雖百世不可變也若安石惠卿等所建為天下害非先帝本意者改之當如以焚極溺猶恐不及昔漢文帝除肉刑斬左趾者棄市笞五百者多死景帝元年既改之武帝作鹽鐵榷沽均輸等法昭帝罷之唐代宗縱宦官公求賂遺置客省拘滯四方之人德宗立未三月罷之德宗晚年為宮市五坊小兒暴橫鹽鐵月進羨餘順宗即位罷之當時悅服後世稱頌未有或非之者也況太皇太后以母改子非子改父衆議乃定公以為治亂之機在於用人邪正一分則消長之勢自定每論事必以人物為先凡所進退皆天下所謂當然者然後朝廷清明人主始得聞天下利害之實遂罷保甲團教依義勇法歲二閱保馬不復買見在者還盡收給諸軍廢市易法所儲物皆鬻之不取息而民所欠錢皆除其息京東鑄錢錢河

北江西福建湖南鹽及福建茶法皆復其舊獨川陝茶以違用未即罷遣使親視去其甚者戶部左右曹錢穀皆領之尚書凡昔之三司使事有數額五曹及寺監者皆歸戶部使尚書周知其數量入以為出於是天下釋然曰此先帝本意也非吾君之子不能行吾君之意時獨免役青苗將官之法猶在而西戎之議未決也山陵畢遷公正議大夫公自以不與顧命不敢當詔不許元祐元年正月公始得疾詔公與尚書左丞呂公著朝會與執政異班再拜而已不舞蹈公疾益甚嘆曰四患未除吾死不瞑目矣乃力疾上疏論免役五害乞直降敕罷之率用熙寧以前法有未便州縣監司節級以聞為一路一州一縣法詔即日行之又論西戎大略以和戎為使用兵為非時異議者甚衆公持之益堅其後太師文彥博議與公合衆不能奪又論將官之害詔諸將兵皆隸州縣軍政要守令通決之又乞廢提舉常平司以其事歸之轉運使及提點刑獄公謂監司多新進少年務為刻急天下病之乞自太中大夫待制以上於郡守中舉轉

運使提點刑獄於通判中舉轉運判官又以文學德行吏事武畧等為十科求天下遺材命文臣陞朝以上歲舉經明行脩一人以為進士高選皆從之拜左僕射疾稍閒將起視事詔免朝覲許以肩輿三日一入都堂或門下尚書省公不敢當曰不見君不可以視事詔公肩輿至內東門子康扶入對小殿且曰母拜公惶恐入對延和殿再拜遂罷青苗錢專行常平糴糴法以歲上中下熟為三等穀賤及下等則增價糴貴及上等則減價糴惟中則否及下等而不糴及

上等而不糴皆坐之時三聖恭儉慈孝視民如傷虛己以聽公公知無不為以自任天下之責數月復病以九月丙辰朔薨于西府享年六十八太皇太后聞之慟上亦感涕不已時方躬祀明堂禮成不賀二聖皆臨其喪哭之哀甚輟視朝贈太師溫國公謚必一品禮服賜銀三千兩絹四千疋賜龍腦水銀以斂命戶部侍郎趙瞻入內侍省押班馮宗道護其喪歸葬夏縣官其親族十人公忠信孝友恭儉正直出於天性自少及老語未嘗妄其好學如飢之嗜食於財利

紛華如惡惡是誠心自然天下信之退居於洛往來陝郊邠洛間皆化其德師其學法其儉有不善曰君實得無知之乎博學無所不通音樂律歷天文書教皆極其妙晚節尤好禮為冠婚喪祭法適古今之宜不喜釋老曰其微言不能出吾書其誕吾不信不事生產買第洛中僅庇風雨有田三頃喪其夫人質田以葬惡衣菲食以終其身自以遭遇聖明言聽計從以身徇天下躬親庶務不舍晝夜賓客見其體羸曰諸葛孔明三十罰以上皆親之以此致疾公不可以

不戒公曰死生命也為之益力病革諄諄不復自覺如夢中語然皆朝廷天下事也既沒其家得遺奏八紙上之皆手札論當世要務京師民畫其像刻印鬻之家置一本飲食必祝焉四方皆遣人購之京師時畫工有致富者有文集八十卷資治通鑑三百二十四卷考異三十卷歷年圖七卷通歷八十卷稽古錄二十卷本朝百官公卿表六卷翰林詞草三卷註古文孝經一卷易說三卷註繫辭二卷註老子道德論二卷集註太元經八卷大學中庸義各一卷集註揚

子十三卷文中子傳一卷河外路目三卷書儀八卷
家範四卷續詩話一卷遊山行記卜二卷醫問二篇
其文如金玉穀帛藥石也必有過於用無益之文未
嘗一語及之初公患歷代史繁重學者不能綜況於
人主遂約戰國至秦二世如左氏體為通志八卷以
進英宗悅之命公續其書置局秘閣以其素所賢者
劉祁劉恕范祖禹為屬官凡十九年而成起周威烈
王訖五代上下一千三百六十二載其是非疑似之
間皆有辨論一事而數說者必考合異同而歸之一

作者異以志之神宗尤重其書以為賢於荀悅親為
製敕賜名資治通鑑詔通英讀其書賜類即舊書二
千四百二卷書成拜資政殿學士賜金帛甚厚娶張
氏禮部尚書存之女封清河郡夫人先公卒追封溫
國夫人子三人童唐皆早亡康令為秘書省校書郎
孫二人植栢皆承奉郎公歷事四朝皆為人主所敬
然神宗知公最深公思有以報之常誦孟子之言曰
責難於君謂之恭陳善閉邪謂之敬謂吾君不能謂
之賊故雖議論違忤而神宗識其意待之愈厚及拜

資政殿學士蓋有意復用公也夫復用公者豈徒然
哉將必行其所言公亦識其意故為政之日自信而
不疑嗚呼若先帝可謂知人矣其知之也深公可謂
不負所知矣其報之也大軾從公遊二十年知公平
生為詳故錄其大者為行狀其餘非天下所以致治
亂安危者皆不載

程伯淳行狀

宋程頤

曾祖希振皇任尚書虞部員外郎妣高密縣君崔氏
祖適皇贈開府儀同三司吏部尚書妣孝感縣太君
張氏長安縣太君張氏父珣見任太中大夫致仕母
壽安縣君侯氏先生名顥字伯淳姓程氏其先曰喬
伯為周大司馬封於程後遂以為氏先生五世而上
居中山之博野高祖贈太子少師諱羽太宗朝以輔
翊功顯賜第於京師居再世曾祖而下葬河南今為
河南人先生生而神氣秀異於常兒未能言叔祖

母任氏太君抱之行不覺釵墜後數日方求之先生
以手指示隨其所指而往果得釵人皆驚異數歲誦
詩書強記過人十歲能為詩賦十二三時群居庠序
中如老成人見者無不受重故戶部侍郎彭公思永
謝客至學舍一見異之許妻一女踰冠中進士第調
京兆府鄠縣主簿令以其年少未知之民有借其兄
宅以居者掘地中藏錢兄之子訴曰父所藏也今曰
此無證佐何以決之先生曰此易辨爾問兄之子曰
爾父藏錢幾何時矣曰四十年矣彼借宅居幾何時

矣曰二十年矣即遣吏取錢十千視之謂借宅者曰
今官所鑄錢不五六年間即遍天下此錢皆爾未藏
前數十年所鑄何也其人遂服令大奇之南山僧舍
有石佛歲傳其首放光遠近男女聚觀晝夜難處為
政者畏其神莫敢禁止先生始至詰其僧曰吾聞石
佛歲現光有諸曰然戒曰俟復現必先白吾職事不
能往當取其首就觀之自是不復有光矣府境水害
倉卒興役諸邑率皆狼狽惟先生所部飲食芟舍無
不安使時盛暑泄利大行死亡甚衆獨鄠人無死者

先生治役人不勞而事集常謂人曰吾之董役乃治
軍法也當路者欲為之多問所欲先生曰為士當以
才之所堪不當問所欲再尋以避親寵再調江寧府
上元縣主簿田稅不均比他邑尤甚蓋近府美田為
貴家富以厚價薄其稅而買之小民苟一時之利久
則不勝其弊先生為令畫法民不知擾而一邑大均
其始富者不便多為浮論欲搖止其事既而無一人
敢不服者後諸路行均稅法邑官不足益以他官經
歲歷時文案山積而尚有訴不均者計其力比上元

不啻千百矣會令罷去先生攝邑事上元劇邑訴訟
日不下二百為政者疲於省覽奚暇及治道先生處
之有方不閱月民訟遂簡江南稻田田類陂塘以溉
盛夏塘堤大決計非萬夫不可塞法當言之府府稟
於漕司然後計功調役非月餘不能興作先生曰此
如是苗稿矣民將何食救民獲罪所不辭也遂發民
塞之歲則大熟江寧當水運之衝舟卒病者則留之
為營以處曰小營子歲不下數百人至者輒死先生
察其田蓋既留然後請於府給券乃得食比有司文
具則困於飢已數日矣先生曰漕司給米貯營中至
者與之食自是全生者大半措至於藏穀之間而人
已受賜如此之比所至多矣先生常云一命之士苟
存心於愛物於人必有所濟仁宗登遐遺制官吏咸
服三日而除二日之朝府尹率群官將釋服先生進
曰三日除服遺詔所命莫敢違也請盡今日若朝而
除之所服止二日爾尹怒不從先生曰公自除之某
非至夜不敢釋也一府相視無敢除者茅山有龍池
其醜如蟬蛸而五色祥符中中使取二龍至中途中

使奏一龍飛空而去自昔嚴奉以為神物先生嘗捕
而脯之使人不惑其始至邑見人持竿道旁以粘飛
鳥取其竿折之教之使勿為及罷官艤舟郊外有數
人共語自主簿折粘竿鄉民子弟不敢畜禽鳥不嚴
而今行大率如此再春就移澤州晉城縣令澤人淳
原尤服先生救命民以事至邑者必告之以孝悌忠
信入所以事父兄出所以事長上度鄉材遠近為保
伍使之力役相助患難相恤而嘉偽無所容凡孤容
殘廢者責之親戚鄉黨使無失所行旅出於其途者
疾病皆有所養諸鄉皆有校暇則親至召父老而與
之語兒童所讀書親為正句讀教者不善則為易置
俗始甚野不知為學先生擇子弟之秀者聚而教之
去邑纔十餘年而服儒服者蓋數百人矣鄉民為社
會為立科條旌別善惡使有勸有耻邑幾為室三年
之間無疆盜及鬪死者秋滿代者且至吏夜叩門稱
有教人者先生曰吾邑安有此誠有之必某村其人
也問之果然家人驚異問何以知之曰吾常疑此人
惡少之弗華者也河東財賦窘迫官所科買歲為民

志雖至賤之物至官取之則其價翔踴多者至數十倍先生常度所需使富家預儲定其價而出之富至不大倍息而鄉民所費比常歲十不過二三民稅常移近遠載往則道遠就輟則價高先生擇富民之可任者預使購粟遠郡所費大省民力用舒縣庫有雜納錢數百千常借以補助民力部使者至則告之曰此錢令自用而不敢私請一切置不問使者屢更無不從者先時民憚差役及則互相糾許鄉鄰為仇先生盡茹民產厚第其先後按籍而命之無有辭

者河東義勇農隙則教以武事然應文備數而已先生至晉城之民遂為精兵晉俗尚焚屍雖孝子慈孫習以為安先生教諭禁止民始信之而先生去後郡官有母死者憚於遠致投諸烈火愚俗視微先生之教遂廢識者恨之先生為令視民如子欲辦事者或不持牒徑至庭下陳其所以先生從容告語諄諄不倦在邑三年百姓愛之如父母去之日哭聲震野用為者改著作佐郎尋以御史中丞呂公著薦授太子中允權監察御史裏行神宗素知先生名召對之

日從容咨訪比二三見遂期以大用每將退必曰頻求對來欲常相見爾一日論議甚久日官報午正先生遽求退庭中中人相謂曰御史不知上未食耶前後進說甚多大要以正心室欲求賢育才為先生不辭辯獨以誠意感動人主神宗嘗使推擇人材先生所薦者數十人而以父表弟張載暨弟頤為首所上章疏子姪不得窺其藁嘗言人主當防未萌之欲神宗俯身拱手曰當為卿戒之及因論人才曰陛下奈何輕天下士神宗曰朕何敢如是言之至于再三

時王荊公安石日益信用先生每逢見必為神宗陳君道以至誠仁愛為本未嘗及功利神宗始疑其迂而禮貌不衰嘗極陳治道神宗曰此堯舜之事朕何敢當先生慨然曰陛下此言天下之福也荊公愛行其說先生意多不合事出必論列數月之間章數十上尤極論輔臣不同心小臣與大計公論不行青苗取息責祠部牒差提舉官多非其人及不經封駁京東轉運司判民布罷不加照責與利之臣日進尚德之風浸衰等十餘事判公與先生雖道不同而常謂

先生忠信先生每與論事心平氣和荆公多為之動
而言路好直者必欲力攻取勝由是與言者為敵矣
先生言既不行懇求外補神宗猶重其去上章及面
請至十數不許遂闔門待罪神宗將黜諸言者命執
政除先生監司差權發遣京西路提點刑獄復上章
曰臣言是願行之如其妄言當賜顯責清罪而獲遷
刑賞混矣累請得罷既而神宗手批暴白同列之罪
獨於先生無責改差簽書鎮寧軍節度判官事為守
者嚴刻多忌通判而下莫敢與辦事始意先生嘗任
臺憲必不盡力職事而又慮其慢已既而先生事之
甚恭維筦庫細務無不盡心事小未安必與之辨遂
無不從者相與甚歡屢平反重獄得不死者蓋前後
以十數河清卒於法不他役時中人程昉為外都水
丞怙勢蔑視州郡欲盡取諸婦兵治二股河先生以
法拒之昉請於朝命以八百人與之天方太寒昉肆
其虐用衆逃而歸州官晨集城門吏報河清兵潰歸
將入城象官相視畏昉欲弗納先生曰此逃死自歸
弗納必為亂昉有言某自當之即親往開門撫諭約

歸休三日復役衆歡呼而入具以事上聞得不復遣
後昉奏事過州見先生言甘而氣攝既而揚言於衆
曰漕卒之潰乃程中允誘之吾必訴於上同列以告
先生笑曰彼方憚我何能爾也果不敢言會曹材埽
決時先生方薨小吳相去百里州帥劉忠渙以事急
告先生一夜馳至帥後於河橋先生謂帥曰曹材決
京師可虞臣子之分身可塞亦為之請盡以廂卒見
付事何不某公當親率禁兵以繼之帥義烈士遂以
奉鎮印授先生曰君自用之先生得印不暇入城省
親徑走決堤諭士卒曰朝廷養爾輩正為緩急爾爾
知曹材決則注京城乎吾與爾曹以自捍之衆皆奮
激自効論者皆以為勢不可塞徒勞人爾先生命善
涸者用細繩以度決口水方奔注達者百一卒能引
大索以濟衆兩岸並進晝夜不息數日而合其將舍
也有大水自中流而下先生顧謂衆曰得彼巨木橫
流入口則吾事濟矣語纔已木遂橫衆以為至誠所
至其後曹材之下復決遂久不塞數路困擾大為朝
廷憂人以為使先生在職安有是也郊祀需恩先生

曰吾罪滌矣可以去矣遂求監局以便親養得罷歸
自是配正者競揚遷新法之說歲餘得監西京洛河
竹木務薦者言其未嘗叙年勞丐遷秩改太常丞神
宗猶念先生會脩三經義嘗語執政曰程某可用執
政不對又嘗有登對者自洛至問曰程某在彼否連
言佳士其後遂見翼軫問詔求直言先生應詔論朝
政極切還朝執政屢進擬神宗皆不許既而手批與
府界知縣差知扶溝縣事先生詣執政復求監當執
政諭以上意不可改也數月右府同為除判武學新

進者言其新法之初首為異論罷復舊任先生為治
專尚寬厚以教化為先雖若甚迂而民實風動扶溝
素多盜雖樂歲疆盜不減十餘發先生在官無疆盜
者幾一年廣濟蔡河出縣境潁河不逞之民不復治
生業專以脇取舟人物為事歲必焚舟十數以立威
先生始至捕得一人使引其類得數十人不復根治
舊惡分地而處之使以挽舟為業且察為惡者自是
邑境無焚舟之患幾邑田稅重朝廷常蠲除以為惠
澤然而良善之民憚督責而先輸逋負獲除者皆頑

民也先生為約前料獲免者今必如期而足於是惠
澤始均司農建言天下輸役錢達戶四等而畿內獨
正第三請亦及第四先生力陳不可司農奏其議謂
必獲罪而神宗是之畿邑皆得免先生為政常權穀
價不使至甚貴甚賤會大旱麥苗且枯先生教人掘
井以溉一井不過數工而所灌數畝閭境賴為永災
民饑先生請發粟貸之鄰邑亦請司農怒遣使閱實
使至鄰邑而令速自陳穀且登無貸可也使至請先
生蓋亦自陳先生不肯使者遂言不當貸先生力言

民饑請貸不已遂得穀六千石饑者用濟而司農益
怒視貸籍戶同等而所貸不等檄縣杖主吏先生言
濟飢當以口之寡寡不當以戶之高下且令實為之
非吏罪乃得已內侍都知王中正巡閱保甲權寵至
盛所至陵惕縣官諸邑供帳競務華鮮以悅奉之主
吏以請先生曰吾邑貧安能效它邑且取於民法所
禁也今有故青帳可用之先生在邑歲餘中正往來
境上卒不入鄰邑有冤訴府願得先生決之者前後
五六有犯小盜者先生謂曰汝能改行吾薄汝罪盜

叩首願自新後教月復穿窬捕吏及門盜告其妻曰
我與大丞約不復為盜今何面目見之耶遂自經官
制改除奉議郎朝廷遣官括收地民田當沒者千頃
往往持累世部券以自明皆弗用諸邑定而扶溝民
獨不服遂有朝旨改稅作租不服加益及聽賣易如
私田民既倦於追呼又得不加賦乃皆服先生以為
不可括地官至請先生曰民願服而君不許何也先
生曰民徒知今日不加賦而不知他日增租奪田則
失業無以生矣因為言仁厚之道其人感動謝曰寧
受責不敢違公遂去之他邑不踰月先生罷去其人
復至謂攝令曰程奉議去矣爾復何恃而敢督留詔
旨督責甚急數日而事集鄰邑民犯盜繫縣獄而逸
既又過赦先生坐是以特旨罷邑人知先生且罷詣
府及司農乃留者千數去之日不使人知老釋數百
追及境上攀挽號泣遣之不去以親老求近鄉監局
得監汝州酒稅今上嗣位卑恩改承議郎先生雖小
官賢士大夫視其進退以下興衰聖政方新賢德登
進先生特為時望所屬召為宗正寺丞未行以疾終

元豐八年六月十五日也享年五十有四士大夫識
與不識莫不哀傷為朝廷生民恨惜先生資稟既異
而充養有道純粹如精金溫潤如良玉寬而有制和
而不流忠誠貫於金石孝悌通於神明視其色其接
物也如春陽之溫聽其言其入人也如時雨之潤身
懷洞然徹視無間測其蘊則浩乎若滄溟之無際極
其德美言蓋不足以形容先生行己內主於敬而行
之以恕見善若出諸己不欲弗施於人居廣居而行
大道言有物而動有常先生為學自十五六時聞汝
南周茂叔論道遂厭科舉之業慨然有求道之志未
知其要泛濫於諸家出入於老釋者幾十年迄求諸
六經而後得之明於庶物察於人倫知盡性至命必
本於孝悌窮神知化由通於禮物辨異端似是之非
開百代未明之惑秦漢而下未有臻斯理也謂孟子
沒而聖學不傳以興起斯文為己任其言曰道之不
明異端害之也昔之害近而易知今之害深而難辨
昔之惑人也乘其迷暗今之入人也因其高明自謂
之窮神知化而不足以問物成務言為無不周遍賢

則外於倫理窮深極微而不可以入堯舜之道天下之學非淺陋固滯則必入於此自道之不明也邪誕妖異之說競起塗生民之耳目溺天下於汙濁雖高才明智膠於見聞醉生夢死不自覺也是皆正路之荼蕪聖門之蔽塞開之而後可以入道先生進將覺斯人退將明諸書不幸早世皆未及也其辨析精微稍見於世者之所傳爾先生之門學者多矣先生之言平易知賢愚皆獲其益如群飲於河各充其量先生教人自致知至於知止誠意至於平天下洒掃

應對至於窮理盡性循循有序病世之學者捨近而趨遠處下而闢高所以輕自大而卒無得也先生接物辨而不間感而能通教人而人易從怒人而人不怨賢惡善惡咸得其心狡偽者獻其誠暴慢者致其恭聞風者誠服觀德者心醉雖小人以趨嚮之異類於利害時見排斥退而省其私未有不以先生為君子也先生為政治惡以寬處煩而裕當法令繁寡之際未嘗從衆為應文進責之事人皆病於拘礙而先生處之綽然衆憂以為甚難而先生為之沛然雖當

倉卒不動聲色方監司競為嚴急之時其待先生率皆寬厚施設之際有所賴焉先生所為綱條法度人可効而為也至其道之而從動之而和不求物而物應未施信而民信則人不可及彭夫人封仁和縣君嚴正有禮奉舅以孝稱善睦其族先一年卒子曰端懿蔡州汝陽縣主簿曰端本治進士業女適假承務郎未純之卜以今年十月乙酉葬于伊川先塋謹書家世行業及歷官行之大槩以求誌於作者

李延平先生行狀

宋 朱 熹

先生諱侗字愿中姓李氏南劍州劍浦人曾祖諱幹
宅田郎中致仕贈金紫光祿大夫妣清源郡太夫人
朱氏祖諱懋朝散大夫贈中奉大夫妣永嘉郡太君
胡氏或寧郡太君朱氏父渙朝奉郎贈右朝議大夫
妣太夫人饒氏先生朝議公之季子也生有異稟幼
而穎悟少長孝友謹篤朝議公太恭人特所鍾愛既
冠遊鄉校有聲稱已而聞郡人羅仲素先生得河洛
之學於龜山楊文靜公之門遂往學焉羅公清介絕

俗雖里人鮮克知之見先生從遊受業或頗非笑先
生若不聞從之累年受春秋中庸語孟之說從容借
玩有會於心盡得其所傳之奧羅公少然可亟深許
焉於是退而屏居山田結茅水竹之間謝絕世故餘
四十年第數屢空怡然自適中間罷將學官聞其名
而招致之或遣子弟從遊受學州郡士子有以矜式
焉脫以二子舉進士試吏考罷更請迎養先生不得
已為一行自建安如鉛山訪外家兄弟于昭武遇其
門弟子故人于武夷溪潭之上徜徉而歸會閩帥王

山汪公以書禮事乘來迎蓋將相與講所疑焉先生
因往見之至之日疾作遂卒於府治之館舍是年七
十有一矣隆興元年十月十有五日也汪公為建泰
議官王君伯序觀察推官謝君倣護喪事躬視棺殮
禮意喪具無不周悉居數日諸子畢至遂以喪歸先
生娶魏吳氏子男三人友直左修職郎信州鉛山縣
尉信甫左修職郎建寧府建安縣主簿友聞未仕女
一人早亡孫男四人女八人皆幼初龜山先生倡道
東南士之遊其門者甚衆然語其潛思力行任重詣

極如羅公者蓋一人而已先生既從之學講誦之餘
危坐終日以驗夫喜怒哀樂未發之前者氣象為如
何而求所謂中者若是者蓋久之而知天下之大本
直有在乎是也蓋天之理無不由是而出既得其本
則凡出于世者雖品節高殊曲折萬變莫不該攝洞
貫以次融釋而各有條理如川流脈絡之不可亂大
而天地之所高厚細而品類之所以化育以至於經
訓之微言日用之小物析之於此無一不得其喪焉
由是操存益固涵養益熟精明純一觸處洞然泛應

曲酬發必中節故其事親誠孝左右無違仲兄性剛
多忤先生事之致誠盡敬更得其確心焉閨門內外
夷愉肅穆若無人聲而衆事自理與族姻舊故恩意
篤厚久而不忘生事素薄然處之有道量入為出賓
祭謹飭租賦必為鄰里先親戚不能婚嫁為之經理
節衣食以賑助之與鄉人處飲食言笑終日油油如
也年長者事之盡禮少者賤者接之各盡其道以故
鄉人愛敬暴悍化服其接後學答問窮晝夜不倦隨
人淺深誘之各不同而要以及身自得而可以入於

聖賢之域故其言曰學問之道不在多言但默坐澄
心體認天理若見雖一毫私欲之發亦退聽矣久久
用力于此庶幾漸明講學始有力耳又嘗曰學者之
病在於未有灑然冰解凍釋處縱有力持守不過苟
免顯然悔尤而已若此者恐未足道也又嘗曰今人
之學與古人之學異如孔門諸子群居終日交相切
磨又得夫子為之依歸日用之間觀感而化者多矣
恐於融釋而脫落處非言說所及也不然子貢何以
言夫子之言性與天道不可得而聞也耶嘗以黃太

史稱濂溪周夫子胸中灑落如光風霽月云者為善
形容有道者氣象嘗諷誦之而顧謂學者日存此于
胸中庶幾遇事廓然而義理少進矣其語中庸曰聖
門之傳是書其所以開悟後學無遺策矣然所謂喜
怒哀樂未發之謂中者又一篇之指要也若徒記誦
而已則亦奚以為哉必也體之於身實見是理若顏
子之叢卓然見其為一物而不違乎心目之間也然
後擴充而往無所不通則庶乎其可以言中庸矣其
語春秋曰春秋一事各是發明一例如觀山水徒步

而行勢不同不可拘以一法然所以難言者蓋以常
人之心推測聖人未到聖人灑處豈能無失耶其於
語孟他經無不貫達苟有疑問答之必極其趣然語
之而不惰者或寡矣蓋嘗曰讀書者知其所言莫非
吾事而即吾身以求之則凡聖賢所至而吾所未至
皆可勉而進矣若直以文字求之悅其詞義以資誦
說其不為玩物喪志者幾希以故未嘗為講解文書
然其辨析精微毫釐畢察嘗與問者曰講學切在深
潛緝密然後氣味深長蹊徑不差若槩以理一而不

察乎其分之殊此學者所以流於疑似亂真之說而不自知也其間端示人大要類此先生姿稟勁特氣節豪邁而克養完粹無復圭角精純之氣達於面目色溫言厲神定氣和語默動靜端詳閑泰自然之中若有成法平居恂恂於事若無甚可否及其酬酢事變斷以義理則有截然不可犯者蚤歲聞道即棄場屋超然遠引若無意於當世然憂時論事感激動人其語治道必以明天理正人心崇節義厲廉耻為先本未備具可舉而行非特空言而已異端之學無所於入其心然一聞其說則知其誠淫邪道之所以然者蓋辨之於錙銖渺忽之間而儒釋之邪正分矣熹先君子與先生為同門友雅敬重焉嘗與沙縣鄧迪天啓語及先生節曰愿中如水壺秋月瑩徹無瑕非吾曹所及先君子深以為知言亟稱道之其後熹載從先生遊每一去而復來則所聞必益超絕蓋其上達不已日新如此嗚呼若先生之道德純備學術通明求之當世始絕倫比然不求知於世已未嘗輕以語人故上之人既莫知之而學者亦莫之識是以進

不獲施之於世退未及傳之於後而先生方且玩其所安樂者於畎畝之中悠然不知老之將至蓋所謂依乎中庸邈世不見知而不悔者先生庶幾焉比年以來學者始益親而方伯連帥之賢者又樂聞其道而邀致之其意豈徒然哉不幸天喪斯文而先生沒矣龜山之所聞於程夫子而授之羅公者至是而不得其傳矣嗚呼痛哉諸子方謀寔空之事謂熹承學之久宜知先生之蘊使其其事以請銘於作者將勒諸幽堂以告後世知德者有以致焉熹愚不肖蒙被教育不為不久聽其言觀其行而服膺焉不為不詳然未能有以得其遠者大者故悉取凡聞見所及一二書之詞若煩而不敢殺者蓋有待于筆削云耳謹狀

翰林學士承旨董公行狀

元虞集

公諱文用字彥材真定路藁城縣人元帥公第三子也公生十年元帥公死王事于歸德母李夫人治家嚴伯兄忠獻公文炳教諸弟有法公內承家訓而外受學侍其先生軸故學問早成弱冠以詞賦試中真定時以真定蒙城奉莊聖太后湯沐歲庚戌太后使擇邑中子弟來上公始從忠獻公楊太后和林城世祖皇帝在潛藩命公主文書講說帳中常見許重癸丑

世祖以憲宗皇帝命自河西征雲南大理忠獻公在行公與弟壽國正獻公文忠先在軍中督糧具贊軍務丁巳世祖令授皇子輕是為北平王雲南王也又使為使召遺老於四方而太師寶公默左丞姚公樞鶴鳴李公俊民敬齋李公治王峰魏公璠偕至於是王府得人為盛己未世祖以憲宗命取宋公發公邊蒙古漢人諸軍理軍需將攻鄂州宋以賈似道呂文德將兵抗我水陸軍容甚備九月世祖臨江聞戰忠獻公請曰宋恃江為險兵力厚法當先之奮其氣臣

請先公與正獻公固請偕行世祖親料甲冑擇大艦授之乃率敢死士數十百人鼓棹疾呼奮進直薄南岸諸軍亦爭進宋軍來赴戰三合一敗之公乘小舟歸報世祖世祖方駐香爐峰因策馬下山問戰勝狀則扶鞍起立暨鞭仰指曰天也即賜卮酒使主帳下宿衛且命傳命他帥曰今夕毋飲酒毋解甲明日將圍城既度江會憲宗崩閏十一月帥還庚申世祖即皇帝位建元中統公持詔先諭遼郡且擇諸軍充侍衛七月還朝中書左丞張仲謙宣撫大明等路奏公為左右司郎中二年八月佩金符以兵部郎中參議都元帥府事三年山東守臣李璫叛聚濟南從元帥闊闕帶統兵代之五月而克其城璫伏誅山東平元帥卒公還都元帥阿木奉詔取宋召公為屬公辭曰新制諸侯總兵者其子弟勿復任兵事今伯兄以經略使總重兵鎮山東我不當行帥曰潛却舊臣不得引此為說公病不行五年改元至元之歲也上曰董某安在年始壯不使為國効力今安在召授金符為西夏中興等路行省郎中中興自渾都海之亂甫定

民間相恐動竄匿山谷而省臣方入奏同僚不知所為公曰吾死不可以去此宜鎮以靜乃為書置通道諭之然後粗安始開唐來漢延秦家等渠壑中興西涼甘肅瓜沙等州之土為水田若干於是民之歸者戶四五萬悉授田種頌農具更造舟置黃河中受諸部落及潰叛之來降者時也屬貴人曰只必鐵木兒者鎮西方其下縱橫需索旁午不可會計省臣不能支公坐幕府輒面折以國法其徒積忿譖公貴人怒召使左右雜訊之意叵測公曰我天子命吏請得與天子所遣傳貴人者辨天子所遣傳貴人者中朝舊臣嘗事莊聖太后來詰問公不承貴人旨意狀公曰我漢人生死不足計我所恨者仁慈寬裕如貴人以重威鎮遠方而其下毒虐百姓凌暴官府傷貴人威名於事體不便因僂指其不法者數十事詰問者驚起去白貴人即召公謝之曰非郎中我殆不知郎中特此心事朝廷宜勿怠自是譖不行而省府事粗立二年入奏經略使宜還以上旨行之中興遂定三年行省罷還京師命公為中書省左右司郎中辭之五

年立御史臺授公山東東西道提刑按察副使以仲兄右衛親軍千戶文蔚卒不及赴八年立司農許授公奉訓大夫山東東西道巡行勸農使十一年三月加朝列大夫勸農使如故山東中更叛亂多曠土公巡行勸勵無閒幽僻入登州境見其墾闢有方公為詩表異其守移剌今刻石在州治於是列郡咸勸地利畢興五年之間政績為天下勸農使之最十二年丞相安童公奏公為中順大夫工部侍郎代統石里統石里者阿合馬私人也其徒問安童公罷政即使薦監奏曰自統石里去工部侍郎不給鷹食鷹且瘦死矣上怒趣召治之因急速公入見上望見曰董某願為爾治鷹食者耶置不問別令取給有司阿合馬知不可譖十三年出公為少中大夫衛輝路總管要本路諸軍與魯總管佩金虎符郡當要衝民為兵者十九餘皆單弱貧病不任力役會初得江南圖籍金玉財帛之運日夜不絕于道警衛輸輓日役數千夫公盡然憂之曰吾民弊矣而又重妨穡事殆不可乃從持運主者言即邑胥校足備用不必重煩吾民也

主者曰公言誠然即行公言事萬有一不虞罪將誰
歸公即為手書具官職姓名保任之民得以時耕而
運事亦無不具者諸郡運江淮粟于京師衛當運十
五萬公曰民籍可役者無幾且江淮舟行風水不時
至而先弊吾民以期會是未運而民已憊矣乃為某
旁郡通議立法驛置民力以紓十四年以職事詣汴
漕司方議通沁水北東合流御河以便漕者公曰衛
為郡地最下大雨時行沁輒溢出百十里間雨更甚
水不得達于河即浸淫及衛今天道之使來豈惟無
衛將無大名長蘆矣會朝廷遣使相地形上言衛州
城中浮屠最高者才與沁水平勢不可開也事得寢
不行為郡多善政民有去思具見郡教授陶師淵所
撰碑文十六年受代歸田里作遐觀之亭於故邱茅
茨數椽僅避風日讀書賦詩怡然燕居自號野莊老
人裕宗在東宮數為臺臣言董某勲舊忠良何以不
見用也十八年臺臣奏起公為山北遼東道提刑按
察使不赴十九年朝廷選用舊臣乃召公為太中太
夫兵部尚書自是朝廷有大議未嘗不與聞二十

年江淮省臣有欲專肆而忌廉察官者建議行臺隸
行省狀上集議公議曰不可御史臺譬之卧虎雖未
噬人人猶畏其為虎也今司僅在紀綱猶不振一旦
摧抑之則風采蕭然無可復望者矣又曰前阿合馬
用事時商賈賤役皆行賄入官及事敗欲盡去其人
廷議以為不可使阿合馬售私恩而朝廷驟斂怨也
及使按察司劾去其不可者然後吏有所憚民有所
赴愬則是按察司者國家當飭勵之不可摧抑也後
悉從公議轉通議大夫禮部尚書遷翰林集賢學士
知秘書監時中書右丞盧世榮本以貨利得幸權要
為貴官陰結貪刻之黨將鉅餉培之為功乃建議曰
我立法治財視常歲當倍增而民不擾也詔下會議
人無敢言者公陽問曰此錢取諸右丞家耶將取之
民取諸右丞家則不敢知若取諸民則有說矣牧養
者歲常兩剪其毛今牧人日剪其毛而獻之則主者
固悅其得毛之多矣然而無以避寒熱即死且盡毛
又可得哉民財亦有限取之以時猶懼其傷殘況全
盡剝剝無遺焉猶有百姓乎世榮不能對丞相安童

公謂坐中曰諸君董尚書直不虛食俸祿者議者出
皆謝公曰公以一言折聚斂之臣而厚邦本仁人之
言其利博哉豈不信然世榮竟以是得罪後嘗謂人
曰我不知何事忤董尚書每折我不遺餘力二十二
年拜中奉大夫江淮等處行中書省參知政事公力
辭上前曰江淮事劇臣不敢當上曰卿家世非他人
比朕所以任卿者不在錢穀細務也卿當察其大者
事有不便第言之公不敢辭遂行行省長官者素貴
倨多微同列莫敢仰視跪起稟白如小吏事上官公
則坐堂上侃侃與論是非可否無所遷就雖數忤之
不顧也有以上命建浮屠於亡宋故宮者有司奉行
急迫天大雨雪入山伐木死者數百人而猶欲併大
建佛寺公坐中謂其人曰非時役民民不堪矣少許
之如何長官者曰參政奈何格上命公曰非格上命
也今日重用民力失民心豈上意耶各拂袖去然竟
得少紓其程公在行省政事大槩如此廿三年將用
兵海東徵飲益急有司為嘉日益甚公曰吾力不足
以口語勝矣乃請入奏事大畧言瘦國家可寶之民

力取僻陋無用之小邦其條目甚悉言上事亦罷廿
五年拜御史中丞公曰中丞不當理細務吾當先舉
按察使乃舉胡公祇適王公憚雷公膺荆初紀許楫
孔從道十餘人為按察使又舉徐公琰魏公初為行
臺中丞當時以為極選方是時桑葛當國用事寵奉
方熾自近戚貴臣見桑葛皆屏息避無可誰何公
以舊臣任御史號不易為桑葛令人風公贊己功於
上前公不答又自謂公曰百司皆具食丞相府獨御
史臺未具食丞相府公又不答屬朔方軍興糧稅租
而誅責逾急公謂之曰民急矣外難未解而內戕其
根本丞相宜思之於是遠近盜賊蜂起公持外郡所
上盜賊之目謂之曰百姓豈不欲生養安樂哉急法
苛歛使至此耳又謂之曰御史臺所以揀政事之不
及丞相當助之不當抑之也御史臺不得行則民無
所赴愬而政日亂將不止臺事不行也浸忤其意益
深乃擬拾臺事百端公日與辯論不為屈於是具奏
桑葛奏狀詔報公語畧外人不知也桑葛日誣譖公
于上曰在朝惟董中丞慤傲不聽令沮撓尚書省請

痛治其罪上曰彼御史職也何罪且董某端謹朕所素知汝善視之當是時雖貴近以誣譖遭斥辱者不一公徒以區區之誠賴天鑒主知而免於是遷公通奉大夫大司農時又欲奪民田為屯田公固執不可則又遷公為翰林學士承旨廿七年隆福太后在東宮以公耆舊欲使公授皇孫以經具奏上以上命命之曰老人畏寒須臾和乃一至帳中授經內侍視饌公每講說經旨必傳以國朝故實丁寧譬喻反覆開悟故皇孫亦特加崇禮焉三十一年上命公以其諸子入見公曰臣蒙國厚恩死無以報臣之子何能為謹不敢以見命至再三終不以見是歲世祖皇帝升遐公望宮牆哀慟幾墜馬下同列爭扶持之及至奠喪次群臣皆推公曰先帝漢人舊臣唯公在矣公宜前受酒行禮皆相對哭失聲今上將即皇帝位于上都太后命公從治裝賜鈔百定以行既即位巡狩三不刺公奏曰先帝新集天下陛下遠狩不以時還無以慰安元元宜趣還京師且臣聞人君猶北辰然居其所而衆星拱之不在勤遠畧也上悟即日可其奏

是行也上每召入帳中問先朝故事公亦盛言先帝時虛心納賢開國經世之務談說或至夜半太后亦素知公故多所顧問公自先帝時每侍燕與蒙古大臣同列裕宗嘗就榻上賜酒使母下拜跪飲皆異數也上在東宮時正旦受賀於衆中見公召使前曰吾鄉見至尊甚憐汝輒親取酒飲之至是眷眷至渥賜鈔三百定至於金衣玉帶紫笠寶環之賜皆追成先帝之意也是年詔修先帝實錄陞資善大夫知制誥兼修國史公於祖宗世系功德咸近將相家世勲績皆記憶貫穿史館有所考訂質問公應之無所遺失大德元年夏四月上章言臣老矣請致其事上聞之特加資德大夫許致仕賜鈔二百定以歸命一子官鄉郡便侍養六月戊寅以疾薨于里第之正寢享年七十有四公性孝友四時祭祖禰輒思慕感愴如將見之事伯兄如事父教子弟嚴而有禮為學以誠實為主本故其文章議論皆質直忠厚不為華靡其從政寬裕慈愛簡於細事至於謀大事決大議則剛毅正直磊落可觀歷事三朝每以忠言正論為己任故言

事上前必引古證今從容盡達其蘊而後已。平居聞
朝政有一未善輒終夜不寐倚壁歎恨不置曰祖宗
艱難成立之天下豈可使賊臣壞之故每與朝議即
奮言不顧危禍以片言折權姦定國是者不可勝紀
朝廷賴之在御史臺行中書省時所遺皆大姦劇惡
每恨公不順己計萬方欲殺之公一不以為意曰人
臣在位豈愛身苟容而上負國家下負生民乎公仕
宦五十餘年凡十八命祿俸之餘盡以買書而家無鹽
粥之資卒賣其京城之宅以償積貸世祖嘗念其貧
每欲有所賜使近臣記其事然公終不一自言也逮
薨之日惟有祭器書冊而已其好賢樂善尤出天性
雖待下士必盡禮至老且貴終不倦人有善必推舉
之而名公大人聞公所為亦必曰出董公門必佳士
也故天下之士爭歸之與人謀至忠款故國人有為
使遠方若出而領兵治民者必求受教而後行公為
開道訓誨足以激勸其意至有欣然聽之終日忘去
者而蒙古大臣見之必曰此故老也皆改容待之嗚
呼蓋可謂忠厚誠實君子者矣公先娶王氏元帥某

之女先卒再娶周氏江淮都轉運使惠之次女後公
四月卒子男八人士貞士亨為仲兄文蔚後渡江有
功官至昭勇大將軍侍衛親軍副都指揮使佩金虎
符常侍裕宗東宮先公卒士楷士英士昌士恒承務
郎員定路總管府判官士庶士方女四人長適趙珙
次通周倣次通齊東縣尹王良傑次在室孫男十六
人守約某孫女十人長適吳某次通張繼祖次通
侍其正次通王惟賢餘在室曾孫男七人皆幼公墓
兆在縣西北高里先塋之東公國之老臣敬歷中外
久矣上而朝廷下及四方賢人大士且必有深知公
者尚能道其德業之詳也謹錄其歷官行事梗概如
上伏惟立言之君子圖其不朽者焉謹狀

知太史院事郭公行狀

元 齊履謙

公諱守敬字若思順德邢臺人生有異操不為嬉戲事祖榮號駕水翁通五經精於算數水利時太保劉文貞公左丞張忠宣公樞密張公易贊善王公恂同學於州西紫金山而文貞公復與駕水翁為同志友以故俾公就學於文貞所先是順德城北有石橋以通活泉水兵後橋為泥濘淤沒失其所在公甫冠為之審視地形按指其處而得之河東元公裕之文其事于石其曰里人郭生者即公是也中統三年張

忠宣公薦公習之水利且巧思絕人蒙賜見上都便殿公面陳水利六事其一中都舊漕河東至通州權以玉泉水引入行舟歲可省餼車錢六萬緡通州以南於蘭榆河口徑直開引由蒙村跳梁務至州還河以避浮鷄洶盤淺風浪遠轉之患其二順德達活泉開入城中分為三渠引出城東灌溉其地其三順德澧河東至古任城失其故道沒民田一千三百餘頃此水開脩成河其田即可耕種其河自小王村經溥沱合入御河通行舟楫其四磁州東北澄漳二水

合流處開引由滏陽邯鄲洺州永年下經鷄澤合入澧河其間可溉田三千餘頃其五懷孟沁河雖已澆溉尚有漏堰餘水東與舟河餘水相合開引東流至武陟縣外合入御河其間亦可溉田三千餘頃每奏一事上輒曰當務者此人真不為素餐矣即授提舉諸路河渠四年加授銀符副河渠使至元改元從忠宣公行省西夏興復瀕河諸渠先是西夏瀕河五州皆有古渠其中興州者一名唐來長袤四百里一名漢延長袤二百五十里其餘四州又有正渠十長袤各二百里支渠大小共六十八計溉田九萬餘頃兵亂以來廢壞淤淺公為之因舊謀新更立牐堰役不踰時而渠皆通利夏人共為立生祠於渠上二年授都水少監公言嚮自中興還特命衆順河而下四晝夜至東勝可通漕運及見查泊兀即海古渠甚多可為修理又言金時日燕京之西麻谷村分引瀘溝一夫東流穿西山而出是謂金口其水自金口以東燕京以北溉田若干頃其利不可勝計兵興以來典守者懼有所失因以大石塞之今若按視故迹使水

得通流上可以致西山之利下可以廣京畿之漕上
納其議公文言當於金口西預開減水口西南還大
河令其深廣以防漲水突入之患衆服其能八年遷
都監十二年丞相伯顏公南征議立水驛命公行視
所使自陵州至大名又自濟州至沛縣又南至呂梁
又自東十至網城又自東平清河逾黃河故道至與
御河相接又自衛州御河至東平又自東平西南水
泊至御河乃得濟州大名東平泗汶與御河相通形
勢為圖奏之十三年都水監併入工部遂除工部郎
中是歲立局改治新歷先時太保劉公以大明歷自
遼金承用二百餘年浸以後天議欲修正而薨至是
江左阮平上思用其言遂以公與贊善王公率南北
司官分掌測驗推步於下而忠宣樞密二張公為之
主領裁奏於上復共薦前中書左丞許公能推明歷
理俾參預之公首言歷之本在於測驗而測驗之器
莫先儀表今司天渾儀宋皇祐中汴京所造不與此
處天度相符比量南北二極約差四度表石年深亦
復欹側公乃畫考其失而移置之既又別圖其壇以

木為重棚創作簡儀高表用相比覆又以為天樞附
極而動昔人嘗展管望之未得其的作候極儀極辰
既位天體斯正作渾天象象雖形似莫適所用作玲
瓏儀以表之矩方測天之正圓莫若以圓求圓作仰
儀石有經緯結而不動公則易之作立運儀日有中
道月有九行公則一之作證理儀表高景虛周象非
真作景符月雖有明察景則難作聞凡歷法之驗在
於交會作日月食儀天有赤道輪以當之兩極低昂
標以指之作星晷定時儀以上凡十三等又作正方
案九表懸正儀坐正儀凡四等為四方行測者所用
又作仰規覆矩圓異方渾蓋圖日出入永短圖凡五
等與上諸儀互相參考十六年改局為太史院以贊
善公為太史令公為同知太史院事給印章立官府
是年奏進儀表式樣公乃對御指陳理致一一周悉
自朝至於日晏上不為倦公因奏唐一行開元間今
南宮說天下測景書中見者凡十三處今疆宇比唐
尤大若不遠方測驗日月交食分數時刻不同晝夜
長短不同日月星辰去天高下不同即日測驗人少

可先南北立表取直測景上可其奏遂設監候官一
十四員分道相繼而出先測得南海北極出地一十
五度夏至景在表南長一尺一寸六分畫五十四刻
夜四十六刻衡岳北極出地二十五度夏至日在表
端無景畫五十六刻夜四十四刻岳臺北極出地三
十五度夏至景長一尺四寸八分畫六十刻夜四十
刻和林北極出地四十五度夏至景長三尺二寸四
分畫六十四刻夜三十六刻鐵勒北極出地五十五
度夏至景長五尺一分畫七十刻夜二十刻北海北
極出地六十五度夏至景長六尺七寸八分畫八十
二刻夜一十八刻繼又測得上都北極出地四十三
度火北京北極出地四十二度強益都北極出地三
十七度火登州北極出地三十八度火高麗北極出
地三十八度火西京北極出地四十度火太原北極
出地三十八度火安西府北極出地二十四度半強
興元北極出地三十三度半強成都北極出地三十
一度半強西涼州北極出地四十度強東平北極出
地三十五度太大名北極出地三十六度南京北極

出地三十四度太強陽城北極出地三十四度太弱
揚州北極出地三十三度鄂州北極出地三十一度
半吉州北極出地二十六度半雷州北極出地二十
度太瓊州北極出地十九度太十七年新歷告成拜
太史令公與太史諸公同上奏曰臣等竊聞帝王之
事莫重於歷自黃帝迎日推策帝堯以閏月定四時
成歲舜在璇璣玉衡以齊七政爰及三代歷無定法
周秦之間閏餘乖次西漢造三統歷百三十年而後
是非始定東漢造四分歷七十餘年而儀式方備又
百二十一年劉洪造乾象歷始悟月行有遲速又百
八十年姜岌造三紀甲子歷始悟以月食衡檢日宿
度所在又五十七年何承天造元嘉歷始悟以朔望
及絃皆定大小餘又六十五年祖冲之造大明歷始
悟太陽有歲差之數極星去不動處一度餘又五十
二年張子信始悟日月交道有表裏五星有遲疾留
逆又三十三年劉焯造皇極歷始悟日行有盈縮又
三十五年傅仁均造戊寅元歷頗未舊儀始用定朔
又四十六年李淳風造麟德歷以古歷章節元首分

度不齊始為總法用建朔以避晦晨月見又六十三
年僧一行造大衍歷始以朔又四大三小定九服交
食之異又九十四年徐昂造宣明歷始悟日食有氣
刻時三差又二百三十六年姚舜輔造紀元歷始悟
食甚泛餘差數以上計千一百八十二年歷經七十
改其創法者十有三家自是又百七十四年欽惟聖
朝統一六合肇造區夏專命臣等改治新歷臣等用
創造簡儀高表憑其測到實數所考正者凡七事一
白冬至自丙子年立冬後依每日測到晷景逐日取
對冬至前後日差同者為準得丁丑年冬至在戊戌
日夜半後八刻半又定丁丑夏至得在庚子日夜半
後七十刻又定戊寅冬至在癸卯日夜半後三十三
刻己卯冬至在戊申日夜半後五十七刻半庚辰冬
至在癸丑日夜半後八十一刻半各減大明歷十八
刻遠近相符前後應準二曰歲餘自劉宋大明歷以
來凡測景驗氣得冬至時刻真數者有六用以相距
各得其時合用歲餘今考驗四年相符不差仍自宋
大明壬寅年距至今日八百一十年每歲合得三百

六十五日二十四刻二十五分其二十五分為今歷
歲餘合用之數三曰日躔用至元丁丑四月癸酉望
月食既推求日躔得冬至日經赤道箕宿十度黃道
箕九度有畸仍憑每日測到太陽躔度或憑星測月
或憑月測日或徑憑星度測日立術推箕起自丁丑
正月至己卯十二月凡三年共得一百三十四事皆
躔於箕與月食相符四曰月離自丁丑以來至今憑
每日測到逐時太陰行度推箕變從黃道求入轉極
遲極疾并平行處前後凡十三轉計五十一事內除
去不真的外有三十事得大明歷入轉後天又因考
驗交食加大明歷三十刻與天道合五曰入交自丁
丑五月以來憑每日測到太陰去極度數比擬黃道
去極度得月道交於黃道共得八事仍依日食法度
惟求皆有食分得入時刻與大明所差不多六曰二
十八宿距度自漢太初歷以來距度不同互有損益
大明歷則於度下餘分附以太半火皆私意牽就未
嘗實測其數今新儀皆細刻周天度分每度為三十
六分以距線代管窺宿度餘分並依實測不以私意

牽就七曰日出入晝夜刻大明歷日出入晝夜刻皆據汴京為準其刻數與大都不同今更以本方北極出地高下黃道出入內外度立術推求每日日出入晝夜刻得夏至極長日出寅正二刻日入戌初二刻晝六十二刻夜三十八刻冬至極短日出辰初二刻日入申正二刻晝三十八刻夜六十二刻永為定式所創法凡五曰一曰太陽盈縮用四正定氣立為升降限立招差求得每日行分初末極差積度比古為密二曰月行遲疾古歷皆用二十八限今以萬分日

之八百二十分為一限凡折為三百三十六限依梁疊招差求得轉分進退其遲疾度數逐時不同蓋前所未有三曰黃赤道差舊法以一百一度相減相乘今依算術勾股弧矢方圓斜真所容求到度率積差率與天道實為脗合四曰黃赤道內外度提累年實測內外極度二十三度九十分以圓容方直矢接勾股為法求每日去極與所測相符五曰白道交周舊法黃道變推白道以斜求斜今夫立渾比量得與月赤道正交距春秋二正黃赤道正交一十四度六

十六分擬以為法推逐月每交二十八宿度分於理為盡十九年太史王公卒時歷雖頒然其推步之式與夫立成之數尚皆未有定彙公於是比次篇類整齊分攷裁為推步七卷立成二卷歷議擬纂三卷轉神選擇二卷上中下三歷註式十二卷二十三年繼為太史令遂上表奏進又有時候箋注二卷修改原流一卷其測驗書有儀象法式二卷二至啓景二十卷五星細行考五十卷古今交食考一卷新測二十八舍雜座諸星入宿去極一卷新測無名諸星一卷月離考一卷並藏之官二十八年有言漕事便利者一謂灤河自永平挽舟踰嶺而上可至上都一謂瀘溝自麻谷可至尋麻林朝廷令各試所說其謂灤河者至中道自知不可行而罷其謂瀘溝者命公與往亦為哨石所阻舟不得通而止公因至上都別陳水利十有一事其一大都運糧河不用一永泉舊源別引北山白浮泉水西折而南經瓮山泊自西水門入城環匯於積水潭復東折而南出南水門合入舊運糧河每十里一置牖比至通州凡為牖七距牖里許上重

置斗門互為提閘以遏舟止水上覽奏喜曰當速行之於是復置都水監俾公領之首事於二十九年之春告成於三十年之秋賜名曰通惠後興之日上命丞相以下皆親操畚鍤為之倡戒待公指授而後行事置牘之處往往於地中偶直舊時軌木時人為之感服船既通行公私省便先時通州至大都陸運官糧歲若干萬石方秋霖雨驢畜死者不可勝計至是皆罷是秋車駕還自上都過積水潭見其舳艫蔽水天顏為之開懌特賜公錢一萬二千五百緡仍以舊

職兼提調通惠河漕運事公又欲於澄清牘稍東引水與北渠河接且立牘麗正門西令舟楫得環城往來志不就而罷三十一年拜昭文館大學士知太史院事大德二年召公至上都議開鐵幡竿渠公奏山水頻年暴下非大為渠堰廣五七十步不可執政吝於工費以公言為過縮其廣三之一明年大雨山水注下渠不能容漂没人畜廬帳幾犯行殿翌日天子北狩謂宰臣曰郭太史神人也可惜不用其言七年詔內外官年及七十並聽致仕公以舊臣且朝廷所

施為獨不許其請至今翰林太史司天官不致仕者咸自公始延祐三年某月日卒年八十六公以純德實學為世師法然其不可及者有三一曰水利之學二曰歷數之學三曰儀象制度之學決金口以下西山之祇而京師材用是饒復唐來以溉瀕河之地而靈夏軍儲用足引汶泗以接江淮之派而燕吳漕運畢通建斗牘以開白浮之源而公私陸費由省又前後條奏便宜凡二十餘事相治河渠泊堰大小數百餘所其在西夏嘗挽舟遡流而上究所謂河源者又嘗

自孟門以東循黃河故道縱廣數百里間皆為測量地平或可以分殺河勢或可以溉灌田土具有圖誌又嘗以海面較京師至汴梁地形高下之差謂汴梁之水去海甚遠其流峻急而京師之水去海至近其流且緩其言信而有徵此水利之學其不可及者也古歷天周與歲周小餘同於日度四分之一漢魏以來漸覺不齊遂有破分之說而立法未均任意進退公乃每以百年為率小餘之下增損各一以之上權往古下驗方來無不脗合且自太初迄于大明名歷

七十餘家其見施用於世者四十有三類多寫分換
母誇誑一時間有翹出如宋元嘉唐大衍近世紀元
不過三教然亦未臻至當考驗天事始雖親密旋已
不效公所為歷測驗既精設法詳備行幾五十年未
嘗一有先後天之差去積年日法之拘無寫分換母
之陋此歷數之學其不可及者也舊儀既多蔽礙且
距齒但有度刻而無細分以管望星漸外則所漸見
展尤難取的公所為儀但用天常赤道四游三環三
距設四游於赤道之上與相套在內同附直距於四
游之外與雙環兩間同結線距端凡測日月星則以
兩線相望劈取其正中所當之刻之度之分之秒之
數舊八尺謂夏至之景尺有五寸千里而差一寸其
說見於周官周髀等書千里而差一寸唐一行已嘗
駁議八尺之表表庫景促古今承用未之或革公所
為表五倍其舊懸施橫梁每至日中以符窺夾測橫
梁之景折取中數與舊表但取表之景者殊為審當
公於世祖朝進七寶燈漏今大明殿每朝會張設之
其中鐘鼓皆應時自鳴又嘗進木牛流馬雖不盡得

諸葛舊制亦自機妙成宗朝進櫃香漏又作屏風香
漏行漏以備郊廟從章大德二年起靈臺水渾渾渾
天漏大小機輪凡二十有五皆以刻木為銜牙轉相
撥擊上為渾象點畫周天星度日月二環斜絡其上
象則隨天左旋日月二環各依其度退而右轉公又
又嘗欲倣張平子為地動儀及候氣密室事雖未就
莫不究極指歸此儀象制度之學其不可及者也初
公年十五六得石本蓮花漏圖已能盡究其理及隨
張忠宣公奉使大名因大為鼓鑄即今靈臺所用銅
壺又得尚書璇璣圖規竹箴為儀積土為臺以望二
十八宿及諸大星及夫見用觀其規畫之簡便測望
之精切功智不能私其議群衆無以參其功王太史
則克自用者也每至公所觀其匠制未嘗不為之心
服魯齋先生言論為當代法因語及公以手加額曰
天祐我元似此人世豈易得嗚呼其可謂度越千古
矣

行狀

行述

行狀二

415

故誠意伯劉公行狀

明 黃伯生

祖庭槐字尚德追封永嘉郡公祖妣梁氏追封永嘉郡夫人父煥字如晦追封永嘉郡公母富氏追封永嘉郡夫人公諱基字伯溫世爲括蒼人年十四入郡庠從師受春秋經人未嘗見其執經讀誦而默識無遺習舉業爲文有英氣決疑義皆出人意表凡天文兵法諸書過目洞識其要講理性於復初鄭先生聞濂洛心法即得其旨歸先生大器之乃謂公父曰吾將以天道無報於善人此子必高公之門矣後應進士舉授江

西瑞州府高安縣丞調文安公曼碩見公謂人曰此魏徵之流而英特過人將來濟時器也公在燕京時間閱書肆有天文書一帙因閱之翊日即背誦如流其人乃大驚欲以書授公公曰已在吾胸中矣無事於書也之官以廉節著名發奸擿伏不避強禦爲政嚴而有惠愛小民自以爲得慈父而豪右數欲陷之時上下咸知其廉平卒莫能害也新昌州有人命獄府委公覆檢案覈得其故殺狀初檢官得罪職罪其家衆倚蒙古根脚欲害公以復讎江西行省大臣素

知公遂辟爲職官掾父以謹直聞後與幕官議事不合遂投劾去隱居力學至是而道益明後爲江西新儒學副提舉爲行省考試官頃之建言監察御史失職事爲臺憲所沮遂移文決去嘗遊西湖有異雲起西北光映湖水中時魯道原宇文公諒諸同遊者皆以爲慶雲將分韻賦詩公獨縱飲不顧乃大言曰此天子氣也應在金陵十年後有王者起其下我當輔之時杭城猶全盛諸老大駭以爲狂且曰欲累我族滅乎遂去之公獨呼門人沈與原置酒亭上放歌極醉而罷時無能知者惟西蜀趙天澤知公才器以爲諸葛孔明之流嘗作文以期之方谷珍反海上省憲復舉公爲浙東元帥府都事公即與元帥納隣哈剌謀築慶元等城賊不敢犯及帖里帖木耳左丞招諭方寇復辟公爲行省都事議復公建議招捕以爲方氏首亂掠平民殺官吏是兄弟者宜捕而斬之餘黨脅從誑誤宜從招安議方氏兄弟聞之懼請重賂公公悉却不受執前議益堅帖里帖木耳左丞使其兄子省都鎮撫以所議請於朝方氏乃悉其貽使人浮海至

燕京省院臺俱細之准招安授谷珍以官乃駁公所
議以爲傷朝廷好生之仁且擅作威福罷帖里帖木
耳左丞革職管公於紹興公發憤慟哭嘔血數升欲
自殺家人葉性等力沮之門人審理沙曰今是非混
淆豈公自經於溝瀆之時耶且太夫人在堂將何依
乎遂抱持公得不死因是有疾氣疾是後方氏遂橫莫
能制山越皆從亂如歸公在紹興放浪山水以詩文
自娛時與好事者遊雲門諸山皆有記行省復以都
事起公招安山寇吳成七等使自募義兵賊拒命不
服者輒擒誅之畧定其地復以爲行樞密院經歷與
行院判石抹宜孫守處州安集本郡後授行省郎中
經畧使李谷鳳巡撫江南諸道採守臣功績奏於朝
時執政者皆右方氏遂置公軍功不錄由儒學副提
舉格授處州路總管府判諸將聞是命下率皆解體
勅書至公於中庭設香案拜曰臣不敢負世祖皇帝
今朝廷以此見授無所宣力矣乃棄官歸田里時義
從者俱畏方氏殘虐遂從公居青田山中公乃著郁
離子客或說公曰今天下擾擾以公才畧據括蒼僻

湖勝負未決公密言於上移軍湖口期以木金相犯
日決勝上從之陳氏遂平上還京定計取張仕誠因
定中原拓土西北公密謀居多上或時至公所屏人
語移時乃去雖至親密友莫知其由以公爲太史令
一日公見日中有黑子奏曰東南當夫一大將時叅
軍胡深伐福建果敗沒他日公見上上方欲刑人公
曰何爲上語公以所夢公曰是衆字頭上有血以土
傳之得土得衆之象應在得夢時三日當有報至上
遂留所刑之人以待之三日後海寧以城降果如公
言捷至上大喜悉以所留人俾公縱之某年月日熒
惑守心群臣皆震懼公密奏上宜罪己以回天意次
日上臨朝即以公語諭群臣衆心始安後大旱上命
公諭滯獄凡平反出若干人天應時雨上大喜公因
奏請宜立法定制上從之張仕誠平後張晞欲亂政
乃使人上書稱頌功德勸上宜及時爲娛樂上以示
公公曰是欲爲趙高也上領之晞色動知公得其情
也乃使齊翼嚴等伺候察公陰事欲陷之未及發而
晞先事受誅及司天臺災翼嚴因為書言之於上其

事多公平日密聞於上或上使為之者翼嚴未知之也書奏上切責翼嚴斬之遂治黨與盡得其與景通謀者狀上適以事責丞相李善長憲使凌悅因彈之公為上言李公舊勲且能輯和諸將上曰是數欲害汝汝乃為之地耶汝之忠勲足以任此公叩頭曰是如易柱必須得大木然後可若求小木為之將速顛覆以天下之廣宜求大才勝彼者如臣鴛鴦尤不可爾上怒遂解洪武元年正月上登大寶於南郊公密奏立軍衛法外人無知者拜御史臺中丞適中丞章公澄奏定處州七縣稅糧比宋制畝悉加五合上特命青田縣糧止作五合起科餘准所擬且曰使劉伯溫鄉里子孫世世為美談也或云有殺運三十年公慨然曰使我任其責者掃除弊俗一二年後寬政可復也上幸鳳陽使公居守公志在澄清天下乃言於上曰宋元以來寬縱日久當使紀綱振肅而後惠政可施也乃命憲司糾察諸道彈劾無所避公案劾中書省都事李彬侮法等事罪當死丞相李善長素愛彬乃請緩其事公不聽遣官賁奏詣行在上從公議處

金華明越可折簡而定方氏將浮海避公矣因畫江守之此句踐之業也舍此不為欲悠悠安之乎公笑曰吾平生念方谷珍張仕誠等所為今用子計與彼何殊耶天命將有歸子姑待之會上下金華定括蒼公乃大置酒指乾象謂所親曰此天命也豈人力能之耶客聞之遂亡去公決計趨金陵衆疑未決母夫人曰自古衰亂之世不輔直主詎能獲萬全計哉衆乃定或請以兵從公曰天下之事在吾與所輔者爾奚以衆為乃悉以衆付其弟陞俾家人葉性朱佑等參掌之且曰善守境土毋為方氏所得也勿憂我適總制官孫炎以上命遣使來聘公遂由間道詣金陵陳時務策一十八款上從之會陳氏入寇獻計者或謀以城降或以鍾山有王氣欲奔據之或欲決死一戰不勝而走未晚也公獨張目不言上召公入內公奮曰先斬主降議及奔鍾山者乃可破賊爾上曰先生計將安出公曰如臣之計莫若傾府庫開至誠以固士心且天道後舉者勝宜伏兵伺隙擊之取威制敵以成王業者在此時也上遂用公策乘東風發伏擊

之斬獲凡若干上以克敵之賞賞公公辭不受中書省設御座將奉小明王以正月朔旦行慶賀禮公大怒罵曰彼牧豎爾奉之何為遂不拜適上召公公遂陳天命所在上大感悟乃定征伐之計遂攻皖城自昏達旦不拔公以為宜遷拔江上遂悉軍西上陳氏率其屬走湖廣江州平上使都督馮勝將兵攻某城命公投方畧公書紙授之使夜半出兵云至某所見某方青雲起即伏兵頃有黑雲起者是賊伏也慎勿妄動日中後黑雲漸薄回與青雲接者是賊歸也即街校躡其後擊之可盡擒也衆初莫肯信至夜半詣所指地果有雲起如公言衆以為神莫敢違竟拔城擒賊而還王漢一饒信降上命公撫之陳氏洪都守將胡均美使其子約降請禁止若干事上初有難色公自後謁所坐胡床上意悟許之均美遂以城降初公聞母富氏喪悲慟欲即歸上以書慰留之期以成功公不得已遂從征伐至是辭歸上遣禮官伴累使吊祭恩甚厚時苗軍反金華括蒼殺守將胡大海耿某孫炎等衢州或謀翻城應之守將夏穀懼無所

措會公至即迎入城一夕定之公即發書金處屬縣諭以固守所部遂同邵平章諸軍克復處城擒苗帥賀某李某處州平公至家營葬事時語所親以上必富有天下之狀於是鄉里及隣附郡縣翕然心服方氏雖據溫台明三郡其士大夫皆仰公如星景慶雲其小民亦未嘗不懷公之舊德也方氏素畏公名時遣人致書奉禮公不敢受使人白於上上因令公與通問公因宣國家威德方氏遂納土入貢上時使人以書訪軍國事公即條答悉合機宜某年月日公赴京道經建德今嚴州也適張氏入寇時曹國公守建德欲奮擊之公乃使勿擊曰不出三日賊當自走追而擊之此成擒也此三日黎明公登城望之日賊走矣衆見其壁壘旗幟皆如故且聞嚴鼓聲疑莫敢輕動公趣使疾進兵至則皆空壘擊鼓者乃所掠老弱耳遂窮追賊進走至東陽悉擒之以還公遂至京師時陳友諒據湖廣張仕誠據浙西皆未下衆以為蕪湖地肥饒欲先取之公曰張仕誠自守閩耳陳友諒居上流且號為不立宜先伐之陳氏敗賊取張氏如囊中物耳會陳氏復攻洪都上遂伐陳氏因大戰於彭蠡

彬死刑公承旨即斬之由是與李公大忤比上回京
李公懇之公乃求退上命歸鄉里公奏曰鳳陽雖帝鄉
然非置都之地王保保雖可取然未易輕也願聖明
留意焉遂辭歸後定西失利王保保竟走沙漠上手
詔敘公勲伐且召公赴京師同盟勲冊公至京師上
賞賜甚厚追贈公祖父爵皆永嘉郡公累欲進公爵
公曰陛下乃天授臣何敢貪天之功聖恩深厚榮顯
先人是矣遂固辭不敢當上知其至誠不强也上欲
相楊憲公與憲素厚以為不可上恠之公曰憲有相
才無相器夫宰相者持心如水以義理為權衡而已
無與焉者也今憲不然能無敗乎上曰汪廣洋何如
公曰此禍淺觀其人可知曰胡惟庸何如公曰此小
禍將傾轅而破犁矣上曰吾之相莫逾於先生公曰
臣非不自知但臣疾惡太深又不耐繁劇為之且幸
大恩天下何患無才願明主悉心求之如目前諸人
臣誠未見其可也三年七月授宏文館學士十一月
進封誠憲伯四年正月賜歸老鄉里二月至家遣長
子璉捧表詣闕謝恩某年某月復遣璉進賀平西蜀

表頌上仍以文答之八月上使尅期以手書問天象
事公悉條答其大意以為霜雪之後必有陽春今國
威已立宜宜少濟以寬書奏上悉以付史館其書豪
并已前奏請諸豪公皆焚之莫能得其詳也初公言
於上甌括間有隙地曰談洋及抵福建界曰三魁元
末頑民負販私鹽因挾方冠以致亂累年民受其害
遺俗猶未革宜設巡檢司守之上從之及設司頑民
以其地係私產且屬溫州界抗拒不服適茗洋逃軍
周廣三反溫處舊吏持府縣事匿不以聞公令長子
璉赴京奏其事徑詣上前而不先白中書省時胡惟庸
為左丞掌省事因挾舊忿欲構陷公乃使刑部尚書
吳雲誅老吏許公乃謀以公欲求談洋為墓地民弗
與則建立司之策以逐其家庶幾可動上聽遂為成
案以奏賴上素知公置不問省部又欲逮公長子獄
上時已勅璉歸及奏上曰既歸矣免之公入朝惟引
咎自責而已先是楊憲敗後汪廣洋為丞相未幾而
貶廣東乃相切惟庸公乃大感嘗謂人曰使吾言不
驗蒼生之福也言而驗者其如蒼生何遂憂憤而薨

疾愈增洪武八年正月胡丞相以醫來視疾飲其藥
二服有物積腹中如卷石公遂自於上上亦未之省
也自是疾愈焉三月上以公久不出遣使問之知其
不能起也特御製為文一通遣使馳驛送公還鄉里
居家一月而薨公生於至大辛亥六月十五日薨於
洪武乙卯四月十六日享年六十五歲公之子璉仲
璉以是年六月某日葬公於其鄉夏山之原禮也遺
文郁離子十卷覆瓿集二十四卷寫情集四卷長子
璉又集所遺文藁五卷名曰犁眉公集娶富氏封永
嘉郡夫人繼室陳氏章氏子男二人長璉由考功監
丞任江西叅政卒於官次仲璉皆陳氏出也女二人
長適吳彪次適沈安皆章氏出也孫男三人薦虎額
孫女三人幼未適也公未薨前數日乃以尺文書授璉
使伺服闋進且戒之曰勿令後人習也復命次子仲
璉曰胡惟庸必敗我欲奉遺表無益也日後上必思
我待有問當密為我奏其畧以為脩德省刑祈天永
命且為政寬猛如循環耳諸形勝要害之地宜與京
師聲勢連絡幸聖主留意生平剛毅慷慨有大節每

論天下安危則義形於色然與人交游開心見誠坦
蕩無間阻至於義所不直無少假借雖親之者以此
而忌之者亦以此惟上察其至誠任以心膺公亦以
為不世之過知無不言每遇急難勇氣奮發計畫立
就外人莫能測其機累贊上成大功上嘗臨朝稱之
公輒逡巡不敢當家居惟飲酒奕棋未嘗自言其功
每天象有大變則累日不樂凡公以天下蒼生休戚
為憂者即此可知矣上天威嚴重惟公抗言直議不
以利害休其中上亦甚禮公常稱為老先生而不名
又曰吾子房也廷臣或有過失得譴者公密為救解
而免其人或知而詣公謝者則拒不納其人不知亦
未嘗為人言也其居鄉里守禮義尚節儉多陰德不
以富貴驕人公初與同郡葉公景淵胡公仲淵章公
三益金華宋公景濂同出處有通家之好至於居官
任政則各行其志俱以功名顯於世而公與宋公又
以文章為當代首稱云伯生辱在同鄉預諸生列與
公子璉仲璉相知最深今公薨而璉沒仲璉與璉之
子薦請錄公遺事因輯平昔所聞大畧為行狀至於

皇上知人之明倚柱之重公之遭遇感激以天下公
議輔人君者觀綸綍之文考成就之績可見矣其籌
策惟懷有不能盡詳者亦不敢強質也

故翰林待制華川先生王公行狀 明鄭濟

公諱禧字子克姓王氏其先太原郡人五代時節度
使彥超自會稽徙金華之義烏遂爲義烏人其後有
曰固者游安定胡先生門登宋皇祐五年進士第卒
官恩陽令南渡後有典方州積階至金紫食邑開國
封男者至公之大父炎澤仕元爲石峽書院山長父
良玉常山東陽西縣儒學教諭益以文學著稱母陳
氏讀書知義理公之生也爲元至正壬戌十二月十
七日與山長公實同初度前夕山長公夢五色芝產
門楣翌日公生識者以爲文章之兆公幼秀異敏惠
稍長習古學師事侍講黃文獻公潛是時文獻爲文
章宗工天下所師仰然性介特慎許可見公所業獨
深器之即屬以斯文之任至正戊子元政衰敝公慨
然聞之乃攬天下事勢爲書七八千言上之時宰嫌
其切直格不以聞新安程公以文知公爲文獻門人
讀其文嘆曰青出於藍冰寒於水其子克之謂歟臨
川危公素太原郝公遠者圖大梁段公天祐一十有
二人列薦於朝不報濟南張文穆公起巖率翰林僚

屬又薦之亦不報有齊琦者得傳即子先天數推言
天人興衰甚驗見公嘆曰子充異代人物也公亦知
世道終不可爲乃歸隱青巖山中著書立說然深自
韜晦若將有所待者歲戊戌大明太祖皇帝親取娶
或以名聞遣使徵之公幡然喜曰吾聞大亂極而聖
人出齊琦之言良足徵乎即日詣行在上見大喜署
中省祿每商畧機務悉契上表益加禮敬語必稱子
充而不名問與論文章稱善因命采故實韻為四言
詩以授皇太子辛丑上親征江西公進平江西頌上
覽而喜曰吾固知浙東有二儒者卿與宋濂耳學問
之博卿不如濂才思之雄濂不如卿癸卯春授江南
儒學提舉司校理未幾訂外艱乙巳五月服闋除禮
部引引進使時當創國之初禮制多公所定是年冬
除起居注嘉言謹論致沃良多丙午七月除同知南
康府事特賜黃金帶以寵勞之公治民本於仁恕而
臨之以廉平民咸服之丁未上將即大位召還議禮
明年戊申爲洪武元年南閩初入職方以公出判漳
州公宣布德澤復以治南康者治之二年詔修元史

召宋公濂與公同為總裁官二月入史局於史事雅
擅其長力任筆削之勞一無所諉書成六月拜翰林
待制永直郎同知制誥兼國史院編修官公掌判代
言凡大詔令多屬焉三年二月奉詔預教大本堂公
經明理達開導訓諭道光師儒每召對殿廷必賜坐
久則賜飲膳一日在史局渴甚謂宋公曰得昨日上
所賜梨漿飲之吾渴濟矣中貴人竊聞之言於上即
命賁賜之其在翰林未久出使吐蕃未達境召還五
年正又使雲南抵其境見梁王君臣而諭之曰皇上
聰明神聖新創大業皆天命人心之所歸惟爾有衆
僻在西南未洽聲教故遣使者來諭意今爾亟奉版
圖歸職方則尺地一民按堵如故高官厚祿不爾吝
也否則如魚遊釜中終取夷滅時梁王君臣相顧駭
服已有降意會元之遺孽有自立於朔漠者遣使脫
脫徵糧餉且欲連兵以拒我覲知梁王有貳心因以
危言必欲迫梁王殺我使以固其意時梁王特兩可
不決因匿公於民間脫脫聞之愈責誚梁王不得已
以公出見之脫脫欲以威屈公慷慨罵曰天訖汝元

命我朝實代之汝如燭火遺燼尚欲與日月爭光耶
我將命遠來宣爲汝屈今惟有死而已寧以迫脇爲
懼耶顧謂梁王曰汝朝殺我大兵夕至矣遂被害時
六年癸亥臘月二十四日也享年五十有二娶何氏
子二曰綬曰紳孫男五穆穰稔植稔孫女三人公卒
後之八年大兵平雲南又十五年紳往求遺殯不獲
因訪得公諱所擗踊號呼裂神主載回時雲南左布
政使張公統及前山西叅政王公景彰力爲採搜死
事之詳爲文以暴白其大節公平生慷慨長身山立
屹然有奇氣人初見之若不敢即及夫一言之入則
情誼懇然恨相知之晚於經史百氏無不究其極其
爲文宏麗沈雄機軸貫綜自成一家言天下士大夫
爭傳誦之所著有華川前後集二十五卷玉堂雜著
二卷詩五卷續東萊大事記七十九卷並藏於家公
事上十餘年服勤報效左右開陳非仁義之言弗道
也天性至孝友弟尤至先世回廬悉推以予兄弟其
教子慈而有法在官還書戒之曰寧人侮我毋我侮
人故二子皆能以文學世其家云惟公之至行大節

其在天理人心者故所不泯而紳也復以濟有世契
之私幸嘗辱知於公者最久請狀公之行故爲按其
大槩以備家乘之闕它日國史置傳太常議謚庶亦
有所考焉

翰林學士承旨宋公行狀 明 鄭 楷

先生諱濂字景濂世爲婺之金華人也其先有諱憲者官大理丞爲易講師弟子衆至數千人唐武德間自京兆尹遷吳興更十四世有諱榮者私謚文通先生通尚書春秋周廣順中徙於義烏隱居覆金山又七世至宋嘉定初有諱栢者復遷金華其地曰潛溪又五世乃至先生始遷浦江仁義里之青蘿山仍以潛溪扁其所居示不忘本也於是四方學子咸以潛溪先生稱之先生在姪七月即生爲嬰兒時苦多病每風眩輒昏迷數日祖母金及母陳更相保抱得免無虞年六歲入小學授以李瀚蒙求一日而盡自後日記二千言同肄業者日暮罷歸其所讀書先生皆成誦九歲爲詩歌有奇語人異之呼爲神童年十五六里人張繼之長者也聞先生善記誦邀至別所問以四書經傳若干日可通倍先生以一月爲答初繼之不之信抽架上雜書俾即記五百言先生以指爪逐行按之按畢輒倍一字不遺繼之告先生之父尚書公曰是子天分非凡當令從名師即有成爾乃携

入城府受業於聞人夢吉先生授以春秋三傳之學凡學春秋者皆苦其歲月先後難記先生即并列國紀年能悉誦之但舉經中一事即知爲魯公幾年幾月是年實當列國某君幾年幾月或俾書而覆之無少異者且兼通易書詩及周禮諸經先生爲舉子業每出諸生右會吳貞文公策授經於白麟溪上攻古文辭金華胡君翰亦來從學胡君致書於先生曰舉子業不足溷景濂盍來同學古文辭乎先生欣然來從吳公博極經史學之未幾悉得其間與自是先生文章之名籍然著聞矣居無何吳公解館而歸先生嗣主教席子弟年十六者皆相從讀書講道東明山中受業者一門凡四十餘人始終越二十年學成多有躋膺仕者當是時曾伯祖貞和府君主家政年踰八十端嚴方正先生年甫四十又五終日毅然履主人尤高之府君方著家規示子孫其冠婚喪祭儀制禮文多參問於先生先生則據証古今準酌時宜以成一家之法子孫世守詩禮之教者先生之力也先生嗜學日篤時柳文肅公貫黃文獻公潛皆大儒天

下所師仰又各及其門執子弟二公則皆禮之如朋
友柳公曰吾邦文獻浙水來號爲極盛吾老矣不足
負荷此事後來繼者所望惟景濂以絕倫之識而濟
以精博之學進之不止如駕風帆於大江中其孰能
禦之黃公曰吾鄉得景濂斯文不乏人矣先生所爲
文多經二公所指授柳公謂其渾雄可喜黃公謂其
雄麗而溫雅國子監丞陳公旅序先生之文謂能兼
二公之所長歐陽文公元謂非才具衆長識邁千古
安能與於斯先生爲當世所稱許如此二公相繼即
世先生踵武而起遂以文章家名海內矣至正己丑
用大臣薦擢先生將仕佐郎翰林國史院編修官自
布衣入史館爲太史氏儒者之特選先生以親老不
敢遠違固辭會世亂益輟閣不事表顯乃與弟子入
龍門山著書二十四篇曰龍門凝道記及著孝經新
說周禮集註等書弟子乃先公貞孝處士諱淵府君
也初宋南渡後新安朱公東萊呂成公並時而作皆
以斯道爲己任娶實呂氏倡道之邦而其學不火傳
朱氏一再傳爲何基氏王柏氏又傳之金履祥氏許

謙氏皆婺人而其傳遂爲朱學之世適先生既間因
許氏門人而究其說獨念呂氏之傳且墜奮然思繼
其絕學每與人言而深慨之識者又以知其志之所
存益本於聖賢之學其自任者益重矣先生於天下
之書無不讀而析理精微百氏之說悉得其旨要至
於佛老之學亦研究用其義趣裁爲經論類其語言
宜諸其書中無辨也誠意伯劉君基謂其主聖經而
奴百氏馳騁之餘取佛老語以資戲劇譬猶飲梁肉
而茹荼飲茗汁耳歲庚子大明皇帝定鼎金陵遣使
者樊觀奉書幣造門徵先生先生曰昔聞大亂極而
興人生今誠其時矣遂幡然應詔先生與青田劉君
基麗水葉君琛龍泉張君溢俱見上尊重之語必稱
先生而不名七月以先生爲江南等處儒學提舉十
月奉旨入內授皇太子經先生儼恪遇綱常大義明
白開陳再三言之而不倦上深嘉歎之壬寅八月上
召先生及與國孔克仁講春秋左氏傳畢先生起曰
春秋乃孔子褒善貶惡之書苟能遵行則賞罰適中
天下可定也是月告歸省親有白金文綺之賜且曰

卿之誠懇朕素知之故有此賜耳甲辰十月改起居注先生侍上左右知無不言補益甚重明年正月上御端門與先生論及黃石公三畧且口釋之先生進曰尚書二典三謨帝王大經大法靡不畢具願陛下留意講明之上曰朕非不知典謨爲治之道但三畧乃用兵攻取時務所先耳嘗侍上語賞賚先生曰天下以人心爲本苟得人心帑藏雖竭無傷也人心不固雖有金帛何補於國耶上詔丞相李公善長歸江西軍中所掠牛於其民無牛者官給之勿取其租丞相退上顧先生曰向所言事當乎先生對曰民富則君不至獨貧民貧則君何能獨富捐利於民實興邦之要道也三月先生以疾告詔還家燮怡仍賜金帛皇太子致贈有加焉五月先生上箋謝恩復奉書皇太子勉以孝友孝敬勤敏讀書無怠惰毋驕縱修進德業以副天下之望上覽書喜甚召太子語以書意且賜書答其畧曰曩者先生教吾子以嚴相訓是爲不佞也以聖人文法變俗言教之是爲疏通也所守者忠貞所用者節儉是爲得體也昔聞古人今則親

見後以文綺侑書上每與群臣言先生淳謹君子輔導有方眷遇甚隆既而先生丁尚書公憂及服除洪武二年詔徵先生總修元史六月除翰林學士亞中大夫知制誥兼修國史時編摩之士皆山林布衣發凡舉例一仰於先生先生通練故事筆其綱領及紀傳之大者同列欽手承命而已逾年書成先生之力居多時剖符封功臣下先生議五等封爵召宿大本堂討論達旦先生歷據漢唐以來故實量其中而奏之曰此可法彼不可法皆傳於理而已時甘露屢降上問災祥之故先生對曰受命不於天於其人休符不於祥於其仁是以春秋不書祥而紀異爲是故也上姪文正以荒淫擅殺得罪先生言曰文正罪固當死陛下體親親之義生之而置諸遠地則善矣上嘗言古帝王當晏安之餘多好神仙以朕言之使國治民安心神恬康即神仙也先生對曰漢武好仙而方士至梁武好佛而異僧集皆由人主篤好故能致之使移此心以求賢輔天下具有不治乎上深然之上既追封王父爲楊王立廟京師御通天冠絳袍以祭

祭畢召大臣問曰朕祭外王父卿等以爲不當服袞冕何也先生對曰袞冕惟祭天地宗廟用之餘則當降禮也上嘗祀方邱惠心不寧先生進曰孟軻有言養心莫善於寡欲審能行之心清而身泰矣上稱善久之二年十二月遷奉議大夫國子司業國子多大臣子弟先生蒞之以莊率之以正日進諸生立兩序據坐執經敷揚闡奧之旨教以孝悌忠信之道學者帖帖遵服惟恐不得爲先生弟子上欲試先生以吏事四年八月授安遠知縣五年二月召爲禮部主事

十二月擢太子贊善大夫階如司業時先生之忠誠久而彌篤皇太子一言一動皆以禮法諷諭使歸於道讀書至切於政教及前世興亡之故必拱手揚言曰君國子民之道當如是不當如彼且推人情物理以明其義皇太子每歛容嘉納敬禮未嘗少衰言則曰師父師父云且書舊學二字以賜先是上問帝王之學何書最要先生請上讀真德秀大學衍義上覽而悅之令左右大書揭之兩廡之壁時睇觀之六年二月上御西廡大臣皆侍坐上指衍義中言司馬遷

論黃老事令先生講析得在坐者聽之先生既如詔復言曰漢武嗜神仙之學好四夷之功民力既竭重刑罰以震服之臣以爲人主能以理養性則邪說不能侵學校教民則禍亂無從而作矣刑罰非所先也上謂先生曰朕之爲君上畏天地下畏兆民兢兢業業不敢自逸先生對曰陛下此心古先哲王之心也書曰予臨兆民凜乎若朽索之御六馬爲人上者奈何不敬正謂此爾願陛下慎終如始天下幸甚上御齋室先生侍坐上問三代歷數封疆之修短廣狹

先生歷言之且曰三代之治天下也以仁義故歷年之多後世莫及上從容謂曰皇太子留心治道卿等宜常與議論庶廣識見幸善調護之先生益孜孜弗懈七月陞翰林侍講學士中順大夫知制誥同修國史仍兼贊善大夫先生之父文昭贈中順大夫禮部侍郎母陳氏贈德人先生奉詔搜羅歷代姦臣之蹟編爲辨姦錄及進太子諸王各分賜焉初上作祖訓錄至是成命先生作序諭以大意先王歷言帝王之道及皇上創業之艱以致箴戒之意於後人上稱善

命刻於篇先生嘗侍上至後苑觀獲上曰農事成矣先生對曰國以民爲本民以食爲天陛下知稼穡之艱難而念民生之良苦實盛德也上問曰三代以上所讀何書先生對曰上古載籍未立不專讀誦而尚躬行人君兼治教之責躬行以率之天下有不從教化者乎八月奉旨纂修大明日歷一百卷擇言行之大者爲寶訓五卷先生總裁其事朝夕禁中至七年五月乃成先生自以布衣沐非常之過誓竭誠以報國凡上有所任使靡晷靡夜躬閱載冊書於牘進之或覆視於冊不遺一字先生在朝日久若郊社宗廟山川百神之典朝享宴慶禮樂律歷衣冠之制四夷朝貢賞賚之儀及勲臣名鄉焯功耀德之文承上旨意論次紀述咸可傳於後世先生在上前所陳說不爲文飾隱蔽難家事苟有問亦一一道之常曰君猶父也天也其可欺耶上嘗問昨日飲酒否座客爲誰饌爲何物悉以其人及膳羞品對上笑曰卿飲時朕令人視之果如卿言卿信不欺我故上久而益信其誠欲俾叅大政先生辭曰臣少無他長惟文墨是攻今

幸待罪禁林陛下之恩大矣臣誠不願居職任也上愈厚之每宴見必命茶賜坐每旦令侍膳詢訪舊章講求治道或至夜分乃退先生屢有所建明召問廷臣臧否第言其善者不置又問否者爲誰先生曰善者與臣友故知之否者縱有臣不知也卒無所毀短或命賦詩爲文必寓忠告嘗奉制詠鷹令七舉足即成有自古戒禽荒之言上忻然曰卿可爲善諫矣然先生卒不以語人至於應制之作亦不留藁暑溫樹二字於居室之壁有問及內事者指以示之上嘗與先生飲先生素不勝杯勺舉觴即辭上強之至三觴面如赭行不成步上歡笑親御翰墨賦楚詞一章以賜仍命侍臣咸賦醉學士歌且曰俾後世知朕君臣同樂若此也甘露降上召先生賜坐上躬執金勺煉湯於鼎以甘露投之手注於卮以賜先生曰此和氣所凝能愈疾延年故與卿共之耳皆異恩也九年六月上以先生久典制作宣勞爲多特拜翰林學士承旨嘉議大夫知制誥兼修國史上每謂先生曰朕以布衣爲天子卿亦起草萊列侍從爲開國文臣之首

得世世與國同休不亦美乎趣令取子孫官之先生
屢辭不敢奉詔至是年某月詔徵先生冢子瓚之子
慎爲殿廷儀禮司序班未幾復召介子璲除中書舍
人上時休暇輒命題試璲與慎而戒飭之上笑語先
生曰朕爲卿教子孫先生或奏事入稱倦上命璲慎
共扶下殿祖子孫三世皆官內廷當時以爲異事復
以先生艱於行步特詔皇太子選良馬以賜上親作
馬歌復詔群臣咸作之以寵耀焉先生亦感激不自
寧常戒子孫曰上德猶天地也將何以爲報獨有誠

敬忠勤畧可效萬一耳上以先生年且至不可煩以
事十一月有致政之詔乃加贈先生之父侍郎爲嘉
議大夫禮部尚書母德人爲淑人祖德政贈亞中大
夫太常少卿祖妣金氏贈淑人夫人賁氏封亦如之
先生及二代誥辭皆上所親製天下榮之誥辭中稱
先生德量之宏如千頃波澄之不清撓之不濁人以
爲上知人之明云先生行既有期上眷念尤深日卿
去何時復承見朕手幸相待數日姑徐徐行由是朝
夕左右者累月時詔許言事朝臣有上疏萬餘言者

上聽厭其迂衍怒欲罪之以問群臣有阿意者指其
疏曰此不敬此詆謗罪當誅上咎之而罷怒未解召
先生先生曰彼應詔上疏其心爲國耳烏可深罪乎
上默然而已上覽疏中有足採者召阿意者罵曰吾
怒時若等不能諫乃激吾誅之何異以膏沃火向非
宋濂之言幾不誤罪言者耶上嘗廷譽先生曰古之
人太上爲聖其次爲賢其次爲君子若宋景濂者事
朕十有九年而未嘗有一言之僞謂一人之短寵辱
不驚始終無異其誠所謂君子人乎匪止君子抑可
謂之賢者矣在廷之臣皆以爲信然十年二月先生
遂辭歸瀕行賜紙幣文綺及御製文集皇太子贈以
衣三襲上諭曰朕最慎于賞予嘉卿忠誠可貫金石
故以是賜卿卿今年幾何矣先生曰六十有八上曰
藏此綺俟三十二年後作百歲衣也先生叩首謝上
復屬曰大江漲不可舟卿宜循內河達家庶幾無虞
仍俾慎護先生至家即拜表遣懷詣闕稱謝仍上箋
皇太子申明正心治國之要上賜詔褒答大旨謂先
生忠良之臣勲業既著文章必傳功成身退惟先生

獨全初先生將辭請歲一來朝是年九月朔先生遂入朝越十又四日見於端門上佇想已久廷問素矣及見大喜加勞再三皇太子皆驩動顏色越翌日上降勅符遣儀曹奉醪膳諸物抵寓館以賜自是日侍上遊歷觀闕盤旋禁禦詢諮備至便殿侍食日晏始退恩禮之優群臣莫望上嘗喟然歎曰純臣哉爾瀛純臣哉爾瀛方今四夷皆知卿名卿其自愛先生避謝不敢當凡所陳論皆古之格言朝廷百官惟恐不留先生下至寺人衛卒見先生至皆以手加額相排迎拜恐不得先覩先生留朝七旬餘上重先生還而難言之先生以歲暮力辭還復遣中貴人賜上尊至於道所經行皆上爲先生指畫聖心惓惓愈加於昔及先生既行數日上問遜曰爾父道中無恙否遜以安對未幾復謂遜曰朕疇昔之夜夢見爾父笑談如曩時爾父雖去其容儀儼然在朕目中也遂叩頭謝曰非陛下垂念臣父之至何以形諸夢寐中書舍人史靖可太子正字桂彥良等皆爲詩歌以紀之上之眷重先生不忘如此先生德尊而不居位顯而彌恭

既司制作之柄造門求文之士先後相繼蠻夷朝貢者數問先生安否日本得潛溪集刻板國中及高麗安南使者至購先生文集不啻拱璧而先生翦然自持似不能言者遇人拜雖三尺童子必誦膝而首下焉至於公侯貴人則未嘗降下魯不識其門何向朝廷有大議閭閻引古今辨說不少有所回性命之理晚而益究其極外物之往來視之若不相干嘗曰古人之爲學使心正身修措之行事俯仰無愧而已繁詞複說道之蔽也先生作事不尚表暴務合乎義教人皆隨其質而導之使入於善尤篤於倫品處父子兄弟夫婦之間者皆可爲法與人交和易任真無鉤詎縱爲所紿亦弗與較臨財廉非其分不取大書於門曰寧可忍餓而死不可苟利而生君子以爲名言權要及有力者苟非其人雖置金滿囊求一字不肯與縱不得已與之亦不受其餽謝日本使奉勅請文以百金爲獻先生卻不受上以問先生先生對曰天朝侍從之官而受小夷金非所以崇國體也上深然之貧賤人情有所哀欲發潛振幽即欣然爲之先生

四持文衡試天下士得人爲多接引後學惟恐弗及遠方來者授館而飲食之雖久不衰有小善必衆譽之邑溫氣和近其側者如大寒之加重裘盛暑之濯清風也天下之能文者多經先生指授朝廷英俊咸以先生爲法初奉勅教文華生數十輩至是出叅大政爲御史知列郡者相望四方士一見先生夸於人以爲幸承一言之賜者人輒改觀視之不敢與齒士大夫言當世有德者必曰先生而天下之人識與不識無賢愚咸推爲先生大人長者及先生之歸上面發後學無師之嘆蓋先生之道內誠外恕一出於正發之也當而行之也安故上下信服若是云雖已貴顯平居布衣蔬食無異貧士先生細目美髯狀貌豐厚不爲奇異行以求過於人不事生產不置田宅或勸爲子孫計先生曰富貴豈一家物哉吾乃所遺之也先生惟刻意於學自少至老未嘗一時去書不觀及致政歸青蘿山闢一室曰靜軒終日閉戶纂述人不見其面戒子孫毋至城市烟煙有以郡縣事爲託者皆峻謝之或談及時事輒引去不與語切於仁

愛聞民有困乏者爲之不飽先生視近甚明夜燃燈於几臥緯帷中閱蠅頭小書一黍上能作十餘字皆可辨點畫人以為先生不飲酒寡嗜慾所致豈或然歟先生所著文有潛溪集四十卷蘿山集五卷龍門子三卷浦陽人物集二卷已傳於學者翰苑集四十卷芝園集歸田已後所著計四十卷十三年冬先生孫傳以罪被刑舉家當真重辟上念先生特降赦安置茂州十四年五月二十日先生以疾卒於夔府臨歿端坐歛手而逝當是時夔之府守官吏皆來賻贈哭奠葬先生於夔府之西蓮花池山下其經紀喪葬刻石表墓者則知事桑以從也先生生於至大庚戌十月十二日享年七十有二娶賈氏名壽字主敬賢而有德爲女婦師前先生一年卒葬青蘿山子男二長璣次璵有文行精篆隸真草四體書女二長適金華賈林次適義門鄭林孫男慎愼恂惇愼嗚呼惜自垂髫時嘗侍先公貞孝府君拜先生於床下先生不以童子無知卽辱進而教之親承化育於茲有年矣第才質凡庸學如望洋有孤父師之教今聞先生謝

世長慟莫知所從竊念先生道德文章固已顯著於當世而出處遭際行事之盛世系遷徙生卒歲月之詳尚恐人未盡知爰敢哀取翰林待制王公禕先伯公太常博士諱濤君舊著小傳及同門友某所作歷官記輯爲行狀一通俟請當代立言君子著爲碑銘表諸墓隧庶幾他日太常國史有所採擇焉

兵部尚書于肅愍公行狀 明 于冕

公諱謙字廷益其先家河南仕金爲汾州節度使知開封府者於公爲八世祖以嘗爲杭州路總管遂家於杭故今爲杭州人公以洪武戊寅四月二十七日生於里第骨相異常甫七歲僧蘭古春見而奇曰此他日救時宰相也比長補邑庠生永樂十八年領浙江鄉薦明年登進士第太宗皇帝嘗命齎金帛使湖廣犒勞官軍即以鹿幹著名宣德元年授山西道監察御史公材貌英偉聲如洪鐘每入侍奏對太宗皇帝爲之傾聽院長顧佐風紀最嚴少當其意者獨於公加重差巡按江西有平民被讐誣指爲賊首久不決公取成案閱之得其寃白之抵誣者罪人皆稱爲神明云王府官屬素驕橫每遣人和買市物民甚苦之有司莫能禁公廉得其實以聞罪黜其尤者十數人弊乃息諸不便於民者釐革殆盡奸吏巨族素不法者縮氣屏息不敢肆民戴公至今祀於郡學名宦祠此代還命率錦衣官校捕長蘆一帶馬快船之夾帶私鹽者公不避權貴悉置之法河道爲之肅清上

新討漢賊人高煦簡公侍從罪人既得上命公數其
不執罪辭嚴義正四口而成大稱工部還賞賚與
文武諸大臣等蓋自是受知於上屬意用公矣五年
河南山西兩省各奏災廷議欲命大臣經理工親署
公名特陞行在兵部右侍郎巡撫二處地方年三十
有三公感上知遇晝夜經畫適歷河南山西間民所
疾苦為之興利除害二省之民獲蘇越五年英宗皇
帝嗣位公還朝議事復出巡撫進左侍郎公在河南
屢布大政其勸糴振米大畧以為積粟備荒雖一時
之勞寔為世之利 又奏山西行都司十三衛俱在
大同府地方遠近巡撫御史不能遍歷軍衛有司事
多不法乞專差御史一員於大同巡按雁門關控壓
邊境所係不小 其柴炭人夫本處通計七千八百
餘名議者欲附近紫荆關易州山場州縣差撥公以
附近紫荆關者無如大同太原二府地方大同極邊
已奏將人夫改添腹裏州縣矣太原所屬艱難猶甚
其餘州縣亦合斟酌民力分派共以七分為數通戒
一分詔從公議 舊例邊儲折收輕齎金銀等物大

戶往往中途招回公奏令布政司封收押送大同管
糧官處出給通關議皆欲將金銀重用煎銷公以邊
方給散官錢每兩折四石今金六錢折銀一兩每銀
一兩折米二石比與日常官銀多得一半若復煎銷
則木炭黑鉛必須出于糧戶設或虧折又將何以陪
償奏免煎銷官民便之公自河南抵山西夜經大行
山郡盜各持兵刃喊而前從者相顧駭愕公厲聲叱
曰汝何為者群盜覺公遂奔散其德威服人如此
山西恭議劉孔宗律已過嚴流輩寡合群小誣以賊
行累及妻子公上章白其事卒不坐十一年乃上章
舉恭政孫原貞王來以自待太監王振方用事御史
有類公姓名者常忤振忘其人疑為公通乘機譏言
者劾其擅舉自代之罪降大理寺左少卿罷巡撫河
南山西之民聞之倍道赴闕交章願普親藩亦以地
方不可無公為請迺復命巡撫會聞榮祿公之計詔
起復公累章懇乞終制不許上遣行人汪瑛諭祭有
司營築事事畢還朝陛見有河南山西民安事安之
諭尋復兵部右侍郎理部事又明年為正統十四年

鹵首也先入寇獨石馬營至秋勢益猖獗上將親率
六師討之公偕尚書鄭瑩上言聖朝脩邊最爲嚴謹
將士用命可以收功不必親率六師以臨塞下不聽
是年八月三日六師啟行初上命公隨征忽改遣鄭
瑩留公理部事十有五日師駐狼山土木主將不識
地理遠絕水路我軍焦渴甚窘促玩不爲備俄而國
騎奄至王師敗績死者填委蓋曠世所無之奇禍
也上北狩報至京師大震公北望號哭誓不與國俱
生太后命卽王監國是日臺諫廷論土木之變罪
歸王振王方攝朝倉卒未有處分錦衣衛指揮馬順
素附振意頗不平衆怒擊順死於廷旦索振所親信
二內侍將擊之彼此譴諍班竹雖亂無復朝儀文武
諸大臣皆驚避公堅立不動王亦疑懼屢起欲退公
直前扶掖勸止之且請降旨令群臣立班勿擅動命
紅盔將軍用爪擊二內侍期亟死王從之時在廷上
下相顧未已公恐事出不測復進言曰請再宣諭群
臣王振罪固當赤族事故太后然後行誅未晚也馬
順罪惡應死勿論衆稍定退朝時已過午利英公祀袖皆

裂徐步出左掖門吏部尚書王直迎執公手謂之曰
今日事起倉卒賴公以定雖百王直將焉用之公謝
不敢當太后以公人望所屬陞兵部尚書公固辭不
獲始就職○公以鑒與未回大敵垂至若前日扈從
失律者一概寬貸則今日披堅臨陣者何所畏憚迺
上章劾舉其罪大略曰武臣如顧興祖等茫無一計
可施遂使三軍覆沒上棄吾君父於國廷下委生靈
於邱壑文臣如王佐等雖無敗軍之罪難違逃法之
誅王令法司議罪以聞時親藩有上章願赴闕勤王
者太后遣大監金英傳旨皇太子冲幼未能遽理萬
幾卿王年長又宣宗皇帝親支宜嗣大統言者亦以
時方多事國有長君杜稷之福於是文武群臣交章
勸進王涕泣固辭太后復降旨責王不得已乃即位
遙尊英廟爲太上皇帝改明年爲景泰元年天下始
知有君朝綱始肅法令始行矣公見上泣曰國祚不
道氣滿志得將有長驅深入之勢不可不預爲計迺
者各爲精銳盡揀隨征軍資器械十不存一宜急遣
官分投召募官舍餘丁義勇起集附近民夫更替沿

河運運官軍令其悉謀神機等營操練聽用仍令工部齊集料物內外局嚴晝夜併工成造攻戰器具京城九門最為緊要令都督孫鍾等統領軍士出城守護列營操練振耀軍威遣給事中御史王竑等分頭巡視勿令疎虞各城門外居民若聽其遷徙協從則敵勢愈衆宜令兵馬司曉諭遷徙城內聽各隨便居住通州壩上等處食糧不可捐棄令各府諸人閑支准作月糧之數一舉兩得計無便於此者大同宣府等處曾經鹵騎往來剽掠者請勅各處守臣諭以今之國家之事必須輯和衆庶固守城池整擷人馬互為應援一切閑隘樓櫓墩臺壕塹務在挑修深固不許虛應故事至於選用人才尤為當今急務文臣如軒輓者宜令巡撫武臣如楊洪柳溥者宜為將帥凡軍之事臣請身任其責不効則治臣之罪上深嘉納施行○時邊報絡繹訊言萬端事情百出公先事預防攝權制變衆一視公為安危輕重大監喜寧本胡種也土木之敗降也先盡以中國虛實告之遂為鄉導奉英廟趙紫荆開京師戒嚴人無固志往往挈而

南奔侍講徐瑾妄言占象倡議南遷以避之事聞六宮而二三大臣復依違其間公痛哭於廷抗言京師天下根本宗廟山林社稷與百官萬姓帑藏倉儲咸在焉此而不守更於何處可守若一動則大勢盡處宋南渡之事可監矣上是公言守議乃定○先是京草場來自永樂以來承平日久俱於城外堆積動以千百萬計壩上養馬草束料豈亦置倉場於野外公亦聞鹵寇臨關急分遣五城兵馬官縱火焚燒一面奏聞或謂事關重大何不待報公曰事有經權今寇在目前若少緩待命下適以資鹵及京城解嚴人皆暇公經濟遠略設不預為焚燒之計則在野倉場皆盡為鹵所有鹵藉此持久是因困我也○主將石亨與公謀議頗異但欲盡閉九門堅壁以待之公不聽乃請率先將士躬擐甲胄駐軍德勝門外諸城門皆闔示以泣諭三軍誓言國恩當報忠義難得事機一失禍患立至生不如死人人感奮勇氣百倍十月之朔也先入紫荆關傳言送駕還京長驅直前其先至者四散前突我軍堅不為動知我有格稍自引却也

先次至城下對壘而陳英廟在也先所由首覲知我軍嚴整不敢有加我亦不敢向鹵輕放一矢喜寧噉也先邀我六七大臣出城議和奉駕還宮所邀金帛以萬萬計蓋責我所難從而妄起釁端也廷議怙怙禮部使使來問公公曰今日止知有軍旅他非所敢聞對壘凡七日是為一月既望諜知鹵中移英廟車駕離其壘漸遠乃砲擊其壘鹵死砲下者萬計也先大沮霄遁仍奉駕以北我軍奮欲追擊之公不許止令逐出境外縱之自去○初紫荆失守議所以禦鹵之策皆曰也先善戰而我軍新集且脆弱公曰嘗聞善戰屈人不若不戰而屈人乃一以忠義扞城卒致一矢不遺鹵衆自退人謂天實生公以為社稷朝廷論功特加少保總督軍務固辭不允衆以為今日之忠勇雖宋之李剛亦莫能及公曰四郊多壘卿大夫之恥今日此舉近免城下之盟耳惟有聲罪討賊復還車駕此臣子之職餘非所宜言○適大同叅將都督許貴議奏遣使齎勅與鹵假名和好暫示休兵待人馬強壯密定討伐之計朝廷下其議公奏謂去年秋

冬亦嘗遣都指揮李鐸與指揮岳讓齎執金帛往使鹵廷賄賂纔入於穹廬鹵騎已至於閭口繼遣通政王復少卿王榮首往鹵營不見上皇回鑾則鹵情誦詐和不足恃也明矣竊計今日之事揆之理勢皆不可和何者中國與虜有不共戴天之讐和則背君父而忘大義理有所不可和也萬一和議既行彼或有不厭之求從之則有害違之則速變勢有所不可和也為今之計莫若選將鍊兵養威蓄銳鹵若遣使入貢量與賜田齎回若欲先遣使臣往彼通好適足以啓其輕侮之心萬萬不可上以公言為然○公又以涿鹿保定真定易州地方密邇京城雖有衛所官軍勢援孤寡先已奏遣都督僉事劉安統領京軍往來巡視以張形勢過者鹵賊知我京城有備不敢侵犯或分投在彼剽掠一時戢殺不及奏添京軍遣都指揮陳旺石端等前去應援又恐地方廣濶劉安一人倉卒不能周遍仍請勅右都督楊俊統領京軍往彼節制庶使緩急相制人民有所倚伏○公又以鹵寇深入必先攻犯白羊紫荆倒馬等關口誠係緊要奏

調撥京軍與同原衛官軍相兼隄備仍將涿州原操官軍策應曰白羊口易州保定官軍策應紫荆關真定官軍策應倒馬關使聲勢連絡彼此應援庶無僨事者俄報也先逼朱謙於閏子口又明日報追石亨於鴈門閏烽火接連遠邇搖動言者謂宜急發京軍往援公曰京軍不可輕動固衆料難持久乃奏上方略遣人密授朱謙等仍令各營整點器械調度官兵若將尅日大舉者遣爲應援先聲旋報固已出境人皆服公料敵之明○公又慮不登除喜寧邊境無由得安乃計授都督楊俊擒寧解京朝廷猶豫未決公上章廷劾其罪其略曰寧以打話爲由引領強固入寇反爲胡鹵之腹心此謂朝廷之仇敵也若不明正典則是使夷鹵有輕視之心禍亂無可弭之日上從其言即日誅寧識者快之也先果悔禍效順遣使詣闕請自送犬駕還京上集群臣廷議多言鹵情誦詐難信公曰此天意也君臣大義兄弟至親當速遣使奉迎以承天心若果也先言而無信則我爲有辭矣衆議乃決○二年秋九月太上皇帝還京衆歸公一言之

重公以鹵情尚未可測益爲安內攘外之策河間東昌地方去京城不遠自永樂以來安置投降降人數多生聚蕃息驕縱莫馴也先入寇之際勢將乘機擡動公因南征之舉其有位號者重加犒餼撰抽隨征事平遂奏留其地爲國家銷此積久難除之患於一日計亦奇矣○天壽山我祖宗陵寢所在有衛無城軍民散處固寇嘗稔惡其地公奏起成山伯王通築城昌平縣軍民徙家城中保護陵寢居庸關亦相倚爲勢臨清縣漕船往來商賈輻輳實我喉襟或謂也先將由紫荆關入據臨清公隨薦平江侯陳璘鎮守其地築立城池設置軍衛防禦完固後諜知據臨清之計河間亡命小田兒者道之後又雜鹵象中進馬入敵我虛實適侍郎王偉使大同公密奏命偉以計誅之○公又以京營軍馬雖有總兵官督管彼此各異一遇調遣輟撥號令不同兵將不識或至誤事議以五軍神機三千等營揀選馬步官軍一十五萬分爲十營各用指揮三十員分管每隊用管隊官二員常令在營操練庶使統體相維兵將相識設有調用就令

原管都督等官統領前去征勦策應號令歸一行伍不亂迄今團營之法守而不易皆公之議也其獨石馬營等處藩籬共有八城土木之變各城奔避皆爲國所據議者欲棄之公曰棄之則不但宣府懷來難守雖京師亦不免搖動乃薦久擢都督孫定議方畧令率兵度龍門關且戰且守自是八城完固如初而祖宗舊疆亦不失尺寸矣都督楊俊議奏調撥遼東永平山海宣府大同延綏寧夏并在京五軍神機等營官軍盡行統領出口勦收敵賊公以調撥諸路軍馬出境則京師各邊一切空虛若緝知內外軍馬掣肘分兵迎絕牽制我軍別遣大軍間道幽掠所在城池何以禦之進退之間兩爲所礙豈兵家全勝之計上深然其言俊議乃沮○時浙江福建廣東廣西等處賊人鄧茂七葉宗黃蕭養輩蜂起殘破州縣一切軍中事宜所司待命方行公雖在千萬里外常若身處目擊者凡百籌畫議奏痛切人情利害用能所在撲滅地方以寧獨貴州苗賊聲勢猖獗侍郎何文淵議奏貴州山嶺高峻林木深密雄兵猛將卒難成功

乞照舊置立宣慰司管屬土人設都司指揮等官鈐束軍衛遣大將一員在被鎮守其被賊燒毀衙不復蓋造布按司府官員悉取回京公謂貴州我祖宗開創經營迄今八十餘年制法已定地方無虞比因兵疲於久戍因於遠輸遂至各種賊寇乘機竊發土地人民皆祖宗之所傳授豈可輕易委棄事遂寢○公以北因殘滅軍國之務規畫甫定邊方無復多事懇辭求解兵柄又以天變自劾乞罷職皆不許○初也先臨城之時石亨雖為主將其實因人成事得封世襲侯爵至是驀然以公有軍功宜錄用其後為請朝廷授冕府軍前衛副千戶公累章懇辭有曰臣果欲代子求官自當乞恩於君父何必假手於石亨不得已受命語竟曰我本書生不知兵惟聖主憂勤吾分當死遂調度軍馬區區犬馬之勞顧荷寵異之重爾果砥礪名節無忝朝廷官爾之意言猶在耳朝廷賜公第京城公上章懇辭謂國家多事之秋非臣子安居之日邇者土星犯太微上相臣參備大臣正宜貶損以穰天譴豈可厚亨以重災慙不許乃所以賜王

帶圖書監甲諸物移置第內封識加謹以修上賜間
一往視之。公夙染疾動輒喘急寓宿直房以便
朝謁一日即發上遣大監與安太醫院使董宿視疾
宿云此疾得竹瀝和藥可愈與安為上言上親幸大
內山代竹賜之仍令計所費用一切給自尚方益寵
異也病中懇求罷歸不許乃降手勅慰諭免公朝參
且屢促公出視事。公總督軍務漸久凡各營號令
進退賞罰皆由於公平日議論斷制宿將欽伏石亨
等不能贊一辭况亨貪縱以壞軍政公悉裁之以法
無稍貸亨與公自此隙矣亨姪石彪頗驍勇議者嫌
其一門同握京兵公奏以石彪充遊擊將軍往大
同等處截殺為國定計亨疑公分共黨與遂切齒于
公思有以傾之。七年杭郡湖水告竭無故土崩人
皆驚異尚書孫原貞方鎮守兩浙間語人曰人材之
生鍾山川之秀今日之兆哲人其萎乎蓋指公也明
年正月景帝不預在廷文武群臣同公等上章請憲
廟臨朝議未下太上皇帝光復寶位改元天順實天
與人歸之會也石亨貪天功為已有假奪門迎復之

名以欺朝廷誣迎立外藩之罪以報私怨原其奸計
蓋謂此罪不重則彼功不高不大殺股肱重臣則威
不立不構成黨逆大獄其權不專乘機喉言官劾與
王文等六七大臣黨有異謀俱下獄所司勘得金牌
勅符見存禁中別無顯跡亨等揚言雖無實跡其意
則有廷鞠之日徐有貞對衆大聲令有司痛加拷掠
文不勝其忿反覆力辨公徐曰辨之何益所司畏懼
亨等羅織煅煉添捏意欲二字文致成招蓋踵於秦
檮所云莫須有之故智也忠良被誣古今如一痛哉
是月二十三日狀聞上猶豫良久曰于謙曾有功衆
相顧未及對徐瑄避倡南遷之故有貞素以前事憾
公直前對曰若不置謙等於死今日之事為無名上
意乃決公與文遂遇害時錦衣衛指揮劉敬帶刀侍
衛目擊其事後每言及公未嘗不切齒於有貞有貞
又與亨輩令所司奏列被害諸臣姓名誣以奸黨榜
示天下遣官來杭繫家屬戍邊沒生於官公沒之日
天日無輝陰霾蔽天行路咨嗟太監吉祥度下達官采
耳者素不見公聞公死慟哭都市且以紙錢壺漿酌

公吉祥聞之切責明日號哭如初忠義感激雖降而
異類天理昭然不可泯也所司藉公第自昔所賜外
無他物其後陳汝言代公為尚書以賂敗上御便殿
以所籍財物陳大內廡下召大臣入視且曰景泰間
任用子讓久且專殺無餘物汝何得賂之無算耶時
上邑變亨輩僥倖首不敢動者久之越數日上擊毬內
苑宮順侯吳瑾撫寧伯朱永等數黜舊隨侍石亨張
軌自外來未及至御前上遙見亨等連以毬杖戲地
曰好箇于讓如此者數聲瑾永等皆流汗沾背戰慄
無所措出語親曰觀上意亨輩將無所逃矣一日邊
報忽急集群臣廷議未定公順侯吳瑾進曰于讓若
在邊患何足慮哉上為之嘿然既出有詰瑾者曰君
先世為謙所劾幾敗事君何過言瑾大聲曰豈可以
私家之怨而廢天下之公議耶初公被害時皇太后宮
中閤而其知後聞之嗟悼累日適上來問安太后語
之曰于讓曾劾勞不用當放彼歸田里何忍置之於
死上益悟其冤而深悔之不旋踵間徐有貞以罪逮
竄石亨等竟生謀逆夷滅無噍類此天道好還之明

驗也公之遺骸都督陳達密賂守者收殮城西淺土
又踰年冤遣義兄康扶柩歸葬祖塋明年憲宗皇帝
即位改元成化詔釋冤等之戍邊者仍給還家產天
日開明公道始白冤遂自龍門詣訪先公之冤朝廷
復公故秩遣行人馬駿祭於墓其文曰國家之多難
保社稷以無虞惟公道而自持為權奸之所害在先
帝已知其枉而朕心實憐其忠外稱快冤亦復官從
使臣歸展拜墓下浙江叅政何宜仰公高義力為修
葺三年特旨令天下有司燒毀奸黨榜文盡復謫內
受誣者官秩見有復起而大用者二十一年杭之父
老白其事於巡按御史劉魁立祠于公故第以風厲
鄉人名曰憐忠祠遵制語也今上皇帝即位是為宏
治元年鳳陽府學訓導儲衍奏公功績卓異宜賜謚
立廟祭祀言甚愷切禮部將上其事給事中孫瑞議
奏古之節義若諸葛亮在漢張巡在唐文天祥在宋
今之節義若侍講劉球祭酒李時勉少保于謙俱合
一體祭祀表勵將來遂蒙朝廷歲賜一祭於鄉祀恩
至渥也冕痛念未及贈謚復乞恩於上事下禮部議

得古今人臣能為國家建大議成大功者生則有旌
擢之恩死則有褒恤之典若前宋岳飛盡忠報國死
非其罪其追謚祠祀在宋就已舉行于謙受冤雖同
而功業所就則大過之宜如其子所請朝廷從之建
祠墓所頒額旌功令有司春秋祭祀仍賜贈謚諡命
其略云當皇帝北狩之時正國步難危之日乃能殫
竭心膂保障家邦回鑒有期論功應賞不幸為權奸
所構乃隕其身輿論咸冤茲復贈特進光祿大夫柱
國太傅謚肅愍用昭旌崇之典天語丁寧可垂之萬
世矣公天性耿介謝絕交同不立黨援惟以誠忠結
上主知分任謗恐但知有國平居急於薦賢凡公所
甄拔後皆一一知名如巡撫時所薦孫原貞王來以
自待後二人皆名績彰著公知人之明大率類此方
北南犯順之時軍旅方興中外交章論事議下兵部
公皆一一裁之以理知無不言言無不用卒能坐困
也先匡濟王室若昔晉武帝時郭欽上徙戎之疏而
卒不見聽宋欽宗時李綱沮和議之非而為群小所
排遂使劉淵竊號中土金人入據汴京臣主俱辱貽

天下後世笑又未嘗不為公幸也且如動搖儲位一
事首建邪謀迎合朝廷者廣西都指揮王洪也職掌
邦禮欣然定議者誰與天生下民作之君父有天下
傳之子執筆草詔者誰與當時密受黃金略無難色
人所共知況會官定議之日舉朝群臣莫不俯首聽
命臺諫言職並無一人喘息奈何石亨等用徐有貞
之策固知迎立外藩之罪出於誣捏不能服天下人
心仍諷所司以衆人之貪謀遂事一概加公必欲置
於死惜哉公歷仕三朝服官三十年位極人臣先世
室廬之在故鄉者未嘗增飾尺寸其孤忠嚴峻更歷
夷險先後一節詩詞頗清遠在江西時和祭酒胡願
菴山居十詠河南周獻王索和馮海粟梅花百詠詩
至今流傳尤長於奏疏每政事旁十章日數十上累
千萬言不假構思云自號節庵配董氏先公十一年
卒公年止四十有二竟不再娶亦不更置媵妾人皆
義之云

江西按察司副使周君行實 明 李夢陽

正德七年閏五月二十六日江西按察司副使周君
攻華林賊戰死之其子幹救之戰亦死時予在泰和
聞之驚而疑已而實然則痛哭曰勇哉周君見危而
授命已哀其子曰幹死於孝矣言是日君以賊食盡
會兵三面夾攻君攻自北門三戰射輒中賊少却君
與其子先登逼之會賊滾其牆石下如雨君潰被執
君頭中刀血流滿面左髀中槍不能行猶大罵賊不
絕口賊怒支解之以徇其子幹前投君中槍然猶力
戰竟墜崖死敗兵先昇其屍回營翌日諭賊求君屍
賊稠裏屍還焉先是制兵者以馬腦華林賊劇滑諸
山賊則日又竊發憂之會君到即檄君勦之君首擒
廬山左湖盆塘賊百數軍為之振乃移軍奉新討擒
飛王胡雪二馬腦寨平華林賊既分立仙女寨以拒
我君拔之賊又立寨鶴公嶺君又拔之先後斬獲以
千數於是進壁華林絕其出道壘之而守久之賊窘
遣諜者言賊饑餓旬狀君信之遂移檄會兵夾攻
然他兵實觀望不大進而君獨與其子進逼之坐是

敗而死於手袁哉屢勝者驕耶抑命歟君宏治六年
毛澄榜進士歷刑部員外郎謫兗州府通判正德改
元復其官歷郎中大理府知府拜今官官一年而死
夫逆豎之亂炎荒瘴海之濱死者屢矣君不之死也
乃今死以此君為主事也檢獄政日蒞視獄中人藥
其病者員外郎則坐請貸言疑獄者罪貶官而在郡
無不得民也所至則又善剖疑獄此皆足不死乃竟
死也君系出元總管思後貌魁梧性侃侃不阿善星
命之學談星命十中八九然不諳自命初華林之役
有星命者實賊黨來談君星命已再拜頃曰美哉動
罔不利君曰我利殺大重無制其人曰夫利殺者利
於兵者也議遂決故曰天有大數世有大運人有大命
故京房郭璞皆不免殺身由是觀之命可識矣君生
天順四年閏十一月十一日午時年五十有三歲配
宋氏封宜人四子金州學生娶黃氏續娶馬氏幹死
於孝者也娶劉氏春聘高氏二女長適劉黎舉人次適
李瞳州學生君父諱正大同府知府正父貴封滁州
知州貴父復復父添祥添祥始居長沙後徙安陸州

原缺

南京吏部左侍郎儲公行狀明顧璘

公諱曜字靜夫號柴墟本毘陵茂族元末始徙海陵
曾大夫諱集字仲文佃僕負義常隆冬載布數乘入
遼遇警道阻人多凍死遂立市門散之又嘗行道中
得遺金歸其人其人分謝悉不受此其種德所自也
哉厚矣公生而穎異六歲讀書過目成誦九歲善屬
文十六應鄉試名聞京師成化乙亥年二十三王淑
人疾祠築不愈乃刺股救之延數旬卒時尚未室宗
戚強公娶公頓足號天足指俱碎乃已淑人遺命勿
葬先兆內家貧無資公極力剝營墓域每旦伏哭塚
上夜則苦讀書以圖顯揚癸卯舉應天鄉試第一歸
至儀真即號泣赴家痛母氏弗及見也甲辰會試禮
部第一太宰齊南尹公欲選為屬公懇求便養遂授
南京吏部考功主事尋陞郎中宏治甲寅大宰鉅鹿
取公奏改吏部考功郎中公留意人材考注臧否無
不曲當一時人士踴然咸曰儲君陽秋可畏居南郎時
考察廉官有得吏肆暴不法或憚然之生亂公毅然
贊罷之北部當朝親考察雖執政親戚不職者咸無

假借天下服其公丁巳擢太僕少卿行部禁吏迎送
除民苛費及馬政積弊乙丑陞本寺卿首舉馬政便
民者四事疏於朝語在奏議中悉見施行譽望日重
性狷介寡合執政不相悅奏報都察院左僉都御史
總督南京糧儲鑾革倉庾宿弊裁省供費及條陳應
議四事多所惠益正德己巳遷左侍郎督京儲其蒞
政一如南都沉靜端毅中貴同事者咸見嚴憚時逆
瑾用事大臣多為屈損稱公為先生而不敢慢庚午
春以疾乞休詔賜乘傳還仍敕有司候病痊奏聞起
用同事太監蔡用素重公鹿魏白今五十西為驢辭
不受壬申春復起為南京戶部左侍郎時四方多故
京儲虛耗公籌畫深遠務善後圖癸酉正月改吏部
左侍郎時方望其大用遽以疾終公體貌清羸若不
勝衣端默簡重凝然具臺閣之器好賢惜才凡海內知
名之士無老少遠近咸見推引阮窮弗達者必思振
起之辟遠非類不惡而嚴未嘗有不善人至其門初
璘舉進士今司徒無錫郎公嘗相語日子持身當以
柴墟為法終不為非人累其見推重如此每與學士

大夫語必政事文學等事否則端坐終日而已人莫敢言其私居常與家人言亦恒引古孝賢貞烈故事爲訓絕無燕昵語事親至孝侍郎公年八十在堂少有三遠遠凡飲食衣服之養顧慮周至而蒙恩賜綺幣悉製衣以爲悅自主事至侍郎四奉勅誥推封每臨母淑人忌辰必齋戒祭祀以致思平生鬚髮爪甲不敢棄遺藏至數大裹竟以殉殮其謹身傳行可類推已晚爲朝廷倚重故誥辭稱其雅操不群長才傑出學有本原志存貞固簡在固已切矣易簣時召璘與

車駕主事王希屬以後事至不能語猶舉筆作國恩未報親養未終八字泣數行下無一語及其家事非養素堅定烏能至是哉公生於天順丁丑九月二十一日卒於正德癸酉七月十一日享年五十有七所著有柴墟文集若干卷奏議一卷駟野集一卷以傳世式後無疑也

翰林院修撰對山康先生行狀 明張治道

嘉靖庚子十二月十四日前翰林院修撰對山康先生卒卒二十四日其弟南川君錄其行實以書抵余請爲先生狀以余知先生者曰嗟乎余忍狀我先生耶爲狀他人在稱其德爲狀先生在白其誣誣苟弗白德將何稱作志君子採而擇焉先生諱海字德涵別號對山又號潯西山人其先河南固始人其世系顯晦見康長公行事序述康長公生二子長阜負才天折其次即先生先生道亞生知才具經濟讀書不專記誦但通其大義餘能類融下筆數千言不竭時提學楊遵菴先生奇其才即以天下士許之其爲文脫去近習上追漢魏以詩經中宏治戊午鄉試壬戌進士第一除翰林院修撰是時孝宗皇帝拔奇掄士右文興治厭一時爲文之陋思得真才雅士見先生策謂輔臣曰我明百五十年無此文體是可以變今追古矣遂列置第一而天下傳誦則效文體爲之一變朝野景慕若麟鳳龜龍問世而一覩焉修撰一年歸閔中居閔中三年北上復爲修撰其在翰林能面道

道人過失論古今文藝不少假借一時在翰林者罔不斂手服之又常曰南北人才之用舍天下治亂之所關也時武宗皇帝初即位宦官用事八黨行權而興平宦劉瑾用事尤專百僚被其竄逐而吾鄉折罰尤甚聞先生名常欲共至而先生獨不之往瑾以是銜之有時見直言諷勸導善極惡在他人不能堪先生獨言之無忌蓋瑾素重其名自能壓其心耳是時瑾怒吾鄉戶部郎中李夢陽蓋以夢陽爲主事時而尚書洪洞韓文率諸大臣劾瑾等專恣擅權而彈文出夢陽手朝廷怒罷諸大臣夢陽官後瑾居司禮忌前彈文搆夢陽以他事奏下錦衣獄欲致之死人情怛怛莫敢極救夢陽自獄中傳帖甚急曰對山救我救我此帖尚存編修何拓齋謂衆人曰康對山肯往瑾救之獻吉可活也人以是語先生先生曰我何惜一往而不救李耶先生雖承往而人猶難之明日先生同御史某往左順門值拓齋自內閣出曰此爲獻吉來耶先生曰是拓齋附先生耳曰此可獨往不可與他人同也先生遂不之往且謂拓齋曰瑾橫惡肆

權人也性好名可說言而奪不可正言而論也拓齋曰此惟先生能之他人不能也又明日先生往瑾所瑾聞先生至倒屣迎之留飲坐話久之瑾謂先生曰人謂自來狀元俱不如先生真爲閣中增光先生結言曰海何足言今閣中有三才古今所稀少也瑾驚曰何三才古今稀少也先生曰李郎中之文章張尚書之政事先先生之功業瑾曰李郎中爲誰乃與我並耶先生曰是今獄中李郎中也瑾曰非李夢陽耶先生曰是瑾曰若應死無赦先生曰應則應矣殺之閹中一才矣飲晚罷出明日瑾奏上赦李夢陽其顛倒小人愚弄好宦即孟子告齊王謂好貨好色之意而昧者不知論爲設瑾可笑哉一日瑾令親密者謂先生曰主上欲以汝爲吏部侍郎先王曰我服官纔越五歲矣翰林未有五越歲而陞部堂者請爲我辭之事遂寢而瑾嫌其不附內廷術之一日起文選郎中張尚質之京先生謂尚質曰我輩欲去而不可得君又何來耶尚質曰我見拿高世德恐慘禍及我高世德者吾鄉御史高允先也爲御史有名瑾銜之

拿焉無何尚質陞爲吏部侍郎先生曰不來恐禍既
來受官矣曷引病辭耶及瑾坐反尚質下獄中謂同
獄者曰悔不聽康德涵之言尚質爲郎中時有進用
之勢一旦與先生同諸公會飲尚質盛稱許冢宰之
才德先生曰只要常如此稱其意謂尚書不久爲尚
書排擠之意勢所必有無何瑾果逐許矣孝宗時謝
閣老遷見知主上其子丕爲翰林編修文亦有名焦
閣老芳其子黃中亦爲翰林檢討爭勝於謝各樹黨
與互爲標榜焦欲引先生爲附一日置酒北先生厚
請先生先生往見座客皆邪媚者曰此爲排謝招我
耶遂正言責之座客皆愧服卽先生者益衆矣是時
李西涯爲中台以文衡自任而一時爲文者皆出其
門每一詩文出罔不模效竊倣以爲前無古人先生
獨不之效乃與郭杜王敬夫北郡李獻吉信陽何仲
默吳下徐昌穀爲文社討論文藝誦說先王西涯聞
之益大卽之戊辰先生同考會試場中擬高陵呂仲
本爲第一而主者置之第六榜後先生忿言於朝曰
什木天下士也場中文卷無可與並者今乃以南北

之私忘天下之公蔽賢之罪誰則當之會試若能屈
呂矣能屈其廷試乎是內閣王濟之爲主考甚怨先
生焉及廷試呂果第一人又甚服之無何丁母憂歸
閨中往時京官值親歿持厚幣求內閣志銘以爲榮
顯而先生獨不求內閣文自爲狀而以郭杜王敬夫
爲志銘北郡李獻吉爲墓表辛蘭段德光爲傳一時
文出見者無不驚歎以爲漢水復作可以洗明文之
陋矣西涯見之益大卽之呼爲子字股蓋以數公爲
文稱子故也若爾非大卽也耶歸閨中居喪以禮哀
毀怨慕無何瑾敗而忘者讐者啣者喝言官以鄉里
指爲瑾黨論先生罷其官嗚呼先生以修撰進身而
以修撰罷歸官不加陞阿瑾何謂大抵先生以才名
致謗口語招謔又何論焉又謂先生還家時被叔有
司爲追捕其所亡益追捕所亡有司素重其名且爲
翰林而追捕之也先生何與焉聞者無不驚歎曰假
手折才嫉賢附黨有天乎而先生聞之畧無愠色且
曰自審無疚禍將從人瑾天下大惡也余嘗憂其禍
國今果敗論死矣深可爲國慶也臬官何惜余官何

惜罷官後一切國家事周論蜀中古服放情山水爲
文讀書造日益精學日益充又嘗曰爲官化民爲民
化俗欲化民俗先敦族黨族中長者敬幼者育窮者
周顛者扶無親踈遠近皆得其歡心而數弟顯達成
名皆先王教導訓誨之力其於鄉黨處之以仁義接
之以禮敬人有爭者不之官而之先生求其決判而
先生別其是非論其曲直雖素年之爭周爭以至給
人困乏扶人顛踣婚喪不得舉者贊助之俾無不舉
余在昔後值父喪困不能葬先王聞之適有先生相
識以百金饋若先生完封道余余固辭弗受先生曰
余大事畢矣得此不過日用費耳何若助吾弟喪余
固再辭之先生曰聘喪致遠授受有名非假借討償
耳曷辭焉予不得已受之遂克葬事其敦友之義周
人之急事悉類此又日與故舊童冠徜徉雖身居小
縣而名動四夷求文者日踵其門板傳刻天下爲徧
家居三十餘年探聖賢之學別王霸之道以至物理
性命策隸醫卜無不克脩周曉常與余論曰道以無
定爲真學以適用爲是又以達賢爲良三代克舜周

有不同至有宋以來執一以爲道訓詁以爲學庸冗
以爲文論其學則有過於用則無講一身之行爲似
是救國家之急難則非也觀乎此言非振古豪傑天
挺獨出者哉家居不離聲妓管絃絲竹一飯必用人
或議之不知大節所關凜不可犯先生少時夜行家
園中值園牆倒有隣女子奔先生先生正色斥之隣
女走不敢近此與柳下惠何異即事量人周誣必信
其爲學道披元門識該宗旨議論如孟軻爲文類馬
遷詩以興致爲先格高辭俊凌駕古人樂府數百篇
可羽翼騷雅使遭時用事管晏不足爲伊傅不足追
也夫何厄塞弗遇終老以歿是天未欲振耀斯文俾
先生厄塞弗遇終老以歿也距生成化乙未六月二
十日享年六十有六先娶尚氏有丈夫行持家訓衆
極有規度雖先生亦敬畏之生男子衆爲縣學生卒
女子三一適華州舉人張之振貞烈剛明如母尚氏
之槃卒生子光孝爲廩膳生次適生員李世貞次適
監生馬襲吉繼張氏側室楊氏季氏俱無出韓氏生子
樛趙氏生子樞張氏沒立季氏爲嫡主家事而楊氏

副焉將以某年某月某日嗟嗚呼先生之言行可誦說者尚多余不能悉悉其所知者耳聞郭杜王漢陳為先生墓碑三原馬谿田為先生志高陵呂涇野為先生墓表咸寧許少華為先生傳而先生以狀誄委余前四君子皆先生厚而王馬呂又先生同業同朝其知先生事又真且多也其為碑為志為表記載傳述必有出余狀次之外余與先生交二十餘年矣指授開方指教良多余時或有所議論亦必採擇聽受人有一善雖一介鄉鄙之士亦稱賞取法人有不善雖公卿權勢之人亦面斥之不貸不遜好以違情不黨同而伐異此雖堯舜三代之時恐不能用況末世衰俗直道難行而欲取大位建大功以求如古人之所為不誠難哉不亦難哉嘗聞先生對孝宗皇帝曰使古今豪傑之士而不遇雖子思孟軻之流則亦徒耳今觀先生之出與處則前所云子思孟軻者其亦自謂也歟其亦自謂也歟

明兵部尚書東涯翁公行狀 明 鄒 愚

公諱萬達字仁夫別號東涯潮之揭陽人也公生穎異五歲能誦書梅齋公異之曰是兒也其與吾宗或携雀雛以昇公方遊玩適意而兩雀從之鳴聲甚悲許夫人顧公曰兒能活之乎公悟而縱去許夫人喜曰吾兒他日必活人矣六歲許夫人卒公哀號不已居喪如成人聞者惻然傷之梅齋公解書至親親之殺公悟日斯異文同情之義也比長文名大起輒試居高等中乙酉鄉試初公就試時御史夢神人大書宏濟二字後閱公卷見吳試官音批曰子負宏濟之才當應大用御史喜曰吾夢謂此矣丙戌登進士丁亥授戶部廣西司主事會議輔大飢公奉命齎金穀出賑每一至縣則立鄉之有行誼者為賑長於是盡得民情偽督委官分投給予之有等無恥欺者不出鄉而或賑民甚懷之尚書以公望調雲南劇司化裁規畫咸中肯綮無不稱尚書指者癸巳陞廣西梧州知府又時興兵事供億經畫公悉力立辦至其興利除害均徭省費咸惠並行民去思不置焉丙申冬十

月皇太子生詔諭四夷以安南久不來貢兵部議請
討會安南人鄭惟燎上變至譯得其頭目莫登庸篡
弑狀四月以咸寧侯仇公等督兵討之擢公廣西按
察添註征南副使戊申春公以征南事白蔡公行之
公從其言登庸懼言曰王朝必不舍我獨不能移海
而走乎且採毒藥以試刀收已豆因集置上流截竹
筒埋地下陷馬足伴傳先襲廣東以撓我時賂邊氓
伺我事以告邊人亦嘗竊往來聞吏利其賂不復能
禁公於是密募敢死士梁文韜等入偽都旬日偵知

其情乃下禁令曰敢有出境與莫賊通者磔之籍其
家能擒莫賊一人者予百金登庸聞之大恐莫知所
爲公上議督府曰今日之兵大率有二用與不用而
已若兵不用也則示之急而急示之緩而緩弛張闔
闢其機在我以彰不戰之功可也若兵必用也則急
而或示之緩緩而或示之急呼吸瞬息其發若神以
藏必戰之用可也至於脩欽廉海濱之地以待窮寇
之奔無謂今日姑可緩法曰先為不可勝以待敵之
可勝此之謂也督府是之用是兵威大振○會龍州

憑祥二州土舍趙楷與李寰韋應同盟陰蓄異志楷
龍州土官趙源姪也源死無子而庶兄溥之二子相
與楷爭立楷知事不諧說源妻岑氏謀殺妻私取田州
人韋璋說稱源遺腹鞠外家借兵兄子猛以兵三千
納之龍州弗克楷又賂北來兩舍人以他事至左江
者矯立璋為檄送入龍州左江大震掠殺無數相挈
印以奔時守臣以變聞不能制後猛鳩殺璋而璋之
子韋應走依楷焉相死州人立其子燧楷送千金并
煖尋又殺煖自立一州大亂州目黃安等往田州購

相次子寶控狀督府林公富謂寶宜嗣而憚楷不欲
急也令楷且攝俟其長而還寶其後寶以五千金并
割三十一村以謝楷而還其州楷陽諾陰使應昭結
其州目得往來寶所寶妻王亞與通焉亞與思明府
土官黃朝女也動息必語應應以告楷楷與應遂謀
殺寶偽言賊入夜殺之指揮蔡基以狀聞應以向武
州兵千人築據州治亞與挈印歸焉應許割地謝朝
朝又發兵助應勢益熾督府檄流官往攝州事應擁
州人據之不得入○又李寰若憑祥州土官廣寧子

庶也廣寧死其孫珠嗣珠死寧族弟班攝州事州目
李蒲蕪寄枝等謀納其族弟珍黃朝黃泰助之遂立
珍淫虐無度哀謀廢立而通珍妻黃孟撫兵入執珍
於寢軒之遂私語登庸曰即稱兵願以全州先附也
登庸因厚賂寰為鄉導曰急緩鐵鉞告我公具以事
白督府督府駭曰君度諸酋首何如公曰兩州爪連
三亮鼎立迫之則變生肘掖內境驛驛宿之則威震
陵夷遠人弛聽指素狙詐未可速圖寰號梟雄難以
兵勝韋應懷懦寡慮計可旦夕就擒斷其中務使不
相屬然後措囊可以次第獲也督府善其策屬公謀
之公至太平使人以他事召黃朝諭之曰若女寶妻
也家世閥閱不幸再遭猶利見佳婿何至降衛下賤
匹體殘俘設果趙氏裔則寶兄也亞與嫂也而奔於
其弟鄙情汚行尤涸聽聞思明誠有四川土官方古
諸侯不宜張目覩顏縱女所為自貽恥笑應誠乳臭
姦命據檄不足污蕭斧但人言以兵助之豈真託
焉自昧王章耶夫以女誨醜以兵助賊是黨亂漬倫
也漬淪無恥黨亂當誅我方問罪於交州陳旅於邊驕

法行自近汝亦何辭朝叩頭出涕自公曰好為之
汝女倘改行我為汝原贖應孤雖無容喘息朝惶恐
惟命公乃授畫令朝以兵百人迎女歸寧應必與楷
可擒也於是公理舟下南寧示不疑夜授指揮錢希
賢領勁卒如畫馳伏路左伺應至擒之械致督府諭
死以其印昇流官署焉楷寰二人大怒公又遣人諭
寰曰天子將有事於南夷遠國之臣苟用命者尊官
可立致也寰遂自薦曰願効趙祀公得書杖楷等至
死遣人持楷書諭州人並檄宥其黨會田豫陽少恭
立其子匡時方逾齡一州以定公剗除三雄不動聲
色而禍本悉拔斧蹟昭明其功深而不露者類此太
平吏民德之立公生祠肖像以祀焉○左江斷藤峽
徑蠻盤據絕險時以藥弩伺劫掠去來倏忽不可擒
捕自都御史韓公新建伯王公勦治以來稍獲寧息
屬首侯勝海居弩灘為變武靖目黃貴誘刺之立堡
戍守其弟公丁畧謀衆破堡殺戍兵二百餘人御史
以聞命蔡公討之與諸司議曰斯腸胃疾也其可緩
治乎賊度兵幾何張總兵經曰兵不過萬人沈泰

將希儀曰非數萬人不可公曰二公言皆是也張君言則劉也沈君言則征也然賊我久矣劉之無得從沈君便蔡公是之會有南安之役未遑也而公丁等益橫公密謀於督府以計擒公丁磔於市於是乘勢調集兵四萬七千餘人分兩軍并發南北夾擊諸巢皆破賊大窘奔林峒而東公督指揮王良輔邀擊中斷斬首數百級餘賊來奔入羅連山公遂移兵就攻之檄右軍挽出其背賊悉力以拒隘塞巨木運布疾蔡旅發懸石樹抄伏機弩毒錄戰斧觸立死公皆以計奪之大破賊衆凡月有九日而班師招其餘黨並諸徭投順者二千九百餘人藤峽悉平○又會議四峒介於思明忠州之間然忠州稍近自天順五年之亂士人黃賢相占有其地峒遂改隸府而加閩焉府州互爭莫能歸一而峒亦向背無常公時在左江南寧知府白其事公議上督府曰四峒之爭久矣圖籍無歸易於叢惡今欲明歸一方勢必繁囂縱使官協民亦靡從若中分其地以彌怨仇然苗類厭聯苦於離析疆塍緯錯尤費區畫議者又欲為之立所立縣不

知縣則治之太詳所則徒費無益皆非羈縻之道也不若以其地割屬南寧府特設撫民通判一員治之築城建署乃以指揮分保甲設峒老而審役於通判內能撫輯其衆無奸法者給冠服榮其身通判指揮能各盡其職奏旌之以五年期其效督府蔡公覽議謂公曰君言偉矣治詳於內則外可得而理也法行於近則遠可得而服也吾方有事安南而日姑舍是何以示觀聽於遠夷哉公使人諭之峒民歡踴稱生願附南寧曰今而後庶見太平也○黃賢相素驚獨稱兵脅衆據四峒地以奸新令督府患之以告公公笑曰易事也同腔之民素苦土官誅求稍不如願賢相制之以威峒民若噬於虎口而不能脫官府遠遯控想無門是以不得已而從之茲當申之以輯寧之意必鼓舞而興引領向我賢相羽翼既携勢難獨立然後實以兵威詎以重典多法以行其間千金以贖其首經權互用奇正雜出不旬日而峒地可歸矣蔡公從之公乃牒參將俞思駐南寧授以秘策如期而賢相獻地督府喜曰翁君神策也公復議善後之

策十四事上督府皆原始要終足為經制云○上命仇公毛公討安南公上議毛公曰今日所以處莫賊者其策有三揖讓而告成功此上策也攝之以不敢不從而兵不血刃此中策也三略五申芟夷絕滅則威矣而聖天子好生惡殺非其所先此下策也今宜總衆長兼群策臨之以懼終之以謀俾機權在我動出萬全縱不得其上可得其中必不得已而就其下亦將舉之裕如不至於從事失時也毛公從之九月公承檄分屯龍憑思陵等處簡士卒礪器械足饋餉誓師以聽獲南安姦細丁南傑訊之曰吾方提兵進討汝能為吾導乎曰能公制邊幅以遇之其國中情偽畢得南傑密白登庸以天朝督府諸大夫決策用兵之狀且云保護元元而曲請以祈免不可不蚤自為計也於是登庸大恐請納疑如期詔廷臣集議上從之罷安南為都統使司賜登庸以不死以都統使治其國奉正朔還我四峒地許入貢班師論功進爵行有差毛公檄有曰廣西布政司參政翁某左江分巡懸著激揚之績紫荆進勦宏收勘定之功軍民以借冠

騰歌中休以得韓為慶間發五機動知情寔歸侵疆而反我華地輩偽號而掃彼夷氛登庸一方之君也能使之跣足祈哀繫頸降服建漢唐以來所未有之功矣自非本官學足以識古今之宜才足以稱錯綜之變守堅金石信格靈夷豈能至此 十二月糧兵部右侍郎蘇石食都御史總督宣大逆勅奏將官卻永貪姦姜夔衰老於是選將帥汰兵壯黃峙蓄修器械固險要謹偵探明賞罰乃又以西北沿邊諸將卒利在殺降以邀功賞公奮曰歸我也則我人也且自國來歸也虛實可審訊也柰何殺之殺即以抵命論死然不賞之則誰肯用力如是亦以歸我者反棄於國也於是懸重賞以待之公以此盡知國情全活甚衆 公每當秋防大棘分地畫守之又使人不用命也時出其不意選勁卒數百寨出以殊和油置小竹筒給之全曰遇官卒不在輒以殊油傾置誠其處官卒受杖輒驚莫測其故後官卒見殊油置處輒自縛以請罪公責而遣之於是遠近不敢離尺寸函知有備造國無事 大同宗室克灼等潛謀出邊勾誘為患禍在門庭公得其情密行總兵周尚文擒發其蹟顯露皆

以聞并起親藩不動聲色坐折逆萌人咸神之然不自以為功悉歸尚文其推避如此八月十六日酉大舉擁衆入鐵裏門來寇公督府兵奮勇鏖戰據險遏敵射死者不知其數悉為函奪去斬獲首級三顆函遁而去時有河南磁州王邦直者號千斤募公威名與諸壯士走隸門下公時以客禮待之是日捍函先鋒用命與參將張鳳力戰死公親為文祭之賻歸其喪又奏官其子並立祠以祀焉邊卒無不感泣思盡死力以怯為恥捷聞上曰剪除禍萌擒縛逆黨消弭

隱伏功出非常其兼官如舊夏桂川以河套事來詢公議析利害凡數百言大要論復河套與搆巢不同兵難輕舉惟謹亭障飭戎備嚴行伍固元氣以俟其隙為計之得夏公不能聽二十八年己酉春函入宣府逼居庸以入公諜知之適大同帥周尚文亦以謀者報至問曰汝嘗告誰乎諜者對尚文方幸對尚文方幸宣府不早為之備且獲罪而已握重兵以取寵逞其地也伐而繫之獄夜草疏請曰函衆近邊不可測勢必侵軼宣府大同帥周尚文勇謀可用令其率

精銳暫代宣府帥以禦函於計最便又移書諸輔臣本兵力言函必入之狀至謂非周尚文不足以抗此函非神速不足以成謀是時疏入上初訝之召輔臣議上知其情實立召兵部覆奏如公議以大同兵付其副帥而促周尚文以行期奏於是周尚文晝夜兼程行至曹家而函已入據險以守函不虞周尚文之猝至也大戰三日夜屢圍屢解公躬擐甲督兵數千人朱援麾下將請止曰函騎充斥乃爾且彼衆我寡是猶以肉投餒虎也公奮曰汝何得為是言也我志決矣誓不與此函俱生於是馳騎先出會西風大作公輒索車數百輛曳柴以進解圍遁去公於是督周尚文追擊出境保障之功多於斬馘矣捷上獻首級四十顆公以書抵余曰向謂周公瑾諸葛孔明西南風助順以破老瞞不謂天亦祐予也并以諸疏牘見寄是時上密遣人探知情偽而公捷疏未至趣問輔臣對曰翁某親自督戰計亦至矣已而果至上大喜秋八月大同帥以挑函邀功失事詔下廷臣議者咸以公宜以金革奪情起復公病瘼力疾十一月朔日至

清流縣而疾作謂其僕曰亟歸矣吾將逝矣哀哉公性剛至潔思深猷遠見抗千古心雄萬夫坦夷平易至其崇論閎議浩如江河之不可竭嫉惡勦暴迅如疾雷之不可抗出謀獻慮秘如鬼神之不可窺故能達變傾否動出成算蹈難履險功在疆圉雖古窺王佐之才社稷之臣無以逾公也使公而無死國家干城之託生靈休戚之命於公乎賴勛名益未可量也

禮部給事中雲村先生許公行狀董穀

鹽官東垂袁花之里黃山降神產有大君子鄉先生姓許氏名相卿字伯台雲村其號也其先富宋中葉自汴來杭之海寧世次厄於兵災斷自四九提督而下五世入國朝海州同懋懋生樸樸生禎禎生糾糾生封給事中君濟先生父也配贈孺人俞氏寔誕先生三歲失依多病鞠於封孺人母居先生少日穎異不群孝友天性善處骨肉有人所不及知者母俞遺妝田二千餘畝悉與母弟均之如祖業焉異母姊氏早寡以苦節終先生尚少奮力合塋其夫婦爲之表封樹無所不至以故庭幃悅豫始終無間言年十七始受詩於四明張先生福師嚴道尊功苦學正所業雖與時同所志則與時異歲丁卯舉於鄉故事同廩生各贖舉者廩一名先生念有寒者悉卻之由是校中遂廢廩贖自先生始三上春官不第聚書萬卷讀於靈泉山中凡十年迺舉進士年三十九歲丁丑也居三歲授兵給事中慨然有澄清之志而道與時違恒切幽憤今上即位萬幾一新迺連疏五六指陳時

弊排擊巨端直言極諫推本聖心無復忌諱讀者危
之蓋不有其身矣幸賴聖德優容感悟厲階自是不
敢萌作先生與有力焉至論考察官員乞遵高皇帝
舊制及成化宏治故事明行賞罰以昭國憲甚快士
論乃之朝陽鳴鳳然先生樹立甚高每以古道自期
暇時之紛華躁競無一當意者直躬骸體自分不偕
於俗於是乎宦情微矣俄上疏引疾歸時四十有五
買山栽松爲終老計久之卻臺撫巡給舍監司中外
交薦以禮料給事中召力辭不起舊遊仕者過先生
勸之出先生神不在也則故與談桑園爲索京師故
人書則曰有我訊者君第言厭世去矣聞之絕倒傳
之都下縉紳有不得選中書者舉此相謔爲口實
焉故人張羅峯桂見山夏桂洲相繼登台輔各嘗貽
書物且以美官問所欲悉謝卻之對使者曰我方聞
子勞子不憐我病耶官是渠家物耶而以私人顧及
我耶去矣領子一尊酣子意矣竟不答書後遂無復
薦者先是家居數歲惟以娛親爲務曲盡愛敬室人
沈以家變恚恨暴卒先生切痛傷之然終忍不言也

先封君既捐館塋海鹽金牛山結廬墓次蔬水三年
旦夕臨毀墓近紫雲村之茶磨山遂徙居焉以醴籍
應隸鮑即鹽課司疏開報可遂爲海鹽人因自稱雲
村病翁以自別於卽時九杞疏云先生篤志師古或
談時態則疾首掩耳居家動必以禮冠笄婚喪一遵
先儒之制尤嚴於祭吉蠲器數必誠必敬遇忌則齋
宿慟哭如初喪檢束自防習以性成著貽謀四事以
爲後訓曰學則曰家則曰祠則曰墓則良哉範也常
以病謝客獨處一室端嚴神明日乎一編至菴不食
值佳風日曳杖游行山椒水湄或對瀑布長脰修髯
昂藏皓潔舉步閒暇若九皋之鶴道逢山僧園叟則
相與班荆爾汝大雪則騎黃犢從一童登雲岫絕頂
縱觀群峯廣野女在混沌自以爲奇襄陽守徐咸濟
南守鍾梁素善先生詣焉先生候於翠微落照返射
千峰皆紫相顧大笑宛有潯陽風致大白先生自天
目來晤先生中秋汎有澈湖酣笑酣笑連旦穀先子
從吾道人曰有善星者當知三百里內少微賢乎謝
歸數十年影不出山足跡雖親知未嘗造無論城府

若與世隔者性猶介慎取與非義一芥弗受自少至
老屹然特立於顛波中無所授附尤成談人過挾己
恩嘗所德者或感之則謝曰吾豈謬記耶我不盡然
或稱其長則泚頰退避若無容顧往往危行迂俗有
相衲鑿者皆怒詒之先生雖知若罔聞也亦不能緇
其所師資莆田林見素俊增城湛甘泉若水錫山邵
二泉賢同里祝虛齋萃而歸宿於陽明王先生守仁
友善者仁和邵銳崑山魏校陸釐永嘉王激嘉善沈
概山陰朱節禁宗完餘姚徐愛臨海金貢寧仙居應
大猷江卽周文興安成卽守益臨川饒文璧武緣李
璧閩人王鳳靈秦人孫一元楚人王從善蜀人白飛
霞吳人文徵明皆海內名賢君子先生嘗有感於世
變江河古風日遠而人心終不死也作年朝志自君
紀至外傳凡十卷又家集若干卷皆續藏不敘示人
蓋非先生之所貴耳

通議大夫都察院右副都御史李公行狀

明 歸有光

公諱憲卿字廉甫世居蘇州崑山之羅巷村以耕農
爲業通議始入居縣城獨生公一子今從博士學山
陰蕭御史鳴鳳奇其姿貌曰是子他日必貴吾無事
閱其卷矣先輩吳中英有知人鑑每稱之以爲瑚璉
之器公雅自脩飭好交名俊視庸輩不屑也舉應天
鄉試試禮部不第丁通議憂服闋再試中式賜進士
出身明年選南京吏部驗封司主事歷遷卽中更在
司有莫不懷其恩居九年家宰鄧聞公奉新宋公皆
當名世卽咸賞識之陞江西布政司左叅議江右田
土不相懸而稅入多寡殊純如南昌新建二縣僅百
里多山湖稅糧十六萬廣信縣六贛州縣十糧皆六
萬南安四縣糧二萬三郡二十縣之糧不及而縣巡撫
院傳都御史議均之公在糧儲道爲法均派折衷最
爲簡易蓋國初以次削平僭僞田賦往往因其舊貫
論者謂蘇州田不及淮安半而吳賦十倍淮陰松江
二縣糧與畿內八府百七十縣埒其不均如此吳郡

異時當均田而均止於一郡且破壞兩稅陰有增羨
民病之不若江右之善而惜不及行也陞山東按察
司副使兵備臨清先是國薄京城又數聲言從井陘
口入掠臨清臨清漕道商賈所湊人情恒懼公處
之晏然或爲公地欲移任公曰詎至於此境上屯兵
數萬調度有方國亦竟不至師尚詔友河南至五河
兵敗散獨與數騎走莘縣擒獲之在鎮三年商民稱
其簡靜既寧李尚書自吏部罷還所過頗懈慢公勞
送禮有加李公甚喜嘆曰李君非世情人吾因以是

識其人會召還即日薦陞湖廣布政司右叅政景王
封在漢東未之國詔命德安造王府公董其役又以
承天修陵恩殿陞河南按察司按察使受命四月尋
擢巡撫湖廣右僉都御史奏水災乞蠲貸親行溝渚
雲夢間捐循之東南用兵禦日本軍府檄至調保靖
容美桑植麻寮鎮溪大刺土兵三萬二千所過牢廩
無缺公因奏土司各有分守兵不可多調且無益徒
糜糧原其後土兵還輒掠內地人口公檄所至搜閱
悉送歸鄉里顯陵大水衝壞二紅門黃河使橋而故

御龍飛慶雲宮殿多隳撓奏加修理建立元祐宮碑
亭是時奉天殿災勅命大臣開府江陵總督河廣川
貴採辦大木工部劉侍郎方受命以憂去上特旨陞
公左副都御史代其任先是天子稽重創建九廟而
西苑穆清之居歲有興造頗瀉蜀荆之材公至則近
水無復峻幹乃行巴庸棘道轉荆岳至東南川往來
督責鈎之荒裔中於是萬山之木稍出然帝室紫宮
舊制壞塊於永樂金柱圓長終不能合公奏言臣督
率郎中張國珍李祐副使張正和盧孝達各該守巡
叅政游震得副使周僉事於錦先後深入永順知峒
梭梭江叅政徐需僉事崔都入容美副使黃宗器入
施州金峒叅政靳學顏入永寧迤東蘭州儒溪副使
劉斯潔入黎州大全建昌董笑入烏蒙叅政繆文龍
入播州真州酉陽僉事吳仲禮入永寧迤西落洪班
鳩井鎮雄程嗣功入龍州叅政張定入銅仁省溪叅
議王重光入赤水猴峒僉事顧炳入思南潮底汪集
入永寧順崖而湖廣巡撫右僉都御史趙炳然巡按
御史吳百朋各先後親歷荆岳辰常四川巡撫右副

御御史黃光昇歷叙馬重夔巡按御史郭民敬歷印
雅貴州巡撫右副都御史高卿歷思石鎮黎巡按御
史朱賢歷永寧赤水臣自趨涪州六月上瀘叙而巨
材所生必於深林窮壑崇岡絕箸人跡不到之地經
數百年而後至合抱又解不空灌昔尚書宋禮及近
時尚書樊繼祖侍郎潘鑑採得逾尋丈者數株而已
今三省見採丈圍以上楠杉二十餘丈四五以上亦
一百一十七視前亦已超絕矣第所派長臣非常故
園園難合臣奉命初恐抄索未徧今則深入窮抄知
不可得而先年營建亦必別有所處伏望皇上勅下
該部計議量材取用庶臣等專心採辦而大工早集
矣上允其奏命求其次者其後木亦益出自江至於
京師簿筏相接而天子猶以皇祖時殿災後十年始
成今未六七載欲待得巨材故殿建未有期而西工
驟興漕下之木多取以爲用三省吏民暴露三年無
有休息期大臣以爲言天子亦自憐之將作大匠又
能規剗膠附極般輸之巧而見材度已足用公懇乞
興工罷採以休剗蜀民使者相望於道詞旨甚哀而

工部大臣力任其事天子從之考卜興工有日矣其
後漕數比先所下多有奇羨凡得木一萬一千二百
八十九章公上最推功於三巡撫下至小官莫不錄
其勞今不載獨載其所奏兩司涉歷採取之地曰四
川守巡督儒溪之木播州之木建昌天全之木鎮雄
烏蒙之木龍州蘭州之木湖廣督容美之木施州之
木永順卯峒之木靖州之木及督行河南購木于九
寢荆南購木于陝西階州武昌漢陽黃州購木于施
州永順貴州則於赤水猴峒思南潮底永寧順崖其
南出雲南金沙江云大抵荆楚雖廣山木少採伐險
遠必俟雨水而出而施州石坂亂灘迂迴千里貴陽
窮險山嶺深峭由川辰大河以達城陵磯蜀山懸隔
千里排巖批谷灘急漩險經時歷月始達會河而吏
民冒犯瘴毒林木蒙籠與虺蛇虎豹錯行萬人邪許
摧輓崩岸鳥獸哀鳴震天吸地蓋出入百蠻之中窮
南紀之地其艱如此故附著之俾後有考焉昔稱雍
州南山檀栢而天水隴西多材木故叢臺阿房建章
朝陽之作皆因其所有金源氏營汴新宮採青峰山

巨木猶以爲漢唐之所不能致公乃獲之山童木遁之時發天地之藏助成國家億萬年之丕圖其勤至矣是歲冬徵還內臺明年考察天下官已而病作請告病益侵乞還卿天子許之行至東安平山驛而薨嘉靖四十一年四月乙亥也年五十有七公仕宦二十餘年未嘗一日居家山東獲賊湖廣營造東南平倭累有白金文綺之賜而提督採運之擢皆從中下蓋上所自簡也祖考妣皆受誥贈母杜氏封太淑人所之官必迎養世以爲榮公事太淑人孝謹每巡行

日遣人問安還輒拜堂下太淑人茹素公跪以請者數太淑人不得已爲之進羞膳平生未嘗言人過其所敬愛與之甚親至其所不屑然亦無所假借在江陵有所使更遲至公問其故言方食市肆中又無馬駒故事臺所使吏廩食與馬爲荆州奪之公曰彼水年欲立名耳竟不復問周太僕還自滇南公不出候蓋不知也周公鄉里前輩以禮相責誚公置酒仲宣樓深自遜謝而已爲人美姿容自少衣服鮮好及貴後稱其志至京師大學士嚴公迎謂之曰公不獨才

望逾人丰采亦足矧儀朝廷矣所居官廉潔不苟採辦銀無慮數百萬先時推積堂中公絕不使入臺門第貯荆州府募召商夷賞購過常人皆懷之故總督三年地窮邊裔而民夷不驚以是爲難是歲奉天殿文武樓告成上製名曰皇極殿門曰皇極門而西宮亦不日而就天子方加恩臣下叙任事者之勞績而公不逮矣余與公少相知諸子來請撰述因就其家得所遺文字叅以所見聞稍加論次上之史館謹狀

行述

陸敬州述

李翱

吳郡陸叅字公佐生於世五十七年明於仁義者道
可以化人厚風俗者餘三十年連事觀察使不能知
退居於田者六七年由侍御史入爲祠部員外二年
出刺歙州卒於道貞元十八年四月二十日也凡人
之所不能窮者必推之於天天之注膏雨也人之心
以爲生旱苗然也雨與苗運相違或雨於海或雨於
山旱苗不得仰其澤惟人也亦然天之生俊賢也人
之心以爲拯顛賴之人然也賢者與顛賴之人時不
合或死於野或得其位而道不能行顛賴之人不能
被其惠膏雨之降也適然唯賢者之生於時也亦然
運相合旱苗仰其澤顛賴之人賴其力傳說耳盤尹
吉甫管夷吾之類也時帝合膏雨降雖終日賢哲生雖
比肩旱苗之不救百姓之弗賴顏子子思孟軻董仲
舒之類也故賢哲之生自有時百姓之賴其力天下
不賴其力亦天也嗚呼公佐之官雖列於朝雖刺於
州其出入始二年道之不行與居於田時帝差也公
佐之賢雖日聞其德行亦未必昭昭然聞於天子公

佐是以不得其職出刺一州又短命道病而死天下之人未蒙其德固宜然也則天之生君也授之以救人之道不授之以救人之位如膏雨之或雨於海或降於山旱苗之不沐其澤者均故君之不得其位以行其德者命也其亦不足於心者邪得是道者窮居於野非所屈冠冕而相天下非所伸其何有不足於心者邪

先大夫述

家 王安石

王氏其先出太原今爲撫州臨山人不知始所以徙其後有隱君子某生某以子故贈尚書職方員外郎職方生衛尉寺丞某公考也公諱某始字損之年十七以文干張公詠張公奇之改字公舜良祥符八年得進士第爲建安主簿時尚少縣人頗易之既數月皆畏翕然令賴以治常疾病闔縣爲禱祠縣人不時入稅州咎縣公曰孔目夷尚不時入稅貧民何獨爲耶即與校至府門取孔目吏以歸杖二十與之期三

日盡期民之稅亦無不入自將以下皆側目爲判官臨江軍守不法公遇事輒拮爭之以故事一政吏爲文書謾其上至公輒闔軍有蕭灘號難度以腐船度輒返吏呼公爲判官灘云豪吏大姓至相與出錢求轉運使下吏出公領新淦縣縣大治今三十年吏民稱說如公在政大理寺丞知廬陵縣又大治移知新淦縣政殿中丞到縣條宿奸數人上府流惡處自餘一以恩信治之嘗歷歲不嘗一人知韶州改次常博士尚書此曰員外郎夷越無男女之別前守類以爲

俗然即其得可已皆弗究公曰同是人也不可瀆其
倫夫所謂因其俗者豈謂是邪凡有萌蘖一掃而空
窮治之時未幾男女之行於市者不敢一塗胡先生
璦爲政範亦擬公此事部縣翁源多虎公教捕之民
言虎自斃者五今斷虎頭輿致州爲頌以獻公麾與
者出以頌還令其不喜怪不以其道說之不說也如
此蜀效忠士屯者五百人代不到謀叛詔小州即有
變無所可校梧佐吏始殊恐公不爲動獨捕其首五
人即日斷流之護出之界上刳佐吏因爭請付獄既
而聞其徒謀若以首赴獄當夜刳之必叛衆乃愈服
公完營驛倉庫建坊道隨所施設有條理長老言自
嶺海服朝廷爲吾置州守未有賢公若丁衛尉府君
憂服除通判江寧府閩兩將一以府倚公辦寶元二
年二月二十三日以疾棄諸孤官下享年四十六公
於忠義孝友非勉也宦遊常奉親行獨西川以遠又
法不聽在新繁未嘗劇飲酒歲時思慕哭殊悲其自
奉如甚嗇者異時悉所有又貸於人治酒食須以娛
其親無秋毫愛也人乃或以爲奢居未嘗怒笞子弟

每置酒從容爲陳孝悌仁義之本古今存亡治亂之
所以然甚適其自任以世之重也雖人望公則亦然
卒之官不克其材以夭嗚呼其命也母謝氏以公故封永
安縣君娶某氏封長壽縣君子男七人女一人適張
氏處而人將以某月日葬某處子男等謹撰次公事
如右以求有道而文者銘焉以取信於後世

紀事

題跋

紀事

燕將錄

唐杜牧

譚忠者絳人也祖瑒天寶末令內黃死燕寇忠豪健
喜兵始去燕燕收劉濟與二十人障白狼口後將漁
陽軍留范陽元和五年中黃門出禁兵伐趙魏牧田季安
令其徒曰師不踰河二十五年矣今一旦越魏伐趙
趙誠南魏亦南矣計焉之奈何其徒有起佑伍而言
曰願借騎五千以除君憂季安大呼曰壯矣哉兵決
出格沮者斬忠其時為燕使魏知其謀乃入謂季安
曰果之謀是引天下之兵也何者往年王師取蜀取
吳莫不失一是相臣之謀今王師越魏伐趙不使若
臣宿將而專付中臣不輸天下之甲而多出禁甲君
知誰為之謀此乃天子自為之謀欲將誇服於臣下
也今若師未叩趙而先碎於魏是上之謀反不如下
且能不恥於天下乎既恥且怒於是任智畫策伏猛
將練精兵畢力再舉涉河鑑前之敗必不越魏而伐
趙校罪輕重必不先趙而後魏是上不上下不下當
魏而求也季安曰朕則若之何忠曰王師入魏君厚
犒之於是悉甲壓境歸曰伐趙則可陰遣趙人書曰

魏若伐趙則河北義士謂魏賣友魏若與趙則河南
忠臣謂魏反君賣友反君之名魏不忍受執事若能
陰解陣障遣魏一城魏得恃之奏捷天子以為符信
此乃使魏北得以奉趙西得以為臣於趙有角尖之
耗於魏獲不世之利執事豈能無意於趙乎趙人脫
不拒君是魏霸基安矣季安曰善先生之來是天眷
魏也遂用忠之謀與趙陰計得其堂陽忠歸燕謀欲激燕伐
趙會劉濟合諸將曰天子知我怨趙今命我伐之趙亦
必大備我伐與不伐孰利忠疾對曰天子終不使我
伐趙趙亦不備燕劉濟怒曰爾何不直言濟以趙叛
命忠繫獄因使人視趙果不備燕後一日詔果來曰
燕南有趙北有猛趙辱不可捨而事趙也燕
其為子謹設北疆勿使子復挂憂而得專心於趙
此亦燕之功也劉濟乃解獄召忠曰信如子斷矣何
以知之忠曰潞牧盧從史外親燕內實忌之外絕趙
內實與之此為趙畫曰燕以趙為障雖怨趙必不殘
趙不必為備一旦視趙不敢抗燕二且使燕獲疑天
子趙人既不備燕潞人則妄告於天子曰燕厚怨趙

今趙見伐而不備燕是燕反與趙也此所以知天子終不使君伐趙趙亦必不備燕劉濟曰今則奈何忠曰燕孕怨天下無不知今天子伐趙君坐全燕之甲一人未濟易水此正使潞人將燕賞恩於趙敗忠於上而皆售也是燕貯忠義之心卒染私趙之口不見德於趙人惡聲徒嘈嘈於天下耳惟君熟思之劉濟曰吾知之矣乃下令軍中曰五日畢出後者醢以殉濟乃自將七萬人南伐趙屠饒陽東鹿殺萬人暴卒於師濟子總襲職忠復用事元和十四年春趙人獻城十二冬誅齊三分其地忠因說總曰凡天地數窮合必離離必合河北與天下相離六十年矣此亦數之窮也必與天地復合且建中時朱泚携天子狩畿甸李希烈僭於梁王武俊稱趙朱泚稱篡田悅稱魏李納稱齊郡國往還美兵皆低目而視當此之時可謂危矣狀天下卒於無事自元和以來劉闢守蜀棧道劍關自以爲子孫世世之地狀軍卒三萬數月見蜀李錡橫大江撫石頭全吳之兵不得一戰反東縛帳下田季安守魏盧從史守潞皆天下之精甲駕趙爲騎

馬立相視可謂彊矣狀從史繞塹五十里萬數自護身如大醉忍在輜車季安死憤折未收家爲逐客蔡人被重索之甲圓三石之弦持九尺之矛突前號後卒如搏鶚一可枝百者累數萬人四歲不北二三可爲堅矣狀夜半大雪忽失其城齊人經地數千里倚渤海牆泰山塹大河指甲數億鈐其阨可謂安矣狀兵折於趙渾首竿於都市此皆君之自見亦非人力所能及益上帝神兵下來誅之耳今天子巨謀纖計必平章於大臣鋪樂張獵未嘗戴星徘徊顧玩之臣頑澀下展縮衣節口以賞戰士此志豈須史忘天下哉今國兵且駸駸北來趙人已獻城十二助魏破齊惟燕未得一日之勞爲子孫壽後世豈能帖帖無事乎吾深爲君憂之總泣且拜曰自數月來未聞先生之言今日者幸枉大教吾心定矣明年春劉總出燕卒於趙忠護總喪來數日亦卒年六十四官至御史大夫忠弟憲前范陽安次令持兄喪歸葬於絳常往來長安間元年孟春某過於馮翔屬縣北微中因吐其兄之狀某因直書其事至於褒貶之間俟學春秋

者焉

書何易于

唐 孫 樵

何易于嘗爲益昌令縣距刺史治所四十里城嘉陵河南刺史崔朴嘗乘春自上游多從賓客歌酒泛舟東下直出益昌旁至則索民挽舟易于即自腰笏引舟上下刺史驚問狀易于曰方春百姓不耕即饑陳不可奪易于爲屬令當其無事可以免役刺史與賓客跳出舟偕騎還去益昌民多即山畝茶利私自入會鹽鐵官奏重推筦詔下所在不得爲百姓匿易于視詔曰益昌不征茶百姓尚不可活矧厚其賦以毒民乎命吏剗去吏爭曰天子詔所在不得爲百姓匿今剗去罪愈重吏止死明府公免竄海裔耶易于曰吾寧愛一身以毒一邑民乎亦不使罪蔓爾曹即自縱火焚之觀察使聞其狀以易于挺身爲民卒不加劾邑民死巷子弱業破不能具葬者易于輒出俸錢使吏爲辦百姓入常賦有垂白傳杖者易于必召坐與食問政得失庭有競民易于皆親自與語爲指白枉直罪小者勸大者杖悉立遣之不以付吏治益昌三年獄無繫民民不知後改綿州羅江令其治視益

昌是時故相國裴公刺史綿州獨能嘉易于治嘗從
觀其政道從不過三人其全易于燕如是會昌五年
樵過出益昌民有能言何易于治狀者且曰天子設
上下致以免吏而易于考止中上何哉樵曰易于督
賦如何曰止請常期不欲緊繩百姓使錢出粟帛督
役如何曰度支費不足遂出俸錢募優貧民饋給往
來權勢如何曰傳符外一無所與擒盜如何曰無盜
樵曰予居長安歲聞給事中校致則曰某人為某縣
得上下考由考得某官問其政則曰某人能督賦先
期而畢某人能督後省度支費某人當道能得往來
達官為好言某人能擒若干盜反若干盜縣令得上
下致者如此邑民不對笑去樵以為當世上位者皆
知求才為切至如緩急補吏則曰吾患無以其治庸
命弊賢則曰吾患無以塞詔及其有之知者何人哉
繼而言之使何易于下有得於生必有得於死者有
史官在

書田將軍邊事

唐 孫 樵

背臨邛南馳越二百里得嚴道郡實與沱黎越雋俱
為邊城迫於群蠻田在賓將軍刺嚴道三年能條悉
南蠻事為樵言曰巴蜀西迫於戎南偏於蠻宜有以
制之者當廣德建中間西戎兩敗馬於岷江其眾如
蟻前鋒魁健皆擐五屬之甲持信尋之戟徐呼接步
且戰且進蜀兵遇闕如值橫堵羅戈如林發矢如彗
皆折刃吞鏃不能斃一戎而况陷其陣乎然其戎兵
踐吾地日深而疫死者日眾即自度不能留亦輒引
去故蜀人為之語曰西戎尚可南蠻殘我自南康公
鑿青谿道以和群蠻俾由蜀而貢又擇群蠻子弟叢
於錦城使習書算業就輒去復以他繼如此垂五十
年不絕其來則其學於蜀者不啻千百故其國人皆
能習知巴蜀土風山川要害文皇帝三年南蠻果大
入成都門其三門四日而旋其所剽掠自成都以南
越雋以北八百里之間民畜為空加以散卒貧民持
兵羣聚因緣劫殺官不能禁由是西蜀十六州至今
為病自是以來群蠻常有屠蜀之心居則思蓄聚

動則練兵講武而又俾其習於蜀省伺連帥之間隙
察兵賦之虛實或聞蜀之細民苦於重征且將啓之
以幸非常吾不知羣蠻此舉大釁以南爲國家所有
乎且每歲發卒以戍南者皆成都頑民飽餉餒承十
九如教雖知鉦鼓之數不習山川之險吾常伺其來
朔風正嚴緩步坦途日次一舍固已呀然汗矣而况
歷重阻即嚴程束甲而趨扶戟而副耶加以爲將者
刻薄以自入餽運者縱吏以鼠竊縣官當給帛則以
疎而易良當賑粟則以沙而黍粒如此則邊卒忍怨
望之不暇又烏能殊死而力戰乎此巴蜀所以爲憂
也樵曰誠如將軍言苟爲國家計者孰若詔嚴道況
黎越雋三城太守俾度其要害按其壁壘得自募卒
以守之具兵籍於郡則易爲後卒出於邊則習其險
而又各於其部善相美地分卒爲屯春夏則耕蠶以
資其衣食秋冬則嚴壁以俟其寇自連帥即能督之
歲遣廉白吏視其卒之有無勅其守之不法者以聞
如此則縣官無餽運之費奸吏無因緣之盜兵足食
給卒無胥怨於將軍何如田將軍曰如此何患言卒

遂書

拾甲子年事

唐 羅 隱

大和中張谷納邯鄲人李巖女備歌舞具及長大妍麗豐足殆不似下賤物又能傳故都聲以奉課人摧沮有時涼曉哀轉歷歷見趙家之遺臺老樹雖驚離予往之懷似不能多也雅為谷所愛因目曰新聲及劉從諫得父封谷以窮遊佐其事新聲亦從去然性本便蕙羣谷之起居謀慮皆預有承迎故頗聞中外消息時從諫得志後勾聚亡命以窺脅朝廷大為四方人怪訝有實其事於谷者谷不以介意新聲曰妾於公直巾屨間狎玩者耳除歌樂外不當以應顧命然食人之食憂人之憂理常也况妾乎前日天子授從諫節度使時非從諫有戰野之功拔城之績蓋以其先父挈齊還我去就間未能奪其嗣耳而公不幸為其屬則牽制之道在此不在彼也自劉氏奄有全趙更改歲時未嘗聞以一縷一蹄為天子壽而指使羣卒無賴人且章武朝數鎮顛覆皆以雄才傑氣尚不能固天子恩况從諫擢自見女子手中一旦襲如何家業苟不以法而得亦宜以不法而終此倚伏之

常數也而又卒伍佻險言語不祥是不為齊鬼所酬而死於帳下者幸矣孰謂公從其事反不知其事者哉姑不能早折其肘臂以作天子計則宜脫族西去大丈夫勿顧一飯恩以骨肉腥健兒衣食言訖悲涕流落谷不決者三月新聲後進以其業不用也縊殺之會昌中從諫死以其子露父意族之谷竟從逆嗚呼謀及婦人者必亡而新聲之言惜其不用余前過太行時有傳吏能道當時事因拾於編簡

說石烈士

唐 羅 隱

石孝忠者生長韓魏間其為人猛悍多力少年時偷
鵠殺狗殆不可勝計州里甚苦之後折節事李愬為
愬前驅其信任與愬家人伍元和中蔡人不歸天子
用裴丞相者光顏者重九者皆受丞相指揮明年蔡
平天子快之詔刑部韓侍郎撰平蔡碑將所以大丞
相功業於蔡州孝忠一旦熟視其文大恚怒因作力
推去其碑僅傾彫者再三吏不能止乃執請節度使
悉以聞時章武皇帝方以東北事倚諸將聞是卒也
甚訝之命具獄將斃於碑下孝忠度必死也苟虛死
則無以明愬功乃偽低畏若不勝按驗吏罔之未知
其為人也孝忠伺吏隙用枷尾拉一吏殺之天子聞
之怒且使送闕下及至也亦未異其人因召見曰汝
推吾碑殺吾吏為何孝忠頓首曰臣一死未足以塞
責但得面天顏則赤族無恨矣臣事李愬歲久以賊
故給事無不聞見平蔡之日臣從在軍前且吳秀琳
蔡之姦賊也而愬降之李祐蔡之驍將也而愬擒之
蔡之爪牙脫落於是矣及元濟縛雖丞相與二三輩

不能先知也蔡平之後刻石紀功盡歸乎丞相而愬
第其名與光顏重九齒愬固無所言矣設不幸更有
一淮西其將略如愬者復肯為陛下用乎賞不當功
罰不當罪非陛下所以勸人也臣所以推去碑者不
惟明愬之績亦將為陛下正賞罰之源臣不推碑無
以為吏擒臣不殺吏無以見陛下臣死不容時矣請
就刑憲宗既得淮西本末且多其義遂殺之因命曰
烈士復召翰林段學士撰淮西碑一如孝忠語後孝
忠隸江陵軍驅使大中末白丞相鎮江陵余求謁丞
相府有從事為余道孝忠事遂次為將所以教人為
下

書劉廷式事

宋 蘇 軾

予昔爲齊州殿中丞劉廷式爲通判廷式齊人也而子由爲齊州掌書記得其鄉閭之言以告予曰廷式通禮學究未及第時議娶其鄉人之女既約而未納幣也廷式及第其女以疾兩目皆盲女家躬耕貧甚不敢復言或勸納其幼女廷式笑曰吾心已許之矣雖盲豈負吾初心哉卒娶盲女與之偕老盲女死於密廷式喪之逾年而哀不衰不肯復娶予偶問之哀生於愛愛生於色子娶盲女與之偕老義也愛從何生哀從何出乎廷式曰吾知喪吾妻而已有目亦吾妻也無目亦吾妻也吾若緣色而生愛緣愛而生哀色衰愛弛吾哀亦忘則凡揚袂倚市目挑而心招者皆可以爲妻也耶予深感其言曰子功名富貴人也或笑予言之過予曰不然昔羊叔子娶夏侯霸女霸叛入蜀親友皆告絕而叔子獨安其室恩禮有加焉君子是以知叔子之貴也其後卒爲晉元臣今廷式亦庶幾焉若不貴必且得道時坐客皆憮然不信也昨日有人自廬山來云廷式今在山中監太平觀西

目奕奕有紫光步上下峻坂往復六十里如飛絕粒不食已數年矣此豈無待而然哉聞之喜甚自以吾言之不安也乃書以寄密人趙果卿果卿與廷式善且嘗聞余言者廷式字得之今爲朝請郎果卿字明叔鄉貢進士亦有行義元豐六年七月十五日東坡居士書

秦士錄

明 宋 濂

鄧弼字伯翊秦人也身長七尺雙目有紫稜開合閃閃如電能以力雄人隣牛方闢不可擊拳其脊折仆地市門石鼓十人舁弗能舉兩手持之行然好使酒怒視人人見輒避曰狂生不可近近則必得奇辱一日獨飲娼樓蕭馮兩書生過其下急牽入共飲兩生素賤其人力拒之弼怒曰君終不我從必殺君亡命走山澤耳不能忍君苦也兩生不得已從之弼自據中筵指左右揖兩生坐呼酒歌嘯以爲樂酒酣解衣箕踞拔刀寘案上鏗然鳴兩生雅聞其酒狂欲起走弼止之曰勿走也弼亦粗知書君何至相視如涕唾今日非速君飲欲以吐胃中不平氣耳四庫書從君問即不能答當血是刃兩生曰有是哉遽摘七經數十義叩之弼歷舉傳疏不遺一言復詢歷代史上下三千年纔纔如貫珠弼笑曰君等伏于未也兩生相顧慘沮不敢再有問弼索酒被髮跳叫曰吾今日壓倒先生矣古者學在養氣今人一服儒衣反奄奄欲絕徒欲馳騁文墨兒撫一世豪傑此何可哉此何可

哉君等休矣兩生素負多才藝聞弼言大愧下樓足不得成步歸詢其所與游亦未嘗見其挾冊呻吟也秦定未德王執法西御史臺弼造書數千言袖謁之闕卒不爲通弼曰若不知關中有鄧伯翊耶連擊踏數人聲聞于王王令隸人捧入欲觀之弼盛氣曰公奈何不禮壯士今天下雖號無事東海島夷尚未臣順間者駕海艦互市于鄣即不滿所欲出火刀斫柱殺傷我中國民諸將軍控弦引矢追至大洋且戰且却其虧國體爲已甚西南諸蠻雖曰稱臣奉貢乘黃屋左纛稱制與中國等尤志士所同憤誠得如弼者一二輩驅十萬橫磨劍伐之則東西止日所出入莫非王土矣公奈何不禮壯士庭中人聞之皆縮頸吐舌舌久不能收王曰爾自號壯士解持矛鼓譟前登堅城乎曰能百萬軍中可刺大將乎曰能突圍潰陣得保首領乎曰能王顧左右曰姑試之問所須曰鐵鎧良馬各一雌雄劍二王即命給與陰成善槩者五十人馳馬出東門外然後遣弼往王自臨觀空一府隨之暨弼至衆槩並進弼虎吼而奔人馬辟易五十

步面目無色已而烟塵漲天但見雙劍飛舞雲霧中連斫馬首墮地血漭漭滴王撫髀驩曰誠壯士誠壯士命勺酒勞弼弼立飲不拜由是狂名振一時至此之王鐵槍云王章薦諸天子會丞相與王有隙格其事不下弼環視四體嘆曰天生一具銅筋鐵肋不使立勲萬里外乃槁死三尺蒿下命也亦時也尚何言遂入王屋山為道士後十年終

史官曰弼死未二十年天下大亂中原數千里人影殆絕元烏來降失家競棲林木間使弼在必當

有以自見惜哉弼見不靈則已若有靈吾知其怒髮上衝也

書劉真人事

明 宋 濂

劉真人德仁滄州樂陵人始生有光熙其室及長讀書稍通大義會宋靖康之亂徙居鹽山太平鄉一日晨起有老叟乘犢車相過撫道德經要言授之曰善識之可以脩身可以化人仍投筆一枝而去自是元學頓進從之游者眾真人乃取所授書數繹其義以示人一曰視物猶己勿萌戕害兇嗔之心二曰忠於君孝於親誠於人辭無綺語口無惡聲三曰除邪淫守清靜四曰遠勢利安貧賤力耕而食量入為用五曰母事悋喪母習盜竊六曰母飲酒茹葷衣食取足母為驕盈七曰虛心而弱志和光而同塵八曰母恃強梁謙尊而光九曰知足不辱知止不殆學者宜世守之金大定初詔居京城天長觀賜號東岳真人傳其道者幾遍國中且善於劾召之術趙氏烏狐所崇真人劾之里中瑩兆自焚狐數百鳴嘯赴火死人尤神之然其養母如禮及亡喪祭一遵世教無愆度者後若十年追封無憂普濟開明洞微真人德仁卒陳師正嗣師正幼魚于河德仁挈以入道能預知吉凶

事師正卒張信真嗣有詩文數百篇號元真集傳于世信真卒毛希琮嗣當金之亡兵戈倏擾希琮能以柔而存希琮卒嗣希誠嗣元憲宗甚尊禮之賜真人號曰太元名其教曰真大道仍給璽書護之希誠卒孫德福嗣德福卒李德和嗣德和卒岳德文嗣德文卒張清忠嗣自德仁至此世稱之為九祖云

史官曰道喪千載諸子之言人人殊德仁在宋金之間髣髴老子遺意以化人人亦多從之者蓋其清修寡欲謙卑自守力作而食無求於人實與天理合也天理人心所同固足以感召歟彼得之而此失之其亦有以也夫

書博鷄者事

明 高 啟

博鷄者表人素無賴不事產業日抱鷄呼少年博市中任氣好鬪諸鳥里俠者皆下之元至正表有守多惠政民甚愛之卻使者臧新貴將按郡至表守自負年德易之聞其至笑曰臧氏之子也或以告臧臧怒欲中守法會表有豪民嘗受守杖知使者意嚙即誣守納己賕使者遂逮守腸服奪其官表人大憤然未有以報也一日博鷄者邀於市眾知有鳥因讓之曰若素勇徒能藉貧弱者耳彼豪民恃其貴誣去賢使君表人失父母若誠丈夫不能為使君一奮臂邪博鷄者曰諾即入閭左呼子弟素健者得數十人邀豪民於道豪民方華衣乘馬從羣奴而馳博鷄者直前捋下提歐之奴驚各亡去乃挽豪民衣自衣復自策其馬麾眾推豪民馬前反接狗諸市使自呼曰為民誣太守者視此一步一呼不呼則杖其背盡創豪民子聞雞鳴宗族僮奴百許人欲要襲以歸博鷄者逆謂曰若欲死而父即前鬪否則閭門善侯吾行市畢即歸若父無恙也豪民子懼遂杖殺其父不敢動稍

歛衆以去表人相聚從觀歡動一城郡錄事駭之馳
白府府佐快其所爲陰縱之不問日暮至豪民第門
拚使跪數之曰若爲民不自謹冒使君杖汝法也敢
用是爲怨望又投間蟻污使君使罷汝罪宜死今姑
貸汝後不善自改且復妄言我當焚汝廬戕汝家矣
豪民氣盡以額叩地謝不敢乃釋之傳鷄者因告衆
曰是足以報使君者未邪衆曰若所爲誠快然使君
冤未白猶無益也傳鷄者曰然即連猪爲巨幅廣二
丈大書一屈字以兩竿夾揭之走許行御史臺臺臣
弗爲理乃與其徒日張屈字遊金陵市中臺臣慙追
受其牒爲復守官而黜戒使者方是時傳鷄者以義
聞東南高子曰余在史館聞翰林天台陶先生言傳
鷄者之事觀表守雖得民然自喜輕上其禍非外至
也戒使者枉用三尺以離一言之憾固賊戾之士哉
第爲上者不能察使匹夫攘袂羣起以伸其憤識者
固知元政荼酷而變興自下之漸矣

書佛郎機遺事

明 王守仁

見素林公聞寧濠之變即夜使人範錫爲佛郎機銳
并批火藥方手書勉予竭忠討賊時六月毒暑人多
道暈死公遣兩使裹糧從間道冒暑晝夜行三千餘
里以遺予至則濠已就擒七日予發書爲之感激涕
下蓋濠之擒以七月二十六距其始事六月十四僅
月有十九日耳世之君子當其任能不畏難巧避者
鮮矣况已致其事而能急國患踰其家如公者予益
公之忠誠振於天性故老而彌爲身退而憂愈深節
愈勵嗚呼是豈可以聲音笑視爲哉欲列其事於朝
顧非公之心也爲作佛郎機私詠君子之同聲者將
不能已於言耳矣
佛郎機誰所爲截取比干腸裹以鴟夷皮義宏之
血霧不足睢陽之怒恨有遺老臣忠憤寄所洩震驚
百里賊膽披徒請尚方劍空聞魯陽揮段公笏板不
在茲佛郎機誰所爲

劉忠愍公死事狀

明 羅洪先

鄉人錦衣指揮彭德清往來王振門下頗用事諸公卿率趨謁而公獨不為禮彭卿之會公上疏彭欲假以相報乃激振曰劉某疏中權不下移之言暗指公也振既大怒而公疏中常言太常不可用道士且以進士處之未幾編修重璘自陳願為太常少卿振因誣公與璘同謀故先以言為璘地并逮下獄已而陰縱錦衣衛使馬順以計殺公順是時掌衛事一日五更攜一小校推監門公與重璘小校前持公公知有變大呼曰太祖太宗之靈在天汝何得擅殺我小校持刀斷頸流血被體屹立不動順走前舉足踢倒因曰如此無禮遂支解之裹以蒲包埋衛後空處董從旁掘其血裾數日密歸公家人始知公死乃以血裾為觀歸葬小校失其姓名本盧氏人與耿公九疇為鄉鄰耿素愛其少年俊美因與往來後久不至甚訝之一日見耿耿視其貌羸黃不類惜之曰得無有他疾乎何羸至是小校吐實且曰順先一夕密語某曰今夜有事汝當早來至期令懷刃相隨迫於勢

不敢不行此聞劉公為忠臣是某故作逆天理事死有餘罪特來別公且謝誤愛耳因慟哭悔恨不自己未幾果卒耿與廣信僉都御史高公明嘗言之高語永豐鍾恭愍子知縣啓啓以語東廓先生而洪先讀先行人如壙手記公下獄在正統八年六月十二日至二十一日而變作二十三日家人始得聞之又二日乃敢發喪當是時親朋無相弔者踰月而歸此事固秘莫得其詳公家諱祭自二十一日後連三舉益亦疑之不知實二十一日也先行人手記日載晴雨諸細碎此事甚大且經目擊其必不誣也

書應生事

明 王世貞

仲芳既已杖朝堂則從四期門鵠夷裘來血泚泚下也吏士目攝亡得問誰何諸稍熟仲芳者拊鼻自引匿去而故下獄尚書當仲芳迷罔不道死尚書坐輕贖矣曹即坐亡奉行謫矣獄吏一二緣大臣指謾罵曰嘻而不治職方氏即為趣公治鬼室仲芳所止獄舍卑甚又久兩蛙龜分枕席而卧久之應生乃當視獄從血肉中辨仲芳別築室醫藥勞問相踵始仲芳以杖瘡甚左脚短三寸叩叩距虛然病大汗小愈已

得改室燥遂愈王侍郎者吉人不欲言其名與大臣有連微聞之意謂何用我為且累之詈元宰若詈敵奈何即不遽令苦地下亦令苦地上而更相席哉風尚書求其主尚書心知為應生也難之或謂生且避謝亡有生喟然曰夫夫也豈其以余非人者益旦夕候仲芳自如移年期滿當請報生走尚書所絮語公力爭之可得也母令天下有以詈廷尉絮法日數反尚書熟計主上自管三尺一旦爭不勝而且謂我速死者謝應生第待之生退欲自具草救亦竟念其事

乃已語余天其殆者私仲芳不爾左脚亡遂短而大臣畏揺衆詭云吾不敢以身益主上過母恐然飛語上矣報論死仲芳且死屬家人藏余血三歲而碧者即地下必有以報應生

書二館人事

明 王世貞

余守比部時見南來人道任兵憲環館人事奇之兵憲始丞吳時也倭暴至臺檄丞以鄉兵五百徵之兵故市人子倉卒應募不習戰遇輒鳥散走而丞方獨身從親信抵射賊賊中勇敢者奮持長刀踰溝來擊丞館人挾抱丞上馬丞上馬則賊已刃尾之館人乃直前手搏賊連中數搶手不舍竟死丞以間得逸去余使三輔遇韓戶部叔陽亦稱其館人云始韓以金華令入觀過淮陰改陸車軌輒從水上行也已薄水車破之韓與館人俱溺馬館人急持韓衣裾不置會傍有絕繩鉤下救者緣且及館人號曰左被髮而溷為令救令有重賞救者乃移緣鉤令起宛轉間竟失館人弗及矣余聞而悲其事問二人姓名俱不得以為恨於予士居平誦說詩書信眉目掀鼻昂頰鼓掌稱仗節者何限一旦事起而抱首鼠竄相接也思至則許人以死過則倍之非其初許謬也亦死生之際深矣夫二館人鄙人耳豈有師友講議之素其死亦豈遂以為名哉倉卒顛沛之際違其一念所不容已

者而已夫違其所不容已而其究乃竟有所濟則不為徒死哉

題跋

書讀題跋上

唐

宋

元

讀儀禮

唐 韓愈

余嘗苦儀禮難讀又其行於今者蓋寡公襲不同復之無由考於今誠無所用之然文王周公之法制粗在於是孔子曰吾從周謂其文章之盛也古書之存者希矣百氏雜家尚有可取況聖人之制度邪於是掇其大要奇辭與旨著於篇學者可觀焉惜乎吾不及其時進退揖讓於其間嗚呼盛哉

讀墨子

唐 韓愈

儒議墨以上同兼愛上賢明鬼而孔子畏大人居是邦不非其大夫春秋譏專臣不上同哉孔子況愛親仁以博施濟衆爲聖不兼愛哉孔子賢賢以四科進褒弟子疾殽世而名不稱不上賢哉孔子祭如在識祭如不祭者曰我祭則受福不明鬼哉儒墨同是堯舜同非祭討同修身正心以治天下國家美不相悅如是哉余以爲辯生於末學各務信其師之說非二師之道本然也孔子必用墨子墨子必用孔子不相用不足爲孔墨

讀荀子

唐 韓愈

始吾讀孟軻書然後知孔子之道尊聖人之道易行王易王霸易霸也以爲孔子之徒沒尊聖人者孟氏而已晚得楊雄書益尊信孟氏因雄書而孟氏益尊則雄者亦聖人之徒歟聖人之道不傳於世周之衰好事者各以其說干時君紛紛籍籍相亂六經與百家之說錯雜然老師大儒猶在大子秦黃老于漢其存而醇者孟軻氏而止耳楊雄氏而止耳及得荀氏書於是又知有荀氏者也考其辭時若不粹要其歸與孔子異者鮮矣抑猶在軻雄之間乎孔子刪詩書筆削春秋合於道者著之離於道者黜去之故詩書春秋無疵余欲削荀氏之不合者附於聖人之籍亦孔子之志歟孟氏醇乎醇者也荀與楊大醇而少疵

讀韓愈所作毛穎傳

唐 柳宗元

自吾居夷不與中州人通書有來南者時言韓愈爲毛穎傳不能舉其辭而獨大笑以爲怪而吾久不克見楊龜隱之始來持其書索而讀之若捕龍蛇搏虎豹急與之角而力不敢暇信韓子之怪於文也世之模擬竄竊取青媲白肥皮厚肉柔筋脆骨而以爲辭者之讀之也其大笑固宜且世人笑之也不以其俳乎且俳又非聖人之所棄者詩曰善戲謔兮不爲虐考太史公書有滑稽列傳皆取乎有益於世者也故

學者終日討論答問呻吟習復應對進退掬溜播灑則罷憊而廢亂故有息焉游馬之說不學操縵不能安絃有所拘者有所縱也太羹元酒體節之薦味之至苦而又設以奇異小蟲水草查梨橘柚苦鹹酸辛雖蜚吻裂鼻縮舌澀齒而咸有爲好之者文王之葛蒲直屈到之姜曾皙之羊棗然後盡天下之奇味以足於口獨又異乎韓子之爲也亦將施焉而不爲虐歟息焉游馬而有所縱歟盡六藝之奇味以足於口歟而不若是則韓子之辭若壅大川焉其必決而放

諸陸不可以不陳也且凡古今是非六藝百家大細穿穴而不遺者毛穎之功也韓子窮古書好斯文嘉穎之能盡其意故奮而爲之傳以發其鬱積而學者得以勵其有益於世歟是其言也固與異世者語而貪常嗜瑣者猶咕咕然動其喙彼亦勞甚矣乎

讀鬼谷子

唐來鵠

聖人神疲力盡以行道開禮展樂以告人欲天下不
忘子溫良忠慤敬讓之心也後之明王又增以設學
校立廟祀遷豆時修衣冕屨製其天下之書則牆
整整林軸麗麗斯可謂教道之備者也如是猶有不
率其勸不由乎道者所以聖人憂其竄墮乃曰三年
不為禮禮必壞三年不為樂樂必崩何訓之示久之
至而訓之示之之難也鬼谷子者鬼谷先生之書也
六國時所作其教人容動色理氣意之間以詭詭激
許恍固呼哩離合揣測反覆儉滑次術悉備於章旨
余讀之知六國之時得術是書者惟秦儀而已亦盜
祿入國之秘經然自六經已降至於漸醜之後其中
有數篇者乃今之粉兒乳子亦可與秦儀齒也至如
捫合飛箱皆篇名實時之常態是知漸醜之後不讀鬼
谷之書者其行事皆得自然符契也嗚呼聖人之道
設禮樂詩書之多學校廟祀之盛孜孜矻矻則何易
壞易崩入人之心難耶鬼谷之書三卷而已代不家
有則何自然符合奧妙契人心之易邪使天下用聖

人之道學溫良忠慤敬讓之心得如自然符契鬼谷之
書者則吾見聖人無憾矣抑余瞋目放已閤陶入太
古風是不可得也昔蒼頡文字見鳥之哭不知鬼谷
作是書鬼何為邪吾今不覺毛磔胆寒若是疑今之
復有鬼谷新書而懷之者則吾不知其備

書襄城驛

孫樵

襄城驛號天下第一及得寓目視其沼則淺混而茅視其舟則離散而膠庾除甚蕪堂廡甚殘烏觀其所謂宏麗者訊於驛吏則曰忠穆公嘗收梁州以襄城控二節度治所龍節虎旗馳騎奔輅以去以來較交蹄劇由是崇侈其驛以示雄大蓋當時視他驛為壯且一歲賓至者不下數百輩苟夕得其庇餽得其飽皆暮至朝去者寧有顧惜心耶至如棹舟則必折篙破舷碎鷁而後止漁釣則必枯泉汨泥盡魚而後止至

有飼馬於軒宿隼於堂凡所以汚敗室廬糜毀器用官小者其下雖氣猛可制官大者其下益暴橫難禁由是日益碎破不與曩類某曹八九輩雖以供饋之隙一二力治之其能補數十百人殘暴乎語未既有老妪笑於傍且曰舉今州縣皆役也吾聞開元中天下富蕃號為治平踵千里者不裹糧長子孫者不知兵今者天下無金革之聲而戶口日益破疆場無侵削之虞而墾田日益寡生民日益困財力日益竭其故何哉凡與天子共治天下者刺史縣令而已以耳

目接於民而政令達於行也今朝廷命官既已輕任刺史縣令而又促數於更易且刺史縣令遠者三歲再更故州縣之政苟有不利於民可以出意革去者其在刺史則曰我即去何用如此當愁醉暖當饒飽鮮囊帛匱金笑與秩終嗚呼州縣者真驛耶矧更代之際黠吏因緣恣為奸欺以賣州縣者乎如此而欲望生民不困財力不竭戶口不破墾田不寡難哉予既揖退老妪條其言書於襄城驛屋壁

讀開元雜報

孫樵

樵襄於襄漢間得數十幅書繫日條事不立首末其略曰某日皇帝親耕籍田行九推禮某日百寮行大射禮於安福樓南某日安北諸蕃君長請扈從封禪某日皇帝自封東還賞賜有差某日宣政門宰相與百寮廷爭十刻罷如此凡數十百條樵當時未知何等書徒以爲朝廷近所行事有自長安來者出其書示之則曰吾居長安者新天子嗣國及窮幽自瀆則見行南郊禮安有籍田事乎况九推非天子禮耶又

嘗入太學見叢覽員士而起若堂皇者就視得石刻乃射堂舊址則射禮廢已久矣國家安能行大射禮耶自關已東水不敗田則旱敗苗百姓入常賦不足至有賣子爲豪家後者吾嘗背華走洛遇西戍還兵千人縣給一食力屈不支國家安能東封從官禁兵安所仰給耶北虜驚囁邊毗勢不可控宰相馳出責戰尚未報功况西關復驚于西戎安有扈從事耶正皇帝以御史竊議宰相事望嶺南是者四人至今卿士辭古相戒况宰相陳奏于伏乎安有廷奏評事邪

語未及終有知書者自外來曰此皆開元政事蓋當時條布於外者樵後得開元錄驗之條條可復云然尚以爲前朝所行不當盡爲墜典及來長安日見條報朝廷事者徒曰今日除某官明日授某官今幸於某明日畋於某誠不類數十幅書樵恨生不爲太平男子及觀開元中事如奮臂出其間因取其書帛而漫志其未凡補缺文者十三正訛文者十一是歲大中五年也

讀司馬法

唐 皮日休

古之取天下也以民心今之取天下也以民命唐虞尚仁天下之民從而帝之不曰取天下以民心者乎漢魏尚權取赤子於利刃之下爭寸土於百戰之內由士爲諸侯由諸侯爲天子非兵不能威非戰不能服不曰取天下以民命者乎由是編之爲術術愈精而殺人愈多法益工而害物益甚嗚呼其亦不仁矣蚩蚩之類不敢惜死者上懼乎刑次貪乎賞民之於君猶子也何異父欲殺其子先給以威後啗以利哉孟子曰我善爲陣我善爲戰大罪也後之君有是者雖不得士吾以爲猶士也

題叔孫通傳後

唐 皮日休

古之所謂禮不相襲樂不相沿者何哉非乎彼聖人此聖人也此不相襲者角其功利之深淺爾不相沿者明文武之優劣爾故三王迭作五帝更制夏殷文武述其禮昭昭然若兩曜爭朗百川注瀆者矣然由周公刊之仲尼正之以周公之才之美謂後世無其人乎乃有仲尼仲尼之後迄今望其道如顏閔又如游夏者鮮矣况聖人哉是後之制禮作樂宜取周書孔策爲標準也漢氏受命禮壞文毀時無聖人苟措其儀立其禮不沿襲於聖制者妄也夫國之大祭不過乎郊祀宗廟也漢之既命其郊止於五畝之祀者禮不曰祀五帝之郊者乎止於昭靈之園者禮不曰天子七廟者乎而叔孫生不爲之正郊祀立宗廟去秦時之非制議昭靈之非禮汲汲於朝會之儀俾漢天子爲高祖其身不得郊見饗不及七廟脆生其制吻刊厥式非不標準於聖人乎將以漢新去水火方弭兵械難爲改作乎將不明壇墠之位禘祫之儀者乎若然者湯伐桀周伐紂其制可知也嗚呼不明

於古制樂通於時變君子不繇也其叔孫生之謂也

題安昌侯傳

唐 皮日休

安昌侯禹見時災異若上體不安常擇日黎齊露著
於星宿正衣冠筮得吉卦致其名占如有不吉禹為
感動日休讀漢史至是未嘗不為之動心因書曰夫
宰相之節以已道輔上天地平則致於君 服則
致於君風教行則致於君苟天地有災則歸於已矣
戎屢動則歸於已萬物有妖則歸於已時政將弊則
歸於已此真大宰輔之職也禹也禹漢名相居師傅
之尊處輔弼之位見災異屢祭上不能匡於君下不
能稱其職孜孜稱其於筮為事斯不足以為賢相之
業也嗚呼當漢帝之重禹禹之有言如師訓門人未
有門人可違師之言也依違在位竟無所發誠伊周
之罪人也大凡國有災異檜懷占問之事自有司存
為宰相者當提大政之綱振百司之領握天下之樞
而已不室以斯處位也以直論之近乎倭以誠論之
近乎偽為宰相其名儒之恥耶嗚呼漢之尊禹宗師
道也禹若此者即非崇師道之過矣

題東漢傳後

唐司空圖

儒衣而漢升也人望而畏之是威其德也必有操戈待之者矣君子救時也亦必相時度力以致其用不可則靜而鎮之以道訓服苟屬鋒氣果於擊搏道不能化力不能制是將濟時重困故元禮之徒終致鉤黨之禍至於張儉又不能引決區區之身雖殘壞天下何裨於吾道哉陳太邱之容衆郭有道之誘人其意未嘗沮物而彼亦不厚其毒利害可見矣且猛擊不革其暴麟不足以爲仁也惡鳥不息其鳴鳳不足以爲瑞也况彼二三子甘逞於權豪啾以至大亂惟據正而屈已者庶可與權

題柳柳州集後

唐司空圖

金之精麤考其聲皆可辨也豈清於磬而渾於鐘哉然則作者爲文爲詩才格亦可見豈當善於彼而不善於此耶愚觀文人之爲詩詩人之爲文始皆繫其所尚既專則搜研愈至故能銜其工於不朽亦猶力巨而闢者所持之器各異而皆能濟勝以爲勁敵也愚嘗覽吏部歌詩累百首其驅駕氣勢若掀雷抉電撐扶於天地之垠物狀其變不得鼓舞而徇其呼吸也其次皇甫祠部文集外所作亦爲邁逸非無意於深密蓋或未遑耳今於筆下方得柳詩味其探搜之致亦深遠矣俾其窮而克壽抗精極思則固非瑣瑣輕可擬議其優劣又嘗觀杜子美祭太尉房公文李太白佛寺碑贊宏振清厲乃其歌詩也張曲江五言沈鬱亦其文筆也豈相傷哉噫後之學者褊淺片詞隻句未能自辨已側目相詆訾矣痛哉因題柳集之末庶俾後之詮評者罔惑偏說以蓋其全工

跋華嶽題名

宋 歐陽修

右華嶽題名自唐開元二十三年訖後唐清泰二年實二百二年題名者五百人一人再題者又三十三人錄爲十卷往往當時知名士也或兄弟同遊或子姪並侍或寮屬將佐之咸在或山人處士之相携或奉使奔命有行役之勞或窮高望遠極登臨之適其富貴貧賤歡樂憂悲非惟人事百端而亦世變多故開元二十三年歲在丙午是歲天子耕籍田肆大赦羣臣方頌太平請封禪蓋有唐極盛之時清泰二年歲在己未廢帝篡立之明年也是歲石敬瑭以太原反召契丹入自鴈門廢帝自焚于洛陽而晉高祖入自太原五代極亂之時也終始二百年間或治或亂或盛或衰而往者來者先者後者雖窮達壽夭參差不齊而斯五百人者卒歸於共盡其姓名歲月風霜剝裂亦或在或亡其存者有千仞之山石爾故時錄其題刻每撫卷慨然何異臨長川而歎逝者也

跋唐李德裕平泉草木記

宋 歐陽修

右平泉草木記李德裕撰余嘗讀鬼谷子書見其說諸侯之國必視其爲人材性賢愚剛柔緩急而因其好惡喜懼憂樂而押圖之陽開陰塞變化無窮故天下諸侯無不在其術中者唯不見其所好者不可得而說也以此知君子宜慎其所好蓋泊然無欲而禍福不能動其利害不能誘此鬼谷之術所不能爲者聖賢之高致也其次簡其所欲不溺於所好斯可矣若德裕者處富貴招權利而好奇貪得之心不已至或疲精神於草木斯其所以敗也其遺戒有云壞一草一木者非吾子孫此又近乎愚矣

跋景陽井銘

宋 歐陽修

景陽井銘不著撰人名述隋戒陳叔寶與張麗華等
投井事其後有銘以戒又有唐江寧縣丞王震井記
云井在興嚴寺其石搥銘有序稱余者晉王廣也其
文字皆唐戒僅可識者其十一二叔寶事史書之甚
詳不必見於此然錄之以見煬帝躬自戒陳目見叔
寶事又嘗自銘以爲戒如此及身爲淫亂則又過之
豈所謂下愚之不移者哉今其銘文隱隱尚可讀處
有云前車已傾負乘將沒者又可歎也

跋王獻之法帖

宋 歐陽修

右王獻之法帖余嘗喜覽觀晉以來筆墨遺跡而想
前人之高致也所謂法帖者其事率皆弔哀候病叙
睽離通訊問施於家人朋友之間不過數行而已蓋
其初非用意而逸筆餘興淋漓揮灑或妍或醜百態
橫生披卷發函爛然在目使人驟見驚絕徐而視之
其意態愈無窮盡故使後世得之以爲奇觀而想見
其人也於高文大策何嘗用此而今人不然至或棄
百事滋弊精疲力以學書爲事業用此終老而窮年
者是真可笑也

讀李翱文

宋 歐陽脩

予始讀復性書三篇曰此中庸之義疏爾智者識其性當復中庸愚者雖讀此不曉也不作可焉又讀與韓侍郎薦賢書以謂翱時窮時憤世無爲已者故丁寧如此使其得志亦未必然以翱爲秦漢間好事行義之一豪雋亦善論人者也最後讀幽懷賦然後置書而嘆不已復讀不自休恨翱不生於今不得與之交又恨予不得生翱時與翱上下其論也況廻翱一時有道而能文者莫若韓愈愈嘗有賦矣不過羨二鳥之光榮歎一飽之無時爾推是心使光榮而飽則不復云矣若翱獨不然其賦曰衆囂囂而雜處兮成嘆老而嗟卑視予心之不然兮慮行道之猶非怪神竟以一旅取天下後世子孫不能以天下取河北以爲憂嗚呼便當時君子皆易其嘆老嗟卑之心爲翱所憂之心則唐之天下豈有亂與亡哉然翱幸不生今時見今之事則憂又甚矣奈何今之人不憂也余行天下見人多矣脫有一人能如翱憂者又皆疏遠與翱無異其餘光榮而飽者一聞憂世之言不以爲

狂人則以爲病子不忍則笑之矣嗚呼在位而不肯自憂又禁它人使皆不得憂可歎也夫

跋隋太平寺碑

宋 歐陽修

右太平寺碑不著書撰人名氏南北文章至於陳隋其弊極矣以唐太宗之致治幾乎三王之盛獨於文章不能少變其體豈其積習之勢其來也遠久而衆勝之則不可以驟革也是以群賢奮力墾闢芟除至於元和然後蕪穢蕩平嘉禾秀草爭出而葩華美實爛然在目矣此碑在隋尤為文字淺陋者疑其俚巷庸人所為然視其字畫又非常俗所能蓋當時流弊以為文章止此為佳矣文辭既爾無取而浮囿因吾儕所貶所以錄此者第不忍棄其書耳治平元年三月十六日書

跋唐華陽頌

宋 歐陽修

右華陽頌唐元宗詔附元宗尊號曰聖文神武皇帝可謂盛矣而其自稱曰上清弟子者何其陋哉方其肆情奢淫以極富貴之樂益窮天下之力不足以贍其欲使神僊道家之事為不無亦非其所可冀矧其實無可得哉甚矣佛老之為世惑也佛之徒曰無生者是畏死之論也老之徒曰不死者是貪生之說也彼其所以貪畏之意為則棄萬事絕人理而為之然而終於無所得者何哉死生天地之常理畏者不可以苟免貪者不可以苟得也惟積習之久者成其邪妄之心佛之徒有臨死而不懼者妄意乎無生之可樂而以其所樂勝其所可畏也老之徒有死者則相與諱之曰彼超去矣彼解化矣厚自誣而託之不可詰或曰彼術未至故死爾前者苟以遂其非後者從而惑之以為誠然也佛老二者同出於貪而所習則異然尤必棄萬事絕人理而為之其貪於彼者厚則捨於此者果若元宗者方溺於此而又慕於彼不勝其勞是真可笑也

記舊本韓文後

宋 歐陽脩

予少家漢東漢東僻陋無學者吾家又貧無藏書州南有大姓李氏者其子克輔頗好學予爲兒童時多遊其家見其樊筐貯故書在壁間發而視之得唐昌黎先生文集六卷脫落顛倒無次序因乞以歸讀之見其言深厚而雄博然予猶少未能悉究其義徒見其浩然無涯若可愛是時天下學者楊劉之作號爲時文能者取科第擅名聲以誇當世未嘗有道韓文者予亦方舉進士以禮部詩賦爲事年十有七試於州烏有司所黜因取所藏韓氏之文復閱之則喟然歎曰學者當至於是而止耳因怪時人之不道而顧已亦未暇學使時時獨念於予心以謂方從進士干祿以養親苟得祿矣當盡力於斯文以償其素志後七年舉進士及第官於洛陽而尹師魯之徒皆在遂相與作爲古文因出所藏昌黎集而補綴之求人家所有舊本而校定之其後天下學者亦漸超於古而韓文遂行於世至於今蓋三十餘年矣學者非韓不學也可謂盛矣嗚呼道固有行於遠而止於近有忽

于往而貴於今者非世俗好惡之使然亦其理有當然者昔孔孟惶惶於一時而師法於千萬世韓氏之文沒而不見者二百年而後大施於今此又非特好惡之所上下蓋其久而愈明不可磨滅雖蔽於暫而終耀於無窮者其道當然也予之始得於韓也當其沉沒棄廢之時予固知其不足以追時好而取勢利於是就而學之則予之所爲者豈所以急名譽而干勢利之用哉亦志乎久而已矣故予之仕於進不爲喜退不爲懼者蓋其志先定而所學者宜然也集

本出於蜀文字刻畫頗精於今世俗本而脫繆尤多凡三十年間聞人有善本者必求而改正之其最後卷帙不足今不復補者重增其故也予家藏書萬卷獨昌黎先生集爲舊物也嗚呼韓氏之文之道萬世所共尊天下所共傳而有也予於此本特以其舊物而尤惜之

書梅聖俞墓後

宋 歐陽脩

凡樂達天地之和而與人之氣相接故其疾徐奮動可以感於心懼忻惻愴可以察於聲五聲單出於金石不能自和也而工苟和之然抱其器知其聲節其廉肉而調其律呂如此者上之善也今指其器以問於工曰彼簫者簫者堵而編執而列者何也彼必曰鼗鼓鍾磬絲管干戚也又語其聲以問之曰彼清者濁者剛而奮柔而曼衍者或在郊或在廟堂之下而羅者何也彼必曰八音五聲六代之曲上者歌而下者舞也其聲器名物皆可以數而對也然至于動盪血脈流通精神使人可以喜可以悲或歌或泣不知手足鼓舞之所以然問其何以感之者則雖有善工猶不知其所以然焉蓋不可得而言也樂之道深矣故工之善者必得於心應於手而不可述之言也聽之善亦必得於心而會以意不可得而言也堯舜之時變得之以和人神舞百獸三代春秋之際師襄師曠川鳴之徒得之爲樂官理國家知興亡周衰官失樂器淪亡散之河海逾千百歲未聞有得之者其天地

人之和氣相接者既不得泄於金石疑其遂獨鍾於人故其人之得者雖不可和於樂尚能歌之爲詩古者登歌清廟太師掌之而諸侯之國亦各有詩以道其風土性情至於投壺饗射必使工歌以達其意而爲賓樂蓋詩者樂之苗裔與漢之蘇李魏之曹劉得其正始宋齊而下得其浮淫流佚唐之時子昂李杜沈宋王維之徒或得其淳古淡泊之聲或得其舒和高暢之節而孟郊賈島之徒又得其悲愁鬱堙之氣由是而下得者時有而不純焉今聖俞亦得之然其體長於本人情狀風物英華雅正變態百出吟兮其似春粼兮其似秋使人讀之可以喜可以悲陶暢酬適不知手足之將鼓舞也斯固得深者耶其感人之至所謂興樂同其苗裔者耶余嘗問詩於聖俞其聲律之高下文語之疵病可以指而告余也至其心之得者不可以言而告也余亦將以心得意會而未能至之者也聖俞久在洛中其詩亦往往人皆有之今將告歸余因求其藁而寫之然夫前所謂心之所得者如伯牙鼓琴子期聽之不相語而意相知也余今

得聖俞之藁猶伯牙之琴絃乎

讀封禪書

宋 劉 敞

劉子曰新垣平候日再中文帝以建元言汾陰有寶鼎氣乃效於後平之於術亦可免矣其卒以詐死為世大戮何哉彼以其術為遠而飾之以巧以其利為迂而益之以誦者也敗不亦宜乎是故博學而精擇之正言而謹守之不為傾久變志不以利鈍遷慮辟此患也莊周有言毋以人徇天毋以故滅命豈新垣平之謂邪悲夫

讀孔子世家

宋 王安石

太史公叙帝王則曰本紀公侯傳國則曰世家公卿特起則曰列傳此其例也其列孔子爲世家奚其進退無所據耶孔子旅人也棲棲衰季之世無尺土之柄此列之以傳宜矣易爲世家哉豈以仲尼躬將聖之資其教化之盛獨奕萬世故爲之世家以抗之又非極摯之論也夫仲尼之才帝王可也何特公侯哉仲尼之道世天下可也何特世其家哉處之世家仲尼之道不從而大置之列傳不從而小而遷也自亂

其例所謂多所抵牾者也

書洪範傳後

宋 王安石

王其曰古之學者雖問以口而其傳以心雖聽以耳而其受以意故爲師者不煩而學者有得也孔子曰不憤不啓不悱不發舉一隅不以三隅反則不復也夫孔子豈敢愛其道驚天下之學者而不使其蚤有知乎以謂其問之不切則其聰之不專其思之不深則其取之不固不專不固而可以入者口耳而已矣吾所以教者非將善其口耳也孔子沒道日以衰熄浸淫至於漢而傳注之家作爲師則有講而無應爲弟子則有讀而無問非不欲問也以經之意爲盡於此矣吾可無問而得也豈特無問又將無思非不欲思也以經之意爲盡於此矣吾可以無思而得也如此使其傳注者皆已善矣固足以善學者之口耳不足善其心况其有不善乎宜其歷年以千數而聖人之經卒於不明而學者莫能資其言以施於世也予悲夫洪範者武王之所以虛心而問與箕子之所以悉意而言爲傳注者汨之以至於冥冥也於是爲作傳以通其意嗚呼學者不知古之所以教而蔽於傳

注之學也久矣當其時欲其思之深問之切而後復
焉則吾將孰待而言邪孔子曰予欲無言然未嘗無
言也其言也蓋有不得已焉孟子則天下固以為好
辯蓋邪說暴行作而孔子之道幾於熄焉孟子者不
如是不足以有明也故孟子曰予豈好辯哉予不得
已也夫子豈樂反古之所以教而重為此說說哉其
亦不得已焉者也

讀江南錄

宋 王安石

故散騎常侍徐公鉉奉太宗命撰江南錄至李氏亡
國之際不言其君之過但以歷數存亡論之雖有愧
於實錄其於春秋之義箕子之說徐氏錄為得焉然
吾聞國之將亡必有大惡惡者無大於殺忠臣國君
無道不殺忠臣雖不至於治亦不至於亡紂為君至
暴矣武王觀兵於孟津諸侯伐紂武王曰未可及聞
其殺王子比干然後知其將亡也一舉而勝焉季梁
在隋隋人雖亂楚人不加兵虞以不用宮之奇之
言晉人始有納璧假道之謀然則忠臣國之與也存
與之存亡與之亡予自為兒童時已聞金陵臣潘佑
以直言見殺當時京師因舉兵來伐數以殺忠臣之
罪及得佑所上諫李氏表觀之詞意實有忠臣之言
予諸父中舊多為江南官者其言金陵事頗詳聞佑
所以死則信然則李氏之亡不徒然也今觀徐氏錄
言佑死頗以妖妄與予舊所聞者甚不類不止於佑
其它所誅者皆以罪戾何也予甚怪焉若以商紂及
隋虞二君論之則李氏亡國之君必有過謀吾知佑

之死信爲無罪是乃徐氏道之耳何以知其然吾以情得之大凡毀生於嫉嫉生於不勝此人之情也吾聞鉉與佑皆李氏臣而俱稱有文學十餘年爭名於朝廷當李氏之危也佑能切諫鉉獨無一說佑見誅鉉又不能力爭卒使其君有殺忠臣之名踐亡國之禍皆鉉之由也鉉思此過而又恥其善不及於佑故匿其忠而汙以它罪此人情之常也以佑觀之其他所誅者又可知矣噫若果有此吾謂鉉不惟厚誣忠臣其欺吾君不亦甚乎

讀孟嘗君傳

宋 王安石 文

世皆稱孟嘗君能得士士以故歸之而卒賴其以力脫於虎豹之秦嗟呼孟嘗君特鷄鳴狗盜之雄耳豈足以言得士不然擅齊之彊得一世焉豈可以南面而制秦尚取鷄鳴狗盜之力哉夫鷄鳴狗盜之出其門此士之所以不至也

讀荆轲傳

宋 王安石

曹沫將而亡人之城又劫天下盟主管仲因勿倍以市信一時可也予獨怪智伯國士豫讓豈顧不用其策耶讓誠國士也曾不能逆策三晉救智伯之亡一死區區尚足校哉其亦不欺其意者也聶政售於嚴仲子荆軻秦於燕太子丹此兩人者汙隱困約之時自貴其身不妄顧知亦曰有待焉彼挾道德以待世者何如哉

讀柳宗元傳

宋 王安石

余觀八司馬皆天下之奇才也一烏叔文所誘遂陷於不義至今士大夫欲為君子者皆羞道而喜攻之然此八人者既困矣無所用於世往往能自強以求列於後世而其名卒不廢焉而所謂欲為君子者吾多見其初而已要其終能毋與世俯仰以自別於小人者少耳復何議彼哉

書魏鄭公傳後

宋 曾 鞏

予觀太宗常屈己以從群臣之議而魏鄭公之徒喜遭其時感知己之遇事之大小無不諫諍雖其忠誠自至亦得君以然也則思唐之所以治太宗之所以稱賢主而前世之君不及者其淵源皆出於此也能知其有此者以其書存也及觀鄭公以諫諍事付史官而太宗怒之薄其恩禮失終始之義則未嘗不反覆嗟惜恨其不思而益知鄭公之賢焉夫君之使臣臣之事君者何大公至正之道而已矣大公至正之

道非滅人言以掩己過取小信以私其君此其不可者也又有甚不可者夫以諫諍為常掩是以諫諍為非美也則後世誰復當諫諍乎況前代之君有納諫之美而後世不見則非惟失一時之公又將使後世之君謂前代無諫諍之事是啓其怠且忌矣太宗末年群下既知此意而不言漸不知天下之得失至於遼東之敗而始恨鄭公不在世未嘗知其悔之萌芽出於此也夫伊尹周公何如人也伊尹周公之諫切其君者其言至深而其事至迫也存之於書未嘗掩焉

至今稱太甲成王以為賢君而伊尹周公為良相者以其書可見矣今當時削而棄之成區區之小讓則後世何所據依而諫又何以知其賢且良歟桀紂幽厲始皇之亡則其臣之諫詞無見焉非其史之遺乃天下不敢言而然也則諫之無傳此乃數君之所以益暴其惡於後世也已矣或曰春秋之法為尊親賢者諱與此戾也矣夫春秋之所諱者惡也納諫諍豈惡乎然則焚藁者非歟曰焚藁者誰歟非伊尹周公為之也近世取區區之小亮者為之耳其事又未見也何則以焚其藁為掩君之過而使後世傳之則是使後世不見藁之是非則必其過常在於君矣常在於己也豈愛其君之謂歟孔光之去其藁之所言其在正邪未可知也其焚之而惑後世庸詎知非謀己之奸謀乎或曰造辟而言詭辭而出異乎此曰此非聖人之所曾言也今萬一有是理亦謂君臣之間議論之際不欲漏其言於一時之人耳豈杜其告萬世也噫以誠信待己而事其君而不欺乎萬世者鄭公也益知其賢云豈非然哉豈非然哉

書資治通鑑外紀後

宋 劉 恕 文

劉恕曰孔子作春秋筆削美刺子游子夏門人之高弟不能措一辭魯太史左邱明以仲尼之言高遠難繼而爲之作傳後之君子不敢紹續焉惟陸長源唐春秋吳楚之君傳號稱王誅絕之罪也左氏傳據魯史因諸侯國書繁年叙事春秋所貶損大人當世君臣有威權勢力其事實皆形於傳故隱其書而不宣以免時難後漢獻帝以班固漢書文繁難省命荀悅依左傳體爲漢紀言約事詳大行于世晉太康初汲郡人發魏襄王冢得紀年文似春秋其所記事多與左氏符同諸儒乃知古史記之正法自是表宏張璠孫盛于寶習鑿齒以下爲編年之書至唐五代其流不廢漢晉起居注梁唐實叙皆其遺制也國語亦左邱明所著載內傳遺事或言論差殊而文詞富美焉書別行自周穆王蓋晉知伯趙襄子當貞定王時凡五百餘年雖事不連屬於史官蓋有補焉七國有戰國策晉孔衍作春秋後語並時分國其後絕不錄焉唐柳宗元采摭片言之失以爲誣謠不概於聖作非

國語六十七篇其說雖存然不能爲國語輕重也司馬遷始撰本紀年表八書世家列傳之目史臣相續謂之正史本朝去古益遠書益煩雜學者牽於屬文專尚西漢書傳覽者乃反史記東漢書而近代士頗知唐書自三國至隋下逮五代懵然莫識承平日久人愈怠墮莊子文簡而義明元言虛誕而似理功省易習陋儒莫不尚之史學浸微矣案歷代國史其流出於春秋劉歆叙七畧王儉撰七志史記以下皆附春秋荀勗分四部史記舊事入丙部阮孝緒七錄記傳錄記史傳由是經與史分夫今之所以知古後之所以知今因善惡以明褒貶察政治以見興衰春秋之法也使孔子贊易不作春秋則後世以史書爲記事瑣雜之語春秋列於六藝愚者莫敢異說而終不能曉也起皇祐初舉進士試於禮部爲司馬公門生侍於大儒得聞餘論嘉祐中公嘗謂恕曰春秋之後迄今千餘年史記至五代史一千五百卷諸生歷年莫能竟其篇第畢世不暇舉其大略厭煩趨易行將泯絕予欲託始於周威烈王命韓魏趙爲諸侯下訖

五代因邱明編年之體微荀悅簡要之又網羅衆說成一家書恕曰司馬遷以良史之才叙黃帝至秦漢興亡治亂班固已下世各名家李延壽總八朝爲南北史而言詞卑弱義例煩雜書無表志沿革不完梁武帝通史唐姚康復統史世近亡軼不足稱也公欲以文章論議成歷世大典高勲美德褒贊流於萬世元凶竊竊貶絀甚於誅殛上可繼仲尼之經邱明之傳司馬遷安可比擬荀悅何足道哉治平三年公以學士爲英宗皇帝侍講受詔修歷代君臣事迹恕蒙辟真史局常請於公曰公之書不始於上古或竟舜何也公曰周平王以來事已春秋孔子之經不可損益曰易不始於獲麟之歲曰經不可續也恕乃知賢人著書尊避聖人也如是儒者可以法矣熙寧三年冬公出守京兆明年春移帥潁川固辭不行退居洛陽恕褊捐好議論不敢居京師請歸江東養親又以新書未成不廢刊削恕亦遙隸局中嘗思司馬遷史記始於黃帝而已藏神農閼焉不錄公爲歷代書而不及周威王之前學者考古當閱小說取舍乖異莫

知適從若魯隱之後止據左氏國語史記諸子而曾損不及春秋則無與於聖人之經已議至未命三晉爲諸侯比於後事百無一二可爲前紀本朝一祖四宗一百八年可請實錄國史於朝廷爲後紀昔何承天樂實作春秋前後傳亦其比也將俟書成請於公而爲之熙寧九年恕罹家禍悲哀憤鬱遂中癰痺右股既廢凡欲執筆口授釋子義仲書之常自念平生事業無一成就史局十年俛仰竊錄因取諸書以國語爲本編通鑑前紀家貧書籍不具南微僻陋士人家不藏書卧病六百日無一人語及文史昏亂遺忘煩簡不當遠方不可得國書絕意於後紀乃更前紀曰外紀如國語得春秋外傳之義也自周共和元年庚申至威烈王二十二年丁丑四百三十八年見於外紀自威烈王二十三年戊寅至周顯德六年己未一千三百六十二年載於通鑑然後一千八百之興廢大事坦然可明昔李宏基用心過苦積年疾而藥石不繼盧昇之手足孿廢者五悲而自沈潁水予病眼病創不寐不食才名不達二子而疾疹衆苦過之

陶潛豫爲祭文杜牧自撰墓誌夜臺甫邇歸心若飛
聊序不能作前後紀而爲外紀焉他日書成公爲前
後紀則可刪削外紀之煩冗而爲前紀以二古今一
家之言恕雖不及見亦平生之志也

書東臯子傳後

宋 蘇 軾 文

予飲酒終日不過五合天下之不能飲無在予下者
然喜人飲酒見客舉杯徐引則予胃中爲之浩浩焉
落落焉酣適之味乃過於客閑居未嘗一日無客客
至未嘗不置酒天下之好飲亦無在予上者常以謂
人之至樂莫若身無病而心無憂我則無是二者矣
然人之有是者接於予前則予安得全其樂乎故所
至常蓄善藥有求者則與之而尤喜釀酒以飲客或
曰子無病而多蓄藥不飲而多釀酒勞已以爲人何
也予笑曰病者得藥吾爲之體輕飲者困於酒吾爲
之酣適蓋專以自爲也東臯子待詔門下省日給酒
三升其弟靜問曰待詔樂乎曰待詔何所樂但美醖
三升殊可戀耳今嶺南法不禁酒予既得自釀月用
米一斛得酒六斗而南雄廣惠循梅五太守間復以
酒遺予略計其所獲殆過於東臯子矣然東臯子自
謂五斗先生則日給三升枚口不暇安能及客乎若
予者乃日有二升五合入野人道士腹中矣東臯子
與仲長子先游好養性服食預刻死日自爲墓誌予

蓋友其人於千載或庶幾焉

書黃子思詩集後

宋 蘇 軾 文

予嘗論書以謂鍾王之迹蕭散簡遠妙在筆畫之外至唐顏柳始集古今筆法而盡發之極書之變天下翕然以爲宗師而鍾王之法益微至於詩亦然蘇李之天成曹劉之自得陶謝之超然蓋亦至矣而李太白杜子美以英瑋絕世之姿凌跨百代古今詩人盡廢然視晉以來高風絕塵亦少衰矣李杜之後詩人繼作雖間有遠韻而才不逮意獨常應物柳宗元發纖穠於簡古寄至味於澹泊非餘子所及也唐末司空圖崎嶇兵亂之間而詩文高雅猶有承平之遺風其論詩曰梅止於酸鹽止於鹹飲食不可無鹽梅而其美常在鹹酸之外蓋自列其詩之有得於文字之表者二十四韻恨當時不識其妙予三復其言而悲之閩人黃子思慶歷皇祐間號龍文者予嘗聞前輩誦其詩每得佳句妙語及復數四乃識其所謂信乎表聖之言美在鹹酸之外可以一唱而三歎也予既

與其子幾道其孫師是遊得窺其家集而子思爲行高志爲吏有異材見於羣誌詳矣予不復論獨評其

詩如此

題唐氏六家書後

宋 蘇 軾 文

永禪師書骨氣深隱體兼衆妙精能之至反造疎淡如觀陶彭澤初若故緩不收反復不已乃識其奇趣今法帖中有云不具釋智永白者誤收在逸少部中然亦非禪師書也云謹此代申此唐宋五代流俗之語耳而書亦不工歐陽率更書妍緊拔羣尤工於小楷高麗遣使購其書高祖歎曰觀其書以爲魁梧奇偉人也此非知書者凡書象其爲人率更貌寒敏悟絕人今觀其書勁峻刻厲正稱其貌耳褚河南書清遠蕭散微雜隸體古之論書者兼論其平生苟非其人雖工不貴也河南固忠臣但有譖殺劉洎一事使人怏怏然余嘗考其實恐劉洎末年禍忿實有伊霍之語非譖也若不然而馬周明其無此語太宗猶誅洎而不問同何哉此殆天后朝許李所誣而史官不能辨也張長史草書頗然天放畧有點畫處而意態自若號稱神逸今世稱善草書有或不能真行此大妄也真生行行生草真如行立草如走未有未能行立而能走者也今長安猶有長史真書卽中石柱記

作字簡遠如晉宋間人顏魯公書雄秀獨出一變古
法如杜子美詩格尤天縱奄有漢魏晉宋以來風流
俊之作者殆難復措手柳少師書本出於顏而能自
出新意一字百金非虛語也其言正心則筆正者非
獨諷諫理固然也世之小人書字雖工而其拂情終
有睚眦側媚之態不知人情隨想而見如列子謂竊
斧者予抑真爾也然至使人見其書而猶憎之則其
人可知矣余謫居黃州唐林夫自湖口以書遺余云
吾家有此六人書予為我略評之而書其後林夫之
書過我遠矣而反求於余何哉此又未可曉也

題逸少帖

宋 蘇軾文

逸少為王述所用自誓去官起然於事物之外常自
言吾當卒以樂死然欲一遊岷嶺勤勤如此而至死
不果乃知山水遊放之樂自是人生難必之事況於
市朝眷戀之徒而出山林獨往之言固已疎矣

書六一居士傳後

宋 蘇軾

蘇子曰居士可謂有道者也或曰居士非有道者也
有道者無所挾而安居士之於五物捐世俗之所爭
而捨其所棄者也烏得爲有道乎蘇子曰不然挾五
物而後安者惑也釋五物而後安者又惑也且物未
始能累人也軒裳圭組且不能爲累而況此五物乎
物之所以能累人者以吾有之也吾與物俱不得已
而受形於天地之間其孰能有之而或者以爲已有
得之則喜喪之則悲今居士自謂六一是其身均與
五物爲一也不知其有物耶物有之也居士與物均
爲不能有其孰能置得喪於其間故曰居士可謂有
道者也雖然自一觀五居士猶可見也與五爲六居
士不可見也居士殆將隱矣

書鮮于子駿楚詞後

宋 蘇軾

鮮于子駿作楚詞九誦以示軾軾讀之茫然而思喟
然而歎曰嗟乎此聲之不作也久矣雖欲作之而聽
者誰乎譬之於樂變亂之極而至於今凡世俗之所
用皆夷聲夷器也求所謂鄭衛者且不可得而況於
雅音乎學者方欲陳六代之物弦匏三五百篇黎然
如戛金匱撞鼗鼈未有不生腫竊笑者也好之而欲
學者無其師知之而欲傳者無其徒可不悲哉今子
駿獨行吟生思寤寐於千載之上追古屈原宋玉及
其人於冥冥續微學之將墜可謂至矣而覽者不知
其貴蓋亦無足怪者彼必嘗從事於此而後知其難
且工其不學者以爲苟然而已元豐元年四月九日
趙郡蘇軾書

書唐林夫惠硯

宋 蘇 軾

行至泗州見蔡景繁附唐林夫書信與予端硯一枚
張過墨半螺硯極佳但小而凸磨墨不甚便作硯者
意待數百年後硯平乃便墨耳一硯猶湏作數百年
計而作事乃不為明日計可不謂大惑耶

題明道先生墓

宋 程 頤

周公沒聖人之道不行孟軻死聖人之學不傳道不
行百世無善治學不傳千載無真儒則天下實實焉
莫知所之人欲肆而天理滅矣先生生乎千四百年
之後得不傳之學於遺經以興起斯文為己任辨異
端闢邪說使聖人之道煥然復明於世蓋自孟子之
後一人而已然學者於道不知所向則孰知斯人之
為功不知所至則孰知斯名之稱情也哉

書鄭元傳

宋 林希文

余嘗謂聖人之教尤備於禮自堯舜以來積于三代周之所以爲周者守此也秦燔人道書灰火學士腐於坑天下之口不復敢言仁義先王之道不亡而存者幾何也賴當時耆儒老叟遺及漢世口誦手傳或山巖屋壁之間收拾缺編折冊朽蠹斷絕之餘次而成文猶有篇章條類明白蓋其初不經於聖人之手至後世又遭磨滅其不能完而少有訛誤豈能免也及得鄭氏注精微通透鉤聯瀆會故古經益以明世學者皆知求而易入識爲人之道皆漢諸儒之功而成之者鄭氏也其於法制更爲章明獨失之者緯也然當大壞之後聖人不世以一人之思慮欲窮萬世之文豈不難哉世之人猶指其一二而談之遂以鄭爲一家之小學噫亦甚愚矣蓋玩文辭則薄於經術抑不思其所爲功者雖元猶有所不敢盡況無元哉當漢之末嘉雄競起元身出禁錮四方聘請不能動其志脫一身於污濁之世獨全其道至使黃巾望元而拜不入其境嗟夫歷千百年及此邇幾人尚敢輒

訕元哉若元者可謂賢矣

天下之所恃而爲安危者誰乎曰宰相焉耳故自朝廷百執事至於州縣之吏不幸而一非其人不過敗其一局之事耳至於宰相者其一人一非則天下殆矣雖亡宗赤族何益於敗蓋天子之於天下也得其術則其道甚易宰相佐天子治天下以一身而當天下之責雖得其術其道甚難臨之六五曰知臨大君之宜此若非易乎乾之九三曰君子乾乾夕惕若此豈非難乎然而人皆易之何也曰不知量也今有焉於

此且其行不過百里也驅而倍之則焉且病矣禽合升斛之量各有所受也以禽合而加之斛升之上則溢矣况斛升之受一斛之量乎故一邑之才施之一郡則不可也以其一郡之才而當天下之責可乎此黃霸之所以得名於前而見譏於後也況遠不迨霸者乎甚矣人之不知量也坤之六五黃裳元吉蓋君子之有諸中形諸外如此可也大有之九二曰大車以載蓋君子以盛德大烈當天下之責如此則可也乾之九三曰君子終日乾乾蓋君子履天下之危

當天下之責其憂勞如此可也忠烈如伊尹勲勞如周公而又終以謙易曰勞謙君子有終吉嗚呼其難若此而人皆易之何也曰好之也尊官重祿國人之所好也不如是不足克其好快其欲彼安肯曰吾不才也吾辱其位者即其禍敗隨之耶取天下笑耶焉萬世之羞耶甚者亡人之國危人之天下不顧也豈予謂不知量者耶安得知量者見之乎予讀陳平傳嘉平知其任讀鄭君傳愛君知其量嗚呼如君者豈易得哉豈易得哉

書王石齋胸山雜詠後 宋 黃庭堅 文

詩者人之情性也非強諫諍於庭怨忿詬於道怒邪
罵生之爲也其人忠信篤敬抱道而居與時乖逢遇
物悲喜同牀而不察並世而不聞情之所不能堪因
發於呻吟調笑之聲宵次釋然而聞者亦有所勸勉
此律呂而可歌列于羽而可舞是詩之美也其發爲
訕謗侵陵引頸以承戈披襟而受矢以快一朝之忿
者人皆以爲詩之禍是失詩之旨非時之過也故世
相後或千載地相去或萬里誦其詩而想見其所
居所養如旦暮與之期鄰里與之游也營邱王知載
仕宦在予前予在江湖浮沉而知載已沒於河外不
及相識也而得其人於其詩仕不過而不怒人不知
而獨樂博物多聞之君子有文正公家風者邪惜予
不幸短命不得發於事業使予言信於流俗也雖然
不期於流俗此所以爲君子者邪

書贈韓瓊秀才 宋 黃庭堅 文

讀書欲精不欲博用心欲純不欲雜讀書務博常不
盡意用心不純訖無全功治經之法不獨玩其文章
談說義理而已一言一句皆以養心治性事親處兄
弟之間接物在朋友之際得失憂樂一考之於書然
後審古人之稽勣而知味矣讀史之法考當世之盛
衰與君臣之離合在朝之士觀其見危之大節在野
之士觀其奉身之大義以其日力之餘玩其華藻以
此心術作爲文章無不如意何況翰墨與世俗之事

哉

書邢居實文卷

宋 黃庭堅文

余觀學記論君子之學有本末等衆人雖不能自壽
百歲然必不驢等如水行川盈科而後進耳小學之
事雖若廢日月要須躬行必曉所以致大學之精
微耳吾惇夫才性高妙超出後生千百輩然慕大略
小初日便爲塗遠之計則似可恨後生可畏當欣慕
其才而鑒其失也

題濟南伏勝圖

宋 黃庭堅文

御史晁大夫號爲峭直刻深觀所寫形質似未至也
然作伏勝宛然故齊之老書生耳又作勝女子鬱然
是儒家子此亦丹青之妙

題摹燕郭尚父圖

宋 黃庭堅 文

凡書畫當觀韻。往時李白時爲余作李廣奪兒馬
扶兒南馳取兒弓引滿以擬追騎。觀箭鋒所直發
之人馬皆應弦也。伯時笑曰：使俗子爲之，當作中箭
追騎矣。余因此深悟畫格。此與文章同一關鍵，但難
得人入神會耳。

題陳自然畫

宋 黃庭堅 文

水意欲遠，見鴨閑暇，蘆葦風霜中，猶有能自持者。予
觀李營邱六軸驟雨圖，偶得此意。陳君以佛畫名京
師，戲作秋水寒禽，便可觀因書以題之。

題自書卷後

宋 黃庭堅 文

崇寧三年十一月余謫處宜州半歲矣官司謂余不當居關城中乃以是月甲戌抱被入宿于城南余所僦舍喧寂齋雖上雨傍風無有蓋障市聲喧憤人以爲不堪其憂余以爲家本農耕使不從進士則田中廬舍如是又可不堪其憂邪既設卧探焚香而坐與西鄰屠牛之機相直爲資深書此卷實用三錢買鷄毛筆書

書稽叔夜詩與姪楨

宋 黃庭堅

叔夜此詩豪壯清麗無一點塵俗氣凡學作詩者不可不成誦在心想見其人雖沉於世故者然而攬其餘方便可撲去面上三斗俗塵矣何況探其義味者乎故書以付楨可與諸郎皆誦取時時諷詠以洗心忘倦予嘗爲諸子弟言士生於世可以百爲唯不可俗俗便不可醫也或問不俗之狀予曰難言也視其平居無以異於俗人臨大節而不可奪此不俗人也士之處世或出或處或剛或柔未易以一節盡其蘊

然率以是觀之

書贈俞清老

宋 黃庭堅

人生歲衣十匹日飯兩杯而終歲蕭然疲役此何理
邪男女婚嫁緣渠儂情地自有衣食分齊所謂誕置
之隘巷牛羊腓字之其不應凍餓溝壑者天不能殺
也今是旬終日者正爲百草憂春雨耳青山白雲江
湖之水湛然可復有不足之歎邪

書贈王長源詩後

宋 黃庭堅

王長源安貧好義簞食瓢飲妻奴不免饑寒而未嘗
作可憐之色向人夫人能自重其在官必能愛民惜
當路未能拭目也相見于京師忽忽不得盡平生朋
友之意長源告行會小人年來苦眩不能苦思因而
廢詩輒以舊詩十許爲贈長源若行登山臨水亦可
以代勞歌耳

書五代郭崇韜卷後

宋 張 耒 文

自古大臣權勢已隆極富貴已充滿前無所希則必退爲身慮自非大姦雄色異志與夫甚庸騖昏闇茸鮮有不然者然其爲慮也實難不憂思之不深計之不工然異日釁之所起往往自夫至深至工是故莫若以正夫正者操術簡而同智者爲緒多而拙夫正者無所事計也行所當然雖怨仇不敢議之況繼之者賢乎郭崇韜於五代亦聰明權智之士也佐莊宗決策滅梁遂一天下自見功高權重姦人議已而莊宗之昏爲不足賴也乃爲自安之計時劉氏有寵莊宗嬖之因請立爲后而中莊宗之欲又結劉氏之援此於劉氏爲莫大之恩而莊宗日以昏酒內聽婦言爲計宜無如是之良者然卒之殺崇韜者劉氏也使崇韜繆計不過劉氏不能有所助而已豈知身死其手哉好謀之士敗於謀好辨之士敗於辨惟道德之士爲無所窮而禍福之變豈思慮能究之哉

書宋齊邱化書

宋 張 耒

齊邱僞唐謀臣其智特大鼠之雄耳何足道哉其爲化書雖皆淺機小數亦微有見於道德其能成功有以也吾嘗論黃老之道德本於清淨無爲遣去情累而其末多流爲智術刑名何哉夫惟靜者見物之情而無爲者知事之要據其要而中其情者智術之所從出也仁義生於恩恩生於人情聖人節情而不遺也無情之至至於無親人而無親則忍矣此刑名之所以用也齊邱之道既陋而其文章頗亦高簡而可善者具言曰君有奇智天下不親雖聖人出斯言不廢矣

題主父之事

宋 張舜民 文

近歲滑南縣有田夫得宿藏於土中凡七甕水銀者二金銀者五金銀皆刻主父字按漢主父偃以金敗而至於殺其身滅其家今日乃知偃之死非謬也中庸曰莫見乎隱莫顯乎微故君子慎其獨也荀卿曰聲無遠而不聞行無微而不彰富偃之死于今久矣徒觀其事而不見其迹猶未足以爲信何以暴其數千年之後今之人結交於尸牖之間託物於苞苴之內期於無人之境投於夜半之時欲人之不我知真

愚也哉

書王蠋事後

宋 秦 觀

古之人有不去商紂之虐君以從周武之聖臣而守死西山者其人曰伯夷伯夷者孔子稱爲仁孟子稱爲聖不在乎學者能道之也古之人有不憂利身戮尸之患以求盡忠極節於其君者其人曰比干比干者孔子稱爲仁孟子稱爲賢不在乎學者能道之也古之人有不愛將軍之印不顧萬家之封引身即死以明君之大義而求自附於伯夷比干之事者其人曰王蠋王蠋無孔子孟子之稱而其名亦不獲自附於伯夷比干焉學者亦不可不道也當燕人之破齊齊王走莒也臨菑之地汶篁之疆爲齊者無幾也齊之臣平居腰黃金結紫綬論議人主之前者一旦狼顧鳥竄分散四出不逃而去則屈而降無一人爲其君出身抗賊以全齊者方是時王蠋齊之布衣也積仁累行退耕於野口未嘗食君之粟身未嘗衣君之帛獨以爲生於齊國世爲齊民則當死於齊君乃奮身守大節守區區之畫邑以待燕人燕人亦爲之却三十里不敢近其後燕將畏蠋之賢念蠋之在而齊

之卒不滅也數為甘言啗之曰我將以子為將封子以萬家不若屠盡邑蠋曰忠臣不事二君正女不更二夫國亡矣蠋尚何存今劫之以兵誘之以將是助桀為暴也與無義而生固不若烹乃經其頭於木枝自奮絕脰而死士大夫聞之皆太息流涕曰王蠋布衣也義不北面於燕況在位食祿者乎於是乃相與迎襄王於莒而齊之殘民始感義奮發開城堅守人莫肯下燕者故莒即墨得數戰不亡而田單卒能因其民心奮其智謀却數萬之衆復七十餘城王蠋

激之也始予讀史記至此未嘗不為蠋廢書而泣以謂推蠋之志足以無憾於天無忤於人無欺於伯夷比干之事太史公當特書之屢書之以破萬世亂臣賊子之心奈何反不為蠋立傳其當時事迹乃倣見於田單之傳尾使蠋之名僅存以不失而不足以暴天下甚可恨也且夫聶政剗刺之匹徒能喚口揀骨奮然不顧以報一言一飯之德非有君臣之讎而懷匕首鐵椎白日殺人以喪七尺之軀者太史公猶以其義也而為之立傳以見後世後世亦從而服之

曰壯士蘇秦張儀陳軫犀首左右賣國以取容非有死國死君之義朝為楚卿暮為秦相太史公猶以其善說也而為之立傳以見後世後世亦從而服之曰奇材以至韓非申不害之徒刑名之學也猶以原道忠附之老聃淳于髡鄒衍田軒慎到接子環鄒奭之徒迂濶之士也猶以為多事而附之孟子然則世有殺身成仁如蠋之事者獨不當傳之以附於伯夷之後乎噫昔者夫子作春秋其大意在於正君臣嚴父子君臣正父子嚴則春秋不作矣後世愚夫愚婦一

言一行近似者皆當筆之春秋况夫卓然有補世教者得無特書之屢書之乎此予所以為太史公惜也

龍井題名

宋 秦觀

元豐二年中秋後一日余自吳興道執東還會稽龍井有辨才大師以書邀余入山比出郭日已夕航湖至普寧遇道人參寥問龍井所造蓋輿則曰以不時至去矣是夕天宇開霽林間月明可數毫髮遂乘舟從參寥策杖並湖而行出雷峯度南屏濯足於惠田澗靈石塢得支徑上風篁嶺憩於龍井亭酌泉據石而飲之自普寧凡經佛寺十五皆寂不聞人聲道旁廬舍或燈火隱顯草木深鬱流水上激悲鳴殆非人間之境行二鼓矣始至壽聖院謁辨才於潮音堂明日乃還

書洛陽名園記後

宋 李格非

洛陽處天下之中扶輿之阻當秦隴之襟喉而趙魏走集蓋四方必爭之地也天下當無事則已有事則洛陽必先受兵余故嘗曰洛陽之盛衰若天下治亂之候也方唐正觀開元之間公卿貴賤開館列第於東都者競千有餘邸及其亂離繼以五季之酷其池塘竹樹兵車蹂躪廢而為邱墟高亭大榭煙火焚燎化而為灰燼與唐共滅而俱亡無餘處矣余故嘗曰園囿之興廢洛陽盛衰之候也且天下之治亂候於洛陽之盛衰而知洛陽之盛衰候於園囿之興廢而得則名園記之作余豈徒然哉嗚呼公卿大夫方進於朝放乎一己之私自為而忘天下之治忽欲退享此得乎唐之末路是已

跋紹興親征詔草

宋 辛棄疾

使此詔見於紹興之前可以無事雖之大恥使此詔行於隆興之後可以卒不世之伐功今此詔與此齒猶俱存也悲夫

讀兩陳遺墨

宋 朱熹

天下有自然不易之公論而言之者或不免於有所避就或多失之若諸公熙寧日錄之辨是也嘗記頃年獲侍坐於政瑞殿上饒汪公縱言及於日錄熹因妄謂日錄固為邪說然諸賢攻之亦未得其要領是以言者瀆而聽者疑用力多而見功寡也蓋嘗即其書而考之則凡安石之所以惑亂神祖之聰明而變移其心術使不得遂其大有為之志而反為一世禍敗之原者其隱微深切皆聚此書而其詞鋒筆勢縱橫捭闔輝煌譎詭又非安石之口不能言非安石之手不能書也以爲蔡卞撰造之言固無是理況其見諸行事深切者明者又已相爲表裏亦不待晚年對筆有所增加而後為可罪也然使當時用其垂絕之智舉而焚之則後來載筆之士於其帷幄之間深謀密計雖欲畢力搜訪極意形容勢必不能得之如此之悉而傳聞異詞虛實相半亦不能使人無溢惡之疑且如勿令上知之語世所共傳終以手筆不存政使陸佃得為隱諱雖以元祐衆賢之力爭辯之苦而

不能有以正也何幸其徒自為失計出此真蹟以暴其惡於天下便當據其肆情反理之實正其迷國誤朝之罪而直以安石為誅首是乃所謂自然不易之公論不惟可以訂己往之謬而又足以開後來之惑奈何乃以畏避嫌疑之故反為迂曲回互之言指為撰造增加誣偽謗詆之書而欲加刑削以滅其迹乎汪公歎息深以愚言為然今觀閒樂陳公遺帖了齋陳公表裏追憶前語自愧學之不進所知不能有以甚異於往時又歎汪公之不可復見也為之掩卷太

息而書其後抑又嘗怪了翁晚歲之論多出此帖之餘然其自訟改過之書曾無一言以及此而獨謂龜山楊氏實發其機是則論者亦頗疑之而以今考之此書之作實在建中崇寧之間且其言猶以日錄為蔡卞之所託而其後了翁合浦尊堯之書亦未直攻安石也至於大觀初年而後四明之論始作則其推言所自獨歸功於楊氏而不及閒樂有不可誣者矣顧其後書雖謂天使安石自馬誣悖之心然猶有慰筆增加歸過神考之云則終未免於所謂有所回互

避就而失之首也又觀閒樂此書之旨所以罪狀安石者至深切矣然考其事不過數條若曰改祖宗之法而行三代之政也廢春秋而謂人主有北面之禮也學本出於刑名度數而不足以性命道德也釋經與義多出先儒而旁引釋氏也是數條者安石信無所辭其罪矣然其所以受病之源遺禍之本則閒樂之言有所未及而其所指以為說者亦自不能使人無可憾也今亦無論其他而姑以安石之素行與日錄之首章言之則安石行己立朝之大節在當世謂如何而其始見神宗也直以漢文帝唐太宗之不足法者為言復以諸葛亮魏元成之不足為者自任此其志議之卓然又皆秦漢以來諸儒所未聞而豈一時諸賢之所及哉然其為人質雖清介而器本偏狹志雖高遠而學實凡近其所論說蓋特見聞億度之近似耳顧乃狹以為高足已自聖不復知以格物致知克己復禮為事而勉求其所未至以增益其所未能是以其於天下之事每以疎率任意而失之於前又以狠愎徇私而敗之於後此其所以為受病之原

而間樂未之言也若其所以遺禍之本則自其得君之初而已有以中之使之悅其高駭其奇而意斯人之不可無矣及其任之以事而日聽其言則又有以信夫斯人之果不可無也於是爲之力拒羣言而一聽其所爲惟恐其一旦去我而無與成吾事也及其訐謨既久漸涵透徹則遂心融神會而與之爲一以至於能掣其柄而自操之則其運動弛張又已在我而彼之用舍去留不足爲吾重輕矣於是安石卒去而天下之政始盡出於宸衷了翁所謂萬幾獨運於元豐間樂所謂屏棄金陵十年不召者蓋皆指此然了翁知其獨運而不知其所運者乃安石之機間樂見安石之身若不用而不知其心之未嘗不用也是以凡安石之所爲卒之得以附於陵廟之尊託於謨訓之重而天下之人愈不敢議以至於魚爛河決而後已焉此則安石所以遺禍之本而間樂亦未之言也若間樂之論祖宗法度但當謹守而不可變猶爲痛切是固然矣然祖宗之所以爲法蓋亦因時制宜以迨一時之便而其仰循前代俯徇流俗者尚多有

之未必皆其竭心思法聖智以遺子孫而欲其爲世守之者也是以行之既久而不能無弊則變而通之是乃後世之責政慶歷之初杜范韓富諸公變之不通而論者至今以爲恨况其後此又數十年其弊固當益甚於前而當時議者亦多以爲當變如呂正獻公父子家傳及河南程氏眉山蘇氏之書蓋皆可考雖間樂此論若有不同而不免亦有仁皇之末適當因革之時之說則是安石之變法固不可謂非其時而其設心亦未謂失其正也但以其驟率任意而不能熟講精思以爲百全無弊可久之計是以天下之民不以爲便而一時元臣故老賢士大夫羣起而力爭之者乃或未能究其利病之實至其所以爲說又多出於安石規模之下由是安石之心愈益自信以爲天下之人真莫已若而陰幸其言之不足爲已病因遂肆其狠愎倒行逆施固不復可望其能勝已私以求利病之實而充其平日所以自任之本心矣此新法之禍所以卒至於橫流而不可救間樂雖能深斥其非而未察其所以爲非者乃由於此此其爲說

所以不能使人無所恨者一也至謂安石遠取三代
渺茫不可稽考之事而力行之此又不知三代之政
布在方冊雖時有先後而道無古今舉而行之正不
能無望於後之君子但其名實之辨本末之序緩急
之宜則有不可以毫釐差者苟能於此察焉無所悖
則其遺法雖若渺然不可稽考然神而明之在我而
已何不可行之有彼安石之所謂周禮乃姑取其附
於己意者而借其名高以服衆口耳豈真有意於古
者哉若真有意於古則格君之本親賢之務養民之
政善俗之方凡古之所謂富先而宜急者曷謂不少
留意而獨於財利兵刑為汲汲耶大本不正名是實
非先後之宜又皆倒置以是稽古徒益亂耳豈專渺
茫不可稽考之罪哉閒樂不察乎此而斷然自畫直
以三代之法為不可行又獨指其渺不可稽考者而
譏之此又使人不能無恨者二也若安石之廢春秋
語北面則亦其志識過高而不能窮理勝私之弊是
以厭三傳凡例條目之煩惡諸儒臆度附致之巧有
太過者而不思其大倫大法固有炳如日星而不可

証者也因前聖尊師重道之意以推武王太公之事
有太過者而所以考其禮之文者有未詳也是其闕
於審重而輕為論說直廢大典固為可罪然謂其因
此而亂君臣之名分又并與孟子迭為賓主之說而
非之則亦峻文深詆而矯枉過直矣此又其使人不
能無恨者三也若夫道德性命之與刑名度数則其
精粗本末雖若有間然其相為表裏如影隨形則又
不可得而分別也今謂安石之學獨有得於刑名度
數而道德性命則為有所不足是不知其於此既有
所不足則於彼也亦將何自而得其正耶夫以佛老
之言為妙道而謂禮法事變為粗迹此正王氏之私
弊今欲譏之而不反隨其說之中則已誤矣又況其
於粗迹之謬可指而言者蓋亦不可勝數政恐未可
輕以得許之也今姑舉其一二而言之若其實有得
於刑名度数也則其所以脩於身者豈至於與僧耶
地而顧客禪衣如錢景諶之所叙乎所以著於篇者
豈至於分文析字以為學而又不能辨乎六書之法
如子說之書乎了翁以為安石之進字說蓋欲布之

海內神考雖好其書玩味不忘而不布於海內者以教化之本不在是也此亦非是夫周禮六藝之教所謂書者不過使人以六書之法分別天下之書而知此字之聲形爲如何欲其遠近齊同而不亂耳非有真空無相無作之說也安石既廢其五法而專以會意爲言有所不通則遂旁取後來書傳一時偶然之語以爲證至其甚也則又遠引老佛之言前世中國所未嘗有者而說合之其穿鑿舛繆顯然之迹如此豈但不知性命道德之本而亦豈可謂其有得於刑名度數之末哉不惟以此自誤又以其說上惑人主使其玩味於此而不忘其罪爲大丁翁之言蓋亦疎矣所以施於家者豈至於使其妻窮奢極侈乎逐婦如而詬訾官吏如林希魏泰之所書豈至於使其子囚首跣足箕踞於前而干預國政如邵伯溫之所記乎所以施於政者豈至於率事理拂民情而於當世禮樂文章教化之本或有失其道理者乃不能一有所正至其小者如鵠鵠公事按問條法亦皆繆戾煩碎而不即於人心乎以此等而推之則如閑樂之所

云亦恐其未免於過予而其所以不能使人無可恨者四也若其釋經之病則亦以自處太高而不能明理勝私之故故於聖賢之言既不能虛心靜慮以求其立言之本意於諸儒之同異又不能反復詳審以辨其爲說之是非但以己意穿鑿附麗極其力之所通而肆爲支蔓浮虛之說至於天命人心日用事物之所以然既以不能反求諸身以驗其實則一切舉而歸之於佛老及論先王之政則又騁私意飾無言以爲違衆自用剝民與利斤逐忠賢杜塞公論之地惟其意有所忽而不以爲事者則或因舊說而不暇擇其是非也閑樂於此乃不責其違本肯棄舊說惑異端又妄言之罪而徒譏其與義多出鄭孔意若反病其不能盡黜先儒之說以自爲一家之言者則又不能使人無恨者五也夫安石以其學術之誤敗國殄民至於如此而起自熙豐訖於宣靖六十年間誦說推明按爲國是鄙儒俗生隨風而靡者既無足道有識之士則孰有不寒心者願以姦賊蔽蒙桀黠廢弄是以飲氣吞聲莫敢持議獨兩陳公乃能出死力

以排之其於平居書疏還往講論切磨惟恐其言之不盡斯亦可謂賢矣然其所以爲說者不過如此豈其所以爲學者亦自未得聖賢之門戶所以觀理制事者猶未免於有蔽而然耶故嘗歷考一時諸賢之論以求至當則惟龜山楊氏指其離內外判心迹使道常無用於天下而經民之務皆私智之鑒者其論紹述而以爲當師其意不當泥其迹者亦能曲盡其理之當而無回互之失繼元城劉公所謂只宗神者有所不逮不但兩陳公而已也然及其請罷廟學配食之章則又不能如其平日之言以正其罪顧乃角肩焉偏指危驚一義以爲實奢汰之原此爲獲殺入於貨之盜而議其竊鈞之罪對放飯流歡之客而議其虛決之非視兩陳公之言乃反有不能及者是以至今又幾百年而其是非之原終未明白往者雖不足論而來者之監亦學者之所不可不知也故竊并其說以俟同志講而擇焉

讀唐志

宋 朱 熹

歐陽子曰三代而上治出於一而禮樂達於天下三代而下治出於二而禮樂爲虛名此古今不易之至論也然後知政事禮樂之不可不出於一而不知道德文章尤不可使出於二也夫古之聖賢其文可謂盛矣然初豈有意學爲如是之文哉有是實於中則必有是文於外如天有是氣則必有日月星辰之光耀地有是形則必有山川草木之行列聖賢之心既有是精明純粹之實以磅礴充塞乎其內則其著見於外者亦必自然條理分明光輝發越而不可掩蓋不必託於言語著於簡冊而後謂之文但自一身接於萬事凡其語嘿動靜人所可得而見者無所遺而非文也姑舉其最而言則易之卦畫詩之詠歌書之記言春秋之述事與夫禮之威儀樂之節奏皆已列爲六經而垂萬世其文之盛後世固莫能及然其所以盛而不可及者豈無所自來而世亦莫之識也故夫子之言曰文王既沒文不在茲乎蓋雖已決知不得辭其責矣然猶逡巡顧望而不能無所疑也至於

推其所以興衰則又以爲是皆出於天命之所爲而非人力之所及此其體之甚重夫豈世俗所謂文者所能當哉孟軻氏沒聖學失傳天下之士皆本趨末不求知道養德以充其內而汲汲乎徒以文章爲事業然在戰國之時若申商孫吳之術蘇張范蔡之辨列禦寇莊周荀況之言屈平之賦以至秦漢之間韓非李斯陸生賈傳董相史遷劉向班固下至嚴安徐樂之流猶皆先有其實而後託之於言惟其無本而不能一出於道是以君子猶或羞之及至宋玉相如王褒揚雄之徒則一以浮華爲尚而無實之可言矣雄之太元法言蓋亦長楊較獵之流而粗變其音節初非實爲明道講學而作也東京以降訖於隋唐數百年間愈下愈衰則其去道益遠而無實之文亦無足論韓愈氏出始覺其陋慨然號於一世欲去陳言以追詩書六藝之作而其獎精神療歲月又有甚於前世諸人之所爲者然猶幸其略知不根無實之不足恃因是頗泝其源而適有會焉於是原道諸篇始作而其言曰根之茂者其實遂膏之沃者其光晔仁

義之人其言藹如也其徒和之亦曰未有不深於道而能文者則亦廢幾其賢矣然今讀其書則其出於誦謔戲豫放浪而無實者自不爲少若夫所原之道則亦徒能言其大體而未見其有探討服行之效使其言之爲文者皆必由是以出也改其論古人則又直以屈原孟軻馬遷相如揚雄爲一等而猶不及於董賈其論當世之弊則但以詞不已出而遂有神狙聖伏之嘆至於其徒之論亦但以剽掠僭竊爲文之病大振頹風教人自爲爲韓之功則其師生之間傳受之際益未免裂道與文以爲兩物而於其輕重緩急本末賓主之分又未免於剽懸而逆置之也自是以來又復衰歇數百年而後歐陽子出其文之妙蓋已不愧於韓氏而其曰治出於一云者則自荀揚以下皆不能及而韓亦未有聞焉是則疑若幾於道矣然考其終身之言與其行事之實則恐其亦未免於韓氏之病也抑又嘗以其徒之說考之則誦其言者既曰吾老將休付子斯文矣而又必曰我所爲文必與道俱其推尊之也既曰今之韓愈矣而又必引夫

文不在茲者以張其說由前之說則道之與文吾不知其果爲一耶果爲二耶由後之說則文王孔子之文吾又不知其與韓歐之文果若是其班乎否也嗚呼學之不講久矣習俗之謬其可勝言也哉吾讀唐書而有惑因書其說以訂之

詹應之三經

宋 真德秀

徐子詹應之自少有志經世之學淹貫六藝旁綜史氏記及百家言益嘗薄遊江淮覽觀山川形勢畫戰守策其言鑿鑿可用顧當世亡知我者退而湛思一室自先儒治心養性之說亡不親既又曰吾之身存然後得以究吾之學則夫道家者流所謂喬神保氣云者固不得而畧也遂之廬山入太平宮發其函爰所有窮日夜以讀盡得其指歸曰黃帝老子之言道也後世神僊方藥九還七返之訣術也道吾所當求術有不必泥於是研精陰符道德二經累年然後閱其妙又謂周易參同契二經之羽翼也併為之註釋凡數千言頗用其法以自錄養年今六十有六矣視其色如渥丹兩目盡碧或曰子儒者從事於此得無爲聖門罪人乎應之曰嗇子言是已然嘗思之人之所以有生者受命於天也儒者欲全其所予之理道家欲全其所賦之氣夫理與氣豈二物耶今夫大主拱壁天下之至寶也夫人而知之故必爲韞襲焉然後其實得全亡害理欲主壁也氣猶韞襲也韞襲敗

而莫主辭之完雖庸人且知不可氣弊矣而曰吾以存
吾理其有是哉故吾所爲養其生者非獨以啻吾氣
也欲吾氣之神明有以充其實理之光大也昔者鄉
黨一書其言飲食起居之法甚備蓋閑閑焉如護嬰
兒不敢少恣焉非以氣一則動志而安其身者固所
以保其性與顧聖賢行之於日用之常而道家雜之
以數術之異於是爲不同爾吾儒者不顧爲師說是
守而於他學有取焉是吾之愧也然惟保順其常而
吾非貪生以自利庶其可免乎且養形延年程子不
廢導引吐內上蔡取焉子以爲何如問者憮然曰命
之矣予因米其語書於三經之末應之名谷自號曰
霞山子云

蜀人游監簿慶元黨人家乘後跋

真德秀

慶元黨人者韓侂胄所立名也夫君子羣而不黨黨
之爲言宜美名也哉侂胄以此誣當世之賢余意當
世之賢將引避之不暇而後漢劉先生顧以是名游
公之墓大理寺丞呂復以是名其家乘焉何哉蓋是
是非非之理天實爲之非人力可以倒置也漢之三
君八俊非黨也而中常侍以黨名之方其加以是名
也斥奪之摧殘之固將使天下之人同心疾之也然
天下不惟不疾而益鄉慕之西州豪傑恥於不與而
凡隸名文德之石者至今望之若神人然則人心
所同然者果可以力倒置之耶當慶元初衆賢盈庭
人稱爲小元祐而侂胄以區區騁弁乃欲祖章蔡故
智一因而空之於是姦黨之名以立彼其心固謂被
是名者不勝其辱矣亦孰知夫適以榮之耶游公在
當時名居餘官之首不問可知其人寺丞呂立忘操
行凜凜有父風隱德之報將於是乎在于讀其所輯
家乘不勝起敬而書之且嘆侂胄之愚欲以一手拊

天下之目也建安真集書

書通鑑後

宋 陸 游

周世宗既服江南諭使修守備通鑑以為近於大邦
畏其力小邦懷其德是比之文王也方是時世宗將
有事於燕晉其謀以為若南方有變雖不能為大害
然北伐之師勢亦不得不還故先思有以安江南之
心又疲其力於大役使不得動比北伐成功江南折
簡可致矣此世宗本謀也遽謂之近于文王豈不過
哉然世宗之謀則誠奇謀也蓋先取淮南去腹心之
患不乘勝取吳蜀楚粵而舉勝兵以取幽州使幽州
逆平四方何足定哉甫得三關而以疾歸則天也其
後中國先取蜀南粵江南吳越太原最後取幽州則
兵已弊于四方而幽州之功卒不成故雖得諸國而
中國之勢終弱然後知世宗之本謀為善也

書郭崇韜傳後

宋 陸 游

後唐莊宗初得天下欲立愛姬劉氏爲后而韓夫人正室也伊夫人位次在劉氏上莊宗雖出又承天下大亂禮樂崩壞之際然顧典禮人情亦難其事未知所出群臣雖往往阿諛士學術然亦無敢當其議者豆盧革爲相郭崇韜爲樞密使崇韜功高迹危思爲自安計而革庸懦無所爲惟誦崇韜以自安因相與上章言劉氏當立於是莊宗遂立劉氏爲后劉氏既立貶質蠹政殘賊忠良天下遂大亂莊宗以弒崩李氏之子孫繼焉嗚呼革不足言矣崇韜佐命大臣忠勞爲一時冠其請立劉氏非有他心也不過謂天子所寵昵而自結焉將賴其助以少安而已然唐之亡寔由劉氏是亡唐者崇韜也後唐之先皆有勲勞于帝室晉王克用百戰以建王業莊宗因之遂有天下同光之初海內震動機可指麾而定矣而崇韜顧區區之私引劉氏以覆其社稷而滅其後嗣宗廟之靈其肯赦之乎崇韜卒以盡忠赤其族革亦無罪誅死豈非天哉昔唐高宗欲立武昭儀爲后大臣褚

遂良等力爭以爲不可者皆得禍獨李勣勸成之罷極富貴而死自謂得計矣及武氏得志唐高祖太宗之子孫誅戮幾盡而勣雖死亦卒以孫淑業故發墓剖棺焚其宗族遂良等雖得禍不至此也天理之不可逃如此雖然豈獨天理哉彼勣與崇韜皆武夫烈士勇于報德乃以此心揣婦人以爲自安之奇策婦人之性陰懷忍毒果于背德方其得志自肆若豺虎然豈復思得立之所自哉然則二人之禍雖微天理固有不可逃者矣悲夫

跋陳伯正所藏山谷帖 宋 陸 游

此卷不應獨在長安逆旅中亦非貴人席帽金絡馬
傳呼入省時所觀陳子他日幅巾筇杖瘦青衣江相
羊喚魚潭瑞草橋清泉翠樾之間與中山人共小巢
龍鶴茶飯掃石置風爐煮家頂紫茁然後出此卷共
讀乃稱爾

跋劉凝之陳令舉騎牛圖 宋 陸 游

公卿貴人方黃金絡馬傳呼火城中時欲如二公騎
牛山谷蕭散遺物固不可得若予者仕既齟齬及斥
歸欲買一黃犢代步其費二馬有畸作獮畜童又在
此外遂一笑而止徒有此生猶著幾兩屐之歎乃知
二公風流亦未易追也紹興甲寅十二月二十九日
陸景識

劉凝之字隱安小名長生南郡枝江人也慕老萊
嚴子陵為人推家財與弟及兄子立屋於野外非
其力不食辟召不就性好山水攜妻子泛江湖隱
居衡山採藥服食年五十九見晉書

記太極圖後

元 劉 因

太極圖朱子發謂周子得于穆伯長而胡仁仲因之遂亦謂穆特周子學之一師陸子靜因之遂亦以朱錄為有考而潘誌之不足據也蓋胡氏兄弟于希夷不能無少譏議是以謂周子為非止為种穆之學者陸氏兄弟以希夷為老氏之學而欲其富膠加無極之旨而有所顧藉于周子也然其實則穆死于明道元年而周子時年十四矣是朱氏胡氏陸氏不惟不致于潘誌之過而又不致乎此之過也然始也朱子

見潘誌知圖為周子所自作而非有所受于人也于乾道己丑己叙于通書之後矣後八年記書堂則亦曰不由師傳然契道體實天之所畀也又十年因見張詠事有陰陽之語與圖說意頗合以詠學于希夷者也故謂是說之傳固有端緒至于先生然後得之于心無所不貫于是始為此圖以發其秘爾又八年而為圖書注釋則復云莫或知其師傳之所自蓋前之為說者乃復疑而未定矣豈亦不致乎此改其為說之不決于一也而或又謂周子與明宿即古同事

濶州一浮屠而傳其易書此益與謂邵氏之學因其母舊為某氏妾藏其亡夫遺書以歸邵氏者同為淺薄不根之說也然而周子邵子之學先天太極之圖雖不敢必其所傳之出于一而其理之出于河圖者則又未嘗不一也夫河圖之中宮則先天圖之所謂無極所謂太極所謂道與心者也先天圖之所謂無極所謂太極所謂道與心者即太極圖之所謂無極而太極所謂太極本無極所謂人之所以最靈者也河圖之東北陽之二生數統夫陰之二成數則先天圖之左方震一離兌二乾三者即太極圖之左方陽動者也具兌離之為陽中之陰即陽動中之為陰靜之根者也河圖之西南陰之二生數統夫陽之二成數則先天圖之右方巽四坎艮五坤六者也先天之右方巽四坎艮五坤六者即太極圖之右方陰靜者也其坎艮之為陰中之動首即陰靜中之為陽動之根者也河圖之奇偶即先天太極圖之所謂陰陽而七陽皆乾凡陰皆坤也河圖先天太極圖之左方皆離

之象也右方皆坎之象也是以河圖水火居南北之
極先天圖坎離列左右之門太極圖陽變陰合而即
生水火也至元丙子八月望日靜修齋記

跋懷素藏貞律公二帖後 元 劉 因

顏魯公自其九世祖騰之至公以能書名天下若凡
十人而顏類不與焉其淵源已如此而其父已傳法
於殷仲容而公又命意於張長史今見懷素此帖所
云則知公之講習於師友者又如此焉呼書一筆也
必欲其精而猶如是矧其大者乎帖後有文潞公呂
汲公趙懿簡劉忠肅諸公元祐四年跋語是年潞公
以元老平章軍國事方辭去不得而汲公為宰相懿
簡為樞密忠肅公為御史呼亦盛矣哉後游師雄列
此帖於長安則八年九月也宣仁后實以是月崩而
明年已非元祐矣宋之治亂已於此分又所以發予
之歎也此雖一帖而有可鑒者云至元丁丑七月己
亥容城劉因書

人東是氣以爲五臟百骸之身者形質相孚而氣亦流通其聲色氣味之接乎人之口耳鼻目者雖若混然然其在我而同其類者固已胞焉而相合異其類者固已悖然而相戾雖其人之身亦不待而自知也如飲藥者以枯木腐骨湯爲薺粉相錯合以飲之而亦各隨其氣類而之焉蓋其原一也故先儒謂酸木味木根立地中似骨故骨以酸養之金味辛金之纏合異物似筋故筋以辛養之鹹水也似脉苦火也似氣甘土也似肉其形固已與類矣而其氣安得不與之流通也推而言之其吉凶之於善惡亦有類也天生此一人而一世事固能辨也蓋亦足乎已而無待於外也嶺南多毒而有金蛇白藥以治毒湖南多氣而有薑摘茱萸以治氣魚鱉螺蛭治濕氣而生於水麝香羚羊治石毒而生於山蓋不能不以勝復之氣則不能生於其氣之中而物之與是氣俱生者夫固必使有用於是氣也猶朱子謂天將降亂心生弭亂之人以擬其後以此觀之世固無無用之人人

固無不可處之世也

書李伯時九歌圖後

元 吳 澄

九歌者何楚正之歌也。正以歌舞事神，手舞而口歌之。九歌之目，天神五人，鬼二地，示一，俱非楚國所當祀。而况問乎物魅？一又非人類所與接也。然則楚正事之而有歌，何耶？古蠻荆之地，中國政化之所不及。先王禮教之所不行，其俗好鬼而多淫祀，所由來遠矣。三閭大夫不獲乎上去國而南，觀淫祀之非禮於正歌，之不辭憤悶，中託以抒情，擬作九篇，既有以易其荒淫媒慢之言，又借以寄吾忠愛繆繆之意。後世

文人之擬琴操，擬樂府，肇於此。琴操樂府古有其名，亦有其辭，而其辭鄙淺，初蓋出於賤工野人之口。君子不道也。韓退之作十琴操，李太白諸人作樂府詩，篇皆承襲舊名，撰造新語，猶屈原之九歌也。太一天神也。按天官書中宮有太一星，非此之謂。禮記云：禮本於太乙。莊子云：主之以太一。一者天地之始也。主宰之帝，故曰上皇祠。在楚東，故曰東皇。猶秦祠白帝於西時也。司命亦天神也。周禮所祀有司中、司命，註以鳥星，非也。司命者萬物之母也，有大有小周禮

一鳥司中，一鳥司命，中者民受中以主之，中命者陰陽五行化生萬物之命也。東君，日神也。禮云：春朝朝日，又云：王宮祭日，祀於東方，故曰東君。雲中君，雲神也。周禮祀風師雨師，而不言祀雲雲師雨之屬也。同宜有祀，或謂楚有雲夢二澤，雲澤謂之雲中，夢澤謂之夢中。雲中君，雲澤之神。考之歌辭曰：日月齊光，曰龍駕帝服，曰衆遠攀曰橫四海，乃天雲非雲澤也。湘君，湘夫人之稱。黃陵廟碑楚辭辨證備矣。太一尊神，歌辭獨簡質，而莊重，擇日辰盛服，飾潔器物，備音樂，以致其尊奉臣之修其忠善以事君，猶是也。司命雲日言神既來而過去，以况君始親已而後疏之於皇英，欲一見而不可得，以况已欲見君納忠而卒不答也。河伯與巫既別而波迎魚騰，近於古者三有禮焉之遺風，而楚之於原不如是。故集註有云：原豈至是而始嘆君恩之薄乎？八篇並以神况君，山鬼物魅耳，不可以况君也。故原特變上八篇之例，不作巫語而作鬼語言，鬼欲親人而人不親之，以况已欲親君而君不親已也。夫此歌假託之辭，與戲劇何異，而唯恐

引喻失當有乖尊卑之禮敬之主也九歌之後有二篇國殤者為國死難之殤禮視者以禮善終之殤年十九以下死曰殤不終其天年而死亦曰殤春蘭秋菊終古無絕四時祖考之常祭也前之九歌原託以仲已意後之二篇無所託意止為巫者禮神之辭而已蓋與九篇不同時後人從其類而附焉此畫李伯時所作伯時畫妙一世而或傳此畫若有神功然蓋其尤得意者在洪都郡守毛侯出示予既為作解題而復隱括九篇歌辭成詩一篇與詞之意雖微不

同而明原之心其超一也嗚呼千載而下能有是於原之心者尚有味於予之言哉

李侯畫手入神品楚賢流風清凜凜誰遣巫陽叶帝開為招江上歸來魂音紛紛音紛紛桂馬長遠馳不聞秋桑初噉海橫雲二妃淚洒重華墳司命播物泥在釣洪纖厚薄無齊勻公無渡公無渡衡風起喘奄奄夜猿啾啾天欲雨天欲雨連歸路歲暮山中休菊杜冥脩顏頰去莫怨瑤臺神女妬坎坎鼓進芳醕紅作蟹玉小腰舞千年佳事今如新摩挲舊畫空愴神騰身輕舉一回首

楚天萬里江湖春

書經廷奏議策後

元 虞 集

泰定元年春皇帝始御經筵皆以國語所說書而進讀左丞相專領之凡再進講而駕幸上都次北口以講臣多高年召王結及集執經從行至察院行宮又以講事亟召中書平章張公珪遂皆給傳與李家赤等俱行是秋將還皆拜金敕對衣之賜獨遣人就賜趙公簡于浙省加白金焉賞言功也四年之間以宰執與者張公珪之後則中書右丞許公思敬與今趙公世延也御史臺則中丞撒忒迷失而任潤譯講讀之事者翰林則丞旨也先帖木而忽都魯克魯迷失學士吳激幼清阿魯威叔重曹元用于貞撒撒干伯瞻燕赤信臣馬祖常伯庸及集侍制彭寅亮允道吳律伯儀應奉許維則孝思也集賢則大學士趙公簡敬甫學士王結儀伯鄧文原善之也李家奴總元買閻仲章皆禮部尚書吳東道彥宏中書參議張起岩夢臣中書右司郎中也或先或後或去或留或從或否或久或近而集與燕赤則四歲皆在此行者也今大丞相自爰立後每講必與左丞相同侍而張公既

歸老猶帶知經筵事皆盛事也今年春趙集賢始以建議召入侍講一日既進書待命殿廡趙集賢慨然數曰予是四年矣未聞一政事之行一議論之出顯有取於經筵者將無虛文乎集乃言曰卿若公奏焚惑違舍事王音若曰講官去數嘗及此又欲方冊便觀覽命西域工人搢楷烏帙刻皮鏤金以護之凡廿枚專屬燕赤繕錄前後所進書以此觀之簡在上心明矣誠使少留淵表則見於德業者何可得而名哉且先儒有言政不足適人不與聞其要格心而已然則所慮者言不足以達聖賢之旨誠不足以感神明之通吾積吾誠云耳他不敵知也然而集賢慨然切至於孟子之所謂夫恭敬者益可見焉故併書奏議

蒙後而歸之四年十二月朔旦書

請唐太宗帝範

元 吳 萊

初唐太宗帝範一卷十有二篇太宗嘗手撰以教太子五代喪亂書有錄而遂闕暨今上征雲南焚夷始出以獻而舊十有二篇復完予聞古今欲治之主不世出嘗必立為治天下之法使其後嗣子孫有以世守之而不敢失墜不幸而一旦昏庸懦弱之君或繼其後亦得有所扶持焉藉不至於甚亂而僅存此雖三代聖人制基垂統立經陳紀而務欲定為法度典章者然亦不過教傳則已自棄其先祖之訓誠國敗

家接踵而有夏之太康商之帝甲武乙周之幽厲五若無異於漢唐之季世然猶幸賴其法度典章之炳然播於宗廟布在有司賢聖之君復有赫然而振起者有此具也自是以來漢承秦亂而高祖立漢家之法唐受隋亂而太宗設唐室之制嗚呼漢法逮矣蓋惟唐制傳之未久而天下多事 侵凌藩鎮跋扈盜賊相挺而起莫之能救此其故何哉當隋氏大亂太宗始銳然盡舉天下於盜手即議立國法粉飾朝章誠欲別其基業於前而特垂具統緒於後使後嗣

子孫得以繼續而行且將有待於此而不害於無所守者是故職官之任定以常員帥使之備設以府衛用以授田則口分世業之法均度以歛財役民則田租身庸戶調之制不紊自古者聖賢之道不作而一切霸強苛簡之術用而太宗乃能慨然庶幾乎先王仁義之意而務成貞觀二十餘年治平之功自漢以來可謂古今欲治不世出之主矣然而太宗每知太子之仁孝慈懦恐不足以任國而僅述古昔聖賢之遺訓帝王之常法強而教之謂為帝範及至太子即

位曾不幾時內則惑於嬖后外則作逆賢相則夫天下國家紛紜變故之迭至曾不可以思患而預患者卒至於易姓改號殺戮宗姓而後已然猶幸其有所扶持焉藉且不至於盡亂而僅存者賴有法也惜乎當時太宗立法之際身教則從言教則訟每求其所以致然者自其法度典章之中或不能自免其瑕釐間隙之可議書有之曰丕顯哉文王謨丕承哉武王烈佑啟我後人咸以正周故太宗之為治無乃文謨武烈一本於正又能無缺者豈或猶有可憾者即何

則太宗親定萬內蓋因隋氏高麗喪師之後而得之
自其即位北滅突厥薛延陀而制高昌徙其種人編
置沿邊州郡而蕩然無有蕃漢內外之防及其晚年
又且東征高麗頻死而帝已是雖高宗之慈懦猶襲
其故深異乎漢孝元之議罷珠崖降及數世而明皇
繼之君臣宴然邊隙數動至竭天下之兵委之西北
付以藩臣中國空虛大盜承之而遽起由是天下多
故藩鎮繁錯奚契丹深入河北吐蕃回鶻連陷秦隴
震驚都邑師徒撓敗土境日蹙而唐室之號令所及
曾不出淮浙已廣數十郡地而遂已戚宦之任師徒
之備授田之法歛財後民之制大抵悉改其舊此豈
非當是邊境用兵之或過遂致蕩延於中國而不以
熄哉然以唐之子孫庸懦弱或危或微不絕若綫
是雖太宗之法守之有未盡替得以扶持憑藉不至
於甚亂而僅存誠求其所以致是亦由太宗平日貪
勝好名之過瑕隙間隙實有以先開其源而漸熾其
禍是則太宗前首包括四海指麾群裔適足以爲當
今屈已和親敗軍卻境之效不可救已夫然故唐之

一代天下之致治莫如太宗天下之致亂亦或自於
太宗而後世議者不之覺也嗚呼予觀太宗之志常
欲法三代次行周禮遂紬紬對德桑之說而專用觀
之仁義貞觀之治夫豈近世所可逮及使其當時立
法之際而其身之所行者一本於正無復可議則雖
三代聖人創基垂統立經陳紀之道何異於是然以
太宗終以不能企及者是亦貪勝好名之一過也詎
不信夫

題跋

書請題跋下

明

恭題御製論語解二章後 明 宋 濂

右解論語二章乃皇上所親製以賜翰林修撰臣孔克表者也初上留心經籍以為經之不明傳註害之傳註之害在乎辭繁而旨深洪武六年乃詔克表及御史中丞臣劉基秦府紀善臣林溫取諸經要言析為若干類以恒言釋之使人皆得通其說而盡聖賢之旨意又慮一二儒臣未達注釋之凡乃手釋二章以賜克表俾取則而為之克表等承詔釋四書五經以上詔賜名曰羣經類要復表疏所賜為卷以臣濂嘗與聞斯事請識其左方臣聞聖人之治天下養之以政而教之以道民非養不生非教不明三代以降未有養之者也欽惟皇上以聖智之資治民之政壹法乎古復慮經旨晦而人不知道乃釋諸經以教之其為後世慮者可謂詳且備矣克表適際盛時而預執筆承明詔豈非幸哉昔唐之盛時太宗有志於起化而孔氏曰穎達者實率諸儒為五經疏天下至今傳而誦之不廢今上開物殫民之心過於太宗而克表復為諸儒首孔氏可謂世不乏人矣它日是書之

傳將與類達之疏無異則夫聖謨之詳烏可不知所
自哉臣故表而出之使後世知類要之書實本諸此
也

恭題御製方竹記後

明 宋 濂

皇帝視朝之暇燕處武樓中每召一二臣隣諮詢治
道時吏部尚書臣詹同在帝左右歷談古帝王事旁
稽物理而偶及於竹帝曰竹之類其亦多乎臣同對
曰其類實繁晉戴凱之所譜至五十餘種或根如盤
輪或節若束針或細則勝箭或鉅可為舟有未能歷
舉者大槩其色皆青其體皆圓也唯吳越山中有名
方竹者最為倭異四稜直上弗偏弗頗若有廉隅不
可犯之色以故士大夫愛之往往采而為節帝曰信
有諸乎臣同復對曰老臣焉敢謬言既退獲一枝以
獻帝摩挲觀之悅曰臣同其亦信人哉於是親御翰
墨草方竹記一通始言品物之夥中序格致之難及
其末也謂臣同為人俊偉氣豪稽之傳記知過百人
曰豪千人曰俊天語之褒嘉斯亦至矣已而召臣同
於端門俾給事中繕書以賜臣同不勝忭躍將趨拜
墀下帝笑曰卿頭童齒豁矣何以謝為臣同捧出屬
裝潢工飾以龍紋玉軸持視太子贊善臣宋濂臣濂
竊自念草莽微臣侍帝前者十又五年當帝為文性

或不喜書詔臣濂坐榻下膝舐受辭終食之間入經
出史滾滾千餘言仰見天光昭回赫著簡素皆日精
月華之所凝結敷之為卿雲散之為彩霞曾不見神
化著見之迹其誠所謂天之文哉臣濂聞之三代而
下混一寰宇者若漢唐之高祖宋之太祖皆產乎北
其勲烈信偉矣而未見以文辭稱今我皇上生自南
服天戈一揮九州內外罔不臣妾自天開地闢以來
世所未有况乎神藻煥發陰驅陽明下被萬物無不
仰熙此無他皇天欲以文明化成天下故挺生聖人
度越前代若斯之盛也然聖製雖多未嘗輕以予人
臣同以文學侍從之臣簡在帝心者久故特被是賜
焉夫臣以誠而事上君以恩而逮下唐虞盛治一旦
復見三千餘年之後何其懿哉臣同宜勒諸金石與
典謨訓誥之文並藏之子孫之多永永傳之無極臣
同受賜以洪武癸丑歲五月之戊辰越二十七日實
六月之乙未臣濂謹董沐而題其後云臣濂拜手謹
記

恭跋御製詩後

明 宋 濂

臣聞自古人君有盛德大業者其積慮深長而詒謀
悠久必日與文學法從之臣論道而經邦當情意洽
孚之時或相與廢歌或夜以詩章或燕之內殿君臣
之間實同魚水非直以為觀美所以禮賢俊示寵恩
而昭四方也有如唐之文皇宋之太宗其事書之簡
編者可以見之矣皇明紀號之八年秋八月甲午皇
上覽川流之不息水容澄奩油然有感於宸衷陋尹
程秋水賦言不契道乃親更為之賦成召禁林羣臣
觀之且曰卿等亦各撰賦以進臣率同列研精覃思
鋪叙成章詣東皇閣次第投獻上皆親覽焉復真品
評於其間已而賜坐勅大官進天厨奇珍內臣行觴
觴已上顧臣曰卿何不盡飲臣出跪奏曰臣荷陛下
聖慈賜臣以醇酎敢不如詔第臣年衰邁恐不勝括
酌志不攝氣或愆於禮度無以上承寵光爾上曰卿
姑試之臣即席而飲將徹上復顧臣曰卿更宜酌一
觴臣再起固辭上曰一觴豈解醉人乎卒飲之臣舉
觴至口端又復瑟縮者三上曰男子何不慷慨為臣

對曰天威咫尺間不敢重有所瀆勉強一吸至盡上大悅臣顏面變頰頓覺精神遊漂若行浮雲中上復笑曰卿宜自述一詩朕亦為卿賦醉歌二奉御捧黃綾案進上揮翰如飛須臾成楚辭一章臣既醉下筆傾欬字不成行列甫綴五韻上遽召臣至命編修官臣右重書以遺臣遂諭臣曰卿藏之以示子孫非惟見朕寵愛卿亦可見一時君臣道合共樂太平之盛也臣行五拜禮叩首以謝上更勅給事中臣善等賦醉學士歌云臣既退竊自念曰臣本越西布衣粗藉父師明訓弗墜箕裘之業而已一旦遭際聖明遣使聘起之踐歷清華地躋禁近無一朝不覩日月之光如此者凡十又七年叨冒恩榮夔絕前比所幸犬馬之力未衰誓將竭奔走之勞以圖稱今天寵屢加雲翰之章昭臨下土臣竊自靖度何足以堪之雖然傳有之泰山不讓土壤故能成其大河海不擇細流故能就其深王者不却衆庶故能明其德洪惟皇上尊賢下士講求黃真治道度越於唐宋遠甚雖以臣之至愚亦昭被非常之殊渥六合之廣其有抱藝懷才

者孰不思踴躍奮厲以揚於王庭哉臣按南有嘉魚之詩有曰君子有酒嘉賓式燕以樂序者謂太平之君子至誠樂與賢者共之也皇上思寵之便著抑過之矣又按天保之詩有曰罄無不宜受天百祿降爾遐福惟日不足序者謂臣能歸美以報其上臣雖無所獻為願持此頌禱於無窮哉古者侈君之命勒諸鼎彝藏諸宗廟嗣世相傳以至於永久臣敢竊援斯義確玉為軸裝褫成卷什襲珍藏以顯示來裔給事中臣善等應制諸詩附錄其後而賢士大夫聞風慕豔而有作者又別見左方云

題孝宗付史丞相內批後 明 宋 濂

阜陵銳意於恢復中原張魏公浚賁之頗力而史衛公浩多從中沮之上嚮信方篤隆興元年正月浩拜右僕射同平章事浚即有區密使都督江淮軍馬之命今內批所謂肅清舊壤者蓋指恢復也又云卿勉與樞使議之樞使正指浚也當是時二府議不合故上戒飭之也建炎五月親征之詔下浩以不預出師之謀遂力丐辭罷知紹興府奉祠而歸此批之頒當在未罷相前數日間爾予道出欽上朱徵君持此卷

至驛舍迫之使題故走筆識之如右張史之得失出師之成敗未暇悉也凡有旨從內出者曰內批又謂之御筆皆內夫人代書而所謂御寶批者或內夫人批皆識之以御寶唯親筆則上親書押字而不用寶此批不用寶而有押字正所謂親筆者也聊并及之以見當時故事云

劉參軍黃牒跋尾 明 宋 濂

西昌劉氏素號簪纓家由宋治平元年至咸淳十年擢第奉常者八人與鄉閭之貢者又二十九人其諱在中字伯正者凡四被薦送方登建炎二年進士第授文林郎永州錄事參軍此蓋其九月所受黃勅也宋舊制告與勅多兼給思陵以建炎元年五月一日即位於應天府戎馬紛紜庶事草創其月十七日始詔文武官自大中大夫正任觀察使以上並命辭給告餘則令吏部具鈔降勅則當時給勅者頗衆不特

初入官令錄而已後因臣寮奏請許詔已給勅官俟法物成時逐等依舊給告則三年三月九日也牒後所書中大夫守右丞朱中大夫守左丞顏而不著其名朱名勝非謚忠靖顏則名岐蓋元年十一月思陵駐蹕維揚越十日擢岐與許景衡為尚書左右丞二年五月十三日景衡罷而勝非代其位以月日較之必知其為二人矣又書正議大夫守右僕射而不著其名氏當是黃潛善無疑或謂為李綱殆非也綱自元年七月五日自右僕射陞左僕射潛善從門下侍

即為右僕射是月綱即出提舉洞霄宮二年十二月十九日潛善始拜左相此牒給於是歲之九月其以右僕射繫銜非潛善而何職事銜之上三人者並加守字凡階高而官卑者稱行階卑而官高者稱守官階同則無之此猶循唐制也嗚呼潛善主和誤國真奸臣之雄不足污君子齒頰岐亦小人力黨張邦昌詆綱為金人所惡不可使秉鈞軸章至五上而不愧惟勝非差強人意律以春秋責備之義亦有不得免焉區區責畱其能幾何乃無所忌憚至於如此墓骨已朽覽其官氏人猶指議之有憤惋不平之氣果何為者哉參軍八世從孫職方郎中崧出此於破壞之餘賞飾以成卷軸然自宋迄今已歷二百四十又五年矣宋之取士用辰戌丑未年建炎二年屬戊申其秋親試進士賜李易以下四百五十人及第出身有差蓋元年丁未翠華出幸江南故無暇及之爾因并書之以解讀者之疑云洪武五年冬十月一日

題陳忠肅公疏文跋語後 明 宋 濂

七峰居士諫議陳公因上書論日錄事有忤曾布出守海陵尋請武夷祠官未幾除名勒停編管宜春崇寧二年正月移合浦三月五日過長沙興化寺遇神宗忌日於是依浮屠法運轉經藏造疏六千言以薦廢事疏文用駢儷體恐不足以盡意仍以散辭分注其下首序請改實錄言蔡卞者九事非國是者七章其餘辯布之奸凡所以尊私史而壓宗廟者無不縷列既繕告神皇在天之靈是月十五日復以別本綴於元豐中王安石所貽手帖之後又假設臣布引咎之辭作跋語繫之且手書二通一遺其姪正裕一寄其甥李進祖俾秘藏之身死之後出示親戚朋友冀幸有知之者蓋公嘗自謂家覆身亡如浮沚起戒不足深計唯神考十九年駿烈茂功受誣羣小為臣子者不得不辯故其所著之書曰日錄不合神道論曰辯誣論曰尊堯集曰自撰墓志墓志述因 殺身之由其言至一萬八千有奇而語尤哀切然 諸書大抵皆疏文并跋語中意也嗚呼公之愛君尊之

誠耿耿弗忘如此真所謂忠精貫日月者矣烏傷王君諱其八世祖永年令仙居時而公之冢子正彙實為尉交契之深遂以其女歸仙居之子嚴州司法僑今王君家藏跋文正假托臣布引咎之辭豈或正裕所秘藏者而正彙出示於親戚歟今去公造此文時已歷二百四十二年中更水火兵革靡所不有區區一紙之微初非所謂金相石質乃能傲兀無窮世變手澤如新殆造化者使神物護持昭示來裔以遂公忠憤之志而永曾蔡之惡於弗磨也吁可畏哉王君與濂為同門友而義若弟昆間以相示因忘其孤陋而僭書之若夫君子小人進退有係於家國安危者史臣褒貶已有定論茲不復勦說云

題天台陳獻公行狀後 明 宋 濂

濂過濠梁天台王公完出考亭朱子所撰陳獻肅公良翰行狀微濂題識朱子之文古今共尊何敢贊一辭若公事行或有闕遺亦學者之不可不知也按朱孝宗實錄云乾道五年十二月樞密都承旨張說奏請置酒延諸侍從上許之說退約客獨兵部侍郎陳良翰不至說殊不平上遣中使賜以上尊珍膳說因附奏臣奉旨集客而良翰不至是違聖意也已而上命再賜說復附奏良翰迄不肯來夜漏將上忽報中批陳良翰除諫議大夫坐客皆愕然此與唐元宗時宋璟却王毛仲事正類非有剛直之操者孰能與於斯哉夫自軒檜主和議而史浩湯思退繼之牢不可破孝宗恢復之志雖上通於天終莫之遂不主和者惟張浚胡銓張闡張震及公等數人而已公平生大節此最彰著故朱子特詳列之而舍巨說細行亦紀事之體當然耳然而朱子修通鑑綱目際之事何嘗不載况孝宗之知人賢於元宗遠甚亦法所合書豈當時弗知耶抑偶忘耶實錄舊藏元之內府革命後

竟不知所在狀中既不收修宋史者復失於采輯周
公謹紀孝宗聖政雖曰具錄又誤指為同時從官陳
良祐事濂恐後人無所考焉特為補闕授諸公完
使藏焉公完字繼遠公之七世孫今出後王氏云

跋何道夫所著宣撫鄭公墓志銘宋濂

右宋資政殿學士鄭忠愍公墓志銘一通秘監何畊
道夫之所撰也道夫廣漢人故知得治蜀之事為悉
而公之行能勞烈亦獨於蜀為最著紹興中公為川
陝宣撫副使患蜀之困於漕運也乃於關外四州及
興州大安軍行營田之法所營至二千除糧種分給
外實入官十四萬一千四十九斛而金州墾田五百
六十九頃歲入萬八千六十餘斛不與焉誌中所謂
移司益昌以便餽運繼修營田之政是也蜀雖罷兵
而財用不足歲計猶闕錢七百七十八萬緡公奏增
印錢引四百萬復患無錢以權之即利州鑄錢歲十
萬緡以救錢引之弊率費二千而得千錢置官六人
兵匠五百人歲用監官錢七萬緡四路稱提錢十四
萬緡為鑄本其後增至十五萬蜀中因此優裕宣總
所椿積錢五千餘萬緡其餘苛賦一切裁削誌中所
謂減科歛至七百萬緡是也公在閬時吳武順璘以
右護軍都統制駐武興郭恭毅浩以樞密都統制駐
漢陰楊襄毅政以宣司都統制居漢中皆擁強兵自

術勢與大帥抗莫敢吐一語相可否公恩威並立獨能帖服之如大羊每入謁必先庭揖然後就坐誌中所謂三大將拱手側足奉命惟謹是也嗚呼公治蜀六年而能俾財用足橫歛減悍將服其效乃章章如此使久於其職又將何如也奈何天未厭亂奸檜得秉鈞軸忌公不附已而竄逐以死悲夫然公之見忌於檜士大夫皆能誦之至於道夫方為檜之所忌則或者未必盡知之也道夫嘗為類省試第一故事榜首不赴大對者賜進士及第恩數視殿試第三人蓋優之也檜方欲沮張魏公而道夫對策歷論蜀人難進易退之節有高視天下竊笑之語檜族之乃諭禮部令奏但賜進士出身道夫亦視之澹如未嘗一踐貴人門登第三十年始召為會部郎累遷至祭酒鄉人趙溫叔為相雅欲相鈞致亦不肯就及溫叔罷蜀人為所引者皆被逐獨道夫不染物議使其居公之位其尚肯屈志以附檜乎雖職位不同功績遂異道夫清峻之節未必有愧於公也然則公之墓誌非道夫為之孰可為之哉公之子德肖不求之它人而屬

之道夫良有以也吾友彥淵氏公之九世孫以葉史君昌父所書此冊求題故瀛以所聞疏公治蜀之績而詳及道夫之事使覽者知士大夫立身以名節自砥礪有不隨世而磨滅者必將惕然自省也道夫以淳熙辛丑春始拜朝請大夫試秘書監之命其秋輒求去乃除知潼川府今以秘書繫銜則誌文作於是歲春夏之間無疑史君公同郡人果益俞先生之高第弟子雖南康之節不完美然字畫儘佳鮮於伯幾謂其極善用筆至欲下拜而此冊尤其得意書可寶也

因并及之至正十八年三月二十五日

題潘內史贈別墨本

明 宋 濂

太康陸君子廢喜佛氏言以內史舍人潘祐贈別序
文能發明先佛遺義近於白下得墨本承以匡廓緣
以色繒揭真坐右以自省間微予識佑事於下方接
佑幽州人能文辭與徐昂臣齊名仕於南唐自秘書
省正字累遷中書舍人當後主時國事日蹙佑極憤
切累疏論列至謂不能與奸臣同事亡國之主張洎
從而濟之後主乃收佑屬吏佑遂自刎前史馬元康
証佑溺淫祀左道斥為人妖陸游作南唐書能辨其
妄固為甚當及游論佑則識其學老莊齊生死故其
上疏若惟恐不得死者則又未免涉於深刻也人之
所欲莫甚於生雖愚不肖之人亦不輕以畀人况賢
知有如佑者乎直以忠義所激乃視死如歸耳佑之
死其心無白之者昂臣作江南錄亦沒而不書及藝
祖命曹彬南征指殺佑為殺忠臣於是其事始著於
後世於戲為人如佑尚不免議者之口人之不樂善
乃至此哉王介父嘗作文評昂臣至於游之所論未
有指其非者故因子廢之請而極言之清源王古刪

昆明遠諸書為道院集要全載此文以簡牘為簡牘
蕙芥蕙寔東為蜀促亦微有不同要當以石本為正

跋韓忠獻王所書義鵲行後

宋 濂

右韓忠獻王琦所書杜南畫鵲行端嚴厚重古所謂顏筋柳骨殆無以過之展卷熟視則夫垂紳正笏不動聲色而措天下於太山之安者其氣象猶可想見其彷彿也朱文公有云韓公書蹟雖與親戚卑幼未嘗有一筆作行草勢以此觀之王之為人由中達外無斯須不本於誠故其建功立事凝定不搖德在生民而名著史冊宜也視被仰欬僇仆常若大忙中書者則其躁急寬易相去何如哉

題司馬手帖

明 宋 濂

右司馬溫公與范忠宣書一通藏楚郡龍雲從家雲從問請題其後濂聞哲宗初立崇慶太后同聽政起公知陳州過闕留為門下侍郎忠宣亦從慶州召還為右諫議大夫俄遷給事中此書正此時所造其殆元豐乙丑之冬或元祐丙寅之春乎夫公自熙寧辛亥居洛再任留司御史臺四任提舉崇福宮至是始司政柄故書中有間居十五年之言公年蓋已六十有七新法方盛行小人附和者衆公度不可止遂絕口不言事故又有更求一任數官守候七十即如禮致事之言當是時章惇蔡確黃履邢恕等蛇蟠蚓結牢不可解公新自外至孑然獨立故又有如一黃葉在冽風中幾何而不危墜之言公之志為可悲矣然公與忠宣素相知其居洛日忠宣方丐罷齊州之政判西京留臺乃同為真率會則其志同道合固非一日之故熙寧之法又皆共起其為害而其設施或不同者忠宣則欲去其太甚公則欲鋤其本根雖書有隨時示諭勿謂形迹之請二賢之見粹有未

易合者豈天未欲平治天下故使之然歟公遣此書
後僅及數月且觀化冥冥之中忠宣繼公為左僕射
務以博大開上心忠篤萃士風四海方翹首望治魯
未幾何穎昌之命亦遽下矣不亦重可悲夫聞此帖
者當知治亂之機所繫初不可以尋常簡牘視之也

跋黃魯直書後

明 宋 濂

右太史黃公書李白秋浦詩凡十七首筆勢瀟灑皆
起軼絕塵觀公所自題謂寫此時雲日流煥移竹西
牖下旋添新翠有攜幽禽至者時弄新音粲粲可聽
則其情景相融盪而生意逸發於毫素間至今如此
飛動當是時公方謫涪州別駕自常情言之必憔悴
無聊所見花鳥濺淚驚心公乃能藉之游戲翰墨無
一髮隕護之意非行安節和夷險一致者有弗能也
昔人稱公以草木文章發帝杼機花竹和氣驗人安
樂雖百世之相後使人躍躍興起者豈欺我哉紹聖
二年公年已五十二故此書矜勁比舉學官丞祕書
時如出二手當時錢穆父不能深知猶病公為拙公
嘗謂李致堯云書要拙多於巧近時少年作字如新
婦子粧梳百種點綴終無烈婦態嗚呼公言其有所
感也夫

題文履善手帖後

明 宋 濂

右少保文信公手帖知贛州日六月所發公自為賈師憲所忌咸淳壬申即授錢若水例上休致之請明年癸酉紹慶特起公提點河南刑獄又明年甲戌改知贛州公年始三十有九爾守贛僅逾年當德祐乙亥之秋即帥勤王之師未赴臨安所謂六月正甲戌之六月也後一年丙子宋亡又二年戊寅公在潮為王惟義所執又四年壬午公以忠死於燕則勝朝至元十九年也距作此帖時蓋九閱寒暑矣丙申春客

有以悅生堂蘭亭本求跋者上有師憲題記予因斥去不暇顧未幾胡君忽出此卷相示再拜起觀恍若見寶玉大弓於先王之世諦玩不能釋手於戲善惡之在人心其不磨滅者如此雖千萬世不易也深可畏哉

題余廷心篆書後

明 宋 濂

右四大篆幽國忠宣公余闕為浦陽戴君叔能書至正九年公持使者節來鎮浙部濂偕叔能往見公獎勵甚至且各書一扁為贈公去浙後江南大亂荆楚之域皆為偽漢陳友諒所據公時以淮南行省右丞分治安慶安慶前後皆盜區公獨守六年小大二百餘載未嘗敗北不幸艱絕城陷公遂赴水死君子稱其大節與日月爭光信哉公文與詩皆超逸絕倫書亦清勁與人相類然其忠義之氣可以思亂賊清惡

屬天地因之以位君臣藉之以定斯豈細故雖書不工猶當傳之萬世况能臻其妙者乎此紙所在定有神物呵護見者當如張中丞之詩段太尉之笏筆然起敬不可徒以翰墨視之公唐元氏余闕其名也字廷心一字天心元統元年進士世居武威今為合肥人

題淵明小像卷後

明 宋 濂

右龍眠居士所畫淵明小像卷鉅公名人題贊於後
發揮出處者甚備固不必真辭於其間有謂淵明耻
事二姓在晉所作皆題年號入宋之詩惟書甲子則
慙於傳記之說而其事有不得不辨者矣今淵明之
集在其詩題甲子者於庚子而迄於丙辰凡十有
七年皆晉安帝時所作初不聞題隆安元興義熙之
號若九日間居詩有坐視時運傾之句擬古第九章
有忽值山河改之語雖未敢定於何年必宋受晉禪
之後所作不知何故反不書以甲子耶其說蓋起於
沈約宋書之誤而李延壽著南史五臣注文選皆因
之雖有識如黃廷堅秦觀李燾真德秀亦踵其謬而
弗之察獨蕭統撰本傳謂淵明以曾祖晉世宰輔耻
復屈身後代見宋王業漸隆不復肯仕朱元晦述通
鑑綱目遂本其說書曰晉徵士陶潛卒可謂得其實
矣嗚呼淵明之清節其亦待書甲子而後始見耶姑
參先儒之論而附著於左方云

題三台三節婦傳後

明 宋 濂

予修元史時天台以三節婦之狀來上命他史官具
豪親加刪定類入列女傳中奉詔刻梓行世先是會
稽楊康夫為之作傳其事頗多於史官蓋國史當畧
私傳宜詳其法則然也近與台士游嘗詢之則康夫
所載猶有闕遺者因據其言補之杜思綱娶沈沈生
三女及子勤而死繼室宗媛秘書丞陶誼女兄也生
一女思綱亦亡宗媛棄膏沐弗御上奉七十之姑獲
其離心下視沈之子不翅親育十八年間悉畢其婚
姻歲丁未九月壬寅台城陷火燄燭天宗媛護姑柩
不忍它適為兵所繫驅之行宗媛不從兵起刺仆於
頭深入二寸餘不見血而沒瀕死無它言惟念勤不
置曰勤苟不存吾尚何望哉宗媛妹宗婉歸周本亦
同日死於水詎婦王淑見事急抱其子名長已者屬
傳姆曰持以歸其父長已存吾不死矣乃披髮亂走
明日定事求之不得淑見夢勝人曰吾義不辱身赴
南鄰杜氏并死矣所懷簪珥亦投其中可聞漢生知
之漢生其夫也也勝人以告黎明冕之皆在焉實十

月乙巳也然人之受亦無血者宗媛則以之淑雖死其精靈猶能動物不亂是知貞節之人其超絕誠與常人殊薦紳家相訾砮者輒斥曰女子婦人女子婦人猶有是嗚呼

跋新刊孝經集注後

明 宋 濂

予舊友呂君遂出守合肥患寇盜未息而民或不知有父子之親因刻孝經集注於學宮俾家傳而人誦之嗚呼呂君之意則善矣亦幸遭夫有道之朝專用儒術故得以專行其志焉爾何以言之昔者宋梟為隴右刺史梟患涼州多寇叛欲多寫孝經令水習之庶幾使人知義蓋勳力諫梟不從遂奏行之詔書詰責坐以虛慢夫教人革心從善者莫踰於聖經顧乃視為迂遠遲頓之器宜乎漢祚之不振也宋梟之事與呂君正同而其幸不幸有如此者非其人才之相懸實以所繫之時或不侔也抑嘗聞在宋之季雪嵒先生鄭公霖因講中庸一篇而使寇退不敢來攻城者此又明効大驗見於事為非止空言而已也有若呂君此舉實知為治之要而非刀筆吏所可及予恐流俗之未能喻也猶以為迂故為題諸篇末如此云

跋太史遺音

明 宋 濂

士大夫以琴鳴者恒法宋楊守其續所以合續者以合於晉嵇康氏故也而其中不無可疑者建樂立均責乎和平宮君而商臣君尊而臣卑有不可毫髮僭者康當晉欲代魏之時憂憤無所洩所制廣陵散操特慢高絃至與宮等其聲忿怒躁急不可為訓尚可為法乎此其可疑一也古者協管以定正宮以正宮為聲律之元也今續以中呂為宮則似用旋宮之法既曰旋宮則諸律何不能各為宮乎其與獨彈黃鍾一均者又何異竊意古人必隨月用律決不若今之膠固不通此其可疑二也千載之下正音寥寥失傳安得知有虞孔子之遺音者相與論斯事今閱此書不覺長慨

讀宋徽宗本記

明 宋 濂

徽宗爰自端邸入正宸極呼吸雷風舒慘陽陰赫然有為聞於天下於是叙復正人宏開言路意臻時雍之治以復祖宗之舊曾未旋踵卒改所圖委政姦回托國闇豎隅軸非據節鉞妄加狐狸嗥於闕庭鬼域潛於宮掖置編類之局樹黨人之碑倡言紹述擠陷忠良虐斂炎炙手可熱百僚側足四國寒心羣光才為得志力陳豐豫之說開大晟府以制雅樂用魏漢律而鑄九鼎文飾太平詐言符瑞八寶誕受玄圭聲錫金芝出於蟾脊祥麟毓於牛腹由是侈心寢生邪欲轉熾大興土木之役初運花石之綱艮岳排空絳霄凌漢碑極工藝之巧鈞致珍怪之物君臣酣飲上下荒淫俾晝作夜以亂為治至同臣庶之服恣行期門之事兼之妖人乘釁惑帝聰天神降於坤寧璇宮過於寰宇元科秘錄方崇醮祠之儀太虛金壇遂定道階之品其視法弊令乖民生塗炭將驕卒弛邊備摧落縱有耳而不聳雖有奏而弗鑒皇天震怒災異荐臻白青見於禁籞赤氣犯於紫宮大水冒於

都城妖狐升於御榻咸謂適然益開戎霧滅天祚而亡兄弟之國結女真而進虎狼之卒啟役謀遂成反噬張毅之降始受粘罕之師已出旌旗蔽空戈戟滿野肆其封豕之威如蹈無人之境蹂踐我檀薊侵軼我代朔攻擣我太原圍逼我京闕三鎮之割方急六賊之誅已緩勢至於此亦可醜矣及夫金兵再出力遂不支瓦鮮土崩魚爛河決宮闈淪辱宗室剪夷哭聲震天赤血滿地翠華北狩遠臻漠北之區父老見思徒洒山東之淚當是時也雖欲噬臍悔將何及

自非義士集勤王之師謀臣建南渡之策則九廟神靈幾不血食矣不亦悲哉嗟夫成湯穆德帝命式於九圍紂為不道身死周人之手其所感應捷於桴鼓聞以一人治天下未聞以天下奉一人奈何窮奢極侈而毒痛四海百萬生靈彼實何辜其身亡國破為萬世笑非不幸也且也傳曰惟命不於常道善則得之不善則失之可不畏哉可不畏哉

書蘇伯修御史劄獄記後 明 劉基

往歲朝廷慮天下斲獄之未審用中書御史臺議遣官審覆論報僕時居山間聞人言之山嶽震疊如雷雨之將至陰風鳴條飛電燦日豪民猾吏竄伏如鼠俱自期不能免而銜冤抱痛之民莫不伸眉引項若稿葉之待滋潤及其至則風止雨霽望者如敗軍之歸而畏者如鷹隼之脫條而得扶搖也則怪而問於老成更事之人咸曰斲大獄必視成案苟無其隙不得而更焉因退自太息曰苟如是烏用是審覆者為哉於是大信刀筆之真能生死人矣既又聞諸人曰非朝廷意也奉命者之不恪耳及觀國子博士黃先生所叙御史蘓公憲因湖北所平反事曷嘗於成案哉然後知賢人所為固與衆人異矣夫以一湖北之地公一巡歷而所平反者八事所摘豪右之持吏而尼法者又數事豈他道之無冤民耶無蘇公而已矣僕往嘗觀於牧民之以簡訟名者之其庭草生於階視其几塵積於牘徐而訪於其鄉察其田里之間則疆梁橫行怨聲盈路問其故曰官不受詞無所訴受

之而已矣大吏至則曰官能不生事民諱非官罪也
則皆扶出之訴者悉舍詒去則轉以相告無復來者
由是卒獲簡訟之名嗚呼與圖廣矣不皆得蘇公彼
上報於朝廷者又將獲備事之賞矣然後怨憤之氣
拘而為開殺激而為盜賊讎而為災沴上應乎天誰
之咎哉嗚呼使人人如蘇公刑期於無刑不難矣明
天子在上庶其見之則求諸老成以為典刑舍是編
其奚適哉

題王右軍蘭亭帖

明 劉基

王右軍抱濟世之才而不用觀其與桓溫戒謝萬之
語可以知其人矣放浪山水抑豈其本心哉臨文感
痛良有以也而獨以能書稱於後世悲夫

題劉商觀奕圖

明劉基

右昔人臨唐劉商觀奕圖其曰李伯時臨茅君彥勒蘇先生識者蓋皆假設之云而其描寫模刻實俱妙絕不必問其真作於何人也王生以采薪入山父母妻子待之以食見奕者而能觀之至於爛其斧柯豈所謂力本者哉比歸而親戚鄉黨咸非其舊可悼也已一夫一婦不獲自盡伊尹恥之以戲迷愚人使之老無所歸其果有是事耶神仙亦未仁矣

書鄭子美文集後

明王禕

鄭子美先生所為文余十年前嘗得其漢唐之論頗病其體制往往或出於絕墨心未之好也今年復獲其師山集盡讀之觀其操議特論務辨道理談名義蓋汲汲焉以扶植世教自見心歎服之於是乃俛向之知先生之不能深也雖然以文求先生非知先生者故論先生當自其平生大節而觀之初先生隱居於鄉教人接物一體於風義至正中宰臣以名聞詔辟翰林待制兼有上尊名幣之賜先生疾當世方奔競成習將有以抑之則抗疏控辭其言曰臣問學之淺深他人不能知臣實自知之所謂吾斯之未能信豈敢貪冒恩榮以自欺其心酒與幣天下所以奉陛下陛下得以私與人臣不敢辭名與器祖宗所以遺陛下使與天下之賢者共之陛下不得私與人臣不敢受疏聞朝廷不之強也居無何而干戈起徽城陷焉城守者將要致之使為用先生厲色拒之曰吾豈事二姓者耶因被拘囚郡中趾辱者久而志不少變親戚朋友攜具餉之則從容為之盡歡且告以必死

狀其妻聞之使語之曰君苟死吾其相從地下矣先生謂曰若果從吾死吾其無憾矣明日衣冠北向再拜自縊而卒嗚呼先生於出處死生之際其大節表表如此而世之以文求先生者豈足以盡先生乎況求之以文者不觀其所以自見而徒徇夫言辭之末其尤淺知先生矣唐司空表聖韓致元所為辭章凡近纖靡無足多者而其處進退存亡能不失其正節義所在君子蓋深許之其所為不朽者有在彼而木在此也予懼夫人讀先生之文者如予向者之所病

故竊志之以為告世有知言者其必謂予能知人也哉先生名玉字子美徽州人

跋西臺慟哭記後

明 劉 崧

方文丞相海上被執時吾郡有王昂翁者丞相同舍生也即為文生祭丞相復手書數十通達人揭之通衢館舍以俟丞相過而見之以自決及聞死燕市也則又為耐文一通為位北望哭而祭之若幸丞相之得死者夫丞相之所以自處固有不待於人言而仁人用心若昂翁者亦何厚哉後有張穀翁者丞相門下客也始與十義士者從丞相赴燕及丞相死翁以百金贖丞相首骨徒步七千里負而完葬焉一日過

梅溪曾氏與劉惟吉顏省身及先祖寶存府君四人者是夕會於見山堂在梅溪上距丞相宅一舍許曾為丞相外家而堂名見山者寓思丞相也是夕舉酒三酌翁自賦摸魚子一闋三人同聲和之有千年華表會有鶴歸來之句每歌一再輒聲淚俱下至嗚咽不自勝則相與掩袂罷去其詞至今可考惜新傳未及載而世亦鮮有知之者今觀張孟兼所注釋謝翱臯羽西臺慟哭記及冬青樹引然後知與昂翁之生死祭文穀翁之摸魚子蓋彼此同一情而先後同一

聲也因記所聞二事於先祖者附於卷末使知當時忠義之士最多其感激憤惋於荒閒寂寞之濱不直臯羽一人而已也

讀貨殖傳

明 趙 沅

貨殖傳當與平準書參看平準書是識人臣橫歛以佐人主之欲貨殖傳是識人主好貨使四方皆變其舊俗趨利書首言漢興接秦之弊高祖重本抑末輕徭薄賦故文景之世國家無事百姓給足府庫充實人人自愛而重犯法後而序武帝事節節與前相反至贊論始推唐虞三代以來而蹈始皇之覆轍不待譏議而可見學者先讀此贊而後讀其書使先後相承則太史公之意瞭然矣若貨殖傳乃此書之注脚而未有察其意者蓋傳中所謂當世賢人則書中所斥不執逐利之民也傳中所序陶朱公白圭輩妙於治生即書中三人言利事析秋毫之比也傳言鄙人牧長窮鄉寡婦禮抗萬乘名顯天下宣曲任民以田畜高而人主重之即書中言卜式以家財助縣官天子尊顯之以風百姓意尤著矣蓋見始皇武帝皆以好大喜功園用不足而後奢奢於此等人也傳中歷舉四方百貨所出行賈所在甚詳即書中置大農諸官盡籠天下之利責責賤賈所以天子無算之用皆

出於此傳中言千乘之侯尚猶患貧即書中屢言稅賦竭縣官太空是也傳中言廟廟巖穴軍士任俠攻剽女媚游間吏士等皆為財利所以深誚當世好貨之俗無貴賤也末言富國者必以奇勝而又歷數奸事惡業賤行辱虐之能致富即書中所謂不益賦而天下用饒亦此類矣循此傳之意深陋為天下國家者不當下行商賈之事蓋是當時親覩言利之人誤國害民如封禪書中所謂究覈方士相官之意云者故言之深切至此後人但謂子長陷於刑法無財可贖故發憤作貨殖傳豈為知太史哉雖然遺之言亦激矣子獨謂其書明白諄復如是千百年来讀者猶未能深悉其意況夫六藝之古遠淵奧而傳注家自謂盡得經旨可乎

書所編李文公集篇目後 明 趙 汾

李文公集十有八卷凡百四篇江浙行省參政趙郡蘇公所藏本某既從公傳寫復總其篇目如上始汾見歐陽公論文每稱韓李其讀幽懷賦恨不得與之同時上下其議論而老泉蘇公亦謂李文公其味黯然而深其光油然以幽自是每欲求其集觀之不可得所得者文苑英華中數篇而已既又見豫章黃公謂皇祖實錄文如女有正色又子朱子論復性書雖病滅情之旨出於釋氏而亦善其有如此思慮益以不觀全集為憾至是迺請於公而得之甚慰也公名翱字習之中進士第元和間為之館修撰既言既以武功定海內當草故事章高祖太宗舊制用文德興太平不然恐大功之後逸欲易生因條上正本六事憲宗不能用後遷禮部郎中面折宰相李逢吉過失移病去雅好推轂賢士韓文公嘗書與之云於賢者汲汲惟公與不材爾其後書以為韓公雖好士惟其有文章兼附己者無所愛惜或不能然則不肯薦拔與己不同又嘗以書責裴晉公居相位道不行恐恥內

愧不能引退其於師友及知己厚者骨鯁無諱忌如此則視逢吉輩何所憚而唐史乃言由不得顯仕拂鬱無所發面斥逢吉既斥之又自懼而去其言抵牾非事實甚明昔人謂韓公於學莫如文章於德莫如好直而習之文行庶幾似焉則以韓謚名而韓李並稱可無愧矣叅政公將刻梓以廣其傳於學者故仿竊著其為人大畧且非排史氏之妄以明歐陽公為知言云

讀鄭虔傳

明 徐一夔

按鄭虔傳鄭相如告虔曰天寶十三年逆臣僭亂當汙偽官顧守忠節相如言時開元三十年也及安祿山反虔果陷賊中祿山署虔水部郎中虔念其言稱疾求攝市令事平議罪虔得減死論貶台州司戶夫為臣死忠理之常也虔以相如豫告故不受偽署不然則受之耶識緯之學聖賢所不道宋景文撰唐書叙事嚴簡而汎及符讖雜說非以為訓也以著虔之不知自守爾覽者無惑焉

書宋學士所書陳思禮孝事後

明 徐一夔

予讀學士宋公所書陳思禮孝事未嘗不嘆思禮至行人所不能及者陳氏四明儒家思禮甫七歲其父不幸蚤世母夫人石氏誓不他天以鞠育之夫人又以思禮陳氏獨子教之甚嚴思禮亦克承母志力學惟謹暨弱冠石夫人與之議婚已而夫人歿思禮創鉅痛深奮欲隨母死賴親戚朋友力慰解之乃止年二十四親戚朋友勸之娶思禮掩耳不答衆迫之曰

娶妻以為養也吾親既歿何以娶為親戚朋友據義責之不得已從之及期合卺先生誦蓼莪之篇凡七晝夜不輟哀動人人嗚呼遠則易忘人之常情也思禮不忘其親如是可謂至矣人有恒言孝衰於妻子以思禮觀之豈其然哉思禮又嘗作堂為時饗之所顏曰如在及以貢至京師入太學為上舍生宋公及御史中丞劉公鄂省參政陶公凡朝之大夫士咸愛重之為歌誅論者甚悉予因擬學士所書孝事有合於近古所謂卓行君子所為者表而出之云

題鄭宣撫墓誌後

明 蘇伯衡

伯衡竊聞公宣撫川陝節制諸將嚴甚吳璘而下每入謁必先庭參然後入就坐一日璘除少保來謝語主閫吏欲講鈞敵之禮吏以白公公厲聲曰少保官雖高猶都統制耳倘變常禮是廢軍容少保若欲反則可取吾頭去庭參之禮不可廢也璘惶恐聽命諸將咸陽憚而陰忌之始見公擢自溫州通判不數年登禁近以資政殿大學士帥蜀意公秦檜之黨也雖忌而莫敢出聲後見公遇事輒與檜抗知非其黨也乃譖之檜言其有跋扈狀檜入其言謀於王喚喚以為不若選一宗室有風力者姓制之因薦趙德夫於是創四川總制財賦以命德夫德夫至坤維辟晁公武幹辦公事且屬其物色公陰事公武起久廢又引公所逐使臣魏彥忠者相與盡力擠之遂與大獄而公竟謫封州以歿於戲正人之不能獨立從古則然豈獨公乎且公帥蜀八年欲加之罪何患無詞而況諸將忌之於外宰相銜之於內迎合徂伺於前後左右者又其仇人此固司馬溫公所謂獨一黃葉之在

風中也雖欲無危其可得乎偶觀墓誌文輒就所傳聞於後以補其畧亦以見羣枉害正其勢蛇蟠蟻結牢不可破如此可畏也

跋山谷墨蹟

明 唐 肅

右黃文節公書韓黎桃源行一首蓋崇寧六年十月筆也按公元年罷知太平州管勾洪州玉隆觀以嘗忤趙正相挺之為轉運判官陳舉承風旨劾公所作荊州承天觀塔記有幸災謗國意遂除名編管宜州三年由鄂過洞庭潭衡永桂三年五月始至貶所云十月十八日則公至宜州已半載明年九月公物故僅一載耳嗚呼公以六十之年橫至貶斥郡守從而貶之至不容居闕城中其困苦至矣然觀其跋李資深書有云子城僦舍上雨傍風無所蓋障人將不堪其憂余自念家本農桑使不從進士則田中蘆舍亦當如是又何不堪其憂耶公之樂天知命不以求失蒂芥於中者如此故能以文墨自娛而書法至老益臻其妙也宜州無佳筆公每以三錢市鷄毛筆作字此紙亦果用鷄毛筆則公書之妙又不可及已公嘗自言元祐中與子瞻穆父飯寶梵僧舍作草書數紙子瞻賞之再三穆父無一言但云恐未見藏真真蹟耳余心竊不平及至中得藏真自序諦視數日恍

然自得落筆便覺超異然後知穆父之言不誣則公
書法自中以後即追跡懷素不待至宜州也雖然
公之所以名當時傳後世者夫豈止於書哉第因其
書想其人有以繫百年之思耳

書九歌圖後

明 貝 瓊

右九歌圖淮南張叔厚所作以贈潘易周克復者越
二十年而神氣益新其一冠服手板見三素雲中二
史左右之而從以玉女一舉旌一執筴東皇太乙
也其次冠服如太乙有牛首人身者執大纛飛揚麾
暖自空而服旁一姬執杖者雲中君也美而后歸飄
飄若驚鴻欲翔而衝波相蕩石上江竹班班者湘君
其後風裳月珮貌甚閒雅儼乎若思者湘夫人也一
雙舄而扶左執卷二從者俱稚而異飾大司命也秀
而豐下冠服甚偉執蓋者猛士擁劍者處子一翁舒
卷旁趨少司命也累甲執弓六臂裂髯張欲仰射者
東君也一乘白鼉水中者河伯而山石如積錢大松
偃蹇皮皆皴裂成鱗甲一袒裸騎虎行者山鬼也甲
而執刀者一甲而執矛者一先後出亂山林木間慘
無人色者國殤也叔厚博學而多藝尤工寫人物咸
稱李龍眠後一人而已巨家右族以厚直購之是圖
凡二十一人有貴而尊嚴者有魁梧奇偉者有枯槁
憔悴者有綽約如神仙者有詭恠可怖者有剝而墨

者夢見側出各極其妙予在三吳時所見凡二此蓋其晚年筆也克復既寶之不趨金玉而先左丞玉雪坡翁又以大篆書九歌之辭於各圖之後可謂二絕已間持以過予求志其左方按荆楚在中國南其俗好鬼自東皇太乙而下則皆所事之神莫詳厥始然太乙為天之貴神司命為上台與北斗第四星文昌禮有不可褻者而東君為朝日之義亦豈閭巷所得而僭乎雲中君者恐以其澤名雲故指澤中之神為君謂之雲神以附漢志未知是否而河伯又非在楚之封內如湘君湘夫人也蠻夷荒遠之域人神雜揉私創其說以罔上下者亦或有之而歲時祀之必用巫作樂其來尚矣屈原九歌因其舊而定之比興之間致意深矣 惑於荒唐如人之徵福哉其見之山鬼者辭雖甚迫至大司命一篇卒曰固人命今有當執離合今可為信所謂順受其正者君子深取焉顧說者未之能察朱子為辯之千載之下志亦白矣余之寓於九峯三湘也壹鬱無聊命酒獨酌輒歌以泄其憤今叔厚又即其辭以求其象便玩其象以

求其心豈徒效馬和之輩之於詩哉且懼不能不朽腐磨滅於既久而文則傳之天下後世得考其彷彿也故書以志之觀者又可并其象而忘之云洪武九年歲在丙辰夏五月攜李具璽序繫之以歌曰紫宮太乙中煌煌佐以五帝環其旁道存無為樂且康豐隆儉忽周八荒鬼塞大蠹蛟螭黃上台司命中文昌斟酌元氣調陰陽福我以德淫必殃下招帝子隔瀟湘蒼梧九點山蒼蒼跼烏三足升扶桑天門洞開夜已明神人瞳目鬚髯張長弓白羽射天狼水僊胡為宅龍堂九河既阻不可方鼉鼉出沒波湯湯山中之人白日藏天陰雨濕啼幽篁與鼙鼓戰士身盡創視魄欲歸道路長吹簫擊鼓歌巫陽酌以桂酒陳椒漿神來不來何渺茫

讀三墳書

明 方孝孺

書之名真而實偽者多矣何從而信之哉亦在慎辨之爾辨之法有三味其辭以望其世之先後正其名以求其事之是非質諸道以索其旨之淺深而真偽無所遁矣吾嘗執是以觀天下之書蓋十不失一焉若世傳三墳書者則又凡鄙而易見者也孔安國稱伏羲神農黃帝之書謂之三墳其言大道今此書以山墳為伏羲之書言君臣民於陰陽兵象謂之連山易而姓紀皇策之篇附焉以氣墳為神農之書言歸

藏生動長育生殺謂之歸藏易以形墳為黃帝之書言其目而傳以申之考其辭則不類正其名則不合質諸道則淺陋而無稽其姓紀篇曰太始者元胎之萌太極者天地之父母太易者天地之變太初者天地之交太素者三才之始天地孕而生男女謂之三才頗剽莊列之餘言而造為異說此其道之淺陋無稽者也其論物則曰木為金所剋服陽臣十幹此後世歷生之常談伏羲之時曾有之乎論民曰四民之物以貨為本伏羲之時曷有四民之名乎謂封禪之

辭曰策策始於漢而謂伏羲氏有策辭可乎祭天地於圓邱大夫之妻曰命婦周禮始有之而謂天地圓邱思及命婦為黃帝之事可乎相人之術起於衰世而謂聖人以形辨貴賤正賢否為神農氏之書可乎此其名之不合者也其辭皆後世俚野之談而其尤謬者曰山月升騰川月專浮山雲疊峰氣雲霞彩山氣籠烟川氣浮光雲氣流霞皆唐人為詩之語其政典篇往往竊取書易而損益之如曰惟天生民惟君奉天民惟邦本食惟民天出言惟辭制器惟象動作

惟變卜筮惟占先時者殺不及時者殺皆是也或者未之察顧謂書所謂政典正大諸此而定為上古之書其亦異哉然世之偽書衆矣如內經稱黃帝汲冢書稱周皆出於戰國秦漢之人故其書雖偽而其文近古有可取者此書則又偽於近代者也其後有序不著其姓名自謂天復中隱於青城之西因風雨石裂中有石匣得此書於匣中其文絕與此書類天復唐昭宗時也豈即青城隱者所偽耶雖然聖人之經猶日月然其道猶天地然使孔子時有三墳書孔子

固不得而刪存其名而亡其書孔子猶嘗言之今孔子之繫易但云伏羲氏畫八卦神農氏為耒耜黃帝垂衣裳未嘗言三皇有所謂三墳書孔子不言安國何據而言之耶然則安國之言亦妄矣彼偽為書者因其言而復僭繫周禮三易連山歸藏之名以為伏羲神農之書周易不可襲則以歸藏先坤後乾名黃帝儲故曰乾坤其亦妄之妄者耶以區區俚野之文而欲托於三代唐虞之上是猶替夫懸破鏡於空中而欲自比於日月也其亦惑之甚耶於乎世之擬經者亦可以知愧矣

讀夏小正

明 方孝孺

夏小正凡三百九十餘言先儒以孔子所謂行夏之時者即此書且以時之正令之善釋之自今觀之其書凡十二之候有關於人事者二十有七若采芣采芣祭鮪攝桑剝瓜剝棗納蔚取荼之類皆備記之其大者惟服公田緹士女萬用入學剝鯉頒冰始蠶祈麥攻駒頒馬王廵陳筋草十一事而已豈所謂令之善者止於斯乎孔子有取於夏時以建寅之月為歲首耳豈誠謂此書乎使此書果夏之遺書孔子曷不編於禹貢亂征之間乎孔子倘見此書奚不曰得夏小正而曰得夏時乎孔子未嘗指而言之後乎孔子者乃從而實之豈固別有所受乎或者信其說遂謂汲冢書之周月解呂不韋之月令皆本諸此果何以定其先後乎聖人之經傳之萬世而無惑者以其明道也於道苟無損益雖謂出於孔氏之壁成於堯舜之時謂之古書則可矣吾安敢信哉

讀汲冢周書

明 方孝孺

汲冢周書十卷七十篇或謂晉太康中出於汲郡魏
安釐王冢故曰汲冢以論載周事故曰周書宋李燾
以漢司馬遷劉向嘗稱之謂晉時始出者非也此固
是矣劉向謂其書為周書即孔子刪定之餘者則非
也何者其事有可疑也略舉其大者言之武王之伐
殷誅其君吊其民而已其世俘篇乃曰馘魔億有十
萬七千七百七十有九俘人三億萬有二百三十夫
殺人之多若是雖楚漢之際亂賊之暴不若是之酷
而謂武王有是乎所誅以億萬計天下尚有人乎周
公之用人不求備於一人其言人篇乃曰醉之以酒
以觀其恭縱之以色以觀其常臨之以利以觀其不
貪濫之以樂以觀其不荒以詐術啗人而責人以正
雖戰國之世縱橫權數之徒所不為曾謂周公而以
此取人乎王者之師禁亂除暴以仁義為本其大武
篇則曰春違其農夏食其穀秋取其刈冬凍其葆不
仁孰甚焉其大明篇則曰委以淫樂賂以美女不義
孰甚焉此後世稍有良心者所不忍為曾謂王者之

用兵乃若是乎其為文王之言曰利維生痛痛維生
樂樂維生禮禮維生義義維生仁此稍知道者所不
言曾謂文王大聖人而為是言乎其文傳篇曰有十
年之積者王有三年之積者霸霸之名起於衰世周
初未嘗有之謂王者不以道德而在乎積穀是商鞅
之徒所不言而以為文王之言可乎其他若是者甚
衆及載武王伐商之事往往謬誕與書不合由此觀
之決非周書謂孔子刪定之然者非也其中若謚法
周月時訓職方之篇又與爾雅月令間有合者竊意
漢初書亡隱士縉紳之流所偽者以為周書而司馬
遷不察故引而用之劉向因以為古書耳其中尚良
夫篇最雅馴其曰后除民害不惟民害民害非后惟
其警民至億兆后一而已寡不敵衆后其危哉嗚呼
君子之言三復其篇為之出涕

讀呂氏春秋

明 方孝孺

呂氏春秋十三紀八覽六論凡百六十篇呂不韋為秦相時使其賓客所著者也太史公以為不韋從蜀乃作呂覽夫不韋以見疑去國歲餘即飲酖死何有賓客何暇著書哉史又稱不韋書成懸之咸陽市置千金其上有易一字者輒與之不韋已徙蜀安得懸書於咸陽由此而言必為相時所著太史公之言誤也不韋以大賈乘勢市奇貨致富貴而行不謹其功業無足道者時以賓客之書顯其名於後世況乎人

君任賢以致治者乎然其書誠有足取者其節喪安死篇譏厚塋之弊其勿躬篇言人君之要在任人用民篇言刑罰不如德禮達辭分職篇皆盡君人之道切中始皇之病其後秦卒以是數者債敗亡國非知幾之士豈足以為之哉第其時去聖人稍遠論道德皆本黃老書出於諸人之所傳聞事多舛謬如以桑穀共生為成湯以魯莊與顏闔論馬與齊桓伐魯魯請比闔內侯皆非其事而其時竟無敢易一字者豈畏不韋勢而然耶然予獨有感焉世之謂嚴酷者必

曰秦法而為相者乃廣致賓客以著書書皆詆訾時君為俗主至數秦先王之過無所憚若是者皆後世之所甚諱而秦不以罪嗚呼然則秦法猶寬也

讀荀悅申監

明 方孝孺

荀悅申監五卷其論治亂興亡之理詳矣悅生漢之衰丁靈獻之際強臣竊柄天下潰潰日非漢有悅雖侍讀禁中而天子拱手受制知其莫之有為著此書以宣其志悅蓋有用之才又親見世之亂故其言愈有微提從而行之可以為志而自漢以來鮮有言之者縱或言之特以其文辭而已著書之不足恃如是哉然秦熅之餘聖道滅息唐虞三代之大經且廢而不講為治者視之以為空言而共譁笑之則夫悅書之不用又無足怪也余讀其書至曰以智能治民者涸也以道德治民者舟也悅然失色而悲之

讀漢鹽鐵論

明 方孝孺

鹽鐵論六十篇漢桓寬所著當武帝時兵革薦興財用匱竭而均輸鹽鐵之征橫出天下疲弊孝昭即位大將軍請詔郡國舉賢良文學問民所苦咸願罷鹽鐵酒榷均輸官御史大夫桑宏羊爭難之以為不可罷寬懷其意而設為問答之詞以盡其辨善乎其言也於乎為天下者曷嘗患乎無財也哉天下未嘗無財也苟用之以節治之有道夫何不足之有以漢言之文帝在位二十三年免民租者近半其時非有均輸鹽鐵之征而府庫充溢錢貫朽不可較武帝之天下即文帝之天下而又加之以百出之歛未嘗免一歲之租宜其富矣而反愈困乏何哉蓋文帝節儉而武帝征伐營繕以糜費之也人君苟不節儉雖積金齊泰華蓄貨擬江海不至於亂未見其厭足也武帝之天下宜亂矣而文景之澤猶在人心重以霍光知所緩急從而稍稍罷其害者故一變而弭元元之憤不然漢豈可冀哉此書也其於道德功利之際論之當矣不特文辭足法而已也

題受禪碑後

明 方孝孺

曹氏父子以禪讓文篡竊其事蹟穢矣當時羣臣侈為贊譽以為舜禹復生著諸金石誇禪來世若誠有足稱者豈以一己之故苟汙無耻而不自知其惡與將逼於亂賊之威虐雖有君子亦莫能自正而從之與然漢之將亡其篡弒之漸暴於天下久矣豪傑之士度不能臣曹氏宜若管幼安之踰海潔身以避之不能決去依徊眷顧於利祿勇不足以死節智不足以撥亂已蓋取容競為諂諛以全身斯為小人矣若當世羣臣是也賢士君子者國之本也舉國無一人焉其國安恃而不亡乎此碑所著皆曹氏所謂佐命勲臣而實賊漢者也用賊人之國者以立其國國未立而賊與國將繼之矣僅一傳世弱子豎孫為司馬氏所陵劫禪者猶未死而受禪之舜國已先亡以此得者必以此失國可謂千古之戒而其贊譽誇耀之虛辭適足取嘲笑於後世耳果何益於敗亡哉

題褚遂良書唐文皇帝哀冊墨蹟 方孝孺

晉宋間人以風度相高故其書如雅人勝士瀟灑飄藉折旋俯仰容止姿態自覺有出塵意陵夷至於中唐法度森然大備而怒張挺勃之氣亦已露矣唐初諸賢去古未遠故猶有晉宋遺風觀褚公所書哀冊豈後人所可髣髴哉古人所為常使意勝於法而後世常法勝於意意難識而法易知顏柳之書余一見即知其美此書八九年中凡三見矣今始識其用意之妙正猶有道君子泊然內運非久與之居不足知其所蘊也

題朱子手帖

明 方孝孺

君子之與小人較勝負於一時則彼常盛而此常衰
觀是非於百世則盛於俄頃者不足以益無窮之惡
屈於一身者未嘗不光顯於天下茲時與事錯迕雖
聖賢莫能達其躬及其勢易而理存人亡而訪息狐
狸狗鼠之輩臭腐漸盡而無遺而論議之公終不能
掩衆庶之口若徽國文公朱子與西山蔡先生屈於
小人之事可見矣文公西山相與講說者孔孟周程
之正道而胡絃沈繼祖輩極力詆誣甚者欲寘之於
死地西山營道之窟公亦受僞學之目奪官褫秩遂
屏從遊之士由小人觀之曲意恃義取媚於權姦以
為朱蔡且將終身名俱滅矣夫孰知二百年之後權
抑困悴者皎乎若白日之當天而鄙陋邪嵬之流以
擠排汙蔑為事者人之視之猶覩不潔之物自憎而
氣索莫不欲戮既死之遺魄以快仁賢之憤哉嗚呼
亦可為千古之鑒矣西山之窟在慶元二年丙辰文
公此書不知道誰而惓惓欲告郡守稍寬西山之拘
執師友之義尚可以敦薄夫而勵末俗非特字畫之

可傳而已也後之觀者其尚有所感悟以為君子之
歸也夫

題許士修詩集後

明 方孝孺

師道之重古之君子以之參予君父之間蓋以人之有身非父則莫能生非君則莫能養父既生之君有以養之而不聞道德禮義之教雖苟生於世不若無生之為愈也是以於人為恃重視夫至尊至親之思靡不及焉洙泗門人視孔子猶父及既沒三年猶哭失聲或築室獨居而不忍去此與唐虞之世如喪考妣者何異自道喪俗偷倫理廢薄而師弟子之義尤闕生無就養之禮死無為喪之制甚者譬疾其師乘

勢折辱以快其忿豈皆民性之不達古哉教者非其道受學者非其才故也誠使師有以為教弟子知所以為學其有不相親愛者耶吾鄉林升嘉猷始事吾友王修德修德良士毅然以古道自整飭後不幸徙家南中嫺族無一人顧恤嘉猷徒步千里追送江涕與訣別此其義有足多者嘉猷少予一歲輒以師禮事予會予教授漢中行六十里來學德業大進見之者莫不稱其篤學此其可與世俗弟子同語哉嘉猷為予言里人王順與其弟陳嘗師修德之友許居士

修許君卒嘉猷為集所為詩頌陳為購工刻千家以傳其侍許君不以存沒少異若頌陳之於師蓋亦當世之所鮮也嗚呼予嘗嘆斯世不復有如古人者今乃於閭里見之豈吾鄉之民性獨不異於古哉抑亦父兄長者之化有以習其耳目而致此也許君之詩予昔既為之序復書其交友門人事以見許君之所教者非世俗所及而其所長非特在予詩且以諷當時之為弟子者使有所感發焉

跋劉府君墓碣後

明 方孝孺

李元賓文學在當時最為韓退之所推而退之銘其墓不過百餘言稱其美者不過十言然非元賓莫能當也古人之文要而不煩也如此近世銘墓者為言多至數千少亦不減數百否則求者怫然有不滿之色是豈特文之不逮古哉習俗之弊也久矣吾友劉君剛養浩請銘其父處士之墓於太史公公為之銘辭約義該得退之意蓋欲矯積弊而復諸古也養浩學古而攻其辭故公以古道處之由是而求處士之為人其亦古之所謂善士夫

題王維畫輞川圖

明 王叔英

右王維輞川圖僊居盧氏之家藏也間以求題於余余不知畫固不敢妄論然世自有識者亦不假於予言若維之事則有可言者維號文學之士其於出處之節君臣之義固嘗聞之矣當元宗之季非可仕之時亦非難隱之日而維官為給事中又無一言一事裨益當世顧獨以能詩畫稱則末矣及祿山之亂陷于賊中又不能死則其罪益以有不容誅矣夫君子之出處內以視其外之可否外以視其治亂而進退行藏之機決焉如維者其才既如彼其下其時又如彼其汙畔祿漁獵以自給可乎而乃挾技能之末叨爵位之榮是又不可徒以昧出處言之矣使其不遭寇亂行節未彰君子蓋亦有不道者況至此哉故余觀是圖而於維深有感焉嗚呼使維終始於輞川徒專藝之功以求道移進取之方以自修縱無補於時又豈不足以善其身哉然則觀斯圖者亦可以有所懲矣

題忠簡公翰墨記

明 胡 廣

先忠簡公澹庵先生手書五通第一書與二十一姪學諭第二書無名中有叔此處安之句亦與姪書也第三書後曰啓英彥姪前稱二十一學諭者以家譜考之即英彥也三書皆是與之即誠齋所謂好學刻苦深厲操清苦克肖先生是也末書中曰羅生者公姪子羅尚志也常從公於貶所曰九弟者當是俊臣也行八十九去八十而稱九也行以知其然公嘗有書與兄振文行五十八但稱曰八哥此為俊臣無疑矣

第四書與七十四姪乃振文次子季劉也第五書首稱提刑監丞年兄者以家籍考之有與司理羅欽若通判方耕道寺丞陳剛中俱稱年兄欽若吉水人極博學誠齋謂當時備顧問惟其可終於武岡守耕道名疇通守武岡有平寇功紹興戊午先公上書乞斬奸臣頭被譴後守李若樸言耕道與先公通書坐獄三百餘日幾死得免剛中坐以啓賀先公得貶差知安遠縣至數月而卒妻落髮為尼以歸其喪觀三人始終未歷提刑此書非與之者三君子行事可稱而

宋史不錄甚可歎也按先公登建炎二年進士第是科自李易而下凡四百五十人如王詹事龜齡與先公尤厚此稱提刑監丞年兄不可必其為誰姑俟再考然公籍不載此帖而親筆存豈既書而未遞歟抑或有所遺歟廣家藏先公翰墨遺藁故多兵亂喪失殆盡尚存此數紙先人什襲藏之嘗食憲廣西融州真僊巖有先公封事藁碑刻先人打碑寄回宗族家置一本未數十年俱已散失廣為之懼今裝表此數書為一卷朝夕觀覽如對先公也夫以先公忠義名節卓然日月萬世之所仰望豈子孫能為之輕重公之翰墨至今猶新尚有生氣為子孫者其可不敬乎昔阜陵嘗問公曰卿寫字宛如卿為人公答曰臣幼習顏真卿字今自成一家人又曰朕前日侍太上於德壽宮閣上治疊書畫因得卿紹興戊午所上封書真本太上與朕玩味久之喜卿辭意精切筆法老成英風義氣凜然飛動太上自藏之曰可為後代式但其後為秦檜之所批抹行者朕啓太上令工逐行裁去裝璜於予公之翰墨在當時人君敬愛之尚如此而

況於子孫者乎公嘗有言昔司馬文正公不喜人寶其祖畫像但喜寶其祖之字蹟以為字心畫也予也見其字即見其人予之後能以文正公之心為心即賢矣誦斯言也則先公之欲後人之寶其翰墨後之子孫觀先公之翰墨者其以先公之心為心寶之敬之母違先公之訓也

書文丞相傳後

明 胡 廣

廣集廬陵先賢傳恒疾宋史文丞相傳簡畧夫實蓋復來史臣為當時忌諱多所刪削又事間有抵牾鄉先生前遼陽儒學副提舉劉嶽申為丞相傳此國史為詳大要去丞相未遼鄉邦遺老猶有存者得於見聞為多又必參諸丞相年譜及指南錄諸編故事蹟覈實可徵故元元統初丞相之孫富既以刻梓後復刊見嶽申文集近年樂平文學夏伯時亦以鋟板於是嶽申所撰丞相傳盛行於天下而史傳人蓋少見廣竊觀二傳詳畧不同不能無憾因參互考訂合而為一中主嶽申之說為多並取証於丞相文集其繁複正其訛舛庶幾全備使人無惑論贊則竝錄之國史之論揆諸人事而言嶽申之贊本乎天運而言發揚不可偏廢亦以見夫取舍之公也於乎丞相之大忠大節獨立千古直與日月爭光天地悠久比之夷齊心則不殊而所為反有難者昌黎韓子所謂特立獨行窮天地亘萬古而不顧者也丞相之云豈異於是噫丞相不可尚已其相從興義之士或出自小

官或奮跡庶民雖當推沮敗衄之餘皆甘心就死不
肯屈辱殺之殆盡無一人肯降丞相忠義至誠感動
固結於人心牢不可解有如此者使人皆爾則宋豈
有亡理彼臨難苟生以饗富貴其視丞相斷卒尤有
愧焉然則丞相固無待於贊論誦其詩讀其書自有
以見之廣韶獻時猶及聞先輩言丞相遺事赫赫殊
動人聽雖小夫婦人皆習聞而能道之七年以來老
成凋謝而論者益稀士夫君子鮮聞盛事蓋漸遠漸
疎其勢然耳更後百年恐寢失實惟取信於列傳詎
晉異同莫適是非故忘其淺陋輒復編次第因其舊
文不敢妄加一筆誠無能有所裨益特盡區區之愚
耳知之者其必不以爲濫也

恭題仁廟御製詩後

明 楊士奇

永樂丁酉太宗皇帝復巡狩北京仁宗皇帝監國當
時留侍監國之臣悉簡敦厚而恭慎者而文臣之預
密務者三人吏部尚書兼詹事寮義翰林學士兼諭
德楊士奇翰林侍讀兼贊善梁潛仁廟好文重士樂
善有誠時節宴羣臣間賜詩獎諭而三人者所得爲
多右二詩前賜臣士奇臣潛凡書二紙悉識以東宮
圖書而分賜之蓋同侍宴也後詩亦識圖書而專賜
潛其詩一書侍讀一書贊善者從畧而互見也觀于
此詩則知上之所以重潛潛之所以事上交得其道
矣明年潛卒時無強任子弟在側所謂獎諭詩文好
事者知其爲寶率持去其子繁能記憶二詩比求善
書者錄爲卷以臣士奇先朝舊人且其父同寮也求
識之臣侍仁廟監國最久仰窺聖志蓋未嘗一日不
在君父不在生民不在求道而咨賢也仁明之德從
古鮮儼焉潛卒後七年宮車上履想見明良神靈感
會今侍寵於三光之表而臣衰病餘息徒抱烏號而
永慟復觀此卷拜稽三復老淚橫流謹識歲月如左

題通鑑續編

明 楊士奇

右通鑑續編二十四卷六冊四明陳桎子經著刻板
今在蘇州府學起盤古至高辛為第一卷契丹事在
唐及五代者為第二卷後二十二卷則宋三百二十
年事也孔子曰吾猶及史之闕文學者於前事據其
所可知其所不可知闕之可也義農以前遐矣邈矣
非有文字之紀也其事間見於百氏所記者要多以
意言之耳而必撮拾以補前文之闕亦異乎孔子之
意哉昔劉恕作通鑑外紀避經而專采百氏之說金
履祥謂其野而難質故作通鑑前編不復避經桎嘗
為之舉要固主履祥之說矣而復著此卷何耶宋史
於今少見全書學者於此編可以考見一代之得失
嘗聞吾郡劉情玉亦著此書未板行往年會其孫公
潛云留在永豐今不知其何如也

書呂少卿所藏戒石銘後

明 楊士奇

右宋黃文節公履堅書戒石銘有呂忠穆公順浩題
識戒石銘本蜀主孟昶所作宋太宗摘其中四句令
天下郡縣皆刻石寘公署之前覆以小亭長吏坐則
正對之此蓋高宗紹興二年六月復領履堅所書摹
本於郡縣命長吏刻石置座右是時軍旅之務方殷
廟堂日不暇給而能用意於此可見君相急於所重
而民心所以不去宋也忠穆前年九月自開府儀同
三司拜少保尚書左僕射同中書門下平章事兼知
樞密院事是年四月奉詔都督江淮荆浙諸軍事如
鎮江開府七月召還此當是還朝後所題於今二百
九十有五年矣當時郡縣所刻石者今多不存余猶
及見士大夫家所藏建昌及紹興刻拓本此本莫究
所出而忠穆九世孫大理少卿升間以見示為書其
後以歸之

題宋歐陽澈謨告身後

明 楊士奇

宋陳東歐陽澈皆以忠言見殺高宗朝後高宗悔之此詰其復恤之命也蓋初為小人所蔽追悔之詞雖切無及然覆轍尚可以戒後而無幾胡銓韓絳言和議何允言馬伸存趙之功梁勛言金兵必至宜有備皆遠竄雖不死等耳惡睹其克戒也哉嗚呼國之患莫大於殺忠言為臣之禍莫慘於以忠言見殺此誥至今三百九十年矣雖傳之千載不能使人讀之不興慟也

題六檜堂卷

明 黃淮

忿之激于中者必徵於色徵諸色其發疾以暴徵諸辭其言婉以深稽之往古蘭相如忿秦之欺趙欲以頭與王俱碎樊噲忿鴻門之背盟拔劍瞋目以脇楚王徵諸色者也國風嘆晉蔚之朝齊楚騷悲蒹葭之盈室徵諸辭者也色之所發雖足快意於一時而辭之所寓誠足以垂戒于萬世其淺深固不可同日而語也今觀胡亥之六檜堂亦忿之徵於辭者歟亥溫之永嘉人當宋運中徵屏處華蓋山中讀書自娛念秦檜之誤國痛入骨髓然而未能伸其志也遂於堂階之下手植檜六本揭其扁曰六檜蓋以六之音與戮同于以識夫檜之罪當致顯戮冀他日得以酬其素願云爾烏乎發獨何心哉不得已也當時有若胡澹菴者上高宗封事請以檜之頭懸之藁街詞雖切而不見信况發未獲進用于朝者乎後雖一出竟以奸權妒嫉僅至滁陽通判而止徒使空言與國風楚騷同傳于編簡良可悲夫然其氣象從容辭意懇至後之覽者足以寒心而駭膽誠非僥倖快意於

一時者之可比也九世孫鑄集成卷鑄之子真復
求士大夫詩文以彰厥美其亦善於繼述者歟

題江景房沈籍事後

明 王 真

予讀元翰林修撰張子長所書江君景房事又識景
房之裔孫秉心而信仁人之澤之遠也蓋仁者天之
道也君子以仁存心斯無愧于天則天之祐之有窮
哉當錢氏納土時為其臣者孰無去就利害之思得
早入朝以自託幸矣况奉國籍納土之且其階於榮
顯可必也景房獨存愛人之心不忍其復困於重賦
遂去其籍寧自棄於貧賤而使十三州之人得輕稅
之利其心之仁如此豈非天之所佑哉宜子孫之久
而盛也古者十一而稅軍國之用量入為出而上下
皆足後世費用無經故往往加稅而又不足則
暴征橫斂以繼之民困無聊於是卒亂以亡書曰民
為邦本本固邦寧果能節用而愛人則豈有亂與亡
哉錢氏賦重民困有亡之道雖不納土勢亦不長其
自歸於宋也乃天哀其人不使重困於兵革而錢氏
因以成歸德之名蓋幸也浙之輕賦雖成於王方贊
然使其故籍尚存方贊亦莫如之何自是以來民享
其樂利百三十四年高宗立國於此民心戴之又百

五十年而後亡蓋由祖宗德澤在人而此乃其大者也推本而論之景房之功豈細哉子孫之久而盛蓋宜也於戲後之仕者有欲為宇文融皇甫鏐之徒其尚監于茲哉

題晦菴先生書簡墨蹟卷後

明 陳敬宗

昔南軒張先生謂王荊公書皆如大忙中寫不知公安得有許忙事晦菴朱先生謂韓魏公書雖與親戚早幼亦皆端嚴謹重未嘗一筆行草勢此與荊公之急迫正相反某於是竊有警焉今觀此書雖若畧不經意而端嚴謹重具存法度之中其詞又皆謙虛溫潤無非道義之所發乃知先生雖已造大賢之域亦有資于警察涵養之功也先生上承列聖道統之傳雖一書劄猶足以師法後學況其大者哉駙馬都尉趙公出是以示予故書此以識景仰之意

題貢師泰送謝原功序後 明 陳敬宗

此貢泰甫為戶部尚書漕粟閩海時送謝原功文也
元至正十九年張士誠僭據平江原功博學負氣慨
然欲白丞相以獻愷兵息民之謀又欲薦名有司入
對大廷一吐胸中之奇以圖國家大利而皆無所遇焉
乃獲以文學遇知泰甫執經海上日相與講明論辨
至於赤面汗背必當於理而後止此有以見泰甫能
忘其勢原功能忘人之勢而得古人交際之心者矣
泰甫以文學知名當時此文累千餘言滔滔汨汨如

長江大河不可窺其涯涘又必能以理為主且欲
原功察時變慎出處不可降志辱身以就富貴至引
伊尹太公不輕自用與夫操瑟齊門以為之戒又以
見泰甫於原功去留之際一本乎道義而非苟焉者
也可謂忠厚之至矣史稱泰甫喜接引後進不問識
與不識即加推轂觀此亦豈不深知泰甫者哉原功
名甫號密菴上虞人其孫澤為刑部郎中清謹自持
克先先德又以見仁人者必有後矣

書顏魯公爭座帖 明 錢習禮

顏魯公剛直之姿見於正楷英發之氣著于行草今
觀與右僕射郭公論魚開府坐次帖藁所稱右僕射
蓋郭英乂也魚開府即朝恩也英乂代宗永泰元年
三月與裴冕同拜命於集賢殿為右僕射唐世以中
官為觀軍容使自魚朝恩始朝恩為軍容實自監英
乂為陝西軍始意與朝恩共事又情好舊故善提奇
行香位次當尋襲為常魯公近而貽書反覆論辨力
斥其非無少容貸當時朝恩怙寵驕肆觀其冒居成
均大司成之位升座講易弔履鍊以譏宰相元載則
可以知其為大瑞之至架點者矣魯公銳然申朝廷
禮秩以折其潛且以盛滿戒英乂者甚至使英乂佩
服其言豈有他日崔旰之禍乎史稱魯公當肅宗至
德初國事方草昧為御史大夫即能正百官次序如
平世以此帖徵之庶幾想其風采也祿山叛河北二
十四郡多潰降唯公以平原最先出師挫其鋒致元
宗驚嘆以為朕不識真卿何如人而能辦此唐之中
興四方義舉自公倡之世傳顏書却厲氣端人正士

之手澤豈不信然哉

題先聖先賢圖贊後

明 吳訥

右宣聖及七十二弟子贊宋高宗製并書其像則龍
眠李公麟所畫也高宗南渡建行宮于杭紹興十四
年正月始即岳飛第作太學三月臨幸首著先聖贊
後自顏淵而下亦皆謨辭以致褒崇之意二十六年
二月刻石于學附以太師尚書左僕射同中書門下
平章事兼樞密使秦檜記檜之言有曰孔聖以儒道
設教弟子皆無邪雜背違於儒道者今縉紳之習或
未純乎儒術顧馳狙詐權譎之說以僥倖於功利其
意蓋為當時恢復者發也嗚呼靖康之禍徽欽蒙塵
汴都淪覆當時臣子正宜枕干嘗膽以圖恢復而檜
力主和議攘斥衆謀盡指一時忠義之言為狙詐權
譎之論先儒朱熹謂其倡邪說以誤國挾虜勢以要
君其罪上通于天萬死不足以贖者是也昔龜山楊
先生時嘗建議罷安石孔廟配享識者避之訥一介
書生幸際聖明備員風紀茲於仁和縣學得觀石刻
見檜之記尚與圖贊並存遂命磨去其文庶使邪說
之說姦穢之名不得廁于聖賢圖像之後庶流傳已

久謹用脩識俾後覽者得所考云

讀汲冢書

明 周洪謨

汲冢周書文體淺露詞意陳迂無百篇渾厚沉雄氣
象劉向謂是周時謄誥號令孔子刪錄之餘愚則以
為文武之道未墜於地賢者識其大者不賢者識其
小者蓋周東遷之後史官隨王室以東而西土逸民私
為此書以識先王之事固非當時左右史之所記者
也其最害理者如武王伐商之日紂既自燔武王乃
射之而擊以輕呂新以黃鉞懸諸太白之旗二女既
縊王又射之而擊以輕呂新以元鉞懸諸小白之旗
又以先誠入燎於周廟夫商之於周非世讎也武王
奉行天罰為民除暴其前徒有倒戈之勢其士女有
元黃之迎而其君又已自燔矣乃擊其尸梟其首以
燎於廟雖伍員報讎於楚不如是之慘也而謂武王
為之乎昔司馬遷之作周紀不取泰誓武成之言而
乃有取乎其說亦可謂陋矣孟子於武成惟取二三
策而已使其見此則將何如取之哉文王會篇言成
周之會四夷貢獻異物甚多夫西旅貢獒未為奇也
而召公猶以為非所當受今乃殫四表八荒珍怪之

產畢集於庭而是時召公猶在乃無一言以及之乎
至於篇末又謂武湯命伊尹為四方獻令使夷戎蠻
貊悉以方物致貢此何理也學者以其先秦古書而
備觀覽可也若取之以實先王之事則不可也

讀大雅

明 劉定之

大雅崧高烝民之二詩相聯皆尹吉甫所作皆八章
章八句崧高首章曰維嶽降神生甫及申維申及甫
維周之翰申者宣王之舅申伯甫者宣王之相太保
冢宰仲山甫二人左右宣王如鳥之有羽翰於左右
以翼其身故吉甫作詩美二人而於崧高首章總言
之曰崧高第二章至第八章專美申伯無一章不曰
申伯凡曰申伯者十有七乃結之曰吉甫作誦其詩
孔碩其風肆好以贈申伯自烝民第一章至第八章
專美仲山甫凡曰仲山甫者十有二乃結之曰吉甫
作誦穆如清風仲山甫永懷以慰其心至唐呂和叔
贊房元齡杜如晦二人前篇專美房後篇專美杜於
杜篇之末曰萬有千古永稱房杜如周申甫以總結
之蓋吉甫之美申甫以二詩也先總言而後結言皆
無不可也和叔希吉甫而變化之者也今詩傳於崧
高首章總言申甫處不以甫為仲山甫而別求其人
以甫為穆王時甫侯作呂刑者又以為作呂刑者之
子孫仕於宣王時可謂失之矣筆谷嚴坦叔謂申但

王舅甫乃王相非甫之比言申而引甫者借甫以大
申爾其言尤為有旨

讀唐史

明 李東陽

事有不可無悔者有不可悔者悔非君子之得已也
知之未周也行之未安也而悔生焉聖人以人不皆
周知安行也故不得已而予之悔若其所能行者而
自暴自棄以陷於大惡則有不可得而悔者矣賈充
悔弑君而自憂傳謚於將死之日高歡悔弑君而敬
事魏主者終其身然其惡卒不可悔也太宗之內巢
妃充其惡與弑君者均之為亂常敗紀無赦耳矣故
善悔過者莫如太宗殺盧祖尚而悔殺張蘊古而悔
殺張亮而悔悔責皇甫德恭悔陪魏徽之碑然無一
言悔於巢妃之後者知其不可悔也聖人恐人之阻
於遷善也故開悔之門予亦懼人之狎於改過也故
立不可悔之戒亦聖人之意也然則何以免於悔乎
曰慎

褚遂良來濟韓瑗承武氏之立狄仁傑不死武氏之
篡君子謂遂良守經仁傑近權然觀遂良之伏節見
太宗納諫之效數年之士氣未衰觀仁傑之成功見
太宗致治之效數十年之人心未去此亦不可得而

証也。顧其所處猶有不同者。若易地而觀。則仁傑必能直諫於將立之時。遂良未必能成功於既篡之後。故為遂良死者難。而易為仁傑生者易。而難耶。子謂任天下之事。不若死天下之事。死天下之事。不若成天下之事。是也。然臣子不幸而當此。能為仁傑。則為之不能。則必為遂良。乃不失正。苟徒畏死而貪名。幾何其不為李。世勣。許敬宗也已。

張九齡諫用牛仙客。是也。其辨元宗之言。非也。夫九齡豈不知仙客所以不可用者。蓋推本而極言之。乃

屑屑於資格門第。文辭之末。顧欲以臺閣誥命之地。勝之。是啟李林甫何必辭學之言。而益屈於元宗。有何閭閻之間也。且此說若行。萬一有大賢出於草茅之下。欲薦而拔之。其何以自解乎。故宰相之言。不可不慎也。

昔人謂壞唐者三女后也。姦臣也。宦官也。惟元宗兼有之。中宗有女寵。而無宦官。敬宗有宦官。而無女寵。然皆身死。賊手恨貽來世。若元宗者。內有楊貴妃。高力士。外有李林甫。楊國忠。彼林甫國忠之於貴妃。力

士也。株連帶結。狐媚狗合。左巢右窟。牢不可破。職是三者。可以亡矣。而又有安祿山者。閹乎其間。林甫能制而不制。乃養之以自翼。國忠不能制。而欲制之。乃激之以自快。元宗者。岌岌乎當敗局。而據危巢。豈趨寄生孤注之類哉。然則不死於數人之手。幸也有國。家者。觀乎此。可以慄慄乎其畏也已。

李泌之術高矣。肅宗欲使侯為元帥。泌懼其偏也。諫而歸之。倣及欲以倣為太子。則勸其待上皇之至。而又使倣自辭之。張良娣之將立也。又勸止之。倣有惡

於良娣。則又勸其監建寧之禍。及其迎上皇復位也。知其不來。又請作羣臣表。而上皇始至。肅宗襲位之後。上皇還京之前。嫌隙未至於大露者。皆泌之功也。蓋泌有過人之術。故其言皆委曲深到。足以深中人主之機。而奪其情。彼固能料肅宗能用己於艱難之際。而極言之也。及良娣輔國。構結既成。建寧既死。而肅宗疆免承順者。將有不終之漸。既不欲與其名。又恐不免其身。故雖以先朝故舊。不及見上皇之至。一旦決欲去之。無疑也。然固未能於忘情於功名之際。

故以德宗之猜忌元載之凶族出而周旋其間進退不以介意卒老於相位者其亦有以深中乎德宗而料元載之不能害已也乎及觀其用則定太子保功臣論宰相乃其所持以為正而諛神仙稱禍福乃其所挾以為奇者故其術雖高而學或未粹矣

段秀實之死於朱泚也胡氏謂其見幾不敏不能執鸞勣以從君負材抱忠草草而死嗚呼豈其然哉豈其然哉德宗之出也變生於倉卒非有明皇之詔也何幾之可見乎惟陸贄王翊輩數人追及於咸陽而

諸王公主不及從者尚十七八蓋是時得聞者先出後時者見陷去住之幾間不容髮其事有不可知者矣且秀實之於盧杞白志貞孰忠且智杞志貞能之而秀實顧有所不能邪陝州之役秀實尚能使白孝德不終日赴援於數百里之外而其身不能從君避難於咫尺之間乃端居待死於其第又不待辨而明矣不得已而隱忍見賊以圖奉迎之計又不得已而用間以尼追襲之兵是時無秀實則以德宗之狐疑朱泚之凶黠而又有盧杞百口之保後何不墮其計

中德宗之得趙奉天誰之功也乃其智窮勢急攘袂奮笏擊賊流血以死豈其所願哉故責秀實之死與責張巡者何異不得不辨也

咸陽人上言見白起請為國扞西陲德宗贈起以官人君之愚未有如此事者自老人結草之說興於左氏而後世有以謝元之捷為蔣子文之功者有稱白衣老父之言而立老子廟者有稱李靖求食而立廟者有稱元元皇帝降於朝元門而求其像者豈惟德宗哉李必謂將帥立功而陛下褒贈白起其言甚簡

而明然直以事論之不能辨其理之誣以格其非也不立廟而尊其故構去三公而贈尚書五十與百步之間耳嗚呼必自稱奉道又方以鬼神幸於德宗雖欲格之猶將不能而況未必知之乎

書宋諸賢墨蹟後

明 李東陽

右宋李忠定公書一張忠獻公書一趙忠簡公劄子一外小帖一呂太保安老李參政泰發書各一姑蘇沈啓南氏所藏者吳太史原傳攜至京師予得而觀之嗚呼天下未有不用君子而治不用小人而亂者宋之衰非無君子而患於不能用然其君子亦有過焉秦檜首惡天下所由亂賢如忠獻實與薦之泰發雖與持議禍至死初不能無忝政之屈此其所憾者呂非純才仇視諸賢無足深論忠定再罷乃由忠獻忠簡雖與忠獻合而屢惑讒間至悉變其所為則所謂君子者亦不能同心戮力自貽矛盾之患何怪乎國勢之不昌小人之禍未殄也晦菴謂明大義識事理惟忠定兼之益雖張趙不能不各有長短呂李而下其器可知也然使其志論獲行小人畢用皆當有益於世今觀其尺書寸札皆國家天下事也卒令厄塞困頓齋志以歿國亡世改而其辭獨存哀哉

書東萊先生手授稿後

明 李東陽

右東萊先生送張孟遠序稿一通舊藏於孟遠外孫潘日敏氏元季金華諸名士如胡汲仲柳道傳吳正傳皆有題識知為先生手筆無疑但紙墨磨滅前行已不可句每行下一字皆橫截以去以意屬讀僅可成篇而汲仲乃稱孟遠為孟陽不知何據按孟遠名杰於義為近意者有別字邪抑其誤也其前有朱岳者自稱為朱遺民幸生於三四十之前得以講明諸老之學因嘆後生者視咸淳又隔一字宙且與日敏所識皆不書年號而書甲申元世祖二十一年也是時宋既改物宿儒故老猶有感於文軌之遷革衣冠之塗炭而不忍自附於膚敏裸將之列先王之遺風善俗於此尚未泯也及其既久而并此失之乃徒以前朝故物相夸耀何哉艾都憲德潤所藏古書畫甚富近得此帖獨寶重之間以視予於此亦有感焉若先生之文章道德天下後世所共知茲不敢贊也

跋文昌朱義士墓碑後 明 羅 倫

右墓碣一通翰林博士張君伯穎為有元義士朱公英發作也公諱士華字英發別號溪南居士嘗師宜黃文學穎老劉先生授書學成而亂作至正壬辰紅巾四起公義辟地會監郡丁中憲舉兵復吉州檄蒼筤劉朝列鎮瀘江西臺掾劉子永守白沙府長史陽承事守沙溪公仗義保障為官兵聲援賊襲執公暨涉江公紹賊赴水死於戲人誰無死公死得其所矣倫聞長老言元綱既頽盜起淮穎蔓於江漢韓林兒

據中原陳友諒據潯陽朝廷遣尚書董鉉黃鉉廉使吳當平寇江西中用間棄功竟弗就羣盜蜂起鄧克明據桃溪陳普據新淦普姪陳海據永豐孫本立據廬陵新安陳關據苦富高以介據永豐明德折桂三鄉立若太平園士大夫多疵砦主以生陳宗舜禾川名士尚附陳關苟旦夕活諸何責乎其臨難伏義可考見者吉州則蕭彞翁一再赴學宮并死戴大賓扼賊龍泉象寡不敵死章立賢盡室投江死永新則姚正叔捍賊三世死樂安丘甲擊勅賊黃流戰死永豐

則羅明遠賊穴其腰三日死貢士唐景行罵賊死於戲士遭亂離死腐野草多矣獨數公之死有聞焉天理之在人心固不泯也傳曰國家之敗由官邪也官之失德寵賂彰也當承平時貪冒尸位玉帛充盈子女寵麗縱欲怙侈僭用威極致國危敗納妻獻女忍耻乞憐五性戮而三綱淪矣扶天理立人極乃發見於草茅之士使國家得斯人而用之夫豈有敗亡之禍乎謀人之國者可以永監矣望振公五世孫倫同學友予故廣其事於左使方來者有所考也

讀王章傳

明 章 懋

秉史筆者當以是非論不當以成敗論以成敗論人天下無全人矣成帝時大將軍王鳳以帝母舅用事京兆尹王章言鳳誣罔不忠不可任用宜更選忠賢成帝悅其言而不能用遂為鳳所陷以死班孟堅譏章不量輕重然則循默充位全軀保妻子之臣乃為能量輕重者乎當是時五侯驕僭並作威福尚書九卿州牧郡守皆出門下大臣則奴顏婢膝如張禹孔光小臣則諛心佞舌如杜欽谷永朋黨比周天下之

勢駸駸入於王氏朝臣自宗室劉向之外無一人為漢忠謀者況王章由諫大夫遷司隸校尉為京兆尹居重任享厚祿固非位卑而言高者矣召見延問輒辟左右上寤曰非京兆尹直言朕不聞社稷計則章與成帝亦非交淺言深者矣如是之言似不為過盡忠於君不幸見殺是亦命而已耳顧何咎其不量輕重耶孟堅如惜其死第曰危邦不入亂邦不居可矣夫既委質事人盡忠乃其職也今必以為不量輕重獨非排死節否忠直者乎設使成帝能用章言抑外

戚之與政求忠賢以自輔則漢室終無新都之禍作漢史者必將美章之功而稱其言之當矣豈有不量輕重之譏也嗚呼成敗論人如此古之所謂良史者果若是耶

書李筠傳後

明 莊 景

李筠功雖不成其氣壯其理直千萬古綱常係此一舉筠亦偉丈夫也哉其曰吾周朝宿將與世宗義同昆弟禁衛皆舊人聞吾之來必倒戈歸我是可謂視人猶己而以忠臣義士待夫石守信高懷德也於乎曾謂舊人者反目以相視逐戈以相擊而天理不存人心已死有如是哉雖然他人不足道也而筠之子守節方其起義兵而沮其父於生存之時及其守上黨以城降而忍背其父於肉未寒之日襲衣金帶銀鞍勒馬設宴從官而亦預其賜貪饕餮之富貴而甘心於叛臣逆子之列筠之不幸而乃有守節如此又尚何責乎趙匡胤石守信高懷德也哉

讀歐陽集

明 黃仲昭

歐陽文忠公平日行已立朝光明正大槩可於文章見之不容妄置喙其間矣然予嘗讀其文而有所感焉公立朝時於王安石呂惠卿皆嘗有所論薦其於安石則稱其德行文學為衆所推守道安貧剛而不屈真貴之臺諫其於惠卿則稱其才識明敏文藝優長好古飭躬為人端雅宜置之館閣夷考其行安石學術不絕於道絕無所見其設心措事無一不入於邪又自以為是而穿鑿附會以文之則其不得為君子彰彰明矣惠卿專事脂韋阿附權寵又小人之尤者也及其相繼得政則皆以奸邪誤國視公之所論薦者不啻薰蕕水炭之不相合予於是有所以見夫小人惑人之深雖光明正大之士有不能免也夫以光明正大如公者尚為其所惑如此况未能如公者邪嗚呼後世有志於為國薦賢者可不慎哉

題宋大慧禪師手帖

明 吳 寬

當宋被金國之難一日國忽議和刑部侍郎張九成謂金寔厭兵特張虛聲以撼我耳因陳十事云彼能從吾言則許之必使權在朝廷時秦檜力主和議以言誘九成終不能奪遂深惡之顧九成素好佛學他日問法於徑山杲公適方議神臂弓禦敵杲遂借以為喻檜聞之即指為謗詆貶九成南安軍至竄杲衡州久之移梅州尋反初服主門育王寺帖中云罪廢十七載及續蒙再賜為僧又出作粥飯主人等語是也吳城東獨聞上人久藏此帖今傳其徒志勤予觀之竊有可慨者夫當檜在相位屈己和戎甘心事讐凡異己者一切屏去於九成固不能逃矣而杲緇流也亦波及之則當時志士賢人遭其毒手者可勝計哉杲在宋南渡後後為禪宗稱首孝宗賜號大慧然晦菴朱子謂其作事少點檢喜怒不中節觀帖中感藏穀家發誓願等語蓋亦可見而姚崇公廣孝特以忠孝許之謂其嬉笑怒罵無非佛事崇公佛者豈亦黨同之論耶

書皮日休集後

明 王 鏊

予觀襲美與魯望倡和跌宕偉真所謂兩雄力相當者及讀其集所謂文藪者亦多感慨激昂六箴有檢身勅己之志反招逐羈有抑邪扶正之志虎門隱書有閔時病俗之志七愛三羞有傷今懷古之志文中子碑配享昌黎諸孟子為學科又幾於知道者及讀唐書則曰黃巢入關以為翰林學士朱子綱目亦書之驚曰襲美乃至是耶讀其文未嘗不悲其志壯其詞惜其遭時之不幸也守之不固也而以為恨魯不得與王維鄭虔為伍一日覽陸務觀渭南集曰襲美晚避吳越死焉有子光業為吳越相四世孫公弼在慶歷間名士也方吳越時中原隔絕乃有妄人造謗謂襲美隳節巢賊宋景文喜取小說入正史公弼書欲辨之於朝不及而卒尹師魯皮子良墓志亦云曾祖日休避廣明之難徙會稽及錢氏王其地遂依之官太常博士贈禮部尚書則其事益信矣於乎襲美千載之冤至是始雪矣不獨雪襲美之冤亦以雪吾儒之耻也曰南部新書亦載襲美今日休作識語有

累頭三屈律之語遂為所害何耶此亦傳聞之語也然亦可見其不屈於賊矣曰後之為史則何如曰所聞異詞所傳異聞信以傳信疑以傳疑此春秋之法也

跋宋文丞相過小青口詩 明 王 鏊

右宋文丞相信國公詩墨蹟一首其詩今見指南錄中初公自奉使伯顏軍前被留得間亡真州浮海以達行在後屯潮陽師潰被執自廣州傳至燕獄所至有詩肯鍾儀囚而楚操荏弱病而越吟或者猶謂之仁況公流離顛沛有感必發於詩詩必歸於忠義讀其集未嘗不為之流涕也於戲可不謂仁乎此蓋公被執北去將至桃源五十里而作文君徵明出示予予謂公之精忠大節焯焯天地間固無庸贊歎念公時在縲絏動止當不自由其感慨不平之氣發之詩可也而字畫精妙雖紙墨之微亦皆不苟何從容如是豈公之賢能使蒙古待之以禮耶夫亦公之所養有定力故臨難如平時不少動於中耶然則公之大節不待柴市而後知也觀於此詩亦可以知之矣今去公且三百年片紙遺墨人傳寶之又况其後之人乎又况徵明之賢不實其世者乎雖然忠義所在自當有神物護持之

題陳止齋夷門歌後

明 王鴻儒

陳止齋作夷門歌送王修德赴闕言眉山金陵不相容而關洛亦復互訖致有戎馬夷門之禍予讀之不免失聲大駭若如止齋言則金入中原非王呂章蔡之罪乃程蘇等之罪也初荆公行新法雖神宗末年亦深悔之蕪氏兄弟論諫為生民計也今乃以不相容為言是直以公道為私意矣且程張實無互相訖攻之事若以洛黨蜀黨為言是非曲直姑置勿論試以二公平生觀之其所以啓召邊釁者為何事非惟

伊川無之東坡亦無之也且雖有洛蜀二黨之分實無相攻之事至崇寧初而程蘇俱入黨人之碑謂金國入侵為二黨相攻之罪不亦誣乎謝疊山為蘇詩序曰川洛交毀自陷其師小人剝君子夷狄盜中原二公亦不虞禍至此極是疊山私意或有未融而有此言可也若止齋於熙豐崇宣未遠王呂章蔡之故接於睹記而立論若此豈不惜哉其後元虞伯生著吳草廬行狀謂為朱子之學者日以增盛曾不足少敵俗學利欲之禍而宋遂亡矣則是亦以亡國之罪

歸於朱子而秦韓史賈之徒邈無與矣然朱子卒於寧宗慶元六年後七十七年而宋亡草廬卒於文宗至順二年後三十六年而元亡何耶况前後年數悠促頗懸其議論識見與止齋無異何程朱之不幸一至此耶昔孔開鄉愿孟子辨楊墨程子排釋氏朱子攻二蘇皆為斯道計其揆一也今止齋乃欲邪正是非混并雜揉如陳同甫金銀銅鐵攪為一鍋鑄而用之之說聖賢之學豈其若是哉

題崔清獻公言行錄

明 宋 端

宋至寧宗末韃靼日強金匭南徙而李全又叛附不
時宋人立國錢塘僅僅支撐以免亡滅使當時繼統
正傳授明繼彼腥膻之氣逼人崛起之勢可畏而我
之民異物則固自若也奈之何黜后權臣相倚為奸
利子竝廢而理宗立旋又擢竝於死地三綱淪人紀
壞國之所使以為精神氣脉者至是蓋已斷喪無遺
雖當時名士往往隨世以立功名而大賢君子則有
的知其不可而嘆息痛恨焉思欲完其名伸其道以
求無忤於心而扶植乎倫紀者南康李公燾莆陽陳
公安與南海崔公與之輩沒齒不肯輕解理宗除命
其意固有所主然李公曾露諸言論間陳崔二公則
未嘗片言以著形迹是以淹淹三百餘年其事猶昧
晦弗彰夫君子尚論古人因時以考其行擬事以原
其意張子房終始為韓之心揚龜山始能得之勿謂
古人心術卒不可得而測也予初讀宋史陳公傳揆
公所以堅卧不起意實有在於茲來南乃得崔公言行
錄觀之益公嘉定末自蜀帥罷歸及寶慶後召帥湖

南不起帥江西不起端平中再除吏部尚書又不起
值權鋒軍士作亂薄廣城公登埤撫諭朝廷聞之即
家除帥公既平賊遂謝間寄徒以不忍鄉郡荼毒詈
勉一出而帥臣六閫月俸給悉還公幣已而除參降
麻前後辭免凡二十阨雖祠祿衣賜亦不受此公微
意之所寓也昔魯宣公為弑君者所立公弟叔躬非
焉終其身不食兄祿與之財則曰我足矣公之心其
叔躬之心乎近世評公者或謂其清風高節或謂其
洪度雅量或謂其知幾知微要之皆淺乎其知公他
書載公有菊坡文集與夫所謂嶺海便民榜海外澄清
錄今皆亡夫子孫所傳寫不過然辭章奏若告勅答詔
及遺文詩歌一二而已又皆與言行錄參錯無倫緒
予既立為更定而并以所知者增益焉因揣公心事
之微以自附於推見至隱之君子而就正於有道云

兩

跋重勒宋太學生陳公少陽書

草石刻後

祝允明

陳公一死光燭千古史紀其所語高宗者在留李忠定斥汪黃及下親征之詔罪不進兵之將毋幸金陵二事其後乃言忠定請都江寧初奏之誤宜從後說即此書也今人見其碎諫鼓鑿內豎至輿視伺戮疑其所言必僞絕近許觀此稿開陳事體展轉曲暢豈若是者哉史言八月壬午用黃潛善議殺東此稿書八月二十五日所作其日即壬午也然則具草錄進與遇禍皆一日也書中辭理明徹與其笑語收吏之

言皆神度淵澄真善處死生者哉書云倘蒙賜盡於陛下之威命則死實甘心或恐遭害於權臣之毒手則死不瞑目故盡言以求死生之決庶父母遺體不至曖昧而沒於是其死果得其素心矣書草石刻在鎮江郡庠四方學士猶罕見之太學孫育思和取拓本摹入木刻以便流布其志嘉而力勞天下良心之同也予與贊其事刻成因稍志其故正德庚午十一月三日吳郡祝允明題

書大理卿胡公遺詩後

明陸釐

昔在宣德初吉郡胡公築以大理卿巡撫南畿威望甚著著論者或頗譏其苛刻然余長聞諸長老言當是時天下又安江以南人物浩穰鄉里深惡民大都漁食百姓以致富羨而疆宗右室所為多踰禮制朝廷患之賜公璽書有祛除民害之語惟公亦以為養盛苗穢不可不鉏故其為政尚嚴雖所誅罰不必皆中然一時并兼豪植之徒斬除畧盡姦冗革心小民得職去之百年而其名聲猶赫赫使人畏仰農畝走隸皆知胡卿云若公者方諸漢吏益趙京兆尹扶風之流非邪自承平久而法抗敝也流俗之論以容養奸蠹為寬厚從政者雍容簡貴日坐官署默數歲月得美遷即去苟少出意見有所建易則衆口誼譁流言飛文上下交搆必擠而去之甚者陷之死然後快嗚呼可悲也已今胡公在今日身且不保安望其功名發聞若是乎公所著有芝山公餘二集皆未行於世此詩僅數十字蓋初仕時為吾鄉人作者余間得觀之乃因論公之行事而竊識其所感者如此士之

有志當世者或於吾言而太息焉

跋顏魯公帖

明 羅洪先

右中丞聶雙江先生家藏魯公手書祭季明文稿自乾元戊戌至於今幾八百餘年紙墨猶新世間何物不朽獨此完好其故蓋可知也後有陳文三君跋皆能明其書法而伯敦叙季明事根據史傳甚悉獨言杲卿之葬稍為失實當杲明購尸時問之行刑者云其父死時先斷一足故杲明啓履謙之瘞以無足者為驗此謂止獲一足豈未之深考耶憶嘉靖戊戌冬訪先生翠微莊始得捧讀當時留意書法徒生羨慕而已今年庚戌冬先生攜之舟中諦觀數過則有不勝其慨然者人之意氣激烈往往蹈險如夷不畏白刃久之意衰氣竭瞻顧利害悔心繼之矣惟發於天性而又能以聖賢之學輔養之是以當其處變委曲審時不失之踈抗而足以成天下之事至於勢不可為然後從容中道視死如歸此夫子之所謂強孟子之所為浩然所以塞天地也公祭季明時年五十一耳骨肉凋殘親黨離散犯難得禍孰不含悲公幸脫於虎口使稍有所瞻顧尚能留念世事耶而希烈之

難乃出於三十六年之後齒近耄矣英英如壯夫不
少挫折此豈無其故哉議者謂公之文雜出於神仙
浮屠以為不合於理彼神仙浮屠之於世事視聖賢
較然殊也獨其所謂靜定者則幾於無辨漢唐以來
聖賢之學不明故二氏者竊據以神其說公之喜談
而不置得非以其近似而取之乎當時之人既不足
以語此而傳史者之智又不足以發之使公之學不
顯而等其忠義至與意氣激發者同科後之儒者亦
不深究凡語近於二氏者輒指以為非道而迂緩自

處顧謂當然何怪無採於世事也羨慕書法者淺矣
感公之忠義莫有知其所由此豈善論世者耶先生
之學亦本於靜定故凡所在皆有建立今以中丞之
節出鎮漁陽乃公故欲恢復之地而先生受知聖明
遭時久泰徵千載之威靈將使邊圉寧謐以伸其未
遂之志矣乎

讀春秋

明 唐順之

春秋王道也天下無二尊是王道也禮樂征伐會盟
朝聘生殺之權一出於天子而無有一人之敢衡行
無有一人之敢作好惡作威福是王道也是故大宗
伯以賓禮親邦國而以間會發四方之志天子巡守
諸侯既朝則設方明而盟是會盟者天子之權也其
或不出於天子而私會私盟者罪也故春秋凡書會
書盟者皆罪之諸侯朝於天子而諸侯之自相與也
有聘禮無朝禮凡其不朝於天子而私相朝者罪也

故凡春秋之書如書朝者皆以罪其朝者與其受朝
者九代之法掌於司馬而天子賜諸侯弓矢斧鉞然
後得顯征伐雖其顯之亦必其臨時請命於天子而
後行是侵伐者天子之權也其不出於天子而私侵
私伐者罪也故凡春秋之書侵書伐者皆罪之諸侯
之大夫公子雖其有罪必請於天子而後刑殺焉其
不請於天子而顯殺者罪也故凡春秋書殺大夫殺
公子者皆罪之夫侵伐有貪兵有憤兵有應兵有討
不睦有以夷狄侵中國有以中國攘夷狄有以中國

借夷狄而伐中國者故戰有彼善於此者要之無義戰盟會有解讐有固黨有同欲相求有同力相援有同患相恤有以夷狄受盟有以夷狄主盟者故會盟有彼善於此者而要之無義會義盟殺大夫有誅叛有討貳有侵諫有借以說於大國有為強臣去其所忌故殺大夫有彼善於此者要之無義殺是故春秋自於獲澶淵兩會之外並不書其故而至於盟會侵伐則絕無一書其故者非略也以為其會其盟其侵其伐其戰既足以著其罪不必問其故也殺大夫必

名其有不名而但書其官如宋人殺其大夫司馬者亦有併其官不書如曹殺其大夫者此非略也以為義繫乎其殺之者而不繫乎其殺者義繫乎其殺之者則其殺也足以著其罪矣義不繫乎其殺者則不必問其為何人與其為有罪無罪焉可也說春秋者不達其意而瑣為之說曰某會也以某故殺某大夫也以某故至於盟戰侵伐亦然皆是皆無益於春秋也而徒為蛇足之畫者夫春秋經世之書也其經世也以正亂賊也易曰臣弑其君子弑其父非一朝一夕

矣不早辯也說春秋者亦云人臣無將夫人臣而竊其君侵伐會盟刑殺之權其為將也甚矣人臣竊其君侵伐會盟刑殺之權而久假焉而莫之歸也其為漸也甚矣故臣子至於推刃於其君父而春秋書某國弑其君某某人弑其君某者是弑之成也是春秋之所痛也人臣而竊其君會盟侵伐刑殺之權是弑之漸也將也是春秋之所辯也孔子嘗白言之矣曰天下有道則禮樂征伐自天子出天下無道則禮樂征伐自諸侯出無道而至於自大夫出無道而至於

陪臣執國命嗚呼是春秋之勢也挈其漏於陪臣天夫者而還之諸侯挈其漏於諸侯者而還之天子是春秋之撥其亂而反之正也夫周自東遷以前雖王室已不競矣而其權固在也幽弑而平徙岐豐之地委為草莽遷洛之外聲教阻絕於是尾大之勢成而諸侯橫變易禮樂馮衆暴寡犬小相朝強弱相劫無一不山於諸侯者而天子曾不得尺寸之權矣蓋周之盛王道行頌聲作而其可見者莫如詩雅蓼蕭湛露是諸侯之會同於天子者也彤弓是諸侯聽征伐

之命於天子者也出車采薇是天子之自為征伐而四夷不敢侵叛者也故曰詩亡而春秋作詩未亡天子之權存詩亡天子之權喪春秋收既喪之權而還之天子者也春秋所以接詩亡之後雖一日不得後也文宣而下則諸侯又不能自執其權而大夫之交政於中國者攘攘矣三桓六卿七穆孫甯魚革陳鮑擁兵樹黨而主勢孤矣葬原仲而私交始矣作三軍舍中軍而魯之權罄於大夫矣盟溴梁盟宋而天下之權罄於大夫矣行出奔孫陽州遜越入彭城入朝

歌入晉陽而大夫之為禍烈矣蓋天下之勢愈下而春秋之治之也愈詳也桓僖以前列國之大夫惟特使而與魯接者則名之而會盟侵伐則大夫未有以名見者夫故徐大夫特將也翟泉大夫特盟也春秋第曰八曰大夫而已不以名見也若此者非略也以為不繫乎大夫也文宣而下侵伐會盟大夫未有不以名見者雖溴梁之會其君在也而大夫盟書鷄澤之盟君既盟也而大夫盟書若此者非煩也以為繫乎大夫也不繫乎大夫雖夷吾黑肱狐偃趙衰之類

且賢未嘗以名見焉繫乎大夫雖劣如欒黶荀偃高厚華閱則瑣瑣以名見焉不繫乎大夫雖其君不在而大夫特盟則亦弗詳焉翟泉是矣繫乎大夫雖其君在而大夫綴盟則亦詳焉溴梁鷄澤是矣不繫乎大夫雖主帥亦略而人之桓僖以前侵伐書人者是矣繫乎大夫雖偏裨亦牽連而名之穀之戰是矣其弗詳大夫者以專治諸侯之為亂賊也其詳大夫者以併治大夫之為亂賊也說春秋者不達其義而曰人大夫貶也夫書人為貶彼黶閱之徒以名見者乃

為褒也耶惟曹薛滕許之大夫始終書人說春秋者曰小國無大夫非也夫此數君者且為人役之不暇而未嘗敢執天下之權也而况其大夫乎蓋不繫乎其大夫是以終始人之而弗詳今日書人為貶則曰齊晉諸大國之大夫偏受褒而曹薛滕許之大夫偏受貶耶侯犯南蒯弗徂陽虎之徒出則大夫又不能自執其權而陪臣實執之矣墮卻書墮費書圍成弗克書竊寶王大弓書得寶王大弓書而春秋之正陪臣者又詳矣故孔子欲往公山佛矜之召而曰吾為

東周云者即春秋書墮費墮卬意也是春秋之終也或曰盟葵邱盟踐土師於召陵城濮說春秋者以為聖人予之也今亦曰是禮樂征伐自諸侯出也而奪焉可乎曰是不然矣桓文之未出也權雖不在天子而諸侯亦未能盡得天子之權也蓋其權散桓文之既出也則權既不在天子又不在他諸侯而桓文獨盡得天下權也蓋其權聚譬之主人有千金焉而竊之者十人雖金已不在主人矣然十人而人得百金焉尚未足以當主人也而竊之者一人苟一人而併千金焉則是疑於主人也權之散臣悖於主權之聚臣疑於主故較利害則權之散而交聞猶不若權之聚而可以紓禍息民語王道則權之聚而疑主猶不若權之散而未有所屬隨之屯曰隨有獲人隨而我獲之未害也而謂凶豫之坤曰由豫由我致豫未害而六五以為貞疾故桓文者臣之凶而主之所以貞疾者也且桓文以前諸侯固有相朝者則亦一二小邦而已猶未有六服羣然相朝者固有私盟會擅侵伐者則亦一國兩國相讐相結而已未有舉中國而

聽於一人未有十餘國而共攻一國者是天子之權未有所屬也桓文之興五年一朝三年一聘而諸侯之玉帛相率而走於其庭天子黼宸之前乃不得一人秉主而北面者彼齊晉亦偃然受諸侯之朝已而終其身未嘗一涉天子之庭也衣裳之會兵車之會未嘗有一介請於天子也是故糾合諸侯同獎王室未有如葵邱踐土者諸侯之羣然役屬臣僕於諸侯亦未有如葵邱踐土之甚者戎狄攘斥中夏又安未有如召陵城濮者而摟諸侯以伐諸侯亦未有如召陵城濮之甚者說春秋者不達其意而曰會於某盟於某是聖人以諸侯授之齊晉也夫王室之不競也諸侯既已盡折而入於齊晉矣聖人不能挈而還之天子也其又推而授之以益其逼也耶夫權自諸侯出不問其如何而均謂之無道敵國相征不問其如何而均謂之無義不知禮樂征伐之出於桓文也其為道耶其為無道耶桓文之戰其為義耶其為無義耶使桓文而誠於勤王誠於攘夷急病而其柄則倒持也其分則上陵也聖人猶必律之以法而桓文且

將為法受惡矣況其借名勤王而實則自殖陽為急病而陰欲養亂哉滅譚滅遂本以自肥執曹界采為請已甚桓之末年侈然有封禪革命之心而文至於請隧以葬此其去問問者無幾耳又何以責楚也然則聖人所稱民免於左衽而仁之何也曰是聖人之頗論功也而春秋者頗以明道也穀梁氏曰仁不勝道存王室也然則說春秋者曰謹華夷之辨何也曰此誅亂賊之一也夫春秋之所夷者吳與楚楚之先鬻熊為姬文師國於江漢之間而太伯端委以臨吳

益皆神明之胄矣荆人不道問周之亂莘子以王莽毒上國吳亦相效而王是亂賊之尤也是以春秋從而夷之春秋諸夷中其顯然為逆者莫如楚吳其陰逆而陽順者莫如齊晉如斷獄之家吳楚則功意皆惡齊晉則功遂意惡功意俱惡故聖人顯誅之顯誅之故其辭直如卒不書葬君臣同詞之類凡皆直辭也功遂意惡故聖人陰奪之陰奪之故其辭微如邢遷於儀夷城楚師狩河陽之類凡皆微辭也夫小雅未廢而四夷不敢交侵小雅盡廢而後四夷交侵春

秋始書荆入蔡以獻舞歸則其躅蹠之勢已見桓文奮而扼之其鋒稍阻文也沒而晉霸衰而楚人之圖北方者遂日長而不可制是故春秋書荆入蔡此霸之末興而楚猾中國之始春秋書次於厥貉此霸之既衰而楚窺中國之始蓋桓文之所以扼楚者其力有難易而楚與中國之所以盛衰其機有倚伏桓起於海濱而所從者宋衛陳蔡皆弱國故謀之十餘年結江結黃連十二國之師而後能服楚於召陵文據表裡山河之固而所從者齊秦皆勁國故反國一年

僅連三國之師而遂能克楚於城濮一戰而殺其事兵之將然晉之克楚也得策於結秦而晉之不競於楚也失策於讐秦自殺之役而秦晉相讐殺者歷四五世戰彭衙戰令狐戰河曲積十餘戰而不解是晉人自失一強援自生一強敵失一強援則其氣力不完強敵伺近則其勢不暇於略遠故晉霸之衰而楚益橫者殺之役實然說春秋者乃曰殺之役春秋許晉襄繼霸吾不知也夫楚莊者又蠻裔之雄耳而遠交秦已近攻陳鄭則是晉之讐秦非特生一強敵乃

又借盜以兵也春秋書楚人秦人巴人滅庸而楚之謀益狡矣書楚子圍鄭而中國虎牢之險淪於夷矣書宋人及楚人平而南北衡矣天下之勢一變也雖然於時諸侯固有附楚者而猶未敢公然附楚也晉雖已不能盡得諸侯而猶未肯甘心以諸侯委之楚也蜀之盟謂之匱盟蓋諸侯猶惴惴晉人知之也弭兵之說倡而南北之從交見於是中國諸侯公然朝楚向之玉帛於齊晉者盡在楚矣申之會空中國而聽焉齊晉之所連以扼楚者今楚人連之以扼中國矣申之會諸侯獻六王之禮宋之會號之會長楚於晉則是諸侯甘心為夷役而晉人甘心以諸侯委於夷也天下之勢又一變也至於吳越交兵而夷禍極矣書伐鄭入州來會黃池入吳而春秋所以治夷者又詳矣是春秋之中也或曰楚橫而齊晉扼之則是終國果不可無桓文也今日禮樂征伐自諸侯出也而奪焉夫賴人之功以紓患斯人之權以資敵是責鷹鷂之搏而繫其足也不亦迂乎曰不然吾又有以譬之今有僕於此鴟黨鑄兵而主人弗能令也然盜夜

入其室則其僕揭兵嘯黨而逐之以僕為不善也然而足以逐盜以僕為善也然而足以抗主故天下無霸至於四夷縱橫而莫之禁者非天下之幸也天下有霸而至於臣疑於主而莫之恠者非天下之幸也夫春秋之事齊桓晉文是也齊桓晉文之功罪定而王道明矣王道明而亂賊懼矣或謂春秋誅亂賊者誅其弑君者也曰若是則春秋所誅者止於弑三十六君之人耳其亦狹矣然則所謂誅亂賊者何也曰治弑也治諸侯之專也治大夫也治陪臣也治夷也

凡無王者皆亂賊之道也

書河圖洛書

明 唐順之

卦未畫書契未作而造物者已出此二圖示蓋天機之始洩而數之所由肇也元氣醞釀而滋潤生焉其初一泡形也故一為水滋潤者氣必緩故二為火氣緩者必急達故三為木急達者必堅凝故四為金萬物始土終土者冲氣也此五氣者一氣也非相待而生也故圖書皆以五居中一冲氣也一得土而六成二得土而七成三以八成而四以九成也亦然四氣一冲氣也洛書縱橫皆十五一冲氣也河圖虛中五

而以十數均之四隅則西北二老為朋得二十五東南二少為偶得二十五一冲氣也冲氣也者所謂人受天地之中以生者也聖人則之而畫卦得中則多吉不中則多凶悔吝取乎此也河圖圓而洛書方邵子曰圖者天也紀歷之數其肇於此乎方者地畫野分州之法其起於此乎員為天而陽下陰上者在天則地道上行故陽不亢陰也方為地而陰隅陽正者在地則不居成功故陰不疑陽也員左旋而方右行天水違行之象也使皆左旋而皆右行也其不相遇

久矣故曰易逆數也天地睽而其事同也男女睽而其志同也萬物睽而其事類也在人則懲忿窒慾與復其赤子之心皆逆之用也其用逆而其機則順也畫書皆以五居中而一居下者此尤造化之精意至於天地之數五十有五而大衍之數五十既虛其五其用四十有九又虛其一其五者中之五其一者下之一也此尤聖人代造化洩盡精意處也故曰其用四十有九則五與一皆勿用也一點在下者即五中之一點也萬物發用在中而根荄在下以天地言則雷復地中以鍾律言則元聲潛萌於黃鍾之管在修養家則陽氣發於下元陰極在聖人之學則洗心退藏於密是故聖人係乾以見天地之心乾者一數也而尤慎重於乾之初爻曰潛龍勿用而聖人又係之曰陽氣潛藏曰陽在下也其藏潛者非謂有時而在上也其上者不離乎下也乾卦所謂勿用之潛龍者大衍所謂勿用之一也四十有九之用至矣而未始離乎一也見躍飛亢六位成矣而未始離乎潛也勿用則神矣故六子有事而乾坤無為也此圖書之

所以一居乎下而數之所以始乎一也嗚呼非知德者孰可與言勿用之妙哉

書秦風蒹葭三章後

明 唐順之

嘉靖戊申秋七月廿五日夜雷雨大作萬艘震蕩平明開霽則河水增高四五尺矣余與諸生泛小舸如陳渡臨沅歌嘯泐然有千里江湖之思因詠秦風蒹葭三章則宛如目前風景而所謂伊人者猶庶幾見之且秦時風俗不雄心於戈矛戰鬪則養技於獫狫射獵至其聲利所驅雖豪傑亦且側足於寺人媚子之間方以為榮而不知愧其義士亦且沈酣秦養與君為殉而不可贖益靡然矜俠趨勢之甚矣而乃有遺世獨立澹乎埃壒之外若斯人者豈所謂一國之人皆若狂而此其獨醒者歟抑亦以秦之不足與而優游肥遁若後來鑿坏羊裘之徒者在當時固已有入歟余獨惜其風可聞而姓名不著不得與鑿坏羊裘之徒並列隱逸傳然鑿坏羊裘之徒以其身而逃之蒹葭伊人者乃并其姓名而逃之此又其所以為至也噫嘻士固有不慕乎當世之榮而亦何心於後世之名也哉因慨然為之一咲遂書以示諸生

書季子微所藏摹本蘭亭 明 徐渭

非特字也世間諸有為事凡臨摹直寄興耳銖而較寸而合豈真我面日哉臨摹蘭亭本者多矣然時時露已筆意者始稱高手予閱茲本雖不能必知其為何人然窺其露已筆意必高手也優孟之似孫叔敖豈併其鬚眉軀幹而似之耶亦取諸其意氣而已矣

讀洹詞

明 郭棐

崔后渠作四貞祠記云往之可言不獨四貞自閩人谷大用八人思盡君以極其欲而燕遊啓八人又進劉瑾使攝廷論而士禍慘當瑾時酷烈如焚怨韓司徒李夢陽刺骨矣衆謂其必死也而免何塘之長揖知縣王勲之不賂也而見重瑾敗而永繼永敗而寧彬繼命亂至矣劉少傳之避位傳尚書之抗奏寧濛叛矣胡世寧曹琬之持法孫燧許達之死義故扞辱之女可觀性秉節之臣可觀學予讀其文慷慨三復深歎正德中士氣掃地猶幸有諸公大節磊落如此詎非一時中流砥柱哉予南海有王公名暉者是時為刑部司務瑾坐東廠公見之獨長揖及為江西叅議寧濛橫驚公見之亦獨長揖人有知者曰是不跪東廠者肯為藩邸屈膝耶公知濛將叛遂謝病歸嗟嗟公不屈瑾其高風奚讓何栢齋不屈宸濠其正氣又不下胡端敏而后渠未之知也故表出之

題八仙像後

明 王世貞

八仙者鍾離李呂張藍韓曹何也。不知其會所繇始亦不知其畫所繇始。余所觀仙跡及圖史亦詳矣。凡元以前無一筆而我明如冷起敬吳偉杜堉稍有名者亦未嘗及之意。或妄庸畫工合委巷輩俚之談以是八公者。老則張少則藍韓將則鍾離書生則呂貴則曹病則李婦女則何為各据一端作滑稽觀耶。乃至適者紫姑靈鬼往往冒真人而上援此八公以相盡惑尤可笑也。是八公者不佞能考其七而疑其一為

志之鍾離公者諱權字雲房嘗以裨將從周考侯敗於齊萬年跳終南山過東華王真人得道至唐而始一出度純陽自稱天下都散漢呂公者諱器字洞賓父讓官舉進士不第遇正陽真人得道在五季及宋時化跡最著而又與正陽度劉海蟾已度王重陽及自度何仙姑張珍奴之屬張公者諱果隱恒州中條山見召於唐開元帝與葉靖龍華諸公比而公最為長者自言充時官侍中葉公器識之曰混沌初分白蝙蝠精也授銀青光祿大夫放歸天寶初尸解藍公

者不知何許人。恒衣破藍衫黑木腰帶跣一足。髹一足醉則持三尺大拍板行歌云。藍采和藍采和世界能幾何。紅顏一春樹。流光一擲梳。後語多不能悉。至濠州忽擲髹帶拍板乘雲而去。韓公者諱湘昌黎之從子。少學通落魄它鄉。久而始歸。值昌黎生辰宴公怒之曰。無怒也。請技薄技以獻。因為頃刻花每瓣金書一睽云。雲橫秦嶺家何在。雪擁藍關馬不前。昌黎不悟。遣之去。後果譴潮至藍關。公來候昌黎乃悟。因吟三韻以補前詩。竟列曹國舅者。苗善時傳不能舉其名。第言丞相彬子。皇后弟少而美。姿安恬上及皇后重之。一旦求出家。雲水上以金牌賜之云。詔書到日如朕親行。抵黃河為篙工。索渡直急用金牌相抵。純陽見而警之。遂拜而得道。按皇后乃侍中彬孫女。金牌云云大約俚巷妄談也。審爾所謂曹公者當作青巾少年不當作髯而翼善冠也。何仙姑零陵市人女也。純陽以一挑與之。僅食其半。自是不綴。頗能談俗咎老而解化亦苗善時云。攷之它野史謂仙姑晚而枯瘠其言休咎亦甚。驗趙道一仙鑑則謂純陽所

度者趙姑名何者也有仙姑何姓者開元中羽化去
合在純陽前若李公者諸方外禪官都不載獨聞之
此云諱元中開元大歷間人也於終南山學道四十
年陽神去舍為虎所殘得一跛弓乍亡者而居之不
可知也令鍾離呂公而游人間必從東華挾海蟾而
重陽輩而八令張果先王而取友則必從赤松安期
次則靖能公遠張洪崖胡長仙輩而八必不屑屑求
凡合諸公方逍遙乎上清亦必不僕僕焉一符之是
聽而受塵凡役也不佞此跋即受此頭書所不恤矣

雜著

雜著上之上

魏晉六朝

唐

宋

詩品 三篇

鍾嶸

上

氣之動物物之感人故搖蕩情性形諸舞詠照燭三才暉麗萬有靈祇待之以致饗幽微藉之以昭告動天地感鬼神莫近於詩昔南風之辭卿雲之頌厥義憂矣夏歌曰鬱陶乎予心楚謠曰名余曰正則雖詩體未全然是五言之濫觴也逮漢李陵始著五言之目矣古詩眇邈人世難詳推其文體固是炎漢之製非哀周之倡也自王揚枚馬之徒詞賦競興而吟咏靡聞從李都尉迄班婕妤將百年間有婦人馬一人而已詩人之風頓已缺喪東京二百載中惟有班固詠史質木無文降及建安曹公父子篤好斯文平原兄弟鬱為文棟劉楨王粲為其羽翼次有攀龍托鳳自致於屬車者蓋將百計彬彬之盛大備於時矣爾後陵遲衰微迄於有晉太康中三張二陸兩潘一左勃爾復興踵武前王風流未沫亦文章之中興也永嘉時黃老稍尚虛談於時篇什理過其辭淡乎寡味爰及江表微波尚傳孫綽許詢桓庾諸公詩皆平典似

道德論建安風力盡矣先是郭景純用雋上之才變創其體劉越石伏清剛之氣贊成厥美然彼衆我寡未能動俗逮義熙中謝益壽斐然繼作元嘉中有謝靈運才高詞盛富艷難蹤固已舍跨劉郭陵轢潘左故知陳思為建安之傑公幹仲宣為輔陸機為太康之英安仁景陽為輔謝客為元嘉之雄顏延年為輔斯皆五言之冠冕文詞之命世也夫四言文約易廣取效風騷便有多得每苦文繁而意少故世罕習焉五言居文詞之要是衆作之有滋味者也故云會於流俗豈不以指事造形窮情寫物最為詳切者邪故詩有六義焉一曰興二曰比三曰賦文已盡而意有餘興也因物喻志比也直書其事寓言寫物賦也宏斯三義酌而用之幹之以風力潤之以丹彩使味之者無極聞之者動心是詩之至也若專用比興則患在意深意深則詞躓若但用賦體則患在意浮意浮則文散嬉成流移文無止泊有燕漫之累矣若乃春風春鳥秋月穉蟬夏雲暑雨冬月祁寒斯四候之感諸詩者也嘉會寄詩以親離群托詩以悲至於楚臣去

境漢妾辭宮或骨橫胡野或魂逐飛蓬或負戈外戎
殺氣雄邊塞客衣單孀閨淚盡又士有解佩出朝一
去忘返女有揚蛾入寵再盼傾國凡斯種種感蕩心
靈非陳詩何以展其義非長歌何以騁其情故曰詩
可以群可以怨窮賤易安幽居靡悶莫尚於詩矣故
詞人作者罔不愛好今之士俗斯風熾矣終能勝衣
甫就小學必甘心而馳驚焉於是庸音雜體各各為
容至使膏腴子弟耻文不逮終朝點綴分夜呻吟獨
觀謂爲警策衆觀終淪平鈍次有輕薄之徒笑曹劉

爲古拙謂鮑昭義皇上人謝朓今古獨步而師鮑昭
終不及日中市朝滿學謝朓方得黃鳥度青枝徒自
棄於高聽無涉於文流矣觀王公縉紳之士每博論
之餘何嘗不以詩爲口實隨其嗜慾商確不同淄澠
並泛朱紫相奪喧議競起準的無依近彭城劉士章
俊賞之士疾其淆亂欲爲當世詩品口陳標榜其文
未遂感而作焉昔凡品論人七畧裁士校以賓賓誠
多未值至若詩之爲技較爾可知以類推之殆均博
奕方今皇帝資生知之上才體沉鬱之思思文麗日

月賞究天人昔在貴遊已爲稱首况八紘既奄風靡
雲蒸抱玉者聯肩握珠者踵武以暇漢魏而不顧吞
晉宋於胃中諒非農歌輟議敢致流別喋之今錄庶
用旋於閭里均之於談笑耳

中

一品之中畧以世代爲先後不以優劣爲詮次又其
人既往其文克定今所寓言不錄存者夫屬詞比事
乃爲通談若乃經國文符應資博古撰德駁奏宜窮
往烈至乎吟咏情性亦何貴於用事思君如流水既
是即日高臺多悲風亦唯所見清晨登隴首羌無故
實明月照積雪詎出經史觀古今勝言多非補假皆
由直尋願延謝莊尤爲繁密於時化之故大明泰始
中文章殆同書抄近任昉王元長等辭不貴奇競須
新事邇來作者寔以成俗遂乃句無虛語語無虛字
拘攣補衲盡文已甚但自然英旨罕值其人詞既失
高則宜加事義雖謝天才亦表學問亦一理乎陸機
文賦通而無貶李克翰林疎而不切王微鴻寶畧而
無裁顏延論文精而難曉摯虞文志詳而博瞻頗曰

知言觀斯數家皆就談文體而不顯優劣至于謝客
集詩逢詩輒取張騭文士逢文即書諸英志錄並義
在文魯無品第嵯合所錄止乎五言雖然網羅今古
詞文殆集輕欲辨彰清濁持振病利凡百二十人預
此宗流者便稱才子至斯二品升降差非定制方申
變裁請寄知者爾

下

昔曹劉殆文章之聖陸謝爲體裁之才銳精研思千
百年中而不聞宮商之辨四聲之論或謂前達偶然
不見豈其然乎嘗試言之古曰詩頌皆被之金竹故
非調五音無以諧會若置酒高堂上明月照高樓爲
韻之首故二祖之詞文或不工而韻入歌唱此重音
韻之義也與世之言宮商異矣今既不備管絃亦何
取於聲律耶齊有王元長者嘗謂余云宮商與二儀
俱生自古詞人不知之惟顏憲子乃云律呂音調而
其實大謬惟見范蔚宗謝莊頗識之耳嘗欲進知音論
未就王元長創其首謝朓沈約揚其波三賢或貴公
子孫幼有文辨於是士流景慕務爲精密裝積細微

專相凌架故使文多拘忌傷其真美余謂文製本須
諷讀不可蹇礙但令清濁通流口吻調利斯爲足矣
至平上去入則余病未能蜂腰鶴膝間里已俱陳思
贈弟仲宣七哀公幹思友阮籍詠懷子卿雙鳧叔夜
雙鸞茂先寒夕平叔衣單安仁倦暑景陽苦雨靈運
鄴中士衡擬古越石感亂景純詠仙王微風月謝客
山泉叔源離宴鮑昭戍邊太冲詠史顏延入洛陶公
詠貧之製惠連擣衣之作斯皆五言之警策者也所
謂篇章之珠澤文彩之節林

家訓

北齊 顏之推

夫聖賢之書教人誠孝慎言檢迹立身揚名亦已備矣。魏晉以來所著諸子理重事復，迺相模數猶屋下架屋，牀上施牀耳。吾今所以復為此者，非敢執物範世也。業以整齊門內，提撕子孫，夫同言而信，信其所親，同命而行，行其所服。禁童子之暴謔，則師友之誠不如傳婢之指揮；主凡人之閒閤，則堯舜之道不如寡妻之誨諭。吾望此書為汝曹之所信，猶賢於傳婢寡妻耳。

序致

父子之嚴不可以狎，骨肉之愛不可以簡。簡則慈孝不接，狎則怠慢生焉。由命士以上，父子異宮，此不狎之道也；抑搔癢痛，懸衾篋枕，此不簡之教也。齊朝有一士大夫嘗謂吾曰：「我有一兒年已十七，頗曉書疏，教其鮮卑語及彈琵琶，稍欲通解，以此伏事公卿，無不寵愛，亦要事也。吾時俛而不答，異哉！此人之教子也。」若由此業自致，卿相亦不願汝曹為之。教子兄弟之際，異於他人，望深則易怨，他親則易弭。譬猶居室一穴，剝塞之一隙，則塗之則無，頽毀之慮如雀

鼠之不卹風雨之不防墜陷，極淪無可救矣。僕妾之為雀鼠妻子之為風雨甚哉！人或交天下之士，皆有歡愛而失敬於兄者，何其能多而不能少也？人或將數萬之師，得其死力而失恩於弟者，何其能踈而不能親也？一娣姁者多爭之地也，使骨肉居之亦不若各歸四海，感霜露而相思，佇日月之相望也。況以行路之人處多爭之地，能無間者鮮矣。所以然者，以其當公務而執私情，處重責而懷薄義，若能恕已而行，換子而撫，則此患不生矣。

兄弟

江東婦女畧無交遊，其婚姻之家或十數年間未相識者，唯以信命賄遺致殷勤焉。鄴下風俗專以姑持門戶，爭訟曲直，請逢迎車乘，填街衢，綺羅盈府寺，代子求官為夫祈屈，此乃恒代之遺風乎。

治家

賢慕

多見士大夫恥涉農商羞務工使射既不能穿札筆則總記姓名飽食醉酒忽忽無事以此銷日以此終年或國家世餘緒得一階半級便謂爲足安能自苦又有吉凶大事議論得失蒙然張口如坐雲霧公私宴集談古賦詩塞默低頭欠伸而已有識傍觀代其入地何惜數年勤學長受一生愧辱哉梁朝全盛之時貴遊子弟多無學術至於諺云上車不落則著作體中何如則秘書無不燠衣剃面傅粉施朱駕長簷車跟高齒履坐基子方得憑班綵隱囊列罷玩于左

右從容出入望若神仙明經求第則顧人答策三九公譏則假手賦詩當爾之時亦快士也及離亂之後朝市遷革銓衡選舉非復曩昔之親當路秉權不見昔時之黨求諸身而無所得施之世而無用披褐而喪珠失皮而露質兀若枯木泊若窮流孤獨戎馬之間轉死溝壑之際當爾之時誠驚材也有學藝者觸地而安自荒亂已來諸見俘虜雖百世小人知讀論語孝經者尚為人師雖千載冠冕不曉書記者莫不耕田養馬以此觀之安可不自勉耶若能常保數百

卷書千載終不為小人也夫明六經之指涉百家之書縱不能增益德行敦厲風俗猶為一藝得以自資父兄不可常依鄉國不可常保一旦流離無人庇廕當自求諸身耳夫老莊之書蓋全真養性不肯以物累已也故藏名柱石終蹈流沙匿跡漆園卒辭楚相此任縱之徒耳何晏王弼祖述元宗遞相誇尚景附草廡皆以農黃之化在乎已身周孔之業棄之度外而平叔以黨曹爽見誅觸死權之網也輔嗣以多笑人被疾陷好勝之穽也山巨源以蓄積取譏背多藏厚亡之文也夏侯元以才望被戮無交離擁腫之鑒也荀奉倩喪妻神傷而卒非鼓缶之情也王夷甫悼子悲不自勝異東門之達也嵇叔夜排俗取禍豈和光同塵之流也郭子元以頃動權勢寧後身外已之風也阮嗣宗沈酒荒迷乖畏途相誡之譬也謝幼興贓賄黜削違棄其餘魚之旨也彼諸人者並其領袖元宗所歸其餘桎梏塵滓之中顛仆名利之下者豈可備言乎直取其清談雅論剖元析微賓主往復娛心悅耳非濟世成俗之要也泊於梁世茲風復聞

莊老周易總謂三元武皇簡文好自講論周宏正奉
贊大猷化行都邑學徒千餘實為盛美元帝在江荆
間後所愛習召置學生親為教授廢寢忘食以夜繼
朝至乃倦刺愁憤輒以講自釋吾時頗預末造親承
音指往既頑魯亦所不好云 義陽朱詹世居江陵
後出揚都好學家貧無資累日不爨乃時吞紙以資
腹寒無氈被抱犬而卧犬亦饑虛起行盜食呼之不
至哀聲動隣猶不廢業卒成學士官至鎮南錄事參
軍為孝元所禮此乃不可為之事亦是勤學之一人

夫文字者墳籍根本世之學徒多不曉字讀五經
者是徐邈而非許慎習賦誦者信諸詮而忽呂忱明
史記者專皮鄒而廢篆籀學漢書者悅應蘊而略蒼
雅不知書音是其技葉小學乃其宗系至見服虔張
揖音義則貴之得通俗廣雅而不屑一手之中向背
如此况異代各人乎 勉學篇

自古文人多陷輕薄屈原露才揚己顯暴君過宋玉
體貌容冶見過俳優東方曼倩滑稽不雅司馬長卿
竊貨無操王褒過家童約楊雄德敗美新李陵降辱

喬國劉歆反覆莽世傳穀黨附權門班固盜竊父史
趙元叔抗疎過度馮敬通浮華擯壓馬季良佞媚獲
諂蔡伯喈同惡受誅吳質詆訶鄉里曹植悖慢犯法
杜篤乞假無厭路粹監狹已甚陳琳實號蒼疎繁欽
性無檢格劉楨屈強輪作王粲率躁見嫌孔融禍衡
誕傲致隕楊修丁廙扇動取斃阮籍無禮敗俗嵇康
凌物凶終傅元忿聞免官孫楚矜誇凌上陸機犯順
履險潘岳乾沒取危顏延年負氣權黜謝靈運空疎
亂紀王元長凶賊自貽謝元暉悔惕見及凡此諸人

皆其翹秀者不能悉紀大較如此至於帝王亦或未
免自昔天子而有才華者惟漢武魏太祖文帝明帝
宋孝武帝皆負世議非懿德之君也自子游子夏荀
况孟軻枚乘賈誼蘊武張衡左思之儔有盛名而免
患者時復聞之但其損敗居多耳每嘗思之原其所
積文章之體標舉興會發引性靈使人矜伐故忽於
持操果于進取今世文士此患彌切一字恆當一句
清巧神厲九霄志凌千載自吟自賞不覺更有旁人
加以砂礫所傷慘于矛戟諷刺之禍速於風塵深宜

防慮以保元吉 有一士族好為可笑詩賦詆擊邢
魏諸公衆共嘲美虛相讚說便擊牛醢酒招延鼓譽
其妻明鑑婦人也泣而諫之此人嘆曰才華不為妻
子所容何況行路至死不覺自見之謂明此誠難也
劉述云君輩辭藻譬若榮華須臾之翫非宏才也
豈比吾徒十丈松樹常有風霜不可凋悴矣劉應之
曰既有寒木又發春華何如也辛笑曰可矣凡為文
章猶人乘騏驎雖有逸氣當以銜勒制之無使流亂
執躅放意填坑岬也文章當以理制為心腎氣調為
筋骨事義為皮膚華麗為冠冕今世相承趨末弃本
率多浮艷辭與理競辭勝而理伏事與才爭事繁而
才損放逸者流宕而忘歸穿鑿者補綴而不足時俗
如此安能獨違但務去泰去甚耳必有盛材重譽改
革體裁者實吾所希古人之文宏才逸氣體度風格
去今實遠但緝綴疎朴未為密綴耳今世音律諧靡
章偶對諱避精詳賢於往昔多矣宜以古之製裁為
本今之辭調為末並須兩存不可偏棄也 吾家世
文章甚為典正不從流俗梁孝元在蕃時撰西府

新文史記無一篇見錄者亦以不偶於世無鄭衛之
音故也 沈隱侯曰文章當從三易易見事一也易
識字二也易讀誦三也邢子才常曰沈侯文章用事
不使人覺若胃臆語也深以此服之祖孝徵亦常謂
吾曰沈詩云崖傾護石髓此豈似用事耶邢子才魏
收俱有重名時俗準的以為師匠邢賞服沈約而輕
任昉魏愛慕任昉而毀沈約每於談讌辭色以之鄙
下紛紜各有朋黨祖孝徵嘗謂吾曰任沈之是非乃
邢魏之優劣也 江南文制欲人彈射知有病累隨
即改之陳王得之於丁廙也山東風俗不通擊難吾
初入鄴遂嘗以此忤人至今為悔汝曹必無輕議也
文章
晉朝南渡優惜士族故江南冠帶有才幹者擢為令
僕以下尚書郎中書舍人已上典掌機要其餘文義
之士多迂誕浮華不涉世務纖微過失又惜行極楚
所以處於清名益護其短也至於臺閣令史主書監
帥諸籤省並曉習吏用濟辦時須縱有小人態皆
可鞭杖肅督故多見委使蓋用其長也人每不自量

舉世怨梁武父子愛小人而疏士大夫此亦眼不能見其睫耳 梁世士大夫皆尚褒衣博帶大冠高履出則車輿入則伏侍郊郭之內無乘馬者周宏正為宣城王所愛給一果下馬常服御之舉朝以為放達至乃尚書郎乘馬則糾劾之及侯景之亂膚脆骨柔不堪行步體羸氣弱不耐寒暑坐死倉猝者往往而然 江南朝士因晉中興南渡江卒為羈旅至今八九世未有力田悉資俸祿而食耳假令有者皆信僮僕為之未嘗目觀起一撥土耘一株苗不知幾月當

下幾月當收安識世間餘務乎故治官則不了營家則不辦皆優閒之過也歟涉務

上書陳事起自戰國逮於兩漢風流彌廣原其體度攻人主之長短諫諍之徒也計群臣之得失訟訴之類也陳國家之利害對策之伍也帶私情之與奪遊說之儔也總此四塗實誠以求位鬻言以干祿或無絲毫之益而有不貲之困 齊之季世多以財貨託附於外家誼動女謁拜守宰者印組光華車騎輝赫榮養九族取貴一時而為執政所惡隨而伺察既已

得利必以利治微染風塵便乖肅正坑穽殊深瘡痍未復縱得免死莫不破家然後噬臍亦復何及吾自南及北未嘗一言與時人論身分也不能通達亦無尤焉 王子晉云佐饗得嘗佐聞得傷此言為善則預為惡則去不欲黨人非義之事也凡損于物凡無與焉然而窮鳥入懷仁人所憫况死士歸我當棄之乎伍員之託漁舟季布之入廣柳孔融之藏張儉孫嵩之匿趙岐前代之所貴而吾之所行也以此得辜甘心瞑目至如郭解之代人報讐灌夫之橫怒求地游俠之徒非君子之所為也如有逆亂之行得辜於君親者又不足恤焉君親之迫危難也家財已力當無所吝若橫生圖計無理請謁非吾教也墨翟之徒世謂熱腹楊朱之似世謂冷腸腸不可冷腹不可熱當以仁義為節文爾省事 吾近為黃門郎已可收退當時羈旅懼羅謗譴思為此計僅未暇爾自喪亂已來見因託風雲微倖富貴旦執機權夜損坑谷朝歡卓鄭晦泣顏原者非十人五人也慎之哉慎之哉止足

夫生不可不惜不可苟惜涉險畏之塗於禍難之事
貪欲以傷生纔慝而致死此君子之所惜哉行誠孝
而見賊履仁義而得辜喪身以全家泯軀而濟國君
子不咎也自亂離以來吾見名臣賢士臨難求生終
為不救徒取窘辱令人憤懣侯景之亂王公將相多
被戮辱妃主姬妾略無全者惟吳郡太守張嶠建義
不撓為賊所害辭色不撓及鄱陽王世子謝夫人登
屋詬怒見射而斃夫人謝遵女也何賢智操行若此
之難婢妾引決若此之易悲夫

養生

山中人不信有魚大如木海上人不信有木大如魚
漢武不信弦膠魏文不信火布北人見錦不信有蟲
食樹吐絲所成昔在江南不信有千人趨帳及來河
北不信有二萬斛船皆實驗也夫有子孫自是天
地間一蒼生耳何預身事而乃愛護遺其基址況於
己之神爽頗欲棄之哉歸心漢書王莽贊云紫色蛙
聲餘分閭位蓋謂非元黃之色不中律呂之音也近
有學士名問甚高遂云王莽非直為爵虎視復紫色
蛙聲亦為誤矣

書證

鞭賈

唐柳宗元

市之鬻鞭者人問之其賈宜文粹五十必曰五萬復
之以五十則伏而笑以五百則小怒五千則大怒必
五萬而後可有富者子適市賈鞭出五萬持以夸余
視其首則拳蹙而不遂視其握則蹇急集作而不植
其行水者一去一來而不相承其節朽黑而無文材
招之滅爪而不得其所窮舉之飄然若揮虛焉余曰
子何取於是而不愛五萬曰吾愛其黃而澤且賈者
云余乃召僮儵湯以濯之則遽然枯蒼然白嚮之黃
者挽也澤者蠟也富者不悅然猶持之三年後出東
郊爭道長樂坂下馬相踉因大擊鞭折而為五六馬
踉不已墜於集作地傷焉視其內則空空然其理若
糞壤無所賴者今之掩其貌蠟其言以求價伎於朝
者當其分則善文粹無一誤而過其分則喜當其分
則反怒曰余曷不至於公卿然而至焉者亦良多矣
居無事雖過三年不害當其有事驅之於陳力之列
以禦乎物以夫空空之內糞壤之理而以責其大擊
之効惡有不折其用而獲墜傷之患者乎

復性書上篇

唐 李 翱

人之所以為聖人者性也人之所以惑其性者情也喜怒哀懼愛惡欲七者皆情所為也情既昏性斯匿矣非性之過也七者循環而交來故性不能統也水之渾也其流不清火之煙也其光不明非水火清明之過沙不渾流斯清矣煙不鬱光斯明矣情不作性斯純矣性與情不相先也雖然無性則情無所生矣是情因性而生情不自情因性而情性不自性因情以明性者天之命也聖人得之而不惑也情者性之動也百姓溺之而不能知其立者也聖人者豈其無情也聖人者寂然不動不往而到不言而神不耀而光制作參乎天地變化合乎陰陽雖有情也未嘗有情也然而百姓者豈其無性邪百姓之性與聖人之性弗差也雖然情之所昏交相攻未始有窮故雖終身而不自覩其性焉火之潛於山石林木之中非不火也江河淮濟之未流而泉於山非不存也石弗訖木不磨則不能燒其山林而燥萬物泉之源弗疏則弗能為江為河為濟為淮東匯大壑浩浩湯湯為弗

測之深情之動靜弗息則弗能復其性而燭天地為不極之明故聖人者人之先覺者也覺則明寂然不動廣大清明照乎天地感而遂通天下之故行止語言無不處於極也復其性者賢人循之而不已者也其不息而至於聖也故制禮以節之作樂以和之安於仁樂之本也動而中禮之本也故在則聞和鸞之聲行步則聞佩玉之音無故不廢琴瑟視聽言行循禮法而動所以教人忘嗜欲而歸性命之道也道者至誠而不息也至誠而不息則虛虛而不息則明明而不息則照天地而無遺非他也此盡性命之道也哀哉人人可以及於此莫之止而不為也不亦惑邪昔者聖人以傳於顏子顏子得之拳拳不失不遠而復其心三月不違仁子曰回也其庶幾乎屢空其所以未到於聖人者一息耳非力不能也短命而死故也其餘升堂者蓋皆傳也一氣之所養一雨之所膏而得之者各有淺深不必均也子路之死也石乞孟堅以戈擊之斷纓子路曰君子死冠不免結纓而死由

非好勇而無懼也其心寂然不動故也魯子之死也
曰吾何求焉吾得正而斃焉斯已矣此正性命之言
也子思仲尼之孫得其祖之道述中庸四十七篇以
傳於孟軻孟軻曰我四十不動心軻之門人達者公
孫丑萬章之徒蓋傳之矣遭秦焚書中庸之弗焚者
一篇存焉於是此道廢缺其教授者惟節文章句威
儀擊劔之術相師焉性命之源則吾弗能其傳矣道
之極於剝也必復吾自六歲讀書但為詞句之學志
於道者四年矣與人言之未嘗有是我者也南觀濤
江入於越而吳郡陸參存焉與之言陸參曰子之言
尼父之心也東方有聖人焉不出乎此也南方有聖
人焉亦不出乎此也唯子行之不息而已矣嗚呼性
命之書雖存學者莫能明是故皆入莊列老釋不知
者謂夫子之徒不足以窮性命於道信之者皆是也
有問於我我以吾之所知傳焉遂書於書以開誠明
之源而缺絕廢棄不揚之道幾可以傳於時命曰復
性書以治乎心以傳乎人嗚呼夫子復生不廢吾言
矣

復性書中篇

唐李翱

或問曰人之昏也久矣將復其性者必有漸也敢問
其方曰弗慮弗思情則不生情既不生乃為正思正
思者無慮無思也易曰天下何思何慮又曰閑邪存
其誠詩曰思無邪曰已矣乎曰未也此齊戒其心者
也猶未離於靜焉有靜必動有動必靜動靜不息是
乃情也易曰吉凶悔吝生乎動者也焉能復其性邪
曰如之何曰方靜之時知心無思者是齊戒也知本
無有思動靜皆離寂然不動者是至誠也中庸曰誠
則明矣易曰天下之動貞夫一者也問曰不慮不思
之時物格於外情應乎內如之何而可止也以情止
情其可乎曰情者性之邪也知其為邪本無其心寂
然不已邪思自息惟性明照邪也何所生如以情止
情是乃大情也情之相止其有已乎易曰顏氏之子
其殆庶幾乎有不善未嘗不知知之未嘗復行也易
曰不遠復無祇悔元吉問曰本無有思動靜皆離然
則聲之來也其不聞乎物之形也其不見乎曰不觀
不聞是非人也視聽昭昭而不起於見聞者斯可矣

無不知也無弗為也其心寂然光照天地是誠之明也大學曰致知在格物易曰無思也無為也寂然不動感而遂通天下之志非天下之至神其孰能與於此曰敢問致知在格物何謂也曰物者萬物也格者來至也物至之時其心昭昭然辨焉而不應於物者是致知也是知之至也知至故意誠意誠故心正心正故身修身脩而家齊家齊而國理國理而天下平此所以能參天地者也易曰與天地相似故不違智周乎萬物而道濟天下故不過曲成萬物而不遺通乎晝夜之道而知故神無方而易無體一陰一陽之謂道此之謂也曰生為我說中庸曰不出乎前矣曰我未明也敢問何謂天命之謂性曰人生而靜天之性也性者天之命也率性之謂道曰何謂也曰率循也循其源而反其性者道也道也者至誠也至誠天之道也誠者定也不動也循道之謂教曰何謂也曰教也者人之道也擇善而固執之者也循是道而歸其本者明也教也者則可以教天下矣顏子其人也道也者不可須臾離也可離非道也說者曰其心不

可須臾動焉故也動則遠矣非道矣變化無方未始離於不動故也是故君子戒慎乎其所不覩恐懼乎其所弗聞莫見乎隱莫顯乎微故君子慎其獨也說者曰不覩之覩見莫大焉不聞之聞聞莫甚焉其心不動是不覩之覩弗聞之聞也其復之不遠矣故慎其獨慎其獨者守其中也問曰昔之注解中庸者與生之言皆不同何也曰彼以事解我以心通者也曰彼亦通於心乎曰吾不知之曰修之一日則可以至於聖乎曰十年撻之一日止之而求至焉是孟子所謂以一杯水而救一車薪之火也甚哉止而不息必誠誠而不息必明明與誠終歲不違則能終身矣造次必於是顛沛必於是則可以希於至矣故中庸曰誠無息不息則久久則悠遠悠遠則博厚博厚則高明博厚所以載物也高明所以覆物也悠久所以成物也博厚配地高明配天悠久無疆如此者不見而彰不動而變無為而成天地之道可一言而盡也問曰凡人性猶聖人性歟曰桀紂之性猶堯舜之性也其所以不覩其性者嗜欲好惡之所昏也非性之罪

也曰為不善者非性邪曰非也乃情所為也情有善而不善性無善而不善焉孟子曰人無有不善水無有不下夫水搏而躍之可使過顙激而行之可使在山是豈水之性哉其所以導引之者然也人之性皆善其不善亦猶是也問曰堯舜豈不有情邪曰聖人至誠而已矣堯舜之舉十六相非喜也流四凶非怒也中於節而已矣其所以皆中節者設教於天下故也易曰知變化之道者其知神之所為乎中庸曰喜怒哀樂之未發謂之中發而皆中節謂之和中也者

天下之大本也和也者天下之達道也致中和而天地位焉萬物育焉易曰惟深也故能通天下之志惟機也故能成天下之務惟神也故不疾而速不行而至聖人之謂也問曰人之性猶聖人之性嗜欲愛惡之心何因而生也曰情者妄也邪也曰邪與妄則無所因矣妄情滅息本性清明周流六虛所以謂之能復其性也易曰乾道變化各正性命語曰朝聞道夕死可矣能正性命故也問曰情之所昏性即滅也何以謂之猶聖人之性也曰水之性清激而渾之者泥

沙也方其渾也情性豈遂無有邪久而不動泥沙自沈清明之性鑒於天地非自外來也故其渾也性本弗失及其復也性亦不生人之性亦猶水也問曰人之性本皆善而邪情昏焉敢問聖人之情將復為嗜欲所渾乎曰不復渾矣情本邪也妄也邪妄無因人不能復聖人既復其性矣知情之為邪邪既為明所覺矣則無邪邪何由生也伊尹曰天之道以先知覺後知先覺覺後覺者予天民之先覺者也予將以此道覺此民也非予覺之而誰也如將復為嗜欲所渾是為不自覺者也而況能覺後人乎曰敢問死何所之耶曰聖人之所不明書於策者也易曰原始反終故知死生之說精氣為物游魂為變是故知鬼神之情狀斯盡之矣子曰未知生焉知死然則原其始反其終則可以盡其生之道生之道既盡則死之說不學而自通矣此非所急也子脩之不息其自知之吾不可以章章然言非書矣

復性書

唐 李 翱

晝而作夕而休者凡人也作乎非作者也與物皆作
休乎非休者也與物皆休吾則不類於凡人晝無所
作夕無所休作非吾作也作有物休非吾休也休有
物作耶休耶二皆離而不存予之所存者終不亡且
離矣人之不力於道也昏不思也天地之間萬物生
焉人之於萬物一物也其所以異於鳥獸蟲魚者豈
非道德之性全乎哉受一氣而成形一為物而一為
人得之甚難也生乎世又非深長之年也以非深長
之年行甚難得之身而不專專於大道肆其心之所
為其所以自異於禽獸蟲魚者無幾矣昏而不思其
昏也終不明矣吾之生二十有九年矣思十九年時
如朝日也思九年時亦如朝日也人之受命其長者
不過七十八十年九十年者則稀矣當百年之時
而眈乎九十年時與吾此日之思於前也遠近其能
相懸耶其又能遠於朝日之時耶然則人之生也雖
享百年若雷電之驚相激也若風之飄颻也可知矣
況千百人而無一及百年之年者哉故吾之終日志

於道德猶懼未及也彼肆其心之所為者獨何人耶

平賦書一篇 並序

唐 李 翱

孔子曰道千乘之國敬事而信節用而愛人使民以時孟子曰欲輕之於堯舜之道大貉小貉也欲重之於堯舜之道大桀小桀也是以什一之道公私皆足人既富然後可以服教化反淳朴古之聖賢未有不善於爲政理人而能先於後代者也故善政者莫大於理人理人者莫大於既富之又教之凡人之情莫不欲富足而惡貧窮四人之苦莫甚於農人麥粟布帛農人之所生也歲大豐農人猶不能足衣食如有水旱之災則農人先受其害有若曰百姓不足君孰與足夫如是百姓之視其長上如仇讐安既不得享其利危又焉肯盡其力自古之所以危亡未有不由此者也人皆知重歛之可以得財而不知輕歛之得財愈多何也重歛則人貧人貧則流者不歸而天下之人不來由是土地雖大有荒而不耕雖耕之而地力有所遺人日益困財日益匱是謂棄天之時遺地之利竭人之財如此者雖欲爲社稷之臣建不朽之功誅暴逆而威四夷徒有其心豈可得耶故輕歛則

人樂其生樂其生則居者不流而流者日來居者不流流者日來則土地無荒桑柘日繁盡力耕之地無餘利人日益富兵日益強四鄰之人歸之如父母雖欲驅而去之其可得邪是以與之安而居則富而可教與之危而守則人皆自固孟軻所謂率其子弟攻其父母自有生人已來未有能濟者也嗚呼仁義之道章章然如大道焉人莫不知之然皆不能行何也見之所未盡而又有嗜欲以害之其自任太多而任人太寡是以有土地者無代無之雖莫不知之然而未有一人能行之而功及於後代者由此道也秦滅古法墮井田而夏殷周之道廢相承滋久不可卒復翱是以取可行於當時者爲平賦書而什一之法存焉庶幾乎有能之者云爾

凡爲天下者祇千里之都爲千里之都者祇百里之州爲百里之州者起於一畝之田五尺謂之步古者六尺爲一步十步謂之畝古者百畝爲一井十畝謂之井古者一井爲一里三百六十步謂之里古者一里爲一井

十歲得粟三千四百五十有六石十里之鄉多人者
不足千六百家鄉之家保公困便勿偷餓歲并入不
足于食量家之口多寡出困與之而勸之蠶以須麥
之升焉及其大豐鄉之正告鄉之人歸公所與之當
戒必精勿濡以內于公困窮人不能歸者與之勿微
于書則歲雖大饑百姓不因于食不死於溝洫不流
而入于他矣人既富樂其生重犯法而易為善教其
父母使之慈教其子弟使之孝教其鄉黨使之敬讓
羸老者得其安幼弱者得其養鰥寡孤獨有不人疾
者皆樂其居屋室相隣煙火相接於百里之內與之
居則樂而有禮與之守則人皆固其業雖強暴之兵
不敢凌自百里之內推而布之千里自千里而被于
四海其孰能當之是故善為政者百姓各自保而親
其君其君雖危亡弗可得也其在詩曰迨天之未陰
雨徹彼桑土綢繆有戶令女下民或敢予侮此之謂
也

去佛齋

唐 李 翱

佛法之染流於中國也六百餘年矣始于漢浸淫于
魏晉宋之間而瀾漫於梁蕭代遵奉之以及于茲蓋
後漢氏無辨而排之者遂使戎狄之術行于中華故
吉凶之禮謬亂其不盡於戎禮也無幾矣且楊氏之
述喪儀豈不以禮法遷壞衣冠士大夫與庶人委巷
無別為是而欲糾之以禮者邪是宜合于禮者存諸
愆于禮者辨而去之安得專己心而言也苟懼時俗
之怒已耶則楊氏之儀據于古而拂于俗者多矣置
而勿言則猶可也既論之而書以為儀捨聖人之道
則禍流于將來也無窮矣佛法之所言者列禦寇莊
周言所詳矣其餘則皆戎狄之道也使佛生于中國
則其為作也必異於是况驅中國之人舉行其術也
君臣父子夫婦兄弟朋友存有所養死有所歸生物
有道費之有節自伏羲至于仲尼雖百代聖人不能
革也故可使天下舉而行之無弊者此聖人之道所
謂君臣父子夫婦兄弟朋友而養之以道德仁義之
謂也惠力不足而已向使天下之人力足盡脩身毒

國之術六七十歲之後雖享百年者亦盡矣天行乎
上地載乎下其所以生育於其間者畜獸禽鳥魚鼈
蛇龍之類而止爾況必不可使舉而行之者耶夫不
可使天下舉而行之者則非聖人之道也故其徒也
不蠶而衣裳具弗耨而飲食充安居不作後物以養
己者至於幾千百萬人推是而凍餒者幾何人可知
矣於是築樓殿宮閣以事之飾土木銅鐵以形之髡
良人男女以居之雖璇室象廊傾宮鹿臺章華阿房
弗如也是豈不出于百姓之財力與昔者禹之治水
害也三過其門而不入手胼足胝鑿九河疏濟洛導
漢汝決淮江而入于海人之弗爲蛟龍食也禹實使
然德爲聖人功攘大禍立爲天子而傳曰菲飲食惡
衣服卑宮室土階高三尺其異於彼也如是此昭昭
然其大者也詳而言之其可窮乎故惑之者溺於其
教而排之者不知其心雖辨而當不能使其徒無譁
而勸來者故使其術若彼之熾也有位者信吾說而
誘之其君子可以理服其小人可以令禁其俗之化
也弗難矣然則不知其心無害爲君子而溺於其教

者以商瞿之風而變乎諸華禍之大者也其不爲戎
也幸矣昔者司士賁告於子游曰請襲於床子游曰
諾縣子聞之曰汰哉叔氏專以禮許人人之襲於床
禮之細者也猶不可況舉身毒之術亂聖人之禮而
欲以傳於後乎

論業

唐 皇甫湜

自六經子史至于近代之作無不備詳當朝之作則燕公悉以評之自燕公已降世爲子論之燕公之文如榘木榘枝締構大厦上棟下宇孕育氣象可以變陰陽閱寒暑坐天子而朝群后許公之文如應鐘鼗鼓笙簧鐸磬崇牙樹羽考以宮懸可以奉神明享宗廟李北海之文如赤羽白甲延亘平野如雲如風有經有虎闐然鼓之吁可畏也賈常侍之文如高冠華簪曳裾鳴玉立於廊廟非法不言可以望爲羽儀資以道義李員外之文則如金輦玉輦雕龍綵鳳外雖丹青可掬內亦體骨不饑孤獨尚書之文如危峰絕壁穿倚霄漢長松怪石傾倒溪壑然而略無和暢雅德者避之楊岷州之文如長橋新構鐵騎夜渡雄震威勵動心駭耳然而鼓作多容君子所慎權文公之文如朱門大第而氣勢橫敞廊廡廩廩戶牖悉同然不能有新規勝槩令人踈觀韓吏部之文如長江千里一道衝飈迅浪瀚流不滯然而施于灌漑或真于用李襄陽之文如燕市夜鴻華亭曉鶴嘹唳亦足警

聽然而才力倍鮮悠然高遠故友沈諫議之文則準擊鷹揚滅沒空碧崇蘭繁榮英揚挺雖迅舉秀擢而能沛艾絕景其他握珠璣奮組繡者不可一二而紀矣

悲汝南子桑

唐 皇甫湜

汝南周子桑治詩通春秋非仁義不動年二十三貞
元十九年如京師將舉五經秋及陝見無詔東還冬
及宋閏月丁亥而死夫天寒大雪火不星前續不銖
身寒之穀與將死之聲黎然其具書存乎側其所行
存其側友人安定皇甫湜適至見之而哀之爲文悲
之

渾沌無端誰開闢之善惡未形誰分白之善其福之
惡其禍之謂善之福夷死何餓謂惡之禍跖死何肥
何閻閻之死金玉其墓何黔婁之死手足不覆孰主
張其事而顛倒其數天且高地且遼鬼神之神幽敢
問何誣哉招曰來吾語汝天有正理地有坦途精者
常不足麓者常有餘常豐不足常枯子乃惑之
一何愚人事著矣指物以復子何聖者千年而愚者
如麻鳳凰不一而鵠鴉滿家何草木不芝盡野而莎
何蟲不龍盡水而蝦非精者理少而麓者理多蘭萎
何先苑老何難玉何為而脆石何故而頑衣冠何感
戎狄何蕃何麟而怪何鶴而軒彼父邪母邪天兮人

今已焉哉謂之何哉

學解嘲對書

唐 沈亞之

客有以今廩食之不充漕輓不勝於弊是勞遠而情
近以為問者余於是發憤數日故縷言而對曰昔漢
徙山東豪富兼并之家以奉園邑凡百二十四萬戶
又有南北東西軍及匈奴雜酋以國衆來歸者仰給
於漢未聞膏俟漕輓於吳越而後給也今以三十千
人食勞輸江淮歲貢三十萬斛迎流陵險覆舡敗輓
不得十半自渭以東督稽之官凡四十七署署吏不
下數百歲費錢千萬為大數而部吏舟傭相踰為姦
鞭撻流血酸苦之聲相聞禁錮連歲不解歲千餘人
雖赦宥而獄死者不可勝多矣甚非聖人之所以牧
人也乃者燕人叛元宗南巡已蜀肅宗勞兵於靈武
及二駕神遊代宗臨陝關中流離羸牛一糶當市錢
二百千故有轉輸之法雖救一時然終轉入於禍誠
可以痛今雖未可暴去宜以三輔粟為貢重資於農
則耕稼自勤耕稼自勤則旬服無曠土游人矣如此
九年之蓄可以儲又何勞輸輓於遠哉客曰敬聞其
旨

罪言

唐 杜牧

國家大事某不當言實言之有罪故以云生人常病
兵兵祖於山東允於天下不得山東兵不可死山東
之地禹畫九土一曰冀州舜以其分野太大離為幽
州為并州程其水土與河南等常重十一二故其人
沈鷺多材力重許可能辛苦自魏晉已下徹浮羨淫
工機纖雜意態百出俗益卑弊人益脆弱唯山東敦
五種本兵矢他不能蕩而自若也復產健馬下者日
馳二百里所以兵常當天天下冀州以其恃強不循理
異其必破弱雖已破異其復強大也并州力足以并
吞也幽州陰慘殺也故聖人因其風俗以為之名黃
帝時蚩尤為兵階阪泉今
鴻州縣自後帝王多居其地豈尚
其俗都之耶自周劣齊霸不一世晉大常傭役諸侯
至秦萃三晉經六世乃能得韓遂折天下脊復得趙
因拾取諸國秦末韓信聯齊有之故蒯通知漢楚輕
重在信光武始於上谷成於鄧魏武舉官渡三分天
下有其二晉亂 作至宋武號為英雄得蜀得關中
盡得河南地十分天下有八然不能使一人渡河以

窺 至于高齊荒蕩宇文取得隋文因以滅陳五百年間天下乃一家隋文非宋武敵也是宋不得山東隋得山東故隋為王宋為霸由此言之山東王者不得不可為王霸者不得不可為霸猾賊得之是以致天下不安國家天寶末燕盜徐起出入成阜函潼間若涉無人地郭李輩常以兵五十萬不能過鄴自爾一百餘城天下力盡不得尺寸人望之若迴鶻吐蕃義無有敢窺者國家因之畦河修障戍塞其術蹊齊魯梁蔡被其風流因亦以為寇以裡拓表以表撐裏

混源迴轉顛倒橫斜未嘗五年間不戰生人日頻委四裔日昌熾天子因之幸陝幸漢中焦焦然七十餘年矣嗚呼運遭孝武澣衣一肉不畋不樂自早冗中援取將相凡十三年乃能盡得河南山西地洗削更革罔不順適唯山東不服亦嘗再攻之皆不利以返豈天使生人未至於帖泰耶豈其人謀未至耶何其艱哉何其艱哉今日天子聖明超出古昔志於理平若欲悉使生人無事其要在先去兵不得山東兵不可去是兵殺人無有已也今者上策莫如自治何者

當貞元時山東有燕趙魏叛河南有齊蔡叛梁徐陳汝白馬津盟津襄鄧安黃壽春皆戍厚兵凡此十餘所總足自護治所實不輟一人以他使遂使我力解勢弛勢視不軌者無可奈何階此蜀亦叛吳亦叛其他未叛者皆逆時上下不可保信自元和初至今二十九年間得蜀得吳得蔡得齊凡收郡縣二百餘城所未能得唯山東百城耳土地人戶財物甲兵校之往年豈不綽綽乎亦足自以為治也法令制度品式條章果自治乎賢才奸惡搜選置捨果自治乎障戍鎮守千戈車馬果自治乎井閭阡陌倉廩財賦果自治乎如不果自治是助國為虐環土三千里植根七十年復有天下陰為之助則安可以取故曰上策莫如自治中策莫如取魏魏於山東最重於河南亦最重何者魏在山東以其能遮趙也既不可越魏以取趙固不可越趙以取燕是燕趙常取重於魏魏常操燕趙之性命也故魏在山東最重黎陽距白馬津三十里新鄉距盟津一百五十里黎陽新鄉並屬衛州障壘相望朝駕暮戰是二津函能潰一則馳入成皋不數日間

故魏於河南間亦最重今者願以逆事明之元和中
纂天下兵誅蔡誅齊頊之五年無山東憂者以能得
魏也田宏正昨日誅滄頊之三年無山東憂者亦以
能得魏也田憲誠長慶初誅趙一日五諸侯兵四出
潰解以失魏也田布昨日誅趙一日罷如長慶時亦
以失魏也李德裕故河南山東之輕重常懸在魏明白
可知也非魏強大能致如此地形使然也故曰取魏
為中策最下策為浪戰不計地勢不審攻守是也兵
多粟多敵人使戰者便於守兵少粟少人不敵自戰
者便於戰故我常失於戰而常困於守山東之人叛
且三五世矣今之後生所見言語舉止無非叛也以
為事理正當如此沈酣入骨髓無以為非者指示順
向詆侵族屬語曰叛去首首起矣至於有圍急食盡
餓屍以戰以此為俗豈可與決一勝一負哉自十餘
年來凡三收趙食盡且下堯山敗都尚趙復振下博敗
杜趙復振館陶敗李趙復振故不計地勢不審攻守
為浪戰最下策也

孫氏西齋錄

唐 孫 樵

孫樵謂陸長源唐春秋乃編年雜錄因撥其體切峭
獨可以示懲勸者擲其叢冗禿屑不足以警訓者自
為十八通書號孫氏西齋錄起高祖之初洎武皇之
終首廟號以表元首日月以表事尚功力正刑名登
崇善良蕩戮凶回有所顧避則微文示譏無所顧慄
則直書志惡所謂高祖殺太子建成者何黜功循愛
譏失教也太宗有大功宜嗣有天下高祖不當立建成
祖李勣立皇后武氏者何忘諫贊惡徵廢命也勣李
建成為顧命大臣倘堅諫不奪高宗不殺起皇后已廢之
立武氏為后故書李勣立皇后武氏起皇后已廢之
魂上配天皇者何登嫔嫔家不可為順子懼後世疑
於禘祫也高宗廢王后立武后乃貞觀侍女何以列
禘祫條天后擅政之年下繫中宗者何紫色閭位不
可謂正子懼後世牽以稱臨也天后改元即真令悉
繫于中宗示女子崔蔡賊殺中書令裴名北武者何
不得改元者政也裴蔡賊殺中書令裴名北武者何
詭設梯亂肇殺機也裴為顧命大臣屢白天后歸政
于都亭驛故書曰崔蔡賊殺中書令裴張守珪以安
稜山叛者何貸刑佛敕稔禍階也稜山乃張守珪部

令守珪案之守珪不從卒使亂天下稱天下殺者何
故書殺守珪以安祿山叛他皆然此
罪暴天下示衆與殺也稱天子殺者何死非其罪示
衆不與殺也臣或不書卒者何不以直終去卒以示
貶也君或不書葬者何不以正終去葬以示譏也懼
怠去瑞示戒志洽尚德必書賤尸位則黜貴皆所以
改邪合正俾歸大義按前所謂起王后配天皇條天
后并號行事繫于中宗之類是
也操實寘例以示懲勸前所謂李勣立皇后武氏
殺守珪以祿山叛之類是嗚
呼宰相升沉人於十數年間史官出沒人于千百歲
後是史官與宰相分挈死生權也若夫史官者不能
忤直骨於枯墳鬱詭於下泉磨亮顯札叢閣飽帙
豈國家任史官意耶樵既序其略授其友高錫望傳
之矣

武皇遺劒錄

唐 孫 樵

武皇帝得利劒於希夷之間提攜六年而四用之宜
其庶績暉如哉往者北戎猖狂渝盟盜壇大出函門
戍卒屢奔武皇赫然奮雷霆之威驅魏武之師靖邊
塵於塞垣復帝子於函庭非武皇一用其劒耶賊鎮
阻兵邀壽山東劫衆以濟其奸聲險以行其誅王師
萃之屢戰無功兵衄將稽賊勢益張并醜乘之遂萌
梟心乃劫吾兵乃固吾城反書既聞卒愕京師輿人
謠曰上宜亟以節假之且赦其辜俾守北門以代商
謀不然并且東連潞兵北合戎師分卒以趨太行卷
甲以下河東國家其能甘心於潞寇耶武皇曾不逗
撓於其衷亟發武符按言誅之羽檄朝馳夕擒并頑
非武皇再用其劒耶弁部既平潞守益監王師告勞國
用告虛內外咨嗟訛言沸騰言上聞上為不聞誅潞
之心益牢責戰之詔日嚴卒能克大慙於山東梟渠
魁于國門非武皇三用其劒耶浮屠之流其來綿綿
根盤蔓滋日熾而昌熹于民心驚于民生力屈財殫
民恬不知武皇始議除之女泣于閨男號于途廷臣

辨之于朝褻臣爭之于旁羣疑膠牢萬口一辭武皇
曾不待疑卒詔有司驅羣髡而髮之毀其居而田之
其徒既微其教僅存民瘼其瘳國用有加風雨以時
災沴不生非武皇四用其劔耶今者嗣皇帝纂武皇之
耿光傳武皇之遺劔宜乎銛其鐔不使其挫寶其刃
不使其沉而又礪之以義淬之以智匣之以禮苞之
以仁持之以信與天下經始天下幸甚

喻古之治

唐 盧 碩

軒昊之代君為心兆民為百骸堯舜之道君為目兆
民為物三代之時君為醫兆民為疾五伯之治君為
工兆民為材二漢之時君為隄兆民為水夫心治則
百骸從視明則衆物露醫善診則疾不彌漸工善度
則木無棄材故委心乃無為軒昊之治自治也任目
必有待堯舜之治求治也醫不全則生死危三代之
治存乎仁工不審則曲直乖五伯之治資於智迫斯
已降民為水矣政為隄矣隄之不完水漂邑矣寢乎
曹馬乃成壞衰焉噉民不可使為水水而隄之困矣
然則軒昊誠堯舜明三代仁五伯智二漢法禁人之
叛也禁之以致君為敵兆民有寇讐焉

漢武山呼

唐 羅 隱

人之性未有生而侈縱者苟非其正則人能壞之事
能壞之物能壞之惟貴賤則殊及其壞一也前後左
右之說倭者人壞之也窮游極觀者事壞之也發於
惑寤者物壞之也是三者有一於是則為國之大蠹
孝武承富庶之後聽左右之說窮游觀之靡乃東封
焉蓋以祈其身而不祈其歲時也由是萬歲之聲發
於惑寤然後踰遼越海勞師弊俗以至於百姓困窮
者東山萬歲之聲也以一山之聲猶若是況千口萬
舌乎是以東封之呼不得以為祥而為英主之不幸

諛國

沈 顏

知倭之諛諛忠不知倭之諛國故人君弗為意也且
曰彼誠倭耶予不過黜一臣彼誠忠耶予不過黜一
臣予授天命有天下豈少若人乎柰何拂予心而不
知寵一倭而百倭進黜一忠而百忠退矧忠者寡而
倭者衆乎是以宰嚭諛子胥而吳滅趙高諛李斯而
秦亡無極諛伍奢而楚昭奔靳尚諛屈原而楚懷囚
故曰知倭之諛諛忠不知倭之諛諛國悲夫

責荀

宋賈同

荀況死舊矣其言存於書亦聖人仁義禮樂之談也然其作非十二子篇則它篇魏牟首陳仲史鮑次墨翟宋鉏又次之慎到田駢又次之惡施鄧析又次之而子思孟軻亦末其數為十二焉而各序其道於下謂子思孟軻則曰略法先生而不知其統然而才劇志大聞見雜博案往舊造說謂之五行甚僻違而無類幽隱而無說閉約而不解案飾其辭而祇敬之曰此先君子之言也子思唱之孟軻和之世俗之講師瞽儒唯唯然不知其所以非也遂受而傳之以為仲尼子游為滋厚于後世是則子思孟軻之罪也又序其後以為道之正者曰仲尼子弓之義以務息十二子之說如是而天下之害除仁人之事畢矣其處子思孟軻也何如是之無謂乎今禮記中庸之篇存者子思之述也今孟子十四篇者孟軻之述也其言道則孔氏而下未有似之者也今以荀之書比之而又出其後則庶幾學之未能似之微得其具體矣故唐韓愈但儕之揚子雲而已今反其若是吾甚見其無謂

也又上十二子為六偶者咸君道而言之也則子弓者亦道均于仲尼乎豈有聖人如仲尼而獨言不垂於後世事不顯于當時乎何仲尼之徒未嘗稱之而泯滅若是乎此又甚無謂也且夫仲尼之道孟軻學而行之吾謂未有能出之者也而荀亦以學仲尼之道而反以孟比十子為十二而復云云此所謂是堯而非舜者也苟非舜則堯亦未足信矣而曰仲尼子弓者吾不知子弓者何如人也而荀謂仲尼者何如人也噫吾觀此是吾不信荀也故作責荀以示來者

禁焚死

宋 賈 同

傳曰孝子事死如事生又曰父母全而生之子全而歸之不亦孝乎父母既沒歛手足形旋葬慎護戒潔奉屍如生斯之謂事死身體髮膚無有毀傷以沒於地斯之謂歸全古今達禮也夫生而或毀傷之雖不仁猶有為也死而後毀傷之則其不仁不亦甚矣故曰君子慎終此之謂歟噫今之多焚其死者何哉禮曰新宮火有焚其先人之弊廬三日哭夫宮廟之與廬舍猶然況自執火而焚其屍者乎惡不容于誅矣

謂縱不仁之子棄其屍于中野使烏鳶狐狸食之不猶愈于自殘之者歟閭閻既以為俗而漸染于士大夫之家亦多為之或以守職徼遠死于千里之外而不肖子孫不能護全其喪以歸柩于先祖之塋域故焚之以苟其便易嗚呼先王制禮士大夫奉以立身推以化民如之何苟其便而棄之也豈獨棄禮哉抑亦舉其親而棄之也設不幸道遠而貧未能奉而歸買地而葬之廬而守之俟其近也負骨而歸不亦可乎又或者以惡疾而死俗云有種慮染其後者而

焚之斯則既不仁矣又惑之甚者也脩短有命疾病生乎身豈有例哉如云先世積殃遺子孫剽雖焚之無益也根其由蓋始自桑門之教西域之俗也夫聖王御世制禮作樂布決仁義使天下密如四裔嚮化如之何使商俗之法敗先王之禮經邪教天下以不仁邪請禁

儒辱

宋 孫 復

禮曰四郊多壘此卿大夫之辱也地廣大荒而不治此亦士之辱也噫卿大夫以四郊多壘為辱士以地廣大荒而不治為辱然則仁義不行禮樂不作儒者之辱歟夫仁義禮樂治世之本也王道之所由興人倫之所由正捨其本則何所治哉噫儒者之辱始於戰國楊朱墨翟亂之於前申不害韓非雜之於後漢魏而下則又甚焉佛老之徒橫乎中國彼以死生禍福虛無報應為事千萬其端始我生民絕滅仁義以

塞天下之耳屏棄禮樂以塗天下之目天下之人愚衆賢寡懼其死生禍福報應人之若彼也莫不爭奉而競趨之觀其相與為羣紛紛擾擾周乎天下於是其教與儒齊驅並駕峙而為三吁可怪也且夫君臣父子夫婦人倫之大端也彼則去君臣之禮絕父子之親滅夫婦之義以之為國則亂矣以之使人則詐矣儒者不以仁義禮樂為心則已若以為心則得不鳴鼓而攻之乎凡今之人與人爭詈少有眚不勝則尚以為辱矧彼以商翟諸子之法亂我聖人之

教耶其為辱也大哉噫聖賢不生怪亂不平故楊墨起而孟子聞之申韓出而楊雄矩之佛老盛而韓文公排之微三子則天下之人胥而為商翟矣惜夫三子道有餘而志不克就力足去而用不克施若使其志克就其用克施則芟夷蘊崇絕其根本矣嗚呼後之章甫其冠縫掖其衣不知其辱而反從而尊之者多矣得不為罪人乎由漢魏而下迨於茲千餘歲其源流既深其本既固不得其位不剪其類其將奈何其將奈何故作儒辱

同學一首別子固

宋 王安石

江之南有賢人焉字子固非今所謂賢人者予慕而友之淮之南有賢人焉字正之非今所謂賢人者予慕而友之二賢人者足未嘗相遇也口未嘗相語也解幣未嘗相接也其師若友豈盡同哉予考其言行不相似者何其少也曰學聖人而已矣學聖人則其師若友必學聖人者聖人之言行豈有二哉其相似也適然予在淮南為正之道子固不予疑也還江南為子固道正之子固亦以為然予又知所謂賢人者既相似又相信不疑也子固作懷友一首遺予其大略欲相扳以至乎中庸而後已正之蓋亦嘗云爾夫安驅徐行轡中庸之廷而造於堂舍二賢人者而誰哉予昔非敢自必其有至也亦願從事於左右焉爾輔而進之其可也噫官有守私有繫會合不可以常也作同學一首別子固以相警且相慰云

訓儉示廉

宋 司馬光

吾本寒家世以清白相承吾性不喜華麗自為乳兒長者加以金銀華美之服輒羞棄去之二十忝科名聞喜宴獨不戴花同年曰君賜不可違也乃簪一花平生衣取蔽寒食取充腹亦不敢服垢弊以矯俗干名但順吾性而已眾人皆以奢靡為榮吾心獨以儉素為美人皆嗤吾固陋吾不以為病應之曰孔子稱與其不遜也寧固又曰以約失之者鮮矣又曰士志於道而恥惡衣惡食者未足與議也古人以儉為美德今人乃以儉相詬病嘻異哉近歲風俗尤為侈靡走卒類士服農夫蹕絲履吾記天聖中先公為郡牧判官客至未嘗不置酒或三行五行多不過七行酒酤於市果止於梨栗棗柿之類肴止於脯醢菜羹罷用瓷漆當時士大夫家皆然人不相非也會數而禮勤物薄而情厚近日士大夫家酒非內法果有非遠方珍異食非多品器皿非滿按不敢會賓友常數月營聚然後敢發書苟或不然人爭非之以為鄙吝故不隨俗靡者蓋鮮矣嗟乎風俗頹弊如是居位者雖不

能禁忍助之乎又聞昔李文靖公為相治居第於封邱門內聽事前僅容旋馬或言其太隘公笑曰居第當傳子孫此為宰相聽事誠隘為太祝奉禮聽事已寬矣參政魯公為諫官真宗遣使急召之得於酒家既入問其所來以實對上曰卿為清望官柰何飲于酒肆對曰臣家貧客至無器皿有果故就酒家觴之上以無隱益重之張文節為相自奉養如為河陽掌書記時所親或規之曰公今受俸不少而自奉若此公雖自信清約外人頗有公孫布被之譏公宜少從衆公歎曰吾今日之俸雖舉家錦衣玉食何患不能顧人之常情由儉入奢易由奢入儉難吾今日之俸豈能常存一旦異於今日家人習奢已久不能頓儉必致失所豈若吾居位去位身存身亡常如一日乎嗚呼大賢之深謀遠慮豈庸人所及哉御孫曰儉德之共也侈惡之大也共同也言有德者皆由儉來也夫儉則寡欲君子寡欲則不後於物可以直道而行小人寡欲則能謹身節用遠罪豐家故曰儉德之共也侈則多欲君子多欲則貪慕富貴枉道速禍小人

多欲則多求妄用敗家喪身是以居官必賄居鄉必盜故曰侈惡之大也昔正考父饁粥以糊口孟僖子知其後必有達人季文子相三君妾不衣帛馬不食粟君子以為忠管仲饁簋朱紘山濞藻稅孔子鄙其小麗公叔文子享衛靈公史鰌知其及禍及成果以富得罪出亡何曾日食萬錢至孫以驕溢傾家石崇以奢靡誇人卒以此死東市近世寇萊公豪侈冠一時然以功業大人莫之非子孫習其家風今多窮困其餘以儉立名以侈自敗者多矣不可徧數聊舉數人以訓汝汝非徒身當服行當以訓汝子孫使知前輩之風俗云

雜識二首

宋 曾 鞏

孫之翰言慶歷中上用杜衍范仲淹富弼韓琦任政事而以歐陽修蔡襄及甫等為諫官欲更張庶事致太平之功仲淹等亦皆戮力自効欲報人主之知然心好同惡異不能瞻然心無適莫甫嘗家居石介過之問介適何許來介言方過富公問富公何為介曰富公以滕宗諒守慶州用公使錢坐法杜公必欲致宗諒重法曰不然則衍不能在此范公則欲薄其罪曰不然則仲淹請去富公欲抵宗諒重法則恐違范

公欲薄其罪則懼違杜公患是不知所決甫曰守道以謂如何介曰介亦竊患之甫廼嘆曰法者人主之操柄今富公患重罪宗諒則違范公薄其罪則違杜公是不知有法也守道平生好議論自謂正直亦安得此言乎因曰甫少而好學自度必難用於世是以退為唐史記以自見而屬為諸公牽挽使備諫公亦嘗與人自謀去就而所與謀者適好進之人遂見誤在此今諸公之言如是甫復何望哉自此凡月餘不能寐慶歷之間任時事者其後余多識之不黨而知

其過如之翰者則一人而已矣廣原州蠻僮智高以其衆叛乘南方無備連邕賓等七州至廣州所至殺吏民縱略東南大駭朝廷遣驍將張忠蔣階馳驛討捕至州皆為智高所摧陷又遣楊略孫沔余靖招撫皆久之無功仁宗憂之遂遣樞密副使狄青為宣撫使率衆擊之翰林學士曾公亮問青所以為方略者青初不肯言公亮固問之青廼曰比者軍制不立又自廣州之敗賞罰不明今當立軍制明賞罰而已然恐聞青來以謂所遣者官重勢必不得見之公亮又問賊之標牌殆不可當如何青曰此易耳標牌步兵也當騎兵則不能施矣初張忠蔣階之往率皆自京師六七日馳至廣州未嘗拊士卒立行伍一旦見賊則疾驅使戰又偕等所居不知為營衛故士卒見敵皆望風退卒而忠臨偕居方卧帳中為賊所圍楊略余靖又所為紛亂不能自振而孫沔大受請托所與行者廼未從道鄭紆歐陽乾曜之徒皆陰薄無賴欲有所避免要求沔引之自從遠近莫不嗟異既至潭州沔遂稱疾觀望不敢進青之受命有因貴望求從

青行者青延見謂之曰君欲從青行此青之所求也
何必因人言乎然智高小寇至遣青行可以知事急
矣從青之士能擊賊有功朝廷有厚賞青不敢不為
之請也若往而不能擊賊則軍中法重不敢私也君
其思之願行則即奏取君矣非獨君也君之親戚交
遊之士幸皆以青之此言告之苟欲行者皆青之所
求也於是聞者大駭無復敢言求從青行者其所辟
取皆青之素所與以為可用者人望固已歸之矣及
行率衆日不過一驛所至州輒休士一日至潭州遂
立行伍明約束軍行止皆成行列至於荷鍤贏糧持
守禦之備皆有區處軍人有奔逆旅菜一把者立斬
之以徇於是一軍肅然無敢出聲氣萬餘人行未嘗
聞鼓每青至郵驛四面嚴兵每門皆諸司使二人守
之無一人得妄出入而求見青者無不即時得通其
野宿皆成營柵青所居四面陳鼓弓弩皆數重所將
精銳列布左右守衛甚嚴方青之未至諸將屢走皆
以為常至是知桂州崇儀使陳知英州供備庫使蘇
緘與賊戰復敗走如常時青至賓州悉召陳與裨校

凡三十二人數其罪按軍法斬之惟蘇緘在某所使
械繫上聞於是軍中人人奮勵有死戰之心是時智
高還守邕州青思崑崙關險阨為所據乃下令賓州
具五日糧休士卒賊謀知不為備是夜大風雨青率
衆半夜時度崑崙關既度喜曰賊不知守此無能為
也彼謂夜半風雨時吾不敢來吾來所以出其不意
也已近邕州賊方覺逆於歸仁廟青登高望之賊據
坡上我軍薄之裨將孫節中流矢死青急麾軍進人
人皆殊死戰先是青已縱蕃落馬軍二千人出賊後
至是前後合擊賊之標牌軍為馬軍所衝突皆不能
駐軍士又從馬上以鐵連加擊之逆皆披靡相枕籍
遂大敗智高果焚城遁去青先為公亮言立軍制明
賞罰不可得見標牌不能當騎兵皆如其所料青坐
堂戶上以論數千里之外辭約而慮明雖古之名將
何以加此豈特一時武人崛起者乎方慶歷中葛懷
敏與李元昊戰於廣川懷敏敗死而諸校與士卒既
敗多竄山谷問是時以權宜招納皆許不死自此軍
多棄其將不肯死戰故青云自廣川之敗賞罰不行

云翰林學士蔡襄亦言聞於青者如此

記客言

宋王向

客有語西師者道劉平石元孫敗時事初起鄜延兵十萬人吐谷坂欲與賊遇乃戰戰時昏矣賊多解馬休勁兵驅老弱對敵士卒得利人人出死力與戰投夜且息更三起聞會明老弱略盡士卒爭獲遇悉已疲番軍始徐鼓起士揭新旗乘高處呼漢兵未聞軍士氣失金鼓皆不敢鳴賊稍出馬馳略陣上調呼射軍中軍人多死此時特劉石軍也前此分萬餘人屬監軍黃德和使屯西坡且以張嚮背為游聲動賊幾得相應援去事已急念引去賊必乘之恐逼險不利不如合軍決死幸有所完兩將方議未熟都監郭應起曰太尉決出此謀應願得善馬走德和軍招與俱來語未已平按之曰始議固在舍人呼軍吏出騎百人從去應曰得百人不不足為護徒自露耳彼知吾呼旁軍必出馬遮去路矣不如獨去便平曰獸去當易即有險欲誰倚邪應曰借覆發得百人何可倚者請立表候日按午不來應死也太尉毋相遲乃下令軍中皆完陣自固敢妄發一箭入敵師斬應從軍皆出行

十里許至德和軍聞應來白開壁欲內德和不肯促
開壁使卒將隔壁門問曰聞太尉已戰舍人宜身
行陣反西來欲西背與賊邪應收馬立陣外呼將卒
前與語傳太尉令如此如此卒將還白之德和愕曰
審如舍人語取符驗來應曰應為軍都監得親與議
使應來正為信耳安須符太尉分軍時有符約耶曰
無雖然吾專一軍來繫屬重其輕去就必得一事可
按乃去應解索度德和畏避本不在符曰執應縛軍
中見太尉一言不如令死此可無疑德和固怯聞敵
大殊不敢去應連促數數度無以拒詎應曰天子取
舍人勇當萬夫欲以備敵破堅使也顧乃受一騎任
使欲避兵自完如何軍歸必以秦促先自去報太尉
比軍隨至矣第戰無留待也應不敢止復馳還白德
和語平等信以為德和審來即鼓起士戰連三北德
和軍竟不來應獨出入行間軍稍却即覆馬以殿持
大鐵稍橫突之所當盡死呼入敵軍軍不敢視我師
將整而止當其軍北時賊使人持大索立高處迎應
下馬下輒為應所斷終不能得應因縱應深入鼓其

劒曰急追漢兵留十餘弩連射應馬死步下行殺
數人欲歸軍取馬軍已亂不得入乃脫身亡去士卒
死者什八兩太尉失軍不還邊大警承受者馳二十
驛比三晝夜至京師以聞已而賊遂收去敗兵散亡
十餘日稍稍出邊旁諸郡負傷被創不及四萬獨德
和一軍完天子使吏治德和以法死天子思平等失
援不救人人力死哀之下詔曰邊鄙有事卿大夫為
朕率身戎行朕以不明信任失職使中人監軍卒敗
邊事朕惟一二將帥失身鼓輦終無慰朕西顧惻惻
之念其贈將佐已下官七遷若子若孫聽以父兄任
為右職云郭應之亡也走東原伏大崖下士卒十餘
輩與俱各解甲吮傷使一人下崖取雪手搗食之息
樹旁良久望見敗馬行自取之棄士卒馳去促後卒
皆呼曰舍人捨我徒邪應愈促馬顧謂趨還州來應
及環州自以失主將疑未敢見既而聞黃德和新已
從坐死者封遂匿山中而時時出部落乞食而子弟
緣應故多得官任違事王氏曰吾久聞郭應死客獨
引延州卒言實以語人人固不謂信然石元孫敗時

而固已傳死前年賊歸元孫而元孫竟不死應其可知耶

日喻

宋 蘇軾

生而眇者不識日問之有目者或告之曰日之狀如銅槃扣槃而得其聲他日聞鐘以為日也或告之曰日之光如燭捫燭而得其形他日揣籥以為日也日之與鐘籥亦遠矣而眇者不知其異以其未嘗見而求之入也道之難見也甚於日而入人之未達也無以異於眇達者告之雖有巧譬善導亦無以過於槃與燭也自槃而之鐘自燭而之籥轉而相之豈有既乎故世之言道者或即其所見而名之或莫之見而意之皆求道之過也然則道卒不可求歟蘓子曰道可致而不可求何謂致孫武曰善戰者致人不致於人孔子曰百工居肆以成其事君子學以致其道莫之求而自至斯以為致也歟南方多沒人日與水居也七歲而能涉十歲而能浮十五而能沒矣夫沒者豈苟然哉必將有得於水之道者日與水居則十五而得其道生不識水則雖壯見舟而畏之故北方之勇者問於沒人而求其所以沒以其言試之河未有不溺者也故凡不學而務求道皆北方之學沒者也昔

者以聲律取士士雜學而不志於道今也以經術取士士知求道而不務學渤海吳君彥律有志於學者也方求舉於禮部作日喻以告之

送于級失官東歸

宋 蘇軾

世俗之患患在悲樂不以其正非不以其正其所取以為正者非也請借子以明其正子之失官有為子悲如子之自悲者乎有如子之父兄妻子之為子悲者乎子之所以悲者惑於得也父兄妻子之所以悲者惑於愛也惟不與於已者則不惑亦不悲夫惑則悲不惑則不悲人宜以惑者為正歟抑將以不惑者為正歟以不惑者為正則不悲者正也然子亦有所樂者曰吾之取以為吾者豈以是哉雖失是其所以為吾者猶存而吾猶可樂焉已而不樂又從而悲之則亦不忍夫天下之凡愛我者之悲而不釋夫天下之凡惡我者之喜也夫愛我而悲惡我而喜是知我之粗也樂其所以為吾者存是自知之深也人不以自知之深為正而以知我之粗者為正是得為正也歟故吾願為子言其正子將終身樂而不悲詩云優哉游哉聊以卒歲

問養生

宋 蘇 軾

余問養生於吳子得二言焉曰和曰安何謂和曰子不見天地之為寒暑乎寒暑之極至於折膠流金而物不以為病其變者微也寒暑之變晝與日俱逝夜與月並馳俯仰之間屢變而人不知者微之至和之之極也使此二極者相尋而狎至則人之死久矣何謂安曰吾嘗自牢山浮海達於淮過大風焉舟中之人如附於桔槔而與之上下如蹈車輪而行反逆眩亂不可止而吾飲食起居如他日吾非有異術也惟莫與之爭而聽其所為故凡病我者舉非物也食中有蛆人之見者必嘔也其不見而食者未嘗嘔也請察其所從生論八珍者必嘔言蕪穢者必唾二者未嘗與我接也唾與嘔何從生哉果生於物乎果生於我乎知其生於我也則雖與之接而不變安之至也安則物之感我者輕和則我之應物者順外輕內順而生理備矣吳子古之靜者也其觀於物也密矣是以私識其言而時省觀焉

太息送秦少章

宋 蘇 軾

孔北海與曹公論盛孝章云孝章實丈夫之雄者也游談之士依以成聲今之少年喜謗前輩或譏評孝章孝章要為有天下重名九牧之人所共稱歎吾讀至此未嘗不廢書太息也曰嗟乎英偉奇逸之士不容於世俗也久矣雖然自今觀之孔北海盛孝章猶在世而向之譏評者與草木同腐矣昔吾舉進士試於禮部歐陽文忠公見吾文曰此我輩人也吾當避之方是時士以剽裂為文聚而見訕且訕公者所在成市曾未數年忽焉若潦水之歸壑無復見一人者此豈復待後世哉今吾衰老廢學自視缺然而天下士不吾棄以為可以與於斯文者猶以文忠公之故也張文潛秦少游此兩人者士之超逸絕塵者也非獨吾云爾二三子亦自以為莫及也士駭於所未聞不能無異同故紛紛之言常及吾與二子吾策之審矣士如良金美玉市有定價豈可以愛憎口舌貴賤之歟少游之弟少章復從吾游不及朞年而論議日新若將施於用者欲歸省其親且不忍去嗚呼子行

矣歸而求諸兄吾何如焉作太息一篇以餞其行使
藏於家三年然後出之

論文

宋 蘇軾

吾文如萬斛泉源不擇地皆可出在平地滔滔汨汨
雖一日千里無難及其與石山曲折隨物賦形而不
可知也所可知者常行於所當行常止於不可不止
如是而已矣其他雖吾亦不能知也

醉中書

宋 蘇 軾

文章至東漢始陵夷至晉宋間句為一段字作一處其源出於崔蔡史載文姬兩詩特為俊偉非猷為婦人之奇乃伯喈所不逮也

求醫診脉

宋 蘇 軾

脉之難明古今所病也至虛有實候而太實有羸狀差之毫釐疑似之間便有死生禍福此古今所病也病不可不謁醫而醫之明脉者天下盖一二數騏驎不時有天下未嘗徒行和扁不世出病者終不徒死亦因其長而護其短耳士大夫多秘所患而求診以驗醫之能否使索病於冥漠之中辨虛實冷熱於疑似之間醫不幸而失終不肯自謂失也則巧飾遂非以全其非至於不救則曰是固難治也間有謹愿者雖或因主人之言亦復參以所見兩存而雜治以故藥不效此世之通患而莫之悟也吾平生求醫蓋於平時默驗其工拙至於有疾而求療必先盡告以所患而後求診使醫者了然知患之所在也然後求之診虛實冷熱先定於中則脉之疑似不能惑也故雖中醫治吾疾嘗愈吾求疾愈而已豈以困醫為事哉

記故人病

宋 蘇 軾

元豐六年十月十二日夜一鼓後故人有得風疾者
急往視之已不能言矣死生陰陽之爭其苦有甚於
刀踞木索者予知其不可救默為祈死而已嗚呼哀
哉此復何罪乎酒色之娛而已古人云甘嗜毒藥戲
猛獸之爪牙豈虛言哉明日見一少年以此戒之少
年笑曰甚矣子言之陋也色固吾之所甚好而死生
疾病非吾之所怖也予曰有行乞於道偃而號曰遺
我一盂飯吾今以千斛之粟報子則市人皆掩口笑
之有千斛之粟而無一盂之飯不可以欺小兒怖生
於愛子能不怖死生而猶好色其可以欺我哉今世
之為高者皆少年之徒也戒生定定生慧此不刊之
語也如有不從戒定生者皆妄也如慧而實痴也如
覺而實夢也悲夫

記先夫人不殘烏雀

宋 蘇 軾

少時所居書堂前有竹柏雜花叢生滿庭衆鳥巢其
上武陽君惡殺生兒童婢僕皆不得捕取鳥雀數年
間皆巢於低枝其鵲可俯而窺之又有桐花鳳四五
日翔集其間此鳥羽毛至為珍異難見而能馴攪殊
不畏人間里間見之以為異事此無他不忤之誠信
於異類也有野老言烏雀巢去人太遠則其子有蛇
鼠狐狸鵲鷺之憂人既不殺則自近人者欲免此患
也由是觀之異時烏雀巢不敢近人者以人為甚於
蛇鼠之類也苛政猛於虎信哉

述醫

宋 龔鼎臣

周官載醫掌養萬人之疾病蓋凡受疾者舉可治也唯父之不治遂革以死未見其有始疾而不可治者也巴楚之地俗信巫鬼實自古而然當五氣相沴或致癘疫之苦率以為天時被是疾非醫藥所能攻故請禱鬼神無少暇雞豚鴨羊之薦惟恐不豐迨其不能則莫不自咎事鬼神之未至或幸而愈乃曰由禱之勤也薦之數也不然烏能與天時抗乎又有治之不平其疾氣之毒日相熏灼一家之人皆至乎病故雖親友之厚百步之外不敢望其門廬以至得病之家懼相遷染子畏其父婦避其夫若富財之人尚得一巫覡守之其窮匱者獨僵卧呻吟一室而已如是則不特絕醫藥之饋其飲食之給蓋亦闕如是以死者未嘗不十八九而民終不悟余嘗訪於人其患非他繇現師之勝醫師耳嗚呼現者豈能必勝諸醫哉其所勝之者蓋世俗之人易以邪惑也夫疾病干諸內神鬼冥諸外良醫所以治內今不務除疾於內而專求外福之來及其甚也其存恤訊問之宜不復相

通不其謬與夫稼茂田疇為螟蟻所害惟能悉除螟蟻則稼之秀可實也家富高貲而盜入其門主人操刃持挺或殺或捕則貲之厚可全也人之身亦然胃陰陽之氣輒遇癘疫當得醫者察穀視色按脉授藥使離諸腹心肝腸然後其體可平若不醫之用芻異不除螟蟻而望稼穡之實不驅盜賊而求家貲之全決不可得矧惟國家重醫藥之書最為事要先朝編緝名方頒布天下郡國其間述時疫之狀實為纖悉及慶歷中范文正公建言俾自京師以達四方學醫之人皆聚而講習以精其術其黜庸謬救生靈倬然為治道之助而世俗罔識朝廷仁愛之意如此而徒惑邪說而天性命愚實憫之今已戒醫博士日與醫之徒考神農子儀扁鵲秦和之術一會於岐伯俞附之道以正紕邪以誠消妄使可治之疾不終害人亦濟民之一事也而慮巴楚之俗尚安故態不知醫効之神倍禱淫祀之鬼故刻詞以告嘉祐四年七月二十日述

記蛙

宋 王十朋

予有鞋布體而麻質其弊甚十趾不能以自藏有蛙乘罅而入蟄於鞋間予不知也會昏暮如廁而蛙忽鳴俯而視地無所見既行而又鳴予始疑之既就几席而坐足每動則閤閤然有聲以指摸之有蠢而動者予愕然未能物色其類呼童子燈之脫鞋而微露一爪乃蛙也命童子出之躍而去東郭先生衣弊履穿貧甚矣然未聞有蛙乘罅而蟄者以是知予之貧又過東郭一等然鞋非可蟄之所蛙託身誤矣使其不能自鳴幾死於足間予去歲嘗和韓退之答柳柳州食蝦蟇詩以戒同舍果能止殺是蛙也豈以予不殘其類故奮身而來託將以脫蟲蛇吞噉之禍於一時耶予亦幸而不踐之不然幾乎避禍而得禍也感而至蟄而免自鳴以求全蛙亦有知矣勿以其蠢焉而愚之人能持無害物之心而物以其類至能持無害人之心人其有不至者耶時紹興庚午孟秋十四夜書

本記

明 朱 熹

始皇紀論封建之不可復其說雖詳而大要直謂無故國之可因而已嘗試考之商周之初大賡所寓已皆善人而其土地廣狹隨時合度無尾大外彊之患王者世世脩德以臨之又皆長久安寧而無倉卒傾搖之變是以諸侯之封皆得傳世長久而不可動非以有故國之助而然也秦至無道決無久存之理正使采公卿之議用淳于越之說並建子弟以自藩屏不過為陳吳劉項魚肉之資雖有故國之助亦皇能以自安也哉至若漢晉之事則或以地廣兵強而逆節萌起或以主昏政亂而骨肉相殘又非以無故國之助而亡也蘇子之考之也其已不詳矣至於又謂後世之封建者舉無根之人寄之吏民之上君民不親一有變故則將漂卷而去亦與秦之郡縣何異若使秦能寬刑薄賦與民休息而以郡縣治之雖與三代比隆可也夫以君民不親而有漂卷之患為不異於郡縣是固以封建為賢於郡縣但後世之封建不能如古之封建故其利害無以異於郡縣耳而又必曰

以郡縣善而治之猶可以比隆於三代至於封建則固以為不可豈封建則不可以善治而必為郡縣乃可以善治耶若以無根為慮則吾又有以折之夫天生烝民有物有則君臣之義根於情性之自然非人之所能為也故謂之君則必知撫其民謂之民則必知戴其君知夫婦之相合朋友之相求既以聯而比之則其位置名號自足以相感而相持不慮其不親也如太公之於齊伯禽之於魯豈其有根而康叔之於衛又合其再世之深讐而君之然皆傳世數十衛乃

後周數十年而始亡豈必有根而後能久耶至於項羽初起即戰河北其為魯公未必嘗得一日臨蒞其民也而其亡也魯人且猶為之城守不下至聞其死然後乃降以至彭越之於梁張敖之於趙其為君也亦暫耳而樂布貫高之徒爭為之死以至漢魏之後則已為郡縣久矣而牧守有難為之掾屬者猶以其死捍之是豈有根而然哉君臣之義固如此也若秦之時六國疆大誠不可以為治既幸有以一之矣則宜繼續其宗祀而分裂其土壤以封子弟功臣使之

維持參錯於其間以義言之既得存亡繼絕之美以勢言之就使有如蘇子之所病則夫故國之助根本之固者又可如此一舉而兩得之亦何為而不可哉但秦至無道封建固不能待其久而相安而為郡縣亦不旋踵而敗亡蓋其利害得失之算初不繫乎此耳蘇子乃以其淺狹之心徂習之見率然而立論固未嘗察乎天理民彝本有之常性而於古今之變利害之實人所共之而易見者亦復乖戾如此是則不惟窮理之學未造本原抑其幕年精力亦有所不逮而然也或曰然則為今之計必封建而後可以為治也耶而度其勢亦可必行而無弊耶曰不必封建而後可為治也但論治體則必如是然後能公天下以為心而達君臣之義於天下使其恩禮足以相及情意足以相通且使有國家者各自愛惜其土地人民謹守其祖先之業以為遺其子孫之計而凡為宗廟社稷之奉什伍閭井之規法制數度之守亦皆得以久遠相承不至如今日之朝成暮敗也若猶病其或自恣而廢法或疆大而難制則雜建於郡縣之間及

使方伯連帥分而統之察其敬上而恤下與其違禮而越法者以行慶讓之典則曷為而有弊耶

論學者

宋 朱 熹

書不記熟讀可記義不精細思可精惟有志不立直是無著力處只如而今貪利祿而不貧道義要作貴人而不要作好人皆是志不立之病直須反覆思量究見病痛起處勇猛奮躍不復作此等人一躍躍出見得聖賢所說千言萬語都無一事不是實語方始得立此志就此積累功夫迤邐向上去去大有事在諸君勉旃不是小事

周禮發題

宋 陳 亮

周禮一書先生之遺制具在吾夫子蓋嘆其郁郁之文而知天地之功莫備於此後有聖人不能加毫末於此矣世儒之論以為治至於周公而術已窮窮則不可復繼周之後必為秦吾夫子蓋逆知而不言也嗚呼果其窮也則周公之志荒矣自伏羲神農黃帝以來順風氣之宜而因時制法凡所以為人道立極而非有私天下之心也蓋至於周公集百聖之大成文理密察彙彙乎如貫珠井井乎如畫棊局曲而當盡而不汙無復一毫之間而人道備矣人道備則足以周天下之理而通天下之變變通之理具在周公之道蓋至此而與天地同流而憂其窮哉夫周家之制既定而上下維持至於八百年諸侯既已擅立周之王徒擁其虛器巖然於諸侯上諸侯皆相顧而莫之或廢彼獨何畏而未忍哉豈非周公之制有以維持其不忍之心雖顛倒錯亂而猶未亡也當是之時周雖自絕於天有能變通周公之制而行之天下不必周而周公之術蓋未始窮也秦徒見其得天下之難

以為周公之制蓋非其所便併與天僅存者而盡棄之而不知周家之制既盡而秦亦亡矣人道廢則其君豈能獨存哉始夫子之言曰其或繼周者雖百世可知也蓋以為後之王者必因周而損益焉自是變通至於百世而不窮而豈知其至此極也漢高帝崛起草莽而得天下知天下厭秦之苛思有息肩之所故其君臣相與因陋就簡存寬大之意而為漢家之制民亦以是安之而漢祚靈長絕而復續者幾與夏商等自是功利苟且之政習以為常先王不易之制棄而不講人極之不亡者幾希矣此有志之士所以抱遺書而興百世之嘆反覆推究而冀其復見天地之大全也然自秦火之餘此書已非其全而駁亂不經之言益如黑白之不相入尚可考而知也雖然文武之政布在方冊其人存則其政舉自周之衰以迄於今蓋千五百餘年矣天獨未厭於斯乎故將與諸君參考同異以有待焉

雜著

雜著上之下

元

明

四經序錄

元 吳 澄

易伏羲之易昔在皇羲始畫八卦因而重之爲六十
四當是時易有圖而無書也後聖因之作連山作歸
藏作周易雖一本諸伏羲之圖而其取用益各不同
焉三易既亡其二而周易獨存世儒誦習知有周易
而已伏羲之圖鮮或傳授而淪落於方伎家雖其說
具見於夫子之繫辭說卦而讀者莫之察也至宋邵
子始得而發揮之於是人乃知有伏羲之易而學易
者不斷自文王周公始也今於易之一經首揭此圖
冠於經端以爲伏羲之易而後以三易繼之蓋欲使
夫學者知易之本原不至尋流逐末而昧其所自云
爾連山夏之易周禮太卜掌三易一曰連山二曰歸
藏三曰周易其經卦皆八其別皆六十有四或曰神
農作連山夏因之以 首民故曰連山今亡歸藏商
之易子曰我欲觀夏道是故之宋而不足徵也吾得
坤乾焉說者以坤乾爲歸藏或曰黃帝作歸藏商因
之以其首坤故曰歸藏今亡周易上下經二篇文王
周公作彖象繫辭上下文言說卦序卦雜卦傳十篇

夫子作秦焚書周易以占筮獨存漢志易十二篇蓋經二傳十也自魏晉諸儒分象象文言入經而易非古注疏傳誦者苟且仍循以逮於今宋東萊先生呂氏始考之以復其舊而朱子因之第其文字闕衍謬誤未悉正也故今重加修訂視舊本頗為精善雖於大義不能有所損益而於羽翼遺經亦不為無小補云

書二十八篇漢伏生所口授者所謂今文書也伏生故為秦博士焚書時生壁藏之其後兵起流亡漢定生求其書亡數十篇得二十八篇以教授於齊魯之間考文時求能治尚書者天下無有欲召生時年九十餘矣不能行詔太常遣掌故晁錯往受之生老言不可曉使其女傳言數錯齊人語多與顏川異錯所不知凡十二三畧以其意屬讀而已夫此二十八篇伏生口授而晁錯以意屬讀者也其文闕誤顛倒固多然不害其為古書也漢魏數百年間諸儒所治不過此爾當時以應二十八宿蓋不知二十八篇之外猶有書也東晉元帝時有豫章內史梅頤增多伏生

書二十五篇稱為孔氏壁中古文鄭冲授之蕪愉愉授梁柳柳之內兄皇甫謐從柳得之以授臧曹曹授梅頤頤遂奉上其書今考傳記所引古書在二十五篇之內者鄭元趙岐常昭王肅杜預輩並指為逸書則是漢魏晉初諸儒曾未之見也故今特出伏氏二十八篇如舊以為漢儒所傳確然可信而晉氏晚出之書別見於後以俟後之君子擇焉書二十五篇晉梅頤所奏上者所謂古文書也書有今文古文之異何哉晁錯所受伏生書以隸寫之隸者當世通行之字也故曰今文魯恭王壞孔子宅得壁中所藏背科斗書科斗者倉頡所製之字也故曰古文然孔壁中真古文書不傳後有張霸偽作舜典汨作九共九篇大禹謨益稷五子之歌允征湯誥咸有一德典寶伊訓肆命原命武成旅葵罔命二十四篇目為古文書漢藝文志云尚書經二十九篇古經十六卷二十九篇者即伏生今文書二十八篇及武帝時增偽泰誓一篇古經十六卷者即張霸偽古文書二十四篇也漢儒所治不過伏生書及偽泰誓共二十九篇爾張

霸偽古文雖在而辭義蕪鄙不足取重於世以售其欺及梅頤二十五篇之書出則凡傳記所引書語注家指爲逸書者收拾無遺既有證驗而其言率依於理此張霸偽書遼絕矣析伏氏二十八篇爲三十三雜以新出之書通爲五十八篇并書序一篇凡五十九有孔安國傳及序世遠以爲真孔壁所藏也唐初諸儒從而爲之疏義自是以後漢世大小夏侯歐陽修氏所傳尚書止有二十九篇若廢不復行惟此孔氏傳五十八篇孤行於世伏氏書既與梅頤所增混淆誰復能辨竊嘗讀之伏氏書雖難盡通然辭義古奧其爲上古之書無疑梅頤所增二十五篇體製如出一手采集補綴雖無一字無所本而平緩卑弱殊不類先漢以前之文夫千年古書最晚乃出而字畫畧無脫誤文勢畧無齟齬不亦大可疑乎吳氏曰增多之書皆文從字順非若伏生之書詰曲聱牙夫四代之書作者不一乃至二人之手而定爲二體具亦難言矣朱子曰書凡易讀者皆古文豈數百年壁中之物不訛損一字者又曰伏生所傳皆難讀如何伏

生偏記其所難而易者全不能記也又曰孔書至東晉方出前此諸儒皆未見可疑之甚又曰書序伏生時無之其文甚弱亦不是前漢人文字只似後漢末人又曰小序決非孔門之舊安國序亦非西漢文章又曰先漢文字重厚今大序格致極輕又曰尚書孔安國傳是魏晉門人作託安國爲名耳又曰孔傳並序皆不類西京文字氣象與孔叢子同是一手偽書蓋其言多相表裏而訓詁亦多出於小爾雅也夫以吳氏朱子之所疑者如此顧澂何敢質斯疑而斷然不敢信此二十五篇之爲古書則是非之心不可得而昧也故今以此二十五篇自爲卷襄以別於伏氏之書而小序各冠篇首者復合爲一以翼其後孔氏序亦并附焉而因及其所可疑非澂之私言也聞之先儒云爾

詩風雅頌凡三百十一篇皆古之樂章六篇無辭者笙詩也舊蓋有譜以記其音節而今亡其三百五篇則歌辭也樂有八物人聲爲貴故樂有歌歌有辭卿樂之歌曰風其詩乃國中男女道其情思之辭人心

自然之樂也故先王采以入樂而被之弦歌朝廷之樂歌曰雅宗廟之樂歌曰頌於燕饗焉用之於朝會焉用之於享祀焉用之因是樂而施於是事故因是事而作為是辭也然則風因詩而為樂雅頌因樂而為詩詩之先後於樂不同其為歌辭一也經遭秦火樂亡而詩存漢儒以義說詩既不知詩之為樂矣而其所說之義亦豈能知詩人命辭之本意哉由漢以來說三百篇之義者一本詩序詩序不知始於何人後儒從而增益之鄭氏謂序自為一編毛公分以宜諸篇之首夫其初之自為一編也詩自詩序自序序之非經本旨者學者猶可考見及其分以宜諸篇之首也則未讀經文先讀詩序序乃有似詩人所命之題而詩文反若因序以作於是讀者必索詩於序之中而誰復敢索詩於序之外者哉宋儒頗有覺其非者而莫能去也至朱子始深斥其失而去之然後足以一洗千載之謬激當因是舍序而讀詩則雖不煩訓詁而意自明又嘗為之強詩以合序則雖曲生巧說而義愈晦是則序之有害於詩為多而朱子之有

功於詩為甚大也今因朱子所定去各篇之序使不清亂乎詩之正文學者因得以詩求詩而不為序說所惑若夫詩篇次第則文王之二南而間有平王以後之詩成王之雅頌而亦有康王以後之詩變雅之中而亦有類乎正雅之辭者今既無從考據不敢輒為之紛更至若變風雅入樂歌而未必皆有所用變雅或擬樂辭而未必皆為樂作其與風雅合編蓋因類附載云爾商頌商時詩也七月夏時詩也皆異代之辭故虞頌詩風詩之末魯頌乃其臣作為樂歌以頌其君不得謂之風故係之頌周公居東時詩非擬朝廷樂歌而作不得謂之雅故附之豳風焉春秋經十二篇左氏公羊穀梁文有不同朱子刻易書詩春秋於臨漳郡春秋一經止用左氏經文而曰公穀二經所以異者類多人名地名而非大義所繫故不能悉具激竊謂三傳得失先儒固言之矣載事則左氏詳於公穀釋經則公穀精於左氏意者左氏必有按據之書而公穀多是傳文之辭況人名地名之殊或由語音字畫之舛此類一從左氏是也然有

之者於義的然見左氏爲失而公穀爲得者則又豈容以偏徇哉嗚呼聖人筆削魯史致謹於一字之微三家去夫子未久也文之脫謬已不能是正尚望其能有得於聖人之微意哉漢儒專門守殘護闕不合不公誰復能貫穿異同而有所去取至唐啖助趙匡陸淳三子始能信經駁傳以聖人書法纂而爲例得其義者十七八自漢以來未聞或之先也觀趙氏所定三傳異同用意密矣其與奪未能悉當間嘗再爲審訂以成其美其間不繫乎大義者趙氏於三家從其多今則如朱氏意專以左氏爲上倘義有不然則從其是左氏雖有事跡亦不從也一斷諸義而已嗚呼屬辭比事春秋教也微欲因啖趙陸氏遺說博之以諸家參之以管見使人知聖筆有一定之法而是經無不通之例不敢隨文生義以侮聖言顧有此志而未暇就故先爲正其史之文如此若聖人所取之義則俟同志者共講焉

三禮叙錄

元 吳 澂

儀禮十七篇漢興高堂生得之以授瑕丘蕭奮奮授東海孟卿卿授后蒼蒼授戴德戴聖大戴小戴及劉氏別錄所傳十七篇次第各有不同尊卑吉凶先後倫序惟別錄爲優故鄭氏用之今行於世禮經殘缺之餘獨此十七篇爲完書以唐韓文公尚苦難讀況其下者朱子考定易書詩春秋四經而謂三禮體大未能緒正晚年欲成其書於此至惓惓也經傳通解乃其編類草彙將俟喪祭禮畢而筆削焉無祿弗逮遂爲萬世之闕典微每伏讀而爲之惋惜竊謂樂經既亡禮經僅存五易之象傳彖傳本與繫辭文言說卦序卦雜卦諸傳共爲十翼居上下經二篇之後著也而後人以入卦爻之中詩書之序本自爲十編居國風雅頌典謨誓誥之後者也而後人以冠各篇之首春秋三經三傳初皆別行公穀配經其來已久最後注左氏者又分傳以附經之年何居夫傳文序文與經混清不惟非所以尊經且於文義多所梗礙歷千數百年而莫之或非也莫之或正也至東萊呂氏

於易始因晁氏本定爲經二篇傳十篇朱子於詩書各除篇端小序合而爲一以宜經後春秋經雖未暇詳校而亦別出左氏經文併以刊之臨漳於是易書詩春秋悉復夫子之舊五經之中其未爲諸儒所亂者惟二禮經然三百三千不存蓋十之九矣朱子補其遺闕則編類之初不得下以儀禮爲綱而各疏其下脫棄之下必將有所科別決不但如今蒙本而下若執蒙本爲定則經之章也而以後記補記補傳分隸分古於其左也與彖象傳之附易經者有以異乎否也經之篇也而以傳篇記篇補篇錯處於其間也與左氏傳之附春秋經者有以異乎否也夫以易書詩春秋之四經既幸而正而儀禮之一經又不幸而亂是豈朱子之所以相遺經者哉徒知尊信草創之書而不能探索未盡之意亦豈朱子之所以望後學者哉嗚呼由朱子而來至於今將百年然而無有乎爾激之至愚不肖猶幸得以私淑於其書實受罔極之恩善繼者卒其未卒之志善述者成其未成之事抑亦職分之所當然也是以忘其僭妄輒因朱子所

分禮章重加倫紀其經後之記依經章次秩叙其文不敢割裂一仍其舊附於篇終其十七篇次第並如鄭氏本更不問以他篇廢十七篇正經不互雜據二戴之記中有經篇者離之爲逸經禮各有義則經之傳也以戴氏所存兼劉氏所補合之而爲傳正經居首逸經次之傳終焉皆別爲卷而不相紊此外悉以歸諸戴氏之記朱子所輯及黃氏喪禮楊氏祭禮亦畧任以去其重複名曰朱氏記而與二戴爲三凡周公之典其未墜於地者蓋畧包舉而無遺造化之運不息則天之所秩未必終古而廢壞有議禮制度考文者出所損所益百世可知也雖然苟非其人禮不虛行存誠主敬致知力行下學而上達多學而一貫以得夫堯舜禹湯文武周孔之心俾吾朱子之學末流不至於漢儒學者事也激也不敢自棄同志其尚毅勗之哉

儀禮逸經八篇激所纂次漢興高堂生得儀禮十七篇後魯共王壞孔子宅得古文禮經於孔氏壁中凡五十六篇河間獻王得而上之十七篇與儀禮正同

餘三十九篇藏在校府謂之逸禮哀帝初劉歆欲以列之學官而諸博士不肯置對竟不得立孔鄭所引逸禮中雷禮禘於太廟禮王居明堂禮皆其篇也唐初猶存諸儒曾不以爲意遂至於亡惜哉今所纂八篇其二取之小戴記其三取之大戴記其三取之鄭氏注奔喪也中雷也禘於太廟也王居明堂也固得儀禮三十九篇之四而投壺之類未有考焉疑古禮逸者甚多不止於三十九也投壺奔喪篇首與儀禮諸篇之體如公冠等三篇雖已不存此例益作記者刪取其要以作記非復正經全篇矣投壺大小戴不同奔喪與逸禮亦異則知此二篇亦經刊削但未知如公冠等篇之甚耳五篇之經文殆皆不完然實爲禮經之正篇則不可以其不完而損之於記故特纂爲逸經以續十七篇之末至若中雷以下三篇其經亡矣而篇題僅僅見於注家片言隻字之未泯者猶必收拾而不敢遺亦我愛其禮之意也

儀禮傳十篇敘所纂次按儀禮有士冠禮士婚禮戴記則有冠義婚義儀禮有鄉飲酒禮大射禮戴記則

有鄉飲酒義射義以至於燕聘皆然蓋周末漢初之人作以釋儀而戴氏抄以入記者也今以此諸篇正爲儀禮之傳故不以入記依儀禮篇次粹爲一編文有不次者頗爲更定射義一篇迭陳天子諸侯卿大夫士之射雖然無倫整之爲卿射義大射義二篇士相見義公食大夫義則用內江劉氏原父所補並因朱子而加考詳焉於是儀禮之經自一至九經各有其傳矣惟覲義闕然大戴朝事一篇實釋諸侯朝覲天子及相朝之禮故以備覲禮之義而共爲傳十篇云

周官六篇其冬官一篇闕漢藝文志序列於禮家後人名曰周禮文帝嘗召至魏文侯時老樂工因得春官大司樂之章景帝子河間獻王好古學購得周官五篇武帝求遺書得之藏於秘府禮家諸儒皆莫之見哀帝時劉歆校理秘書始著於錄畧以考工記補冬官之闕歆門人河南杜子春能通其讀鄭衆賈逵受業於杜漢末馬融傳之鄭元元所注今行於世宋張子程子甚尊信之王文公又爲新義朱子謂此經

周公所作但當時行之恐未能盡後聖雖復損益可也至若肆為排軼訾毀之言則愚陋無知之人耳冬官雖闕今仍存其目而考工記別為一卷附之經後云

小戴記三十六篇微所序次漢興得先儒所記禮書三百餘篇大戴氏刪合為八十五小戴氏又損益為四十三曲禮檀弓雜記分上下馬氏增以月令明堂位樂記鄭氏從而為之注總四十九篇精粗雜記靡所不有秦火之餘區區掇拾所謂存十一於千百雖

不能以皆醇然先王之遺制聖賢之格言往往賴之而存第其諸篇出於先儒著作之全書者無幾多是記者旁搜博采勦取殘編斷簡會粹成篇無復詮次讀者每病其雜亂而無章唐魏鄭公為是作類禮二十篇不知其書果何如也而不可得見朱子嘗與東萊先生呂氏商訂三禮篇次欲取戴記中有關於儀禮者附之經其不係於儀禮者仍別為記呂氏既不及答而朱子亦不及為幸其大綱存於文集猶可考也晚年編校儀禮經傳則其條例與前所商訂又不

同矣其間所附戴記數篇或刪本篇之文補以它篇之文今則不敢故止就本篇之中科分櫛剔以類相從俾其上下章文義聯屬章之大指標識於左庶讀者開卷瞭然若其篇則大學中庸程子朱子既表章之以與論語孟子並而為四書固不容復廁之禮篇而投壺奔喪實為禮之正亦不可以雜之於記其冠義婚義鄉飲酒義燕義聘義六篇正釋儀禮別輯為傳以附經後矣此外猶三十六篇曰通禮者九曲禮內則少儀玉藻通記小大儀文而深衣附焉月令王

制專記國家制度而文王世子明堂位附焉曰喪禮者十有一喪大記雜記喪服小記服問檀弓曾子問六篇記喪而大傳問傳問喪三年問喪服四制五篇則喪之義也曰祭禮者曰祭法一篇記祭而郊特牲祭義祭統三篇則祭之義也曰通論者十有二禮運禮器經解一類哀公問仲尼燕居孔子問居一類坊記表記緇衣一類儒行自為一類學記樂記其文雅馴非諸篇比則以為是書之終嗚呼由漢以來此書千有餘載矣而其顛倒糾紛至朱子始欲為之是正

而未及竟豈無望於後之人歟用敢竊取其義修而成之篇章文句秩然有倫先後始終頗爲精審將來學禮之君子於此考信豈有取乎非但爲戴氏忠臣而已也

大戴記三十四篇敎所序次按隋志大戴記八十五篇今其書闕前三十八篇始三十九終八十一當爲四十三篇中間第四十三第四十四第四十五第六十一四篇復闕第七十三有二總四十篇據云八十五篇則末又闕其四或云止八十一皆不可考竊意

大戴類粹此記多爲小戴所取後人合其餘篇仍爲大戴記已入小戴者不復錄而闕其篇是以其書冗泛不及小戴書甚蓋彼其膏華而此其查滓爾然尙或間存精語不可棄遺其與小戴重者投壺哀公問也投壺公冠諸侯遷廟諸侯霽廟四篇旣入儀禮逸經朝事一篇又入儀禮傳哀公問小戴已取之則於彼宜存於此宜去此外猶三十四篇晏小正猶月令也明堂猶明堂位也本命以下雜錄事辭多與家語荀子賈傳等書相出入非專爲記禮設禮運以下諸

篇之比也小戴文多綴補而此皆成篇故其篇中章句罕所更定惟其文字錯謬參互考校未能盡正尙以俟好古博學之君子

故物譜

元 元好問

予家所藏書宋元祐以前物也法書則唐人筆迹及五代寫本為多盡有李范許郭諸人高品就中薛稷六鵠最為超絕先大夫銅山府君官汝縣時官賣宣和內府物也銅碌兩小山以酒沃之青翠可摘府君却役時物也鳳字大硯先東巖君教授鄉里時物也銅雀研背有大錢一天祿一堅重緻密與石無異先隴城府君官冀州時物也正祐丙子之兵藏書壁間得存兵退予將奉先夫人南渡河舉而付之太原親

舊家自餘雜書及先人手寫春秋三史莊子文選等尚千餘冊並畫百軸載二鹿車自隨三研則瘞之鄭村別墅是歲寓居三鄉十月北兵破潼關避於女几之三潭北下山則焚蕩之餘蓋無幾矣今此數物多予南州所得或向時之遺也往在鄉里常侍諸父及兩兄燕談每及家所有書則必枚舉而問之如曰某書買於某處所傳之何人藏之者幾何年則欣然志之今雖散亡其綴緝裝褱題印識猶夢寐見之詩有之維桑與梓必恭敬止以予心付度之知吾子孫

却後當以不知吾今日之為恨也或曰物之閱人多矣世之人玩於物而反為物所玩貪多務取巧偷豪奪遺簪敗履惻然興懷者皆是也李文饒志平泉草木有後世毀一樹一石非吾子孫之語歐陽公至以庸愚處之至於法書名畫若桓元之愛玩王涯之固護非不為數百年計然不旋踵已為大有力者負之而趨我躬之不可必矣我後之卿哉予以為不然三代鬲鍾其初出於聖人之制今其款識故在不曰永用享則曰子子孫孫永寶用豈為聖人者超然遠覽而不能忘情於一物耶抑知其不能必為我有而固欲必之也蓋自莊周列禦寇之說與世之誕者遂以天地為逆旅形骸為外物雖聖哲之能事有不滿一笑者况外物之外者乎雖然彼固有方內外之辨矣道不同不相為謀使渠果能寒而忘衣饑而忘食以游於方之外雖眇萬物而空之猶有託焉爾如曰不然則降物以致用守器以為智惟得之有道傳之無媿斯可矣亦何必即空以遺累矯情以趨達以取異於世耶乃作故物譜

燕書

明 宋 濂

元黃之間事變無垠辯士設論以風以陳賢往舊
開今新作燕書四十首

晉侯將伐楚楚子甚懼召六卿訊之曰楚國雖小自
若救蚡冒至於武文威被氣馘隔波諸姬今晉君不
道乃謀兵入我是蔑寡人而死二三子也寡人老矣
不獲親帥三軍以逆堅乃城郭以逕晉人不亦可乎
王孫由于對曰然易有之王公設險以守其國非險
國孰與守蓋圖諸雖然城郭有時而墮楚國之南有

方城焉其東有漢水焉晉人雖衆將焉用之雖然山
川之阻亦可踰也若使舅犯守郢先軫保鄢叔矜禦
雲中荀偃扼直轅誰能侮予雖然此猶以力言也齊
民毒吾賦久若綏之以仁馭之以寬繩之以禮則封
內之民德君以死守矣雖然是保民也非保國也楚
子曰何謂保國王孫由于曰君務上尊天王下睦四
隣分昭於上勢定於下上下有序嚆鼓搆兵是保國
也楚子曰善於是遣公子結如京師左司馬戍聘於
齊魯諸大國晉侯聞之謂諸大夫曰楚國方尊王睦

鄰而以兵入其境不祥遂退師君子曰甚哉分之大
也分爲天則定乃靡亂何有兵禍哉易不云乎六二
之吉順以則也夫則凶矣

燕與齊方睦齊人以燕不虞其入也將侵之武安君
聞之走告燕文公曰齊將不利於我公宜謀之文公
曰寡人所畏晉楚大國爾齊何能爲武安曰不然也
臣嘗至豚澤豚澤之人養蜀鷄有文而赤翁有羣鷄
周周鳴忽晨風過其上鷄遽翼諸鷄晨風不得捕去
已而有烏來與鷄同咏鷄之兄弟也與之下工甚馴
烏忽銜其鷄飛去鷄仰視悵然似悔爲其所賣也夫
丑峽之險不能覆舟而覆於平流羊腸之曲不能仆
車而仆於劇縣此無他福生於所畏禍起於所忽也
文公曰子誠過慮哉不聽未幾齊果攻燕取十城君
子曰絳蔓且有毒况上國乎燕文爲不知矣

齊路寢壞桓公欲新之召工師翰具材工師翰伐巨
木於營邱山中若樞若玷若魄旄若豫章無疵取而
泛之河蔽流而下工師翰麾衆徒操剗剗斲之運繩
尺則之閭閻然素素然聲達乎臨淄之郊越五月路

寢或桓公環視之東阿之楹有用樗者桓公讓工師
翰曰樗散木也庸理不齊潘液弗固喫之腥爪之不
知所竊爲杖爲棖且不可況爲負任器耶工師翰對
曰臣之作斯寢也嘉木以爲程文礪以爲薦址畫藻以
莫井堅壘以厚墉陶甃以歸黜臣竊以爲盡善矣雖
東阿之楹缺以一樗足之不虞君之見讓也桓公曰
寢之鞏者在宋腐承末者在梓藉梓唯楹耳一楹盡
則寢壞奈何不讓工師翰曰臣聞國猶寢也一楹盡
則無寢若衆士進尚可國乎桓公曰不可也工師
翰曰君既知不可何爲祭其小而遺其大也桓公曰
不知也工師翰曰臣請爲君言之楹執國柄者有症
巫馬咸內食之嘉者有夷鼓初焉長君之欲者有寺
人貂焉外惡諸侯而凶德弗章者有開方焉是衆楹
皆蠹矣路寢能獨存耶桓公悟曰敬諾於是解四子
政而召管敬仲任之齊國大治君子曰工執藝事以
諫忠矣斷而行之者非勇歟宜其上下相親霸業底
定書曰從諫弗咈桓公有焉易曰納約自牖工師翰
述之矣

楚莊躋過商邱之墟聞司馬鴻氏之妻嬰美而豔殺
司鴻氏撲之未幾又將室衛人之白閭白閭宜衛人
不從引錐自刺左右奪錐免躋怒欲梟衛人白閭曰
衛人辱我若地勿以妾故傷衛人也泣而往白閭得
幸久竟忘衛人思已請曰衛人女弟瑩容顏姱姱肌
膚若琢玉善爲陽阿七盤之舞翩翩如龍旋見者欲
死君強委禽焉可妻也躋從之瑩至躋絕情愛瑩終
不自憚嬰則日媚躋作狐拘態躋或一破顏輒出驕
人曰主君贈我以笑矣主君面目有光唇如渥丹齒
如齊貝音中黃鍾其美丈夫哉悔相從不風也雖然
今幸得侍中柳者殆天畀我寵乎言已手足皆亂無
主白閭尤善媚其驕人比嬰有過無不及焉已而躋
專瑩白閭甚患往詒瑩曰而涸鼎耳遽忘德吾乎不
然何專我主君也嬰繼習尤力瑩起避之白閭與嬰
逐噪不已瑩問嬰曰而昔有良人乎無也曰有曰今
何在曰人殺之矣曰孰殺之曰主君也曰然則主君
而讎也而弗能報反爭一旦之寵不亦悞乎嬰不能
答白閭遽曰妾夫子固在也瑩曰而夫子固在而心

倘未死曾記泣別時言予白闔抱螢大慟與螢亦泣
下不能仰視君子曰大俠起南海中殺人肝為脯妻
其女婦事與莊躋正同南海之人無縛之者反北面
事之爭權而矜龍已焉哉天實為之謂之何哉

頤國之大夫權開黃帝與蚩尤戰製角以象龍鳴樂
之制桐而髹銅焉畫為龍文日習焉其音鬱紆而迴
旋優優焉靡靡焉可聽若能通乎元潛者大夫吹向
南山之湫以感龍湫中三足能聞角鳴意人將醢已
呀然號林木皆動大夫大驚謂真龍吟也走謂公之

奇曰真龍之鳴業業如靈鼓前後相續宛渾不能休
吾向學者殆非也請改而習諸何如公之奇曰子所
聞者能也非龍也龍之鳴人鮮能聞子之角固偽也
今子又以能為龍益偽矣舍偽而學偽奚擇焉君子
曰世之法孔子斷斷兮自謂得其宗者若真龍出鳴
則駭矣

鄭伯卒庶孽奪正公子五爭及厲公自櫟入國將盡
劉諸公族懸劍於國門且下令曰敢爭者斬子俞彌
方病聞之嘆曰是何亡國之政乃今左右扶見公未

至公遙呼曰大夫力疾而見寡君非欲嘗國門劍子
聲色俱厲子俞彌陽驚曰何謂也公語之故子俞彌
曰君能如此過文王遠矣臣頃首賀且不暇況敢爭
乎公辭顏曰寡君焉能過文王也曰臣言不悖君實
過之公曰大夫言何易也雖然幸卒言之子俞彌曰
君之過文王者無他威勝也公悅前子俞彌問曰文
王初伐犬戎次伐密須次伐耆邦次伐崇侯虎而作
豐邑岐徙都之其威威矣大夫乃謂寡君勝之其
故何耶子俞彌曰文王之威能行天下而獨不行於

周宗故其孫子之蕃兄弟之國十有五人姬姓之國
者四十人此無他親親也今君欲兵之非威勝文王
乎公艱然見乎色曰大夫言周善如儀臺之黨何子
俞彌曰鄭之公族盡二人黨耶君奈何殲之臣所居
之南有山曰陽都之山甚深羣熊萃焉熊性惡血偶
度絕空棘刺脅血見若濡縷熊並爪之血愈滿爪之
不已膚成坎原原如泉湧熊不能禁剝去其膚而血
弗息竟擢腎腸以死鄭之公族猶一體也今因公子
五爭不問小大盡劉無乃與前事類耶公矍然失聲

曰吾過矣吾過矣遂下城門之劍寘諸公族不論君
子曰鄭厲公之悞諫誰能犯焉子俞彌反覆言之而
公弗格者以順入以正出也內經曰寒因寒用熱因
熱用其始則同其終則異於戲豈特醫師之爲然哉
蔡人有列宗子泓性好潔惡人口過人與語遙答之
且答且唾人進寸則退尺以避沐浴必十更湯收濕
不以中適風乾之攝坎爲匱而軒其上下䟽河水隨
恩隨流欲行人道汲井泉前後濯大雪不廢妻因病
寒死然好嗅女婦足訊足訊若行 纒三周而覆湧

泉善垢或辭之其臭逆鼻人不噉即吐子泓獨樂之
驕人曰是何鬱金之賤也婆律之潤也椒蘭之郁也
宜諸袖中飯不甘嗅之神度弗與嗅之怒不舒慙不
釋也及從而嗅之頻死召其子曰吾死矣梁威薌合
不爾求也嘉薦普淖弗汝覲也能時致足執於柩前
孝莫大焉蔡大夫聞而笑之君子曰古語有之大潔
者必有大汚其子泓之謂乎

魯之老父相與謀造狐白之裘紉之以密箴緣之以
畫純佩之以長綬熨之以榆火擇形筭承之趨魯君

之庭而致辭曰吾儕小人得有闔廬以蔽風雨者非
君賜與出作入息而鼓腹酣歌者非君賜與男播於
疇婦饁於郊以遂其生者非君賜與吾聞工德不報
於人爲無禮於德爲讐義不祥莫大焉請以是爲玉
體之共謹再拜以獻魯君曰寡人聞之君猶本也民
猶支也君所以庇民如本之養支也爾二三老父之
無衣宜於寡人乎是給今倒行而逆施之無乃不可
乎敢辭二三老父又相與謀曰是服之不華無以彰
君之德也盍更諸於是以錦爲衣繡以五色龍章擊

以朱絲褰以華黼有文爛如也又復趨魯君之庭而
致辭曰臣等不佞長於蒿萊之野未嘗受教於君子
不知以禮事君夫因物以合矩矩謂之章緣文以顯
義義謂之范君有至德而惟皮草之物是供非合顯
之意謹更之惟君圖焉公曰魯國雖小尚敢私一裘
乎禮若可受施布惟盈如其不然五采益敢固辭
二三老父又相與謀曰吾君誠賢其不受者非有也
也不欲重煩吾民哉等當愛之以德可也又進而致
辭曰君之中心臣等幸已知之有君無臣世謂亂國

臣不敢以藝服汚於執事願以仁義為衣道德為領忠信為紳廉知為緣使君服之長有茲魯國先公杜後永有攸賴不亦可乎公曰寡人敢不承教君子曰魯之老父何其善愛君哉其氣和其辭婉以周其情懇懇而有依魯君應之若黃鍾大呂弦歌于揚洋洋乎相宣冷冷乎相應也君臣如此魯欲不治得乎禮曰無體之禮上下和同此之謂也

腹擊至趙趙苦成常與出游指河山曰吟吟乎有哉也指民物曰焚焚乎衆多也指兵府曰予戟牟利也

指為藏曰玉帛充牣也大夫上國也寧有正乎於是乎腹擊曰敝邑素甚安能及此然有一說焉為君陳之可乎曰可曰南海之濱有昭支焉者居蛟汭之邱汭不產牛有繩犢來者大如焚其角爾爾粟爾昭支豈怖曰是何物也其友伯昏氏告曰此謂犢牛易稱童牛之牯是也昭支豈曰吾見貌牛者形咫尺耳其大有若斯乎懇其人囑以歸驕其比鄰矜其輿皂自以無敵也他日齊宣子過焉謂之曰是未足為大也高涼之山有牛曰懷其項黃其尾元其色類乎犢其

重三百餘斤子盍致之昭支豈復往購以歸又自以為無敵也他日爰子擅過焉謂之曰是未足為大也空竇之林有牛曰旄赤鬣垂髯紺麓體長而多力其肉重六百斤子盍致之昭支豈復往購以歸又自以為無敵也他日倨無膝過焉謂之曰是未足為大也已峽之中有牛曰犀其毛拳然其睛烜然其角鬚然其肉重一千斤子盍致之昭支豈復往購以歸又自以為無敵也他日梁都之舟過焉謂之曰是未足為大也合浦之間有牛曰犛項肉上葵龍胡下絳

迅行如飛其肉重二千斤子盍致之昭支豈復往購以歸且詭人曰如此尚有可敵者耶津津焉悅置置然自溢也他日公孫伯光過之昭支豈出牛櫪之公伯光曰是猶未足為大也岷峨之谷有牛曰犛鑊盪以為項鵠象以為跟離壁以為質填脂以為尻其肉重七千斤子盍致之昭支豈惑曰有是哉雖然且將驗之迨至果如伯光言因嘆曰使人不我告我遂矜犢牛大於天下牛也趙之河山民物府藏較之胡沈固為大國也此之齊晉則不及矣齊晉比趙固為

大國也較之秦楚則雄強不如之矣君勿自足自足則驕驕則輕輕則殘民以逞國欲治得乎昔成常古本強不能對君子曰人自狹者其不可哉

齊景公懲奢而好儉諸大夫復日浸乎滯靡然懼景公之知矯情事焉每入朝駕羸馬橫車以從衣惡甚冠纓殆欲絕也景公謂其誠也憐焉召羣臣曰寡人使子囊帶賜爾等錦衣一襲及鞞琫容刀各一以爲身章而等毋過儉也皆對曰臣等藉君威靈得從大夫之後食雖弗鑒不我賤也傳曰儉德之興也共則

一和儉則從 從 則豫一和則輯唯君圖之景公說一日出游會諸大夫饗於鹿門入而觀焉其車則澤而煥也其馬則矯而騰也其服食器用則豐明精腴也景公以其結已大怒曰叱噤而吾臣也敢爾乎盡收而戮之君子曰書云作偽心勞日拙其齊大夫之謂乎

秦昭王卽位之三年中外士多去昭王患之謂陽山君曰寡人過士不爲不至矣先飢而舖之未凍而裘之寡人何負於士士之相視如弁髦將禁維之耶蓋

離其心欲任其所之耶則去者百多矣弗禁國將空奈何陽山君曰君何患焉夫王孫非重顧不棲非山實不食非族林不懸聞人聲則逸弋人餌而罕之詔而馴之命之春人立而下止其手命之水負壺出汲命作甕離桑林之舞則冠帶踉蹌而起夫王孫類夫人者猶可也至於魍魎則噬人之物昂首則百獸驚掉尾則林木震嘯咆則陰飈四發非惟不可近列敢狎獵人羶而縛之習而安之相與作角觝之戲跨項編頭或翻出踏下無所不至魍魎亦靈獸猶可也至

於伯趙禽中微者爾技人引而羅之援而采之搏土爲人獸神鬼面而空其中衣與皮如之令其爲鬼則鬼鬼面服鬼衣以出跳踉匿僕如畫至於人獸神皆然伯趙雖微猶禽屬也至於魍魎則蟲之至微者也形大於粟具目鼻入微不可見駐人以蠟肪誘而致之集於乾壺元與黃異貯序而散之布髮几於庭置二壺其上振鼓三初則元黃皆出再則各成列奮首搖鬣相向三則紛紜交不可辨聞鉦聲各退入壺不亂夫王孫魍魎獸也伯趙禽也魍魎蟲也皆口不能

言冥頑不靈其可服而制之者莫心志寧嗜欲故也
況士靈於萬物者乎且士者國必資以成治者也昔
我先君繆公西取由余於戎東得百里奚於宛迎蹇
叔於宋求丕豹公孫支於晉遂成伯業臣竊聞之先
君嘗語羣臣曰林繁則家禽來棲海寬則大魚來遊
寡人之待士亦以寬故劬為乃廢至耳今王之馭下
如束澁畫不得寧夜不得息來者如入囊有入無得
出者臣亦將去之況他人乎王若以誠待士縱其去
來不同士若不至當磔臣以示不悔也昭王曰善鄰
國聞之士之來歸者千餘人君子曰君子懷材抱藝
孰不欲自見哉特患遇之非其道故避去爾禮云舉
賢而容衆毀方而瓦合言寬裕也君子亦何心哉
齊頃公欲賦民一邱出車一乘不從者死袁婁宰注
曰敝邑之賦急矣四邱一乘尚弗支也況倍三乎吾
寧死爾不忍死民也弗奉令公使使者讓宰且召與
使者俱宰至見公頓首請曰臣無罪盧蒲就魁在側
斥曰汝惡得無罪立國養民古也齊民肥國今也胡
不腹民膏血以媚公爾罪一也公既素民汝反欲愛

民使諸侯不敢侵伐爾罪二也通國之宰皆徇公欲
爾獨以正自匡而欲死之爾罪三也汝惡得無罪公
笑而釋之君子曰古者諫有五有正諫有降諫有忠
諫有懇諫有諷諫若盧蒲就魁之言其殆諷諫也歟
韓帥師伐魏入舞陽魏人避之韓將公仲曰夫魏易
搖之國也今弗圖蓋弱我矣再帥師進必下一二城
公叔曰不然魏國雖小許鄢在其南西河路其北長
城界其西淮潁出其東是所謂險阻國也今無故我
弱蓋有伏甲焉譬猶越人穿鼠鼠好夜竊粟越人宜
粟於盎盎鼠齧不顧鼠呼羣類入焉必舐而後反越
人乃易粟以水浮糠覆水上而鼠不知也逮夜復呼
羣次第入咸溺死魏以舞陽餌我是宜粟於盎也無
乃不可乎弗聽未幾伏甲四起韓師殲焉公仲僅以
身免君子曰公叔可謂智士哉所謂智者察見隱微
無所遁其情爾魏人無故而棄舞陽豈能弱哉蓋誘
我也公仲遽信何耶老子曰將欲取之必固與之其
魏人之謂矣
晉欒氏世為晉卿以財名至欒霄益務侈靡狗馬聲

色無不好藉之舉火者百姓無規之者媚惑惟恐不
亟求焚西旅訪神馬渥洼徵樂姬燕趙出則行馬擁
犬還則吹竹彈絲爲長夜飲酒酣連臂踏歌北邙之
陰白楊悲止今我不樂日月馳止卷髮衰止飲酒沓
止我心和止無日不然茲藏皆空而爲樂不厭霄覺
召所嬖謂曰吾樂已太康家力不向單乎輒給之曰
魚鴈滿菰澤羊牛溢郊坰金帛珠玉充積庫藏何謂
單乎雩復悅雩妻蓼媛罵曰螭螭所藉以生者在人
腸胃中嗜其血膏日夜不止人因病厲死人死則螭

螭亦稿矣爾曹藉吾家舉火旦旦蠱而伐之我家亡
汝家獨存乎衆畏衆言以計去之亂益甚雩以貧
死百餘家皆散爲丐君子曰山之陽有桑蟲穴之
晝夜蠶弗止桑溜液乾而悴蟲亦無生者蟲具藥氏
之客歟使成衆言亦何至於丐哀哉
楚有鬬子般者貌肅而言莊言則必稱先王國人皆
以爲脩潔人也一日飲遂啓疆家而沈尹壽師和犁
在焉師和犁與沈尹壽語語近鬬子般怒曰若等
陋女蠱若渠略出入穢壤雖鬼見亦唾也尚敢颺言

沮豆鬬子衆皆色沮言未訖有蠶姬過門鬬子般起
更衣忽見夫握劍起甚疾衆隨之觀則所追者正鬬
子般也初鬬子般通於姬姬知飲遂啓疆家過而目
招之鬬子般尾而私焉不虞良人見也沈尹壽拊膺
嘆曰天下寧復有是耶天下寧復有是耶遂啓疆尤
之曰子何見之晚也昔紀侯好沮師教焉沮師脫土
肖人貌飾之冠九山之冠衣結霞之躡文鸞之履升
降周旋人也拜立坐跪人也沮師度可用進紀侯觀
之衆舉觴觴焉沮飲已竟跳擲裂冠裳適去蓋沮假
人貌飾形也其心沮也因物則遷爾子何怪鬬子般
哉今之世假稱先王以文姦言者衣袂相屬也子何
怪鬬子般哉君子曰天之高也日月之昭也星辰之
遠也步天之家咸得測焉獨人心之變竟舜有難知
者觀鬬子般之事可爲寒心矣

齊西王須善賈海出入扶南林邑頓遊羣蠻中賈遠詣寶
若毒冒頗黎火齊馬腦之類白光煜煜然遇東風覆舟附
斷桅浮沉久之幸薄岸被濕行喬陰山中山幽不見日常
若雨將壓地西王須自分必死尋巖實絕氣庶遺齒不爲

鳥爲飯未入猩猩自竇中出反覆視意若憐之者取
戎叔毳裘姜諸物指之食而王須方餒甘之竇石
有小洞棲新毳尊尺餘甚溫讓而王須猩猩獨卧於
外大寒不自恤語雖殊朝夕盟咿作聲似慰解狀如
是者一年不懈忽有餘皇度山下猩猩急扶西王須
出送之登及登則其友也猩猩猶遙望不忍去西王
須因謂其友曰吾聞猩猩血可染縞經百年不薦是獸
也脂刺之可得斗許盍升岸捕之其友罵曰彼獸而
人汝則人而獸也不殺何爲費石如頸沉之江君子

曰負恩悖義人勿殺鬼斯戮之矣西王須之見殺也
宜哉雖然西王須固可殺猶施於異類也類同者亦
有之豈惟類同而同氣者亦或有之奈之何哉天王
之法尚在吾當執刑書以往

王賊生與三鳥叢臣別王賊生曰吾儕宜自厲異時
立朝勢人之門足毋陟也三鳥叢臣曰此余切齒腐
心盡誓諸王賊生喜乃歃血誓曰二人同心毋徇利
毋誅有位毋附厥愾士而移其行有違此盟明神殛
之居亡同共仕於晉王賊生復中前誓三鳥叢臣

既悔復恐王賊生知之又不得不往也鷄初鳴即去
候宣子入門有危坐東榮者舉火照之則王賊生也
各慙而退君子曰二子貧賤時其盟誠良及登祿仕
遷變其初志何耶利害戰於中位勢怵於外故也士
君子養於山林而壞於朝廷昔人之嘆其有感哉

武安君說六國從親以孤秦秦惠王患之使犀首欺齊
魏與共伐趙以敗從約趙肅侯使臣說齊魏之君
曰臣之東鄰有長滿君其妻終葵夫人妬虐其侍姬
長滿君苦之長滿君之友六人家有如夫人者三和

而不爭長滿君泣而訴焉六人者各遣其妻載饗餼
以食夫人且解之曰人所貴於婦者能樂其夫子爾
長滿君年將耄矣宜安之今因帷薄之故以傷其可
不可乎夫人答曰妾不佞不知明訓不能奉夫子致
辱王耻責於茲敝廬有命敢不敬從然竊有辭焉長
滿君實耄子且幼未能勝洒掃所恃以無恐者長滿
君存耳苟一旦溘先朝露吾屬將操瓢丐於道路長
滿君精神幾何寶之愛之惟妾爾侍短惟欲是從長
滿君若死其目寧有淚耶肉未及寒已思移他家矣

妾雖愚寧便計惟博事乎六人之妻各歸逐其如夫
人者今六國合從將以擯秦秦遣衡人一詠從約煩
解而惟秦之令是從不亦難哉且說士之口是非紛
亂唯其所命皆傳理善惑大王不可不察也齊魏之
君皆曰善於是遣使至諸國從約復成君子曰七國
之君甚矣無識也隨辯士之舌以爲東西辯士升國
勢降矣故當時謂無士爲無國傳曰脰白爲黑倒上
爲下其士之謂歟

駿裔子謂魏力叔牟曰越山之中多蒙頰覆父而牛

尾狸亦產焉狸骨與肉間錯味旨甚當林實秋肥日
飫之其毛澤澤狸自料爲人所忌穴山爲宮樹石爲
柵聚籜爲墉晝伏夜動無隙可尋者獵師嗾犬蹤跡
之毀柵壞墉而煙其宮狸不能煙也閉目冒火出犬
隨斃之力叔牟曰狸何罪哉駿裔子曰狸何罪哉利
其肉之膳也高國氏以富見禍人以爲無辜殊不知
從已召也高國氏亦牛尾狸哉君子曰匹夫無罪懷
璧其罪信矣

楚放宜咎者善爲鸛學未三月皆馴縱之揚則揚呼

之降則降指驚鵠鳬鵠使之擊則擊無不如志西鄰
有終利之伊爭能宜咎欲學之求鸛於太陰山使調
鷹奴囚之七月有鵠過焉命鸛搏之鵠驚陸鸛亦陸
對立結枝上招之矯矯然逝矣餘者瘦死過半終利
之伊甚慚往詰宜咎曰子何術而使鸛馴也宜咎曰
吾亦何術哉予初得之也剋之以籠胃束之以絛鐵
嚴之以鼓聲承之以講養振之以鑿和使其目無邪
視神無外馳時其飢也和水肉以次之廉其饜也咽
羽毛以洩之於是其天者全不知有人人亦鸛也故

命擊則擊命止則止今子畜之以人不以禽乖戾其
性情動搖其筋骸逆亂其血骨紊傷其羽翮不適其
飽飢神既不完天者皆喪矣又烏能如人志哉唯恐
其不縱也縱則颺去爾吾亦何術哉所用與子異耳
終利之伊再拜曰吾因問調鸛而得馭將之術也君
子曰豈惟馭將哉治民亦猶是爾

楚將伐魯取其地召諸大夫問焉辟閭巫臣曰可神
子魚曰不可楚子病之請言其故辟閭王臣曰魯公
失政季氏得民公伐之弗勝次於陽州齊侯唁公於

野井而不能討魯之臣子枕戈待旦莫敢發者畏季氏威也君將求逞諸而徵福周公之廟祭何不伐臣故曰可神子魚曰周室東遷列國失序若聲罪加之以兵何君不可攻何國不可伐楚之視魯猶齊晉之視楚也魯可伐也楚能免焉臣故曰不可辟閭巫臣曰魯棄周禮唯弱強是視當齊魯弔衣裳之會九兵車之會四魯鮮不與聞晉文率諸侯會於溫以臣召君不可以訓則亦僕僕而往不遑寧處其蔑我楚國則曰是革路藍縷之邦可與行典禮乎楚國之民舍怒日久非特君也康王即世魯公雖與二三大夫辱臨楚郊實怵於勢非中誠也不伐何以示遠臣故曰可神子魚曰周公相王室尹天下於周爲睦分魯公以大路大旂夏后之璫封父之繁弱殷民六族使帥其宗輯其分族將其醜類以法則周公用即命於周其德至今未泯也夫脩惠以懷人人誰弗親逞威以工人人何能輯今以魯不我與而兵之以示遠其無乃非德惠也乎臣故曰不可辟閭巫臣曰受姓定封孰非懿親諸姬存者其可數也或明德之弗崇則弗

足以存且臣聞之立德敦政立義和民德天之明也義地之制也君人者則天之明法地之制以決和民人古之道也今魯之公室弱民罹荼毒若入烈火無所避之棄而不伐不亦左乎臣故曰可神子魚曰王靈雖微天下共主楚國固強終人臣也以君伐臣是謂布義以臣伐臣是謂悖政四海弗靖職此之由君若以師宿於魯境東諸侯告於天王使一介之使以讓君曰魯也弱諸臣畔之致使其君越在草莽不事宗廟諸姬竊憂之君爲大國不唯其難之靖而土地是圖或爲執事羞天王命我諸姬亦既有辭當以公使三萬與君周旋於莒之墟君其圖焉不知君將何辭以對也臣故曰不可辟閭巫臣曰天王崩王室亂劉子單子以王猛居自皇自救且不及况能緩我魯乎五侯九伯桓公實征之以臣伐臣非一朝夕今楚之伯與齊代興我若討魯之罪東諸侯震疊不暇其能有辭乎臣故曰可神子魚曰魯之爲國密邇於齊又甥舅也王室固多難魯之君子或藉齊餘威以安靖之楚師進焉諸姬必忿將爲楚患是無故動諸侯

也如或還也勞師千里糜廩糧糧觸冒風露何益於國臣故曰不可楚子曰巫臣之言良欲帥師東聞齊侯取卿居昭公乃止君子曰春秋大夫類多能言而麗乎理者何其寡也季氏逐君諸侯莫不聞楚能告天王致討桓文之功可繼也神子魚乃力遏之巫臣不務出此乃凌蔑我王室惓惓以威儀為言二者胥失也楚之為楚其不競也宜哉

宋襄公繼伯將與楚子會於孟以乘車往而不設兵備道國人皆憂之莫敢言昆吾之叟曰君安則臣寧

君設有難宋社且不血食吾屬將焉寤諸請昧死言焉侯宋襄公出歌而過之曰有虓者貌其毛栩栩冠弁而揖吾不知死所密密者陸鱗鱗者予伋伋者夫始可貌與居貌乎貌乎良足畏乎君何之乎襄公怪之召而問焉昆吾之叟對曰聞君將與楚子會有諸曰然曰聞君武備弗之戒有諸曰然曰禮務從時政在體要佩玉鏘鏘不可新於山荷戈與殺不可酌於廟其理然也今楚人貌而冠者君欲以文德合之其術迂矣君之蒞政勳法文王使文王遇貌亦使勇士

操戟逐之未必朝服與之揖也襄公曰人皆相率約君以禮子奈何欲興戎乎壇坫之間王帛交錯而使甲士刺之人其謂我何不聽往與楚子會楚子以兵車至執襄公君子曰宋襄公為萬世笑者以膠柱而鼓瑟也膠柱而鼓瑟且不可況往會強國而不知變乎

鄭人有愛妾魚者計無從得魚或汕或滲或設餌笱之列三盆庭中且實水焉得魚即生魚新脫罔罟之苦憊甚浮白而噲噲踰旦鬣尾始搖鄭人掬而觀之曰鱗得無傷乎未幾移類而食復掬而觀之曰腹將不厭乎人曰魚以江為命今處以一勺之水日玩弄之而曰我愛魚我愛魚魚不腐者寡矣不聽未三日魚皆鱗敗以死鄭人始悔不用或人之言君子曰民猶魚也今之治民者皆鄭人也哉

楚萬城語不更先生曰鼫之在田也彈丸欲擊盧犬欲磔山狸欲啖鼯若之其黠者乃往依稷焉稷社之配也世謂之稷鼠人不敢圖意而之野巢也烏鳶啄其穀鷄鳩殘其軀伯趙效其室亦不能一朝居意而

近人而家於宮則舒然安矣夫物尚有知人或失所
依何耶不更先生曰若是余將焉依萬城曰仁義汝
稷也禮樂汝宮也人依乎仁義禮樂其孰曰不然不
更先生冷然而悟君子曰人之智豈不物若哉物之
喜人則援而離也詩云依彼平林有集惟鷦鷯非平
林固不集也人孰不智哉

楚興王有燕乘之珠愛之甚函以金檢命左右負以
隨時出遊之游於雲夢之澤失焉共王不悅下令國
中曰有獲吾珠者予以萬家之邑楚國臣無小大咸

索珠簡茅淘土閭閻者三月竟不得更數年繁陽之
子牧犢於澤有氣青瑩起管中視之珠也積以獻共
王不食言乃賜之邑君子曰仲尼既沒珠之失二千
年矣求者非一世一人而弗獲之一旦乃入牧犢者
之手可以人賤忽其珠哉

衛靈公問治國之要於蘧伯玉曰寡人之國不爲小
矣久而不治欲帥虎士以禦四封何如蘧伯玉曰可
也非其要也遣使致聘以修鄰好何如曰可也非其
要也曰慎簡百僚毋聽厥官何也曰可也非其要也

曰杜闕女謂勿使行政何如曰可也非其要也曰斥
擯奸回崇厥正士何如曰可也非其要也曰儉德是
共屏棄淫侈何如曰可也非其要也曰懷保小民夙
夜匪懈如天敬之如神綏之若子何如曰斯其至矣
有民斯有國有國斯有君民者君之天也君之則君
舍之則獨夫耳可不畏哉公曰善哉言乎君子曰蘧
伯玉之言其可敬哉君者主民民之從君猶水朝宗
振古然也而曰民爲君之天何耶雖然天之生民使
君生之不使虐之虐之非君也是則君爲民立民亦

重矣哉

趙成陽壘其宮火欲滅之無階可升便其子胸假於
奔水氏胸盛冠服委蛇而往既見奔水氏三揖而後
升堂默坐西楹間奔水氏命儂者設筵薦脯醢觴胸
起執爵啐酒且酢主人觴已奔水氏曰夫子辱臨敝
廬必有命我者敢問胸方白曰天降禍於我家鬱攸
是崇虐燭方熾欲緣高沃之肘弗加翼徒望宮而號
聞子有階可登盍乞我奔水氏頓足曰子何其迂也
子何其迂也飯山逢彪必吐哺而迷濯溪見鰓必棄

履而走宮火已燭乃子揖讓時耶急昇階從之至則宮已燼矣君子曰迂儒債事往往類此是何可勝道人以經濟自負臨事之際或不知急緩以至覆亡亦何其謬哉

中山君嬖梁其生生蹇僂而椎鄙盡國中無過者唯中山君宜之一朝不見輒若有所失語大夫旃曰梁其生其智人哉何爲能安我也大夫旃曰心成憐白髮元情弗怡艷色嫫從古然也中山君曰何哉大夫旃曰君聞癸北子琴之爲人乎子琴復妃耦十年不遂

恒鬱鬱離居曲逆有醜女眇左目疹癢如叢珠且黑而羸曲逆人過而不睨醜女怒去從師學擊筑彈坎篥三年精其技又善爲北里之舞以惑人子琴一見大悅致厚幣聘以歸字曰元姬朝筑焉暮坎篥焉嬖之甚子琴稍出游歸必熟視其面無不妍者反笑世人多一目云其友宛爰都憐之爲致趙女先豔皦皦照人世謂閭頰白台不能似之子琴遂出曰何物醜類敢儕吾元姬所謂元姬其君之智人歟中山君笑曰大夫言過矣君子曰中山君之蔽一至是乎妍蚩

最易辨且不可況其他乎世道既污以佞爲賢以正直爲險邪者皆是也尚何暇中山君之笑哉尚何暇中山君之笑哉

宋大心鉤與公玉乘無庸伯仇同居於來却大心鉤學內聖外王之道滔滔而洽於心公玉乘迂之曰子之道古也不宜於今是翠黃擒鼠也千不得一焉乃舍去學假仁定霸之術三年而足之無庸伯仇又尤之曰子病大心鉤善矣子道亦未爲得是使韓盧捕鼠百而一中焉子所業則異於是公玉乘曰何術也

曰捭闔之術也儀秦之舌申韓之法軫到之略也故之一邑則一邑服放之一國則一國準放之天下則天下從是使蒙貴襲鼠也十不失一焉大心鉤公玉乘疑之相與說於秦王大心鉤進曰王道如春煦嫗兆民無跡可窺均國至仁王假臣以三十年鴻化覃於通遐矣王曰子之言美矣惟黃虞能致之爾寡人不能同也曰公玉乘進曰揣摩地勢明王之制義融於人已蝕其利王假臣以十年伯業可定矣王曰子之言良矣惟桓文能行之爾寡人不能學也無庸伯

仇見二人所對不合於是不待王見問目如明星風雷隱隱起古間利害聚如也言已且繼曰願王假臣五月之久四海諸侯皆懼膝行而來朝矣王大悅曰此寡人夙夜不敢忘者也即命爲上大夫與聞國政王乘去之齊不遇又之宋之衛無客之者晉人聞而召之亦爲大夫大心鉤輒環諸侯皆不售老死乘却一如無庸伯仇之言君子曰羽籥干戚之舞不可施鄭衛之邦亦猶子女優雜之戲不可陳齊魯之俗大心鉤欲行先王之道於春秋之世難矣哉

晉定公好以位驕人揚食我諫曰東海有巨魚名王鮪焉不知其大多少赤熾曳曳見龜楮間則其鬣也王鮪出入海中鼓浪鼓沫腥風蓋偃偃然云逢網網鮪鮪必吞日以十千計不能饜出游黑水洋海船聚洋中者萬王鮪一噴皆沒不見其從雄行海間孰何敢問之者沂潮上羅刹江潮退膠馬盡若長陵江濱之人以爲真陵也涉之當足處或戰大駭斫甲而視王鮪之肌之乃架棧而鬻割之載數百艘焉爲蔽體羣啄之各飲夫王鮪之在海也其勢爲何如一失其

勢欲爲小蛇且不可得位其可恃哉公曰寡人已知之矣子姑就舍君子曰德稱其位者恒下人反是則驕是何也德則虛不德則盈虛則能容盈則覆理也傳曰君子以虛受人又曰日中則昃月可不信夫

齊侯再伐山我負齊無問聞君將有事山戎然乎非歟公曰然何如曰以臣觀之可伐者五不可伐者一公驚曰何謂也曰謀夫孔多可伐者一也予戰銘利猶憾精明可伐者二也既稟充物饒饒希絕無仰於鄰可伐者三也卒乘輯睦隊伍成列不戰則已戰無

不克可伐者四也大而陳蔡宋衛小而邾鄆杞莒皆與國也奔號承令匍匐恐後可伐者五也以此言之止君勿行者惑也臣竊有私焉夫山戎蕞爾之邦也使誠有罪君亦既伐之矣奈何再乎爲土地耶海濱千里君悉有之何愛僻遠之野以廣君土疆爲民人耶衣冠劍舄充斥君之境土何愛黽結弁裳之俗以亂戎遺陞爲一戰可以定伯耶君已帖陳服鄭親魯而懷楚乎何假乎山戎今再帥師使使斯民肝腦潤草莽枯苗暴平野耳夫爭地以戰殘民以逞非仁君

也非仁君不足以霸諸侯此不可伐也齊侯曰大夫言固善山戎屢悖寡人奈何賓胥無曰熊羆豺虎並家於山蛟鼉魚鼈俱穴於淵九裔百蠻均宅於仁務仁德之脩獨不能容一山戎乎容之則來庭伐之則叛去力不勝德故也君請改圖焉齊侯曰大夫之言善君子曰桓公賢君哉不然何聞義則服如此也

南文子任衛國之政察見淵魚人莫不畏之一旦忽若狂易者以足衣爲巾以冠纓苴履以食豆而羹簞百物靡不反者衛君深憂之親枉駕文子之間問曰

先生病耶曰臣非敢病也曰先生非病何反悖若是耶曰臣非敢反悖也效尤也曰何謂效尤曰今國中法制不定上下無章驍暴者宇民孱夫操弓矢出闕是簞受羹而豆盛食也貴戚之卿混乎與臺是履苴冠纓也髡鉗之倫升於上士是巾足衣也舉國反易而無一人悟者君顧獨憂臣乎即實病亦一身爾如國何衛君曰目能察白黑而不見其瞽心能識壯老而不覺其形自蔽之患請爲先生更諸君子曰南文子托疾以悟衛君美矣衛君聞之即有心目之喻亦

易悟也哉詩曰鷓鴣鳴於九臯聲聞於天此之謂也

漁者庶其廉與婦競絕數月不通於越入楚兵大掠各西東匿死生不相恤人誣庶其廉盡聚諸輟謝去一日漁於海獲甲蟲曰蟹雖雄相負雖風濤不解庶其廉悔曰是物也人或不如可乎歸召婦與居禮之終身君子曰陰陽合而大化彰寒暑正而歲功成夫婦和而家政理天道也亦人道也俗降世行有反目至死弗覲者不亦悲夫視庶其廉之能悔抑又賢矣秦有尊盧沙者善誇談居之不疑秦人笑之尊盧沙

曰勿予笑也吾將說楚以王國之術翩翩然南迨至楚境上關吏繫之尊盧沙曰慎毋繫我我來爲楚王師關吏送諸朝大夫寘館之間曰先生不鄙夷敝邑不遠千里將康我楚邦承顏色日淺未敢敷布腹心他不敢有請姑問師楚之意何如尊盧沙怒曰是非子所知大夫不得其情進於上卿瑕瑕客之問之如大夫尊盧沙愈怒欲辭去瑕恐獲罪於王亟言之王趣見未至使者四三往及見長揖不拜呼楚王謂曰楚國東有吳越西有秦北有齊與晉皆虎視不悞臣

近道出晉却聞晉約諸侯圖楚刑白牲列珠槃王敦
歎血以盟曰不禍楚國無相見也且投璧祭河欲凌
王尚得真枕而寢楚王起問計尊盧沙曰使尊盧沙
爲卿楚不强者有如日王曰然敢問何先尊盧沙曰
是不可以空言白也王曰然即命爲卿居三月無異
者已而晉侯帥諸侯之師至王恐甚召尊盧沙卻之
尊盧沙瞠目視不對迫之言乃曰晉師銳甚爲王上
計莫若割地與之平耳王怒囚之三年剗而縱之尊
盧沙謂人曰吾今而後知夸談足以賈禍終身不言

欲言捫鼻卽止君子曰戰國之時士多大言無當蓋往
往藉是以媒利祿尊盧沙亦其一人也使晉兵不至
或可少售其妄未久輒敗亦不幸矣哉歷考往事矯
虛以誑人未有今後者也然則尊盧沙之剗非不幸
也宜也

宋有白冥子旂耕於渠蔭之野得石馬圓而背肉且
倍好上有蒲穀文子旂執視之質如截肪澤而有章
其璧也哉字尹旁達廉而不剗其璧也哉無功而家
大賈者禍當獻諸朝於是沐浴冠帶言於周王曰臣

渠蔭之賤夫也偶挈耒耜以耕竊不自意地不愛寶
寶獲嘉璧焉臣不敢私聞王將有事上帝方明六玉
闕其一焉敢獻諸下執事王使大夫竄受璧薦諸王
尹玉尹曰嘻是珉也卻還之子旂抱石嘆曰吾聞有
道之朝是與非別白繡裳雖華不翳以補冠太阿雖
鈍不委以割牲今強謂璧爲珉可不可乎楚邱丈人
過而視之曰子旂其幸矣哉子旂怒曰何幸也曰卞
和以玉獻尚遭刑况爾薦珉者乎子旂終不悟君子
曰士以真材樹且猶不可假才能自致與嗚呼世不

特一子旂也

越人甲父史與公石師交甲父史能計而弗決公石
師善決而計疏各合其長事無留行人兩而一心也
因語相侵離去政輒敗密須奮泣諫二人曰君不聞
海蟲有水母乎水母無目資蝦以行蝦亦資水母食
兩不能無也水母姑冥之又不聞有瑣瑤腹藏蟹飢
則蟹出求食歸則瑣瑤飽否乃死蟹失所巢亦兩不
能無也瑣瑤姑冥之又不知憂蟹飢乎與瑣瑤驢
此爲瑣瑤驅驢謁甘草卽有難瑣瑤驅驢負而走亦

兩不能無也。蜚鼠姑冥之。又不聞西域有共命之鳥。乎。和首一體性多妬。既則爭啄一俛其腹。食毒草害之。及下噬皆斃。亦兩不能無也。是皆山海燕爾不足怪。雖人亦有之。北方有比肩之民。迭食而迭望。夫一則死。亦兩不能無也。今二人甚類之。其所異者。彼以形。此以事。爾奈何離去。奈何離去。二人相顧曰。微奮言。吾等將愈敗。驩焉如初。君子曰。十二官各有所司。必相資以成體。况尺有所短。寸有所長。何可自用哉。泰須奮可謂善諷矣。

倚于皋。聞尾勺氏言。豹善捕獸。以雙白璧易之。且肆逆。召所與游者。飲出豹。而誑其能。於是治金為繩。繫之文羅。日割牲啖之。居亡何。有碩鼠過。宇下急解豹。斃之。豹視鼠。若不見。倚於皋。怒詈之。他日。又有鼠過。焉。倚於皋。復縱之。豹遇鼠。如初。倚於皋。怒鞭之。豹輒嗥。倚於皋。愈鞭之。易以縲紲。冥之。牛羊棧中。日舖以糟。豹喪欲泣。倚於皋之友。安茶于他間。之。謂曰。吾聞巨闕雖利。補履不如利錐。錦綺雖麗。供饋不如尺布。文豹雖驚禽鼠。不如狸狌。子何愚也。曷不用狸狌。鼠

而縱豹捕獸哉。倚于皋說如其言。未幾。狸捕鼠。且盡。豹獲麋鹿。先以歸。無算者。君子曰。獸固善捕。亦各有所能。至於用人。乃適其才。何耶。

楚多鵠。善格如膠。弗之解。大夫黎嗜之。偶使韓逆扶以行。左右言於韓君。君說之。今國中羅鵠與格。皆不勝。君以韓無鵠。愧之。無鈞大夫曰。夫鵠海內所有也。而韓獨無乎。然而能格與否。在所擇焉。今衣褐而班文。鵠也。翁鱗而尾佳。鵠也。刀啄而戰距。鵠也。鵠則鵠矣。求能格者。幾何。雖然。此不足道也。國中圓冠方屨。堯行舜趨者。皆士也。能與君排難解紛者。復幾何。能否在君不在物也。君說擇善。鵠與黎格。卒大勝。韓因此而得擇士之法。君子曰。古語有羊質而虎皮。見草悅。見豹戰。士鮮不類之。然豈無真虎哉。亦患人君不能用爾。

楚師師伐晉。晉人恐。嚴甲兵以待。楚入河陽。退師。未幾。又入。如是者三。晉侯疑朝。羣臣問焉。伯瑕對曰。楚誘我也。急宜敗。弗敗。必深入存亡。不可期。晉侯曰。子計疎矣。伯瑕患曰。君如勿納。臣言臣終不能得。隨君

請先去之晉侯斤之問步毅步毅對曰楚非昔楚矣執政聚衆內嬖曰威芟綺穀而副玉珣者後宮千人且酣惟日不足焉龍及我問士渥濁士渥濁對曰穀言固當亦知其一未知其二者也楚西有秦難東諸侯則齊鄭魯衛枕戈待隙獨吾國有新喪未暇攻彼虞我兵起五國必應之故先動相制耳不足慮也問范匄匄對曰如二大夫言問韓起韓起大笑絕纓晉侯變色曰大夫笑寡人乎對曰老臣何敢笑君實笑鴈奴不知也晉侯曰何謂也曰貝區之澤白鴈聚焉夜必擇栖恐人弋已也設鴈奴環巡之人至則鳴羣鴈藉是以棲澤人熟其故藝火照之鴈奴憂然鳴澤人遽沉其火羣鴈皆驚起視之無物也如斯者四三羣鴈以奴始已共啄之未幾澤人執火前鴈奴不敢鳴羣鴈方寐一網無遺者今楚師進退三執火之謂也君何不少察之乎晉侯曰爭人不當如是哉於是大嚴守備楚子聞之曰勿謂晉無人不敵侵君子曰晉侯其善謀哉集衆人之慮必有一長者及韓起獻計楚人知悉其情遂退師詩云先民有言詢於芻蕘

況士乎宋剗成君自高自高視羣臣皆有諫者輒拒曰爾欲上我耶毋不已也指所佩劍曰懼此乎肯涕汗而退欲造九成臺於雍邱之郊恐羣臣言戒門者毋納士納則死北殿子且謂門者曰吾將見吾君門者沮之子且堅欲入且曰吾事君十年豈不知君君所甚惡者諫耳吾不諫則已何沮也曰子既不諫欲入何爲曰吾善爲鷄戲將以悅君也門者入白剗成君君召至子且鼓肱爲翼膠膠而長鳴鳴已急趨出氣甚暢君怪之趣使還問曰子人耳乃效鷄鳴何也曰臣尊鷄甚故效之曰何改尊之曰臣以堯舜之知或不如此曰是何言歟是何言歟寡人聞非聖人者無法况方之異類乎曰臣言敢非聖人竊有疑也道蔽天地者堯德極萬世者舜皆古聖人也今謂其知不鷄若者說過乎激然風雨冥晦能司晨不愆度者堯舜能之乎曰不能也曰堯舜雖大聖司晨必以鷄乎曰固也曰君知如此奈何盡下羣臣無若鷄者乎君喜曰羣臣無言及茲者今乃始聞之寡人有過子宜力諫也

曰君令臣諫臣不敢隱今賦急民單環四封皆強敵夙夜憂勤且懼不免况事游觀乎曰寡人不敢也曰君曰不敢而造九成之臺何也別成君即日罷其役君子曰日之行晝天下無不照月之行夜萬國無不明然日月之光有所不及者一燈之微足補其功此蓋子且鷄喻之說也

余爲燕書四十篇蓋取鄭人誤書舉燭之義讀者好之謂有秦漢風余獨愧汗弗止者何也自嬰憂患以來神情銷沮見於觚翰之中氣蕭而辭荒惡在其能秦漢也不猶優孟之似孫叔敖哉

大乙元微記

明 宋 濂

金華宋濂賦質甚弱十口九疾生產作業之事皆力有所不任惟日學操觚造爲文章精思弗得罷極就寢夢一老父白髮鬚髯與雲鬪潔身被黃服手支青藜杖徐徐而前招濂謂曰若何疲思之甚耶吾乃太乙之精在皇漢時曾降天祿閣以洪範五行授劉向若今意有何圖第言之吾當有以處若也濂再拜曰下上蟻蠱臣不自料得接休光以沐浴神化亦既幸矣復不以臣之微賤使吐其情辭臣雖無知敢不精白一心以承需脫臣受氣於天孱弱而蒙唐虞之歲律中應鍾在於次地寒以風毋姪七月臣體即降生未五齡百疾交攻熱火鬱水邪沴制陽肝氣動搖手牽目瞠謁鑒視之謂爲癰癰毒艾焮膚其苦莫膺雖脫於虎口筋骸弗彊有牛負輓有鑄在場力既勿任田卒歲荒幸有書一束塵蠹齏戕以佩以藏以噉以嘗以求其方疲精竭思攻爲文章窮年矻矻恒不知變更太乙曰吾聳心有所溺者必有所甚樂也若之所嗜如是將樂之邪抑弗獲已也濂曰爲文之時獨

潛闔廬五官內守形若縻株凡慮既澄運思希裔上
升層霄下入重壚網緼庶彙彌布大區自形自色匪
可數知一一攝之若禽在笥若獸在周陸縱健距捷羽
曾不得離其範圍及天意暢氣熙與神合機岳盪河
翻雷推霆驅倏爾陰合歛然陽施鬼出電入載正載
奇萬終千變莫窮端倪雖身執台樞腰縣金魚饌羞
熊蹯居飾璇題入則面姝吹竹彈絲出則戎士負弩
曳旂亦不足以踰其適臣實樂之初非有弗獲已也
太乙曰若樂則樂矣古之人亦有業是者乎濂曰有
之雖更僕不可盡也請陳其畧昔有鉅儒曰大史遷
豪氣孤騫濶視無前執筆著書動數萬言稅之金匱
及藏召山至今文光上燭九天董生三策揚雄太元
相如大人退之五原若修若軾若鞚之堅各有論著
焜耀後先虎鳳騰躍韶鈞相宣汗瀾卓蹕盤紆蟬連
業之既專厥功乃全其功何居時磨研之矜之獲之
湘之淪之炊之酌之使心樂之一日不治若芒刺肌
六氣昏昏精神不來由是觀之古之人所業其亦有
以哉太乙曰嘻若言陋矣知兎角頤胡之爲象而不

知弁冕纓綬之制知糗飯藜羹之爲美而不知淳熬
肝膏之味知吳歎楚艷之爲曲而不知憂復武勺之
音若言陋矣濂於是慨然自失膝行而進俯首至地
且拜且祈曰臣不佞竊受教於先生長者學文二十
餘年自意已造其極不知猶未也夫井魚固不足以
語天夏蟲固不足以語寒幸察臣之誠憐臣之愚授
臣以要道使臣聞之雖即死無憾太乙愀然不答濂
復殷勤致辭俯伏俟命歷一時之久太乙三難而後
言曰上堪下輿惟人中居厥初芒芡薺未有知野鹿
標枝蚩蚩狂狂聖人者出扶弼教基揭我日月燭我
冥廋所謂建生民極立天地心者是不有其道歟道
雖亡形揆文可知典謨渾淳卦畫閎奇雅頌恢張禮
樂威儀春秋謹嚴衮褒鉞誅不由於此去道遠而舍
其根菱玩其葩葉而何以史遷諸子爲且非文不行
非文不章天子非文曷風四方諸侯非文莫守其邦
卿大夫非文身爵不揚士庶人非文卒過於鄉故云
文者乾坤之精粹也陰陽之肅和也四時之衡石也
百物之錙鎰也中國之丕章也四裔之儀法也可不

務乎彼辨博馳騁以和奪正是誣世也卑辭甘言藉
威取寵是媚權也佞墓受金是非舛繆是罔利也氣
亡魄喪厥厥不振是萎蘭也抽青媲白眩人耳目是
聲替也若此者弗可枚舉其文乎哉其文乎哉吾前
之所謂文則異於是矣尤於一身和順內積英華外
發達於四國民物阜康政教洽筆之於書則可爲
天下後世法傳曰有德者必有言若之志勤矣其亦
慎所學哉言訖四方晦冥颼風上行仰視天門如有
火光反而顧之太乙已亡濂驚而寤不知其爲何祥

也乃召日者占之日者端橫出著左右探之挂而扐
之遇復之離曰是謂後得而先迷百折倚岐展張安
歸雖車堅馬肥終九顯而一隋或道之於崇期載旌
以驅歷國過都騰宰致饋司里授廬不亟不徐直抵
夫元聖之所居蓋復者不遠復也而重離又文明之
象也此殆子學文元微乎濂於是惕然悟悉蟠毀筆
硯取六藝燭溫之未幾學果進

書客言二首

明 宋 濂

天台李某遇盜官爲購捕之有刀礪工出簪珥粥諸
市市魁執送官工具言私於下東鄰女得之官逮女
問狀女戰栗不能言工曰爾毋伴惡爲也爾左乳有
藏可驗官覆之信然女恚自剄死三月始得真盜
初女童子時常用工雞髮故知女藏工怨女嫁時不
償其勞陷之黃巖少年嘗游於博徒一日飲市上市
人携虛篋與博不勝馳而去少年慚其紿已躡至大
澤中杖之仆地有一翁挾子過焉意其病厥也扶還
其家未至而氣絕市人家縛翁父子赴官子哀慟不
伏翁謂子曰兒毋用苦吾老矣自度在世無幾願易
兒也子聞之輒自陳殺市人狀甚悉官用縱翁歸翁
念兒冤也自經死
爲說者曰漢張釋之爲廷尉天下無冤民嗚呼今之
從政者其釋之也哉

賣柑者言

明 劉基

杭有賣果者，善藏柑，寒暑不潰，出之煜然，玉質而金
色，置於市，買十倍，人爭鬻之。予買得其一，剖之，如有
烟撲口鼻，視其中，則乾若敗絮，予怪而問之。若所市
於人者，將以實還豆奉祭祀，供賓客乎？將街外以惑
愚瞽也？甚矣哉，爲欺也。賣者笑曰：「吾業是有年矣，吾
賴是以食，吾經售之人，取之未嘗有言，而獨不足
子所乎？世之爲欺者，不寡矣，而獨我也乎？吾子未之
思也。」今天佩虎符，坐皋比者，洗洗乎干城之具也，果
能授孫吳之畧耶？峨大冠，拖長紳者，昂昂乎廟堂之
器也，果能建伊臯之業耶？溢起而不知禦民，困而不
知救吏，姦而不知禁法，斁而不知理生，縻廩粟而不
知恥，觀其坐高堂，騎大馬，醉醇醪，而飲肥鮮者，孰不
巍巍乎可畏，赫赫乎可象也？又何往而不金玉其外，
敗絮其中也哉？今子是之不察，而以察吾柑乎？然則
無以應退而思其言，類東方生滑稽之流，豈其憤世
疾邪，而託於柑以諷耶？

君子非有恭敬則不齊

明 劉基

祭統曰：「君子非有大事也，非有恭敬也，則不齊。」是非
所以語君子也。夫君子之所以爲德者，恭敬而已矣。
恭敬也者，不可須臾離也。故孔子之語仲弓曰：「出門
如見大賓，使民如承大祭。」大雅之述文王曰：「於緝熙
敬止。」又曰：「不顯亦臨，無射亦保。」聖人無一息之不恭，
且敬何待乎？齊齊所以篤其恭敬，猶恐其未至而致
之聖人，不自滿假之心也。謂之非有大故，不齊猶可
也。謂之非有恭敬，則不齊大不可也。信斯言也，是不
齊之時，不恭敬矣。豈所以語君子哉？其悖也甚矣。或
曰：「然則所謂不齊，則於物無防也，嗜欲無止也，如之
何？」曰：「其疵同也，猶可謂之泛論。泛論非言君子，猶可
說也。不若非有恭敬，則不齊之階而不可舉也。大抵
漢儒記禮之言，多駁往世，流於文而失於理，取其長
而去其短可也。」

郁離子

明 劉 基

郁離子謂執政曰今之用人也徒以其數與抑亦以爲良而倚以圖治與執政者曰亦取其良而用之耳郁離子曰若是則相國之政與相國之言不相似矣執政者曰何謂也郁離子曰僕聞農夫之爲田也不以羊負斲賈子之治車也不以豕馱服知其不可以集事恐爲其所敗也是故三代之取士也必學而後入官必試之事而能然後用之不問其系族惟其賢不鄙其側陋今風紀之司耳目所寄非常之選也儀

眼云子哉言語云子哉乃不公天下之賢而悉取諸世胄昵近之鄙那豎爲之是愛國家不如農夫之田賈子之車也執政者許其言而心忤之

郁離子曰一指之寒弗煥則及於其手足一手足之寒弗煥則周於其四體氣脈之相貫也忽於微而至大故疾病之中人也始於一瘵理之不知或知而忽之也遂至於不可救以死不亦悲夫天下之大亡一邑不足以爲損是人之常言也一邑之病不救以及一州由一州以及一郡及其甚也然後傾天下之力

以救之無及於病而天下之筋骨疏矣是故天下一身也一身之肌肉腠理血脉之所至舉不可遺也必不得已而去則爪甲而已矣窮荒絕徼聖人以爪甲視之雖無所不愛而捐之可也非若手足指之不可遺而視其受病以及於身也故治天下者惟能知其孰爲身孰爲爪甲孰爲手足指而不逆施之則庶幾乎弗悖矣

楚太子以梧桐之實養梟而異其鳳鳴焉春申曰是梟也生而殊性不可易也食何與焉朱英聞之謂春申君曰君知梟之不可以食易其性而爲鳳矣而君之門下無非狗偷鼠竊亡賴之人也而君寵榮之食之以玉食薦之以珠履將望之以國士之報以臣觀之亦何異乎以梧桐之實養梟而異其鳳鳴也春申君不寤卒爲李園所殺而門下之士無一人能報者石羊先生謂郁離子曰子不知予之憂乎郁離子曰何爲其不知也曰何以知之曰周人有好妓服者有不足於其心則怙怙而不置必易而後懷一日有所之袂涅而弗知也揚揚而趨樂甚其友半途而指之

涅則悅而嗟攝而擄之涅去而跡在其心妯娒然五步而六視不成行而復鄭子陽好其妻其妻美而顙齧蔽之以瞿三年未之見一夕而褫其瞿見焉則快然不樂申旦而不寐其妻雖以瞿蔽之終不好矣故陰谷之木生於蔽蔽之下終年不見日月之光而不怨者不知天之有日月也

梧邱之野人種稻以爲食歲儲舊而待新新未嘗不敢竭其舊旦日之畝視其禾皆穎而且粟喜而歸曰新可期矣則皆發其舊與其人飽之舊且盡而新未

熟不勝其舛望與其子及妻更往而迭視蹊其畝而禾愈青是非禾之返青也望之者切也

荆人有走虎而捐其子者以爲虎已食之矣弗求矣人有見而告之曰爾子在盍速求之弗信采薪者以歸子之他日遇而爭之其子弗識矣

趙王之太子病召醫緩緩至曰病革矣非萬金之藥弗可問之曰是必得代之楮荆之玉岫嶠之沙禹同青蛉之空曾青崑崙之紫白英合浦之珠蜀之犀三韓之寶龜璽無閭之珣珎合汞鉛而鍊之一年而

和二年而成三年而金粟生則取而埋諸土中又三年而服之斯可以起矣淳於公聞而笑之曰誠哉所謂醫緩矣

莊子之齊見飢人而哀之餓者從而求食莊子曰吾己不食七日矣餓者吁曰吾見過我者多矣莫我哀也哀我者惟夫子向使夫子不食其能哀我乎泰龍先生謂石羊子曰往予汧於江十日而風恒從西來及還而沿又十日而風恒從東來從者恚而泣予唏之曰天有風主爲予汝乎何爲泣也

濟陰之賈人渡河而亡其舟棲於浮苴之上號焉有漁者以舟往救之未至賈人急號曰我濟上之巨室也能拯我予爾百金漁者載而并諸陸則予十金漁者曰向許百金而今予十金無乃不可乎賈人勃然作色曰若漁者也一日之獲幾何而驟得十金猶爲不足乎漁者默然而退他日賈人浮呂梁而下舟薄於石又覆而漁者在焉人曰盍救諸漁者曰是許金而不酬者也立而觀之遂沒都離子曰或稱賈人重財而輕命殆吾不信而今知有之矣張子房謂漢王

曰秦將賈人子可啗也抑所謂習與性成者與此陶
朱公之長子所以死其弟也孟子曰故術不可不慎
也信哉

楚使芊叔爲尹課上最楚王大悅詭諸朝孫叔敖仰
天大笑三噫而三顧楚王不懌曰今尹有不足於寡
人與盍數之而廷恥寡人竊爲令尹不取也孫叔敖
對曰臣之里人有滂池以爲利者吳行人過楚見其
魚鼈之物也謂之曰我善漁臣之里人喜爲之具罔
畧舟楫資其行則趨而之其池曰我於是乎漁臣之

里人蹙然曰吾惟子能取江湖之魚以益我也若是
則我固有之矣而爲用於爲哉今楚國之民莫非王
民矣芊叔之尹申也不聞有令政以來鄰國之民而
多取諸王之固有以最其課是則王之股以啗王也
則王之左右皆能之矣不惟是大也今王朝羣臣而
譏之羣臣不佞由是而度王心則相率而慕效之以
爲敵國驅是社稷之憂也楚王曰善哉乃黜芊叔下
令國中曰下邑之大夫有效芊叔剝吾民以最課者
服上刑楚人大悅三年而霸諸侯

司城子之園人之子食鰕鮓而死弗哭司城子問之
曰父與子有愛乎曰何爲其無愛也司城子曰然則
爾之子死而弗哭何也對曰臣聞之死生有命知命
者不苟死鰕鮓毒魚也食之者夫人莫不知也而必
食以死是爲口腹而輕其生非人子也是以弗哭司
城子愀然歎曰好賄之毒其猶食鰕鮓乎今之役役
者無非口腹之徒也而不知園人之弗子也甚矣
岐山之鷹既化爲鳩羽毛爪皆皆鳩矣飛翔於林木
之間見羣羽族之鵲然集也超然忘其身之爲鳩也

鵲然而鷹鳴羣鳥皆翕伏久之有鳥翳薄而闕之見
其爪背羽毛皆鳩而非鷹也則出而噪之鳩倉皇無
所措欲闕則爪與背皆無用乃竦身入於灌木呼其
朋而逐之大困郁離子曰鷹天下之鷙也而化爲鳩
則既失所恃矣又鳴以取困是以哲士安受命而大
含悲也

齊宣王與盼子游於圃出鳥獸魚鼈而觀之見其馴
狎而不驚也洋洋然有喜色盼子問曰王何以能使
之若是哉王曰吾惟其性之欲而非逆焉耳盼子曰

王必以山林處其狐狸猿猴沼處其魚鼈而澤處其鴻鴈乎王曰然盼子曰王必以內飽其虎豹果飽其猴猿狐狸飽其鴻鴈鷄鶩飽其狐狸乎王曰固然盼子曰使虎豹一日無內猴猿一日無果鴻鴈一日無稻梁狐狸一日無鷄鶩則王能安之乎王曰不能也今欲以澤沼處虎豹狐狸猴猿而山林處鴻鴈魚鼈則王能馴之乎王曰不能也曰然則王之所以處鳥獸魚鼈無不得其所矣彼必感王之惠而知所以報王矣今濟與洸闕河濟洸泗同溢民庶流離無人以拯之臣請舉豹三晉合兵伐我侵車東至阿無人以治之臣請舉虎瀛博之間海溢水肩於城郭無人以䟽之臣請舉鼈四郊多壘烽火不絕狗偷鼠竊乘時而興無人以治之臣請舉狐戎卒相持千里餽餉禾黍不登倉廩空竭無人以理之臣請舉鷹禮典違闕紀法失守敵國使至無人以應之臣請舉猴忠信不孚民隲其情斷獄多辟無人以明之臣請舉獲力本無資草萊滿蔓四野荒蕪無人以闢之臣請舉狸而王可以坐鎮齊國矣王勃然色變盼子曰王無怪也

臣以為王不惜桑麻之地以為山林沼澤不惜人食以養禽獸者為其足以承王之任使也今皆不可則必於人乎取之而王之待士未見有惟其性之欲而弗逆者也未見有處之必以其處而食之必以其食者也則王之所重輕人知之矣而又欲繩之以王之微纆範之以王之桀度彊之以其所不能迫之以其所不願則任王之事者非圖誅備則有所不得已焉耳而欲望其悉心竭力與王共治齊國是何異乎桀枯槁以防水鑽朽木以取大哉於是宣王豁然大寤投案而起下令放禽獸開沼澤與民共之禮四方之賢士立盼子以為相齊國大彊秦楚致霸盼子之力也

吳王夫差與羣臣夜飲有鴝鵒鳴於庭王惡使彈之子胥曰是好音也弗可彈也王怪而問之子胥曰王何為而惡是也夫有口則鳴物之常也王何惡焉王曰是妖鳥也鳴則不祥是以惡之子胥曰王果以為不祥而惡之與則有口而為不祥之鳴者非有一鳥矣王之左右皆能鳴者也故王有過則鳴以文之王

有欲則鳴以道之王有事則鳴以持之王有聞則鳴以蔽之王臣之順己者則鳴以譽之其不順己者則鳴以毀之凡有鳴必有為故其鳴也能使王喜能使王怒能使王聽之而不疑是故王國之吉凶惟其鳴王弗知也則其不祥孰大焉王胡不此之虞而鳥鳴是虞夫吉凶在人禽鳥何知若以為不祥則慮而先為之防求吾闕而補焉所益多矣臣故曰是好音也郁離子與艾大夫偕謀盜士有倖盜以請賞者予之金不願而請爵大夫不可郁離子請予之大夫曰爵王章也弗可濫也郁離子曰大夫之言是也然吾嘗觀於園人矣果實之未摘雖其家人不敢求嘗焉及其既摘而餘則蚊蚋皆聚而啗之矣漢曲之處女色若朝虹觀者慕之不敢求也一旦歸於娼家則儂子挑夫庸奴賤皂之有金者皆得而覲之今朝廷之尊爵大盜得之士之有恥者弗欲仕矣而猶有願之者未之思也矧敢靳乎此鄙之獠人以肉養狗而怒其子之竊食其骨於是室家離心子必悔之郁離子謂執政者曰物之所貴於天下者以其少有

而難得也如使明珠如沙黃金如土則人皆得而有之其何以能貴乎故服有章爵有等使人不可以妄覲然後王命尊而榮辱行此鼓舞天下之奇貨也昔者趙王得於闐之玉以為爵曰以飲有功者邯鄲之國解王跪而執爵進酒為魏公子壽公子拜嘉焉故鄙南之役王無以為賞乃以其爵飲將士將士飲之皆喜於是趙人之得爵飲重於得十乘之祿及其後王遷以爵爵嬖人之詆痔者於是秦伐趙李牧擊却之王取爵以飲將士將士皆不飲而怒故同是爵也施之一不當則反好以為惡人知寶其所貴而已矣

續志林

明 王 禕

古稱文章家自漢唐而下莫盛於宋東都歐陽脩氏曾鞏氏王安石氏並時迭起而蘇軾氏於其間爲尤傑然者也蘇氏之文長於持論縱橫開闢上下變化無不知其意之所欲言雖其理不能皆純而其才氣之浩博固將躡漢唐而上之矣余讀其書愛其志林諸篇議論超卓而文章馳騁殊可喜中心慕之因竊其餘論續爲十八篇陳俚樂於金聲玉振之餘廁瓦缶於夏鼎商敦之末亦見其不知量已然而願學之意則庶乎君子有取焉王禕序

今錄八篇

周穆王時徐偃王爲國除去刑爭末事君國子民待四方者出於仁義而穆王無道意不在天下四方諸侯之爭辯者無所質正咸賓祭於徐焉或謂楚文王曰徐偃王好行仁義之道漢東諸侯三十六國盡服矣王不伐楚必事徐楚遂興師伐徐殘之徐偃王將死曰吾賴於文德而不明武備好行仁義之道而不知詐人之心以至此也君子曰仁義天下之卒也自古有天下者由之以興矣未有由之而亡者也謂行

仁義而亡者知假仁義之名而不知所以爲仁義者也徐偃王之謂也夫徐處淮之南北而得乎地之中其爲中國患久矣先乎穆王當成王時即已肆其強暴書所謂淮夷徐戎並興東郊不開是也後乎穆王至宣王時其馮陵爲尤甚詩所謂徐方驛驤是也當穆王時天下晏安而天子乃無意於天下方乘八龍西遊與王母宴於瑤池之上逸樂而忘反於是偃王時得乘間而起用其籠絡駕馭之小智煦煦以爲仁予子以爲義以壅替東諸侯而諸侯之爭辯者適無所質正乃咸賓祭於徐庭偃王蓋自仁義之道爲止於是而王業固可圖而不知所以爲仁義者不在是也故未幾爲天下諸侯所不容而國以遂敗身以遂亡而偃王顧謂吾好行仁義之道以至此也嗚呼籍使偃王誠知仁義之爲道而力行之則民之附之者心必堅諸侯之從之者名正而言順湯武之業可成也其何敗亡之有惟其不知所以爲仁義而徒假仁義之名故不旋踵而敗亡世之論者因以謂湯武以仁義興偃王以仁義亡興亡雖殊其爲仁義一也嗚

呼亦孰知仁義雖一而行之有不同僂王假其名而行之湯武則真知之而行之以無偽者也興亡之效固判然不同矣湯武僂王奈何同年而語哉春秋之時宋襄公欲圖霸亦徒假仁義以為名與楚人為泓之戰曰吾文王之師也不禽二毛不鼓不成列一戰而敗國以幾亡故宋襄公之仁義即徐僂王之仁義也一則假以謀王而不成一則假以圖霸而不就皆假其名而不知用其實者也或曰齊桓晉文亦假仁義者也而其霸業以成何歟曰齊桓晉文之於仁義

善假之者也假之而善故其業已成僂王襄公則慕仁義之名而不善假不善于假其敗亡也固宜此又其得失之所由分也

太史公曰學者皆稱周伐紂居洛邑其實不然武王營之成王使召公卜居居九鼎焉而周復都鄴鄴至犬戎敗幽王周乃東遷于洛蘇氏曰周之失計未有如東遷之謬也自平王至於亡非有大無道者也然終以不振則東遷之過也君子以周之東遷非過也謂周自東遷而益衰可也謂東遷而致衰不可也周

居鄴鄴鄴在西故謂洛為東都自武王遷九鼎于洛固已有意於經營周公相成王成武王之志於是乎卜洛以建邑而郊邱社壇宗廟市里無乎不備是固以洛邑為可都矣謂洛邑形勢不如西周之據函崤界蜀隴邠則東有成皋西有散邕背河向伊洛其固有足守也謂洛邑土地不如西周為天下土腴邠則左伊右瀍沃衍可以富也而況天下之中實維洛邑陰陽之所和南北日晷於是而取正道里之所均四方諸侯於是而取則是則雒邑曷嘗不可以為都也以書考之周公告成王使居新邑以為治王因遂東故曰戊辰王在新邑烝祭歲是成王嘗治洛邑事烝祭矣以詩考之宣王微車馬備器械會諸侯於東都因田獵而選車徒是宣王又嘗至洛邑會諸侯矣然則平王之遷洛得非先王之遺意而豈可謂其失計乎藉使周因東遷而致衰則曰盛國百里已非一日西夷交侵有甚於戎伐九伯南征不復有甚於問鼎重豈至平王以後而然耶蓋周自厲王之亂王室板蕩不有宣王以中興之吾見其不待東遷已無周矣

宣王之後幽王失德王室又大壞使平王不遷周其將不衰乎使文武而東遷周其有不興乎是周之所以衰因無令王以振興之初不以遷故也且堯都平陽而舜遷蒲坂禹又遷安邑商自契至湯八遷盤庚五遷是唐虞夏商之都罔有定止蓋屢遷矣奈之何獨以周之東遷爲失計耶遷都之義曰洛邑之地四通而平使有德易以興無德易以衰則都洛本可以致興而所由致衰者固在於不德也周以後漢世祖都洛矣而延祚二百魏孝文又都洛矣而太和稱治有德而都洛無有不興之理此古今之所同然者然則周有天下傳主三十七而平王以後凡二十四王歷年八百六十有七而東遷之後猶五百三十八年平王之東遷其果失計乎哉

漢高帝既定天下謂羣臣曰運籌帷幄之中決勝千里之外吾不如子房鎮國家撫百姓給餽餉不絕糧道吾不如蕭何迎百萬之衆戰必勝攻必取吾不如韓信三者皆人傑吾能用之此所以取天下也君子曰知人善任使此帝王之略也夫以高帝之雄姿大

度而當其任使者又皆天下之才其取天下也固宜矣方其與項籍俱起叛亡逐秦鹿蚌鷸相持者八年高帝之命懸於籍手數矣而籍卒以敗亡者籍專爲暴高帝務爲寬大故也高帝之入咸陽也秋毫無所犯籍至大而屠之暴與寬大異趣如此楚漢興亡於於已決况籍有一范增而不能用而高帝則攬一時之英豪而御如所謂三傑者皆天下之才也而用之各能當其才及其成功且曰吾不如焉是可謂知人善任使有帝王之略矣其得天下不亦宜乎雖然高

帝固善知人爲可尚抑所以任使之道則未免持駕御之術以求縛馳驟之蓋有無足多者當韓信爲治粟都尉蕭何數言其奇而高帝故不用殆欲激之使亡爾既亡而迫得之則信以爲必死矣反遽拜之爲大將使其以任遇大重爲過望效死以酬恩不復叛而信遂謂漢遇我厚也此在其術中而不知者也鄺食其爲漢謀撓楚欲立六國後高帝非不知六國後不可立也而以問良是特以嘗其心焉耳蓋良始惟爲韓報讐又嘗說項梁立韓諸公子橫成君成爲王

而已爲韓司徒而後又自襄中去漢而歸韓高帝恐
良終爲韓不爲漢故因疑其謀以嘗良豈果不知六
國後不當立哉而子房固且力陳其難以爲不可此
又在其術中而不知者也蕭何與高帝同起事蕭專
任守關中漢廷諸臣功無與比高帝恐其脫自驕
以取禍故遣卒爲衛又繫之廷尉以抑折之使自謹
守以保全終非誠疑何也設誠疑之則已以待韓彭
者待之矣而何至自汙以求免此又在其術中而不
知者也嗟乎三子者皆人傑然後於高帝術中而皆
不知而高帝既知三子之爲人傑矣乃徒以術御之
下復知有忠信之爲道君臣之際其不俱可惜哉且
吾聞之舜之於十二牧武王之於十臣其君臣之相
與無非忠信之道焉上以誠求下下以誠事上元首
股肱視同一體烏有所謂相持之術哉嗚呼此古帝
王之所以爲盛也高帝非不得天下也然其君臣之
際如此其不有愧於古帝王也夫

高帝六年叔孫通徵魯諸生起朝儀魯兩生不肯行
曰今天下初定死者未葬傷者未起又欲起禮樂禮

樂所由起積德百年而後可興也君子曰兩生之所
謂禮樂非禮樂也彼以爲禮樂矣而吾謂非禮樂何
哉彼徒知其文而非其本之謂也記曰禮者天地之
別也樂者天地之和也天高地下萬物散殊而禮制
行矣流而不息合同而化而樂興焉又曰大禮與天
地同節大樂與天地同和孔子之論以爲禮云禮云
玉帛云乎哉樂云樂云鐘鼓云乎哉孟子之論先之
以仁義而曰禮之實節文斯二者是也樂之實樂斯
二者是也此禮樂之謂也夫禮樂不可斯須去身者
也聖賢之治身即其所以治天下國家者也以其不
可斯須廢者而必俟乎百年亦何其迂之甚也是故
無本不立無文不行其可損益因革者文也故忠變
爲質質變而文繼文者不能保其不變也夏變而漢
漢變而武繼武者亦不能保其不變也此皆文之謂
也至論其本則古今一而已矣孔子所謂百世可知
者也吾故曰兩生之所謂禮樂非禮樂也禮樂之文
而非其本之謂也自兩生創是說而漢儒悉宗之終
漢之世禮樂之說紛如而其大槩則正朔也服色也

辟雍也井田也封建也雅樂也是皆帝王經制之具而掃滅於暴秦者有王者作固當修而明之然漢之賢君莫如孝文漢興至是已及百年禮樂之興雖其時矣而賈生請改正朔易服色定官名興禮樂則謙讓以爲未遑惟以德化民故海內安寧煙火萬里成康以後稱治者莫如焉至武帝而改正朔矣議明堂矣至成帝議立辟雍未作而王莽作之矣至哀帝而詔定雅樂罷淫聲矣此三君者其於致治何如也自漢以來千數百年之間有爲之君臣於斯數者未嘗不講明之其說易通而易行者正朔服色也言人々殊而或行或不及者明堂辟雍雅樂也其說雖多而終不可行者封建井田也夫其可行者因之不可行者革之而皆足以爲一代之治則其爲禮樂之文而非其本也明矣禮樂之文無與於治道也明矣蓋高祖以馬上得天下而輕詩書叔孫通鄙儒也因拔劍擊柱之事將肅朝儀以止喧嘩乃進儒者可與守成之說夫肅朝儀以綿最從事其事至末也而通以爲儒者守成之事兩生以爲興禮樂之事嗟乎儒之爲

儒禮樂之爲禮樂止是而已乎至隋文中子講道河汾謂其徒魏徵房杜曰先輩雖聰明特達然逢明主必愧禮樂及聞江都之變曰道廢久矣如有王者出三十年而後禮樂可稱也十年平之十年富之十年和之斯成矣其後唐太宗與房杜論興禮樂曰禮壞樂崩朕甚愍之有志不就古人攸悲時難得而易失朕所以遑遑也徵與房杜皆慚悚而退是數公者可謂興王之良佐而明於古今之治體矣雖未嘗以改法立制自任至論其輔佐之實則房杜之彌縫魏之諫諍皆人臣之所難爲在其規禮樂也是故以征伐取天下者莫如湯武湯武造邦之初語其臣下曰無從匪彝無即怙淫各守爾典以承天休此禮也攸徂之民室家相慶此樂也武下車之初列爵惟五分土惟三建官惟賢位事惟能此禮也大賚於四海而萬姓悅服此樂也然則革命不崇朝而禮樂行乎其間亦烏待於三十年之久乎故吾以謂兩生之所謂百年文中子之所謂三十年皆徒論禮樂之文而非達其本者也嗟乎兩生不足道也文中子動以聖人自

擬而立論若是幾何而不爲叔孫通也哉

光武遭漢中衰紹恢前緒征伐四方日不暇給而乃敦尚經術賓延儒雅開廣學校修明禮樂繼以明章臨雍拜老橫經問道自公卿大夫至於郡縣之吏咸選用經明行修之人是以教立於上俗成於下自三代既亡風俗之美未有若東漢之盛者也君子曰國家風化之成非一人之爲一日之積也爲之非一人故行之也無弊積之非一日故守之也有素此所以既成而益隆愈久而不替者也周之有天下也始於

文武崇道德隆禮義辟雍辟宮庠序之教 陳禮樂

弦歌移風之化叙人倫正夫婦天下莫不曉然論孝悌之義惇篤之行故仁義之道滿天下繼以成康持盈守成世篤忠厚當其時風俗之隆比屋可封蓋垂裕乎八百年之久此豈一人之爲一日之積哉成周之後言風化之美者無如東漢矣然非光武躬行於其先明章繼志於其後皆敦尚經術修明儒學以爲務則其效之所至亦豈能底於盛極乎是故自建武永平以至於建初永元上而朝廷下而鄉閭莫不以

名節相砥礪而不肯一毫苟且以自見相師成風翕然無間此其俗習之美雖其比隆於成周可也及乎元興以後閭閻堅擅政而小人扶其威福相煽爲惡中材顧望不知所爲而漢已失其操柄綱紀大壞矣然在位公卿大夫有若袁安楊震李固杜喬陳蕃李膺之徒皆豪傑特起之士相與發憤同心戮力用公義以扶其危直道正言分別其是非白黑不少回撓至於勢有不容而織羅鉤黨之獄起而其執彌堅其行彌厲志雖不就而其忠則有餘天下之士聞其風慕

其義者人人感慨奮激如符融郭泰范滂許劭之流咸立私論以救其敗闕而其甚者至於解印綬棄家族骨肉相勉起死而不避或且以不得與其死以爲恥以故百餘年間擁兵專地者雖互相吞噬而猶莫不以尊漢爲辭雖以曹操之姦雄擅強大覲非望乃至沒身不敢廢漢以自立豈不以名義有在知所畏避而自抑乎嗚呼尚論兩漢之習西漢必曰經術東漢必曰名節抑豈知經術者固名節之本而名節之爲教其有係於國家天下爲尤重如是夫程子之言

曰後漢名節成於風俗非自得也然一變之則可以至道矣司馬公之言曰教化國家之急務風俗天下之大事惟明智之君子深識長慮然後知其益之大而收效之遠也至哉言乎其政治之龜鑑乎

曹操權勢日隆董昭言宜進爵加九錫以彰殊勛荀彧以爲曹公本興義兵以匡朝寧國秉忠貞之誠守退讓之實君子愛人以德不宜如此操由是不悅及擊孫權請或勞軍因輒留彧以侍中光祿大夫持節參丞相軍事或以病留壽春飲藥而卒君子曰篡逆

之人將欲奪人之國家必擇正賢士人望所屬而意與己忤者從而中傷之惟恐人之不成其志而其惡之不遂也曹操之殺荀彧文若是已夫文若飲藥而死蓋自殺也而謂操殺之何哉蓋文若雖自殺而致其自殺者操也雖謂操殺之可也嗚呼君子不幸而處國家亂亡之際而欲自立於其間適足以殺其身而已爾雖欲明哲保身有不可得若文若者亦何其不幸也且文若可不謂正人賢士者歟當漢之亂豪傑並起文若以爲曹操者庶幾可以圖大事定國家故

從而佐之凡其與操謀所謂大順大略大德者大抵皆匡朝寧國之事豈嘗與謀篡漢哉而不知曹操者天下之姦雄懷其兇域之智雖外示恭遜而篡漢乃其本心彼董昭逆知其本心者也九錫之謀有以中其心之所欲矣文若雖賢而智不足顧謂曹公秉忠貞而守退讓君子愛人以德不宜如此不亦有忤其心乎智不足而節有餘不殺其身不止矣操見平時文若所與言未嘗違其志及圖九錫而又忤其志使文若而在將已之志不得終成其殺之也固其所矣

是故文若死操之惡遂成明年而九錫加及孫權稱臣稱述天命而操以爲天命在吾吾爲周文王矣操死子丕遂篡位而且以舜禹自居矣嗚呼世豈有是等文王舜禹也哉朱溫將篡唐欲以優人張廷範爲太常卿裴樞持其事樞等朝廷宿望溫以爲小事猶不已從必不肯聽已取天下故肆其誅鋤白馬之禍樞等無遺類矣曹操之篡漢朱溫之篡唐其惡一也操之殺荀彧溫之殺裴樞何其所爲之相類耶吾是以知篡逆之欲奪人之國家者必擇正人賢士而中

傷之惟恐人之不成其志而其惡之不得遂也嗚呼以操久蓄無君之心加有大功於天下其移漢祚不啻如反掌文若縱得已其力豈足以沮操當是時國之后戚朝之忠良殺戮略盡留一文若夫亦何害而操曾不能少容焉文若則死矣而不知篡位之司馬懿已餒其後而不察也害能加於其所易制而明不足以料其所難圖烏在曹操之爲智哉懿既制魏國命子師及昭並秉重權而昭子炎遂以代魏當其時王陵以壽春欲討懿而不克文欽毋邱儉以淮南欲

誅師而不遂諸葛誕又欲以壽春誅昭而不成巨毒之鋒夫人將嚙之然人知司馬氏專親而不知養成其惡者由操之不智也故夫司馬氏於魏猶曹氏之於漢而已耳孟子曰不仁而得國者有之矣未有不仁而得天下者也又曰出乎爾者反乎爾者也有天下者盍亦鑒觀之乎

唐太宗有天下貞觀之間天下大治外薄嶺海戶門不閉行不齎糧米斗三錢歲斷死獄僅二十有九蠻裔君長咸襲衣冠帶刀宿衛太宗歎曰此魏徵勸我

行義既效矣惜不令封德彝見之或曰太宗烏在其爲仁義也太宗之爲君大抵仁不勝其武義不勝其利者也當其以英武之姿而舉義師於弱冠之始一戰而定東都再戰而下河北以至取江陵舉黎陽攘羣盜如振稿拉朽其有天下如運諸掌視成湯之拯民似矣而陽尊隋以爲名則何異晉文河陽之尊周北擒頡利西滅高昌以及破吐谷渾降薛延陀衣冠其人郡縣其地視武王之通道似矣而高麗之征重光而不厭則不及齊桓召陵之伐楚太宗之用武果

三王之義乎囚至五覆罪至三訊視古人聽獄之辭則審矣而張蘊古之死則未免於濫殺除斷趾之法去鞭背之刑視古人肉刑之制則輕矣而李君義之誅則未免於淫刑太宗之用刑果三王之仁乎蓋其好大喜功志慕高遠而學問之道有未充故其設施制度綱紀雖有足觀而平生所爲類假仁義以濟其功利之私烏在其爲仁義也君子曰三代而下賢聖之君無如太宗矣而顧猶不足爲春秋責備之意其毋乃已甚乎夫論仁義之本太宗雖若有愧論仁義

之功太宗不可謂不盛也孟子曰堯舜性之湯武身之也五霸假之也然則太宗雖未可以性之許之而亦豈可以假之議之哉不然仁義之效大矣太宗行之何其易致而達成如是也蓋仁義之於天下如饑渴之於飲食人情之所同欲也其所以同欲由人心之所同有也況當天下大亂之餘斯民新脫於水火綏之以仁撫之以義尤易為力故其行之數歲粟米之賤斗至數錢居者有餘蓄行者有餘資人人自厚幾至刑措天下翕然而從化如影響之從形聲有不期然而然者此其為效易致而達成曾不待乎必世百年之久不謂之盛可乎太宗之所以致是者非其身之而孰致之乎使太宗行之以無倦雖至於由仁義可也而謂其徒行仁義可乎而況謂其假仁義不亦過乎且自唐虞之治五百餘年而有湯之治五百餘年而有文武之治文武以後千有餘年而始有太宗之為君其治天下之微如此然而猶以其所未至而責備之不得與先王並是則文武之前幸五百餘年而遇一治世文武之後千有餘年而猶未遇願治

之君也是不亦責人終無已乎嗚呼唐有天下更十八君垂三百年其間蜀道閬陝奉天之幸唐之幾亡者數矣而天下終復為唐焉是則太宗仁義之效蓋不可誣而行仁義之效果何負於太宗哉
魏徵嘗言於唐太宗曰願陛下俾臣為良臣無俾臣為忠臣也君子曰人臣委質以事君其義一也而以為有良臣忠臣之異者則以其君有道無道有不同焉耳人君有道人臣直道以事之而得明哲以保身故謂之良臣君臣之名兩全而無失此處君臣之常者也人君無道人臣不容於直道而殺身以徇之故謂之忠臣君臣之名兩敗而不全此處君臣之變者也是故有禹湯文武之為君則皋陶伊尹周召之流因而為良臣有桀紂紂之為君則龍逢比干之流因而為忠臣嗚呼使其君為桀紂而已為龍逢比干之為此豈人臣之所願乎宜乎魏徵拳拳焉以為太宗告也且三代而下受諫如太宗之為君盡諫如魏徵之為臣可謂各極其志無魏子君明臣良者矣而微猶為是言何哉嗚呼此微之所為善諫者也微之

意以謂君有道則臣得爲良臣君無道則臣必爲忠臣願陛下爲有道無爲無道苟爲無道則臣將必爲忠臣矣是殆欲絕其君使不得爲無道云耳不然則忠良雖異稱要皆美名而徵亦何擇焉蓋徵非爲其身謀實爲其君計藉令其君以無道見醜於天下後世而已獨以忠節聞號與君都顯號臣荷美名而臣主之善兩立也抑徵之爲是言蓋亦深知太宗之足以為有道矣苟太宗果不足爲有道也則與龍逢比干游於地下徵其寧有貶哉幸而太宗力致貞觀之治而終爲有道之君雖徵之所以諫之者非一端矣知非忠臣良臣之論有以啟之也雖然良臣未始不爲忠而忠臣未有不爲良者也徵之此言抑有所矯而言之世有庸回之臣常脂塞然惟以持祿固位爲務者將必生視其君之昏愚暴戾而無所匡救因據魏徵良臣之言以爲辭卒致臣主有兩敗之禍嗚呼此又徵之罪人也哉

讀喪禮

明 胡 翰

按儀禮疏衰裳齊牡麻經冠布縗削杖布帶疏履三年者其降服父卒則爲母父在則爲母期傳曰何以期也屈也至尊在不敢伸其私尊也夫期之喪子爲父屈而三年之喪母爲長子得遂揆其輕重二者蓋不侔矣唐孔氏謂子於母屈而從期心喪三年蓋亦於義不安而創爲是說耳古未之聞也古者弟子爲師心喪三年若喪父而無服由子貢以義起之也子貢以孔子之施於門人者還以報之苟施於母子之間則疏衰裳齊非若師之無服也服斷以期而猶爲心喪則是外屈於父之尊而內存喪母之哀所謂服者何以表裏也斯亦僞而已矣後世之言禮者不以父降其母而使子得伸其尊誠不過矣抑所本者何取於古也又古者爲曾祖父母齊衰三月傳曰何以齊衰三月也小功也小功兄弟之服也不敢以兄弟之服服至尊也故重其衰麻貳其月日尊尊而恩殺也是雖不及高祖父母說者謂兼高祖而言則其服同其月日亦同也今禮家定爲曾祖父齊五月爲高

祖父母齊衰三月則其服同其月日不同矣以經考之服之數盡於五總麻三月小功五月等而至於高曾意其月日以是為差其服制則一以齊衰斷也且疏云為父加隆三年則為祖宜大功為高祖宜小功苟以齊衰之服從大功小功之月日亦若可為也古之制禮者所以不出乎二者之間而一斷以三月之制豈無其義乎故尊尊而恩殺為高曾三月者後世不必易也至尊在不敢伸其私尊為母齊衰期者雖古不必盡從也何以摧之禮以義起而緣乎人情者也

按禮斬衰裳直經杖絞帶冠繩纓菅屨者女子在室為父布總笄髻三年鄭康成引傳小記云男子冠而婦人笄男子免而婦人髻凡服上曰衰下曰裳婦人不殊裳故但言衰衰如男子衰下如深衣則衰無帶下又無柱此蓋古者婦人之喪服也朱子定禮自總以上莫不悉遵乎古而婦人之服豈宜以俚俗參之若大袖遮頭竹釵布頭須之屬不知於古何服也古者婦人不殊裳非無衰也其衰之下與男子異耳非

今大袖也檀弓云去纓而露髻謂之露髻則以麻纓額與髻耳非今遮頭也婦人不冠布總笄傳云總六升長六寸箭并長尺猶今釵與頭須耳而今竹釵布須亦非制也五禮廢久矣惟喪服民間尚多用之今冢子斬衰裳齊直經杖絞帶冠繩纓菅屨即位而有事於內何嘗戴鍾而間以師延靡靡之樂犧尊龍勺而置之玉杯象箸之間其清也甚矣是非求于意門人不察之過也問喪之記云親始死鷄斯徒跣說者謂鷄斯當作笄纓夫纓以黑緇韜髻士冠禮所謂纓廣終幅長六尺者以之即吉可也而凶事去之此又漢儒之不察也

綱目凡例考異

明 汪克寬

或問春秋凡例子朱子曰春秋之有例固矣奈何非夫子之所爲也夫子作春秋筆則筆削則削游夏尚不能措一辭而三傳各立凡例後之言春秋者又各立例殆將數十百家言人人殊學者將安取衷哉子朱子筆削資治通鑑爲綱目褒貶去取一準春秋書法別統系以明大一統之義表歲年以倣首時之體辨名號以正名紀即位改元以正始書尊立崩薨以叙始終書篡弑廢徙以討亂賊書祭祀以著吉禮之

得失書行幸田狩以著巡遊之荒怠書恩澤制詔以著命令之美惡書朝會聘問以著賓禮之是非書封拜黜罷以見賞罰之當否書征伐戰攻以志用兵之正僞書人事以寓予奪書災祥以垂勸戒片言隻字如持權衡以較輕重銖積黍分芒忽靡忒故手筆凡例一卷備列所以筆削之法學者據此以求綱目之旨不須更設註脚而史外傳心之要典瞭然在目如跡諸掌與傳者之自立例以言春秋蓋不霄壤超矣然魯齊主公刊之金華敬所文君刊之宣城而傳之

未廣也至元丁丑友人倪仲宏偶得於其友朱平仲遂以示余余喜其有益於後學欲鋟素俾遠其傳海寧任用和以其子從余遊聞而樂之迺刻諸家塾余因考其同異以附於後并識其所從來之顛末於卷首云

歐史十國年譜備證

明 徐一夔

五季時十國稱帝改元者七荆楚吳越常行中國年號歐陽公五代史著十國世家年譜於吳越云間之故老亦嘗稱帝改元而求其事迹不可得獨得其封落星石爲寶石山制書稱寶正六年辛卯始信其改元歐史所據者以此所以不他見者疑其年號止行於國中而不行於外國後并諱之至正中余避亂海寧州之東有姓許者嘗開巨室得古墓一內有誌碑蓋錢氏將許俊墓也俊年十八從軍以驍勇有戰功累官至節度使都押牙兼御史中丞寶正三年卒於此所載年月甚明此又錢氏改元之一證也惜乎歐公未之見爾鏐珍巢殺宏誅昌以有兩浙之地又貢獻中朝不絕若無稱帝改元事當唐明宗即位之初安重誨用事鏐致書重誨涉慢重誨大怒會使臣烏昭遇韓政使鏐還朝政誣昭遇柝臣舞蹈重誨遂奏削鏐王爵鏐蓋有激而然而鏐卒之歲實爲明宗改元長興之壬辰則寶正六年之明年也重誨被殺當長興二年夏而元瓘自陳復鏐王爵則在重誨既

死之後改元瓘襲位不復改元其事可見已以余觀之鏐自梁末帝貞明二年加天下兵馬都元帥開府置官屬唐莊宗入洛以厚獻故得賜王冊金印自稱吳越國王更名所居曰宮殿官屬皆稱臣遣使封拜海中諸國長君至如俊者以分言一陪臣爾亦授前項職名儼然行帝者事矣奚待重誨見絕而歐公去五代未遠故其所云蓋可信也當時十國皆非中國有鏐之稱帝改元與否亦不足較第錄所見以備歐史之一證云爾

深衣考

明 朱 右

上古穴居巢處衣鳥獸之皮以自蔽軒轅氏作制衣裳以示象公侯等數上下不紊自夫王澤一竭羸劉迭興古制茫昧曲臺講禮僅存深衣一篇鄭氏箋註既有未當世代沿革襲以成俗無復復古之意矣宋司馬文正公始製深衣為燕居常服士大夫往往效之紹興間太常博士王晉著深衣制度追合古人文公朱子修入家禮趙公汝梅又著深衣說明白簡易未免互有得失近世天台牟氏仲袞刊誤菴漢馮氏公亮考證皆有發明右生也晚不獲承諾君子緒論而竊有志焉輒考禮經及先儒諸氏之說求合古制便宜今可服庶幾好古博雅者有所稽而不惑於紛紜之議作深衣考

深衣之制

以白織布為之

古者用十五升布鍛濯灰治升八十縷今人為布

無升數當用細帛布潔白者

度用指尺

取各人中指中節以兩尖相距為寸今人用折尺亦彷彿

衣二幅屈其中為四幅

前後長居身三之一強自領至要王氏謂衣二尺二寸則恐傷太長當掖下則裁至袷外屬於袂衽二幅

衽說文曰衣衽注交衽為衽爾雅衣皆為襟通作衿正義云深衣外衿之邊有緣則深衣有衽明矣宜用布一幅交衽裁之上尖下闊內連衣為六幅

下屬於裳玉藻曰深衣衽當旁王氏謂衽下施衿趙氏謂上六幅皆是也

裳十二幅

長與身等經曰短毋見膚長毋被土玉藻曰深衣要半下齊倍要宜用布六幅斜裁上廣六寸下廣尺有二寸上屬於衣當要若人體大小又隨宜而廣狹之

袷之高下可以運肘袷音袂袂之長短反屈之及肘袷袂當掖之縫也

袷與袷平

袷袷口也舊制尺有二寸今時制宜稍小

袷中及齊與身參而圓之齊音

齊謂袷下當縫處經曰袷圓以應規

要七尺二寸

當裳之上際王氏謂要中三蓋袷尺有二寸圓

之為二尺四寸則要七尺二寸

袷二寸交而方袷音

袷交領也玉藻曰深衣袷二寸注曲領也經曰曲

袷如規以應方

鉤邊續袷

邊謂邊縫也袷邊斜幅既無旁屬別裁直布而鉤

之續之袷下若今之貼經曰續袷鉤邊正以鉤

邊續於袷也後人不察至有無袷之衣或有袷亦

加鉤邊則於袷領相妨身服不宜姑正之以俟知

者馮氏謂鉤邊乃要間當縫處亦非也

緣廣寸半

緣純也領與袷口齊邊皆緣經曰具父母大父

母純以續具父母純以青孤子純以素今人常居

年光宜緣以皂

負絕及蹀以應直

謂自領下衣與裳連縫直不如絕今之背縫也

下齊如權衡以應準

齊衣下縫也

帶黃四寸

以白繒夾縫之其長要而結於前後通屈四寸

為兩細垂其餘為紳玉藻曰天子素帶朱裏終辟

諸侯素帶終辟大夫素帶辟重注終克也辟緣也

克辟畫緣之也細兩耳天子諸侯從要後至紳皆

緣之大夫緣其兩耳及紳士惟緣其紳爾餘皆不

緣也

紳長三尺辟二寸辟音

辟邊緣也兩旁各廣一寸為二寸

約用組三寸

組綬屬以絲為之帶廣難紹而易解故用組貫其

細而約之

冠用緇布

緇黑色宜用烏紗而加漆焉上有辟積五 向左
爲古加武卷於冠後今人屬武於冠前有純如今
人加夾於額者簪用象橫貫之

幅中加於冠

古冠無中今人加以巾覆之中用烏紗方幅似今
頭巾但直縫其項而殺其兩端爾

屨用白

古者屨用裳色夏布屨冬皮屨士冠禮曰元端

屨素積白屨則深衣屨宜用白絢纁純用緇絢屨
頭飾用條或用緇屈爲之纁牙底相接之縫亦綴
以條以爲行成純屨緣口也或黑屨則飾以青又
著茶屨繫也其色同上

雜著

雜著中

明

鄭氏孝義門表

明 王 禮

門名孝義者何朝家旌淑之令典也何旌乎浦江鄭氏也余讀揭文安公孝友傳見鄭綺事親孝父以非罪繫獄綺欲見不得以頭觸圓扉出血上書請自代郡守錢端禮偉之為直其事母張氏末疾綺保持若嬰兒雖奏圈必抱就之三十年不懈四世孫德珪及其弟德璋友愛甚至怨家傾德璋以死罪逮送揚州德珪以詭計先往當之德璋比至兄已死獄市中矣蓋未嘗不深羨其孝友萃於一門與古君子同科故至於今十世同爨無私財物內外翕然一遵先訓宜乎名公碩士播之聲歌著之紀述達之邦國天下洋洋盈耳繁乎簡編以垂耀于後未已也至若養祈泉而井湧葬禱齋而雪消馬待齊而茹草犬各雛而均哺蓋孝義之感達之於天而天應之求之於地而地應之被之禽獸而禽獸化至德通貫豈惟感召同類而已哉及觀其家範朔望家長率衆謁祠堂畢出生堂上男女分立堂下令子弟一人唱聽一人誦于側曰子道孝養專道順正兄必弟愛幼必長敬毋徇私

慈以妨公義母聽婦言以傷和氣母為非橫以干天刑母耽麪藥以亂厥性有一於此既隕爾德復隕爾允瞻茲訓辭寔係廢興言之再三爾宜深戒于是會揖而退男女各堂以序會膳議所當為各趨其事而矜不能冬夏有衣履之給婚塋有禮物之助宗族之無歸者生有義宅以居養之死有義祠以燕嘗之鄉隣之無後者生有義廩以賑給之死有義塚以安厝之繼承其良規防範其流弊念慮詳密而規摹宏遠又未嘗不竊嘆夫天之報施善人必使其有賢子孫世世守之弗替有引故一堂雍穆有如此者然觀世之清門舊族又有彼友而此不恭下順而上弗睦見利達則忌之見清修則污之若是者抑獨何心余又竊疑夫鄭公之鄉必以山川之美風氣之聚有以助之故後之人同心同德無有榛梗如是其遠也過其門孰不曰此堯舜之民也此鄒魯之俗也為子孫者可不以此自待自厚也哉鄭君仲纖溫厚君子也視余以其家集披閱數四起敬起慕遂飾鄙陋之辭綴其卷末以為孝義門表表其異於他氏而亦因以自

警發云

宗儀九首有序

明 方孝孺

君子之道本乎身行諸家而推於天下則家者身之
符天下之本也治之可無法乎德脩於身施以成化
雖無法或可也而古之正家者常不敢後法蓋善有
餘而法不足法不足而守之人不足家與國通患之
況俱無焉者乎余德不能化民而竊有志於正家之
道作宗儀九篇以告宗人庶幾賢者因言以超善不
賢者畏義而遠罪他日於大者有行焉或者其始於
此

尊祖

明 方孝儒

人之異於物者以其知本也其所以知本者以其禮義之性根於天備於心粹然出於萬物故物莫得而類之今夫形禪而氣續者人與物之所同也渴而飲餒而噉勞而瘁逸而嬉者人與物之所同也卒之人貴而物賤者何哉人能知尊其身之所自出而物不能也故生而敬事之為之甘脆豐柔之味以養其口為之華軟溫美之服以養其體為之采色以養其目為之馨香以養其鼻順其所欲以養其心猶以為未至也於是飭身惇行以養其德令聞嘉譽以養其名著其德美於天下後世使之沒而不忘久而彌章君子之為人子孫非以養生為貴而以奉終為貴非以奉終為難而以思孝廣愛為難藏于墓祀于廟自天子達於士降卑廣狹不同而其致一也故天子之諸侯五大夫三士二官師一庶人獲乎薦自外為之制者由乎人孝敬之情出於天由乎人者不可踰也本乎天者夫寧有強之者哉天之命也人雖至昏弱也甚無知也過先祖之墓未有不動心者時焉而祀其

先語及其遺事未有不嘆泣者形氣之感有所受之也非偶然也故宗廟之制祭祀之禮君子以此崇本反始致誠敬於其先屢井之氓曰則祭田祖不以歲之豐歉而變不忘其始也況於身之所自出者乎知有其身而不知身之所自出是謂禽犢之民知奉其身而不恤吾身之所同出是謂痿痺之民是二者雖色貌為人而其身物化也久矣故人而不知本謂之悖不睦族謂之戾悖與戾惡名也世之立而談者天之所授與堯舜孔子不異由顏焉而顏由孟焉而孟不此之務而為惡名之求尚為愛其身也乎吾懼夫吾族之人痿痺禽犢之歸而不自知也為尊祖之法曰立祠祀始遷祖月吉必謁拜歲以立春祀族人各以祖祔食而各以物來祭祭畢相率以齒會拜而宴齒之最尊而有德者向南坐而訓族人曰凡為吾祖之孫者敬父兄慈子弟和鄰里時祭祀力樹藝無胥欺也無胥訟也無犯國法也無虐細民也無博奕也無鬭爭也無學歌舞以蕩俗也無相攘竊姦侵以賊身也無鬻子也無大故勿黜妻也勿為奴隸以辱先

也有一于此者生不齒乎族死不入于祠皆應曰諾
然後俗人之文者以譜至登下一歲之生卒而書舉
族人之臧否其有婚姻相調患難相恤善則勸惡則
戒臨財能讓養親事長能孝而悌親姻鄉里能睦而
順此其行之足書舉書之累有足書者死則爲之立
傳於譜其有犯於前所訓者亦書之若能改則削之
久而愈甚則不削而書其名俗人見必揖雖貴賤貧
富不敵皆以其屬稱喜必慶災必弔死以其屬服無
服者爲之是日不肉而群哭之羣賻之群葬之

重譜

明 方孝儒

尊祖之次莫過於重譜由百世之下而知百世之上
居閭巷之間而盡同宇之內察統系之異同辨傳承
之久近叙戚疏定尊卑收渙散敦親睦非有譜焉以
列之不可也故君子重之不脩譜者謂之不孝然譜
之爲孝難言也有微而不書則爲棄其祖無微而書
之則爲誣其祖有恥其先之賤旁援顯人而尊之者
有恥其先之惡而私附于聞人之族者彼皆以爲
智矣而誠愚也夫祖豈可擇哉兢兢然尊其所知闕
其所不知詳其所可微不強述其所難考則庶乎近
之矣而世之知乎此者常鮮趨乎偽者常多淳安之
汪氏由其身緣而上之至於魯公之族七十餘世皆
有諱字卒葬若目見而耳受之者其心以爲至博也
而博不能勝其偽也越之楊氏親煬帝之裔而恥名
之行遂避而不言吳寧之杜氏越千餘歲而宗漢之
延年晉之富陽侯是皆知本者之所深惡而爲之者
以爲工也顧不惑哉天下有貴人無貴族有賢人無
賢族有士者之子孫不能脩身篤行而屈爲童隸而

公卿將相常發於隴畝聖賢之世不能傳其遺業則
乎恒人而縉紳大儒多興於賤宗天之生人也果
孰貴而孰賤乎四海之廣百氏之衆其初不過出於
數十姓也數十姓之初不過出於數十人也數人之
先一人也故今天下之受氏者多堯舜三王之後而
皆始於黃帝譬之巨木焉有盛而蕃有萎而悴其理
固有然者人見其常有顯人也則謂之著族見其無
有達者也則從而賤之貴賤豈有恒哉在人焉耳苟
能法古之人行古之道聞于天下傳於後世則猶古
人也雖其族世未著不患其不著也孔子子思以為
祖而操庸寬之行則其庸寬自若也祖不能貴之也
故吾方氏出帝榆圉而譜不載列之顯于昔者衆矣
而不附之疑者闕之以傳疑不可詳者略之以著實
而惟以篤學脩身望乎族之人嗚呼富貴利達外至
者也求之不可必得之不可必守守之不能必傳
也仁義忠信之道備乎心不求而足得之者可以行
行之可以著施之盈天下而歛於身不見其隘傳之
被萬物而非威武勢力之所能移善尊祖者思是道

也行是道也天下不惟尊其身將歸德於祖而祖益
尊祖益尊而譜益傳斯其為孝大矣何必趨趨然為
偽而欺且誣哉

睦族

明 方孝儒

井田廢而天下無善俗宗法廢而天下無世家聖人之立法所以收萬民之心而使之萃于一一者治道之極治功之盛不可忽也故一之所在智者無所措其謀辨者無所措其說勇者無所用其力如裘之領如網之綱如髮之握如輻之轂如馬之有轡如牛之有綯操之則歛縱之則放招之則集撫之則退屈信作止惟上之所令而民不能參以私先王之民非甚異於後世也其好義而易使從化而畏法寧死於饑

寒而不忍爲亂者豈礎斧鉞所能禁哉教之以其所固有故其向善也安令之以其所易知故其趨化也亟當是之時同閭接畝之人猶相親睦信順而大小宗法行乎宗族之間爲百世之宗者百世宗之爲五世之宗者五世宗之宗其身則守其訓有所猷爲皆受命于宗子而悍戾爭鬪之風無自而起苟非大姦魁詐不可教令則安有不善者乎故三代之俗非固美也爲治之具既美而習使之然也後世願治之主王佐之臣迭興于世而卒不足幾乎古豈民性之

不可化邪其具之廢已久世主便因循而憚改作材士昧遠略而務近功區區補弊宜漏而未及乎政教之全也民心益離而俗愈散奚獨民之罪君子預有責焉吾嘗病之而未之能行則思以化吾之族人而族不可徒化也則爲譜以明本之一爲始遷祖之祠以維繫族人之心今天散處於廬爲十爲百而各顧其私者是人之情也縱其溺於情而不示之以知本則將至於紛爭而不可制今使月一會于祠而告之以譜之意俾之十百之本出於一人之身人身之疾在乎一肢也而心爲之煩貌爲之悴口爲之呻手爲之撫思夫一身之化爲十百也何忍自相戕刺而不顧乎何忍見其顛連危苦而不救乎何爲不合乎一而相視如塗之人乎故其睦族之法祠祭之餘復置田多者數百畝寡者百餘畝儲其入俾族之長與族之廉者掌之歲量視族人所乏而補助之其贏則以爲棺槨衣食以濟不能葬者產子者娶嫁者喪者疾病者皆以私財相贈遺立典禮一人以有文者爲之俾相族人吉凶之禮立典事一人以敦睦而才者爲

之以相族人之凡後世擇子姓一人為醫以治舉族之疾其藥物於補助之贏取之有餘財者時增益之族之富而賢者立學以為教其師取其行而文其教以孝悌忠信敦睦為要自族長以下主財而私典事而情相禮而野不能睦族沒則告於祖而貶其主不祠富而不以教者不祠師之有道別祠之不能師者則否

廣睦

明 方孝孺

人之親疎有恒理而無恒情自同祖推而至於無服又至於同姓愛敬之道厚薄之施固出於天而不可易然有親而若疎者有疎而若親者常情變於所習也閭閻時而不相見則同姓如路人比廬舍同勞逸酒食之會不絕則交遊之人如昆弟使同姓如路人他人如昆弟斯豈人之至情哉物有以移之君子未必然而常情所不能免也聖人之治人以常人之情為中制俾厚者加厚而薄者不至於離恐其以不接而疎疎而不相恤也故為之祭酺之法合之以燕樂飲食以洽其歡忻慈愛之情恐其拘於利而不知道也肅之以鄉射讀法使之祗敬戒慎而不至於怠肆祭而酺所以為樂也讀法所以為禮也約民於禮樂而親者愈親疎者相睦此先王所以為盛也哉舉而行諸天下今未見其不可也然非士之職也故敬自族而行之鄉而為之制其制曰宗族歲為燕樂之會四其時則二月也五月也八月也十有一月也其物則時祀之餘也其品則豕與羊各一酒醴是菓惟所有而

不必侈也酒以七行九行為節也位以尊卑長幼為序也苟尊矣雖稚子猶位乎上也苟長矣雖貧且賤以齒也其言為孝弟忠信而勿褻也勿譁也勿慢也飲雖醉而勿違禮也立子弟二人為執禮以佐酒酒至揖請飲既飲揖請饔既饔揖請斂羞二人歌詩其詩則蓼莪棠隸葛藟東門唐之杖杜谷風雅之黃鳥之類貴其能感人而敦倫理也其數則如酒也立二人講說嘉言古之人及乎教者皆在所取也將歌也將說也執禮揖曰請肅以聽皆拱而坐坐則肱相此行則武相衡舉爵飲饔食羞皆後長者畢則族揖辭而退少者送長者于家然後返歲為禮儀之會三冬至也歲之初吉也夏至也冬至陽之始生也君子之道至此始亨矣宜有慶也是日昧爽舉族自勝冠以上咸盛服造祠下相揖趨及門祝啟門以次入序立以時羞獻奠酒皆再拜班趨出族之長坐別堂次長者率羣昆弟子姓捧觴稱壽畢皆拜遂以次飲酒相拜如禮典禮以譜至北向坐讀之長者命眾坐眾坐聽善惡之在書者咸讀無隱設席於南楹之東北向

署其上曰旌善之位善之多者長者命之酒俾少者拜之典禮翼以就位署南楹之西曰思過之所惡之累書而不改者俾立其下於是長者以譜所列傳緒盛衰絕續之故明言之而告以常訓曰為善如嗜飲酒去惡如去毒螫慎思哉勿墜爾先祖之祀眾拱而聽皆俯首就班再拜出少者授長者杖以序行乃還于家夏至陰之始生也君子所宜慎哉是日素服謁祠如冬至禮不飲酒不相拜讀譜之儀亦如之歲之初吉慶拜如冬至禮不讀譜鄉黨之制歲為燕樂之會一其時以秋其物以祭社之餘其坐以齒以德以爵其禮主於讓其儀如宗族之會歌詩說嘉言亦如之其詩以伐木魚麗南有嘉魚菁菁者莪賓之初筵擇鄉人子弟群歌之其誦嘉言也耆老之賢者舉以教在坐者皆起應曰祇奉長者之訓凡族人鄉人不與于會者八悖倫紀者鬪爭者相訟者使酒而酗者博奕者過累書而不改者虐鄉里者言偽而行違者皆君子之所棄也不善者棄而後知所戒然後善者尊而益勸勸戒而俗寧有不美者乎

奉終

明方孝孺

愛敬以養生哀戚以送死墓焉而塋位焉而祭皆本於禮而不敢忽者先王教民之通法也喪而用浮屠之術塋而信塋師之說資其報於不可致詰之間微休咎於無情難驗之川阜上以為親謀下以為身利者此古之所未聞也後世閭夫野人多趨信而甘心焉親沒于床不于禮而于浮屠不哭泣擗踊而于鐘磬饒餒非是之務則人交笑以為簡時可塋矣泥于山川之利否而不即塋或至於終身或自死而委塋於子孫甚者子孫恐塋之禍其身舉而棄諸水火塋親以禮者世人非之為愚嗚呼是殆其不察而至於此極乎彼浮屠之所謂輪迴者果可信耶天之生人物者二氣五行也其運也無窮其續也無端先者過而後者來未嘗相資以為用者二氣五行之常也自草木而觀之發榮於春盛壯奮長蔚乎而不可遏及乎戒之以凜風申之以霜露昔之沃澤茂美一旦飄而為浮埃化而為汙泥蕩滅殫盡無跡可窺矣其萌生於明年者氣之始至者為之也豈復資既隕之

餘榮乎惟人也亦然得氣而生氣既盡而死死則不復有知矣苟有焚炙剗割佚樂適意身且不有而何以受之形盡氣盡而魂升魄降無所不盡安能入人胸腹重生於世而謂之輪回也哉天地至神之氣以其流行不窮故久而常新變而不同使必資已死之人為將生之本則造化之道息矣烏足為天地倘或有之人固不知之也浮屠亦人耳何自而獨知之彼以其茫昧不可揣索故妄言以誣世夫豈可信而事其教乎孔子謂祭之以禮為孝則事異端之妄棄聖端而不信者其為非禮大矣不孝孰加焉而閭者顧妄之而不以為非可哉塋師之動人以禍福而其說尤怪人之昌隆盛熾者其先必有厚德之遺賤貧夭絕者必有餘惡之著山川何與焉誕者則不然聞有富貴之人於此則歸福於其塋塚曰此某形也此某徵也於塋之法宜爾也聞有貧賤之人於此則曰此塋之罪也此於法宜至於斯也信斯言也則人之多財而力足者皆相率而為不善及乎死也求善地以塋其身則可免子孫於禍夫孰肯為善乎由大者

而論之繫乎盛衰者莫如乎國都畿區河渭無異也
 秦帝之亡漢帝之昌隋據之而促唐據之而長果在
 於善地乎帝王之尊家天下而後海內使地善而可
 興竭智以營陵廟奚求而不致而亡國敗主相屬則
 果不在乎此也審矣古之卜宅兆云者以神道定民
 志耳非視岡阜之向背逆順臆度目斷如世之葬師
 之爲也茲師祖晉郭璞書其書苟可信璞用之以葬
 其祖考宜有奇驗不誣而璞卒死于墓賊其身不能
 福而謂能福乎人其可信否邪世之人多信之不知
 自陷於不孝而莫之贖也嗚呼先王之禮一失而流
 于野再壞而化于 豎其大壞而不可爲忽乎入于
 禽獸而不知覺也寧不哀哉天下之人其小者化爲
 由 而往吾不能知其所至矣其心淪沒膠固非
 空言所能革也久矣故吾獨以告吾族人親喪必以
 三年三年之制必循禮勿以浮屠從事違者生罰之
 死不祀于先祠塋卜吉凶而勿泥葬師之說期必以
 三月三月不能至五月五月不能止七月過一歲者
 如違喪禮之罰必刻塋志墓銘力不足者刻其名俾

後有考作方氏喪葬儀

務學

明 方孝孺

學者君子之先務也不知爲人之道不可以爲人不知爲下之道不可以事上不知居上之道不可以爲政欲達是三者舍學而何以哉故學將以學爲人也將以學事人也將以學治人也將以矯偏邪而復于正也人之資不能無失猶鑑之或昏弓之或枉絲之或素苟非循而理之藥而直之瑩而拭之雖至美不適於用烏可不學乎夫學非爲華寵名譽爵祿也復其性盡人之道焉耳彼矯而動翻而鳴者不知其生之故與其爲生之道是以物而不神冥而不靈人之爲學所以自異於物也匪特異於物歟異於衆人也匪特異於衆人上將合乎天地拔乎庶類之上而爲後世之則也其說存於易詩書春秋三禮其理具乎心其事始乎窮理終乎知天其業始於脩己終於治人其功用至於均節運化涵育萬物大得之而聖深造之而賢危脩之而爲君子聖賢君子非天墜而地出人爲之也舉夫人之身皆可爲聖賢而乃不能異於物曷過哉不知務學之方也今世俗之儒申申而

行由由而言騰口頰播簡牘以誇乎人知非不博言非不華矣而於古之學未也何哉爲其泛而無本也漫而無統也可喜而無用也君子之學積諸身行於家推之國而及於天下舉而措之秩如也奚待詞說乎以詞說爲學上以是取士下以自是期此士所以莫逮乎古也嗚呼無善教而天下無善士無善士而天下無善俗世俗之陋其患豈微也哉余不欲學者之類之也方氏之學以行爲本以窮理誠身爲要以禮樂政教爲用因人以爲教而不強人所不能師古以爲制而不違時所不可此其大教也其小學曰七歲而學訓之孝弟以端其本訓之歌謠諷諭之切乎理者以發其知羣居而訓之和賜之以物而道之讓慎施朴楚以養其恥敏者守之以重默木者開之以英慧柔者作之強者抑之扶之植之權之激之而童子之質成矣其大學曰立四教皆本於行行不脩者不與一曰道術二曰政事三曰治經四曰文藝一道術視其人質之端方純明知微近道者與言考其言行以稽其所進試其問難以審所造政事文藝其材

之所能者無不學也二政事視其通明才智者使學焉治民之政八制產平賦興教聽訟禦災恤孤御史禁暴悉民情知法意為政事本試以言授以事而觀其所堪三治經精察燭理為信不惑而長講說者為之四文藝博文多識通乎制度名物立言陳辭可以為世教者其極也試之之日皆以終月皆欲其稱其教之名也教之存乎師化之遲速存乎人得其人推而用之不難於天下夫豈一家之學也哉

謹行

明 方孝孺

士之為學莫先於慎行行之於人猶室之有棟柱也帛之有縑縷也木之有本也馬之有足也鳥之有翼也聖得是而後為聖賢得是而後為賢君子脩是而為善小人失是而陷於禽獸之歸夫焉可忽哉積之如升高之難而或敗於談笑為之於閭閻之內而或播於四海九州才極乎美藝極乎精政事治功極乎可稱而行一有不掩焉則人視之如汙穢不潔避之如虎狼賤之如犬豕并其身之所有與其疇昔竭力專志之所為者而棄之矣可不慎乎夫口之便於甘肥體之便於華美耳目之耽於所思心志之趨於所樂家欲富而身欲尊者人之同情聖賢之所不能無也然而學道之士禁制克節惟是念之萌於中削衣藿食黜好寡欲終身而不敢怠者誠知輕重之分也人之身不越乎百年善愛其身者能使百年為千載不善愛其身者忽焉如蚊蚋之處乎蠶蠶之間夫蚊蚋之生亦自以為適矣而起滅生死不踰乎旬月當其快意於所欲以登丘為天地而不知其所處

之微昧陋之民亦若是矣迷溺於聲色勢利以身為
之後而不以勞其心以為至樂而不知其可悲也甚
適也而不知其為汙柔也均之為身也聖賢之尊榮
君彼而衆人之汙辱若此曷為而然哉慎行與否致
之耳難成易毀者行也難立易傾者名也得之不能
久於身樂未既而憂繼之者人之欲也以富貴利達
易汙辱之名猶食鳥啄而易死也況倏忽接於耳目
之不足恃乎故人有殺身而殉君親者非不愛身也
愛其身甚而欲納之于禮樂其為慮甚遠矣寧死而
不肯以非義食知義之重於死也寧無後不敢以非
禮娶知夫禮之重於無後也僥倖苟冒於一時而蒙
垢被汙於萬世小則閭里識之以為訾大則冊書著
之天下笑之聞其名則唾罵不欲入于耳計其所得
曾不若秋毫而賤辱其身使孝子羞以為父正士羞
以為友遺裔遠允羞以為祖不亦惑哉且人不患不
富貴而患不能慎行無行而富貴無益其為小人守
道而貧賤無損其為君子吾家自始遷祖至於余身
十五世矣以言乎貨產則不踰于中家以言乎爵祿

則未有位乎朝者然而不愧于人見推于世者以先
人世有積德蓄學操行異乎恒人焉耳遠者余不足
知之若曾大父西洲府君之純厚愷大先君太守貞
惠公之廉介方正視古之賢者豈有間哉吾族之人
暨將來而未至者烏可不效也人莫不喜為名人之
子孫而不知其尤難於衆人蓋德大則難繼行高則
難稱有善過人人未之取也曰其祖之賢不但如斯
而已有惡未著人已責之以為不肖曰若之祖何人
也而為此哉故生於微宗庸族者過易隱而善易著
以其特出掩於其先生皆異之故不求其備也生於
世家者過易聞而善易昭以其先多顯人而不可企
也嗚呼方氏之嗣人柰何而不慎乎君臣父子兄弟
夫婦朋友五者天倫也數天倫者天之所誅天之所
誅人之所棄生不齒死不服塋不送主不入祠譜不
書其名行和于家稱于鄉德可為師者終則無服者
為服總麻有服者如禮祭雖已遠猶及雖無主祭者
猶祭如是而不能為君子則非方氏之子孫也告于
祠而更其姓不列于譜

備德

明 方孝孺

能爲衆人所不能行之善者其子孫必享衆人所不能致之福人之爲善非爲子孫計也然天道之於善人以及其身爲未足常推餘澤以福其後人則亦曷嘗不爲子孫計哉第衆人之計速而易致而君子之澤遠而難贖故趨乎善者常少溺乎利者常多衆人每笑爲善之士爲迂緩無術而不知天道之所祐固在此而不在彼也天下無千載全盛之國無百年全盛之家天豈不欲有國家者久而不墜哉或一再傳而失之或未終其身而不振得之於勞動艱難之餘而敗之於談笑燕安之頃非其智力所不能德不足而子孫無所藉以自立也人之生於德善之家猶木之生沃土蚤發而易長華茂而後凋礪田瘠墮雖有萌蘖之滋拳曲擁腫終不足觀則所藉使之然耳今之人莫不欲子孫之蕃賢才之夥傳緒久而不衰而莫能爲善此猶不藝而欲穫也不獵而欲衣狐貉也孰從而致乎故富貴而不備德是以爵祿貨財禍其身也富貴其子孫而不力爲善是置子孫於賤辱之弁

爭奪之區而不顧也使貴而可傳則古之顯人與齊魏秦楚之君至今不失祀矣使富而可傳則趙孟三桓之裔有餘積而無憂矣然而皆莫之存何哉德澤既竭而後人莫能繼也先人有千乘之勢萬室之邑不足恃也金帛菽粟雖盈溢廩廩不足恃也惟有餘德焉爲可恃而恃之者身必危可恃以存者其惟德脩于身而不懈者乎德有及乎數百年者有及乎百歲者有及乎當世者有及乎一鄉行乎一家者子孫之食其報也恒視所及爲廣狹道術材略高世而拔類或見於事功佐明主除暴亂立法制或著於書以陳仁義政教正人心於將亡過邪說於欲盛此德及於數百年者也不能如彼之盛而其所爲可以扶衰拯溺爲百年所依怙者百年之所德也又不能然而濟當時之難者當時之所德也下此而盡力於一鄉行法於一家鄉與家賴之亦可以及其子孫俾不遽至於禍敗況其所及愈大則所利愈遠乎閭巷之士欲澤天下後世固非其職然因其身之所居以爲其分之所當爲奚爲而不可也故事親而孝事長而弟族

焉而睦姻而義慈恭惠和不犯不忤以此守身而無愧者其德可以澤其子推而行于鄉矜寒恤飢周人之所不及而爲人之所難爲其允嗣有不興者乎有位而立功學道而立言皆人所可致者孰謂吾族之人而不能爲善人乎孰謂爲善而果不可恃乎

體仁

明 方孝孺

天之生人豈不欲使之各得其所哉然而勢有所不能故托諸人以任之俾有餘補不足智愚之相懸貧富之相殊此出於氣運之相激而成者天非欲其如此不齊也而卒不能免焉是氣行乎天地之間而萬物資之以生猶江河之流渾涵澎湃其所衝激不同而所著之狀亦異大或如蛟龍小或如珠璣或聲聞數十里而或汨然而止水非有意爲巨細於其間也而萬變錯出而不可禦人何以異於斯乎智可綜覆海內而闇者無以謀其財或可以及百世而饒者無一吸之粟天非不欲人皆智且富也而不能者勢不可也勢之所在天不能爲而人可以爲之故立君師以治使得於天厚者不自專其用薄者亦有所仰以容其身然後天地之意得聖人之用行而政教之說起故聖賢非爲已設也所以爲愚不肖之資貨財非富匹夫也固將俾分其餘以補人之匱三代之盛是法行于朝廷達於州里成於風俗而入於人心是以天下無怨嗟之民久矣其亡而莫之復也世之志

義之士猶有推其所有餘行其所可為者其亦先王之所取者乎然非知本者不知其意之美也人之挾所長以虐同類由不知本故耳使知斯人之生皆本於天視人之顛隤陷溺與已無以異則民焉有所失之患哉余病乎未能而欲試諸鄉閭以為政本數百家之鄉其人必有才智賢產殊絕於眾者雖廢興迭出而未嘗無每鄉推其尤者為之表使為二廩三學廩之法豐歲夏秋自百畝之家以上皆入稻麥于廩稱其家為多寡寡不下十升多不過十斛使鄉之表

籍其數而衆閭守之度其凡歲可得千斛以備凶荒札瘥及死喪之不能自存者其入也先富而出也先貧出也視口而入也視產多者皆廩加息十一不能廩則否廩之左入祠以祠入粟多而及人博者祠之左右序揭二版左曰嘉善書其人之績版以朱書以青右曰愧頑版不飾書以白書吝而私者為表而不均者漁其利而不恤民者歲再集衆謁祠而讀之以為戒學之法各立師一人以有德而服人者為之立司教二人司過二人司禮三人鄉人月吉盛衣冠相

率謁學暇則遊於學問乎師有違過者於師乎治悖教不良者師與其罰其教法如族學之儀

西北伐崇

明方孝孺

爲史者之言曰西伯之囚羗里崇侯虎實譖之及西伯得斧鉞專征伐而歸五年果伐崇侯虎果若其言是西伯挾天子之柄而報私怨也此必不然聖人之於賞罰豈嘗容心於其間哉觀人之善惡何如耳其善誠可旌雖平生之所讐怨烏得不賞之其惡誠可誅也雖懿親近戚吾烏敢避焉蓋此法者非吾之所私有乃天子之法受之於先王而與天下共之者也竊天子之法賞無功則爲祐惡罰無罪則爲戕善此二者必誅聖王之世紂之無道久矣諸侯豈無不臣服者乎其以斧鉞賜西伯而西伯受而行之宜自不臣服者始必不悻悻然蓄私怨而圖伐之也崇侯之事遠不可知其詳矣吾意其人必比凶黨惡不供臣職於天子而侵害其與國殺虐其民人棄蔑其宗廟故西伯之必不以其譖已也苟憾其譖已是微量淺智之人齊恒晉文之流之所爲豈足爲聖人哉且羗里之事不經見史所稱獻美女善馬珍怪之說皆戰國之末好妄言者意構之詞非其事之實也妄言者

見歌詩伐崇求其罪而不得遂誣其譖西以爲伐崇之端而不自知其謬也西伯嘗伐犬戎豳耆及邠矣則此四國者又豈皆譖西伯者耶故謂西伯伐崇者是也謂崇侯譖西伯以女馬賂得脫者皆非也曰然則史氏所述西伯之事亦有足信者歟曰惟獻地請去炮烙之刑者近之餘皆無足取焉耳

武王誅紂

明 方孝孺

余讀春秋見其紀時書事少者止一二言多者不過數十言斷斷然傳其所信而不敢肆竊嘗疑之以爲當時史官所載之詳矣孔子曷不盡舉而書之奚爲簡略若是哉及觀左氏穀梁公羊三子之傳各述其所聞甚詳或曲說以傳經或因經而構事肆情極論無復顧忌初若可喜徐而推之率多虛詞而鮮事實往往不足以得其要領而愈致人之惑然後知孔子謹嚴其詞若不敢盡者憂天下後世之至也孔子嘗繫易以辭矣反覆詰難至於理彰意竭而後止何獨於春秋而不盡其辭蓋道可以智窮而事必以實著與其徇疑而失實以爲後世害不若著其可信者之爲愈也故曰多聞缺疑又曰吾猶及史之缺文也此孔子之意也司馬遷之爲史記其志以作春秋自儆亦非不知春秋者矣至於紀載往昔之事奇聞怪說無所不錄而於三代之本紀多背經而信傳好立異論以眩人其他微者未足論若武王與紂之事見於書最詳而遷乖亂之尤甚牧野之兵非武王之志也

聖人之不幸也武成載其時事但曰一戎衣天下大定不書紂之死者爲武王諱且不忍書也他書謂紂自焚死意爲近之武王之於紂非有深讎宿怨特爲民去亂耳當斯時使紂悔過遷善武王必不興師而踰孟津及紂兵已北使紂不死而降武王必將封之以百里之邑俾奉其宗廟必不忍加兵於其身也况紂已死乎吾意武王見紂之死也不踊而哭之則命商之羣臣以禮葬之矣豈復有餘怒及其既死之身乎遷乃謂武王至紂死所三射之躬斬其首懸於大白之旗又斬其二嬖要懸於小白之旗此皆戰國薄夫之妄言齊東野人之語非武王之事遷信而取之謬也漢高祖魏文帝皆中才之主非有聖智之度高祖猶能不殺子嬰文帝猶能奉山陽公終其身曾謂武王聖人而忍其君至此乎吾決知其不然矣苟信遷之言是使後世強臣凌上者蘊醢其君而援武王以藉口其禍君臣之大義下亦甚哉吾故辨之以爲好奇信怪者之戒

畢命

明方孝孺

余讀周書至於康王之命畢公然後知周公之忠厚也殷之遺民可謂頑矣大者作亂小者驕淫奢侈不率法度禮不得而齊之德不得而服之周公知其不可旦夕治也既欲加兵誅之又樂而遷之於洛其怒殷民亦甚矣然方伐叛也爲大誥告四方自他人言之宜痛詆深誚不比於恒民而周公方申申焉告以天命之去就無一辭及其民之非多士多方一則言遷民之故一則言四國民命不誅之由反覆乎夏商之存亡稱其民曰商王士曰義民而不忍少傷之夫周公豈不知殷民之頑哉終不斥之爲頑民而曲爲之諱避者聖人之慮至深遠也民莫不有是非好惡善未至於此而加之以善名則必喜而奮曰上之待我以善人也安敢不爲善惡未至於此而加之以惡名則必怨而怒曰上之不以君子待我吾安用爲君子故以君子望中人中人皆慕而爲君子以小人望中人中人或失其恒心殷民固頑矣周公以王士義民待之彼欲不脩士君子之行得乎聖人之待人也

怒如此宜乎未歷三紀而皆化也至於康王不知聖人導民之微權命畢公繼周公之職輒稱之爲頑民舉洛邑之民豈無善者哉槩而謂之頑殷民聞之得無怨且怒乎號之以爲頑而欲責其不爲頑不可得矣然則周公婉辭和色化殷民爲君子康王發片言而誣殷民爲頑民文王武王忠厚之意至其銷鑠殆盡矣不然世之庸主無典則以遺後祠者子孫蒙其遺烈猶可傳數世無亂以文武周公之大德曷爲不一三傳而遽徵乎史稱成康爲至治余謂周之衰康王基之

周禮辨疑

明 方孝孺

周禮者周史所記周之治事書也以其出于周也文
武周公之遺法微意往往可得而推以其成于史氏
所述也故不能無謬於聖人然去後世之制則已遠
矣其有不能大過於後世者蓋亡逸之餘秦漢之士
以意增損之者衆也條狼氏之誓群臣於馭曰車輶
于大夫曰鞭五百於太史曰殺小史曰墨周法豈若
是暴哉君臣之際有常禮上不以尊而威其下下不
以卑而屈於上道合則仕否則引而退不宜以鞭笞
戮辱懼之也夫馭及太史皆近臣大夫則國之執政
加以嚴刑而誓於衆使賢者居其職而能不知愧乎
此非以禮使入之道也且車裂鞭三百之法秦漢以
降之所有周之盛時寧有秦法御羣臣哉其非周制
也明矣昔歐陽氏蘇氏皆嘗疑周禮然皆其制度之
失耳於道無害也周禮之書多矣制度之不盡合豈
足爲周公累哉若其有戾于道者則學周公者所宜
知也

牛李維州事

明 胡廣

洪谷齋謂維州之事當時議者謂德裕賢於僧儒以
今觀之則僧儒爲得司馬溫公斷之以義利兩人曲
直始分按吐蕃頑獷狡暴世爲唐患屢盟屢叛非德
之可懷信之可結維州之事竊有議焉自清水劫盟
兵臨近鎮上下震驚德宗欲出幸以避之自是用兵
經費歲無虛日國計匱乏故德宗問李泌以復府兵
之策泌對以屯田積穀致富強之術德宗喜泌曰未
也臣能不用中國之兵使吐蕃自困德宗曰計將安
出泌不對大意欲結回紇大食雲南與共圍吐蕃令
吐蕃多備以牽制之知德宗素恨回紇故不對恐并
沮屯田之議不行自吐蕃寇西川韋臯與東蠻兩林
蠻連兵禦之屢捷屢勝吐蕃奔應西川南詔之不暇而
寇河隴之跡漸稀此正與泌計相合至憲宗時雖嘗
出寇亦鮮獲利穆宗長慶元年吐蕃寇青塞堡鹽州
刺史李文悅擊却之秋九月吐蕃遣其禮部尚書論
納羅來求盟以大理卿劉元鼎爲會盟使入吐蕃與
盟二年六月會盟之使未還即復來寇靈武寇鹽州

自此不見再盟文宗太五年九月吐蕃維州副使悉
怛謀請降盡率其衆奔成都李德裕遣行維州刺史
虞藏儉將兵入據其城具狀且言欲遣生羌燒十三
橋搗西戎腹心可洗久恥事下尚書省集議皆請如
德裕策牛僧孺曰吐蕃之境四面各萬里失一維州
未能損其勢比來脩好約罷戍兵中國禦戎守信為
上彼若來責曰何事失信養馬蔚茹川上平涼阪萬
騎綴回中怒氣直辭不三日至咸陽橋此時西南數
千里外得百維州何所用之徒棄誠信有害無利此
匹夫所不為況天子乎文宗以為然還其城執悉怛
謀歸之吐蕃盡誅之於境上由此觀之則僧孺之謀
誠過矣且維州本唐故地廣德元年陷入吐蕃韋皋
屢攻取之而不能得悉怛謀一旦舉以還唐其來降
之日又在吐蕃敗盟之後何失信之有僧孺乃有私
憾沮德裕之功故謬以往日吐蕃入長安之跡恐愒
天子使祖宗故地不復德裕成功不遂悉怛謀枉死
負冤於無窮朱子於綱目特書曰吐蕃將悉怛謀以
維州來降蓋深惜之也牛李是非如此其著溫公之

言直牛而曲李者其意蓋有所為宋神宗在位喜於
論兵富鄭公嘗云願陛下二十年不可道着用兵二
字溫公之意即鄭公之意也當西夏部將嵬名山欲
以橫山之衆取李諒祚以降詔邊臣招納其衆公上
疏極論以為名山之衆未必能制諒祚幸而勝之滅
一諒祚生一諒祚何利之有神宗不聽遣种諤發兵
迎之取綏州費用六十萬西方用兵蓋自此始矣後
城永樂夏人來爭喪師數十萬神宗臨朝大慟於是
公言始驗公平生惟以和戎為念及得疾猶嘆曰四
患未除吾死不瞑目矣其一以西戎之議未決折簡
與呂公著曰邊計以和戎為便然則牛李之論公云
云者欲假此以抑要功生事之人矯當時之弊不然
牛李之事曲直甚明公何為曲李而直牛乎維州之
論當以朱子綱目與致堂之說為當

劉給事

明 胡 廣

唐代宗永泰元年僕固懷恩誘回紇吐蕃雜入寇下
詔親征魚朝恩欲奉代宗幸河中以避吐蕃恐羣臣
議論不一百官入朝朝恩從禁軍操白刃宣言曰吐
蕃殺犯郊畿車駕欲幸河中何如公卿皆錯愕不知
所對有劉給事者獨出班抗聲曰敕使反耶今屯軍
如雲不戮力扞寇而遽欲脅天子棄宗廟而去非反
而何朝恩驚沮而退事遂寢劉給事當倉卒之頃而
能抗辭以折權幸使之驚沮真大丈夫哉視當時之
公卿閉口錯愕者誠可羞也惜乎史失其名不知為
誰千古之恨楊雄曰齊魯有大臣二人而史失其名
箋杜詩者謂黃四娘者獨何人哉因此以託不朽世
間幸不幸類如此劉給事言存而名泯其幸歟不幸
歟

張湯杜周有後

明 胡 廣

語曰仁者必有後張湯杜周俱為酷吏然皆有良士
爵位尊繼世立朝漢之元勳儒林之後乃有不如其
故何哉班孟堅謂湯推賢揚善固宜有後考周之跡
絕無一行之可舉其有後又何也史載湯決大獄欲
傳古義乃請博士弟子治尚書春秋補廷尉史平亭
疑法奏議疑必奏先為上分別其原上所是受而著
讞法廷尉挈令揚主之明湯用儒者議疑法豈於是
而有陰惠及人者乎其有後者蓋由於此周無一善
之可述但上以其盡力無私若然亦宜有後矣世疑
湯周不當有後而皆有後故采摭其美而論之所可
見者如此而已不然湯之子安世周子之延年見其
父行之繆循德礪行為漢名臣足以蓋其父之惡安
世之子延壽延年之子欽又能世濟其美後之繼隆
或不係於湯周而本於此歟

公孫宏節儉

明 胡 廣

汲黯謂公孫宏位在三公奉祿甚多然為布被此詐也。以本傳觀之宏嘗稱人主病不廣大人臣病不節儉。又其身食一肉脫粟飯其躬行節儉蓋亦素性然也。年八十終于相位漢之公卿多由奢縱取敗有如宏之節儉必能保其富貴宏之行亦可以厲俗故元始中脩功臣後下詔曰漢興以來股肱在位身行儉約輕財重義未有若公孫宏者位在宰相封侯而為布被脫粟之飯奉祿以給故人賓客無有所餘可謂減於制度而率下篤俗者也。與內富厚而外為詭服以釣虛譽者殊科夫表德章義所以率世厲俗聖王之制也。其賜宏後子孫之次見為適者爵關內侯此又可見漢之重節儉而薄奢靡故特表章宏以敦厲風俗厥後若唐尊失身以仕王莽封侯貴重位歷公卿衣敝履空以瓦器飲食被虛偽名其亦與宏異矣何足道哉

東坡祖黃生說

明 胡 廣

東坡武王非聖人之說蓋本於漢儒黃生黃生曰湯武非受命而殺也。轅固曰不然夫桀紂荒亂天下之心皆歸湯武湯武因天下之心而誅桀紂桀紂之民弗為使而歸湯武湯武不得已而立非受命而何黃生曰冠雖敝必加于首履雖新必貫于足何者上下之分也。今桀紂雖失道然君上也湯武雖聖臣下也夫主有失行臣不正言其過以尊天子反因過而誅之代立南面非殺而何故東坡曰武王非聖人也孔子蓋罪湯武歷稱堯舜禹有不足於湯武也。又云孟軻始亂之曰吾聞誅獨夫紂未聞弑君也。自是學者以湯武為聖人之正皆孔氏之罪人也。斯言竊為未當論語於篇終歷敘堯舜禹以及湯武孔子何嘗不稱湯武觀易革之彖曰湯武革命順乎天而應乎人孔子何嘗不足於湯武所謂順天應人者豈虛言乎。又謂武王伐紂誅其君其社稷諸侯必有不悅者故封武庚以慰之有有不得已焉耳。此蓋戰國相傾之術曾謂武王而為之乎。當牧野之誓諸侯不期而會者

八百天下固已叛紂歸武王矣雖賢如三仁知殷之必淪喪紂之必亡亦末如之何也已矣苟使天命未改人心不去雖紂百武庚又何足以慰悅殷之故家遺民哉封武庚者蓋武王公天下之心非爲私也湯武之迹孔孟言之盡矣不待辨而明第東坡之論如此恐後來學者惑於其言故略舉其槩以破其說黃生不師孔孟而立異論東坡何爲而師其說歟或曰東坡假此以彰荀彧之美甚曹操之惡以武王爲非聖人則曹操其鬼魅矣雖然曹操何足論以或身爲漢臣爲操盡謀以贊其業及篡奪之形已著方詭異論以自釋其自殺也宜矣何足取哉

易卦

明 胡廣

周易爻辭凡吉凶悔吝皆戒占者人能反求諸己則其應驗有如影響第占者以吉爲在己凶爲在人往往不應則歸咎于蓍龜誤矣昔漢武帝伐匈奴易之卦得大過爻在九五其繇曰枯楊生華象曰枯楊生花何可久也太卜謂匈奴破不久也皆以爲吉迺遣貳師將軍李廣利伐匈奴軍敗而降武帝歸咎於卦兆反謬當是時使太卜能云所兆在己阻武帝不遣貳師則必無喪師降將之恥而卦爲可徵矣噫蓍龜斷之明矣而用之者失其意往往如斯

唐太宗征高麗

明 胡 廣

唐太宗初征高麗諫議褚遂良曰陛下指麾則中原清晏顧野則四裔聳服威望大矣今乃渡河遠征小裔若指蒼克捷猶可也萬一蹉跌傷損威望更與忿兵則安危難測矣及上欲自征遂良復上疏以爲天下譬猶一身兩京心腹也州縣四肢也四裔身外之物也高麗罪大誠當致討但命二三猛將四五萬衆伏陛下威靈取之如反掌耳今太子新立年尚幼穉自餘藩屏陛下所知一旦棄金湯之全踰遼海之險以天下之君輕行遠舉皆愚臣之所甚憂也上不聽時羣臣多諫征高麗者尉遲敬德亦上言陛下親征遼東太子在定州長安洛陽心腹空虛恐有元惑之變且邊隅小 不足以勤萬乘願遣偏師征之指期可殄上不從及後出師無功乃深悔歎曰魏徵若在不使我有是行也命使祀徵復立所仆碑觀遂良敬德之諫如此太宗苟能聽之未必不善又何必魏徵之言是思乎竊謂使魏徵若在太宗亦必不能從其言方遂良初諫時李世勣即曰聞者薛延陀入寇陛下

欲發兵窮討魏徵諫而止使至今爲患曷用陛下之策北鄙安矣上曰然此誠徵之失朕尋悔之而不欲言以是知徵雖在太宗必不從其言也范氏謂帝知過能悔此其所以爲賢使果爲悔過實遂良敬德之言何必更思魏徵所以爲此說者帝於徵報之薄矣中心豈無慚忸故昔此以樹仆碑撫其妻子耳豈真思其言乎若帝真有悔心自當斬然決絕於東征之念矣何故連年不已啓房元齡臨終之諫與徐充容聞聞之疏乎由此觀之曷有悔過之實積鬱蓄念久而不解至於高宗累歲用師方始平之然小 雖哀而中國之經費亦不可勝計矣何足補哉或曰太宗之思魏徵元宗之思九齡事異而情同曰是不然元宗之思九齡蓋出乎中情太宗之思魏徵蓋矯情耳

記徐元張旺史整

明 胡 廣

紹興十九年冬完顏亮戕其主亶明年營都燕山二十九年又治汴京漸謀南侵三十年春東海民徐元張旺史整共起義師以帛書求援於宋宋守盟約不敢報元等嬰城半年國師水陸夾攻破之誅戮極其慘酷亮由是益疑宋得中原心決策入寇起蕃漢兵二十七萬僭人不預焉倣唐制分二十七軍明年自將巡洛至汝遣高景山王全來求釁此周益公文集所載而宋史紀不見陳桎通鑑續編載金東海民張旺作亂使徐文率舟師平之常慨宋失中原忠義之士嬰城固守力竭城陷并遭屠戮者何限如徐元張旺史整之徒志本為宋乃不能揀又不得一書于史以見其起義之忠而乃書曰金民作亂使千古之下負冤受抑何由復伸桎之書法大抵若此有不可憑當要以益公所記為定因表著其事以雪元輩之枉

文章辨體序題

明 吳 訥

古歌謠辭

按西山輯文章正宗凡古文辭之載于經聖人所嘗刪述者不敢錄獨采書傳所載康衢擊壤歌之類列于古詩之前且曰出于經者可信傳記所載者未必當時所作其好古傳疑之意至矣今謹遵其意仍以康衢童謠為首終於荀卿成相彙真卷端以俟考質

古賦

按賦者古詩之流漢藝文志曰古者諸侯卿大夫交接隣國必稱詩以喻意春秋之後聘問歌詠不行於列國而賢士失志之賦作矣大儒荀卿及楚臣屈原離騷憂國以賦風其後宋玉唐勒枚乘司馬相如楊子雲競為侈麗閎衍之辭而風諭之義沒矣近世祝氏著古賦辨體因本漢志之言而斷之曰屈子離騷即古賦也古詩之義若荀卿成相是也然其所載則以離騷為首而荀詩勿錄尚論世次屈在荀後而成相亦非賦體故今特取成相附古歌謠後而仍楚辭于古賦之首蓋欲學賦者必以是為先也宋景文公

有云離騷為辭賦祖後人為之如至方不能加矩至圓不能過規信哉

古樂府

易曰先王作樂崇德殷薦之上帝以配祖考成周盛時大司樂以黃帝堯舜夏商六代之樂報祀天地百神若宗廟之祭神既下降則奏九德之歌九韶之舞蓋以六代之樂皆聖人之徒所制故悉存之而不廢也迨秦焚滅典籍禮樂崩壞漢興高帝自制三侯之章而房中之樂則令唐山夫人造為歌辭史記云高祖過沛詩三侯之章令小兒歌之高祖崩令沛得以四時歌舞宗廟考惠文景無所增更於樂府習常肄舊而已至班固漢書則曰漢興樂家有制氏但能紀其鏗鏘而不能言其義高祖時叔孫通制宗廟迎神奏嘉至入廟奏永至乾豆上奏登歌再終下奏休成天子就酒東廂坐定奏安世然徒有其名而亡其辭所載不過武帝郊祀十九章而已後儒遂以樂府之名起於武帝殊不知考惠二年已命夏侯寬為樂府令豈武帝始為新聲不用舊辭也迨東漢明帝遂分

樂為四品一曰大予樂郊廟上陵用之二曰雅頌樂辟雍享射用之三曰黃門鼓吹樂天子宴群臣用之四曰短簫繞歌樂軍中用之其說雖載方冊而其制亦復不傳魏晉已降世變日下所作樂歌率皆夸靡虛誕無復先王之意下至陳隋則淫哇鄙褻舉無足觀矣自時厥後唯唐宋享國最久故其辭亦多純雅南渡後夾漈鄭氏著通志樂畧以為古之達禮有三一曰燕二曰享三曰祀所謂吉凶軍賓嘉皆主此三者仲尼所刪之詩凡宴享祀之時用以歌之漢樂府之作以繼三代因列鏡歌與三侯以下于篇亦無其辭後太原郭茂倩輯樂府百卷錄漢迄五代蒐輯無遺金華吳立夫謂其紛亂詭雜厭人視聽雖浮淫鄙倍不敢妄何哉近豫章左克明復編古樂府十卷斷自陳隋而止中若後魏楊白花等淫鄙之辭亦復收載是亦未得盡善也今考五禮以郊廟歌辭為先愷樂燕饗歌辭次之蓋以其切於世用足為制作家之助至若古今琴操與夫相合等曲亦附于後以俟好古君子之所考訂焉其或有題無辭或辭雖存而為

莊人雅士之所厭聞者茲亦不錄

古詩

詩大序曰詩者志之所之也詩有六義曰風曰雅曰頌曰賦曰比曰興三百篇尚矣以漢魏言之蘇李曹劉實爲之首晉宋以下世道日變而詩道亦從而變矣晦庵朱子嘗答鞏仲至有曰古今詩凡三變自漢魏以上爲一等自晉宋間顏謝以後下及唐初爲一等自沈宋以後定著律詩下及今日又爲一等然自唐初以前爲詩者固有高下而法猶未變至律詩出

而後詩之與法始皆大體無復古人之風矣嘗欲抄取經史韻語及文選漢魏古辭以盡郭景純陶淵明之作自爲一編而附三百篇楚辭之後以爲詩之根本準則又於其下二等之中擇其近於古者各爲一編以爲羽翼與衡其不合者則悉去之不使接於耳目入於胃次要使方寸之中無一字世俗言語意思則其爲詩不期於高遠而自高遠矣厥後西山編又章正宗劉氏輯風雅翼悉本朱子之意而去取詳略則有不同者焉是編所收率以二家爲主近代之有

合作者亦取載焉歌行之作別錄于後蓋歌行放情長言其句語格調與古詩亦有不同者矣律詩雜體具載外集嗚呼學詩之法子朱子之言至矣盡矣有志者勉夫

歌行

昔人論歌辭有有聲有辭者若郊廟樂章及鏡歌等曲是也有有辭無聲者若後人之所述作未必盡被於金石也夫自周衰採詩之官廢漢魏之世歌詠雜曲本其命篇之義曰篇因其立辭之意曰辭體如行書曰行述事本末曰引悲如登堂曰吟委曲盡情曰曲放情長言曰歌言通俚俗曰謠感而發言曰歎憤而不怒曰怨雖其立名不同然皆六義之餘也唐世詩人共推李杜太白則多模擬古題少陵則即事名篇無復倚傍厥後元微之以後人沿襲古題倡和重複深以少陵爲是故今是編凡擬古者皆附樂府本題之內若即事爲題無所模擬者則自漢魏以降迄于近代取其辭義之勿過於淫傷者錄載云

諭告

按西山云周官大祝作六辭以通上下親疎遠近曰辭曰命曰詰曰會曰請曰誅皆王言也大祝以下掌爲之辭則所謂代言者也以書考之若湯詰甘誓微子之命之類是也此皆聖人筆之爲經不當與後世文辭同錄今獨取春秋內外傳所載周天子諭告諸侯之辭及列國應對之語附焉又按東萊有曰文章從容委曲而意獨至惟左氏所載當時君臣之言爲然蓋由聖人餘澤未遠涵養自別故其辭氣不迫如此非後世專學語言者所得而比焉

璽書

按應邵曰璽信也古者尊卑共之左傳魯襄公在楚季武子使公冶問璽書至秦漢臣下始避其稱漢初有三璽天子書用璽以封故曰璽書文帝元年嘗賜南越趙陀璽書佗愧感頓首稱臣納貢至今讀史者未嘗不三復書辭以欽仰帝德於無窮也夫制詔璽書皆曰王言然書之文尤覺陳義委曲命辭懇到者蓋書中能盡褒勸警飭之意也故今特取前代璽書詔令之前讀者其必有以得之

批答

按王海唐學士初入院試制詔批答共三篇蓋批答與詔異詔則宣達上意批答則采臣下章疏之意而答之也文鑑輯批答詔教各爲一類可見矣唐史載太宗之答劉洎謂出自手筆今觀辭意誠然至若宋昭陵之答富弼等則皆詞臣之撰進者也讀者其尚考諸

詔

按三代王言見於書者有三曰詰曰誓曰命至秦改之曰詔歷代因之然唯兩漢詔辭深厚爾雅尚爲近古自偶儻之作興而去古遠矣東萊云近代詔書或用散文或用四六散文以深純溫厚爲本四六須下語渾全不可尚新奇華巧而失大體是編今以漢詔居前附以唐宋諸詔庸備二體西山有云王言之體當以書之詰誓命爲祖而參以漢詔冊信哉

冊

按漢書天子所下之書有四一曰策書注曰策者編簡也其制長二尺短者半之策書起維年月日以命

諸侯王公若三公以罪免亦賜策則用一尺木而隸書之又按唐百官志曰王言有七一日冊書立皇后皇太子封諸王則用之說文云冊者符命也諸侯進受於王象其札一長一短中有二編之形當作冊古文作冊蓋策二字通用至唐宋後不用竹簡以金玉爲冊故專謂之冊也若其文辭體制則相祖述云

制誥

按周官大祝六辭二曰命三曰誥考之於書命者以之命官若畢命罔命是也誥則以之播誥四方若大誥洛誥是也漢承秦制有曰策書以封拜諸侯王公有曰制書用載制度之文若其命官則各賜印綬而無命書也迨乎唐世王言之體曰制者大賞罰大除授用之曰發敕者授六品以下官用之即所謂告身也宋承唐制其曰制者以拜三公三省等職辭必四六以便宣讀于廷誥則或用散文以其直告某官也西山云制誥皆王言貴乎典雅溫潤用字不可深僻造語不可失新文武宗室各得其宜斯爲善矣

制策

按說文策者謀也凡錄政化得失顯而問之謂之對策考之於史實始漢之晁錯錯遇文帝恭謙好問之主不能明目張膽以答所問惜哉唯董仲舒學識醇正又遇孝武初政清明策之再三故克罄竭所蘊帝因是罷黜百家專崇孔氏以表章六經厥功茂焉迨宋蘇軾之答仁宗制策亦克輸忠陳義婉切懇到君子有取焉

表

按韻書表明也標著事緒使之明白以告乎上也三代以前謂之敷奏秦改爲表漢因之竊嘗考之漢晉皆尚散文蓋用陳達情事若孔明前後出師李令伯陳情之類是也唐宋以後多尚四六其用則有慶賀有辭免有陳謝有進書有貢物所用既殊則其辭亦各異焉西山云表中眼目全在破題要見盡題意又忌太露貼題目處須字字精確且如進實錄不可移於目錄若汎濫不切可以移用便不爲工矣大抵表文以簡潔精緻爲先用事忌深僻造語忌纖巧補叙忌繁冗是編所錄一以時代爲先後讀者詳之則體

製亦有以得之

露布

按通典云元魏攻戰克捷欲天下聞知乃書帛建於漆竿上名爲露布此其始也攷諸文章緣起則曰漢賈洪爲馬超伐曹操作露布及世說又載桓溫北征令袁宏倚馬撰露布是則魏晉以來有之矣文心雕龍又云露布者蓋露板不封布諸視聽近世帥臣奏技蓋本於此然今考之魏晉之文俱無傳本唐宋雖有傳者然其命辭全用四六蓋與當時表文無異今故錄附表後以備一體西山云露布貴奮發雄壯少麓無害觀者詳之

論諫

古者諫無專官自公卿大夫以至百工技藝皆得進諫隆古盛時君臣同德其部俞吁咈見於語言問答之際者考之書可見西山以爲聖賢大訓不當與後之文辭同錄今謹取其所載春秋內外傳諫爭論說之言著之于首其兩漢以下諸臣進說有可以爲法戒者間亦采之以附于後

奏疏

按唐虞禹皋陳謨之後至商伊尹周姬公遂有伊訓無逸等篇此文辭告君之始也漢高惠時未聞有以書陳事者急乎孝文開廣言路於是賈山獻至言賈誼上政事疏自時厥後進言者日衆或曰上疏或曰奏劄或曰奏狀慮有宣泄則囊封以進謂曰封事考之史可見昔人云君臣相遇雖一語有餘上下未孚雖千萬言奚補爲臣子者惟當罄其忠愛之誠而已

議

周書曰議事以制政乃不迷眉山蘇氏釋之曰先王人法並任而任人爲多故臨事而議是則國之大事合衆議而定之者尚矣今采漢唐宋諸臣上議狀次于奏疏以備一體若儒先私議其有關於政理者間亦取之而附于中云

彈文

按漢書注云羣臣上奏若罪法按劾公府送御史臺卿校送謁者臺是則按劾之名其來久矣梁昭明輯文選特立其名曰彈事若文粹文鑑則載奏疏之中

而已迨後王尚書應麟有曰奏以明允誠篤為本若
彈文則必理有典憲辭有風軌使氣流墨中聲動簡
外斯稱絕席之雄也是則奏疏彈文其辭氣亦異焉

檄

按釋文檄軍書也春秋時祭公誅父稱文告之辭即
檄之本始至戰國張儀為檄告楚相其名始著劉勰
云凡檄之大體或述此休明或叙彼苛虐指天時審
人事算強弱角權勢故植義颺辭務在剛健揮羽以
示迅不可使辭緩露板以宣衆不可使義隱大抵唐
以前不用四六故辭直義顯昔人謂檄以散文為得
體信乎

箴

按許氏說文箴誠也商書盤庚曰無或敢伏小人之
攸箴蓋箴者規誡之辭若箴之療疾故以為名古有
夏商二箴見于尚書大傳呂氏春秋而殘缺不全獨
周大史辛甲命百官官箴王闕而虞氏掌獵為虞箴
其辭備載左傳後之作者蓋本於此東萊云凡作箴
須用官箴王闕之意箴美須依虞箴獸臣司原敢告

僕夫之類大抵箴銘贊頌雖或均用韻語而體不同
箴是規諷之文須有警誡切劘之意

銘

按銘者名也名其器物以自警也漢藝文志稱道家有
皇帝銘六篇然亡其辭獨大學所載成湯盤銘九字
發明日新之義甚切迨周武王則凡几席觴豆之屬
無不勒銘自警厥後又有稱述先人之德善勞烈為
銘者如春秋時孔惺鼎銘是也又有以山川宮室門
闕為銘者漢班固之燕然山則旌征伐之功晉張
孟陽之劍閣則戒殊俗之階級其取義各不同也傳
曰作器能銘可以為大夫陸士衡云銘貴博約而溫
潤斯得之矣

頌

詩大序曰詩有六義六曰頌頌者美盛德之形容以
告神明者也嘗考莊子天運篇稱黃帝張咸池之樂
姦氏為頌斯蓋寓言爾故頌之名實出於詩若商之
那周之清廟諸什皆以告神為頌體之至至於魯頌
之駉駉等篇則當時用以祝頌僖公為頌之變故胡

氏有曰後世文人獻頌特勅魯頌而已文心雕龍云頌須鋪張揚厲而以典雅豐縟爲貴敷寫似賦而不入華侈之區敬慎如銘而異乎規諫之域諒哉

贊

按贊者贊美之辭文章緣起曰漢司馬相如作荊軻贊世已不傳厥後班孟堅漢史以論爲贊至宋范蔚宗更以韻語唐建中中試進士以箴論表贊代詩賦而無頌題迨後復置博學宏詞科則贊頌二題皆出矣西山云贊頌體式相似貴乎瞻麗宏肆而有雍容俯仰頓挫起伏之態乃爲佳作大抵贊有二體若作散文當祖班氏史評若作韻語當宗東方朔畫像贊金樓子有云班固願學尚云贊頌相似信然

七體

昭明輯文選其文體有曰七者蓋載枚乘七發繼以曹子建七啓張景陽七命而已容齋隨筆云枚生七發創意造端麗旨腴辭固爲可喜後之繼者如傅毅七激張衡七辯崔駰七依馬融七廣曹植七啓王粲七釋張協七命陸機七徵之類規模太切了無新意

及唐柳子厚作晉問雖用其體而超然別立機杼漢晉之間沿襲之弊一洗矣竊嘗考對偶白論六經所不廢七體雖專尚駢儷然辭意變化與全篇四六不同自柳子後作者未聞迨元袁伯長之七觀洪武宋王二老之志釋文訓其富麗固無讓于前人至其論議又豈七發之可比

問對

問對體者載昔人一時問答之辭或設客難以暑其意者也文選所錄宋玉之於楚王相如之於蜀父老是所謂問對之辭至若答客難解嘲賓戲等作則皆設辭以自慰者馬洪氏景廬云東方朔答客難自是文中傑出楊雄擬爲解嘲尚有馳騁自得之始至於班固之賓戲張衡之應問則屋下架屋章摹句寫讀之令人可厭迨韓退之進學解出則所謂青出於藍而青於藍矣

書

按昔臣僚敷奏朋黨往復皆總曰書近世臣僚上言名爲表奏惟朋黨之間則曰書而已蓋論議知識人

豈能同苟不具之於書則安得盡其委曲之意哉戰國兩漢間若樂生若司馬子長若劉歆諸書數陳明白辯難懇到誠可以為侑辭之助至若唐之韓柳宋之程朱張呂凡其所與知舊門人答問之言率多本乎進脩之助讀者誠能熟復以反之於身則其所得又豈止乎文辭而已

記

金石例云記者記事之文也西山曰記以善叙事為主禹貢顧命乃記之祖後人作記未免雜以議論陳后山亦曰退之作記記其事耳今之記乃論也竊嘗考之記之名始於戴記學記等篇記之文文選弗載後之作固以韓退之畫記柳子厚遊山諸記為體之正然觀韓之燕喜亭記亦微載議論於中至柳之記新唐鐵爐步則議論之辭多矣迨至歐蘇而後始專有以議論為記者宜乎后山諸老以是為言也大抵記者蓋所以備不忘於記營建當記月日之久近工費之多少主佐之姓名叙事之後畧作議論以結之此為正體至若范文正公之記嚴祠歐陽文忠公

之記畫錦堂蘇東坡之記山房藏書張文潛之記進學齋晦翁之作婺源書閣記雖專尚議論然其言足以垂世而立教弗害其為體之變焉

序

爾雅云序緒也序之體始於詩之大序首言六義次言風雅之變又次言二南王化之自其言次第有序故謂之序也東萊云凡序文籍當序作者之意如贈送燕集等作又當隨事以序其實大抵序事之文以次第其語善序事理為上近世應用唯贈送為盛當須取法昌黎則庶得古人贈言之義而無枉已徇人之失也

論

按韻書論者議也梁昭明文選所載論有二體一曰史論乃史臣於傳末作論議以斷其後人之善惡若司馬遷之論項籍商鞅是也二曰論則學士大夫議論古今時世人物或評經史之言正其訛謬於賈生之論過秦江統之議徙戎柳子厚之論守道守官是也唐宋取士用以出題然求其辭精義粹卓然名世

者亦惟韓歐爲然劉勰云聖哲彙訓曰經述經敘理
曰論故凡陳政則與傳注參體辨史則與贊評齊行
詮文則與序引共紀信夫

說解

按說者釋也述也解釋義理而以己意述之也說之
名起自吾夫子之說卦厥後漢許慎著說文蓋亦祖
述其名而爲之辭也魏晉六朝文載文選而無其體
獨陸機文賦備論作文之義有曰說煒燁而誦誼是
豈知言者哉至昌黎韓子憫斯文日弊作師說抗顏
爲學者師迨柳子厚及宋室諸大老出因各即事即
理而爲之說以曉當世以開悟後學由是六朝陋習
一洗而無餘矣盧學士云說須自出己意橫說豎說
以抑揚詳贍爲上若夫解者亦以講釋解剝爲義其
與說亦無大相遠矣

辯

昔孟子答公孫丑問好辯曰予豈好辯哉予不得已
也中間歷叙古今治亂相尋之故凡八節所以深明
聖人與己不能自己之意終而又曰豈好辯哉予不

得己也蓋非獨理明義精而字法句法章法亦足爲
作文楷式迨唐韓昌黎作諱辯柳子厚辨桐葉封弟
識者謂其文數孟子信矣大抵辯須有不得已而辯
之意苟非有關世教有益後學雖工亦奚以爲

原

按韻書原者本也一說推原也義始大易原始要終
之訓若文體爲之原者先儒謂始於昌黎之五原蓋
推其本原之義以示人也黃山谷曰文章必謹布置
每見學者多告以原道命意曲折石守道亦云吏部
原道原人等作諸子以來未有也後之作者蓋亦取
法於是

戒

按韻書誠者警勅之辭文章緣起曰漢杜篤作文誠
辭已弗傳昭明文選亦無其體今特取先正誠子孫
及警世之語可爲法誠者錄之

題跋

按蒼崖金石例云跋者隨題以贊語於後前有序引
當據其有關大體者以表章之須明白簡嚴不可墮

人窠臼予嘗即其言考之漢晉諸集題跋不載至唐韓柳始有讀某書及讀某文題其後之名迨宋歐曾而後始有跋語然其辭意亦無大相遠也故文鑑文類總編之曰題跋而已近世疎齋廬公又云跋取古詩狼跋其胡之義狼行則前躡其胡故跋語不可太多多則冗尾語宜峭拔使不可加若然則跋比題與書尤貴乎簡峭也庸書以俟考訂云

雜著

雜著者何輯諸儒先所著之雜文也文而謂之雜者何或評議古今或詳論政教隨所著立名而無一定之體也文之有體者既各隨體聚集其所錄弗盡者則總歸之雜著也若雖雜然必擇理之弗雜者則錄焉蓋作文必以理爲之主也若夫掛一漏萬尚有俟博雅君子

傳

太史公創史記列傳蓋以載一人之事而爲體亦多不同迨前後兩漢書三國晉唐諸史則第相祖襲而已厥後世之學士大夫或植忠孝才德之事慮其湮

沒弗白或事雖微而卓然可爲法戒者因爲立傳以垂于世此小傳家傳外傳之例也西山云史遷作孟荀傳不正言二子而旁及諸子此體之變可以爲法步里客談又云范史黃憲傳蓋無事蹟直以語言模寫其形容體段此爲最妙由是觀之傳之行迹固繫其人至於辭之善否則又繫之於作者也若退之毛穎傳迂齋謂以文滑稽而又變體之變者乎

行狀

按行狀者門生故舊狀死者行業上于史官或求銘誌於作者之辭也文章緣起云始自漢丞相倉曹傳朝幹作楊原伯行狀然徒有其名而亡其辭蕭氏文選唯載任彥叔所作齊竟陵王行狀而辭多矯誣識者病之今采韓柳所作載爲楷式云

謚法

周禮大史喪事考焉小喪賜謚疏云小喪卿大夫也卿大夫謚君親制之使大史往賜之至遣之日小史往爲讀之又按禮記曰幼名冠字五十以伯仲死謚周道也是則賜謚之制實始於周崇文總目載周公

同老天女維摩總解禪經卷藥爐新活計舞衫歌扇舊因緣丹成遂我三山去不作巫陽雲雨仙

贈子真秀才

萬里雲山一破裘杖端閒挂百錢遊五車經已畱兒讀二項田應爲雀謀水底笙歌蛙兩部山中奴隸橘千頭幅巾我欲相隨去海上何人識故侯

出潁口初見淮山是日至壽州

我行日夜向江海楓葉蘆花秋興長平淮忽迷天遠近青山久與船低昂壽州已見白石塔短棹未朱金元詩永卷十朱七言律

展黃茅岡波平風軟望不到故人久立煙蒼茫

蘇轍

感秋扇

團扇經秋似敗荷丹青髣髴舊松蘿一時用捨非吾事舉世炎涼奈爾何漢代誰令收汲黯趙人猶復用廉頗心如懷袖非安處重見秋風愧恨多

古北口道中呈同事

獨臥繩牀已七年往來殊復少縈纒心遊幽闕鳥飛處身在中原山盡邊梁市朝回塵滿馬蜀江春

近水浮天枉將眼界疑心界不見中宵氣浩然

春日寄內

春到燕山水亦消歸驛迎日喜嫖姚久行胡地生華髮初試東風脫敝貂插唇小幘應正黼黻盤生衆爲誰挑附書勸掃東園雪到日青梅未滿條

送文太史還洛

國老無心豈爲身五年朝謁慰符紳元臣事業通三世舊將威名服四隣遍閱後生真有道欲談前事恐無人公惟有凌雲會歲歲何妨雨露新

朱金元詩永

卷十 朱七言律

事

興州新開古東池

山繞興州萬壑青池開近郭百泉井昔年種柳人安在累歲開花藕自生波暖跳魚聞樂喜人來野鴨望船鳴西還過此須終日爲問使君行未行

披仙亭晚飲

落日欲沒多雲煙南山暝鴉歸北山樓臺城上半明滅燈火橋頭初往還江西八月熟猶在坐中還客頭欲斑何時解網墮歸去黃花白酒疎籬間

次韻王學同飲王廷老度支家戲咏

白魚紫蟹早霜前有酒何須問聖賢上客遠來工
緩頰雙鬟爲出小垂肩新傳大曲皆精絕忽發狂
言亦可憐莫怪貧家少還往自須先辦買花錢

聞王鞏還京會客劇飲賦贈

聞君歸去便招呼笑語不知清夜徂結束佳人試
銀甲蕭連狂客憫金吾燭花零落玉山倒詩筆欲
斜翠袖扶暫醉何年依錦瑟東齋還復臥氍毹

次韻王鞏代書

去年河上送君時我醉看君倒接羅一笑便成經

朱全元詩未

宋七言律

上

歲隔扁舟重到滿城知舊傳北海偏憐客新怪東
方苦想飢應笑長安居不易空吟原上草離離

黃庭堅

次韻蓋中郎率郭郎中休官

仕路風波雙白髮閒曹笑傲兩詩流故人相見自
青眼新貴卽今多黑頭桃葉柳花明曉市荻芽蒲
筍上春洲定知閒健休官去酒戶家園得自由

和師厚郊居示里中諸君

籬邊黃菊關心事窓外青山不世情江橋千頭供

歲計秋蛙一部洗朝醒歸鴻往燕競時節宿草新
墳多友生身後功名空自重眼前樽酒未宜輕

寄黃幾復

我居海北君南海寄雁傳書謂不能桃李春風一
杯酒江湖夜雨十年燈持家但有四立壁治病不
斬三折肱想得讀書頭已白隔溪猿哭瘴溪藤

寄上叔父夷仲

闕寒塞雪欲嗣音燕雁拂天河鯉沉百書不如一
見面幾日歸來兩慰心弓刀陌上望行色兒女燈

朱全元詩未

宋七言律

主

前語夜淡更懷父子東歸得手種江頭柳十尋

新喻道中寄元明用觴字韻

中年畏病不舉酒孤負東來數百觴喚客煎茶山
店遠看人秧稻午風涼但知家裏俱無恙不用書
來細作行一百八盤揚手上至今猶夢遶羊腸

秦觀

與鄧慎思沐于啓聖遇李端叔

羸兵瘦馬犯黃塵自笑區區夢裏身不是對花能
伏老自緣無酒可澆春校書天祿陪羣彥啼髮陽

惟文選錄曹子建之誄王仲宣潘安仁之誄楊仲武蓋皆述其世系行業而寓哀傷之意厥後韓退之之於歐陽詹柳子厚之於呂溫則或曰誄辭或曰哀辭而各不同迨宋曾南豐東坡諸老所作則總謂之哀辭大抵誄則多叙世業故今率倣魏晉以四言為句哀辭則寓傷悼之情而有長短句及楚體不同焉

祭文

古者祀享史有冊祝載其所以祀之之意考之經可見若文選所載謝惠連之祭古冢王僧達之祭顏延之則亦不過叙其所祭及悼惜之情而已迨後韓柳歐蘇與夫宋世道學諸君子或因水旱而禱于神或因喪塋而祭親舊真情實意溢出言辭之表誠學者所當取法大抵請神以悔過遷善為主祭故舊以道達情意為尚若夫諛辭蔓說固非足以動神而亦君子所厭聽也

連珠

按晉傳元曰連珠興於漢章帝之世班固賈逵亦嘗受詔作之蔡邕張華又嘗廢焉歟之文選止載陸士

錄以備一體

律賦

律賦起於六朝而盛於唐宋凡取士以之命題每篇限以八韻而成要在音律諧協對偶精切為工迨元氏場屋更用古賦由是學者弗習今錄一二以備其體

律詩

律詩始於唐而其盛亦莫過於唐考之唐初作者蓋鮮中唐以後若李太白常應物猶尚古多律少至杜子美王摩詰則古律相半迨元和而降則近體盛而古作微矣大抵律詩拘於近體固弗若古體之高遠然對偶音律亦文辭之不可廢者故學之者當以子美為宗其命辭用事聯對聲律須取溫厚和平不失六義之正者為務式若換句拗體粗豪險怪者斯皆律體之變非學者所先也楊仲宏云凡作唐律起處要平直承處要舂容轉處要變化結處要淵永上下要相連首尾要相應最忌俗意俗字俗語俗韻嘗用工二十年始有所得嗚呼其可易而視之哉

排律

楊伯謙云唐初五言排律雖多然往往不純至中唐始盛若七言則作者絕少大抵排律若句鍊字鍛工巧易能唯抒情陳意全篇貫徹不失倫次者爲難故山谷嘗云老杜贈韋左丞相詩前輩錄爲壓卷蓋其布置最爲得體如官府甲第廳堂房室各有定處不相淆亂也

絕句

楊伯謙曰五言絕句盛唐初變六朝子夜體六言則

王摩詰始効顧陸作七言唐初尚少中唐漸盛又按詩法源流云絕句者截句也後兩句對者是截律詩前四句前兩句對者是截後四句皆對者是截中四句皆不對者是截前後各兩句故唐人稱絕句爲律詩觀李漢編昌黎集凡絕句皆收入律詩內是也周伯弼又云絕句以第三句爲主須以實事寓意則轉換有力而渾蓄無盡焉

聯句

按聯句始著於陶靖節集而盛於退之東野攷其體

有人作四句相合成篇若靖節集中所載是也又有人作一聯若子美與李尚書之芳及其甥宇文或聯句是也復有先出一句次者對之就出一句前人復對之相繼成章則昌黎東野城南之作是也其要在於對偶精切辭意均若出一手乃爲相稱山谷嘗云退之與孟郊意氣相入故能雜然成篇後人少聯句者蓋由筆力難相追爾

雜體

昔柳柳州讀退之毛穎傳有曰善戲謔兮不爲詭兮學者終日討說習復則罷憊而廢亂故有息焉游焉之說譬諸飲食既薦味之至者而奇異苦鹹酸辛之物雖暫吮裂鼻縮舌溢齒而咸有篤好之者獨又異乎予於是而知雜體之詩皆類是也然其爲體各雖不同今總謂之雜者以其終非詩體之正焉

近代詞曲

按歌曲源流云自古音樂廢後鄭衛之聲雜然並出至唐開元天寶中薰然成俗于時才士始依樂工按拍之聲被之以辭其句之長短各隨曲而度於

是古昔聲依永之理愈失矣又按致堂胡先生曰近世歌曲以曲盡人情而得名故文章豪放之士鮮不寓意於此隨亦自掃其跡曰此詭浪遊戲而已唐人爲之者衆至柳耆卿乃掩衆製而盡其妙篤好者以爲不可復加及眉山蘇氏出一洗綺羅香澤之態擺脫綢繆宛轉之度使人登高望遠舉首高歌而逸懷浩氣超乎塵垢之表竊嘗思凡文辭之有韻者皆可歌也第時有升降故言有雅俗調有古今爾昔在童稚時獲侍先生長者見其酒酣興發多依腔填詞以歌之歌畢顧謂幼稚者曰此宋代慢詞也當時大儒皆所不廢今間見草堂詩餘自元世套數諸曲盛行斯音日微矣迨予既長奔播南北鄉邑前輩零落殆盡所謂填詞慢調者今無復聞矣庸輯唐宋以下辭意近於古雅者附諸外集之後竹枝楊柳亦不棄焉好古之士於此亦可以觀世變之不一云

紀瀛國公事錄

明 袁忠徹

予幼時聞諸先生與先人言宋幼主北遷元降封爲瀛國公一夕世祖夢金龍舒爪纏殿柱明日瀛國來朝立所夢柱下世祖感其事欲除之謀諸臣下瀛國知懼遂乞從釋疏合尊大師往西天受佛法獲免過朔北札顏之地謁周王即明宗見瀛國后罕祿魯氏郡王阿兒廝蘭之裔孫也明宗愛而納之未幾生安惟帖睦爾後有言於文宗詔曰明宗在朔漢之時素謂非己子遂兩徙高麗海島尋移廣西文宗崩丞相燕鐵木兒請於文后卜答失里立太子燕帖古思后不從命立明宗次子亦隣班是爲宣宗寧宗崩燕鐵木兒復請立燕帖古思后曰吾子尚幼明宗長子安惟帖睦爾在廣西年十三矣乃命中書右丞閻里吉思往廣迎之至良鄉燕鐵木兒既見且陳迎立之意安惟帖睦爾幼且畏之一無所答於是燕鐵木疑之適太史亦言不可立立則天下亂遂不果文后視政一年燕鐵木兒薨學士虞集上封事不肯草詔文后與大臣及學士屢屢等定議立姪安惟帖睦爾爲帝

且詔尊文后曰燕帖木兒猶懷兩端遷延數月天殞
厥躬永惟皇太后之子一以至公為心親挈太寶昇
子兄弟迹其定策兩朝功德隆盛帝以虞集之上封
事乃曰噫嘻餓秀才怎麼知我家事集驚懼表明帝
立之八年六月撤文宗廟主徙文后幽於東安放其
太子燕帖古思於高麗中道謀殺之嗚呼順帝享國
實由文后然聽讒臣之言遂至文后母子被害夫宋
待崇世宗之後代居顯官詳見史冊為孤兒寡
婦元君忍不相容也瀛國居燕八年因殺文丞相方
給衣糧此待之薄甚急感夢有疑瀛國逆知假往西
天又遇周王奪其后而生順帝明宗朔漠之言觀
之明為遺腹也而天不負宋而又享國之久然順帝
之負文后豈其少恩哉國祚之歸于大明宜矣予歸
老于家或誦虞文靖公詩所紀瀛國之事因而有感
遂行書舊所聞者使知宋三百年之德澤不泯也如
是順帝幽文后殺其太子此又天使宋之遺孽滅元
之報復也永樂十年五月十八日我太宗文皇帝御
武英門命內官李謙王吉於古今通集庫取宋列帝

遺像命臣忠徹及畫士百戶徐英觀之上笑謂忠徹
曰宋太祖以下雖是元王鼻其氣象清癯若太醫然
十九日上復御武英門命臣忠徹同內官王吉看元
列帝像俱魁偉雄邁上曰都喫綿羊肉者及觀順帝
像顧謂臣忠徹曰惟此何為類大醫也忠徹斯時承
命未實俯首莫對今蒙賜老田里得以歷考宋元史
傳暨元學士虞集所作第十六飛龍之詩果符太宗
文皇帝之言感念聖鑑之明愧當時不能對此為恨
庸書以俟秉筆者補之

蘇子瞻

宋仁宗以前用差役而民不擾王安石用雇役民始擾矣司馬君實廢雇用差雖蘇子瞻亦喋喋不已豈稍欲中立於荆溫兩間冀免後患邪觀其為哲宗言臣私憂神宗勵精之政漸致隳壞理財疎而備邊弛故撰策問欲以感動聖意子瞻之情殆可見也然其後惠僭之貶罪子瞻全佐助溫而不貸其略護向荆則昔者之言徒為向背亦何益哉子瞻作君實神道

碑深美其誠蓋自覺誠之未如君實者也

蘇子由

蘇子由使遼歸為哲宗言遼王宏基以與我和好為喜年貌可六十步履輕健飲啗不衰享國尚當有年我可以無虞其君臣事佛國俗化之彼之巨蠹足為我喜也宏基孫延禧當嗣位然骨氣凡弱視瞻不正恐非彼之福其意亦嚮慕和好而我不足恃之矣其後宏基守和好又十餘年而殂延禧亦不肯盟然遼國遂亡於延禧之身則子由之言信矣容貌辭氣乃

德之符非特得其身之退促而併得其國之興替仲

由益成括之死見知於孔孟邾子高仰魯侯卑衛兆其死亡見知於子貢聖賢原自有觀人之法也子由殆聞於是而然歟抑使可覘國則非其人者不足使佛能蠹國而歷世之莫悟也何哉

李清臣

李清臣見宣仁聖烈后既崩哲宗入羣小之言意欲紹述熙豐之法而是時小人屏出在外者其勢亦將轉而後起元祐諸賢漂漂乎履歷及之矣若此者清

臣之所喜也清臣平日於操切禽割以作法抑揚軒輊以立勢所優為也故嘗發而為濫原勢原之文翫其辭氣真小人之言也夫為治者先德而後法上理而下勢今乃切切於法與勢之為言則其所蘊可知矣

王介甫

王介甫詩云周公恐懼流言王莽謙恭下士時假使當時身便死終身真偽有誰知其意謂已嘗辭館職出於真異已者若司馬君實辭樞副范景仁辭翰出

於偽為莽之徒也然不知蘇子瞻又嘗謂介甫為莽之徒其詩曰漢家殊未識經綸入手功名事業耕百尺穿成連夜并千金購得鮮飛人譏其汲汲妄作也嗚呼數他人之髭髻鬚而不見已睫者其介甫之謂哉

李杜韓柳

以詩言杜比跡於李以文言柳差肩於韓而以人言則杜韓楊淑李柳陰隱如水炭異其熱薰猶殊芳臭矣子美當安史作難時徒步從肅宗其詩拳拳於君臣

之義太白於其時從永王璘欲乘危割據江表叛棄宗社作猛虎行云於旌旗紛西河鼓驚山欲傾倒一輪一失闕下兵

翻覆無定止張良未遇韓信貧劉項存亡在兩臣其辭意視祿山思明反噬其主比於劉項敵國相爭尚安知君臣之大倫歟元稹謂太白不能窺子美藩籬况其堂奧得之矣退之懷忠事主闢邪宗聖固有本原其稱子厚謂序不久其文必不能傳於後於今無疑蓋惟稱其文而已其阿附任文元敦堂謂忌憲宗

在儲位有更易秘謀未及為而敗後又託河間淫婦無卒者以詆憲宗得免於大戮為幸由是言之文雖美而若斯過惡固非可滿滌者也朱文公楚辭載子厚謫居時懲咎賦取其有自悔之言噫悔已又詆主則亦非真悔也奚足錄哉

天極

天有北南極如瓜果

果分十柰何故以

遲速有常度最遲之處即李也故謂之月字李六十

二年而七周天炁生於閏二十

周天炁李皆有度

并七政為十一曜也

同謂之四餘

記龍生九子

明 李東陽

龍生九子不成龍各有所好因牛龍種平生好音樂
今琴頭上刻獸是其遺像睚眦平生好殺今刀柄
上龍吞口是其遺像嘲風平生好險今殿角走獸是
其遺像蒲牢平生好鳴今鐘鈕是其遺像狻猊
平生好坐今佛座獅子
今碑座獸是其遺像
頭是其遺像昔在
子名目因憶少
具又莫知所出
得於其師左叅
續以故冊來冊面
復命蓋記問之難如此恐久而
失之漫識于此以
俟他日

門上獅子
問龍生九
不能悉

其五六云
節劉員外續
從出因據以

咨脈

明 劉玉

天以二氣五行化生萬物靈而為人然察其虛實寒
溫燥濕死生存乎脈爾自素難扶其微王叔和草為
脉經世所傳脉訣蓋六朝高陽生所續其為言曰左
心小腸肝膽腎右肺大腸脾胃命又曰煩人反此背
觀之尺脉第三同斷氣登為
男女陽順自下
生上右手之尺為
萬物從
此惟脾為先故
公故關上之
寸為肺肺金生
其之尺為腎
腎水生木故左
其要矣然又
之寸為心其言
命之本萬物
謂女子陰逆自上
從土而出惟脾為先
為脾脾土生
金故關下之尺為肺肺金生水故左手之尺越右手
之寸為腎腎水生木故右手寸下之關為肝肝木生
火故關下之尺為心其言又如此則可謂惑於人而
不察其理也人稟天地之氣以生四體百骸男女無
不同者豈獨至於脉相反如此哉竊嘗考之心火也

火旺於南故心之脉見於左寸肝木也木旺於東故	肝之脉見於左關肺金也金旺於西故肺之脉見於	右寸脾土也土旺於四季中無定位寓於西南故脾	之脉見於右關腎水也水旺於北故腎與命門之脉	皆見於左右尺以人身高言心	肺在隔膜之上其	氣至清肝與脾在臟腑	身與命門在丹	田之下其氣至沉	四九陽勝手陰	數二七金數	陽相近也水數	生數五十陰	與肺同居於	寸肝與脾同	天然心肝腎	陽屬也故同居	同居于右此	自然之理不可得	女尺脉常弱	女子尺脉常盛蓋以男	上表之別爾豈謂	脉之相反男女殊絕上者下而左者右十二時將安	屬證何以察而治何以處乎然則反此之說其義何	居曰脉經所言是已脉經不言者素難未常言也素	難未嘗言脉訣何自言而言之邪纂之者務簡而不	精申之者承訛而愈失明於難素脉經者必有審於
----------------------	----------------------	----------------------	----------------------	--------------	---------	-----------	--------	---------	--------	-------	--------	-------	-------	-------	-------	--------	-------	---------	-------	-----------	---------	----------------------	----------------------	----------------------	----------------------	----------------------

斯作言脉

春秋天子之事

明 席 書

孟子曰孔子懼作春秋天子之事也是故孔子曰知我者其惟春秋乎罪我者其惟春秋乎此數語者千萬世春秋之宗旨也惜乎後之儒者誤讀孟子之言遂使宗旨一失而百家紛紛者出矣謹按孟軻氏本謂孔子懼亂文則其繁汙筆也懼此春秋所以征伐皆天子也

事也以天下

王命者可以作

故知孔子者謂不

之罪孟軻氏之本意

以寫王法惇典庸禮命德討罪要皆天子之事也

知孔子者所云似矣罪孔子者謂無其位而託二百

四十二年南面之權使亂臣賊子禁其欲而不得肆

則賊矣直謂夫子欲代天子之賞罰也嗚呼釋經而

至于如此則亦無所不至矣孟子所云春秋天子之

年故取春秋之

而後亂賊知

所載禮樂

下國家之

以作之奉

行而作也是

有謂有出言

孔子作春秋

事而孔子作之也世儒所云春秋天子之事而孔子

行之也孟子所云孔子作春秋以明王道于世也世

儒所云孔子作春秋以任王法于身也嗚呼釋經至

于如此則亦無所不至矣此非直文定之言也公穀

以來蓋已有之至文定則言其考亭平日議論春

秋大不類此至釋天之言是蓋一

時之所采非終身

十萬言君臣之

諸性道發諸言

以來亦有也

無抵牾者褒貶

義出於託南面

自夫儒者一言之誤

天子之事是故吳楚降王魯

為人子突下

中士善者賞之惡者罰之亂臣賊子秉鉞鉞以誅之

宛然王者被袞冕於明堂之上而進退乎百官也嗚

呼誣亦甚矣吾不意仲尼之聖所為一至此也然猶

可也至於春無王以著天下之無王王無天以貶王
者之不天是夫子非特行天子之事以賞罰乎諸侯
而又行天之事以賞罰乎天子也夫子將為之乎夫
子不為天以賞罰乎天子則亦不為天子以賞罰乎
諸侯也其為誣也則亦不矣且天子之事豈惟
春秋馬遷之史記班
綱目凡為史者
者亦欲託諸中
俟辨矣或曰
異于是備史
僭天子僭國中
吾所謂春穩之
惡以重天下之懲
秋萬世之大法也如必曰
以萬古之春穩坐一言之非誤以至於今莫可易者
此余所以不避迂朽而過為論也不知孔孟再作將
取于余言否耶

豈數君子
經也則亦不
所謂僭也

人之僭非
之法安在曰
之法也彰善
之去取此春

敢以誣春秋也夫

夾谷

明 席 書

孔子相夾谷之會仲由毀強僭之都眾皆頌之而有
識者疑焉夫經有不俟傳而可考者夾谷之會即費
之墮是也兩書平會之後而繼以濟來歸田則齊田
之歸歸以平也不平則不歸也兩書圍
郎之後而繼以墮郎
邑不叛二氏二
謂夾谷之會
氏寧將墮三
仲由之謀也
平也齊既平
有從容談笑之
齊出萊兵孔不
以十數餘言且曰而不
目動神怒殆賴曹劇齊柯之盟樊噲
人氣象大不槩也自左氏作之公穀附之儒者從而
爭頌之曰仲尼一語威重三軍信非大聖人不能也
是豈惟聖人哉其在春秋戰國申包胥簡相如鄭子

仲由為季
皆出孔子

生於所不
之君子因
夾谷之會
乎齊侯說

氏罷耳
之會於聖

產蘇秦張儀李左車鄼食其之徒皆優為之矣豈
 聖人哉二氏欲墮二邑移辰墮之孟氏不欲墮成公
 圍之而不克也以此見進退不在公而在三家也而
 謂由孔子哉邱費克而成不克何孔子長於邱費
 短於謀成也臣舉之則見
 釋君而臣是功乎三
 於強者斯易行
 之化未足神
 而至於命將
 仲尼命申句
 無異於人也
 聖人若果用魯
 而不來將唱
 以圍之乎
 矣夫子
 於兩觀之下至無功而還威
 後見圍成
 無功護之公也向使成叛孟氏孟氏帥師墮成必不
 重勞魯公之圍也後之人追見圍成之事不以歸孟
 氏而以歸仲尼多見其因成敗以附人也且曰墮

則難引 仕魯豈
 與未見行
 不能聖人
 也墮邱費
 何計已疎

圍皆非有道時事也苟以墮都為功夫子同於用
 之年既專墮都之功當服圍成之各儒者不究所從
 功則歸於仲尼過則歸於魯定設令仲尼再主必不
 誣功於已假曰圍成之時孔
 孔子十四年為魯
 未合可盡信也
 未得一日少
 而不知非所
 都無仲由平
 之仕如斯
 孔子奚害為
 欲頌天之功也
 子之聖矣異

事不出於
 非天也有
 孔子
 孔子
 之
 功

五吏篇

深文鍊法此苛吏也而世

譽此偽吏也而世尚之

吏也而世尚之曰

世尚之曰功能

曰材幹之吏

之禮之則曰

之正陽城

惑群議而

明 崔 銑

曰法理之吏飾外修

一逢 此倭

雜著

雜著下

明

大雅小雅

明楊慎

詩大序曰政有大小故有小雅焉有大雅焉此說未安大雅所言皆受命配天繼代守成固大矣小雅所言天保以上治內采薇以下治外亦豈小哉華谷嚴坦叔云雅之小大特以體之不同爾蓋優柔委曲意在言外風之體也明白正大直言其事雅之體也純乎雅之體者為雅之大雜乎風之體者為雅之小今考小雅正經十六篇大抵寂寥短章其篇首多寄興之辭蓋兼有風之體大雅正經十八篇皆春容大篇其辭皆正大氣象開闊與國風迥然不同比之小雅亦自不侔矣至於變雅亦然變小雅中固有雅體多而風體少者然終不得為大雅也離騷出於國風言多比興意亦微婉世以風騷並稱謂其體之同也太史公稱離騷曰國風好色而不淫小雅怨誹而不亂若離騷者可謂兼之矣言離騷兼國風小雅而不言其兼大雅見小雅與風騷相類而大雅不可與風並言也詠呦鹿鳴食野之苹便識得小雅興趣誦文王在上於昭于天便識得大雅氣象小雅大雅之別昭

昭矣華谷此說深得二雅名義可破政有大小之說特為表出之

郭象注莊子

昔人謂郭象注莊子乃莊子注郭象耳蓋其襟懷筆力畧不相下今觀其注時出俊語與鄭元之注擅弓亦同而異也洪容齋嘗錄檀弓注之奇者于隨筆予愛郭注之奇亦復錄於此如逍遙篇注云大鵬之與斥鷃宰官之與御風同為累物耳養生篇注云向息非令息故納養而命續前火非後火故為薪而火傳又以生死為寤寐以形骸為逆旅又云多賢不可以多君無賢不可以無君又云通彼而不喪我即所謂惠而不費也又云天性在天實乃閑又云堯有亢龍之喻舜有卷倭之談周公類之走狼仲尼比之逸狗又云律呂以聲義形元黃以色兼質又云生之所無以為者分外物也知之所索何者命表事也此語尤精可比於荀孟又云草不謝榮于春風木不怨凋于秋天李太白用為詩語而人不知其本於子元也

宋史

宋史表首稱相阿魯圖其實歐陽元之筆也其爲卷
六百文百萬言自有史冊以來未有若是多者也其
自謂辭之煩簡以事文之今古以時蓋欲自成一代
書而不強附昔人是也其可憾者有紀一事而先後
不同一人而彼此不同由脩之者非一手也愚觀自
古文籍至宋而憾焉非憾乎人也所憾於上之人壞
古脩史之法也史始於尚書春秋大抵皆一人之筆
尚書雖雜出然而紀一事自一篇一篇自一人春秋
則孔子特筆而門人一辭不能贊者矣春秋三傳各

以其意釋經而其事傳焉若國語若世本若戰國策
皆一家言自史記十七代之書亦皆一人成之唐書
雖文忠與景文共之然而卷帙互分兩美相合至元
脩宋遼金三史此法壞矣原其所以由北人在位大
臣寡學不欲中國之人擅其所長故不惟其人惟其
官不惟其實惟其名其長不知所美其短不知所委
其先後矛盾復何怪哉雖然豈始於宋哉後漢東觀
大集群儒著述無主條章靡立由是伯度譏其不實
公理以爲可焚張蔡二子糾之於當代傅范兩家嗤

之於後葉其傳卒亦不廣唐中宗世史司取士每記
一事載一言皆閤筆相視含毫不斷義稟監脩辭從
指授由是劉知幾謂頭白可期汗青無日卒不能成
其書也原宋史一書其實類此蓋漢唐皆文人相聚
元則相參其形迹之拘忌義例之蒙昧豈特如
漢唐人所譏而已嗚呼元所壞者宋一代史猶之可
也而其法遂使嗣代襲用之今曰一代之史可以一
人成不以爲駭則以爲狂矣其貽害於中國禍於斯
文者可重爲慨也

虞雍國忠肅公守唐鄧欲取長安事

虞雍公允文既成采石之功朝廷付以襄漢上流重
任公知唐鄧勝勢可以牽制虜兵則隴右之師可以
平取長安章奏凡十餘上且曰朝廷必欲剽唐鄧以
和臣即挂冠而去是歲六月孝宗受禪盡棄陝西新
復州郡省符以公知夔州又割海泗唐鄧以和眉山
任燮曰諸葛孔明草廬中與昭烈論取天下先取荆
益待天下有變則一軍出隴右一軍出荆襄亦欲犄
角取雍爾其後關羽已失襄陽則孔明右臂已斷天

下形勢非復草廬中所料矣是故魏延嘗欲以奇兵取長安孔明不從蓋無特角故也天若祚漢關羽尚在襄陽孔明以大軍出隴右而許洛之間又有徙都之警則孔明可以端坐而得長安何至乘危徼幸用魏延之策哉自項中原有事采石成功天下勝勢孔明欲而不之得者一旦在我而以再從西人市和之詐失此機會可扼腕切齒矣慎按廣允文采石之戰陝西州郡盡復歸宋允文城唐鄧而西將蕭定遠以四千騎夜走汴矣唐鄧間士民爭持牛酒拜馬前邯鄲之民健武者聚義兵千餘人遮殺其歸卒以待宋師而宋師不至武遂遇害當時人心時勢如此若從允文之策恢復在指日矣何以言之岳武之世金國方興而元本幹離不皆善用兵取之亦不易海陵之主無道遇弑國又無將取之比武穆之勢極易而宋之君皆孱主位皆奸邪失此機會樓船載國胥沈於海非不幸也自取也 允文城唐鄧欲取長安事不見於史而見於任燮之文健武遺民之忠勇亦不見於史而見於施成大之北轅錄予特表之

宋主禮儒臣

宋之君崇禮儒臣過於漢唐正史之所遺者有二事其一真宗臨楊礪之喪降輦步吊重其清介也其二富弼母卒仁宗爲之罷春宴二事雖三代令主不過此也其後徽宗之待蔡京王黼南宋之待秦檜侂冑似道恩禮倍此然前之則如蕩子之交俠客後之則如弱主之畏豪奴豈曰榮遇美事乎

歎後

黃東發曰自知其必能相而相者古今一伊尹也自知其必不能相而不相者古今一鄭五也人皆曰必不能相已獨曰必能相者滔滔皆鄭五之眾人也嗚呼伊尹吾不得而見之矣得見鄭五斯可矣又曰蔡之初相獨驚恠而固辭其進甚明也唐末諸相率植黨與以持之蔡之既相獨致仕而速去其退甚明也進退如此不賢而能之乎又跡其平生守廬州而盜不入境留緡錢而盜不敢犯亦有過人者不謂之賢不可也

李華論文

李華曰文章本乎作者而哀樂繫乎時本乎作者六經之志也繫乎時樂文武而哀幽厲也有德之文信無德之文詐臯陶之歌史克之頌信也子朝之告宰嚭之詞詐也夫子之文章偃商傳焉偃商沒而伋軻作焉蓋六經之遺也屈平宋玉哀而傷廉而不遠六經之道通矣淪及後世力足者不能知之知之者力或不足則文義浸以微矣慎謂華之論文簡而盡韓退之與人論文諸書遠不及也特難為褊心俠見者道耳

古今文字繁簡

程去華云精一執中無俟皇極之煩言欽恤兩字何至呂刑之騰口蓋古今世變不同而文之繁簡因之孔子曰夏道未湮辭推而言之則殷周之辭已湮矣韓退之云周公而下其說長

辭尚簡要

書曰辭尚體要子曰辭達而已矣荀子曰亂世之微文章匿采揚子所云說鈴書肆正謂其無體要也吾觀在昔文弊於宋秦疏至萬餘言同列書生尚厭觀

之人主一日萬幾豈能閱之終乎其為當時行狀墓銘如將相諸碑皆數萬字朱子作張魏公沒行狀四萬字猶以為少流傳至今蓋無人能覽一過者繁冗故也元人脩宋史亦不能刪節如反賊李全一傳凡二卷六萬餘字雖覽之數過亦不知其首尾何說起沒何地宿學尚迷焉能曉童稚乎予與古今文章宋之歐蘇曾王皆有此病視韓柳遠不及矣韓柳視馬班又不及班馬比三傳又不及三傳比春秋又不及予讀左氏書趙朔趙同趙括事茫然如墮瞢瞶既書字又書名又書官似謎語誰兒童者讀春秋之經則如天閭日明矣然則古今文章春秋無以加矣公穀之明白其亞也左氏浮誇繁冗乃聖門之荆棘而後人實以為珍寶文弊之始也愛忘其醜可乎我太祖高皇帝科舉詔令舉子經義無過三百字不得浮詞異說百八十餘年遵之近時舉子之文冗贅至千有餘言者不根程朱妄自穿鑿破題謂之馬籠頭處處可用也又謂無單鎗鬼一跳而上也起語百餘言謂之壽星頭長而虛空也其中例用存乎存乎謂之謂

之此之謂此之謂有見乎無見乎名曰教命索不論與題合否篇篇相襲師以此授徒上以此取士不知何所抵止也可以爲世道長太息矣

梓碧山人

四明梓碧山人許奎作百思歲多率合衍贊予獨取其箴云圍棋制淝水之勝單騎入回紇之軍此宰相之雅量非將軍之輕身蓋安危未定勝負未決帳中倉皇則麾下氣懾正所以觀將相之事業浮海遇風色不變於張融亂兵掠射容不動於庾公蓋鯨鯢澎湃舟楫寄躬白刃蠶午節制誰從正所以試天下英雄噫可不思歟

環語

鳥集之交初離而後吐鳥巢之旅先笑而後號始龍卒蛭化荃變茅詩曰靡不有初鮮克有終材生於天不係乎地禹貢紀山川而不紀風俗風俗由乎上之教也紀物產而不紀人才人才由乎下之化也

平準書譏橫歛之臣也貨殖傳譏好貨之君也太史

公之旨千載之下有趙訪知之懿哉

爲文而欲一世之人好吾悲其爲文爲人而欲一世之人好吾悲其爲人幼清之格言吾黨之炯戒乎出則元亨處則利貞貞元者出處之則也默則立象語則成文文象者語默之檢也

道以罷寓人與天期故雷霆之聲可以鼓鐘寫風雨之變可以音律和

嚴挺之寧不作相不見李林甫崔隱甫寧不作相不見牛仙客

魏文侯匿誇書樂羊得成中山之勛魏襄王信史起鄴令得成漳水之功故洵洵之中不可不味也

于定國身爲九卿猶迎師執弟子禮韓信破趙功成禮降將而北面事之前漢風俗之厚近於三代矣以沈充爲父而有沈勁之子以許敬宗爲祖而有許遠之孫犧生犂胎龍寄蛇腹人能起宗非以宗起也

別周龍岡語

明 羅洪先

先宜人所生幸存者予與女兄二人女兄許聘龍岡周君已而以目青遂婚于我踰年而夭故予視龍岡猶女兄存也予年十有四未屬文龍岡時時爲語東泉師舉業法其後師事陽明王先生于贛又時時爲語學問正傳及冀閣齋篤志處予於是慨然有志聖賢之業父母憐愛不令出戶庭然每見龍岡未嘗不自憤憤也龍岡身多病二業不竟然其性行淳實一無改於相語之時予雖以二業冒虛名亦誠有感於

當時之語而年已垂老卒無所成白沙有云白頭不負垂髫志記得城南就館時同心之言一字一涕當垂髫時何意遂至白頭即頭白何意所期止此交游滿前誰復可告故每見龍岡又未嘗不自惻惻也龍岡長予六年今以大學生待次公車且三就矣當語我二業時其自視何若亦何意遂止于此昔不能改性行於久病豈以一命之寄受變流俗耶憶龍岡嘗自贛病歸附廬陵劉子吉舟別與陽明先生素厚善會母死往請墓志實以濠事暗相邀結不合而返至

舟顧龍岡呻吟昏瞶意其熟寢也呼其門人王備嘆曰初意專倚陽明兩日數調以言若不喻意更不得一肯綮不尚此船明矣此事遂已乎且吾安得以一身當重擔也儲拱手曰先生氣弱今天下大事屬先生先生安所退託陽明何足爲有無哉劉曰是故在我多得數人更好陽明曾經用兵爾儲曰先生以陽明爲才子乎吾見其怯也劉曰誠然贛州峒賊髡頭耳乃終日練兵苦對大敵何其張皇哉相與大笑而罷龍岡反舍語予若此己卯二月也其年六月濠反子吉與儲附之七月陽明先生以兵討賊八月俘濠是時議者紛然曰是附濠而資以爲利者也或曰與劉期而中變賣友也或曰擒濠者伍吉安而援爲功也予與龍岡竊嘆莫能辨比見詆先生者問之曰吾惡其言是而行非益其僞也龍岡舌尚在至京師見四方人士猶有爲前言者否乎益以語予者語之以解其惑且告之曰其及時自修聖賢之業乎無若予之垂老而徒惻惻焉也

敘廣右戰功

明 唐順之

紫江沈公自襲指揮使時未弱冠已能馳馬手搏賊賊憚之未幾調征永安嘗以數百人擣陳村寨賊牆立山上公一人拍馬而登賊却下山誘公入渚中馬陷以吻拄渚中而騰其足及於陸三首前趙渚刳公一酋鏢而左一酋刀而右夾馬一酋鼓弩十步外公振頸以過鏢而挑右足以該刀鏢離頸寸而退刃著於鏢鏢然斷鐵公射鏢者中缺項墮左挂弓而右掣刀砍刀首於鏢間斷其頸車折齒墮弩者怖失弩倭而手行上山公又射之中臂既連斃三首後騎至找其首公以二首讓後騎而囊斷頰者自為功餘賊糜而入箐追兵戰於箐中斬首若干級毒弩中公膊整軍而還驗功或以斷頰者非全首難之監軍吳布政怒曰賊豈伸頸而待斫乎命紀之以功連都指揮食事義寧賊寇臨桂掠而還巢公追之巢有兩隘賊伏兵丁嶺隘以伺使熟徭以其隘閉告而導公入丁嶺公策之斬所閉隘而果無兵守於路擒敗者數人以丁嶺之賊告連率以導巢而熟徭亦以公斬閉隘告

丁嶺之賊賊還趨巢大破之賊奔公獨逐一酋首騎而走崖窘釋騎跳而下澗澗深沒顛馬浮而岸毛盡濕束濕馬於樹緣澗而求首首洄而逃矚水中影射之血縷水上入水斬之後騎相屬至崖望見公提人頭立水中崖峻不可跳乃尋路從公則賊遁已遠公乘濕馬與諸騎追之猶斬數十級乃還荔蒲賊八千餘渡江而東寇謀者告公倉卒率五百人待於江岨駐白面寨去蛟龍滑石兩灘各數里謀者又告賊飽而歸將及江公以為滑石灘狹牽線而濟雖衆可薄也蛟龍灘濶成列而潛衆難圖矣吾欲奪其濶而致之狹令掣旗軍中無尺布伐岨竹揭竿而編篾以為綉刻項成數百旗揮之蛟龍灘令羸卒數十人守之燃柴烟以疑賊賊至果避蛟龍趨滑石公分兵兩岸而潛以小艦載勁卒數十伏葭葦中賊營於中洲以護濟濟且半公以艦乘瀧急衝之兩岨軍謀而前有酋騎而水立挺鏢當艦公舍艦跳水斬鏢酋人騎皆踣洲上賊辟易賊濟者西奔巢未濟者却東走上山而復潛趨蛟龍灘以濟洲賊孤艦軍攻洲兩岸軍始

至下水夾攻之洲賊後行擠墮淵溺死無算其前行
盡俘之得生口首級若干收賊所掠牛畜之在兩岨
者是後也以五百人破八千餘賊公用奇往往如是
復以功遷都司同知嘉靖六年岑猛叛聚兵數萬人
督府奏誅之一日督府召公計曰歸順岑璋猛婦翁
也助猛奈何公素能得土官陰事曰璋女失寵而璋
心恨猛徒親合耳公復密語督府云云如此可使璋
擒猛督府復曰猛乘上流之勢擁兵建瓴而下則豈
梧諸郡老矣奈何曰此不足憂土官大率飽富貴戀

巢穴所以叛者懼誅耳非有他志也猛離田州而子
女玉帛皆在彼或乘虛襲之猛安得不慮乎督府又
慮猛且走交趾曰猛走交趾則閉不能歸矣猛安得
不慮乎猛果如公所料而岑璋雅敬公公潛使人於
璋於是督府進兵分五哨入猛勁兵盡左工亮諸將
死讓無敢當者公自請將中哨當工亮去工亮五里
而軍進攻隘堅復退營五里而糧且盡湖兵五千
人請於公願得一飽而死敵公時僅有自齎家糧五
十石與湖兵人給之升而官軍縮腹張目以觀湖兵

分米不敢言公無以為計時左哨將與公隔江而軍
公潛濟江就左哨將乞糧而請並兵攻工亮左哨將
以分地拒公公笑而還曰兵糧吾自有之姑試公耳
左哨將慚公還軍乃夜分軍三百人緣山而右走間
道三百人緣江而左上山並繞出工亮背揮旗為號
賁餘糧為稀糜食而遣之黎明合戰賊殊死鬪我軍
却麾而進又却公親斬却者一人而提其頭以令軍
復麾而進先所遣間道卒皆已至登山揮旗初岑璋
既與公為約而遣兵二千人陽為助猛守工亮遣精
卒千人以護女為名居猛左右璋兵在陣後望見山
上旗大驚曰天兵得工亮矣潰而却猛軍見後陣却
亦置而却我軍乘之斬猛子邦彥於陣中蹂尸數里
遂入隘得其積粟軍始飽乘勝攻田州猛聞工亮破窘
急欲走交趾而璋卒五百人護猛妻以歸五百人獨
守猛指猛所欲走給之曰此路皆天兵也不如且走
歸順為後圖猛不得已從之璋待於境相見因相抱
哭璋以子女歌舞飲食恣猛團圞而潛遣其子報
公於田州公入田州五日而諸哨始至璋所使報猛

所在者事頗洩左哨將移軍壓歸順境索猛欲破敗公事自爲功璋以二十牛百甕酒犒軍而謂左哨將曰猛誠有之公無急也於是解猛而斬其首亟送督府斬他囚首貫猛屍而以與左哨將左哨將喜於得猛而抽軍獻猛首督府則猛首已梟一日矣猛死田州平安置猛子邦相於福建而議設流官公曰思恩設流官反側至今未愬田州復然兩賊且合從起矣督府不聽且調公守田州公請以他將假守三月而待希儀治裝他將守之一月而田州酋盧蘇果與思恩酋王受連兵劫城他將狼狽歸田州復爲賊巢公又言於督府曰兩酋能用其衆以復故主爲名今若返岑邦相於福建而置之南寧比奇貨也可使兩酋坐受縛矣督府復不聽而徵兵數十萬征之既而失利督府以罪罷新督府餘姚王公至其所以撫定兩酋公多與其謀因薦公右江叅將右江故治柳州柳在萬山中城外皆賊巢軍民至無地可田而室廬妻子數被焚劫知府劉璉殪於賊知府鄧鉉聞出城弩中其膊自是諸軍民官必甲而後敢出城城兵又疲不

足伏公爲叅將始議剿五都五都去城五六里而巢最險賊又最獷所虜獲人畜最富巢中不聞官兵者百餘年公乃以五百兵付百戶蔣紹宗使搆其巢賊蜂出累我兵殺數十人而隘其入路使不得逞我兵即賊巢爲營固守而因賊糧以爲食然氣奪不能戰賊又欲坐路之於是百戶潛遣人爰而告急於公公即上馬復聚兵得五百人入巢爲援既至聲銳者三因奮擊賊百戶兵聞銳聲亦出奮擊賊賊分兵爲二腹背戰我兵鼓譟斬級賊不支然尚橫鯁兩陣中守隘不肯散公使人爰而以勝告百戶百戶亦使人爰而以勝告公公因謂百戶曰汝且據巢毋出待賊服乃已不服更夾攻之可盡擒也賊素怯柳州兵最易與至是詞曰汝誰也敢入吾巢公使人給曰是新叅將老沈所率藤峽軍耳兩江賊熟老沈名而憚藤峽軍因咋舌曰吾固知柳州兵不及此相持數日賊不退然心懼因熟德爲解熟德者界漢人生徭徭間陽附官軍而陰附賊或官軍勢盛附官軍賊勢盛附賊以爲常於是熟德間說於公曰請爲兩家解開公度

賊尚勁乃且聽其說而謂熟雋曰返我生口牛馬我兵乃去賊以所虜生口二十牛馬百四十為獻賊收衆奔山頂而空隘以通百戶兵牽連行至城城中人惟始知柳州之能戰賊也公以為欲大破賊非狼兵不可右江狼兵惟那地最勁乃請於軍門以那地兵二千戍柳州柳之有戍狼兵自公始先是賊勢張甚而熟雋及城中黠吏民多為賊訶者賊耳目徧官府左右官府聞聞動色情性賊在谿尚千百里外輒知凡議大征或雕剿口語沓沓未及聚兵而手足盡露以是賊得陰為備或伏岩藪伺官兵殪之或先徙妻子畜聚於隣巢而自空巢以待官兵官兵至徒手無所得甚者我所任為鄉導往往為賊誤我入死地崩墜崖谷不戰而糜爛者過半而賊以耳目故益知官軍虛實與民積聚少多乘虛掠多所入無一當而所噬無不飽我兵築堡增戍則益紛然如刻穴守鼠而賊活脫不可踪跡公以為圖勝算莫如得賊情得賊情則莫如謀而使官府人為謀則賊生疑於是陰求得素與狼人商販者數十人假以買物召至府家謂

之曰吾素知若輩通雋吾不罪若更與若銀為販本若試為我訶賊衆感諾乃人給銀五兩使益買物散入諸崗中諸雋雖凶暴樂殺人然販者至則寨寨傳送護衛飲食恐損一販者則諸販不至是以難絕棧深箐販者無所不歷每有動靜販者輒先知奔走報公公厚賞販者而秘其事雖肘腋親近絕不得聞至期鳴號者三則諸兵皆聚第謂之曰今日出某門而遣心腹人為旗頭引諸軍貿貿行問旗頭旗頭不知曰然則汝何引我曰公強我往我漫往耳軍行千萬人其所往獨公與旗頭兩人知之而已頃之劄營設伏賊果至遇伏奔追殪之已而賊寇他所則公軍又已先在賊始驚以為神而我軍亦不知公自何得之也公始至柳令諸雋得出入賃買游戲城中無禁諸雋時入府見公公兒女撫之久之稍稍擇其巧便曉事者結以厚賞使訶賊後賊發其火伍中輒報公公又厚賞之而間謂諸雋曰若見我若妻子何不來見夫人諸雋叩頭不敢公曰試令其來已而雋婦五六人來夫人好言慰勞賞之針線包帕諸物以銀簪簪

其頭又命諸妾婢灌之以酒人數大碗察羣婦中其夫嘗以賊事報者則又因摘之他所勞苦之曰若夫為吾大人盡力良苦私賞之也怕銀簪諸物倍於人前所賞者而益以珍果美物塞其袖中又陰戒之勿令人知也諸淫婦既多得賞又酒醉踉蹌舞手出府門淫夫望見之歡喜爭前掖而歸果自是諸淫婦來者至數百人夫人傾筐篋針頭線尾皆盡猶不能給而淫婦相戒以勿令人知者淫婦又洩之以所獨得珍果美物誇諸淫婦以為夫人愛已諸淫婦皆快快心羨嫉其夫使報賊冀已入府得珍果美物而公間使人往諸巢中陰以夫人之命賜物諸淫婦自是賊中消息或諸淫婦不肯言則淫婦族之使言或諸淫婦不肯言者則諸淫婦自以使人至巢賜物時附耳語云云若勿向我老公語也公用兵風雨來去既得賊時率輕騎剿其尤劇者一二人兵至巢以管為絕統記刺賊家示諸軍所捕繩之內老弱婦女牛畜無一免者繩之外老弱婦女牛畜無一及者遂出巢數里遇平地度賊援所不至則停車審究其為劇賊家婦

女牛畜者收之其雖獲於劇賊家而係鄰家與鄰巢者還之諸淫婦得完室家與見還者皆喜以為往時官兵入巢見人輒殺或賊遁則搜斬不為賊者以充級故賊詈我輩我雖為賊時得脫或保拏汝輩雖不為賊時見我或拏實為擄自今我輩乃有顏面詈賊矣公入巢有助賊戰者既還軍遣熟淫婦之曰若奈何助賊戰吾剿若無赦項之擄其巢盡殲之自是凡所剿剿歷數百巢竟無一人敢助賊戰者雖剿所過他巢或刀弩而門閭既還軍則檄曰若奈何刀弩而門閭令罰若五牛不者且剿自是所歷百數巢竟無一人敢刀弩而門閭者所獲劇賊多不殺剗而目剗兩耳賞銀數兩而還之自是他賊有所擄掠多不遣兵而用剗目者騎而一人率以詣賊使彼所擄掠賊見之驚曰某巢某也震懾不敢隱盡還所擄掠而剗目者索不已賊至出自所有與之公以給被擄者而以其餘給剗目者剗目者每一入巢則利益多而為賊者所獲每不補所償則益無利在柘州所剗目七人其六人皆為官用其還巢而復為賊者單萬星一人而

已公竟以計擒殺之公始議發兵故制欲發兵必請督府督府檄下乃發公以為吾治文書吾據史知之文書上府府檄下我府據史知之多人知則洩又柳去督府千里待報踰時坐失機會而書檄往來水陸諸巢絡繹能保不為賊得於是凡率兵入巢未嘗先請既勝則上首庸督府而以邂逅追賊至巢為解於是督府不能以文法詰而兵謀得無洩公嘗欲剿一巢而恐其洩也乃佯病所部入問病公曰吾病想鳥獸肉若輩能從我獵乎因起出獵去賊二里而止營軍中始知其非獵也公耳目多賊不能數率走之他巢他巢嚇之則又走跡血瘞以死或餒稿崖谷又每以甚雨凄凍風真之夜察賊所止宿處四散遣人齎火銃以筒貯火衣毯衣毳帽與草同色潛至賊所夜聲銃者三賊盡驚老沈至矣挈妻子裸而蒲伏上山頂兒啼女哢往往寒凍死或觸崖石死不者且為虎咬諸妻子更相嗟怨汝為賊之利至此黎明下山詢之則寂無人陰使其黨至城訶之時公所遣衣毯者四散諸巢同夜舉銃明日諸巢所使為訶者亦同會

於城旁西巢人謂東巢人曰老沈昨夜來吾巢東巢人謂西巢人曰老沈昨夜來吾巢則固已更相怪駭已而訶之城中人則老沈固安坐城中不出也蓋怪駭曰昨聲銃者誰耶鬼耶諸猺又自相嚇曰虎咬人者老沈所使也自此賊益膽落或易面為好猺獐而柳城四旁一童子牽牛行深山數百里無敢訶者其軍民往往寄牛於猺家以耕或索雞酒於猺獐不敢不與公在柳先後十三年名賊宿滑幾盡而韋扶諫者馬平四都猺賊弩中知府聘者也克猾甚先是嘗七捕之不能得至公亦七捕之不能得會有報扶諫逃隣巢三層巢者公潛率兵剿之至巢則扶諫又已與三層賊往刦他所而三層賊妻子獨在公盡俘以歸計七十餘人平時公所俘賊妻子盡以與狼兵為賞至是獨不與而閉之空室中善飲食之公又陰使狼兵數百人怒而挺刀猺獐入室恐諸婦女作欲槍狀公佯執鞭痛鞭狼兵使退如是者三欲以深德諸婦女而潛使諸猺聞之以繫其心公又使熟猺謂諸猺之亡妻者曰吾不害汝但得韋扶諫則還汝妻子

矣諸徭四五人來投公公令入室視其妻夫妻相持哭其小子牽其父哭妻曰非沈公吾爲狼兵殺且捨久矣已而怨相詈曰咄扶諫非汝爹非汝娘何不縛以贖我諸徭心割而別復見公公曰欲得扶諫耳諸徭曰扶諫已逝他巢圖之實難雖然願公切勿以吾妻子與狼兵也吾且爲公緩圖之公曰諾因殺牛犒諸徭而去之諸徭踪跡扶諫所在遂往以言惱扶諫曰還我妻子扶諫不應諸徭因曰我輩失妻子計窮惟有更隨汝作賊耳扶諫喜諸徭乃詭相與計曰今官府擄吾妻子而穿山驛與守堡百戶與巡司俱在山中今往劫之三印可必得也官府懼失三印得重罪以易吾妻子可必得也扶諫曰善扶諫既離巢則黨益孤諸徭因醉扶諫與其黨而縛之置巖洞中而使熟徭報公曰得扶諫矣恐見賣可遣吾妻子於三十里外相易公以爲吾不遣諸徭且謂吾怯於是鎖徭妻亦挾之以行至三十里使熟徭諭諸徭曰諸徭且叔妻子者先殺妻子然後戰諸徭請於公曰吾獻扶諫懼懼公可遣三十人至巖洞自取之公慮諸徭

有變乃選健卒十五人賞而遣之曰得扶諫吾且賞汝若諸徭殺汝者吾且重賞汝家又以十五人付之熟徭而質熟徭妻子曰十五人者損一人汝妻子盡移矣至巖洞中果得扶諫而出諸徭閉之五里外懼扶諫往而妻子不至復要公曰必相易於此公又曰吾不往諸徭且謂吾怯於是先遣諸徭中妻女四五人往言亦挾諸婦女狀諸徭吐舌懼殺妻子帖息不敢動遂易扶諫以歸刺扶諫目截耳剔心手足斬之而四懸諸城門諸徭出入城者見之無不股慄諸徭既熟公威信公嘗調一巢往征他巢雖懼讐然不敢不往牛畜盡俘以歸獨首虜生口視狼為少耳公亦盡以所俘牛畜賞諸徭其後復調而與之期會天大雨諸徭懼失莽乘雨洄溪水沒者六人公勞苦之命沒者人三牛付其家其餘皆遣還之自廣西爲山雲惟能使徭人不作賊至公能使徭攻徭則廣西所未有也十六年而有思恩岑金之變初思恩府土官岑濬被誅而立流官以其首二人徐五韋貴爲土巡檢分掌其兵各萬餘人而聽於流官然裔民

獷悍不樂漢法數十年間凡數叛則數舉兵誅之而亦不能定也當破岑濬時調兵鎮安鎮安掠思恩生口以歸已而其中一人長大而姣因託言岑濬子而名之曰金夷民益思亂鎮安乃潛召其酋長出金而與之盟曰汝小主也諸酋感泣擁金以歸鎮安因要之曰金立與我某地幾百里遂盟金而遣之諸酋聚兵五千人以奉金將攻城郭復故地諸酋多欲為響應者勢洶洶而先時濬既誅其酋楊智者無所歸乃率其黨千餘人詣賓州應募為打手賓州兵素弱故倚打手至是留欲往授金以遲時公與兵備皆在賓州留入言於公曰留小主人在請往公方慮岑金之危思恩未暇慮留之在肘腋也聞留言獨心駭以為金去賓州數百里而留應之表裡相扇賓州危矣賓州危則咽喉哽咽哽則廣右盡騷而何有於思恩此事大不可急圖宜以計款之乃婉色好語謂留曰汝弟往我曩征田州調兵鎮安時已聞有岑金在是岑濬第九子也留聞言固已刺心公因叩留曰聞鎮安繫金甚堅何因出乎留詭曰百計逃耳公低聲作

自語狀曰岑氏其復乎欲以深動留而呼留至密所曰為我一言語金若欲官必毋殺人刳城若欲殺人刳城任汝自為之金能聽我言可以狀訴我及諸上司留唯唯公遂與留銀十兩以花紵方褶之納留懷中為我寄金得官後為衣衣之可常念我也公復給留曰金欲官非賂我萬金不可留曰金誠當盡力然金方倥偬安能辦此公笑曰吾豈遽責金耶且欲得一帖為信耳自是益信公無他腸矣留出公又呼還謂之曰我幾忘之章貴徐五素仇汝亦仇金可善備之無墮彼計也留詣金且如公言金大喜真謂倚公可得官矣因率其五千人詣賓見公至城門門者懼而報公請無內金公怒罵曰金非賊柰何不內現者以告金心益安率其眾散入城而與留及親信二十人皆裹甲見公公曰金來乎留曰來矣金叩頭潛以萬金帖子奉公公復曰若窮鬼安得此乎金曰賴公力得官不窮矣賴公力誠不敢忘報公子孫公戲曰汝土官多不知恩汝得官且忘我矣況子孫乎金唯唯不敢公乃令其姪出見金曰金汝兄弟也金得

官他日每一出征乞金四功與汝公復爲金計曰汝
賂我兵備公獨無賂金對不敢公曰第寫帖子吾爲
汝致公以兩帖子示兵備笑而火之於是遣金詣兵備
始金叛而督且往兵備甚懼公潛與兵備計此事大
禍巨測公商情未熟一語蹉跌敗矣不若一以聽我
兵備唯唯及見金但言吾視金有福相以微動之且
曰此事一聽沈公明日公詣金營犒之五牛酒五十
尊又明日兵備犒之如公公復召督金謂曰倘兵馬
殺金是吾殺金倘暗箭刺客殺金是責五殺金非關
我事今一以付督可無贖金也督乃日夜甲而擁金
爲備公復遣其姪至金營與金同飲食卧起金自是
心死於公矣公欲縛金而憚其衆時巡按在南寧將
誘金至南寧乃縛之乃請兵備先往密語巡按以故
公謂金曰吾挈汝訴巡公吾代汝詞公爲金作訴稿
塗抹四五次以示忠於金復謂金曰吾與汝往南寧
倘貴五伏人於路暗箭射汝不若易汝土官裝衣青
衣雜掾史中而先我馬令五千人後行金如公言路
中飲食公與金同席語金曰貴五以重賂賂吾庖使

毒汝則奈何自今以後吾所食汝亦食吾所不食汝
亦勿食可也金如公言而益以公爲愛已行七十里
至思龍驛公晨起耳語金曰今往南寧南寧人皆言
汝叛聲甚惡以五千人往則人益疑汝不若散遣三
千人而選心腹從卒二千人以往是汝不撒衛而坐息
人言也金以爲然選二千人往復行一日去南寧百
里公謂金曰汝至南寧久候而諸從人衣糧懼不給
不若以千人營於此而以千人從爲便金亦以爲然
從金至南寧者緣千人金入見巡按巡按好語慰之
曰吾爲汝奏明日巡按遣人至金營犒其衆而督金
以待奏居五六日公度金衆衣糧且盡復謂金曰思
恩去南寧近耳何不遣其半取衣糧而坐待糧盡衆
且散矣金復遣其半衆行金所遣千人營百里外者
久之亦以衣糧乏稍稍散去而獨五百人尚散處城
中公欲縛金而又以爲五百人者迫死而狼鬬則殺
傷幾何更欲爲計而金所遣取衣糧者適至則從金
者又千人矣公知金未可動間請於巡按公且往南
寧而以金從可于路圖金也至思龍驛忽報韋徐將

萬人在陽以迎巡按而陰襲金金驚而跳公與兵備巡按聞之曰禍矣公謂巡按且陽爲不知而聽希儀徐圖之公出呼韋徐罵曰汝安得擅兵至此金得官與不得官唯朝廷所命汝安得私讐之是時金尚駐近地覘伺而韋徐部中亦有爲金耳目者金聞公言復還公行三十里金道伏候公公曰岑金耶汝尚不知死貴五兵至矣可疾入賓州匿吾叅將府則貴五無如汝何矣金馳馬入賓州公復於巡按曰金入賓州矣巡按兵備至是始有面色自金往南寧返賓州飲食起居無不隨公居數日韋徐復私公曰請甘心於金公又怒罵韋徐亦莫測公計所出也公密請於巡按散遣貴五衆而後圖金然是時金衆尚千餘人與楊督所統殺手千人皆在賓州内外公與兵備計公可遣楊督殺手百人護巡按往柳州公間謂金曰楊督殺手百人護巡按往柳州矣汝盍將百人護送四五十里以自結乎至五十里金欲返公又拉之行百餘里金又欲返公曰汝獨返勢弱倘貴五伏人待汝奈何今去柳且近汝何不與督偕至柳而偕還金

遂以百人至柳其酋長十餘人皆金死黨驍健會金於路躍馬而墜公以機責其酋五六人曰何不護金而令至此痛扶之五六人皆病創卧然尚以公愛金故被扶不敢恚公金至柳入叅將府公命夫人見金曰金我兒子也金得官聽調往來貴顯吾縱不在汝必見之金益喜置酒勞金與其酋是時諸大酋其五六人既病扶卧獨四五人從金而督所部打手百人與金兵百人皆營於城外柳城故有狼兵二百人足以虞變公將縛金先以狼兵三千人護巡按三百人護兵備而以三百人入叅將府待事謀既定因酒中戲謂金曰痴兒子汝往時懼誅又懼貴五逼意常不樂今無事矣何不痛飲金與諸酋皆盡飲至醉其夜遣狼兵縛之黎明遣人召督於城外狼兵夾墀左右立督與其黨三十人見公公大言曰非楊督忠不能成我事以銀十兩勞督取紅紵挂督督愕然公曰汝爲之而汝不知乎金國賊也非汝與吾同心誘金至此吾安得縛之督大駭泣下曰督少主人也公曰汝爲之而欲誑衆乎公意又欲以疑督於其黨也督

懼不能言其黨三十人皆股慄公且曰吾且為留奏功矣因見留於巡按巡按勞賞之如公見兵備兵備勞賞之如公勞城外二百人牛酒而令留率之還賓州遂令留齎牌散遣金衆之在賓州者曰所誅止金一人留既惶恐見給又虞同行者猜以賣金相讐見殺於路中日夜跼蹐為備奔歸頃之遂發病死金兵聞金縛皆散去公乃以金與其首之病扶者辭而縛者解巡按府而撲殺之恩恩復安當是時使公不先竅留則金必不至而且攻城殺人使公在南寧賓州縛金則困獸之聞何所不噬使公聽韋徐甘心於金則兩客相閱而主受其讐惟公緩之又緩以漸脫金於五千人之手若剥笋然待其為一夫而後縛之人以是益多公之算而韋徐諸土酋亦益謂公不可測也公見督府於梧時鹽船八十餘阻峽賊不能前左江孫叅將千人送之不能督府以命公先時公泝峽峽中大酋侯公丁嘗謁公公寄六羊令公丁牧養至是遣人取羊於公丁公丁奉羊至潯公命諸鹽船牛酒攜公丁與其從人謂公丁護船上峽公丁身居公

舟尾命其黨乘小舟護船囑曰吾以身質於沈公護不謹吾碑矣公因命班首一人與公丁從人護船至武宣未返時孫叅將與左江兵備聞公丁在公舟欲乘間捕之而密言於公公曰此斷不可人信我而我詐之不祥招而縛之不武且護一人而疑諸將焉用之此斷不可公居常有所徵台雖其深谿絕崗未嘗不來其來雖桀猾宿惡未嘗輒殺其可諭者諭之其不悛者必遣還巢而後捕之故公以此語兩人兩人猶豫未決公乃摘公丁告之故曰可亟歸矣公丁大感泣去而公所遣班首護鹽船上峽者亦至不失升斗公以報督府督府笑曰孫叅將千人乃不如沈叅將一班首十八年七山之役奪叅將於虎口功尤奇公膽勇機警善撫士其私財與所得俸祿賞賜半以給諸人為耳目者其出兵多齎私財以行有先登與斬首者就陳給賞不失頃刻故人爭盡死力公嘗笑曰人以貲財積賄賂而博官吾以貲財積首級而博官豈為非計哉其征陳村時染危疾所部皆自戕於神前以禱公刀穿手矛刺股鉤刺脊繫鐵鎖我之

痛毒諸體皆徧最後至者一人無所施乃箭貫喉為
禱其得士心如此蓋余宦游而得當時名將數人北
則馬永梁震西則何卿南則公震與卿余未之識而
識公與永永魁瓌長貌而氣特沈毅見人頰首下視
寡言笑公短而精悍目炯炯燭人議論磊落激發皆
所謂偉男子也公與余稍談及廣西事余是以得撰
次之公戰功尚多余不盡聞也公謂余言當時固多
將患在牽掣觀觀不能展噫嘻若公者猶為未盡
其用哉

婚範

明 侯一元

易曰正其本萬事理楊湯止沸不如絕薪諒哉是言
余生長於斯觀國之故男女之際何其詳也大都重
女而論財有女者往往懸高價於人人趨之或捐恒
產與諍辭絕行葦之恩而不顧子哲子南之事歲歲
有之及女笄則主人迺始病矣於是乎傾家以奉其
女良其袂庀其具費數十百于男男前有委禽之厚
因心計其生息視之固然不德也而女據所有則以
驕男或先富後貧細其厚幣而盡其裝則違言生而
夫婦之道始苦矣且禮親迎以重女今重女者親迎
非幸也女至則坐車門外為之揖已迺設帷帳坐女
上坐而下為之拜余五六歲時習見之今稍衰矣拜
交而女左揖尚如故也此不知其所由來矣夫浙固古
東甌於越勾吳之地也不及被周公之禮而漸於商
以然哉其尤果敢而殘賊者女生往往不舉婦人已
免身視之女也即水之苦漬草菅然恬弗怪也今人
有雞犬溺則惜之而溺其女曾不少惜千金之家所
舉女及二三以為多矣夫以其重女若彼求之奉之

其厚若此而不免殺之不得與雞狗為等此有由然故諺有之曰盜不過五女之門以其空人之財此哀痛之言也故女有不舉則女愈少女愈少則求愈艱幣愈厚幣愈厚則奉之亦益厚奉女愈盛厚則愈不舉女因襲以然其無足異間者良有司患之誨諭紛若牖其天性憲殺子之令使相叔司以為德復三女之家不事以為勸然皆當身則行事已復然莫可柰何至迺禁其器服聽人篡取行一切之法而猶弗能革也余每感朱簋之紛奢思示儉於豆肩劇山林之

厚藏懷矯枉於引囊慨然喟曰夫以女為市無異賣僮烏孫之嫁不劇於此矣質人之女責其貨賄緣本規息負販之行不汙於此矣庸奴其夫傲其尊章則反脣相稽之俗不惡於是矣賊虐天性擠之溝壑則豺狼之戾不是酷矣執柯伐柯其則不遠出爾反爾即彼我何利焉甚矣哉俗之溺也余不敢以告人爰著令令子若孫焉令曰蓋黃帝始制男女之禮而大備於成周經禮述焉昏事女盛服衣元而元纁其首飾髮也無金玉文繡之飾媵以女姪女弟而無僮奴

原缺

古文輯略

無卷數 湖北巡撫採進本

國朝曹本榮編本榮有奏議稽詢已著錄是書文以體分各體前俱引文體明辨一條大概因是書而廣之然所分子目冗瑣特甚舛誤尤多漢文帝賢良文學策問武帝賢良策問之類亦往往一文而兩載皆失詳檢鐵券文類止載唐德宗賜王武俊一篇諭祭文類止載隋文帝祭薛濬一篇之類亦殊挂漏至每篇刪削尤不免失其本來